

Holy Bible

Aionian Edition®

भटियाली नोआ नियम
Bhattiyali Bible

AionianBible.org
The world's first Holy Bible untranslation
100% free to copy and print
also known as " The Purple Bible "

Holy Bible Aionian Edition ®

भटियाली नोआ नियम

Bhattiyali Bible

CC Attribution ShareAlike 4.0, 2018-2024

Source text: eBible.org

Source version: 7/12/2024

Source copyright: CC Attribution ShareAlike 4.0

The Love Fellowship, 2022

Formatted by Speedata Publisher 4.19.18 (Pro) on 7/19/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

भटियाली at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

भटियाली at AionianBible.org/History

04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 135 languages.
05/01/24 - 371 translations now available in 151 languages.

Table of Contents

NEW TESTAMENT

मत्ती	11
मरकुस	76
लूका	122
यूहन्ना	191
प्रेरितां दे कम्म	243
रोमियो	313
1 कुरिन्थियो	345
2 कुरिन्थियो	380
गलातियो	400
इफिसियो	412
फिलिप्पियो	423
कुलुस्सियो	430
1 थिस्सलुनीकियो	437
2 थिस्सलुनीकियो	444
1 तीमुथियुस	448
2 तीमुथियुस	457
तीतुस	464
फिलेमोन	469
इब्रानिया	471
याकूब	496
1 पतरस	504
2 पतरस	515
1 यूहन्ना	522
2 यूहन्ना	530
3 यूहन्ना	532
यहूदा	534
प्रकाशितवाक्य	538

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



ताल् यीशुऐ बोलया, “हे पिता, इना जो माफ कर, क्योंकि ऐ जाणदे नी न की ऐ क्या करा दे न?”
कने उना पर्चियां पाई करी उदे कपडे बंडी ले।
लूका 23:34

मत्ती

1 ऐ यीशु मसीह दे पूर्वजां दे ना दी सूची है, सै राजा दाऊद दा बंशज था, जड़ा अब्राहम दा बंशज था। **2** अब्राहम ला इसहाक पैदा होया, इसहाक ला याकूब पैदा होया, कने याकूब ला यहूदा कने उदे भाई पैदा होये। **3** यहूदा कने तामार ला पेरस कने जेरह पैदा होया, कने पेरस ला हिस्त्रोन पैदा होया, कने हिस्त्रोने ला एराम पैदा होया। **4** एराम ला अम्मीनादाब पैदा होया, कने अम्मीनादाब ला नहशोन, कने नहशोन ला सलमोन पैदा होया। **5** सलमोन कने राहब ला बोअज पैदा होया, कने बोअज कने स्त ला ओबेद पैदा होया, कने ओबेद ला यिशै पैदा होया। **6** कने यिशै ला दाऊद राजा पैदा होया। कने दाऊदे ला सुलैमान, सै उसा जनानिया ला पैदा होया जड़ी पेहले ऊरिय्याह दी घरे बाली थी। **7** सुलैमान ला रहबाम पैदा होया, कने रहबाम ला अबिय्याह पैदा होया, कने अबिय्याह ला आसा पैदा होया। **8** आसा ला यहोशाफात पैदा होया, कने यहोशाफात ला योराम पैदा होया, कने योराम ला उज्जियाह पैदा होया। **9** उज्जियाह ला योताम पैदा होया, योताम ला आहाज पैदा होया, कने आहाज ला हिजकिय्याह पैदा होया। **10** हिजकिय्याह ला मनश्शे पैदा होया, मनश्शे ला आमोन पैदा होया, कने आमोने ला योशिय्याह पैदा होया। **11** योशिय्याह ला यकुन्याह, कने उदे भाई पैदा होये। यकुन्याह कने उदे भाई इस्राएलियां जो कैदी बणाई करी बाबेल देशे जो लेई जाणे ला पेहले पैदा होये थे। **12** कैदी होईकरी बाबेल पुजाणे बाद यकुन्याहे ला शालतियल पैदा होया, कने शालतियल ला जरूबबेल पैदा होया। **13** जरूबबेल ला अबीहूद पैदा होया, अबीहूद ला एलयाकीम पैदा होया, एलयाकीम ला अजोर पैदा होया। **14** अजोर ला सादोक पैदा होया, सादोके ला अखीम पैदा होया, कने अखीम ला एलीहूद पैदा होया। **15** एलीहूद ला एलीआजार पैदा होया, एलीआजार ला मत्तान पैदा होया, कने मत्ताने ला याकूब पैदा होया। **16** याकूब ला यूसुफ पैदा होया, जड़ा मरियमा दा घरेबाला था, कने मरियम ला यीशु पैदा होया जिसयो मसीह बोलदे न। **17** अब्राहम ला लेईकरी दाऊदे दीकर सारियां चौदा पीढ़ियां होईयां, राजा दाऊदे ला बेबीलोन जो कैदी बणाई करी पुजाणे दीकर चौदा पीढ़ियां, कने कैदी बणी करी बाबेल पुजाणे दे बकते ला लेईकरी मसीह दीकर चौदा पीढ़ियां होईयां। **18** यीशु मसीह दा जन्म होणे ला पेहले इयां होया, कि जालू उदी माता मरियम दी मंगणी यूसुफे सोगी होई गेई, तां उना दा बियाह होणे ला पेहले ही सै पबित्र आत्मा दिया

शक्तिया ला गर्भवती होईं गेईं। 19 उसा दा होणेबाला घरेबाला यूसुफ बडा ही धर्मी था, कने उसा जो बदनाम नी करणा चांदा था, इस तांई उनी उसा जो डोल करी छडी देणे दे बारे च मने च सोचया। 20 जालू सै इना गल्लां दे बारे च सोचा दा था, तालू प्रभु दे स्वर्गदूते उदे सुपने च आई करी बोलया, “हे यूसुफ! राजा दाऊदे दे बंशज, तू मरियम जो अपणी घरे बाली बणाणे ला मत डर क्योंकि जडा उसा दे पेटे च है, सै पबित्र आत्मा दिया शक्तिया ने है। 21 कने उना इक जागत जमणा है, कने तू उदा ना यीशु रखयां, क्योंकि उनी अपने लोकां जो उना दे पापां ला छुटकारा देणा है।” 22 ऐ सारा कुछ इस तांई होया कि जडा बचन परमेश्वरे दा संदेश देणेबाले यशायाह बोलया था, सै पूरा होऐ, 23 “दिख, इकी कुआरिया गर्भवती होणा कने उना इक जागत जमणा है, कने उदा ना इममानुएल रखणा है,” जिसदा मतलब ऐ है, की परमेश्वर साडे सोगी है। 24 तालू यूसुफ निद्रा ला उठया, कने जियां स्वर्गदूते उसयो बोलया था, उनी मरियम ने बियाह किता, कने उसा जो अपने घरे लेई आया। 25 जालू दीकर उना पुत्र नी जमया तालू दीकर उनी उसा ने कोई वैवाहिक संबंध नी रखया: कने यूसुफे उदा ना यीशु रखया।

2 जालू राजा हेरोदेस यहूदिया प्रदेश च शासन करा दा था, तालू यीशु दा जन्म उस प्रदेश दे बैतलहम शहरे च होया। तालू तारयां दा ज्ञान रखणेबाले केई ज्योतिषी पूर्व दिशा ला यरूशलेम शहरे च आई करी पूछणा लग्गे, 2 “कि सै बच्चा कुथु है? जडा यहूदियां दा राजा बणने तांई पैदा होया है। क्योंकि असां पूर्व दिशा च उदे जन्म दे बारे च दसणे बाला तारा दिखया है, कने उसयो नमस्ते करणा आयो न।” 3 हेरोदेस राजा यहूदियां दे राजे दे जन्म दे बारे च सुणीकरी डरी गया। कने मते सारे यरूशलेम शहर दे बासी भी डरी गे। 4 कने तालू उनी लोकां दे सारे बड़े याजकां कने व्यवस्था जो सिखाणे बालयां जो सदया कने उना ला पुछया, कि मसीह दा जन्म कुथु होणा है? 5 उना राजा हेरोदेस जो बोलया, कि मसीह दा जन्म यहूदिया प्रदेश दे बैतलहम शहरे च होणा है। क्योंकि परमेश्वरे दा संदेश देणेबालयां इयां ही लिखया है: 6 “हे यहूदिया प्रदेश दे बैतलहम शहरे दे लोको, तू कुसी भी तरीके ला यहूदा दे अधिकारियां चे सबते छोटा नी है; क्योंकि तिजो चे इक माणु निकलना है, जिनी मेरी प्रजा इस्राएले दी रखबाली करणी है।” 7 तालू राजा हेरोदेसे ज्योतिषियां जो डोल करी सदीकरी उना ला पुछया, कि तारा कुस बेले दिखया था, क्योंकि राजा उस बच्चे दी उम्र जाणना चांदा था। 8 कने उनी उना

जो ऐ बोली करी बैतलहम शेहर च भेजया, “जा” कने उस बच्चे दे बारे च ठीक ढंगे ने पता करा, कने जालू सै मिली जांगा तां मिंजो खबर भेजनयो ताकि मै भी उसयो नमस्ते करे। 9 सै राजे दी गल्ल सुणीकरी चली गे, कने जड़ा तारा उना पूर्व दिशा च दिखया था, सै तारा उना दे अगगे-अगगे चलया, कने उस घरे उपर स्की गया, जिथू सै बच्चा था। 10 कने सै उस तारे जो दिखीकरी बड़े खुश होये। 11 कने उस घरे जाई करी उस बच्चे जो कने उदिया माता मरियम जो सोगी दिखया, कने झुकी करी बच्चे जो नमस्ते किता, कने अपणा-अपणा थैला खोली करी उसयो सोना, कने लोबान, कने गंधरस दी भेंट चढ़ाई। 12 कने उना जो सुपने च परमेश्वरे ला चेतावनी मिल्ली कि राजा हेरोदेस बाल मुडी करी मत जांदे, कने ज्योतिषियां हेरोदेस जो खबर नी दिती कने होर रस्ते ला होईकरी अपणे देशे जो चली गे। 13 उना दे जाणे बाद दिखा, प्रभु दे इकी स्वर्गदूते यूसुफे दे सुपने च आई करी बोलया, “उठ! कने उस बच्चे जो कने उदिया माता जो लेईकरी मिस्र देशे जो चली जा; कने जालू दिकर मै तिजो नी बोलगा तालू दीकर ओथु ही रियां, क्योंकि राजा हेरोदेस इस बच्चे जो तोपा दा है, ताकि उसयो मारी दे।” 14 कने सै तालू ही राती उठी करी बच्चे जो कने उदिया माता जो लेईकरी मिस्र देशे जो चली गया। 15 कने राजा हेरोदेस दे मरणे दीकर सै ओथु ही रिया। इस ताई कि सै बचन पूरा हो जड़ा परमेश्वरे दा संदेश देणेबाले होशे बड़ा पहले बोलया था: “कि मै अपणे पुत्रे जो मिस्र देश ला सदया।” 16 जालू हेरोदेस जो पता लग्गा कि ज्योतिषियां मिंजो धोखा दिता है। तालू उसयो बड़ा गुस्सा आया, कने उनी सिपाईयां जो भेजी करी ज्योतिषियां दे ठीक-ठीक दसयो बकते दे मुताविक बैतलहम शेहरे च कने उस दे अखे-बखे दे सारे बचयां जो जड़े दो सालां दे या उसला भी लोके थे, सै सारे मारवाई दिते। 17 तालू जड़ा बचन परमेश्वरे दा संदेश देणेबाले यिर्मयाह दे जरिये बोलया गया था, सै पूरा होई गया 18 “रामाह शेहर च लोकां जो कुसकी दी बड़े जोरे ला रोणे दी अबाज सुणोया दी थी, राहेल अपणे बचयां ताई रोआ दी थी; कने चुप नी होणा चांहदी थी, क्योंकि सै हुण मरी गियो थे।” 19 यूसुफ मरियम कने बच्चा यीशु हल्ले दीकर मिस्र देशे च ही थे। राजा हेरोदेस दे मरणे बाद तां प्रभु दे स्वर्गदूते यूसुफे दे सुपने च आई करी बोलया, 20 “उठ, कने बच्चे कने उदिया माता मरियम जो लेईकरी इस्राएल देशे जो चली जा, क्योंकि राजा हेरोदेस कने सै लोक जड़े बच्चे जो मारणा चांदे थे, सै सब मरी गियो न।” 21 सै उठया, कने

बच्चे कने उदिया माता जो लेईकरी मिस्र देशे ला इस्राएल देशे जो बापिस आई गिया। 22 पर जालू यूसुफे ऐ सुणया कि अरखिलाउस अपने पिता राजा हेरोदेस दिया जगा पर यहूदिया प्रदेश च राज करा दा है, तां सै ओथु जाणे ला डरया, कने उसयो परमेश्वरे सुपने च चेतावनी दिती, कने सै गलील प्रदेशे जो चली गिया। 23 कने यूसुफ नासरत नाए दे इक गाए च जाई बसया, ताकि सै बचन पूरा हो, जड़ा परमेश्वरे दा संदेश देणेबालयां यीशु दे बारे च बोलया था: “कि यीशु मसीह जड़ा नासरत ला है कने इसी नाए ने जाणया जाणा।”

3 उना दिना च यूहन्ना बपतिस्मा देणेबाला यहूदिया प्रदेश दी इक सुनसान जगा च आई करी ये प्रचार करदा था कि: 2 अपने पापां जो मनी लिया कने गलत कम्मा जो छडी दिया, क्योंकि स्वर्गे दा राज्य नेडे ओआ दा है। 3 ऐ सै ही है, जिदी चर्चा परमेश्वरे दा संदेश देणेबाले यशायाह किती थी, “सुनसान जगा ला इक हक्का पाणे बाले दी अबाज सुणाआ दी है, परमेश्वरे ओणे ताई, अपने आपे जो तैयार करा, कने अपने मने दी सोच समझा जो खरा रखा, उनी ओणा है।” 4 यूहन्ना ऊंटे दे बालां दे बणयो कपडे पांदा था, कने अपने लके च चमड़े दा पटा बनदा था, कने टिट्टे कने मखिर खांदा था। 5 तालू यरूशलेम शहरे दे कने सारे यहूदिया प्रदेशे दे, कने यरदन खड़ा दे अखे-बखे दे सारे इलाके दे लोक उदे बाल आये। 6 कने उना लोकां अपने पापां जो मनया, कने यूहन्ना उना सारयां जो यरदन खड़ा च बपतिस्मा दिता। 7 कने जालू उनी मते फरीसियां कने सदूकियां जो बपतिस्मा लेणे ताई अपने बाल ओदा दिखया, तां उनी उना जो बोलया, तुसां लोक जहरीले सांपा सांई बुरे न, तुहाडा ऐ सोचणा गलत है, कि सिर्फ तुसां बपतिस्मा लेणे ने अपने पापां दी सजा ला बची जाणा जड़ी परमेश्वरे तुसां जो देणी है। 8 इस ताई अपने पापां जो मनी करी बुरे कम्मा जो छडी करी अपने पश्चाताप जो साबित करा। 9 कने अपने-अपने मना च ऐ मत सोचा, कि साडा पिता अब्राहम है; क्योंकि मैं तुहांजो बोला दा है, कि परमेश्वर इना पथरां ला भी अब्राहमे ताई ओलाद पैदा करी सकदा है। 10 कने हुण कुहाडी सूखां दिया जड़ा च रखियो है, इस ताई की जड़ा-जड़ा सूख खरा फल नी दिगा, सै बढी करी अग्गी च फूकी देणा है। 11 “तुसां पापां दा पश्चाताप करिके मन बदला, इस ताई मैं तुहांजो पाणिये ने बपतिस्मा दिन्दा है, पर जड़ा मेरे बाद ओणे बाला है, सै मिंजो ला भी शक्तिशाली है; मैं तां उदे जुते चुकणे जोगा भी नी है, उनी तुहांजो पबित्र आत्मा कने अग्गी ने बपतिस्मा देणा है। 12 उदा सूप उदे हथे च है,

कने उनी अपणी कणक गांणे बाली जगा ढंगे ने साफ करणी, कने कणक पेडुआं च गठेरी रखणी, पर भूए जो उसा अग्गी च फुकणा जड़ी कदी बुझदी ही नी।”

13 उस बेले यीशु गलील प्रदेशे दिया यरदन खड्डा कंडे पर यूहन्ना बाल उसला बपतिस्मा लेणे ताई आया। 14 पर यूहन्ना उसयो ऐ बोली करी रोकणा लग्गा, कि मिंजो तां तेरे हथे ला बपतिस्मा लेणे दी जरूरत है, कने तू मेरे बाल आया है? 15 यीशुऐ उसयो ऐ जबाब दिता, “हुण तां इयां ही होणा दे, क्योंकि सांझो इस तरीके ने सै सब कुछ करणा चाईदा जडा परमेश्वर चांदा है।” तां यूहन्ना उदी गल्ल मनी लेई। 16 कने यीशु बपतिस्मा लेईकरी झट पांणिए ला बाहर आया, कने दिखया, उदे ताई अम्बर खुली गया, कने उनी परमेश्वरे दिया आत्मा जो कबुतरे सांई उतरदे कने अपने उपर ओंदे दिखया। 17 कने दिखा, स्वर्गे ला ऐ अबाज सुणोई की, “ऐ मेरा प्यारा पुत्र है, कने तिजो ला मैं खुश है।”

4 तालू पबित्र आत्मा यीशुऐ जो सुनसान जगा च लेई गेई ताकि शैतान उसयो लालच देई सके। 2 यीशु चाली दिन, कने चाली रात, बिना कुछ खादयो ओथु रिया, कने जालू उसयो भूख लग्गी। 3 तालू शैताने उदे बखे आई करी उसयो बोलया, “अगर तू परमेश्वरे दा पुत्र है, तां बोल, कि ऐ पथर रोटियां बणी जान, ताकि तू इना जो खाई सके।” 4 यीशुऐ जबाब दिता, “कि पबित्र शास्त्र च लिखया है, कि माणु सिर्फ रोटियां ला ही नी, पर परमेश्वरे दे बोलयो बचना जो मन्नी करी जिन्दा रेंदा है।” 5 तालू शैतान यीशुऐ जो पबित्र यरूशलेम शहर च लेई गया कने परमेश्वरे दे मंदरे दिया चुंडिया पर खरेडी दिता। 6 कने उसयो बोलया, अगर तू परमेश्वरे दा पुत्र है, तां ऐथू ला छाल मारी करी दस कने तिजो कुथी भी चोट नी लगणी है; क्योंकि पबित्र शास्त्र च लिखया है, कि उनी स्वर्गदूतां जो हुकम देणा; कने उना तिजो हथो हथ सभांली लेणा है; कुथी इयां ना होए कि तेरे पैरां च पथरे ला चोट लग्गी जा। 7 यीशुऐ उसयो बोलया, “कि पबित्र शास्त्र च ऐ भी लिखया है, कि लोकां जो अपने प्रभु परमेश्वरे जो नी परखणा चाईदा।” 8 फिरी शैतान उसयो इक बडे उच्चे पहाडे पर लेई गया, कने सारे संसारे दे राज्य कने उना दी धन दौलत दस्सी करी, 9 उनी बोलया, कि अगर तू मेरे पैरां पेईकरी मिंजो नमस्ते करगा, तां मैं ऐ सब कुछ तिजो देई दिंगा। 10 तालू यीशुऐ उसयो बोलया, शैतान दूर होई जा, क्योंकि पबित्र शास्त्र च लिखया है: “तू सिर्फ अपने प्रभु परमेश्वरे जो नमस्ते कने सिर्फ उदी ही भक्ति कर।” 11 तालू शैतान उदे बखे ला चली गया,

कने स्वर्गदूत आई करी यीशुए दी सेबा करणा लग्गे। 12 जालू उनी ऐ सुणाया कि यूहन्ना जो पकड़ी करी जेला च बन्द करी लिया है, तां सै यहूदिया प्रदेश जो छडी करी गलील प्रदेशे जो चली गया। 13 कने सै नासरते जो छडी करी कफरनहम शेहरे च जड़ा गलील झिला दे कंडे था, जिथू जबूलून कने नत्ताली दे गोत्र रेंदे थे, ओथु जाई करी रेणा लग्गा। 14 ताकि जड़ा परमेश्वरे दा संदेश देणेबाले यशायाह बोलया था, सै पूरा हो। 15 “तुसां लोक जड़े जबूलून कने नत्ताली गोत्र दे इलाके च रेंदे न, ऐ इलाके उस रस्ते पर न जड़े गलील दरियाये दे बखे कने यरदन खड्डा दे पूर्वी कंडे पर है, ऐ गलील प्रदेशे दे ऐसे इलाके न जिथू होर जातियां दे लोक रेंदे न।” 16 परमेश्वरे जो जाणयो बिना नेहरे च रेणेबाले लोकां इक बडी ज्योति दिखणी; इना ज्योतिया उना लोकां जो मुक्ति दा रस्ता दसणा, जड़े परमेश्वरे जो जाणयो बिना जिन्दगी जिंदे न कने हमेशा दिया मौता दे रस्ते पर चलयो न। 17 उस बेले ला यीशुए प्रचार करणा कने ऐ बोलणा शुरू किता, “कि मन बदला क्योंकि स्वर्गे दा राज्य बखे आई रिया है।” 18 इक दिन जालू यीशु गलील झिला दे बखे-बखे चलया था, तां दो मछवारे भाईयां जो झिला च जाल पांदे दिखया, उना चे इक शमौन था जिसयो पतरस बोलदे न कने उदा भाई अन्द्रियास था। 19 यीशुए उना जो बोलया, “ओआ कने मेरे चेले बणा; मै तुहांजो सिखांगा कि लोकां जो मेरे बाल कियां लोणा कने कियां मेरे चेले बणणा है।” 20 उना झट जाल छडया कने उदे पिच्छे चली पे। 21 जालू यीशु थोड़ा अग्रे चलया, उनी होर दो भाईयां जो दिखया जिना दे ना याकूब कने यूहन्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे, कने यीशुए उना जो भी सदया। 22 सै झट किस्तिया कने अपने पिता जो छडी करी उदे पीच्छे चली पे। 23 यीशु सारे गलील प्रदेशे च गुमदा रेंदा कने उना दे यहूदी जंज घरां च उपदेश दिन्दा कने राज्य दा शुभसमाचार दा प्रचार, कने लोकां दियां सारियां बिमारियां कने कमजोरियां जो ठीक करदा जांदा था। 24 कने सारे सीरिया प्रदेश च यीशुये दे कम्मा दी खबर फैली गई कने लोक सारे बिमारां जो, जिना जो केई किस्मा दियां बिमारियां कने दुखां जकडया था, कने जिना च बुरियां आत्मा थियां, कने मिर्गिया दे दौरे बाले, कने लकवे दे रोगियां जो उस बाल लेईकरी आए कने यीशुए उना सारयां जो ठीक करी दिता। 25 कने गलील प्रदेश कने दिकापुलिस शेहरे कने यरूशलेम शहर कने यहूदिया प्रदेशे ला कने यरदन खड्डा दे पारे ला भिड़ा दी भीड़ उदे पिच्छे चली पेई।

5 यीशु भिड़ा जो दिखीकरी, पाहड़े पर थोड़ा उपर चली गया, कने उना जो शिक्षा देणे ताई ओथु बेई गया तां उदे चेले उदे बाल आये। **2** कने उना जो शिक्षा देणी शुरू किती: **3** “धन्य न सै लोक, जड़े मने दे दीन न जिना जो परमेश्वर दी जस्रतां दा ऐहसास है, क्योंकि स्वर्गे दा राज्य उना दा ही है। **4** धन्य न सै लोक, जड़े शोक करदे न, क्योंकि परमेश्वरे उना जो शांती देणी। **5** धन्य न सै लोक, जड़े नम्र न, क्योंकि धरती उना दी होणी है। **6** धन्य न सै लोक, जड़े धार्मिकता ने जिन्दगी जिणे दी सच्ची भूख प्यास रखदे न, क्योंकि परमेश्वरे उना जो रजाणा है। **7** धन्य न सै लोक जड़े दयालु न, क्योंकि परमेश्वरे उना पर दया करणी। **8** धन्य न सै लोक, जिना दे मन साफ न, क्योंकि उना परमेश्वरे जो दिखणा। **9** धन्य न सै लोक, जड़े इकी दुज्जे दा मेल कराणे बाले न, क्योंकि उना जो परमेश्वरे दा पुत्र बोलया जाणा। **10** धन्य न सै लोक, जड़े धर्मे दे कम्म करणे दिया बजा ने सताए जांदे न, क्योंकि स्वर्गे दा राज्य उना दा ही है। **11** धन्य न तुसां, जालू माणुए मेरिया बजा ने तुहाड़ी निन्दा करणी कने तुसां जो सताणा क्योंकि तुसां मेरे चेले न कने झूठ बोली-बोली करी तुहाड़े खिलाफ हर तरां दियां बुरियाँ गल्लां बोलगे। **12** तालू तुसां खुश कने मगन होनयो क्योंकि तुहाड़े ताई स्वर्गे च बडा इनाम है। इस ताई कि जड़े बड़े बकते पहले परमेश्वरे दा संदेश देणेबाले थे उना जो भी इयां ही सताया था। **13** तुसां धरतिया पर लोकां ताई लूँगे साईं न; पर अगर लूँगे दा स्वाद बिगड़ी जा, तां फिरी सै कुसा चिजा ने लूँका करणा? फिरी सै कुसी कम्मे दा नी है, सिर्फ इसी ताई कि इसयो बार सुटी दिया ताकि माणुआं दे पैरा हेठ ओए। **14** तुसां पुरे संसारे ताई ज्योति न। जड़ा शेहर पाहड़े पर बस्या है, सै कदी छुपी नी सकदा। **15** कने लोक दिय्या बाली करी टोकस्से हेठ नी रखदे न, पर उसयो उपर धारिया पर रखदे न, ताकि घरे दे सारे लोकां जो लौ होऐ। **16** तियां ही तुहाड़ी लौ भी माणुआं सामणे चमके तां सै तुहाड़े भले कम्मा जो दिखीकरी तुहाड़े पिता दी बडाई करन, जड़ा स्वर्गे च है। **17** ऐ मत समझा कि, मै मूसा दी व्यवस्था या परमेश्वरे दा संदेश देणेबालयां दिया गल्लां जो खत्म करणा आया है, मै उना जो खत्म करणा नी, पर उना जो पूरा करणा आया है। **18** क्योंकि मै तुसां ने सच्च बोलदा है, कि अम्बर कने धरती खत्म होई जांगे, पर परमेश्वरे दिया व्यवस्था ला कुछ भी, ऐथू दीकर इक बिंदु या मात्रा भी पूरा होयो बिना नी टलनी है। व्यवस्था दियां सारियां भविष्यवाणियाँ पुरियां होणियां न। **19** इस ताई जड़ा कोई छोटे ला

छोटे हुकम चे कुसकी इकी जो भी नी मनगा, कने तियां ही लोकां जो सिखांगा, तां उसयो स्वर्गे दे राज्य च सारयां ला छोटा बोलणा, पर जड़ा कोई उना दा पालन करगा कने उना जो सिखांगा, सिर्फ उसयो ही स्वर्गे च महान बोलणा है। 20 मैं तुसां ने बोलदा है, कि अगर तुसां चे कोई स्वर्ग दे राज्य च जाणा चांदा है, तां तुसां जो व्यवस्था जो सिखाणे बाले कने फरीसियां ला बदीकरी परमेश्वरे दी व्यवस्था दा पालन करणा चाईदा। 21 तुसां सुणया होंणा, व्यवस्था जो सिखाणे बालयां साडे पूर्वजां जो दसया कि 'हत्या मत करदे', कने जड़ा कोई हत्या करगा उसयो यहूदी सभा च सजा मिलणी है। 22 पर मैं तुसां जो ऐ बोलदा है, कि जड़ा कोई अपने भाईऐ पर गुस्सा करगा, उसयो यहूदी सभा च सजा मिलणी: कने जड़ा कोई अपने भाईऐ जो नकम्मा बोलगा उसयो महासभा च परमेश्वरे सजा देणी; जड़ा कोई अपने भाईऐ जो निकम्मा कने मुख बोले; उसयो नरके दी अग्नी दी सजा मिलणी। (Geenna g1067) 23 इस ताई अगर तू अपनी भेंट चढ़ाणे ताई मंदरे जो लोए, कने ओथु तिजो याद ओए, कि मेरे भाईऐ दे मने च मेरे ताई कोई शिकायत है, 24 तां अपनी भेंट ओथु ही मंदरे दे सामणे छडी दे, कने पेहले जाई करी अपने भाईये ने मेल मिलाप कर, तां फिरी आई करी अपनी भेंट चढ़ा। 25 कचेरी जांदे बकते रस्ते च ही तू अपने बिरोधी ने राजीनामा करी ले, ताकि तेरा बिरोधी तिजो न्याय करणे बाले दे हथे ना देई दे, कने न्याय करणे बाला तिजो जेला च पाई दे। 26 मैं तुसां ने सच्च बोलदा है जालू दीकर तू इक-इक पैसा नी भरी दिंगा तालू दीकर तू जेलखाने ला नी छुटी सकदा है।” 27 तुसां सुणी बैठयो न कि परमेश्वरे हुकम दितया था, कि व्यभिचार मत करदे। 28 पर मैं तुसां ने ऐ बोलदा है, जड़ा कोई कुसा जनानिया जो बुरिया नजरा ने दिखे तां से अपने मने च उसा ने व्यभिचार करी बैठा है। 29 अगर तेरी सजी हख तेरे पाप दी बजा बणे, तां उसा जो कडी करी सट्टी दे; क्योंकि तेरे ताई ऐ ही खरा है कि तेरे अंगा चे इकी दा नाश होई जाए ताकि तेरा बाकी शरीर नरक जाणे ला बची जा। (Geenna g1067) 30 कने अगर तेरा सज्जा हथ तेरे पाप करणे दी बजा बणे, तां तू उसयो बडी करी सुटी दे, क्योंकि तेरे ताई ऐ ही खरा है कि तेरे अंगा चे इक हिंसा नाश होई जा, ताकि तेरा बाकी शरीर नरक जाणे ला बची जा। (Geenna g1067) 31 मूसा दिया व्यवस्था च ऐ भी बोलया था, कि जड़ा कोई अपनीया घरे बालिया जो तलाक देणा चांदा है, तां उसा जो तलाकनामा दे। 32 पर मैं तुसां जो ऐ बोलदा है, कि जड़ा कोई अपनीया घरे बालिया जो व्यभिचार

दे सिवा कुसी होरसी बजा ने छडी दे, तां सै उसा ला व्यभिचार करवांदा है; कने जड़ा उसा छडिया ने बियाह करे, सै व्यभिचार करदा है। 33 फिरी तुसां सुणी बैठयो न, कि व्यवस्था जो सिखाणे बालयां साडे पूर्वजां बोलया था, झुठियां कसमां मत खांदे, पर परमेश्वरे दे सामणे खादियां अपणियां कसमां जो पुरियां करनयो। 34 पर मै तुसां ने ऐ बोलदा है, कि कदी कसम मत खांदे; ना ही स्वर्गे दी, क्योंकि स्वर्ग परमेश्वरे दा सिंहासन है। 35 ना ही धरतिया दी, क्योंकि सै उदे पैरां दी चौकी है; कने ना ही यरूशलेम शहर दी क्योंकि सै महान राजा परमेश्वरे दा शहर है। 36 कने अपने सरे दी भी कसम मत खांदा क्योंकि तू अपने इक बाले जो भी ना चिट्टा, कने ना काला करी सकदा है। 37 पर तुहाड़ी गल्ल हां दी हां, कने ना दी ना हो; क्योंकि जड़ा कुछ इसला जादा होंदा है, सै शैतान ला होंदा है। 38 फिरी तुसां सुणी बैठयो न कि मूसा दिया व्यवस्था च लिखया है, कि अगर कोई तेरी हखी जो फोड़ी दे तां तुमी उदे बदले च उदी हख फोड़ी दे, कने इयां ही दंद दे बदले दंद तोड़ी दिया। 39 पर मै तुसां ने ऐ बोलदा है, कि तुसां बदला मत लेंदे; पर जड़ा तेरिया सजिया खाडिया पर थपड़ मारे, तां उदे सामणे दुई खाडी भी करी दिया। 40 कने अगर कोई तिजो पर मुकद्मा करी के जबरदस्ती तेरा कुरता लेणा चांदा है, तां उसयो अपणिया धोतिया भी लेणा दिया। 41 कने कोई रोमी सिपाई तिजो जबरदस्ती ही इक मील भर लेई जांदा है, तां उदे सोगी दो मील चली जा। 42 कने जड़ा कोई तिजो ला कुछ मंगे, तां उसयो देई दे; कने जड़ा तिजो ला उधार लेणा चांदा है, उसयो मना मत करदे। 43 तुसां सुणी बैठयो न कि व्यवस्था च लिखया है; कि अपने पड़ोसियां ने प्यार रखा, कने दुश्मणा ने दुश्मणी रखा। 44 पर मै तुसां ने ऐ बोलदा है, कि अपने दुश्मणा ने प्यार रखा, कने जड़ा तुसां जो सतादां है उस तांई प्रार्थना करा। 45 जिसने तुसां अपने स्वर्गीय पिता दी ओलाद बणना है, क्योंकि सै खरे लोकां कने बुरे लोकां दोना उपर अपना सूरज निकालदा है, कने धर्मियां कने अधर्मियां दोनो पर बरखा बरसांदा है। 46 क्योंकि अगर तुसां अपने चाहणे बालयां ने ही प्यार रखन, तां परमेश्वरे तुसां जो फल नी देणा, क्योंकि चुंगी लेंगे बाले भी इयां ही करदे न? 47 कने अगर तुसां सिर्फ अपने मसीह भाईयां जो ही नमस्ते करदे न, तां तुसां दुज्जे लोकां दे बदले कोई बड़ा कम्म नी करदे न। क्योंकि होर जातियां जडियां परमेश्वरे दे हुकमा दा पालन नी करदियां न, सै भी तां

इयां ही करदे न? 48 इस ताई तूहांजो उना जो प्यार करणा चाईदा जडे तूहांजो प्यार नी करदे इस तरीके ने तुसां सिद्ध बणा, जियां तुहाडा स्वर्गीय पिता सिद्ध है।

6 ध्यान रखा तुसां माणुआं जो दसणे ताई अपने भले कम्म मत करा, नी तां तूहांजो अपने स्वर्गीय पिता परमेश्वरे ला कोई इनाम नी मिलणा। 2 इस ताई जालू तू दान करे, तां इदा दिखावा मत करदा, जियां डोंगी लोक यहदी जंज घरे च कने गलियां च करदे न, ताकि लोक उना दी बड़ाई करन, मै तुसां ने सच्च बोलदा है, कि उना जो लोकां ला अपना इनाम मिली गया है। 3 पर जालू तू दान करे, तां तेरा दान गुप्त हो जडा लोकां च कुसी जो भी पता ना चले। 4 ताकि तेरा दान गुप्त रे, कने तालू तेरा पिता परमेश्वरे जडा गुप्त च दिखदा है, उनी तिजो उदा इनाम देणा। 5 जालू तू प्रार्थना करे, तां कपटियां सांई मत करदा क्योंकि सै लोकां जो दसणे ताई यहदी जंज घरे च कने सडकां दे मोडा पर खडोई करी प्रार्थना करदे न, सै इस ताई करदे न ताकि लोक उना जो दीखन कने प्रशंशा करन। मै तुसां ने सच्च बोलदा है, कि उना जो अपना इनाम मिली गया है। 6 पर जालू तू प्रार्थना करगा, तां अपने कमरे अंदर जा, कने दरबाजा बंद करिके अपने पिता परमेश्वरे ने प्रार्थना कर जिसयो कुनी नी दिखया है, तालू तेरे पिता परमेश्वरे जडा गुप्त च दिखदा है, उनी तिजो इदा इनाम देणा। 7 पर प्रार्थना करदे बेले होर जातियां सांई बेकार च बडबडा मत करा, क्योंकि सै समझदे न कि उना दे बडबडाणे ने परमेश्वरे उना दी सुणी लेणी है। 8 इस ताई तुसां उना सांई मत बणा, क्योंकि तुहाडा पिता परमेश्वरे तुहाडे मंगणे ला पैहले ही जाणदा है, कि तुहाडियां क्या-क्या जुस्तरतां न। 9 इस ताई तुसां जो इस तरीके ने प्रार्थना करणा चाइदी की: है साडे पिता परमेश्वर, जडा तू स्वर्गे च है; तुहाडा ना पबित्र मनया जाये। 10 सारे माणुआं पर तू राज्य करे। जियां तेरी इच्छा स्वर्गे च पुरी होंदी है, तियां ही धरतिया च भी पूरी होऐ। 11 सांझो हर रोज सै खाणा दे जडा सांझो उस दिने ताई चाईदा है। 12 कने जियां असां अपने गुनागारां जो माफ कितया है, तियां ही तू भी साडे पापां जो माफ कर। 13 कने साडी परख ना ले, पर सांझो शैताने ला बचा। क्योंकि राज्य कने पराक्रम कने महिमा सदा तेरी है। आमीन। 14 इस ताई अगर तुसां माणुआं दे गुनहां जो माफ करगे जडे उना तुहाडे खिलाफ कितयो, तां तुहाडे स्वर्गीय पिता परमेश्वरे भी तुहाडे गुनहां माफ करणे। 15 कने अगर तुसां माणुआं दे गुनाहां जो माफ नी करगे, तां तुहाडे पिता परमेश्वरे तुहाडे गुनाहां भी माफ नी करणे। 16 जालू तुसां बरत

रखन, तां कपटियां सांईं तुहाड़े मुऐ पर उदासी नी होणा चाईदी क्योंकि सै अपणा मु उदास बणाई रखदे न, ताकि लोकां जो पता लग्गे कि उना बरत रख्या है। मैं तुसां ने सच्च बोलदा है, कि उना जो अपणा इनाम मिली गया है। 17 पर जालू तू बरत रखे तां अपने सिरे पर तेल मल कने मुऐ जो धोई ले। 18 ताकि लोकां जो नी, पर तेरे पिता परमेश्वरे जो पता लग्गे जिसयो कुनी नी दिखया है, उनी तिजो इदा इनाम देणा। 19 अपने तांई धरतिया च धन दौलत मत गठेरा, जिथू कीड़ा कने भुत्थी खराब करदी है, कने जिथू चोर नजर रखदे न कने ताले तोड़ी करी चोरी लेई जादे न। 20 पर भलाई करी के अपने तांई स्वर्गे च धन दौलत गठेरा, जिथू ना तां कीड़ा लगदा है, ना भुत्थी खराब करदी है, कने जिथू ना कोई नजर रखदा कने ना कोई चोरदा है। 21 क्योंकि तेरा मन हमेशा ओथु लग्गी रेणा जिथू तेरी धन दौलत है। 22 हखी शरीर तांई इक दिव्ये सांईं न, इस तांई अगर तेरियां हखी साफ न, तां तेरे सारे शरीर च भी लौ होंणी। 23 पर अगर तेरियां हखी बुरियाँ न, तां तेरा सारा शरीर भी नेहरे च होणा; इसा बजा ने जड़ी लौ तिजो च है, अगर सै नेहरा होए तां सै नेहरा कितणा जादा होणा! 24 कोई माणु इक ही बकते दो मालकां दी सेवा नी करी सकदा, क्योंकि उनी इकी ने दुश्मनी कने दुऐ ने प्यार रखणा, या इकी ने मिली के रेणा कने दुऐ जो घटिया समझणा। तुसां परमेश्वर कने धन दौलत दोनो दी सेवा नी करी सकदे। 25 इस तांई मैं तुसां ने बोलदा है, कि अपणी रोजे दी जिन्दगी जिणे तांई ऐ चिंता मत करदे असां क्या खांणा, कने क्या पिणा, कने ना अपने शरीर तांई कि क्या पेनणा, क्या अपने प्राण खाणे ला कने शरीर कपड़े ला बदीकरी नी है? 26 अम्बरे दे पंछियां जो दिखा। सै ना कुछ रांदे न, ना बडदे न, ना खेतरां च बटोलदे न, तमी तुहाड़ा स्वर्गीय पिता परमेश्वर उना जो खुआंदा है। तुसां क्या इना पंछियां ला जादा कीमती नी न? 27 तुसां चे ऐसा कुण है, जड़ा चिंता करणे ने अपणिया जिन्दगिया च इक घड़ी भी बधाई सकदा है? 28 कने कपड़यां तांई कजो चिंता करदे न? जंगली फुलां पासे ध्यान दिया, कि सै कियां बडुदें न, सै ना तां मेहनत करदे न, कने ना ही कपड़े बणादे न। 29 तमी मैं तुसां ने बोलदा है, कि जालू राजा सुलैमान बाल बडा भरी धन दौलत थी, तालू भी उनी उना चे कुसी सांईं भी कपड़े नी पायो थे। 30 इस तांई अगर परमेश्वर बणे दे घाए जो, जड़ा अज है, कने कल अग्गी च फुकया जांणा, तमी परमेश्वर घाए जो इतणी सुन्दरता दिन्दा है, तां हे अल्पविश्वासियों, तां उनी पक्का तुसां दी देखभाल करणी है, पर परमेश्वरे

पर तुहाडा भरोसा इतणा घट कजो है? 31 इस ताई तुसां चिंता करिके ऐ मत बोलदे, कि असां क्या खांगे, या क्या पीगे, या क्या पेनगे? 32 क्योंकि होर जातियां इना सारियां चीजा दियां तोपा च रेदियां न, कने तुहाडा स्वर्गीय पिता परमेश्वर जाणदा है, कि तुसां जो ऐ सारियां चिजा चाईदियां न, इना दी चिंता मत करा। 33 इस ताई पेहले तुसां परमेश्वरे दे राज्य कने धार्मिकता दी जिन्दगी जिणे दी कोशिश करा, तां तुसां जो ऐ सारियां चिजा मिली जाणियां। 34 इस ताई कल्ले ताई चिंता मत करा, क्योंकि कल दा दिन अपणी चिंता अपु करी लेंदा है; अज्जे ताई अज्जे दा दुख ही बतेहरा है।

7 दुजयाँ पर दोष मत ला, ताकि परमेश्वर तुहांजो पर भी कोई दोष ना लाये। 2 क्योंकि जियां तुसां कुसी पर दोष लांदे न, तियां ही परमेश्वरे तुहांजो पर भी दोष लगाणा; कने जियां तुसां दुजयां ने व्यवहार करदे न, तियां ही परमेश्वरे तुहाडे सोगी करणा। 3 तू कजो अपने विश्वासी भाईऐ दियां छोटियां-छोटियां गलतियां जो दिखदा है, जडियां उदिया हखी च पियो छोटे दे कखे साई न, अगर तेरिया जिन्दगिया च मते पाप न, जडा तेरिया अपणी हखी च इक लठे साई है, तां सै तिजो कनी नी मिलदा? 4 जालू तेरे अंदर ही मते पाप न, तां तू खुद ला घट पाप बाले कुसी भाईये दी मदद कियां करी सकदा है। 5 कपटियों, पेहले तां अपने आपे दे पापां जो सुधारी ले, तां तू अपने भाईये दिया हखी दे कखे जो ढंगे ने दिखीकरी कडी सकदा है, कने तां दुजयां जो उना दे छोटे पापां जो सुधारणे च मदद करी सकणा। 6 उना लोकां जो परमेश्वरे दा संदेश मत सुणा जडे बचना जो सुणना नी चांदे। अगर तुसां ऐसा करदे न, तां ऐ ऐसा होणा जियां पबित्र चिजां जो कुतयां अगे फेंकी देणा, या जियां सूअरां दे अगे हीर मोती फेंकणा, उना तां सै पैरां हेठ गेचणे कने फिरी करी तुसां पर ही हमला करणा। 7 तुसां जो जडा चाईदा सै परमेश्वरे ला मंगा कने उनी तुसां जो देणा; अगर तुसां तोपगे, तां तुसां जो मिलणा; अगर खटखटांगे, तां तुहाडे ताई खुलणा। 8 क्योंकि जडा कोई मंगदा है, उसयो मिलदा है; जडा तोपदा है, उसयो मिलदा है; कने जडा दरबाजा खटखटांदा है, उदे ताई खोलया जाणा। 9 तुसां चे कोई भी ऐसा माणु नी है, जडा अपने पुत्रे दे रोटी मंगणे पर उसयो पथर दिन्दा है। 10 इयां ही अगर तुहाडा जागत तुसां ला खांगे जो मछी मंगे तां क्या तुसां उसयो जरिला सप्प दिन्दे न? 11 जालू तुसां बुरे होईकरी, अपने बचयां जो खरियाँ चिजा देणा जाणदे न, तां तुहाडे स्वर्गीय पिता परमेश्वरे

अपणे मंगणे बालयां जो खरियाँ चिजा कनी दिगा? 12 इसा बजा ने जडा कुछ तुसां चांदे न, कि माणु तुहाडे सोगी करे, तां तुसां तियां ही उना सोगी करा; क्योंकि मूसा दी व्यवस्था कने परमेश्वरे दा संदेश देणेबाले दी शिक्षा दा मतलब ऐई है। 13 तुसां सिर्फ सुंगडे फाटके ला परमेश्वरे दे राज्य अंदर जा, क्योंकि जडा फाटक चौड़ा कने असान रस्ता है, सै बरबादिया पासे लेई जांदा है; कने मते भरी लोक न जडे इस रस्ते ला जांदे न। 14 क्योंकि सुंगड़ा सै फाटक है, कने औरखा है सै रस्ता जडा अनन्त जिन्दगी बाल पुजांदा है, सै लोक थोड़े ही न जिना जो ऐ रस्ता मिलदा है। 15 असां परमेश्वरे दे संदेश देणेबाले लोक न, ऐसा अपणे आपे जो बोलणे बाले झूठे लोकां ला चौकने रिया। सै उना भेड़ियां सांई न जिना अपणे आपे जो भेड़ां दियां खल्ली ने ढक्या है, लोकां जो यकीन दिलाणे तांई कि सै सच्ची च भेड़ां न, पर सै असल च भेड़िये न जडे लोकां पर हमले करदे न। 16 उना दे कम्मा ने तुसां उना जो पछेणी लेणा है। लोक क्या झिल्लां ला अंगूर, या कंडे बाले झिल्लां ला अंजीर तोड़दे न? 17 इयां ही इक खरा सूख खरा फल दिन्दा है, कने बेकार सूख बुरा फल दिन्दा है। 18 खरा सूख बुरा फल नी देई सकदा, कने ना बेकार सूख खरा फल देई सकदा है। 19 जडा-जडा सूख खरा फल नी दिन्दा है, सै बडी देणा है, असां परमेश्वरे दे संदेश देणेबाले लोक न ऐसा अपणे आपे जो बोलणे बाले झूठे लोकां जो ऐई सजा मिलणी है। 20 तुसां उना दे कम्मा ने जडे सै करदे न उना जो पछेणी लेणा है। 21 जडा मिंजो ने, हे प्रभु, हे प्रभु बोलदा है, उना सारयां ही स्वर्गे दे राज्य च प्रवेश नी करणा है, सिर्फ उना ही जडे मेरे स्वर्गीया पिता परमेश्वरे दिया मरजिया पर चलदे न। 22 न्याये दे रोजे मतयां लोकां मिंजो ने बोलणा; प्रभु जी, प्रभु जी, क्या असां तैरे नाऐ दी भविष्यवाणी नी किती, कने तैरे नाऐ ने बुरियां आत्मा जो नी कडया, कने तैरे नाऐ ने कितणे ही चमत्कारी कम्म नी किते? 23 तालू मै उना ने खुली करी बोली देणा है, कि मै तां तुसां जो जाणदा ही नी, बुरे कम्म करणे बाले लोको, ऐथू ला चली जा। 24 इस तांई जडा कोई मेरियां गल्लां सुणीकरी उना जो मनदा है, सै उस अकला बाले माणुऐ सांई है, जिनी अपणा घर चट्टान पर बणाया है। 25 कने अम्बर बरया कने बाढ आई, कने तूफान चलया, कने सै उस घरे ने टकराया, पर सै घर नी डेथा, क्योंकि उस दी नीव चट्टाना पर बणईयो थी। 26 पर जडा कोई मेरियां इना गल्लां जो सुणदा है, कने उना पर नी चलदा है, सै उस मुख माणुऐ सांई है जिनी अपणा घर रेता पर बणाया है। 27 कने अम्बर बरया, कने बाढ

आई, तूफान चले, कने उस घरे ने टकराए कने सै घर डेई करी सारा भजी टूटी गया। 28 जालू यीशु ऐ गल्लां बोली बैठा, तां इयां होया कि सारी भीड़ उस दे उपदेशे ने हेरान होई। 29 क्योंकि सै उना जो व्यवस्था जो सिखाणे बालयां सांई नी, पर अधिकारियां सांई उना जो उपदेश दिन्दा था।

8 जालू यीशु उस पाहडे ला थल्ले उतरया, तां इक बड़ी बड़ी भीड़ उदे पिच्छे चली पेई। 2 इकी कोठिये यीशुए बाल आई करी उसयो नमस्ते किते कने बोलया, “कि प्रभु जी अगर तू चाआं, तां मिंजो ठीक करी सकदा है।” 3 यीशुए हथ अग्रे करी के उसयो छुता, कने बोलया, “मैं चांदा है कि तू ठीक होई जा” कने तालू ही उस कोठिये दा कोठ ठीक होई गया। 4 यीशुए उसयो बोलया, “दिख, कुसी ने कुछ मत बोलदा, पर जाई करी अपने आपे जो याजकां ने दस, कि तू खरा होईया कने परमेश्वरे जो भेंट चढ़ा जिदे बारे च मूसा व्यवस्था च लिखया है, ताकि लोक जाणी सकन कि तू खरा होई गया।” 5 यीशु जालू कफरनहम शहर च आया तां इकी रोमी सुबेदारे उस बाल आई करी बिनती किती, 6 “प्रभु जी, मेरे नोकरे जो लकवे दी बिमारी होई गियो है, कने सै हिली-जुली नी सकदा है, कने बड़ा दुखी है।” 7 यीशुए उसयो बोलया, “मैं आई करी उसयो ठीक करगा।” 8 सुबेदारे जबाब दिता, कि प्रभु जी, मैं इस लाइक नी है कि, कि तू मेरे घरे ओऐ, पर तू सिर्फ हुकम करी दे, तां ही मेरे नोकरे ठीक होई जाणा। 9 मैं ऐ समझदा है क्योंकि मैं भी अधिकारियां दे थल्ले कम्म करणे बाला माणु है। कने मेरे अधीन सपाई कम्म करदे न, कने जालू इकी सपाईऐ जो बोलदा है कि, तू जा, तां सै चली जांदा है; कने दुऐ जो बोलदा है कि, तू ऐथू आ, तां सै आई जांदा है; कने जालू मैं अपने नोकरे जो बोलदा, कि ऐ कर, तां सै करी दिन्दा है। 10 ऐ सुणीकरी यीशुए हेरानी होई, कने जडे उदे पिच्छे ओआ दे थे उना ने बोलया, “मैं तुसां ने सच्च बोलदा है, कि मैं इस्राएल देशे च इक भी ऐसा माणु नी दिखया, जडा इस गैर-यहूदी माणुऐ सांई मिंजो पर भरोसा करदा है। 11 कने मैं तुसां ने बोलदा है, कि मतयां होर जाति दे लोकां पूर्व कने पश्चिम ला आई करी अब्राहम कने इसहाक कने याकूबे सोगी स्वर्ग राज्य दे भोज च शामिल होणा है। 12 पर इस्राएलियां जो बाहर नेहरे च पाई देणा है, ओथु उना रोणा कने दंद पीणे न।” 13 कने यीशुए सुबेदारे जो बोलया, “घरे जा, जदेया तेरा भरोसा है, तदेया ही तेरे तांई हो। कने उदा सेवक तालू ही ठीक होई गया।” 14 कने यीशु जालू पतरसे दे घरे पुज्जा, तां उनी उदिया ससु जो

बिस्तरे च पिया दिखया कने उसा जो बुखार चढया था। 15 कने उनी उसा दा हथ छुता कने उसा दा बुखार उतरी गया, कने सै उठी करी उदी सेवा करणा लगी पेई। 16 कने जालू संज होई तालू सै यीशुए बाल मते सारे लोकां जो लेईकरी आये जिना च बुरियां आत्मा थियां, कने उनी उना आत्मा जो अपने बचने ने कडी दिता, कने सारे मरिजां जो ठीक करी दिता। 17 ताकि जड़ा बचन यशायाह परमेश्वरे दा संदेश देणेबाले बोलया था, सै पूरा हो: उनी अपु साडियां कमजोरियां लेई लियां, कने साडियां बिमारियाँ जो हटाई दिता। 18 यीशुए जालू अपने चारो पासे मती भरी भीड़ दिखीकरी, यीशुए अपने चेलयां जो बोलया, तां “ओआ असां गलील झीला दे पारले पासे चलदे।” 19 कने जियां ही सै जाणे जो तैयार होऐ, तां इकी व्यवस्था जो सिखाणे बाले उस बखे आई करी बोलया, “गुरू जी, मैं तुहाडा चेला बणने ताई जिथू कुथी तू जांगा, मैं भी तेरे पिच्छे-पिच्छे चली पोंगा है।” 20 यीशुए उसयो बोलया, “लोमडियां जो रेहणे ताई कुडी न, कने अम्बरे दे पंछियां दे आले होंदे न; पर मिंजो, माणुए दे पुत्रे बाल इक भी घर नही है, जिथू मैं सोई सकें।” 21 इक होर चले उसने बोलया, “प्रभु जी, मिंजो पेहले घर बापस जाणा दे। मेरे पिता दे मरणे बाद, मैं उसयो दफनाणा, कने तां फिरी मैं आई करी तेरा चेला बणगा।” 22 यीशुए उसयो बोलया, “मेरा चेला बणने ताई मेरे पिच्छे आई जा; कने जडे लोक आत्मिक स्ने ने मरयो न, उना जो मुर्दयां जो दफनाणा दे।” 23 जालू सै किस्तिया पर चढया, तां उदे चले उदे पिच्छे चली आए। 24 कने इकदम झीला च तूफान चलणा लग्गी पिया कने किस्ति लैहरां ने डूबणा लगी पेई, कने यीशु सुतया था। 25 तालू चेलयां बखे आई करी उसयो जगाया, कने बोलया, “प्रभु जी, सांझो बचाई ले, असां डूबी करी मरणे बाले न।” 26 यीशुए उना जो बोलया, “हे अल्पविश्वासियों, कजो डरा दे न?” तालू उनी उठी करी पाणिऐ कने तुफाने जो झिड़कया, कने सब कुछ शान्त होई गया। 27 कने सै सारे हेरान होऐ कने बोलणा लग्गे, “कि ऐ कदिया माणु है? ऐथू दीकर कि तूफान कने लैहरां भी इदा हुकम मंदे न।” 28 जालू सै उस पार गदरेनियों जगा च पुज्जे, तां उसयो दो माणु मिल्ले जिना च बुरियां आत्मा थियां, सै कब्रिस्तान ला निकलदे बेले यीशुए मिल्ले, सै आत्मा बडियाँ खतरनाख थियां, कि कोई भी उस रस्ते ला नी जाई सकदा था। 29 कने दिखा, उना जोरे ने बोलया, “परमेश्वरे दे पुत्र, साडा तिजो ने क्या कम्म है? तू क्या बकते ला पेहले ही सांझो दुख देणा आया है?” 30 उना ला थोड़ी दूर इक सूअरां

दा झण्ड चुग्गा दा था। 31 बुरियां आत्मा उसने ऐ बोली करी बिनती किती, अगर तू सांझो कडणा है, तां इना सूअरां बिच भेजी दे। 32 यीशुऐ उना जो बोलया, “जा!” सै निकली करी सुअरां च चली गियां, कने सारे सूअर भेठी ला रीडकी करी पाणिए च जाई पे कने डूबी करी मरी गे। 33 उना दे रखबाले नठी करी शेहर च ऐ खबर सुणाई, कने जीना च बुरियां आत्मा थियां उना दे बारे च भी दसया। 34 तालू जडे लोक दिखणा आयो थे, सै यीशुऐ ने बिनती करिके बोलणा लग्गे, कि साडे इलाके ला चली जा।

9 फिरी सै किस्तिया पर चढी करी पारले पासे गिया, कने अपने शेहर कफरनहम जो आया। 2 कने कुछ लोक इकी धरंगे दे मरीजे जो मंझे पर रखीकरी उस दे बाल लेई आये। यीशुऐ उना दा भरोसा दिखीकरी, उस लकवे दे मरिजे ने बोलया, “हे पुत्र, हौसला रख; तेरे पाप माफ होइ गे।” 3 कने, इसा गल्ला पर केई व्यवस्था जो सिखाणे बालयां ऐ सोचया, कि ऐ तां परमेस्वरे दी निंदा करा दा है। 4 यीशुऐ उना दे मने दी गल्ल जाणी करी बोलया, “तुसां अपने-अपने मने च बुरा बिचार कजो करा दे न?” 5 असान क्या है, ऐ बोलणा कि, तेरे पाप माफ होये, या ऐ बोलणा कि उठ कने चल फिर। 6 पर इस तांई कि तुसां जाणी सकन कि मिंजो माणुऐ दे पुत्रे जो धरतिया पर पाप माफ करणे दा हक है। तालू उनी धरंगे दे मरीजे जो बोलया: उठ, कने अपने मंझे जो चुक, कने अपने घरे जो चली जा। 7 कने सै उठी करी अपने घरे जो चली गिया। 8 लोक ऐ दिखीकरी हेरान होई गे कने परमेस्वरे दी महिमा करणा लग्गे, जिनी आदमियां जो ऐदिया हक दितया है। 9 ओथु ला अगगे जाई करी यीशुऐ मत्ती नाऐ दे इक माणुऐ जो कर लेणे दिया चौकिया पर बैठयो दिखया, कने उसयो बोलया, “मेरे चेले बणा।” सै उठी करी उस दे पिच्छे चली पिया। 10 कने जालू यीशु घरे रोटियां खाणा बैठा, तां मते चुंगी लेणेबाले कने पापी आई करी उस दे चेलयां सोगी रोटि खाणा बैठे। 11 ऐ दिखीकरी फरीसियां उदे चेलयां ने बोलया, “तुहाडा गुरू चुंगी लेंगे बाले कने पापियां सोगी कजो खांदा है?” 12 जालू यीशुऐ ऐ सुणया तां उना जो बोलया, “जडे लोक खरे न उना जो वैघे दी जरूरत नी होंदी है, पर जडे बिमार न उना जो है। 13 इस तांई तुसां जाई करी इदा मतलब सीखी लिया, कि मै बलिदान नी पर दया चांदा है; क्योंकि मै धर्मियां जो नी पर पापियां जो सदणा आया है।” 14 तालू यूहन्ना दे चेलयां उस बाल आई करी बोलया, “क्या बजा है कि असां कने फरीसी बरत रखदे न, पर तेरे चेले तां बरत

नी रखदे?” 15 यीशुए उना ने बोलया, “क्या बराती, जालू दीकर लाड़ा उना सोगी है, दुखी होई सकदे न? पर सै दिन ओणे न जालू लाड़े उना ला बख कितया जाणा, उस बेले उना बरत रखणा। 16 लोक नोए कपड़े दा रफु पराणे कपड़यां च कोई नी लांदा है, नी तां उनी रफुये धोणे ने सुकड़ी जाणा, कने पुराणा कपड़ा होर जादा फटी जाणा। 17 नोए अंगूरा दे रसे जो पराणिया खलडिया च कोई नी भरदा है नी तां नोआ अंगूर रस खलडिया जो फाड़ी दिन्दा है, कने अंगूरा दा रस निकली जांदा ऐ, तांई तां नोआ अंगूर रस नोईयां खलडिया च भरदे न।” 18 सै उना ने ऐ गल्लां बोला दा ही था, इकी यहदी जंज घर दे सरदारे आई करी उसयो नमस्ते किते कने बोलया, “मेरी कुड़ी हुणी मरी है, पर ओथु आई करी उसा पर हथ रख, तां उना जिंदिया होई जाणा।” 19 यीशु उठी करी अपणे चेलयां समेत उदे पिच्छे चली पिया। 20 कने इक जनानी थी जिसा जो बाहरां सालां ला खून निकलने दी बिमारी थी, उना पिच्छे ला आई करी यीशुए दे कपड़यां जो छुई लिया। 21 क्योंकि सै अपणे मने च बोला दी थी कि, अगर मैं उस दे कपड़े जो छुई लेगी तां मैं ठीक होई जाणा। 22 यीशुए फिरी करी उसा जो दिखया कने बोलया, “पुत्री हौंसला रख; तेरा भरोसा जडा मिजों पर था उनी भरोसे तिजो खरा कितया है।” कने सै जनानी उसी बेले ठीक होई गई। 23 यीशु जालू उस सरदारे दे घरे पुज्जा, कने बंसरी बजाणे बाले कने भिडा जो रोंदे दिखया, 24 तालू बोलया, “हटी जा, कुड़ी मरियो नी है, पर सुतियो है”, इसा गल्ला पर सारे हंसणा लग्गे। 25 पर जालू भीड कडी दिती, तां उनी अंदर जाई करी कुडिया दा हथ पकड़या, कने सै जिन्दी होई पेई। 26 कने इसा गल्ला दी चर्चा सारे देशे च फेली गई। 27 जालू यीशु ओथु ला थोड़ा अगगे गया, तां दो अन्ने उदे पिच्छे ऐ बोलदे आये, कि हे दाऊदे दे बंशज, सांझो पर दया कर। 28 जालू सै घरे च पुज्जा, तां सै अन्ने उस बाल आये, कने यीशुए उना जो बोलया, “क्या तुहांजो भरोसा है कि मैं ऐ करी सकदा है?” उना उसने बोलया, “हां प्रभु।” 29 तालू यीशुए उना दियां हखी जो छुई करी बोलया, “तुहाडे भरोसे दे अनुसार तुहाडे तांई होई जा।” 30 कने उना जो मिलणा लग्गी पिया, कने यीशुए उना जो समझाई करी बोलया, “ध्यान रे, तुसां कुस्यो भी मत दसदे, कि मैं तुहाडे तांई क्या कितया है।” 31 पर उना निकली करी सारे देशे च उदी खबर फैलाई दिता। 32 जालू सै दो अन्ने माणु बाहर जा दे थे, तां कुछ लोक इकी माणुये जो यीशुए बाल लेई आये कने सै बोली नी सकदा था, क्योंकि उदे च

बुरी आत्मा थी। 33 जालू यीशुए बुरिया आत्मा जो उस माणुये ला कडी दिता, तां सै बोलणा लग्गी पिया। कने भीड़ हेरान होई गेई कने बोलणा लग्गी, कि इस्राएल देशे च ऐसा कदी नी दिखया। 34 पर फरीसियां बोलया, बुरियां आत्मा दा सरदार उसयो शक्ति दिन्दा है कने बुरियां आत्मा जो कडदा है। 35 यीशु कने उदे चेले गलील प्रदेश दे केई शेहरां कने गां चे होईकरी गे, कने यीशु यहूदी जंज घरां च उपदेश दिन्दा, कने परमेश्वरे दे राज्य दा शुभसमाचार प्रचार करदा, कने हर तरा दियां बिमारियाँ कने कमजोरियां जो ठीक करदा गया। 36 यीशु किस्तिया ला उतरया कने उनी मती भरी भीड़ दिखी, कने उसयो उना पर तरस आया, क्योंकि उना दा कोई अगुवा नी था जड़ा उना दी रखबाली करी सके, जियां भेडां बिना ग्वाले होंदियां न, सै बेचेन कने भटकयो होयो थे। 37 तालू उनी अपने चेलयां ने बोलया, “जियां खेतरां च मती फसल होंदी है, तियां ही मते भरी लोक न जड़े परमेश्वरे दा संदेश सुणने तांई तैयार न, पर परमेश्वरे दे राज्य दे बारे च दसणे तांई लोक घट न। 38 इस तांई फसला दे मालिके ने प्राथना करा कि सै फसला तांई होर मजदूर भेजे।”

10 फिरी उनी अपने बाहरां चेलयां जो अपने बाल सदया, कने उना जो बुरियां आत्मा पर हक दिता, कि उना जो कडन कने हर तरा दियां बिमारियाँ कने, हर तरा दियां कमजोरियां जो दूर करन। 2 इना बाहरां प्रेरितां दे ना ऐ न: पेहला शमौन, जिसयो पतरस बोलदे न, कने उदा भाई अन्द्रियास; जब्दी दा पुत्र याकूब, कने उदा भाई यूहन्ना; 3 फिलिप्पुस कने बरतुल्मै, थोमा, कने चुंगी लेंगे बाला मती, हलफई दा पुत्र याकूब कने तैई। 4 शमौन कनानी, कने यहूदा इस्करियोती, जिनी यीशुए जो पकड़ाई भी दिता। 5 इना बाहरां चेलयां जो यीशुए ऐ हुकम देईकरी भेजया, “कि होर जातियां बाल मत जांदे, कने सामरियां दे कुसी भी शेहरे दे अंदर मत जांदे। 6 इस्राएले दे लोकां बाल जा, जड़े परमेश्वरे ला दूर होई गियो न, जियां भेडां गवाची करी अपने रखबाले ला दूर चली जांदियां न। 7 कने चलदे-चलदे ऐ प्रचार करा कि, स्वर्गे दा राज्य नेडे आई रिया है। 8 बिमारां जो ठीक करा: मरयां जो जिन्दा करा, कने कोठियां जो शुद्ध करा: बुरियां आत्मा जो निकाला: तुसां लोकां दी मदद करणे दा कुछ भी मत लेंदे, क्योंकि परमेश्वर भी तुहाडी मदद करणे दा कुछ नी लेंदा है। 9 कने अपने थेलयाँ च सोना, चांदी, कने तांबे दे सिक्के मत गठेरदे। 10 रस्ते तांई ना कोई थेली रखा, ना दो कुरते, ना जुते, ना सोठी लेंणी,

क्योंकि मजदूरे जो खाणा कने रेणे दी जगा मिलणी चाईदी। 11 जिस कुसी शेहरे
 या गांऐ जांगे तां ओथु पता करा कि कुण काबील माणु है कने जालू दीकर गांऐ ला
 नी निकलगे, तालू दीकर उदे घरे ही रिया। 12 घरे अंदर जांदे बेले उस घरे जो
 आशीष दिनयो। 13 अगर उस घरे दे लोक काबील होंगे, तां तुहाडी शांति उना
 बाल पूजणी, पर अगर सै तुहाडा स्वागत नी करगे तां तुहाडी शांति तुहाडे बाल
 बापस आई जांणी। 14 जिसा जगा दे लोक तुहांजो अपनांगे नी कने तुहाडे उपदेश
 नी सुणगे, ओथु ला जांदे बेले अपने पैरां दी धुड जाडी दिनयो, इयां करणे ने तुसां
 उना जो चेताबनी दिन्दे न कि, परमेश्वरे तुसां जो सजा देणी क्योंकि तुसां उपदेश नी
 मनया। 15 मै तुसां ने सच्च बोलदा है, कि न्याय बाले रोजे सै शेहरे जिथू दे लोक
 परमेश्वर दा बचन नी मंदे, उना दी हालत सदोम कने अमोरा शेहरां दे लोकां दी
 हालत ला भी जादा भयानक होणी है।” 16 दिखा, मै तुहांजो भेडां सांई भेड़ियां
 बिच भेजदा है। तुसां सप्पां सांई चलाक बणा, कने कबुतरां सांई भोले बणा। 17
 “पर तुसां लोकां ला हमेशा चौकने रेणा। क्योंकि लोकां तुहांजो कैदी बणाना कने
 यहदी जंज घरे च पेश करणा कने तुहांजो कोड़े मारणे, कने मेरिया बजा ने तुहांजो
 हाकिमा कने राजयां दे सामणे न्याय तांई महासभा च पेश करणा। 18 तुसां मेरे तांई
 हाकिमा कने राजयां दे सामणे उना पर, कने होर जातियां पर गबाह बणने तांई पेश
 किते जाणे न। 19 जालू सै तुहांजो पकड़ागें तां चिंता मत करदे, कि असां कियां;
 कने क्या बोलणा है: क्योंकि जड़ा कुछ तुसां बोलणा है सै तुहांजो उसी बेले पता
 लग्गी जाणा। 20 क्योंकि बोलणे बाले तुसां नी न, पर तुहाडे पिता परमेश्वरे दी
 पबित्र आत्मा तुसां च बोलदी है। 21 उसी बेले, जड़े लोक मिजों पर भरोसा नी
 करदे न, उना अपने भाईयां जो अधिकारियां दे हथे मारणे तांई देई देणा, क्योंकि सै
 मिंजो पर भरोसा करदे न। पिता अपने बचयां सोगी इयां ही करणा है कने बचयां
 माता-पिता दे खिलाफ होईकरी उना जो मारी देणा है। 22 क्योंकि तुसां मेरे चेले न
 उदिया बजा ने सारे लोकां तुसां ने बैर करणा है, पर जड़ा आखरी दीकर सबर
 रखगा उदा ही उद्धार होणा। 23 जालू सै तुहांजो इकी शेहरे च तंग करगे, तां तुसां
 दुऐ शेहरे जो चली जानयो। मै तुसां ने सच्च बोलदा है, तुहाडी इस्राएले देशे दे इकी
 शेहरे ला दुज्जे शेहरे दी यात्रा पूरी भी नी होणी है, कने मै, माणुऐ दे पुत्रे आई जाणा
 है। 24 चेला अपने गुस्से ला, कने नौकर अपने मालिके ला बडा नी होंदा है। 25
 काफी है कि चेले दा गुस्से दे बराबर, कने नौकरे दा मालिके दे बराबर होणा; अगर

सै मिंजो घरे दे मालिके जो शैतान बोलदे न, तां उना मेरे घरे दे लोकां जो कितणे बुरे ना ने बोलणा है। 26 पर उना लोकां ला मत डरदे जड़े तुसां जो धमकांदे न, क्योंकि सै बकत ओणे बाला है जालू जड़ा कुछ भी ढक्या है, सै खोलया जाणा है; कने सै सारा कुछ जड़ा छुपया है, सै लोकां दे सामणे ओणा है। 27 जड़ा कुछ मैं तुसां ने नेहरे च बोलदा है, उसयो चेले सारे सामणे बिना कुसी डरे दे बोली सकदे न, कने जड़ा तुसां बल्ले-बल्ले सुणदे न, उसयो छती पर चढी करी प्रचार करा। 28 सै जड़े शरीर जो मारी सकदे न, पर सै आत्मा जो नी मारी सकदे न, उना ला डरदे मत, पर परमेश्वर ला डरा, जड़ा आत्मा कने शरीर दोनो जो नरके च मारी सकदा है। (Geenna g1067) 29 क्या बड़ी घट कीमता च दो चिड़ियाँ नी बिकदियां? तमी तुहाड़े पिता परमेश्वरे दिया मरजिया बिना उना चे इक भी मरी करी धरतिया पर नी पेई सकदी। 30 परमेश्वर तुहाड़ी जिन्दगिया दी हर गल्ला दी परवाह करदा है। सै ऐ भी जाणदा है कि तुहाड़े सिरे पर कितणे बाल न। 31 इस ताई डरा मत, क्योंकि तुसां चिड़ियाँ ला भी जादा किमती न। 32 जड़ा कोई लोकां दे सामणे मिंजो परमेश्वर मन्नी लेंगा, उसयो मैं भी अपने स्वर्गीय पिता दे सामणे अपने चेले मन्नी लेंगा। 33 पर अगर सै दूजयां दे सामणे ऐ बोलणे ला डरदे न, कि असां यीशुऐ दे चेले न, तां मैं अपने पिता परमेश्वरे जो जड़ा स्वर्गे च, दसी देणा कि, सै मेरे चेले न। 34 ऐ मत सोचा कि मैं धरतिया पर लोकां बिच शांती लोणे ताई आया है; मैं तां लोकां च लड़ाई करवाणा आया है।” 35 मैं तां इस ताई आया है, ताकि माणुऐ जो उस दे पिता परमेश्वरे ला, कने कुड़िया जो उसा दिया माता ला, कने नुंआ जो उसा दिया ससु दे खिलाफ भड़काणा है। 36 माणुऐ दे दुश्मन उस दे घरे दे ही लोक होणे न। 37 जड़ा अपने माता पिता जो मिंजो ला जादा प्यार करदा है, सै मेरा चेला बणने दे लायक नी है, कने जड़ा कुड़िया या जागते जो मिंजो ला जादा प्यारा करदा है, सै भी मेरा चेला बणने लायक नी। 38 जड़ा मेरिया बजा ने दुख सेहन कने मरणे ताई तैयार नी है, सै मेरा चेला बणने दे लायक नी है। 39 कोई माणु ऐसा नी करगा कने अपने प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका गबाई देणा है। पर जड़ा माणु मिजों पर भरोसा करगा कने मेरे शुभसमाचार दिया बजा ने मरगा उस माणुऐ जो परमेश्वरे सोगी सदा ताई दी जिन्दगी मिलणी। 40 जड़ा तुहांजो अपनांदा है, सै मिंजो भी अपनांदा है; कने जड़ा मिंजो अपनांदा है, सै मेरे भेजणे बालयां जो अपनांदा है। 41 जड़ा परमेश्वरे दा संदेश

देणेबालयां जो परमेश्वरे दा संदेश देणेबाला समझीकरी अपनाए, उसयो परमेश्वरे दा संदेश देणेबालयां सांई इनाम मिलणा; कने जड़ा धर्मी माणुए जो धर्मी माणु समझीकरी अपनाए, उसयो धर्मिये सांई इनाम मिलणा है। 42 जड़ा कोई इना लोकयां चे इकी जो भी मेरा चेला समझीकरी सिर्फ इक कटोरा ठंडे पाणिऐ दा पिया, उसयो पक्का ही इनाम मिलणा है।

11 जालू यीशु अपने बाहरां चेलयां जो हुकम देई बेठा, तां सै उना दे गलील जिले दे नगरां च उपदेश कने प्रचार करणे तांई ओथु ला चली गया। 2 यूहन्ने जेला च मसीह दे कम्मा दी खबर सुणीकरी, अपने चेलयां जो उसला ऐ पृछणे जो भेजया। 3 “क्या तू ही मसीह है जिसयो भेजणे दा बायदा परमेश्वरे कितया था, या असां कुसी दुजे दी नियाल रखन?” 4 यीशुऐ जबाब दिता, “जड़ा कुछ तुसां दिखदे कने सुणदे न, सै सारा कुछ जाई करी यूहन्ना ने बोली दिया। 5 कि अन्नयां जो मिलदा है, कने लंगड़े चलदे न, कोढियां दा कोढ ठीक होआ दा, कने टोंणे सुणदे न, मुर्दे जिंदे किते जांदे न, कने गरीबां जो शुभसमाचार सुणाया जांदा है। 6 कने धन्य न सै, जड़े मिंजो पर शक नी करदे।” 7 यूहन्ना दे चेले जालू ओथु ला चली गे, तां यीशु यूहन्ना दे बारे च लोकां जो बोलणा लग्गा, “तुसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो? इदा मतलब ऐ है कि जड़ा बड़ी असानी ने अपने बिचार बदली दे, सै ऐसा माणु है जड़ा डरदा है कि दुज्जे लोक उदे बारे च क्या सोचगे कने बोलगे। 8 तां फिरी तुसां क्या दिखणा गियो थे? क्या इक माणुये जो जिनी बड़े मेंहगे कपड़े पायो थे? दिखा जड़े लोक मेंगे कपड़े पांदे न सै मेहलां च रेंदे न। 9 तां फिरी कजो गियो थे? कि क्या कुसी परमेश्वरे दा संदेश देणेबाले जो दिखणे तांई? हाँ, मैं तुसां ने बोलदा है, कि परमेश्वरे ला भी बड़े जो? 10 यूहन्ना सेई माणु है जिंदे बारे च पबित्र शास्त्र च दसया, कि दिख, मैं अपने संदेश देणेबाले दूते जो तेरे अग्रे भेजदा है, जिनी तेरे ओणे तांई लोकां जो तैयार करणा है। 11 मैं तुसां ने सच्च बोलदा है, कि जड़े लोक जनानिया ला पैदा होयो न, उना चे यूहन्ना बपतिस्मा देणेबाले ला बड़ा कोई नी होया; पर स्वर्गे दे राज्य च जड़ा सारयां ला छोटा है, सै उसला बड़ा है। 12 जालू ला यूहन्ना बपतिस्मा देणेबाले प्रचार करणा शुरू कितया है, उस बकते ला लेईकरी हुणे दीकर स्वर्गे दा राज्य जबरदस्ती ने अग्रे बदा दा है, कने हिसक लोक उस हमला करा दे न। 13 क्योंकि सारे परमेश्वरे दा संदेश देणेबालयां दियां कताबां च कने मूसा दिया

व्यवस्था च यूहन्ना बपतिस्मा देणेबाले दे ओणे दीकर परमेश्वर दे राज्य दे बारे च लिखया है। 14 कने तुसां मेरी गल्ल मनणा चांदे न, कि एलिय्याह जिदे ओणे दी भविष्यवाणी कितियो थी, सै एलिय्याह ही है। 15 जिस बाल सुणने दा मन हो, सै ध्यान देईकरी इना गल्लां जो सुणे, कने समझी ले।” 16 मैं इस युगे दे लोकां दी तुलना कुसने दें? सै उना जागतां सांई न, जडे बजारां च बेईकरी इकी दुजे जो पुकारी करी बोलदे न। 17 “कि असां तुहाड़े तांई खुशिया दे गाणे गाए, कने तुसां नचे नी; असां शोक दे गीत भी गाए, फिरी भी तुसां रोए नी।” 18 क्योंकि यूहन्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है। 19 पर मैं माणुए दा पुत्र खांदा पिदा है, कने सै बोलदे न, “कि पेटू कने शराबी माणु है, कने चुंगी लेंगे बाले कने पापियां दा मित्र है। पर इक माणुए दे कम्मा ऐ साबित करणा कि अकला बाला कुण है।” 20 तालू यीशुए उना शेहरां च रेणेबाले लोकां जो फटकार लगाई, जिथू उनी बडे भरी चमत्कार दे कम्म कितयो थे; क्योंकि उना अपणे पापां दा पश्चाताप नी कितया था। 21 हाय, खुराजीन शेहर दे कने बैतसैदा शेहर दे लोको! जडे चमत्कारी कम्म तुहाड़े शेहर च कितयो न, अगर सै कम्म सूर कने सैदा च कितयो होंदे, तां ओथु दे लोक बडे पेहले टाट ओढी लेंदे, कने धुड अपणे उपर छिड़की लेंदे ऐ दसणे तांई कि उना अपणे पापां ला पश्चाताप करी लिया है। 22 पर मैं तुसां ने बोलदा है; कि न्याय दे रोज जड़ी सजा सूर कने सैदा जो देणी है, सै सजा तुहाडिया सजा ला बड़ी घट होणी है। 23 हे कफरनहम शेहरे दे लोको, तुसां क्या स्वर्गे दीकर उच्चे करणे न? तुसां तां पताले दीकर थले करणे न; जडे अनोखे कम्म तुहाड़े च कितयो न, अगर सै सदोम शेहर च होंदे, तां उनी अजे दीकर बणी रेणा था। (Hadēs g86) 24 पर मैं तुसां ने बोलदा है; कि न्याय दे रोज जड़ी सजा सदोम शेहरे दे लोकां जो देणी है, सै सजा तुहाडिया सजा ला बड़ी घट होणी है। 25 तिस्सी बेले यीशुए बोलया, “हे पिता, स्वर्गे कने धरतिया दे प्रभु, मैं तेरा धन्याबाद करदा है, तू इना गल्लां जो ज्ञानियां कने समझदारां लोकां ला लुकाई रखया, कने लोक बचयां सांई न उना पर प्रगट किता है। 26 हाँ, पिता जी, क्योंकि तिजो ऐ ही ठीक लग्गा।” 27 मेरे पिते मिंजो सब कुछ दितया है, कने पिता दे बिना कोई पुत्रे जो नी जाणदा है, कने ना ही कोई पिता जो जाणदा है सिर्फ पुत्र ही है जडा पिता जो जाणदा है। कने जिना लोकां जो पुत्र चुणदा है उना लोकां ही पिता जो जाणना है। 28 “सारे मेहनत करणे बालयो कने

भोज्य हेठ दबूयो लोको, मेरे बाल ओआ; मैं तुहांजो अराम देणा। 29 मेरा जुआ अपने उपर चुकी लिया; कने मंजो ला सिखा; क्योंकि मैं मने ला नरम कने दयालु है; कने तुसां जो अपने मने च अराम मिलणा। 30 क्योंकि जडा करणे दा हुकम मैं तुहांजो दिन्दा है, सै करणा मुशकिल नी है।”

12 उस बेले यीशु सब्ते दे रोजे खेतारां चे होईकरी चलया था, कने उस दे चेलयां जो भूख लग्गी, कने सै बेलां तोड़ी-तोड़ी करी खाणां लग्गी पे। 2 फरीसियां ऐ दिखीकरी उसयो बोलया, “दिख, तेरे चेले सै कम्म करा दे न, जडा सब्ते दे रोज करणा ठीक नी।” 3 यीशुऐ उना जो बोलया, “क्या तुसां परमेश्वरे दे बचन च कदी नी पढ़या, कि राजा दाऊदे तालू क्या किता, जालू उसयो कने उस दे मित्रां जो भूख लग्गी थी? 4 सै कियां परमेश्वरे दे घरे च गया, कने परमेश्वर जो चढाईयां रोटियां खादियां, जिना जो खाणां ना उस ताई कने ना उदे मित्रां ताई व्यवस्था दे अनुसार ठीक था, पर सिर्फ याजकां ताई ठीक था? 5 या क्या तुसां मूसा दी व्यवस्था च नी पड़या है, कि याजक सब्ते दे रोज मंदरे च सब्ते दे रोजे दिया विधिया जो तोड़ने पर भी निर्दोष होंदे न?” 6 पर मैं तुसां जो बोलदा है, इदा मतलब है, कि मैं तुहाडे बाल आया है कने मैं मंदरे ला भी जादा बहुमूल्य है। 7 अगर तुसां जाणदे न कि पबित्र शास्त्र च इना अखरां दा मतलब क्या है, मेरे ताई बलियां चढाणे दी बजाऐ, तुसां दुजयां ताई दयालु बणा कने मेरे इना निर्दोष चेलयां दी निंदा नी करदे। 8 “मैं माणुऐ दा पुत्र ऐ बोलणे दा हक रखदा है, कि लोकां जो सब्ते बाले रोजे जो क्या करणे दी अनुमति है।” 9 ओथु ला चलीकरी करी सै यहदी जंज घर च आया। 10 ओथु इक माणु था जिदा इक हथ सुक्की कने बेकार होई गया था, कने फरीसियां यीशुऐ पर दोष लाणे ताई उसला पुछया, कि क्या सब्ते दे रोज चंगा करणा ठीक गल्ल है? 11 यीशुऐ उना जो बोलया, “मन्नी लिया कि तुसां चे कुसकी दी इक ही भेड है। कने सै सब्ते दे रोजे खड़े च पेई जा, कने सै उसा जो पकड़ी करी खड़े ला नी कडे? 12 भला, माणुऐ दी कीमत भेडां ला कितणी जादा बदीकरी है। इस ताई सब्ते दे रोजे लोकां जो खरा करणा ठीक गल्ल।” 13 कने यीशुऐ उस माणुऐ जो बोलया, “अपणा हथ कर रूआं।” उनी अपणा हथ किता, कने उदा हथ दुऐ हथे सांई ठीक होई गया। 14 तालू फरीसी झट बाहर आई करी कुछ लोकां कने मिलिकरी यीशुऐ दे खिलाफ सलाह करणा लग्गे, कि उसयो कियां मारणा है। 15 ऐ जांणी करी यीशु ओथु ला चली गया। कने मते सारे लोक उदे

पिछे चली पै, कने उनी सारयां जो ठीक किता। 16 कने यीशुऐ चेतावनी देईकरी
 उना जो हुकम दिता, “कि मेरे बारे च कुसी ने भी मत दसदे कि मैं परमेश्वर दा पुत्र
 हूँ।” 17 ताकि जड़ा बचन यशायाह परमेश्वरे दा संदेश देणेबाले बोलया था सै पूरा
 हो: 18 “दिखा, ऐ मेरा सेवक है, जिसयो मैं चूँया है, मेरा प्यारा, जिसते मेरा मन
 खुश है, मैं अपणी आत्मा उस पर पांणी है, कने उनी होरनी जातियां जो न्याय दा
 संदेश देणा। 19 ना उनी कोई लड़ाई करणी, कने ना उनी कोई हल्ला पाणा, कने
 ना ही सै लोकां बिच घमंडी सांई जोरे ने कोई भाषण नी देणा। 20 उनी कुसदा भी
 नुकसान नी करणा जड़ा भजयो टुटयो सरकंडे सांई कमजोर न, कने जिसयो भी
 कोई समस्या है सै सुलगती बतिया सांई न, उनी इसा जो कोई नुकसान नी करणा,
 पर उनी पक्का करणा कि न्याय किता जाए। 21 कने होरनी जातियां उदे नाऐ पर
 आस रखणी है।” 22 तालू लोक इक अन्ने कने गूगे जो जिदे च बुरी आत्मा थी,
 उसयो उदे बाल लेई आये, कने उनी उसयो ठीक किता कने सै गूंगा बोलणा कने
 उसयो मिलणा लगी पिया। 23 इसा गल्ला पर सारे लोक हेरान होए, कने बोलणा
 लग्गे, “क्या ऐ माणु मसीहा होई सकदा है, जड़ा राजा दाऊदे दे बंशे ला है, जिसयो
 असां नियाला दे न।” 24 पर फरीसियां ऐ गल्ल सुणीकरी बोलया, ऐ तां बुरियां
 आत्मा दे सरदार शैताने दिया सहायता लेईकरी बुरियां आत्मा जो कडदा है। 25
 उनी उना दे मने दी गल्ल सुणीकरी उना ने बोलया, “अगर कुसी राज्य च लोक
 अपु च ही लडदे रेंगे तां सै राज्य बडे बक्ते तक नी टिकी सकदा है। कने अगर
 कुसी घरे दे माणु अपु च ही लडी पोंगे तां सै घर नी बणी सकदा।” 26 अगर
 शैतान ही शैताने जो कहे, तां उनी अपणा ही बैरी होई जाणा, तां उनी अपणा ही
 नाश करी लेणा है, तां फिरी उस दा राज्य कियां बदी सकदा है, 27 अगर मैं शैताने
 दिया मददा ने बुरियां आत्मा जो कडदा है, तां तुहाडे चेले कुसदिया मददा ने बुरियां
 आत्मा जो कडदे न? इस तांई उना ही तुहाडा न्याय करणा है। 28 पर अगर मैं
 परमेश्वरे दिया आत्मा दिया सहायता ने बुरियां आत्मा जो कडदा है, तां परमेश्वरे दा
 राज्य तुहाडे बाल आई पुज्जा है। 29 जालू दीकर तुसां जोरे बाले माणुऐ जो नी
 बनगे, तां तुसां उदे घरे च नी बडी सकदे कने उदियां चीजां जो नी चोरी सकदे न।
 30 “जड़ा मेरे सोगी नी है, सै मेरे खिलाफ है, कने जड़ा मेरे सोगी नी बटोलदा है,
 सै खलारदा है। 31 इस तांई तां मैं तुसां ने बोलदा है, कि माणुऐ दी ओलादी दे सारे
 पाप कने निंदा जड़ा सै परमेश्वर या कुसी दे खिलाफ करदे न, परमेश्वरे उना दे पाप

माफ करी देणे न, पर जड़ा कोई पबित्र आत्मा दे खिलाफ निंदा करगा, तां सै परमेश्वरे कदी भी माफ नी करणा है। 32 पर जड़ा कोई माणुए दे पुत्रे दे बारे च कोई बुरी गल्ल बोलगा, उदा ऐ अपराध माफ होई जाणा, पर जड़ा कोई पबित्र आत्मा दे बारे च बुरा बोलगा, उदी ऐ गलती ना तां इस लोक च ना ही ओणे बाले युग च माफ होणी।” (aiōn g165) 33 “अगर सूख खरा है, तां उदे फले जो भी खरा होणा, अगर सूख बेकार है, तां उदे फल भी बेकार होणे न, क्योंकि सूख फले ने ही पछेणया जांदा है।” 34 “तुसां जहरीले सपां दे बचयां सांई न, तुसां बुरे होईकरी कियां खरियाँ गल्लां बोली सकदे न? क्योंकि जड़ा मने च भरया है सै ही मुए च ओंदा है। 35 इक भला माणु मने दे भले भंडारे ला भलियाँ गल्लां कडदा है, कने इक बुरा माणु मने दे बुरे भंडारे ला बुरियाँ गल्लां कडदा है। 36 कने मैं तुसां ने बोलदा है, कि जड़ियां-जड़ियां बेकार गल्लां माणुए बोलणियां न, उना सारियां गल्लां दा लेखा न्याय दे रोजे देणा है। 37 क्योंकि परमेश्वरे न्याय करणा है कने हर इक माणुए जो उदियां बोलियां गल्लां दिया बजा ने दोषी या निर्दोषी ठहराया जाणा है।” 38 इसा गल्ला पर मते व्यवस्था जो सिखाणे बालयां कने फरीसियां उसयो बोलया, “गुरू जी, असां तिजो ला इक स्वर्गे दा कोई चमत्कार दिखणा चांदे न, जिसने पता लग्गे कि तिजो परमेश्वरे भेजया है।” 39 पर यीशुए उना जो जबाब दिता, तुसां चमत्कार इस तांई मंगदे न क्योंकि तुसां बुरे लोक न कने भरोसा नी करदे न, पर परमेश्वरे दा संदेश देणेबाले योना ने जड़ा होया उस जो छडी करी होर कोई तुसां जो चमत्कार नी मिलणा है। 40 योना तिन्न रात दिन पाणिऐ दे इकी बड़ी बडिया मच्छिया दे पेटे च रिया, तियां ही, मैं माणुए दे पुत्रे भी तिन्न रात दिन धरतिया दे अंदर रेणा। 41 नीनवे शेहरे दे लोकां न्याय दे रोजे इस युगे दे लोका सोगी उठी करी उना जो दोषी ठेहराणा, क्योंकि उना योना दा प्रचार सुणीकरी मन बदलया, पर तुसां तां पश्चाताप करणे मना करदे न; कने दिखा, ऐथू तां सै है जड़ा योना ला भी बडा है। 42 दक्षिणे दिया राणिया न्याय दे रोजे इस युगे दे लोकां सोगी उठी करी उना जो दोषी ठेहराणा, क्योंकि सै सुलेमान दा ज्ञान सुणने तांई बड़ी दुरे ला आयियो थी; कने दिखा, ऐथू सै है जड़ा सुलेमाने ला भी बडा है, पर तुसां पश्चाताप करणे मना करदे न। 43 “जालू बुरी आत्मा माणुए ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है। 44 तां सै अपने आपे ने बोलदी है, कि जिस माणुए ला मैं आई है उसी माणुए दे

अंदर चली जां कने बापस आई करी उस माणुऐ जो उस खाली घरे सांई पांदी है, जिसयो छेल करी साफ कने सजाया हो।” 45 तालू बुरी आत्मा जाई करी अपणे ला होर बुरियाँ सत्त आत्मा जो अपणे सोगी लेई ओदी है, कने सै उस माणुऐ दे अंदर जाई करी रेणा लगदी है, कने उस माणुऐ दी हालत पहले ला भी बुरी होई जांदी है। इस युगे दे बुरे लोकां ने भी इयां ही होणा है। 46 जालू सै भिडा ने गल्लां करा दा ही था, तां उस दी माता कने भाई बाहर खडुतयो थे, कने उसने गल्लां करणा चांदे थे। 47 कुनकी उसने बोलया, “दिख, तेरी माता कने तेरे भाई बाहर खडुतयो न, कने तिजो ने गल्लां करणा चांदे न।” 48 ऐ सुणीकरी उनी बोलणे बाले जो जबाब दिता, “कुण है मेरी माता? कने कुण न मेरे भाई?” 49 कने अपणे चेलयां पासे हथ करिके बोलया, दिखा, “मेरी मां कने मेरे भाई ऐ न। 50 क्योंकि जडा कोई मेरे स्वर्गीय पिता दिया मरजिया पर चले, सै ही मेरा भाई, कने बेहन, कने माता है।”

13 तिस्सी रोजे यीशु घरे ला निकली करी दरियाये दे बखे जाई बैठा। 2 कने उस बाल मती भरी भीड़ गिठी होई गई, कने सै किस्तिया पर चढ़ी गया, कने सारी भीड़ दरियाये दे बखे खडोई रेई। 3 कने उनी उना ने कहाणियां च मतियां सारियां गल्लां बोलियां, “दिखा, इक बी रांणे बाला बी रांणा निकलया। 4 रांदे बेले थोड़े बी रस्ते दे बखे पेई गे कने सै तां पंछियां आई करी चुगी ले। 5 कने थोड़े बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ला तौली लूंगी पै। 6 कने जालू खडी धुप पेई, तां सै फकुई गे, क्योंकि उना दिया जडा दुगियां नी थियां तां सै सुकी गे। 7 कने थोड़े बी झिल्लां च पै, कने जालू झिल्ल बडुऐ तां उना से बी डकी ले। 8 पर थोड़े बी खरिया जमिना पर पे, कने सै बी लुंगे, कने मते सारे फल देणेबाले होए; केईयां सौ गुणा, केईयां सठ गुणा, केईयां ती गुणा।” 9 जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले। 10 कने चेलयां यीशुऐ बखे आई करी पुछया, “तू उना ने कहाणिया च कजो गल्लां करदा है?” 11 उनी जबाब दिता, “तुहांजो स्वर्गे दे राज्य दे भेदां जो समझणे दी समझ दितियो है, पर उना जो नी। 12 जिस कुसी बाल सै समझणे दी इच्छा है, जडा परमेश्वर सिखांदा है, उसयो होर देणा, पर जडा समझणे दी इच्छा नी रखदा, कि मै क्या सिखांदा, तां सै जडा समझया है, परमेश्वरे से भी उसला लेई लेणा।” 13 मै उना ने कहाणिया च

गल्लां इस ताई करदा है, कि सै दिखदे होए भी, नी दिखदे; कने सुणदे होए भी, नी सुणदे न; कने ना समझदे न। 14 कने उना दे बारे च यशायाह दी ऐ भविष्यवाणी पुरी होदी है: “तुसां कन्ना ला सुणना तां है, पर समझणा नी है; कने हखी ला दिखणा ता है, पर कुछ मिलणा नी है।” 15 “क्योंकि इना लोकां दा मन कठोर होई गया है, कने सै कन्ना ला उच्चा सुणदे न, कने उना अपणिया हखी बंद करी लियां न; कुथी इयां ना हो कि सै हखी ला दिखन, कने कना ला सुणन कने मने ला समझन, कने अपने पापां दा पश्चाताप करगे, कने मै उना जो ठीक करे।” 16 “पर धन्य न तुहाडियां हखी, क्योंकि सै दिखदियां न; कने तुहाडे कन्न, कि सै सुणदे न। 17 क्योंकि मै तुसां ने सच्च बोलदा है, कि मते परमेश्वरे दा संदेश देणेबाले कने धर्मी चांदे थे कि जडियां गल्लां तुसां दिखदे न, दिखन, पर दिखियां नी; कने जडियां गल्लां तुसां सुणदे न, सुणन, पर सुणियां नी।” 18 हुण तुसां बी राणे बाले दी कहाणिया दा मतलब सुणा: 19 “जड़ा कोई राज्य दा बचन सुणीकरी नी समझदा, उदे मने च जड़ा कुछ राया था, उसयो शैतान झट पट जादां कने उना दे मने ला बचन कडी दिन्दा है जड़ा उना सुणया था; ऐ सै ही बी है, जड़ा रस्ते दे बखे राया था। 20 कने जड़ा पथरिलिया जमिना च राया था, ऐ सै माणु न, जड़े बचना जो सुणीकरी उना जो झट खुशिया ने ग्रहण करी लेंदे न। 21 पर परमेश्वर दे बचना जो मने दिया गहराईया च बदणा नी दिन्दे, उदे बाद जालू बचने दिया बजा ने उना पर कला क्लेश या परेशानी होदी है, तां सै बचना ला पिच्छे हट्टी जांदे न। 22 जड़े बी झिल्लां च पियो न, ऐ सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रेंदा है, ऐ सब परमेश्वर दे बचन च स्कावट पांदा है। कने सै बचन उना ताई फायदेमंद नी होदा। (aiōn g165) 23 कने जड़े बी खरिया जमिना पर रायो थे, ऐ सै माणु न, जड़े बचन सुणीकरी ग्रहण करदे न, कने फल दिन्दे न, कोई सौ गुणा, कोई सठ गुणा, कने कोई ती गुणा।” 24 यीशुऐ उना जो इक होर कहाणी सुणाई, “स्वर्गे दा राज्य उस माणुऐ सांई है जिनी अपने खेतरे च खरा भी राया। 25 पर जालू लोक सोआ दे थे तां उना दे दुशमण आई करी कणका बिच जंगली भी राई करी चली गे। 26 जालू लूंगा निकलियाँ कने बेलां लगियां, तां जंगली दांण्यां दियां लूंगा भी मिलणा लगियां।” 27 इस गल्ला पर घरे दे नौकरां आई करी उसला बोलया, हे मालिक, तू क्या अपने खेतरां च खरा भी नी लाया था? फिरी खेतरे च जंगली दांणे

दे बूटे कुथु ला आए? 28 उनी उना जो बोलया, ऐ कुसी दुशमणे दा कम्म है।
 नोकरां उसला बोलया, तेरी क्या मर्जी है, कि असां जाई करी जंगली बूटयां जो
 जडा ला पुटी देन? 29 उनी बोलया, नी, ऐसा मत करा इयां ना होऐ कि जंगली
 दांणे दे बूटयां जो जडा ला पुटदे बेले उना सोगी कणका दे बूटे भी पुटुई जान। 30
 बडणे दीकर दोनो जो बडूणा दिया, कने बडणे दे बेले मै बडणे बालयां ने बोलणा है,
 कि पेहले जंगली दांणे दे बूटयां जो बटोली करी फूकणे ताई गढियां बन्नी लियां,
 कने कणका जो मेरे खेतेरे च गठेरा। 31 उनी उना जो इक होर कहाणी सुणाई,
 “स्वर्गे दा राज्य इक राई दे दांणे सांई है, जिसयो कुनी माणुऐ लेईकरी अपणे खेतरां
 च राई दिता। 32 सै सारे बियां ला छोटा होंदा है, पर जालू सै बडा होई जांदा है
 तालू सै सारे साग पतयां ला भी बडा होंदा है; कने ऐसा स्ख बणी जांदा है, कि
 अम्बरे दे पंछी आई करी उदिया डालियाँ पर घोंसले बणादे न।” 33 उनी इक होर
 कहाणी उना जो सुणाई, “स्वर्गे दा राज्य खमिरे (तराक) सांई है, जिसयो कुनी
 जनानिया लेईकरी तीन पसेरी आटे च मलाई दिता कने होंदे-होंदे सै सारा खमीर
 बणी गया।” 34 ऐ सारियां गल्लां यीशुऐ कहाणिया दे जरिये लोकां ने बोलियां,
 कने जडा कुछ सै सिखांदा, सै कहाणिया ने ही सिखांदा था। 35 कि जडा बचन
 परमेश्वरे दा संदेश देणेबाले बोलया था, सै पूरा होऐ: “मै कहाणी बोलणे ताई अपणा
 मु खोलणा है: मै उना गल्लां जो जडियां संसारे दे शुरू होणें ला गुप्त न उना जो
 सामणे लोंगा।” 36 तालू यीशु भिडा जो छडी करी घरे च आया, कने उदे चेलयां
 उदे बाल आई करी बोलया, “खतेरे दे जंगली दांणे दी कहाणी समझाई दे।” 37
 उनी उना जो जबाब दिता, “खरे भी रांणे बाला मै माणुऐ दा पुत्र है।” 38 खेतर
 संसारे दे लोक न, खरा बी राज्य दे लोक न, कने जंगली भी शैताने दे लोक न। 39
 जिनी दुशमणे उना जो राया सै शैतान है; बडणा संसारे दा खात्मा हे: कने बडणे
 बाला स्वर्गदूत है। (aiōn g165) 40 जियां जंगली दांणे दे बीऐ दे बूटे फुकणे ताई
 गठेरदे न, तियां ही संसारे दे खात्मे च होणा है। (aiōn g165) 41 मै माणुऐ दे पुत्रे
 अपणे स्वर्गदूते जो भेजणा, कने उना उदे राज्य च सारियां पाप दियां बजां जो, कने
 बुरे कम्म करणे बालयां जो उखाड़ी देणा है। 42 कने स्वर्गदूतां उना जो अग्गी दे
 कुण्डे च पांणा, कने उना ओथु रोंणा कने दंद पीणे न। 43 उस बेले धर्मियां अपणे
 पिता दे राज्य च सूरजे सांई चमकणा है। जिस बाल सुणने ताई कन्न न सै ध्यान
 लाईकरी गल्ला जो सुणे, कने इसा गल्ला जो समझी ले। 44 “स्वर्गे दा राज्य

खतरे च लुकयो खजाने सांई है, जड़ा कुसी माणुऐ जो मिलया है, कने उनी लुकाई रखया, खुशिया दे मारयो जाई करी उनी अपणा सारा कुछ बेची करी, कने उस खेते जो खरदी लिया।” 45 “फिरी स्वर्गे दा राज्य इक व्यपारिये सांई है, जड़ा खरे मोतियाँ दिया तोपा च था। 46 जालू उसयो इक बड़ा भरी मेहंगा मोती मिला, तां उनी अपणा सारा कुछ बेची दिता, कने सै मोती खरीदी लिया।” 47 “फिरी स्वर्गे दा राज्य उस मच्छियां पकड़ने बाले बड़े जाल्ले सांई है, जिसयो समुद्रे च पाया, कने सै हर तरा दियां मच्छियां जो बटोली लेई आया। 48 कने जालू जाल्ल भर्ई गया, तां मछवारे जाल्ले जो खिंज्जी करी किनारे जो लेई आये, कने बेईकरी खरियाँ-खरियाँ मच्छियां जो भांडयां च पाया कने बेकार-बेकार सुटी दितियां। 49 संसारे दे अंत च इयां ही होणा है; स्वर्गदूते आई करी बुरे लोकां कने धर्मियां जो लग करणा, (aiōn g165) 50 कने बुरे लोकां जो अग्गी दे कुण्डे च पांणा। ओथु उना रौणा कने दंद पीणे न।” 51 “तुसां क्या ऐ सारियां गल्लां समझी गे?” उना उसला बोलया, “हाँ।” 52 उनी उना ने बोलया, “तांई तां हर इक व्यवस्था जो सिखाणे बाला जड़ा स्वर्गे दे राज्य दा चेला बंणया है, उस ग्रहस्थ दे सांई है जड़ा अपणी पराणियां कने नोइयां चिजां जो अपने भंडारे ला कडदा है जिथू सै दुजयां दिया मदद करणे तांई उना जो गठेरदा।” 53 जालू यीशु सारी कहाणी बोली बैठा, तां ओथु ला चली गया। 54 कने अपने देशे च आई करी उना दे यहूदी जंज घर च उना जो ऐसा उपदेश देणा लगा; कने सै हेरान होईकरी बोलणा लग्गे, “कि इसयो ऐ अकल कने चमत्कारी कम्म करणे दी शक्ति कुथु ला मिली? 55 क्या ऐ तरखाणे दा जागत नी है? कने क्या इदिया माता दा ना मरियम कने इदे भाईयां दे ना याकूब कने यूसुफ कने शमौन कने यहूदा नी न? 56 कने क्या इदियां सारियां बेहणा साडे बिच नी रेंदिया न? फिरी इनी ऐ सारा कुछ कुथु ला सिखया?” 57 इयां उना उदिया बजा ला ठोकर खादी, पर यीशुऐ उना जो बोलया, “परमेश्वरे दा संदेश देणेबालयां दा अपने ग्रां कने घरे छडी करी, उसयो हर कुथी इज्जत मिलदी है।” 58 कने उनी ओथु उना दे भरोसा नी करणे दिया बजा ला जादा अनोखे कम्म नी किते।

14 कने हुण राजा हेरोदेसे यीशुऐ दे कम्मा दी चर्चा सुणी जडे यीशु करा दा था। 2 कने अपने सेवकां ने बोलया, “ऐ सेई यूहन्ना बपतिस्मा देणेबाला यूहन्ना है! सै मरयां च जिन्दा होई गया है, ये ही बजा है कि उदे बाल इना चमत्कारां जो करणे

ताई परमेश्वर दी शक्ति है!” 3 क्योंकि हेरोदेसे अपने भाई फिलिप्पुस दी घरे बाली हेरोदियास दिया बजा ला, यूहन्ना जो पकड़ी करी बन्या, कने जेला च पाई दिता था। 4 क्योंकि यूहन्ने उसयो बोलया था, कि इसा जो रखणा तिजो ताई ठीक नी है। 5 कने सै उसयो मारी देणा चांदा था, पर सै लोकां ला डरदा था, क्योंकि सै उसयो परमेश्वरे दा संदेश देणेबाला मंदे थे। 6 पर जालू हेरोदेस दा जन्म दिन आया, तां हेरोदियास दिया कुडिया त्योहारे च नची करी हेरोदेसे जो खुश किता। 7 इसा गल्ला पर उनी कसम खाई करी बचन दिता, कि जड़ा कुछ तू मंगगी, सै मै तिजो दिगा। 8 उना अपणिया माता दे बहकावे च आई करी बोलया, “यूहन्ना बपतिस्मा देणेबाले दा सिर थालिया च रखीकरी मिंजो ऐथू मंगबाई दे।” 9 ऐ सुणीकरी राजा बड़ा उदास होया, पर अपणिया कसमां, कने सोगी बोणे बालयां दिया बजा ने, हुकम दिता, कि यूहन्ना दा सर इसा जो देई दिया। 10 राजे इक सिपाइऐ जो हुकम दिता, कि जेला च जा, कने यूहन्ना दा मुंड बड़ी करी उदे बाल लेईकर आ। 11 सिपाइऐ जेला च जाई करी उदा सिर कटया, कने इक थालिया च रखीकरी लेई आया कने उसा कुडिया जो देई दिता, कने कुडिया अपणिया माता जो देई दिता। 12 तालू यूहन्ना दे चेलयां उदिया लाशा जो ले जाई करी दबाई दिता, कने जाई करी यीशुऐ जो खबर दिती। 13 जालू यीशुऐ ऐ सुंणा, तां किस्तिया च चढी करी ओथु ला कुसी सुनसान जगा जो, एकांत च चली गया; कने लोक ऐ सुणीकरी शेहरे-शेहरे ला पैदल चली करी उदे पिच्छे चली गे। 14 उनी निकली करी मते भरे लोकां दी भीड़ दिखी, कने उना पर तरस खादा, कने उनी उना चे जड़े मरीजां जो ठीक किता। 15 जालू संज होई, तां उदे चेलयां उदे बाल आई करी बोलया, “ऐ तां सुनसान जगा है, कने देर होआ दी है; कने लोकां जो भेजी दिया ताकि सै ग्रां च जाई करी अपने ताई खांणा खरीदी लेन।” 16 पर यीशुऐ उना जो बोलया, “उना दा जाणा जरूरी नी है। तुसां ही इना जो खाणे जो दिया।” 17 उना उसला बोलया, “साड़े बाल ऐथू पंज रोटियां कने दो मछियां जो छडी करी होर कुछ नी है।” 18 उनी बोलया, “उना जो ऐथू मेरे बाल लेई ओआ।” 19 तालू उनी लोकां जो घाए पर बोणे जो बोलया, कने उनी सै पंज रोटियां कने दो मछियां लियां; कने स्वर्गे पासे दिखीकरी धन्याबाद किता, कने रोटियां तोड़ी-तोड़ी करी चेलयां जो दितियां, कने चेलयां लोकां जो। 20 सारे खाई करी रजी गे। कने जालू रोटी खायी बैठे तालू चेलयां बाकी बचियाँ रोटियां कने मछियां गिठेरेइयां कने उसला बाहरा टोकरियाँ

भरई गियां। 21 कने खांणे बाले चे जनानिया कने बचयां जो छडी करी लगभग पंज हजार मर्द थे। 22 कने उनी तोले-तोले अपने चेलयां जो किस्तिया पर चढने तांई बोलया, ताकि सै उसला पेहले पार पुज्जी जान, तालू दीकर कि मै लोकां जो भेजी करे। 23 सारे लोकां जो भेजणे बाद, यीशु पहाड़े पर प्राथना करणे तांई गिया; संझा जो सै ओथु किल्ला था। 24 उस बेले किस्ति झिल्ला बिच लेहरां ने डगमगा दी थी, क्योंकि होआ सामणे ला ओआ दी थी। 25 कने तां भयागा तडके यीशु झिल्ला पर चली करी उना बाल आया। 26 पर जालू चेलयां उसयो झिला पर चलदे दिखया, तां से घबराई गे, कने बोलणा लग्गे कि, “भुत है ऐ!” 27 पर यीशुए उना ने झट गल्लां कितियां कने बोलया, “हिम्मत रखा, डरा मत, मै यीशु है।” 28 पतरसे उसयो जबाब दिता, “हे प्रभु, अगर तू है, तां तू मिजो अपने बाल पांणिए पर चली करी ओणे दा हुकम दे।” 29 उनी बोलया, “आ।” तालू पतरस किस्तिया ला उतरी करी यीशुए पासे चलणा लग्गा। 30 पर होआ जो महसूस करी डरी गिया, कने जालू डूबणा लगा तां चिलाई करी बोलया, “हे प्रभु, मिजो बचा।” 31 यीशुए झट हथ गां करी के उसयो थमी लिया, कने उसला बोलया, “हे घटविश्वासी, तू कजो शक किता?” 32 जालू सै किस्तिया पर चढी गिया, तां होआ भी स्की गई। 33 इसा गल्ला पर जडे किस्तिया पर थे, उना उसयो झुकी करी नमस्ते करी के बोलया, “सच्ची, तू परमेश्वरे दा पुत्र है।” 34 सै पार उतरी करी गन्नेसरत प्रदेश दे कन्डै पुज्जे। 35 कने ओथु दे लोकां उसयो पछेणी लिया कने अखे-बखे दे सारे देशे च बोली भेजया, कने सारे बिमारां जो उदे बाल लेई आये। 36 कने उसने बिनती करणा लग्गे कि सै सिर्फ अपने कपड़यां जो छुणा दे, कने जितणे भी छुंदे थे, सै सारे ठीक होई जांदे थे।

15 तालू यरूशलेम ला कुछ फरीसी कने व्यवस्था जो सिखाणे बाले यीशुए बाल आई करी बोलणा लग्गे, 2 “तेरे चले पूर्वजां दे रीती रिबाजां जो कजो टालदे न, कि बिना हथ धोतयो रोटी खांदे न?” 3 यीशुए उना जो जबाब दिता, “तुसां अपने बणायो नियमा दिया बजा ला कजो परमेश्वरे दे हुकमे जो टालदे न?” 4 क्योंकि परमेश्वरे बोलया है, “कि अपने माता पिता दा आदर करा, कने जडा कोई अपने माता पिता जो श्राप दिगा, सै पक्का मारी देणा।” 5 “पर तुसां लोकां जो इजाजत दिन्दे न की, अपने माता-पिता जो ऐ बोली दिया कि जडा कुछ मै तुहांजो देणा था, सै मै परमेश्वर जो देणे दी कसम खादियो है।” 6 तां सै अपने पिता दा आदर नी

करदा है, इयां ही तुसां भी अपने रीती रिवाजा दिया बजा ला परमेश्वरे दा हुकम तोड़ी दितया है। 7 यशयाह तुहाड़े बारे च ठीक बोलया था, जिनी पबित्र शास्त्र च तुसां कपटियां दे बारे च लिखया है, 8 “कि ऐसे लोक गल्लां ने तां मेरा आदर करदे न, पर इना दे मन मिंजो ला बड़े दूर न। 9 कने ऐ बेकार ही मेरी भक्ति करदे न, क्योंकि माणुऐ दे तरीकियां जो धर्म उपदेश बणाई करी सिखादे न।” 10 कने यीशुऐ लोकां जो अपने बाल सदीकरी उना ने बोलया, “सुंणा, कने समझा। 11 जडा मुऐ च जांदा है, सै माणुऐ जो अशुद्ध नी करदा है, पर जडा मुऐ ला निकलदा है, सै माणुऐ जो अशुद्ध करदा है।” 12 तालू चेलयां आई करी बोलया, “क्या तिजो ऐ पता है कि फरीसियां ऐ बचन सुणीकरी ठोकर खादी?” 13 उनी जबाब दिता, “हर इक बूटा जडा मेरे स्वर्गीय पिता नी लाया है, सै पुटुई जाणा है।” 14 “उना जो जाणा दिया; सै रस्ता दसणे बाले अन्ने न, कने अगर अन्ना अन्ने जो रस्ता दसे, तां दोनो खड़े च पोंणा है।” 15 ऐ सुणीकरी पतरसे उसला बोलया, “ऐ कहाणी सांझो समझाई दे।” 16 उनी बोलया, “क्या तुसां भी हले दीकर नी समझे?” 17 “क्या तुहांजो पता नी है, कि जडा कुछ मुऐ च जांदा है सै पेटे च पौंदा है, कने संडास ने बाहर निकली जांदा है? 18 पर जडा कुछ मुऐ ला निकलदा है, सै मने ला निकलदा है, सै ही माणुऐ जो अशुद्ध करदा है। 19 क्योंकि बुरे बिचार, मारणा, परस्त्रीगमन, व्यभिचार, चोरी, झूठी गबाई कने निंदा मने ला ही निकलदे न। 20 ऐ ही है जडे माणुऐ जो अशुद्ध करदे न, पर बिना हथ धोतयो खांणा खाणां माणुऐ जो अशुद्ध नी करदा है।” 21 यीशु ओथु ला निकली करी, सूर कने सैदा दे देशां जो चली गया। 22 उस देशे ला इक कनानी जनानी आई, कने जौरे-जौरे ने बोलणा लगी, “है प्रभु। दाऊदे दी ओलाद, मिंजो पर दया कर, मेरिया कुड़िया जो बुरी आत्मा बड़ी भरी सतांदी है।” 23 पर उनी उसा जो कोई जबाब नी दिता, कने उदे चेलयां आई करी उसने बिनती करिके बोलया, “इसा जो भेजी दे; क्योंकि सै साड़े पिच्छे डडदी ओआ दी है।” 24 यीशुऐ जबाब दिता, “इस्राएले दे घराने दियां गवाचियां भेडां जो छडी करी मिंजो होर कुसी बाल नी भेजया है।” 25 पर सै आई, कने उसयो नमस्ते करिके बोलणा लगी, “है प्रभु, मेरी मदद कर।” 26 उनी जबाब दिता, “बचयां दी रोटी लेईकरी कुतयां दे अग्ने पाणा ठीक नी है।” 27 उनी बोलया, “सच्च है प्रभु; पर कुत्ते भी सै ही टुकड़े खांदे न, जडा उना दे मालिकां दे मजे ला हेठ पोंदे न।” 28 इसा गल्लां पर यीशुऐ उसा जो जबाब दिता,

“हे जनानी, तेरा भरोसा बड़ा है; जियां तू चांदी है, तेरे ताँई तियां ही हो।” कने उसा दी कुडी उसी बेले ठीक होई गई। 29 यीशु ओथु ला गलील झिला बखे आया, कने पाहड़े पर चढ़ी करी ओथु बेई गया। 30 तालू भिड़ा दी भीड़ उदे बखे आई। कने अपने सोगी केई लंगड़े, अन्ने, जल्ले, टुंडे, कने होर मते सारयां जो लेईकरी उदे बाल आये; कने उना जो उदे पैरा च रखी दिता, कने उनी उना सारयां जो ठीक किता। 31 जालू लोकां दिखया कि, जल्ले बोलणा, कने टुंडे ठीक होंणा, कने लट्टे चलदे, कने अन्नयां जो मिलदा है, तां हेरान होऐ कने इस्राएले दे परमेश्वरे दी बड़ाई करणा लगगे। 32 यीशुऐ अपने चेलयां जो सदीकरी बोलया, “ऐ लोक मिजों सोगी तिन्ना रोजां ला रे दे न। उना बाल खाणे ताँई कुछ नी है कने मिजो इसा गल्ला पर तरस ओआ दा है; कने मैं इना जो भूखा नी भेजणा चांदा है; कुथी इयां ना हो कि सै रस्ते च थकी करी रेई ना जान।” 33 चेलयां उसयो बोलया, “सांझो ऐथू सुनसान जगा च कुथु ला इतणियां रोटियां मिलगियां कि असां इतणियां बडिया भिड़ा जो खुआन?” 34 यीशुऐ उना ला पूछया, “कि तुहाड़े बाल कितणियां रोटियां न?” उना बोलया, “सत रोटियां कने थोड़ियां दियां छोटियां मछियां न।” 35 तालू यीशुऐ लोकां जो धरतिया पर बोणे दा हुकम दिता कने सै बेई गे, 36 कने उदे बाद उनी सै सत रोटियां कने मछियां लियां, कने परमेश्वरे दा धन्यवाद करिके तोड़ियां, कने अपने चेलयां जो रोटियां तोड़ी करी दिन्दा गया ताकि सै उना जो लोकां च बंडी देन। 37 फिरी बादे च सारे लोक खाई करी रजी गे कने उदे बाद चेलयां बाकी बचयो टुकडयां जो सत टोकरियां च भरी लिया। 38 कने खाणे बालयां चे जनानिया कने बचयां जो छडी करी चार हजार मर्द थे। 39 तालू सै भिड़ा जो भेजी करी किस्तिया पर चढया, कने मगदन देशे दिया सीमा पर आया।

16 फरीसियां कने सदूकियां यीशुऐ बाल आई करी उसयो परखणे ताँई बोलया, “कि सांझो स्वर्गे दा कोई चमत्कार दस।” 2 उनी उना जो जबाब दिता, “संझा जो तुसां बोलदे न, कि मौसम खरा रेणा है, क्योंकि अम्बर लाल है।” 3 कने ब्यागा जो बोलदे न, कि अज तूफान ओणा क्योंकि अम्बर लाल कने धुंधला है तुसां अम्बरे दे लछण दिखीकरी फरक दसी सकदे न, पर बकते दे निशाणा दा फरक कनी दसी सकदे न? 4 “इस युगे दे बुरे कने व्यभिचारी लोक निशाण तोपदे न, पर योना दे निशाणे जो छडी करी उना जो कोई होर निशाण नी मिलणा।” कने सै उना जो छडी करी चली गया। 5 कने चले झीला दे पार जांदे बेले रोटियां लेणा भूली

गियो थे। 6 कने यीशुए उना जो चेतावनी दिती कि, “फरीसियां कने सदूकियां दे खमिरे ला बचणे ताई चौकने रेनयो।” 7 सै अपु चे बिचार करिके बोलणा लग्गे, कि यीशुए ऐ इस ताई बोलया क्योकि “असां रोटियां नी लोंदियां।” 8 ऐ जाणी करी, यीशुए उना ने बोलया, “हे घटविश्वासियो, तुसां कजो अपु चे बिचार करा दे कि साडे बाल रोटिया नी न?” 9 तुसां क्या हले दीकर नी समझे? कने उना पंजा हजारों दियां पंज रोटिया याद नी न, कने ना ही ऐ कि कितणियां टोकरियाँ चुकियां थियां? 10 कने ना ही उना चार हजार दियां सत रोटियां, कने ना ही ऐ कि तुसां कितणियां टोकरियां चुकियां थियां? 11 “तुसां कनी समझदे कि मैं तुसां ने रोटियां दे बारे च नी बोलया? पर फरीसियां कने सदूकियां दे बचना ला चौकने रेणे दे बारे च बोलया है।” 12 तालू उना जो समझ आया, कि उनी रोटिया दे खमिरे ताई नी, पर फरीसियां कने सदूकियां दिया शिक्षा ला चौकने रेणे ताई बोलया था। 13 यीशु कैसरिया फिलिप्पी दे प्रदेशे च आया कने उनी अपने चेलयां ला पूछया, “लोक मिंजो, माणुए दे पुत्रे जो क्या बोलदे न?” 14 चेलयां जबाब दिता कुछ लोक बोलदे न कि तुसां यूहन्ना बपतिस्मादाता न; पर कोई-कोई एलिय्याह, कने कोई-कोई बोलदे न कि पुराणे जमाने दे परमेश्वरे दा संदेश सुनाणे बालयां चे कोई इक है। 15 यीशुए उना जो बोलया, “पर तुसां मिंजो क्या बोलदे न?” 16 शमौन पतरसे जबाब दिता, “तू जिंदे परमेश्वरे दा पुत्र मसीह है।” 17 यीशुए उसयो जबाब दिता, “हे शमौन, योना दे पुत्र, तू धन्य है; क्योकि मासे या खूने नी, पर मेरा पिता परमेश्वर जडा स्वर्गे च है, उनी ऐ गल्ल तिजो पर प्रगट कितियो है। 18 कने मैं भी तिजो ने बोलदा है, कि तू पतरस है, कने मैं इसी पथरे पर अपनी कलीसिया बणाणी, कने अधोलोक दे फाटक उदे पर प्रबल नी होणे।” (Hades 986) 19 “मैं तिजो स्वर्गे दे राज्य दियां चाबियां दिगा: कने जडा कुछ तू धरतिया पर बणांगा; सै स्वर्गे च भी बणना, कने जडा कुछ तू धरतिया पर खोलगा, सै स्वर्गे पर भी खुलणा।” 20 तालू उनी चेलयां जो समझाया कि, “कुसी ने भी मत बोलदे कि, मैं मसीह है।” 21 उस बेले यीशु चेलयां जो दसणा लगा, “मिंजो जरूरी है कि मैं यरूशलेम जां, कने यहूदी अंगुवे, बड़े याजकां, कने यहूदी व्यवस्था जो सिखाणे बालयां दे हथां ला मते दुख झेलें, कने सै मिंजो मारी देन, कने फिरी मैं तिन्ना रोजां बाद मरयां चे जिन्दा होई जां।” 22 पतरस यीशुए जो बखिया लेई गिया कने इसा गल्ला पर झिडकणा लगा, “है प्रभु, परमेश्वर ना करे। कि तिजो पर कदी ऐसा होऐ।” 23 उनी मुडी

करी पतरसे जो बोलया, “शैताने सांई कम्म करणा बंद कर! मेरे सामणे ला दूर होई जा! क्योंकि तू परमेश्वरे सांई नी, पर तू माणुऐ सांई सोचा दा है।” 24 यीशुऐ भिडा जो अपने चेलयां समेत अपने बाल सदीकरी बोलया, “जडा कोई मेरा चेला बनणा चांदा है, उसयो अपणिया शरीर दियां इच्छां कने जडियां तरकिबां बणाईयां उना जो छडी करी! मिजों तांई मरणे जो तैयार रैणा पोणा, सेई मेरा चेला बणी करी मिजों पिच्छे चली सकदा है।” 25 कोई माणु ऐसा नी करगा कने अपने प्राणा जो बचाणा चांहगा, उनी परमेश्वर सोगी आत्मिक जिन्दगी जिणे दा मोका गबाई देणा है। पर जडा माणु मिजों पर भरोसा करगा कने मेरे शुभसमाचार दिया बजा ने मरगा उस माणुऐ जो परमेश्वरे सोगी सदा तांई दी जिन्दगी मिलणी। 26 अगर तुसां संसारे दा सब कुछ पाई लेंगे कने परमेश्वरे सोगी सदा दी जिन्दगी जिणे दा मोका गबाई दिगे, तां उदा क्या फायदा? इक माणु परमेश्वरे जो क्या देई सकदा है, जडा उदी सदा दी जिन्दगी खरिदगा? कुछ नी! 27 मैं, माणुऐ दे पुत्रे अपने स्वर्गदूते सोगी अपने पिता दिया महिमा च ओणा है, कने उस बेले उनी हर इकी जो उदे कम्मा दे अनुसार उसयो फल देणा है। 28 मैं तुसां ने सच्च बोलदा है, “कि जडे ऐथू खडोतयो न, उना चे केई ऐसे न, कि जालू दीकर मिजो, माणुऐ दे पुत्रे जो उदे राज्य च ओदे नी दिखी लेन, तालू दीकर मौता दा स्वाद नी चखणा है।”

17 छे रोजां बाद यीशुऐ पतरस कने याकूब कने उदे भाई यूहन्ना जो सोगी लिया, कने उना जो एकांत च कुसकी उच्चे पहाडे पर लेई गया। 2 कने उना दे सामणे यीशुऐ दा रूप बदलई गया। कने उदे कपडे चमकदार सफेद होई गे, 3 तालू उना तिन्ना चेलयां, परमेश्वरे दा संदेश देणेबाले मूसा कने एलिय्याह जो, जडे बडे पेहले जिन्दा थे उना जो यीशुऐ सोगी गल्लां करदे दिखया। 4 इसा गल्ला पर पतरसे यीशुऐ जो बोलया, “प्रभु जी, साडा ऐथू रैणा ठीक है, इस तांई असां ऐथू तीन तम्बू बणांदे न, इक तेरे तांई, इक मूसा तांई, इक एलिय्याह तांई।” 5 पतरस बोला दा ही था, तालू इक चमकीला बदल आया कने उना जो अपनी छाया ने ढकी लिया, बदले च परमेश्वरे जो बोलदे सुणया, “कि ऐ मेरा प्यारा पुत्र है, कने मैं इसला खुश है, कने जडा ऐ बोलदा है उसयो ध्याने ला सुणा।” 6 चले ऐ सुणी के मुऐ भार पेई गे, कने बडे डरी गे। 7 यीशुऐ उना जो बखे आई करी छुता, कने बोलया, “उठा कने डरा मत।” 8 तालू उना अपने चारो पासे नजर मारी, तां मूसा कने एलिय्याह ओथु नी थे, कने उना जो सिर्फ यीशु ही मिल्ला। 9 जालू यीशु कने उदे तिन्न चले

पहाड़े ला उतरा दे थे, तालू यीशुए उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मैं, माणुए दा पुत्र मरयां चे जिन्दा ना होई जा।” 10 कने चेलयां उसला पुछया, “मूसा दी व्यवस्था जो सिखाणे बाले यहूदी गुरू कजो बोलदे थे मसीहा ला पेहले एलिय्याह ओणा था? अगर ओणा था, तां हाली दिकर कजो नी आया सै?” 11 यीशुए उना जो जबाब दिता, “ऐ तां सच्च है कि एलिय्याह पेहले आई करी सब कुछ सुधारणा है।” 12 पर मैं तुसां ने बोलदा है, “एलिय्याह ता पेहले ही आई चुकया था, कने लोकां उसयो नी पछेणया; पर जियां सै करणा चांदे थे तियां ही उदे सोगी किता। इसी तरीके ने ही माणुए दे पुत्रे जो भी उना दे हथे ला दुख होणे न।” 13 तालू चेलयां समझया कि उनी सांझो ने यूहन्ना बपतिस्मा देणेबाले दे बारे च बोलया है। 14 जालू सै भिड़ा बखे पुज्जे, तां इक माणु उना बाल आया, कने गोडे भार बेईकरी बोलणा लग्गा। 15 “प्रभु जी, मेरे पुत्रे पर दया कर। क्योंकि उसयो मिर्गी दे दौरै पोंदे न, उसयो बड़ी तकलीफ होंदी है, कने बार-बार अग्गी च, कने बार-बार पांणिए च पेई जांदा है। 16 कने मैं उसयो तेरे चेलयां बाल लांदा था, पर सै उसयो ठीक नी करी सके।” 17 ऐ सुणीकरी यीशुए उना जो जबाब दिता, “हे अविश्वासी लोकों, मैं कालू दीकर तुहाड़े सोगी रेंगा, कने कालू दीकर तुहाड़े अविश्वास जो सेहन करगा? उसी जागते जो मेरे बाल लोआ।” 18 तालू यीशुए उसयो झिड़कया, कने बुरी आत्मा उसला निकली गई; कने जागत उसी बेले ठीक होई गया। 19 जालू यीशु किला था, तां उदे चेले उस बाल आए कने उसयो पुछया कि, “असां उसा बुरी आत्मा जो कजो नी कड़ी सके?” 20 यीशुए उना ने बोलया, “अपणे भरोसे दिया कमिया दिया बजा ला। क्योंकि मैं तुसां ने सच्च बोलदा है, अगर तुहाड़ा भरोसा राईया दे दांणे बराबर भी होंदा, तां इसी पाहड़े ने बोली सकदे न, कि ऐथू ला खिसकी करी ओथु चली जा, तां उनी चली जाणा; कने कोई भी गल्ल तुहाड़े ताई मुशकिल नी होणी। 21 (पर ऐ जात बिना प्राथना कने बिना बरते दे नी निकलदी।)” 22 जालू चेले गलील प्रदेशे च थे, तां यीशुए उना ने बोलया, “मैं, माणुए दा पुत्र माणुआं दे हथे पकड़ाया जाणा है। 23 कने उना मिंजो मारी देणा, कने मैं तीजे रोजे मरयां चे जिंदा होई जाणा।” इना गल्लां जो सुणीकरी चेले बड़े उदास होए। 24 जालू सै कफरनहूम शेहरे च पुज्जे, तां मंदरे दा कर लेंगे बालयां, पतरसे बाल आई करी पुछया, कि क्या तुहाड़ा गुरू मंदरे दा कर नी दिन्दा है? 25 उनी बोलया, “हाँ, दिन्दा है।” जालू सै घरे

आया, तां यीशुऐ पतरसे दे पूछणे ला पेहले ही उसयो बोलया, “हे शमौन तू क्या समझदा है? धरतिया दे राजे महसूल या कर कुसला लेंदे न? अपने पुत्रां ला कि परायां ला?” 26 पतरसे उना ने बोलया, “परायां ला।” यीशुऐ उसला बोलया, “तां पुत्र बची गे।” 27 तमी असां उना जो ठोकर ना खुआन, तू झिला दे बखे जाई करी बीडी पा, कने जड़ी मछी पेहले निकलगी, उसा जो पकड़यां; उसा दा मुउ खोलणे पर इक सिक्का मिलणा है, उसयो लेईकरी मेरे कने अपने बदले उना जो कर देई दियां।

18 उस बेले चले यीशुऐ बाल आई करी पूछणा लग्गे, “स्वर्गे दे राज्य च बडा कुण है?” 2 इस गल्लां पर उनी इक जागते जो अपने बाल सदीकरी उना बिच खरेडया, 3 कने बोलया, “मैं तुसां ने सच्च बोलदा है, कि तुसां अपना मन बदला, कने बचयां सांई बणा, तां तुसां स्वर्गे दे राज्य च जाई सकदे न। 4 जड़ा कोई अपने आपयो बचयां सांई छोटा करगा, उनी स्वर्गे दे राज्य च बडा होणा। 5 कने जड़ा कोई मेरे नाऐ ला इक ऐसे बच्चे जो अपनांदा है सै मिजो भी अपनांदा है।” 6 पर जड़ा कोई इना छोटयां चे कुसी इकी जो भी भरोसे ला भटकांदा है या उना दे पाप करणे दी बजा बणदा है, उदे तांई तां खरा होंदा, कि उदे गले च बट्टे घराटे दा पथर लटकाई करी उसयो डुगे समुंद्रे च डोबी दिन्दे। 7 “ठोकरां दियां बजा ने संसारे पर हाय! ठोकर लगणा जरूरी है; पर हाय उस माणुऐ पर जिदे जरिये ठोकर लगदी है।” 8 “अगर तेरा हथ या पैर तेरे पापां दी बजा बणा दा, तां उना जो बडी करी फेंकी दे; तेरे तांई ऐ ही ठीक है कि तू टुंडा या लंगड़ा होईकरी हमेशा दिया जिन्दगिया च प्रवेश करे, कि दो हथ पैर होंदे होए भी तू कदी नी बुझणे बालिया अग्गी च जां। (aiōnios g166) 9 अगर तेरी हख तेरे पाप दी बजा बणे, तां उसा जो कडी करी फेंकी दे। तेरे तांई ऐ ही ठीक है कि काणा होईकरी हमेशा दिया जिन्दगिया च प्रवेश करे, कि दो हखी दे होंदे होए भी तू कदी नी बुझणे बालिया नरके दिया अग्गी च जां।” (Geenna g1067) 10 “दिखा, तुसां इना छोटयां चे कुसयो भी घटिया मत समझदे; क्योंकि मैं तुसां ने बोलदा है कि स्वर्गे च उना दे स्वर्गदूत हमेशा मेरे स्वर्गीय पिता दे सोगी रेंदे न।” 11 (क्योंकि मैं, माणुऐ दा पुत्र गवाचयां जो बचाणा आया है।) 12 “तुसां क्या सोचदे न? अगर कुसी माणुऐ दियां सौ भेडां न, कने उना चे इक गवाची जा, तां क्या सै उना निन्यानबे जो बाकी रखबालयां बाल छडी करी, पाहडे पर जाई करी, उसा गवाचिया जो नी तोपगा?”

13 “कने अगर ऐसा हो कि सै भेड उसयो मिली जाए, तां मै तुसां ने सच्च बोलदा है, कि उनी निन्यानबे भेडां ताई इतणा खुश नी होणा, जितणा कि इसा भेडां ताई होणा। 14 तियां ही तुहाडा पिता जड़ा स्वर्गे च है उदी इच्छा नी है, कि इना छोटयां चे इक भी खत्म होऐ।” 15 “अगर तेरा मसीह भाई तिजो ने कोई जुल्म करे, तां जा कने उस सोगी किल्ले च गल्ल बात करिके समझा; अगर सै तेरी सुणे ले कने अपणी गलती मन्नी ले, तां तू अपने मसीह भाईऐ जो बापिस पाई लिया।” 16 कने अगर सै नी सुणे, तां इक दो जणे होर लेई जा सोगी, क्योंकि मूसा दिया व्यवस्था दे अनुसार, “हर इक आरोप जो दो या उसला जादा गबाह ला सही साबित करणा चाईदा।” 17 अगर सै उना दी भी नी मन्ने, तां तू कलीसिया ने बोली दे, पर अगर सै कलीसिया ने भी नी मन्ने, तां तू उसयो जियां तुसां होर जातियां सोगी व्यवहार करदे न, तियां ही उसयो कलीसिया ला कडी दिया। 18 “मै तुसां ने सच्च बोलदा है, जडा कुछ तुसां धरतिया पर बणाणा है, उनी सै स्वर्गे च भी बणाणा है कने जडा कुछ तुसां धरतिया पर खोलणा है, सै स्वर्गे च भी खोलणा है।” 19 मै तुसां ने फिरी बोलदा है, अगर धरतिया पर तुसां चे दो जणे कुसा गल्लां ताई इक मन होईकरी मंगगे, तां सै उना ताई मेरे पिता दिया तरफा ला जडा स्वर्गे च है होई जाणी। 20 “क्योंकि जिथू दो या तीन मेरे नाए ने गिठे होंदे न ओथु मै उना बिच होंदा है।” 21 तालू पतरसे बखे आई करी, उसयो बोलया, “प्रभु जी, अगर मेरा मसीह भाई जुल्म करदा रे, तां मै उसयो कितणी बरी माफ करे, क्या सत बरी दीकर?” 22 यीशुऐ उसयो बोलया, “मै तिजो ने ऐ नी बोलदा, कि सत बरी नी, पर तिजो उसयो माफ करी देणा चाईदा।” 23 “इस ताई स्वर्गे दे राज्य उस राजे सांई न, जडा अपने सेवकां ला लेखा लेणा चांदा था। 24 जालू सै लेखा लेणा लग्गा, तां इकी बंदे जो उदे सामणे लांदा सै दस हजार सोने दे सिकयां दे बोरे दा कर्जदार था। 25 कने उदे बाल बापस करणे ताई कुछ भी नी था, तां उदे मालिके बोलया, कि ऐ कने इदी घरे बाली कने बाल-बच्चे कने जडा कुछ भी इदा है सै सब कुछ बेची दिया, कने कर्ज चुकाई दिया। 26 इसा गल्ला पर उनी सेवके पैरां च पेईकरी नमस्ते किते, कने बोलया, हे मालिक, सबर रख, मै सारा कुछ भरी दिंगा। 27 तालू उदे मालिके उस पर तरस खाई करी उसयो छडी दिता, कने उदा कर्ज भी माफ करी दिता। 28 पर जालू सै सेवक बाहर निकलया, तां उसयो इक सोगी कम्म करणे बाला साथी मिला, जिनी उसला सो दीनारां (सो दीनार: सो चांदी दे सिकके) दा कर्ज लिया था;

उनी उदा गला पकड़ी करी उसयो बोलया, जड़ा कुछ तेरे पर कर्ज है उसयो भरी दे। 29 उदे साथी सेवके उदे पैरां पेईकरी, उसने बिनती करणा लगा; कि सबर रख मैं सारा भरी दिगा। 30 पर सै नी मनया, कने उनी जाई करी उसयो जेला च पाई दिता, ताकि जालू दीकर सै कर्ज नी भरगा, तालू दीकर ओथु ही रे। 31 कने उदे साथी सेवक ऐ दिखीकरी बड़े उदास होए, कने जाई करी ऐ सारा हाल अपने मालिके ने सुनाई दिता।” 32 तालू उदे मालिके उसयो सदीकरी बोलया, “हे दुष्ट सेवक, तू जड़ी मिजो ने बिनती किती थी, तां मैं तेरा सारा कर्ज माफ करी दिता। 33 इस तांई जियां मैं तिजो पर दया किती थी, तियां ही तिजो भी अपने साथी सेवके दा कर्ज माफ करी देणा चाईदा था?” 34 कने उदे मालिके गुस्से च आई करी उसयो सजा देंगे बालें दे हथे देई दिता, ताकि जालू दीकर सै सारा कर्ज नी भरगा, तालू दीकर उना दे हवाले रे। 35 “इयां ही अगर तुसां चे हर कोई अपने मसीह भाई जो मने ला माफ नी करगा, तां मेरा पिता जड़ा स्वर्गे च है, उनी तुसां जो भी माफ नी करणा।”

19 जालू यीशु ऐ गल्लां बोली बैठा, तां गलील प्रदेशे ला चली गया; सै यहूदिया प्रदेशे ला निकले कने यरदन खड़ा दे दुज्जे पासे चली गे। 2 कने मते भरी लोक उदे पिच्छे चली पे, कने ओथु यीशुऐ उना सारयां जो ठीक किता। 3 तालू फरीसी उदे बाल आए कने उसयो परखणे तांई उसला पुछया, “क्या हर इक छोटिया बजा ला अपणिया घरे बाली जो छडी देणा ठीक है?” 4 उनी जबाब दिता, “तुसां क्या पढया नी है, कि जिनी उना जो बणाया है, उनी शुरू ला ही नर कने नारी बणाई करी, बोलया। 5 इस बजा ला माणुऐ अपने माता-पिता ला लग होईकरी अपणिया घरे बालिया सोगी रेणा, कने इना दोनो इक तन होणा? 6 कने सै दोनो हुण इक तन न, क्योंकि हुण सै दो जणे नी, पर इक माणुऐ सांई न। इस तांई उसा जनानिया कने मर्दे जो बख नी करणा चाईदा जिना जो परमेश्वरे बियाह दे बंधना च बनया है।” 7 उना यीशुऐ ने बोलया, “फिरी मूसा ऐ कजो बणाया, कि उसा जो तलाक देईकरी छडी दिया?” 8 यीशुऐ उना ने बोलया, “मूसा तुहाड़े मने दिया कठोरता दिया बजा ला तुहांजो अपणिया घरे बालिया जो छडी देंगे दा हुकम दिता, पर शुरू च ऐसा नी था। 9 मैं तुसां ने बोलदा है, कि जड़ा कोई व्यभिचार जो छडी करी कुसा होरसी बजा ने अपणिया घरे बालिया जो छडी करी दुईया ने बियाह करे, तां सै व्यभिचार करदा है।” 10 चेलयां उसने बोलया, “अगर मरदे दा जनानिया सोगी ऐसा रिश्ता

है, तां बियाह नी करणा ही ठीक है।” 11 उनी उना ने बोलया, “सारे ऐ बचन ग्रहण नी करी सकदे, सिर्फ सै ही जिना जो परमेश्वरे इस तरीके ने जिन्दगी जिणे दी शक्ति दितयो है। 12 क्योंकि कुछ नपुंसक ऐसे न जड़े माऊ दे पेटे ला ही ऐसे न; कने कुछ नपुंसक ऐसे न, जिना जो माणुआं नपुंसक बणाया है: कने कुछ नपुंसक ऐसे न, जिना अपने आपे जो स्वर्गे दे राज्य ताई नपुंसक बणाया है, जड़े इसयो समझी सकदे न, सै समझी लिया।” 13 तालू लोक बचयां जो उदे बाल लेईकरी आए, ताकि सै उना पर हथ रखे कने प्रार्थना करे; पर चेलयां उना जो झिडकां दीतियां। 14 यीशुए बोलया, “बचयां जो मना मत करा कने इना जो मेरे बाल ओणा दिया, जड़े इना बचयां सांई भरोसेमदं न उना स्वर्गे दे राज्य च रेणा।” 15 कने सै उना पर हथ रखीकरी, ओथु ला चली गया। 16 इक माणुए यीशुए बाल आई करी बोलया, “गुरू जी, मैं कुण दिया भला कम्म करे, ताकि मिंजो हमेशा दी जिन्दगी मिल्ले?” (aiōnios g166) 17 यीशुए उसयो बोलया, “तू मिंजो ला भलाईया दे बारे च कजो पूछा दा है? भला ता इक ही है; पर अगर तू हमेशा दिया जिन्दगिया च प्रवेश करणा चांदा है, तां तू हुकमा जो मना कर।” 18 उनी उसला पुछया, “कुण दे हुकम?” यीशुए बोलया, “ऐ कि हत्या नी करणी, व्यभिचार नी करणा, चोरी नी करणी, झूठी गबाई नी देंणी; 19 अपने माता पिता दी इज्जत करणी, कने अपने पड़ोसियां सोगी अपणयां सांई प्यार रखणा।” 20 उनी मुंडे यीशुए जो बोलया, “इना सारियां गल्लां जो तां मैं मनदा है, हुण मिंजो च कुसा गल्लां दी कमी है?” 21 यीशुए उसयो बोलया, “अगर तू सिद्ध होणा चांदा है, तां जा कने जड़ा कुछ तेरा है उसयो बेची करी गरीबां जो देई दे, तां तिजो स्वर्गे दा धन मिलणा, इयां करणे बाद आ कने मेरा चेला बणिया।” 22 पर ऐ गल्ल सुणीकरी उस जवान मुंडे दे चेहरे पर उदासी छाई गई, कने सै दुखी होइ करी चली गया, क्योंकि सै बड़ा भरी अमीर था। 23 तालू यीशुए अपने चेलयां जो बोलया, “मैं तुसां ने सच्च बोलदा है, कि अमीरां दा स्वर्गे दे राज्य च जाणा बड़ा मुशकिल है। 24 ऊंटे दा सुइया दे नके चे निकलना असान है, पर अमीरां दा परमेश्वरे दे राज्य च जाणा बड़ा भरी मुशकिल है। 25 ऐ सुणीकरी चेले बड़े हेरान होईकरी बोलया, तां कुण अपने पापां दी सजा मिलणे ला बची सकदा है?” 26 यीशुए उना दे पासे दिखीकरी बोलया, “जड़ा माणु नी करी सकदे, पर परमेश्वरे सब कुछ करी सकदा है।” 27 तालू पतरसे यीशुए जो बोलया, “दिख, असां तां सारा कुछ छडी करी तेरे पिच्छे आयो

नः तां सांझो क्या मिलणा है?” 28 यीशुए उना जो बोलया, “मैं तुसां ने सच्च बोलदा है, कि नोए संसारे च जालू माणुए दे पुत्रे अपणिया महिमा दे सिंहासने पर बोंणा है, तां तुसां भी जडे मेरे पिच्छे आयो न, बाहरां सिंहासना पर बेईकरी इस्त्राएले दे बाहरां गोत्रों दा नयाय करणा है।” 29 “कने जिनी घरां जो या भाई, बेहणा जो या माता-पिता जो या बाल-बच्चां जो या खेतरां जो मेरे नाए तांई छडी दितया है, उसयो सो गुणा मिलणा, कने सै हमेशा दिया जिन्दगिया दा अधिकारी होणा। (aiōnios g166) 30 पर मते लोक जडे हुण महान कने अग्रे न, उसी बकते सै पीच्छे होणे, कने जडे पीच्छे न, सै उसी बकते पेहले होणे न।”

20 स्वर्गे दा राज्य इसा कहाणिया सांई है, इक जमींदार था, सै ब्यागा निकलया, ताकि अपने अंगूरा दे बागे च कम्म करणे तांई मजदुरां जो लगा। 2 कने उनी मजदुरां ने इक रोज कम्म करणे तांई इक मजदूरी रखी, अपने अंगूरा दे बागे च कम्म करणे तांई भेजया। 3 फिरी कोई नौ कि बजे ब्यागा निकली करी, होर लोकां जो बजारे च बेकार खडुतयो दिखया, 4 कने उना जो बोलया, “तुसां भी अंगूरा दे बागे च जा, कने जडा ठीक है, सै तुहांजो दिगा।” तां सै भी कम्म करणे तांई गे। 5 फिरी उनी दोपहर कने संझा तिन्न बजे भी निकली करी तियां ही किता। 6 कने लगभग पंज कि बजे निकली करी होरां जो खडोतया दिखया, कने उना जो बोलया, “तुसां कजो ऐथू दिन भर बेकार खडोई रेंदे?” उना उसया बोलया, “इस तांई, कि कुनी भी सांझो मजदूरिया च नी लाया।” 7 उनी उना जो बोलया, “तुसां भी अंगूरा दे बागे च कम्म करणा जा।” 8 संझा जो अंगूरा दे बागे दे मालिके अपने भण्डारिये जो बोलया, “मजदुरां जो सदीकरी जडे सारयां ला आखिर च आयो उना ला लेईकरी जडे सारयां ला पेहले कम्म करणा आयो मजदुरां जो उना दी मजदूरी देई दे।” 9 जालू सै आए जडे पंज बजे कम्मे पर लगयो थे, तां उना जो इक दिने दी दिहाड़ी इक दीनार मिली। 10 जडे पेहले आयो थे उना ऐ समझया, कि सांझो जादा मिलणा पर उना जो भी इक दिने दी दिहाड़ी इक दीनार ही मिली। 11 जालू उना जो इक दीनार मिला, तां सै घरे दे मालिके उपर बुडबुडाणे लग्यो। 12 कि जडे संझा दे पंज बजे आये कने इक ही घंटा कम्म किता, तू उना जो भी उतनी ही दिहाड़ी दिती जितनी तू सांझो दिती, असां दिन भर भार चुक्या कने धूप खादी? 13 तालू बगीचे दे मालिके उना चे इकी जो जबाब दिता, “कि हे मित्र, मैं तिजो ने कोई गलत नी करा दा। क्या मैं तिजो पुरे दिन कम्म करणे दा इक दीनार नी बोलया

था? 14 जड़ी दिहाड़ी तेरी है, सै ले कने चली जा; मेरी मजीं ऐ है कि जितणा मैं तिजो दें, उतणा ही इस इक घंटा कम्म करणे बाले जो भी दें। 15 मिंजो हक है कि मैं अपने पैसे जो अपणिया मरजिया ने खचीं सके। तिजो जलन नी होणा चाईदी कि मैं दुजयाँ ताई दयालु है। 16 पर मते लोक जड़े हुण महान कने अगगे न, उसी बकते सै पीछे होणे, कने जड़े पीछे न, सै उसी बकते पेहले होणे न।” 17 यीशु यरूशलेम शहरे जो जांदे बेले बाहरां चेलयां जो एकांत च लेई गया, कने रस्ते च उना ने बोलणा लगा। 18 “दिखा, ध्याने ने सुणा, असां यरूशलेम चलयो न, कने मैं माणुऐ दा पुत्र बड़े याजकां कने यहूदी व्यवस्था जो सिखाणे बालयां दे हथे पकड़ाया जाणा है, कने उना मिंजो मौत दी सजा देणी है। 19 कने होर जातियां दे हथे देई देणा है। कने उना मेरा मजाक उड़ाणा है, मिंजो पर थुकणा, कने मिंजो कोड़े मारणे, कने मिंजो सूली पर चढ़ाई करी मारी देणा है, कने मैं तिजे दिने मरयां चे जिंदे होई जाणा है।” 20 तालू जब्दी दे पुत्रां दिया माऊ अपने बचयां सोगी उदे बाल आई करी उसयो नमस्ते किते, कने उसला कुछ मंगणा लग्गी। 21 यीशुऐ उसा जो बोलया, “तू क्या चांहदी है?” उना उसयो बोलया, “ऐ बचन दे, कि मेरे ऐ दोनो पुत्र तेरे राज्य च, इक तेरे सजे पासे कने इक खबे पासे बेई सकन।” 22 यीशुऐ जबाब दिता, “तुसां जो नी पता कि तुसां क्या मंगा दे? हुण जड़े दुख मैं सेहणे न, क्या तुसां उना दुखां जो सेहन करी सकदे न?” उना उसने बोलया, “हाँ करी सकदे न।” 23 यीशुऐ उना जो बोलया, “तुसां भी सारे दुख सेहणे न, जियां मैं सेहणे। पर अपने सजे कने खबे पासे बैठलना मेरा कम्म नी है, पर जिना ताई मेरे पिता दिया तरफा ला तैयार कितया है, उना ताई ही न।” 24 ऐ सुणीकरी बाकी दसो चले याकूब कने यूहन्ना पर गुस्सा करणा लग्गे। 25 तां यीशुऐ उना जो अपने बाल सदीकरी बोलया, “तुहांजो पता है ना, कि जड़े लोक प्रधान मने जादें थे, सै अपने अधिकारां दा इस्तेमाल अपने अधीन लोकां दे उपर हक जमाणे ताई करदे न। उना दे अगुवे लोक अपनी गल्ल मनाणे ताई हक जतांदे न। 26 तुसां चे जड़ा महान बणना चांदा है, उसयो बाकियां दी सेबा करणी चाईदी। 27 कने जड़ा कोई तुसां चे प्रधान बणना चांदा हो, सै सारायां दा नौकर बणे। 28 मैं ऐ इस ताई बोलदा है क्योंकि मैं माणुऐ दा पुत्र, इस संसारे च सारायां दी सेबा करणे ताई आया है, मैं इस ताई नी आया कि लोकां ला अपनी सेबा करां। मैं तां लोकां जो पापां ला छुटकारा करणे ताई अपने प्राण कीमत च देणा आया है।” 29 जालू सै यरीहो

शेहरे ला निकला दे थे, तां इक बड़ी बड़ी भीड़ उदे पिच्छे चली पेई। 30 दो अन्ने, जड़े सड़का बखे बैठयो थे, ऐ सुणीकरी कि यीशु जा दा है, पुकारी करी बोलणा लग्गे, “हे प्रभु, दाऊदे दे बंशज, सांझो पर दया कर।” 31 लोकां उना जो झिड़कां दितियां, कि चुप रिया, पर सै होर भी जोरे ने चीलाई करी बोलणा लग्गे, “हे प्रभु, दाऊदे दी ओलाद, सांझो पर दया कर।” 32 तालू यीशुए खडोई करी, उना जो सदया, कने बोलया, “तुसां क्या चांदे न कि मै तुहाडे ताई करे?” 33 उना उसने बोलया, “प्रभु जी, ऐ कि साडियां हखी खुली जान।” 34 यीशुए तरस खाई करी उना दियां हखी छूतियां, कने उना जो झट मिलणा लगी पिया, कने सै उदे पिच्छे चली पै।

21 जालू सै यरूशलेम दे बखे पुज्जे कने जैतून स्खां दे पाहडे पर बैतफगे जगा च आए, तां यीशुए दो चेलयां जो ऐ बोली करी भेजया, 2 “अपणे सामणे बाले ग्रां च जा, ओथु पुजदे ही इक गधी बनियो होणी कने सोगी उसा दा बच्चा भी बनया होणा। उना जो खोली करी मेरे बाल लेई ओआ। 3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जरूरत है, कने उनी माणुए तुसां जो लेई जाणा देणा है।” 4 ऐ इस ताई होया, कि जड़ा बचन परमेश्वरे दा संदेश देणेबाले बोलया था, सै पूरा हो: 5 “सियोन दिया कुडिया ने बोला, दिख, तेरा राजा तेरे बाल ओआ दा है; सै नम्र है, कने गधे पर बैठया है; मतलब कि लादूए दे बच्चे पर बेईकरी ओआ दा है।” 6 चेलयां जाई करी, तियां ही किता, जियां यीशुए उना ने बोलया था। 7 गधी कने उसा दा बच्चा लांदा कने उना पर अपणे कपड़े बछाई दिते, कने यीशु उस पर बेई गया। 8 कने मते लोकां अपणे कपड़े रस्ते च बछाए, कने केई लोकां स्खा जो छांगी करी डालियाँ रस्ते च बछाईयां। 9 कने थोड़े लोक यीशु दे अग्गे-अग्गे चलयो थे, कने थोड़े लोक पिच्छे चलयो थे, सै सारे खुशिया ने बोला दे थे, “दाऊदे दे बंशज दी होशाना; धन्य सै जड़ा प्रभु दे नाए ने ओंदा है, स्वर्ग च होशाना।” 10 जालू यीशु यरूशलेम शेहरे च पुज्जा, तां सारे नगरे च हिल पेई गई, कने लोक बोलणा लग्गे, “ऐ कुण है?” 11 लोकां बोलया, “ऐ गलीले प्रदेश दे नासरते ग्रां दा परमेश्वरे दा संदेश देणेबाला यीशु है।” 12 यीशुए परमेश्वरे दे मंदरे च जाई करी व्यपारी लोकां जो मंदरे ला कडी दिता, जड़े ओथु जानवर कने चिजां खरीदणे बचने दा कम्म करा दे थे। कने पेसे बदलने बाले साहुकारां दे मेज पलटी दिते, कने कबुतरां जो बेचणे बालयां दियां

चौकियाँ जो बाहर सूटीं दिता। 13 कने यीशुऐ उना जो बोलया, पबित्र शास्त्र ऐ बोलदा है कि, “लोक में घरे जो प्राथना दा घर बोलदे न, जिथू सारे लोक प्राथना ताई ओदे न? पर तुसां तां इसयो डाकुआं ने भरईयो गुफा सांई बणाई दितया है।” 14 तालू अन्ने कने लंगड़े, मंदरे च उदे बाल आये, कने यीशुऐ उना जो खरा करी दिता। 15 पर जालू बड़े याजकां कने व्यवस्था जो सिखाणे बालयां इना अनोखे कम्मा जो दिखया, जड़े यीशुऐ किते कने मंदरे च जागतां जो दाऊदे दे बंशजे जो होशाना बोलदे सुणया, तां सै गुस्सा होई गे, 16 कने उसयो बोलणा लग्गे, “तू क्या सुणा दा है कि ऐ क्या बोला दे न?” यीशुऐ उना ने बोलया, “हाँ; तुसां क्या ऐ कदी नी पढ़या की: जागतां कने दूध पिंदे बचयां दे मुऐ ला तू स्तुति कराई?” 17 तालू सै उना जो छडी करी नगरे दे बाहर बैतनिय्याह ग्रां जो गया, कने ओथु रात बिताई। 18 ब्यागा जालू सै नगरे जो बापस ओआ दा था, तालू यीशुऐ जो भूख लग्गी। 19 सड़का बखे अंजीर दा इक सूख दिखया, कने सै उस बाल गया, कने उस सूखे च पतयां जो छडी करी होर कुछ नी था, उनी उसयो बोलया, “हुण तिजो पर कदी फल नी लगणे न।” कने अंजीर दा सूख झट सुकी गया। (aiōn g165) 20 ऐ दिखीकरी चले बड़े हेरान होए, कने बोलणा लग्गे, “ऐ अंजीर दा सूख झट कियां सुकी गया?” 21 यीशुऐ उना जो जबाब दिता, “मैं तुसां ने सच्च बोलदा है; अगर तुसां भरोसा रखन, कने शक नी करन; तां सिर्फ तुसां ऐ नी करणा जड़ा इस अंजीर दे सूखे ने किता है, अगर तुसां इस पाहड़े जो भी बोलगे कि ऐथू ला पुटई जा, कने समुंद्रे च जाई पो, तां ऐ होई जाणा।” 22 “कने जड़े कुछ तुसां प्राथना च भरोसे ने मंगगे सै सारा कुछ तुसां जो मिलणा।” 23 सै मंदरे च जाई करी उपदेश करा दा था, तां बड़े याजकां कने यहूदी व्यवस्था जो सिखाणे बालयां कने यहूदी अगुवे उदे बाल आये कने उसयो पुछणा लग्गे, “तू ऐ कम्म कुसदे अधिकारे ला करदा है? कने तिजो ऐ हक कुनी दितया है?” 24 यीशुऐ उना जो जबाब दिता, “मैं भी तुहांजो ला इक गल्ल पूछदा है, अगर तुसां मिंजो जबाब दिगे, तां मैं दसगा कि ऐ कम्म मैं कुसी हके ने करदा है। 25 यहून्ना जो लोकां जो बपतिस्मा देणे तांई कुनी भेजया था? क्या सै परमेश्वरे भेजया था या माणुऐ? मिंजो दसा।” तालू सै अपु चे बोलणा लग्गे कि अगर असां बोलया कि, “परमेश्वर जड़ा स्वर्गे च है उनी भेजया है, तां यीशुऐ सांझो ला पुछणा, कि तुसां यहून्ना पर भरोसा कन्नी किता?” 26 कने अगर बोलन माणुऐ दिया तरफा ला तां सांझो भीड़ा दा डर है, क्योंकि सै उना

लोकां ला डरदे थे, जडे यूहन्ना जो परमेश्वर दे पासे ला आया इक सच्चा परमेश्वरे दा संदेश देणेवाला मंदे थे। 27 उना यीशुए जो जबाब दिता, “असां नी जाणदे।” यीशुए भी उना जो बोलया, “तां मै भी तुहांजो नी दसणा, कि ऐ कम्म मै कुस हके ने करदा है।” 28 “तुसां इसा कहाणिया ला क्या सोचदे कने समझदे न? कुसी माणुए दे दो जागत थे; उनी पेहले बाल जाई करी बोलया, अज अंगूरा दे बागे च जाई करी कम्म कर।” 29 उनी जबाब दिता, मै नी जाणा, पर बादे च उसयो पछताबा होया कने फिरी चली गया। 30 फिरी दुज्जे बाल जाई करी इयां ही बोलया, उनी जबाब दिता, जी हॉ मै जांदा है, पर सै गया नी। 31 इना दोना चे कुनी परमेश्वरे दी इच्छा पुरी किती है? उना बोलया, “पेहले बाले।” यीशुए उना ने बोलया, “मै तुसां ने सच्च बोलदा है, कि कर लेणेबाले कने वेश्यां तुहांजो ला पेहले परमेश्वरे दे राज्य च प्रवेश करणा है। 32 मै ऐ इस ताई बोलया क्योंकि जालू यूहन्ना बपतिस्मा देणेबाले तुहांजो दसया कि कियां सही तरीके ने जीणा है, कने तुसां उदा भरोसा नी किता। पर कर लेणे बालयां कने वेश्यां अपने पापां जो छडी दिता कने उदा भरोसा किता: कने तुसां ऐ दिखीकरी बादे च भी नी पछताय कि उदा भरोसा करी लेदे।” 33 “इक होर कहाणी सुंणा: इक माणुए बागे च अंगूर लाये। उनी बागे दे चारों पासे बाड लगवाया, कने इक जगा अंगूरा दे रसे जो निचोड़ने ताई बणाई, कने निगरानी रखणे ताई इक उचिया जगा पर कमरा बणाया। फिरी उनी बागे जो कुछ किसाना जो ठेके पर देई दिता, कने परदेस जो चली गया। 34 फिरी जालू अंगूर पक्की गे, तां उनी अपने नोकरां जो ठेकेदारे बाल अपना अंगूरा दे बागे दा हिस्सा लेंगे ताई भेजया। 35 पर ठेकेदारां उदे नोकरां जो पकड़ी करी, कोई कूटया, कोई मारी दिता; कने केईयां जो पथरा ने मारया। 36 फिरी उनी पेहले ला भी जादा होर नोकरां जो भेजया, कने उना ठेकेदारां उना सोगी भी तियां ही किता। 37 आखरी च उनी अपने पुत्रे जो उना बाल ऐ सोची करी भेजया, कि उना मेरे पुत्रे दी इज्जत करणी। 38 पर ठेकेदारां पुत्रे जो दिखीकरी अपु चे बोलया कि, ऐ तां वारिस है, ओआ असां इसयो मारी दिन्दे न, कने इदी सारी जगा जमीन साड़ी होई जाणी। 39 कने उना उसयो पकड़या कने अंगूरा दे बागे ला बार कडी करी मारी दिता। 40 इस ताई कि जालू अंगूरा दे बागे दा मालिक ओगा तां, तां सै ठेकेदारां सोगी क्या करगा?” 41 उना उसने बोलया, “उनी उना बुरे लोकां जो बुरे तरीके ने खत्म करी देणा; कने अंगूरा दे बागे दा ठेका होर किसाना

जो देई देणा, जडे उसयो बकते पर फल दिगे।” 42 यीशुऐ उना ने बोलया, “तुसां क्या कदी पबित्र शास्त्रां च ऐ नी पढया: जिस पथरे जो राजमिस्त्रियां बेकार बोलया था, सै ही पथर कुंणे च सिरे दा पथर बणया? ऐ प्रभु दिया तरफा ला होया, पर साड़िया नजरा च अनोखा है।” 43 इस ताई मैं तुसां ने बोलदा है, कि परमेश्वरे दा राज्य तुहांजो ला लेई लेणा है, कने ऐसे लोका जो देई देणा है जडे सै ही करगे जडा परमेश्वर चादां है। 44 “जडा इस पथरे पर पोंगा, उदा चूर भुर होई जाणा; जिदे पर सै पथर पोंगा, उसयो पि सड़ना उनी।” 45 बट्टे याजकां कने फरीसी उदिया इसा कहाणिया जो सुणीकरी समझी गे, कि सै साडे बारे च बोला दा है। 46 कने सै उसयो पकड़ना चांदे थे पर लोकां ला डरी गे क्योंकि सै उसयो परमेश्वरे दा संदेश देणेबाला मंदे थे।

22 यीशुऐ फिरी उना जो कहाणी सुणाई, 2 “स्वर्गे दा राज्य इक कहाणिया सांई है, इक राजा था जिनी अपने पुत्रे दा बियाह किता।” 3 उनी अपने नोकरां जो भेजया कि जिना जो नियुंद्र दितियो उना लोकां जो बियाह दिया धामा च सदा; पर सै कोई ओणा नी चांदे थे। 4 “फिरी उनी होर नोकरां जो ऐ बोली करी भेजया, कि नियुंद्र दितियो लोकां ने बोला: दिखा मैं धाम तैयार करी दितियो है, कने सारा कुछ तैयार है; कने तुसां बियाये दिया धामा च ओआ। 5 पर सै बहाना लाइ करी चली गे: कोई अपने खेतरां जो, कोई अपने कम्म धंधे जो। 6 बाकी लोक जडे बचा थे उना नोकरां जो पकड़ी करी उना दा अनादर किता कने मारी दिता। 7 जालू राजे ऐ सुणया तालू राजे जो गुस्सा आया, कने उनी अपनी सेना भेजी करी उना हत्यारां जो मरवाया, कने उना दे शेहरे जो फुकी दिता। 8 तालू उनी अपने नोकरां ने बोलया, बियाये दी धाम तां तैयार है, पर सदयो लोक खांणे जोगे नी न। 9 इस ताई तुसां हर जगा जा, कने जितणे भी लोक तुसां जो मिलन, सबना जो बियाये दिया धामा तांई सदी लोआ। 10 उना नोकरां हर जगा पर जाई करी क्या बुरे, क्या भले, जितणे भी मिल्ले, सब गठेरे; कने बियाये बाला घर परोंणया ने भस्ई गिया। 11 जालू राजा परोंणया जो दिखणे तांई अंदर आया, तां उनी ओथु इक माणुऐ जो दिखया, जिनी बियाये तांई खरे कपडे नी पायो थे। 12 राजे उसला पुछया, है मित्र, तू बिना बियाये दे नोऐ कपडे पाई करी ऐथू कजो आया? कने सै चुप होई गिया। 13 तालू राजे नोकरां ने बोलया, इदे हथ-पैर बन्नी करी इसयो काल कोठडी च पाई दिया, ओथु उनी रोणा कने, दंद पीणे। 14 क्योंकि परमेश्वरे मते लोकां जो अपने बाल सदया है

पर थोड़े ही न जड़े चुणयो न।” 15 तालू फरीसियां जाई करी अपु चे बिचार किता, कि उसयो कुस तरीके ने गल्लां च फसान। 16 उना अपने चेलयां जो हेरोदियां सोगी उदे बाल ऐ बोलणे जो भेजया, “गुरू जी, असां जो पता है कि तुसां हमेशा सच्च बोलदे न, कने परमेश्वरे दा रस्ता सच्चाईया ने दसदा है, कने कुदी भी परवाह नी करदे न, क्योंकि तू माणुऐ दा मुऐ दिखीकरी गल्ल नी करदा है। 17 इस ताई सांझो दस कि तू क्या सोचदा है? महाराजा जो कर देणा ठीक है, कि गलत है।” 18 यीशुऐ उना दी बुराई जाणी करी बोलया, “है कपटियों, मिंजो कजो परखदे न?” 19 करे दा सिक्का मिंजो दसा। “तालू सै उदे बाल इक दीनार लेई आये।” 20 उनी, उना ला पुछया, “ऐ आकृति कने ना कुसदा है?” 21 उना उसने बोलया, महाराजा दा। तालू उनी उना जो बोलया, “जड़ा महाराजा दा है, सै महाराजा जो, कने जड़ा परमेश्वरे दा है, सै परमेश्वरे जो दिया।” 22 ऐ सुणीकरी सै हेरान होये, कने उसयो छडी करी चली गे। 23 उसी रोजे सद्की जड़े बोलदे थे कि मरयां दा जिन्दा होणा है ही नी सै यीशुऐ बाल आए, कने उसला पुछया, 24 “गुरू जी, मूसा बोलया था, कि अगर कोई बिना ओलादी मरी जा, तां उदा भाई उदिया घरे बालिया ने बियाह करी के अपने भाई ताई बंश पैदा करे। 25 हुण साडे ऐथू सत भाई थे; पेहला भाई बियाह करिके मरी गया; कने ओलाद नी होणे दिया बजा ने अपणिया घरे बालिया जो अपने भाईऐ ताई छडी गया। 26 तां दुऐ भाईऐ उसा ने ही बियाह करी लिया कने से भी बिना ओलादी मरी गया, कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे। 27 सबना दे बाद सै जनानी भी मरी गई। 28 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी?” 29 यीशुऐ उना जो बोलया, “तुसां दो बजा ने गलत न, तुसां पबित्र शास्त्र जो नी जाणदे ने जड़ा मरणे दे बाद लोकां जो जिन्दा रेणे दे बारे च दसदा है। तुसां ऐ नी जाणदे कि परमेश्वर बाल मरे होये लोकां जो जिन्दा करणे दी शक्ति है।” 30 क्योंकि जालू उना मरयां चे जिन्दा होणा, तां उना लोका दे बियाह नी होणे; जियां स्वर्गे च रेणेबाले स्वर्गदूत बियाह नी करदे। 31 “मरयां चे जिन्दा होणे दे बारे तुसां क्या मूसा दिया कताबां च नी पढ़या जड़ा परमेश्वरे तुसां जो बोलया: 32 मैं अब्राहम दा परमेश्वर, कने इसहाक दा परमेश्वर, कने याकूब दा परमेश्वर है? सै मरयां दा नी, पर जिन्दया दा परमेश्वर है।” 33 ऐ

सुणीकरी लोक उदे उपदेशे ला हेरान होए। 34 जालू फरीसियां सुणया कि यीशुए सदूकियां दा मु बंद करी दितया है, तां सै गिठे होए। 35 उना चे इकी यहूदी मूसा दी व्यवस्था जो सिखाणे बाले परखणे तांई, यीशुए ला पुछया, 36 “गुरू जी, परमेश्वरे जड़े भी हुकम दितयो न, उना सारयां चे सारयां ला बडा हुकम कुण दिया है?” 37 उनी उना जो बोलया, “तू अपने प्रभु परमेश्वर ने अपने सारे तन मन कने सारे प्राण कने अपणिया सारिया अकला सोगी प्यार कर।” 38 सारयां ला बडा कने मुख्य हुकम तां ऐ ही है। 39 कने उस सांई ऐ दूजा हुकम भी है, कि तू अपने पड़ोसियां सोगी अपने सांई प्यार रख। 40 “इना दो हुकमा पर ही सारी व्यवस्था कने भविष्यवाणियां आधारित न।” 41 जालू फरीसी गिठे थे, तां यीशुए उना ला पुछया, 42 “मसीह दे बारे च तुसां क्या सोचदे न? सै कुदा पुत्र है?” उना यीशुए ने बोलया, “दाऊदे दा बंशज।” 43 यीशुए उना ला पुछया, “तां दाऊद आत्मा च होईकरी उसयो प्रभु कजो बोलदा है?” 44 “प्रभुए, मेरे प्रभु ने बोलया, मेर सजे पासे बो, जालू दीकर मैं तेरे दुशमणा जो तेरे पैरां हेठ नी करी दें।” 45 “भला, जालू दाऊद ही उसयो प्रभु बोलदा है, तां सै उदा पुत्र कियां होया?” 46 उदे जबाबे च कोई भी कुछ नी बोली सकया। पर उस रोजे ला कुसयो भी फिरी उसला पूछणे दी हिम्मत नी होई।

23 तालू यीशुए भिड़ा कने अपने चेलयां जो बोलया, 2 “फरीसियां कने व्यवस्था जो सिखाणे बालयां जो मूसा दिया व्यवस्था दी व्याख्या करणे दा हक है।” 3 इस तांई सै तुसां ने जड़ा कुछ बोलगे सै तुसां करणा कने मनणा, पर जड़ा सै करदे न सै मत करदे; क्योंकि सै उपदेश दा दिन्दे न पर उना दा पालन नी करदे। 4 सै अपु अपनी व्यवस्था दा पालन करणे दी कोशिश भी नी करदे। कने ऐसे नियम बणादे न जिना दा पालन करणा बडा मुशकिल है। 5 सै अपने सारे कम्म लोकां जो दसणे तांई करदे न: सै अपणिया बांई कने मथे पर पट्टियां बनदे न जिना च पबित्र शास्त्र दे बचन लिखयो होंदे न, कने अपने कपडयां दियां झालरां बदांदे न। 6 धामा च समानित जगा च बोणा चांदे न, कने यहूदी जंज घर च भी खास-खास आसना पर बोणा पंसद करदे न, 7 बजारां च सारे लोक उना जो नमस्ते कने सारे उना जो गुरू जी बोलन सै उना जो खरा लगदा है। 8 पर तुसां गुरू मत बणदे, क्योंकि तुहाड़ा इक ही गुरू है: कने तुसां सारे भाई-बेहणा सांई न। 9 कने अपने पिता जो छडी करी कुसयो भी धरतिया पर अपने पिता परमेश्वरे दा आदर मत दिन्दे क्योंकि

तुहाडा इक ही पिता है, जडा स्वर्ग च है। 10 कने कुसी दे गुरू भी मत बणदे, क्योंकि तुहाडा इक ही गुरू है, मतलब कि यीशु मसीह। 11 जडा तुसां चे बडा है, सै तुहाडा सेवक बणे। 12 जडा कोई अपने आपे जो बडा बणांगा, सै नम्र करी देणा: कने जडा कोई अपने आपे जो छोटा बणांगा, सै बडा करी देणा। 13 “हे कपटी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां लोकां जो स्वर्गे दे राज्य च जाणे दी इजाजत नी दिन्दे, ना तां अपु स्वर्गे च जाणा, कने ना तां स्वर्ग जाणे बालयां जो जाणा दिन्दे न।” 14 “हे कपटी व्यवस्था जो सिखाणे बालयो कने फरीसियां, तुहांजो ताई बडा बुरा होणा है। तुसां धोखे कने वेईमानिया ने विधवां दे घरां दी चिजां पर कब्जा करी लेंदे है। कने लोकां जो दसणे ताई बड़ी देरा दीकर प्राथना करदे न, परमेश्वरे इना जो बड़ी बुरी सजा देणी है।” 15 “हे कपटी यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां इक जणे जो अपने भरोसे च लोंणे ताई सारियां जगा च दुरे-दुरे दीकर गुमदे फिरदे रेंदे न, कने जालू सै भरोसे च आई जांदा है, तां उसयो अपने ला दुगणा नरक जाणे जोगा बणाई दिन्दे न।” (Geenna g1067) 16 हे अन्ने अगुवाई करणे बालयो, तुहांजो ताई बडा बुरा होणा है, कि तुसां सिखांदे न कि अगर कोई मंदरे दी कसम खा तां कोई फरक नी है, पर अगर कोई मंदरे दे सोने दी कसम खा तां उदे ताई कसम पूरी करणा जरूरी होई जांदा है। 17 है मूर्खो, कने अन्नयो कुण बडा है, मंदरे दा सोना या सै मंदर जिसला सै सोना पबित्र होंदा है? 18 कने फिरी तुसां ऐ भी सिखांदे न कि अगर कोई वेदी दी कसम खा तां कुछ फर्क नी है, पर जड़ी भेंट उस पर चढाई है, अगर कोई उसा दी कसम खा तां फर्क पोंदा है। 19 हे अन्नयो, कुण बडा है, भेंट या वेदी जिसने भेंट पबित्र होंदी है? 20 इस ताई जडा वेदी दी कसम खांदा है, सै उदी कने जडा कुछ उसा पर है, उदी भी कसम खांदा है। 21 कने जडा मंदरे दी कसम खांदा है, सै उदी कने उदे च रेणेबाले परमेश्वरे दी भी कसम खांदा है। 22 कने जडा स्वर्गे दी कसम खांदा है, सै परमेश्वरे दे सिहांसने दी भी कने उस पर बोणे बाले दी भी कसम खांदा है। 23 यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां पुदीने, कने सौफ, कने जिर, दा तां दसमां हिसा दिन्दे न, पर तुसां व्यवस्था दियां जरूरी गल्लां जो मतलब कि न्याय, कने दया, कने इमानदार होणा छडी दिता है; तुहांजो दशमांश तां दिन्दे रेणा चाईदा था, पर इना गल्लां जो भी नी छडणा चाईदा था। 24 हे

अन्ने यहूदी अगुवो, (अगुवाई करणे बाले) तुसां जडे नियम जरूरी नी न उना जो तां बडिया साबधानिया ने मंदे न, जियां कि पिंदे बेले माखियाँ जो दूर करदे पर परमेश्वरे दी जरूरी गल्लां जो मंदे नी न! ऐ ऊंटे जो निगलने सांई है। 25 “यहूदी व्यवस्था जो सिखाणे बाले कने फरीसियों, तुहांजो तांई बडा बुरा होणा है। तुसां ऐसे कटोरे कने भांडे सांई न जडे तां उपरे-उपरे ला तां साफ न, पर अंदरे ला अजे भी गंदे न। सै ऐ कि, तुसां अपने आपे जो भले लोकां सांई दसदे न, पर तुहाडे मन लालची कने मतलबी न।” 26 हे अन्ने फरीसी, पेहले तुसां जो लालची कने मतलबी होणा रोकी देणा चाईदा तां तुसां से ही करी सकणा जडा धर्म है। 27 “यहूदी व्यवस्था जो सिखाणे बाले कने फरीसियों, तुहांजो तांई बडा बुरा होणा है। तुसां तां उना सफेदी कितियां कबरां सांई न जडियां उपरे ला तां छेल मिलदियाँ न, पर अंदर मुर्दयां दियां हडियाँ कने हर तरा दियां गंदगिया ने भरूइयां न।” 28 इना कबरां सांई तुसां भी उपरे ला तां माणुऐ जो धर्मीं लगदे न, पर तुसां अंदरे ला कपट कने पापां ने भरूयो न। 29 “यहूदी व्यवस्था जो सिखाणे बाले कने फरीसियों, तुहांजो तांई बडा बुरा होणा है। तुहाडे पूर्वजां जिना परमेश्वरे दा संदेश देणेबालयां जो मारया था उना दियां कबरां जो सजादे न कने धर्मीं लोकां दियां कबरां जो सम्मानित करदे न।” 30 कने बोलदे न कि, अगर असां अपने बाप दादयां दे बकते च होंदे तां असां परमेश्वरे दा संदेश देणेबालयां दिया हत्या च हिस्सेदार नी होंदे। 31 इसला तां तुसां अपु ही साबित करदे न कि तुसां उना लोकां दे बंशज न जिना परमेश्वरे दा संदेश देणेबालयां दी हत्या कितियो। 32 तुसां उस बुराईया जो पूरा करणे बाले न जिसयो तुहाडे पूर्वजां शुरू कितया था। 33 हे जहरीले सप्पां दे बचयां सांई लोको कने करैतों दे बच्चयों, तुसां नरके दिया सजा ला नी बचणा है। (Geenna g1067) 34 इस तांई मैं तुहाडे बाल परमेश्वरे दा संदेश देणेबालयां जो भेजदा है। कने, बुद्धिमान, कने व्यवस्था जो सिखाणे बालयां जो भेजदा है; तुसां इना चे थोडयां जो मारी देणा हे, कने केईयां जो सूली पर चढाना कने केईयां जो अपने यहूदी जंज घर च कोड़े मारणे, कने इकी शेहरे ला दुजे शेहरे जो नठाणे न। 35 धर्मीं हाबिल ला लेईकरी बिरिक्याह दे पुत्रे जकर्याह दीकर, जिसयो तुसां मंदरे कने वेदिया दे बिच मारया था, जितणया धर्मियां दी हत्या इसा धरतिया च होईयो है, उना सारयां तांई तुसां जो दोषी बोलणा। 36 “मैं तुसां ने सच्च बोलदा है, इना सारियां हत्या दी सजा इस बकते दे लोकां पर आई पोणी है।” 37 “यरूशलेम

शेहेरे दे लोको, हे यरूशलेम दे लोको! तुसां जड़े परमेश्वरे दा संदेश देणेबालयां जो मारी दिन्दे न, कने जीना जो तुहांजो बाल भेजदे न, उना जो पथरा ने मारदे न, कितणी बरी मैं चाया कि जियां मुर्गीं अपणे बचयां जो बचाणे ताई फंगा हेठ गिठे करी लेंदी है, तियां ही मैं भी तुसां जो गिठे करी लेणा, पर तुसां नी चांदे कि ऐसा हो।” 38 दिखा, तुहाडा मंदर तुहाड़े ताई उजाड़ी छडया है। 39 “क्योंकि मैं तुसां ने बोलदा है, हुणी ला जालू दीकर तुसां नी बोलगे, कि धन्य है सै, जडा प्रभु दे अधिकारे ने ओंदा है, तालू दीकर तुसां मिंजो फिरी कदी नी दिखणा है।”

24 जालू यीशु मंदरे ला निकली करी जा दा था, तां उदे चेले उसयो मंदरे दी बनावटा जो दसणे ताई उदे बाल आये। 2 उनी उना जो बोलया, “क्या तुसां ऐ सारा कुछ दिखा दे न। मैं तुसां ने सच्च बोलदा है, ऐथू इक भी पथरे पर पथर नी रेंणा है, जडा ढाया नी जाणा है।” 3 जालू सै जैतून सखां दे पाहड़े पर बैठया था, तां चेलयां उदे बाल आई करी उसला पुछया, “सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होंगा तां उदा क्या निशाण होणा है?” (aiōn g165)

4 यीशुऐ उना जो जबाब दिता, “ध्यान रख्यो कि तुहांजो कोई भटकाई न दे।” 5 क्योंकि मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ कने उना मतयां लोकां जो भटकाणा है। 6 जालू तुसां लडाईयां, कने लडाईयां दियां गल्लां सुणगे तां डरदे मत; क्योंकि इना दा होणा जरूरी है, पर तालू संसारे दा खात्मा नी होणा है। 7 क्योंकि जातियां ने जातियां कने राज्य ने राज्यां ने इक दुजे ने लडाईयां करणियां न। कने हर कुथी हिलण होणे न कने अकाल पोणे न। 8 ऐ तकलीफ कने दुख इयां होणा जियां इक माँ जो बच्चे दे जन्म देणे दिया शुरूआत च होँदा है। 9 “तालू सै लोक जड़े तुहाड़े खिलाफ न, उना तुहांजो दुख देणे ताई पकड़ाई देणा है, कने तुहांजो मारी देणा है, कने सारियां जातियां दे लोकां तुसां ने दुशमणी रखणी है क्योंकि तुसां मिंजो पर भरोसा रखदे न।” 10 तालू मतयां मिंजो पर भरोसा करणा बंद करी देणा, कने इक दुज्जे जो पकड़ाणा कने इक दुजे ने दुशमणी रखणी। 11 मतयां परमेश्वरे दे संदेश देणेबालयां झूठे लोकां ओणा है, कने उना मतयां जो भटकाणा। 12 पाप बदणे दिया बजा ने मतयां इक दुज्जे ला प्यार करणा बंद करी देणा है। 13 पर जडा जिंदगी दे अंत दीकर मिंजो पर भरोसा रखगा सै ही बचाया जाणा है। 14 कने स्वर्गे दे राज्य दा ऐ शुभसमाचार दा प्रचार सारे संसारे च करणा है, ताकि सारे देशां दियां सारियां जातियां जो इसयो मनणे दा मोका

मिल्ले, तालू अंत होई जाणा है। 15 “इस ताई जालू तुसां इक उजाडने बाली बड़ी बुरी चिजा जो यरुशलम मंदिर च खडोतयो दिखगे, जिदी चर्चा परमेश्वरे दा संदेश देणेबाले दानियेले किती थी, (जडे पढन, सै समझन)।” 16 तालू यहूदिया प्रदेशे दे लोकां जो जान बचाणे ताई पहाडा जो नसणा पोणा। 17 जडे छती पर होंगे, सै अपने घरे चे समान लेंगे ताई थले मत उतरदे। 18 कने जडे खेतरां च होंगे, सै अपने कपडे लेंगे ताई बापस मत जांदे। 19 उना रोजां च उना जनानिया ताई बडा बुरा बकत होणा जडियां लैरथियां होणियां न, कने उना जनानियां ताई जडियां नियाणे जो दूध पियादियां होंगियां। 20 इस ताई प्राथना करा कि ऐ बुरा बकत सर्दियां दे दिना च या सब्ते दे दिना ना हो, जालू सफर करणा मुशकिल हो। 21 क्योंकि उना दिना लोकां जो बडे दुख होणे न, जदिया संसार दे शुरू ला हुणे दीकर कदी नी होया कने ना कदी होणा। 22 “अगर परमेश्वरे उसी बुरे बकते जो नी घटादां, तां कोई भी माणु नी बचदा। पर उना चुणयो होए लोकां दिया बजा ला, जिना जो परमेश्वरे चुणयां है, बकत घटणा है।” 23 “उस बेले तुसां जो कोई बोले, कि दिखा, मसीह ऐथू है! या ओथु है! तां भरोसा मत करदे।” 24 क्योंकि झूठे मसीह कने परमेश्वरे दा संदेश देणेबाले झूठे लोकां मतयां ओणा है, कने उना बडे चमत्कार कने अनोखे कम्म दसणे न, ताकि होई सके तां जडे चुणयो न उना जो भटकाई देंन। 25 मैं पेहले ला ही तुसां ने ऐ सब कुछ बोली दिता है। 26 इस ताई अगर सै तुसां ने बोलन, कि दिखा, सै सुनसान जगा च है, तां बाहर मत निकलदे; दिखा, सै कोठडियां च है, तां भरोसा मत करदे। 27 क्योंकि जियां बिजली पूर्व ला निकली करी पश्चिम दीकर चमकदी जांदी है, तियां ही माणुए दे पुत्रे भी ओणा है। 28 “जिथू लाश होऐ, ओथु ही इल्लां गिठियां होणा है।” 29 “उना दिना च, बुरा कने दुखे बाल बकत मुकी जाणे दे बाद, सूरजे च अंधेरा होई जाणा, कने चद्रमें रौशनी नी देणी। अम्बरे ला तारायां पेई जाणा, कने अम्बरे दियां शक्तियाँ हिलाईयां जाणियां।” 30 “तालू मैं, माणुए दे पुत्रे दा निशाण अम्बरे च मिलणा, तालू धरतिया दे सारे कुलां दे लोकां छाती पिटणी; कने माणुए दे पुत्रे जो बडे सामर्थ्य कने महिमा सोगी बदलां पर ओंदे दिखणा।” 31 “उनी तुरही दी जोरे दिया अबाजा ने अपने स्वर्गदूतां जो भेजणा है, ताकि सै उना सारे लोकां जो गठेरी करी, जिना जो मैं चुणयां है कने उना संसारे दे चारों पासयां ला लोका जो गठेरणा है।” 32 “अंजीर दे स्रखे दिया कहाणिया ला ऐ सिखा: जालू उदिया डालियाँ नरम होई जांदियां न कने

पते निकलना लगदे न, तां तुहांजो पता लगी जांदा है कि गर्मियां ओणे बालियां न। 33 इयां ही जालू तुसां इना सारियां गल्लां जो होंदे दिखदे न, तां समझी जा कि मैं, माणुऐ दे पुत्रे दा ओणा नेडे ही है, मतलब कि दरबाजे पर ही है।” 34 मैं तुसां ने सच्च बोलदा है, कि जालू दीकर ऐ सारियां गल्लां पुरियां नी होई जांदियां न, तालू दीकर इसा पीढ़िया दा अंत नी होणा है। 35 अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंणियां न। 36 ऐ गल्लां कुसी रोजे या कुसा घड़िया होणिया न कोई भी नी जाणदा है, ना स्वर्गदूत कने ना ही मैं माणुऐ दा पुत्र, पर सिर्फ पिता ही उसी रोजे कने घड़िया जो जाणदा है। 37 “जियां नूह दे रोज थे, तियां ही माणुऐ दे पुत्रे दा ओण भी होणा है।” 38 क्योंकि जियां जल-प्रलय ला पेहले दे दिना च, जिस रोजे दीकर नूह जहाजे पर नी चढया था, तालू दीकर लोक खांदे पिंदे थे, कने उना चे बियाह होंदे थे। 39 कने जालू दीकर जल-प्रलय आई करी उना जो रूडाई नी लेई गई, तालू दीकर उना जो कुछ भी पता नी था, तियां ही मैं माणुऐ दे पुत्रे भी ओणा है। 40 उस बेले दो जणे खेतेरे च होणे न, इक लेई लेंणा है कने दूजा छडी जाणा है। 41 दो जनानिया चक्की पिसा दियां होणिया, इक लेई जांणी, कने दुई छडी देंणी है। 42 “इस तांई जागदे रिया, क्योंकि तुहांजो नी पता है कि तुहाडे प्रभुये कुस रोजे ओणा है।” 43 पर ऐ जाणी लिया कि अगर घरे दे मालिके जो पता होंदा कि चोरे कालू ओणा है, तां सै जागदा रेंदा, कने अपने घरे चोरी नी होणा दिन्दा। 44 इस तांई तुसां भी तैयार रिया, क्योंकि जिसा घड़िया दे बारे च सोचदे भी नी न, उसा घड़िया माणुऐ दे पुत्रे आई जाणा है। 45 सै भरोसे जोगा कने अकला बाला नोकर कुण है, जिसयो मालिके अपने नोकरां चाकरां दा सरदार बणाया है, ताकि बकते पर उना जो खांणा खाणे दे? 46 धन्य है सै दास, जिसयो उदा मालिक आई करी उसयो ऐदिया करदा दिखे। 47 मैं तुसां ने सच्च बोलदा है; सै उसयो अपणिया सारिया संपतिया दा अधिकारी बणाणा है। 48 “पर अगर सै बुरा नोकर सोचणा लग्गे, कि मेरे मालिके जो ओणे जो देर है।” 49 कने अपने सोगी नोकरां जो कूटणा लग्गे, कने शराबियां सोगी खा पिऐ। 50 तां उस नोकरे दे मालिके ऐसे रोजे बापस ओणा है, जिस रोजे सै उदी राह नी दिखा दा हो, कने ऐसी घड़ी कि उसयो पता ना हो, 51 कने उसयो सकत सजा देईकरी, उदा हिस्सा कपटियां सोगी जोड़े, तालू उनी रोंणा कने दंद पिणे।

25 फिरी यीशुए अपणे चेलयां ने बोलया, जालू मै, माणुए दे पुत्रे बापस ओणा है, तालू स्वर्गे दा राज्य ऐसा होणा है: दसां कुआरियां अपणिया मशालां लेईकरी लाड़े जो मिलने ताई उदे बियाये जो जाणा। 2 उना चे पंज जणियां मुख कने पंज समझदार थियां। 3 उना मुख कुआरियां अपणिया मशालां तां लियां, पर अपणे सोगी जादा तेल नी लांदा। 4 पर समझदार कुआरियां अपणियां मशालां सोगी अपणिया-अपणिया कुपियाँ च तेल भी भरी लांदा। 5 जालू लाड़े जो ओणे च देर होई, तां सै बोर होणा लगियां, कने सै सोई गियां। 6 पर अधिया राती रोल्ला पिया, कि दिखा, लाडा ओआ दा है, उसला मिलणे ताई चला। 7 तालू सै सारियां कुवारियां उठी करी अपणिया-अपणिया मशालां ठीक करणा लगियां। 8 कने मुखी समझदारां ने बोलया, अपणे तेले च थोडा सांझो भी दिया, क्योंकि साडियां मशालां बुझी जा दियां न। 9 पर समझदारां जबाब दिता, कि ऐ साडे कने तुहाड़े ताई कदी पूरा नी होणा; ठीक तां ऐ है, कि तुसां बेचणे बाले बाल जाई करी अपणे ताई खरदी लिया। 10 जालू सै खरीदणा जा दियां थियां, तां लाडा आई रिया, कने जडियां तैयार थियां, सै उदे सोगी बियाह बाले घरे जो चली गियां कने घरे दा दरबाजा बंद करी दिता। 11 “इदे बाद सै दुईयां कुआरियां भी वापिस आई करी रोंदे होऐ लाड़े जो सदणा लगियां, है स्वामी, है स्वामी, साडे ताई दरबाजा खोली दिया।” 12 “उनी जबाब दिता, कि मै तुसां ने सच्च बोलदा है कि, मै तुहांजो नी जाणदा है।” 13 “इस ताई जागदे रिया, क्योंकि तुसां नी जाणदे मेरे बापस ओणा दा रोज, कने सेह बकत कालू ओणा है।” 14 “फिर यीशु ने इक होर कहाणी दसी कि मै जालू बापस ओणा है, तालू स्वर्गे दा राज्य ऐसा होणा: इक माणु था जिनी परदेस जांदे बेले अपणे नोकरां जो सदीकरी अपणी सारी जमीन जयादात उना जो देई दिती।” 15 उनी इकी जो पंज तोड़े, दुज्जे जो दो, कने तरिये जो इक, हर इकी जो उदिया शक्तिया दे अनुसार दिता, कने फिरी परदेस चली गया। 16 तालू जिसयो पंज तोड़े मिलयो थे, उनी झट जाई करी उना ने लैन-दैन किता, कने पंज तोड़े होर कमाई ले। 17 इसी तरीके ने जिसयो दो मिलयो थे, उनी भी दो होर कमाई ले। 18 पर जिसयो इक ही तोड़ा मिलया था, उनी जाई करी मिटी खूणी, कने अपणे मालिके दे पेसे लुकाई दिते। 19 मते रोजां बाद मालिके आई करी उना नोकरां जो गिठे सदया कि उना उदे पैसयां ने क्या किता। 20 जिसयो पंज तोड़े मिलयो थे, उनी पंज तोड़े होर आंणी करी बोलया, है मालिक, तू मिंजो पंज तोड़े दिते थे, दिख मै पंज

तोड़े होर कमायो न। 21 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोड़े पैसयां जो सम्भालने कने भरोसे दे लाइक रिया है; मैं तिजो होर मतियां चिजा दा अधिकारी बणाणा है। अपने मालिके सोगी खुश हो। 22 कने जिसयो दो तोड़े मिलयो थे, उनी भी आई करी बोलया, है मालिक तू मिंजो दो तोड़े दिते थे, दिख, मैं दो तोड़े होर कमायो न। 23 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोड़े पैसयां जो सम्भालने कने भरोसे दे लाइक रिया, मैं तिजो मतियां चिजा दा अधिकारी बणांगा। अपने मालिके सोगी खुश हो। 24 तालू जिसयो इक तोड़ा मिलया था, उनी आई करी बोलया, हे मालिक, मैं तिजो जाणदा था कि तू बड़ा सकत माणु है: तु दुजे लोका दे कम्मे ला फायदा कमाणे दी आस रखदा है, कने जिथू तू नी खलारदा है ओथु तू बटोलदा है। 25 ताई तां मैं डरी गया कि अगर मैं तेरा पैसा गवाई दिता तां तू मिंजो सजा देणी, इस ताई जाई करी मैं तेरा तोड़ा मिटिया च लुकाई दिता; दिख, जडा तेरा है, सै ऐ है। 26 उदे मालिके उसयो जबाब दिता, हे दुष्ट कने आलसी नोकर; तिजो पता था कि, मैं दुजे लोका दे कम्मे ला फायदा कमाणे दी आस रखदा है। 27 तां तिजो ऐसा करणा चाईदा था कि, मेरा पैसा सर्राफों जो देई दिन्दा, फिरी मैं आई करी अपना पैसा उना ला ब्याजे समेत लेई लेंदा। 28 तालू मालिके बाकी नोकरां जो बोलया, “तोड़े जो इसला लेई लिया, कने जिदे बाल दस तोड़े न, उसयो देई दिया। 29 जिना बाल समझणे दी इच्छा है जडा परमेश्वर सिखांदा है, उसयो परमेश्वरे होर समझ देणी, पर जडा समझणे दी इच्छा नी रखदा, कि मैं क्या सिखादां, तां सै जडा समझया है, परमेश्वरे सै भी उसला लेई लेणा।” 30 कने इस नकमे नोकरे जो नेरे च पाई दिया, जिथू उनी रौणा कने दंद पीणे। 31 “जालू मैं, माणुए दे पुत्रे अपणिया महिमा च ओणा है, कने स्वर्गदूते उदे सोगी ओणा, तालू लोकां दा न्याय करणे ताई उनी अपने महिमा दे सिहांसने पर विराजमान होणा।” 32 कने सारियां जातियां मेरे सामणे गिठियां करणियां न; जियां पुहाल भेडां जो बकरियां ला लग करी दिन्दा है, तियां ही उनी भी उना जो इक दुजे ला लग करणा है। 33 कने मैं धर्मी लोका जो अपने सजे पासे कने अधर्मियां लोका जो खबे पासे खरेडना है। 34 “तालू मैं राजे अपने सजे पासे बोणे बालयां ने बोलणा कि, हे मेरे पिता दे धन्य लोको, ओआ, कने उस राज्य दे अधिकारी बणी जा, जडा संसारे दे शुरू होणे ला तुहाड़े ताई तैयार कितया है।” 35 क्योंकि मैं जालू भूखा था, तां तुसां मिंजो खाणे जो खाणा दिता,

जालू मैं प्यासा था, तां तुसां मिंजो पांणी पियाया, मैं इक परदेसी था, तुसां मिंजो अपने घरे रियाया। 36 जालू मैं नगां था, तुसां मिंजो कपड़े दिते, मैं बिमार था, तुसां मेरा हाल चाल पुछया, मैं जेला च था, तां तुसां मिंजो ने मिलणा आये। 37 “तालू धर्मियां उसयो जबाब देणा, कि प्रभु जी, असां कालू तिजो भूखा दिखया कने खुआया? या प्यासा दिखया, कने पांणी पियाया?” 38 असां कालू तिजो परदेसी दिखया कने अपने घरे रियाया या नंगा दिखया, कने कपड़े दिते? 39 असां तिजो कालू बिमार कने जेला च दिखया, कने तिजो ने मिलणा आये? 40 “तालू मैं राजे उना जो जबाब देणा, मैं तुसां ने सच्च बोलदा है, कि जड़ा तुसां मेरे इना छोटे ला छोटे चले चे कुसी इकी दे सोगी कितया है, से ही मेरे सोगी कितया है।” 41 “तालू उनी खबे पासे बालयां ने बोलणा है, हे श्रापित लोको मेरे सामणे ला इसा कदी नी बुझणे बालिया अग्गी च चली जा, जड़ी शैताने कने उदे दूतां तांई परमेश्वरे तैयार कितया है।” (aiōnios g166) 42 क्योंकि मैं भूखा था, तुसां मिंजो खांणे जो नी दिता, मैं प्यासा था, कने तुसां मिंजो पांणी नी पियाया; 43 मैं परदेसी था, कने तुसां मिंजो अपने घरे नी रियाया; मैं नंगा था, कने तुसां मिंजो कपड़े नी दिते; कने मैं बिमार कने जेलां च था, तां तुसां मेरा हाल चाल नी पुछया। 44 “तालू उना जबाब देणा, कि प्रभु जी, असां तिजो कालू भूखा, या प्यासा, या परदेसी, या नंगा, या बिमार, या जेला च दिखया, कने तेरी सेबा या टहल नी किती?” 45 “तालू मैं उना जो जबाब देणा, मैं तुसां ने सच्च बोलदा है कि तुसां जड़ा इना छोटे ला छोटे चले चे कुसी इकी दे सोगी नी कितया है, से मेरे सोगी भी नी किता है।” 46 कने सै जड़े खबे पासे न इना जो हमेशा दी सजा मिलणी है पर धर्मी लोका हमेशा दिया जिन्दगिया च प्रवेश करणा है। (aiōnios g166)

26 जालू यीशु ऐ सारियां गल्लां बोली बैठा, तां अपने चेलयां ने बोलणा लग्गा। 2 “तुहांजो पता है, कि दो दिना बाद फसह दा त्योहार होणेबाला है, कने माणुऐ दा पुत्र सूली पर चढ़ाणे तांई पकड़ाया जाणा है।” 3 तालू बड़े याजक कने प्रजा दे यहूदी अगुवे कैफा नाऐ दे महायाजक दे अंगणे च गिठे होए, 4 कने अपु चे बिचार करणा लग्गे कि यीशुऐ जो धोखे ने पकड़ी करी मारी दें। 5 पर सै बोलदे थे, कि त्योहारे दे बकत नी, कुथी इयां ना होऐ कि लोकां च रोल्ला पेई जा। 6 जालू सै बैतनिय्याह ग्रां च शमौन कोढी दे घरे था, जिसयो यीशुऐ ठीक कितया था। 7 जालू यीशु खांणा खाणे तांई बैठया था तां इक जनानी संगमरमरे दे भांडे च बड़ा मेंहगा

इन्न लेईकरी उदे बाल आई कने, तां उना सै इन्न उदे सिरे पर नियोरी दिता। 8 ऐ दिखीकरी उदे चले हेरान होए कने बोलणा लग्गे, “इस इतणे मेंगे इन्ने जो सत्यानाश नी करणा चाईदा? 9 इसयो तां खरे दामे च बेची करी कंगालां जो बंडी सकदे थे।” 10 ऐ जाणी करी यीशुऐ उना ने बोलया, जनानिया जो कजो तंग करा दे न? उना मिंजो ने खरा किता है। 11 कंगालां तां तुहाडे सोगी हमेशा रेणा है, पर मैं तुहाडे सोगी हमेशा नी रेणा है। 12 इना जडा इन्न मेरे शरीर पर नियोरया है, सै इना मिंजो मरणे ला पहले ही दफनाणे दी तैयारी किती है। 13 “मैं तुसां ने सच्च बोलदा है, कि सारे संसार च जिथू कुथु भी ऐ शुभसमाचार सुणाया जांगा, ओथु इसा दे इस कम्मे दी चर्चा भी इसा दिया यादा च होणी।” 14 यहदा इस्करियोती, जडा बाहरां चेलयां चे इक था, उनी बड्डे याजकां बाल जाई करी बोलया, 15 अगर मैं उसयो तुहाडे हथे पकडाई दे, “तां मिंजो क्या दिगे? उना उसयो ती चांदिये दे सिक्के तोली करी देई दिते।” 16 कने सै तालू ला ही उसयो पकडाने दा मोका तोपणा लगी पिया। 17 अखमीरी रोटिया दे त्योहारे दे पेहले रोजे, चले यीशुऐ बाल जाई करी पूछणा लग्गे, “तू कुथु फसह खाणा चांदा है, ओथु असां जाई करी तेरे तांई फसह खाणे दी तैयारी करन?” 18 उनी बोलया, “शेहरे च जा कने अमुक नाए दे माणुऐ बाल जाई करी बोला, कि गुरू बोला दा है, कि मेरा बकत नेडे है, कने मैं अपने चेलयां सोगी तेरे ऐथू फसह दा त्योहारे मनाणा है।” 19 चेलयां यीशुऐ दा हुकम मनया, कने फसह तैयार किता। 20 जालू संज होई तां सै चेलयां सोगी खाणा खाणे तांई बैठा। 21 कने जालू सै रोटी खाणां बैठयो थे, तां यीशुऐ बोलया, “मैं तुसां ने सच्च बोला दा है, कि तुसां चे इकी जणे मिंजो पकडाणा है।” 22 इसा गल्ला पर सै बडे उदास होई गे, कने सारे उसयो पूछणा लग्गे, “हे गुरू, क्या सै मैं है?” 23 उनी जबाब दिता, “जिनी मिंजो सोगी थालिया च हथ पाया है, उनी ही मिंजो पकडाणा है।” 24 “माणुऐ दे पुत्रे मरी जाणा है, क्योंकि ऐ सब कुछ पबित्र शास्त्रां च लिखया है, पर उस माणुऐ जो बडी बुरी सजा होणी है जडा मिंजो धोखा दिन्दा है जिनी मिंजो पकडवाणे च सहायता करणी है! अगर उस माणुऐ दा जन्म ही नी होया होंदा तां ही उदे तांई खरा होंदा।” 25 तालू उसयो पकडाणे बाले यहदे बोलया, “गुरू जी, क्या सै मैं है?” उनी उसयो बोलया, “तू बोली बैठा।” 26 जालू सै खा दे थे तां यीशुऐ रोटी लेई, कने परमेखरे दा धन्यवाद करी के तोड़ी, कने चेलयां जो दिती कने बोलया, “लिया, खाई लिया; ऐ मेरा शरीर है।” 27

फिरी उनी दाखरस दे कटोरे जो चुकी करी परमेश्वरे दा धन्यबाद किता, कने चेलयां जो दिता कने बोलया, “तुसां सारे इस कटोरे चे पिया, 28 क्योंकि ऐ बाचा दा मेरा सै खून है, जडा मतयां लोकां दिया भलाईया ताई बहाया जाणा है।” 29 “मैं तुहांजो ने सच्च बोलदा है, मैं दाखा दा ऐ रस उस दिने दीकर नी पीणा, जालू दीकर पिता दे राज्य च नोआ दाखरस नी पी लेंगा।” 30 फिरी यीशुऐ कने उदे चेलयां फसह दे त्योहारे दे भजन गाई करी यरूशलेम शहरे दे बाहर जैतून रुखां दे पाहडे पर चली गे। 31 तालू यीशुऐ उना ने बोलया, “तुसां सारयां ही अज राती अपने भरोसे ला भटकी जाणा है; क्योंकि पबित्र शास्त्र च लिखया है कि मैं पुहाल मारी देणा है; कने झुंडे दियां भेडां तितर-बितर होई जाणा।” 32 पर मैं मरी के जिन्दा होणे ला बाद तुहांजो ला पेहले गलील प्रदेश च पूजणा है। 33 पर पतरसे यीशुऐ जो बोलया, “चाहे सारे छडी करी नसी जांगे पर मैं नी नसगा।” 34 यीशुऐ उसयो बोलया, “मैं तिजो ने सच्च बोलदा है, कि अज ही इसा राती मुर्गे जो दो बार बांग देणे ला पेहले तू मिंजो तीन बरी बोलणा है, कि मिंजो नी जाणदा है।” 35 पतरसे यीशुऐ ने बोलया, अगर मिंजो तेरे सोगी मरणा भी पौंगा, तमी मैं तिजो ला कदी नी मना करगा। कने इयां ही सारयां चेलयां भी बोलया। 36 तालू यीशु अपने चेलयां सोगी गतसमनी नाए दिया इक जगा च आया कने अपने चेलयां ने बोलणा लगा, “ऐथू बेई रिया, जालू दीकर मैं प्राथना करें।” 37 सै पतरस कने जब्दी दे दोनो पुत्रां जो सोगी लेई गया, कने उदास कने रोणा लगा। 38 तालू उनी उना जो बोलया, “मेरा मन बडा उदास है, ऐथू दीकर कि मेरे प्राण निकली चल्यो न। तुसां ऐथू ही स्का, कने मेरे सोगी जागदे रिया।” 39 फिरी यीशु थोडा अगे गया, कने गोडे भार पेई गया कने मुह धरतिया पर करी प्राथना करणा लगा, “हे मेरे पिता, अगर होई सके तां ऐ कटोरा मिंजो ला टली जाए, तमि जियां मैं चांदा है तियां नी हो, पर जियां तू चांदा है, तियां ही हो।” 40 फिरी जालू यीशु बापस आया कने उना चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके? 41 जागदे कने प्राथना करदे रिया ताकि मिजों पर भरोसा रखणा नी छडन। आत्मा तां खरा करणा चांहदी है पर शरीर च जोरे दी कमी है।” 42 फिरी उनी दुजी बरी जाई करी ऐ प्राथना किती कि, “हे मेरे पिता, अगर ऐ मेरे पित्यो बिना नी हटी सकदा है, तां तेरी इच्छा पुरी होए।” 43 तालू उनी आई करी उना जो फिरी सुत्या दिखया, क्योंकि उना दियां हखी निद्रा

ने भस्इयां थियां। 44 उना जो छडी करी सै फिरी चली गया, कने सेई गल्ल दोवारा बोली करी, तिजी बरी प्राथना किती। 45 तालू उनी चेलयां बाल आई करी उना जो बोलया, हुण सोंदे रिया कने अराम करा: दिखा, सै घडी आई गेई है, कने माणुऐ दा पुत्र पापियां दे हथे पकड़ाया जाणा है। 46 “उठा कने चला। दिखा, जिनी माणुऐ मिजों पकड़वाणा है सै बखे आई रिया है।” 47 जालू यीशुऐ ऐ बोला दा ही था, यह्दा जडा बाहरां चेलयां चे इक था, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड़े याजकां, यह्दी व्यवस्था दे गुरूआं कने यह्दी अगुवां भेजयो थे। 48 उनी यीशुऐ जो पकड़णने बालयां जो ऐ बोलया था कि: “जिदी मैं चूमी लेंगा, सै ही यीशु है, उसयो तुसां पकड़ी लेनयो।” 49 उनी झट यीशुऐ बाल आई करी बोलया, “गुरू जी, नमस्ते!” कने उदी चूमी लेई। 50 यीशुऐ उसयो बोलया, “हे मित्र, जिसी कम्मे तांई तू आया है, उसयो करी ले।” तालू उना बखे आई करी यीशुऐ जो पकड़ी लिया। 51 यीशुऐ दे साथियां चे इकी अपणी तलवार कडी कने महायाजके दे इकी नोकरे पर चलाई करी उदा कन बडी दिता। 52 तालू यीशुऐ उसला बोलया, अपणिया तलवारा मयाना च रख क्योंकि जड़े तलवारां चलादें न सै तलवारा ने ही खत्म करणे न। 53 तिजो क्या पता नी है कि मैं अपने पिता ने विनती करी सकदा है, कने उनी स्वर्गदूते दियां बाहरां पलटना ला भी जादा स्वर्गदूत मेरे बाल हुण हाजिर करी देणे? 54 “पर पबित्र शास्त्रां दियां सै गल्लां कि इयां ही होणा जरूरी है कियां पुरियां होणियां?” 55 यीशुऐ उना जो बोलया, तुसां क्या तलवारां कने डांगा लेईकरी मिजो डाकुआं सांई पकड़ना आयो न? पर मैं जालू हर रोज मंदरे च बेईकरी उपदेश दिन्दा था, तालू तां तुसां मिजो नी पकड़या। 56 “पर ऐ इस तांई होया कि पबित्र शास्त्रां दियां गल्लां पुरियां होन।” जालू ऐ होया तां उदे सारे चेले उसयो छडी करी नसीं गे। 57 तालू यीशुऐ जो पकड़ने बाले उसयो कैफा नाऐ दे महायाजक बाल लेईं आए, जिथू यह्दी व्यवस्था जो सिखाणे कने यह्दी अगुवे गिठे होयो थे। 58 कने पतरस दुरे-दुरे ला उना दे पिच्छे-पिच्छे महायाजक दे अंगणे दीकर गया, कने अंत दिखणे तांई अंदर जाई करी पयादयां बखे बेई गया। 59 बड़े याजक कने यह्दी महासभा दे सदस्य यीशुऐ जो मारी देणे तांई उदे खिलाफ च गबाई तोपा दे थे, 60 पर मते झूठे गबाह ओणे पर उना जो कोई गबाई नी मिली। आखरी च दो जणे आए, 61 कने बोलया, “कि इनी बोलया था कि मैं परमेश्वरे दे मंदरे जो ढाई

सकदा है, कने फिरी उसयो तिन्ना रोजां च बणाई सकदा है।” 62 तालू महायाजके बिच खड़ोई करी यीशुए जो बोलया, “तू क्या कोई जबाब नी देणा? ऐ लोक तेरे खिलाफ क्या गबाई देद न?” 63 पर यीशु चुप ही रिया। तालू महायाजके उसयो बोलया “मै तिजो जिंदे परमेश्वरे दी कसम दिन्दा है, कि अगर तू परमेश्वरे दा पुत्र मसीह है, तां सांझो ने बोली दे।” 64 यीशुए उसयो बोलया, “उनी अपु मन्नी लिया; कने मै, माणुए दा पुत्र तुसां ने ऐ भी बोलदा है, कि हुण तुसां माणुए दे पुत्रे जो सर्वशक्तिमान दे सजे पासे बैठया, कने अम्बरे दे बदला पर ओदे दिखणा है।” 65 जालू महायाजके यीशुए जो ऐ बोलदे सुणया तां उनी गुस्से च अपणे कपडे फाड़ी दिते, कने बोलया, “हुण सांझो कुसी गबाह दी जरूरत नी है। तुसां परमेश्वर दी निंदा करदे सुणया, तुहाड़ी क्या सलाह है इसा गल्ला पर?” उना सारायां फेसला किता कि यीशुए परमेश्वरे दी निंदा किती है। 66 तुसां क्या सोचदे न? उना जबाब दिता, ऐ तां मारी देंगे जोगा है। 67 तालू उना उदे मुए पर थूक्या कने उसयो मुक्के मारे, कने बाकियां थप्पड़ मारी करी बोलया, 68 हे मसीह, अगर तू परमेश्वरे दा संदेश देणेबाला है! तां सांझो दस कुनी तिजो मारया, 69 पतरस बाहर अंगणे च बैठया था तां इकी दासिया उदे बाल आई करी बोलया, “तू भी तां यीशु गलीली सोगी था।” 70 उनी सारयां दे सामणे ऐ बोली करी मना किता कि, “मै नी जाणदा कि तू क्या बोला दी है।” 71 जालू सै बाहर डेवढिया पर गिया, तां दुईया नोकराणिया उसयो दिखीकरी उना ने बोलया जड़े ओथु बैठयो थे कि, “ऐ भी तां यीशु नासरिये सोगी था।” 72 उनी कसम खाई करी फिरी मना किता, “मै इस माणुए जो नी जाणदा है।” 73 थोड़िया देरा बाद जड़े लोक ओथु खड़ुतयो थे, उना पतरसे बाल आई करी उसयो बोलया, “सच्ची तू भी इना चे इक है; क्योंकि तेरी बोली तेरा सच्च दसा दी है।” 74 पतरस अपु जो कोसणा लग्गा, कसम खाणा लग्गा, मै इस माणुए जो नी जाणदा। कने झट मुर्गे बांग देई दिती। 75 तालू पतरसे जो यीशुए दियां बोलियां गल्लां याद आईयां, मुर्गे दिया बांगा देंगे ला पेहले तू मिंजो तिन्न बरी मना करणा है। कने सै बाहर जाई करी जोरे-जोरे ने रोणा लग्गा।

27 कने ब्यागा तड़के होंदे ही झट उना बड़े याजकां, कने यहूदी अगुवां, कने व्यवस्था जो सिखाणे बालयां कने महासभा दे सारे लोकां यीशुए जो मारी देणे दी सलाह किती। 2 कने उना यीशुए जो बन्नया, कने न्याय करणे तांई यहूदिया प्रदेश दे राज्यपाल पिलातुस दे हबाले करी दिता। 3 जालू यीशुए जो पकड़ाणे बाले यहूदा

जो पता चला कि सै मरवाणे ताई दोषी ठेहराया गया है तां सै बड़ा पछताया कने उना ती चांदिये दे सिक्कयां जो बड़े याजकां कने यहूदी अगुवां जो बापस देई आया। 4 कने बोलया, मैं बेकसूर जो मारणे ताई पकड़ाणे दा पाप किता है, उना बोलया, “सांझो क्या है? इस ताई तू ही जिम्मेबार है।” 5 तालू सै उना सिक्कयां जो मंदरे दे अंगणे च फेंकी करी बाहर चली गया, कने जाई करी उनी अपु फा लेई लिया। 6 बड़े याजकां उना सिक्कयां जो लेईकरी बोलया, “साडे नियम दे हिसावे ने इना पेंसया जो मंदिर दे भंडारे च रखणा ठीक रैणा है, क्योंकि ऐ इक माणुऐ जो मरवाणे ताई दितया दाम है।” 7 उना सलाह करिके उना सिक्कयां ने परदेशियां जो दबाणे ताई कुम्हारे ला खेतर खरीदी लिया। 8 इसा बजा ने उस खेतेरे जो अजे दीकर खूने दा खेतर बोलदे न। 9 तालू जड़ा बचन यिर्मयाह परमेस्वरे दा संदेश देणेबाले बोलया था सै पूरा होया: “उना सै ती सिक्के जड़े इस्राएल दे लोकां यहूदा जो दितयो थे लेई ले। 10 कने जियां प्रभुऐ मिंजो हुकम दितया था तियां ही उना जो कुम्हारे दे खेतेरे दे दामे च देई दिता।” 11 जालू यीशु राज्यपाले दे सामणे खडोतया था, तां हाकिमे उसयो पुछया, तू क्या यहूदियां दा राजा है? यीशुऐ उसयो बोलया, “तू अपु ही बोला दा है।” 12 जालू बड़े याजक कने यहूदी अगुवे उस पर दोष ला दे थे, तां उनी कोई जबाब नी दिता। 13 इस पर पिलातुसे उसयो बोलया, “तू क्या सुंणा दा नी है कि, ऐ तेरे खिलाफ च कितणियां गबाईयां देद न?” 14 पर उनी उसयो इकी भी गल्ला दा जबाब नी दिता, ऐथू दीकर कि राज्यपाल जो बड़ी हेरानी होई। 15 हर साले फसह दे त्योहारे च, राज्यपाल पिलातुस इक केदिये जो छडी दिन्दा था, जिसयो लोक चांदे थे कि सै छूटे। 16 उस बेले बरअब्बा नाऐ दा इक मनया नामी कैदी था। 17 जालू सै गिठे होए तां पिलातुसे उना जो बोलया, “तुसां कुस्यो छुडाणा चांदे न, ताकि मैं तुहाड़े ताई उसयो छडी दें? बरअब्बे जो या यीशुऐ जो जिसयो मसीह बोलदे न?” 18 क्योंकि सै जाणदा था कि उना उसयो जलनिया ने पकड़ाया है। 19 जालू सै न्याय दिया कुर्सिया पर बैठया था तां उदिया घरे बालिया उसयो बोली भेजया था कि, “तू उस धर्मिये दे मामले च हथ मत पांदा; क्योंकि मिंजो अज राती सूपने च उदिया बजा ने बड़ा दुख होया है।” 20 पर बड़े याजकां लोकां दिया भिड़ा जो भड़काया, कि पिलातुस ला यीशुऐ जो छडणे दी बजाये बरअब्बा जो छडणे दी माँग करा, कने यीशुऐ जो मारणे ताई बोला। 21 राज्यपाले उना ला पुछया, इना दोना चे कुस्यो चांदे न, ताकि मैं तुहाड़े ताई छडी

दें? उना बोलया, “बरअब्बा” जो। 22 पिलातुसे उना ला पुछया, फिरी यीशुए दा क्या करणा, जिसयो मसीह बोलदे न? “सबना बोलया, इसयो सूली पर चढाई दिया।” 23 पिलातुसे उना जो बोलया, “कजो इनी क्या बुरा कितया है?” पर भीड़ होर भी जोरे ने चिलाणा लग्गी कि, “इसयो सूली पर चढाई करी मारी दिया।” 24 जालू पिलातुसे दिखया, कि कुछ नी बणा दा है कने उल्टा होर जादा रोल्ला होंदा जादा है, तां उनी पांणी लेईकरी भिडा दे सामणे अपने हथ धोते कने बोलया, “मैं इस धर्मिये दे खूने ला निर्दोष है; हुण तुसां ही जाणा।” 25 सबना लोकां जबाब दिता, “इदे खूने दा इल्जाम सांझो पर कने साड़िया ओलादी पर होऐ।” 26 बरअब्बा जो उना तांई छडी दिता, कने यीशुए जो कोड़े लगबाई करी सूली पर चढाणे तांई रोमी सिपाईयां दे हबाले देई दिता। 27 तालू राज्यपाले दे सिपाईयां यीशुए जो किले च लेईजाई करी उदे चोरो पासे सारी पलटन खरेडी दिती। 28 उदे सारे कपड़े उतारी करी उसयो बैगणी रंगे दे कपड़े पेहनाइ दिते, 29 कने कंडयां दा मुकुट बणाई करी उदे सिरे पर रख्या; कने उदे सजे हथे च सरकंडा दिता। कने यीशुए दे सामणे झुकी करी उदा मजाक उड़ाणा लग्गे कने बोलया, “हे यहूदियां दे राजा नमस्ते।” 30 कने उस पर थूक्या कने सेई सरकंडा लेईकरी उदे सिरे च मारणा लग्गे। 31 जालू सै उदा मजाक उड़ाई बैठे, तां उना सै कपड़े उतारी करी उदे अपने कपड़े उसयो पेहनाऐ, फिरी उसयो सूली पर चढाणे तांई शेहरे ला बाहर लेई गे। 32 बाहर जांदे बेले उना जो शमौन नाऐ दा इक कुरेनी माणु मिल्ला, उना उसयो बेकार च ही पकड़या ताकि सै उदिया सलिया जो चुकी करी लेई चले। 33 कने उसयो गुलगुता नाऐ दिया जगा च मतलब जिसयो खोपड़ी दी जगा बोलदे न, ओथु पुज्जी करी, 34 उना उसयो कोडा रस मिलाई करी दाखरस पीणे जो दिता, पर उनी चखी करी नी पिता। 35 तालू उना उसयो सूली पर चढाया, कने चिठियां पाई करी उदे कपड़े बंडी ले। 36 कने ओथु बेईकरी उदा पेहरा देणा लग्गे। 37 कने उदा दोष उदे सिरे पर लाई दिता कि “ऐ यहूदियां दा राजा यीशु है।” 38 तालू उदे सोगी दो डाकू इक सजे पासे कने इक खबे पासे सूली पर चढाऐ। 39 कने ओणे-जांणे बाले लोक सिरे हिलाई-हिलाई करी उदी निंदा करदे थे। 40 कने बोलदे थे कि, “ओ मंदरे जो ढाणे बाल्या कने उसयो तिन्ना रोजां च बणाणे बाल्या, अपने आपे जो तां बचा। अगर तू परमेश्वरे दा पुत्र है, तां सूली ला उतरी आ।” 41 इसी तरीके ने ही बड़े याजक, व्यवस्था जो सिखाणे बाले कने

यहदी अगुवे समेत सारे उदा मजाक उडाई करी बोला दे थे कि, 42 इनी होरना जो तां बचाया पर अपने आपे जो नी बचाई सकदा है। ऐ तां इस्राएले दा राजा है। अगर तू हुण सूली ला उतरी ओऐ, तां असां तिजो पर भरोसा करणा। 43 इनी परमेश्वरे पर भरोसा रखया है, अगर सै इसयो चांदा है, तां हुण इसयो छुडाई ले, क्योंकि इनी बोलया था कि, मैं परमेश्वरे दा पुत्र है। 44 इयां ही सै डाकू भी उदी बुराई करदे थे जड़े उदे सोगी सूली पर चढायो थे। 45 उस रोजे दोपेरा ला लेईकरी तिजे पहर दीकर सारे देशे च नेहेरा होई गया। 46 तिजे पहर दे बखे यीशुए बड़े जोंरे ने पुकारी बोलया, “एली, एली, लमा शबत्तनी?” मतलब “है मेरे परमेश्वर, तू मिंजो कजो छडी दिता?” 47 जड़े ओथु थे, उना चे कितणयां ऐ सुणीकरी बोलया, “सै तां एलिय्याह जो पुकारा दा है।” 48 उना चे इक बन्दा झट दोडया, कने उनी स्पंज लेईकरी सिरके च डुबोई, कने सरकंडे पर रखीकरी उसयो चुसाया। 49 होरनी बोलया, “स्की जा, दिखदे न कि, एलिय्याह इसयो बचाणा ओंदा है कि नी।” 50 तालू यीशुए फिरी बड़े जोंरे ने चिलाई करी अपने प्राण छडी दिते। 51 कने दिखा, मंदरे दा परदा उपरे ला लेईकरी थले दीकर फटी करी उदे दो टुकड़े होई गे, कने धरती कमी पेई कने पथर तिडकी गे। 52 कने कबरां खुली गियां, कने मरे हुय मते पबित्र लोकां दे शव जिन्दा होई गे, 53 कने जिन्दा होणे बाद सै कबरां ला निकली करी पबित्र शेहरां च गे, कने मत्यां जणया उना जो दिखया। 54 तालू सूबेदार कने जड़े उदे सोगी यीशुए दा पेहरा देदे थे, सै भूकम्प कने जडा कुछ ओथु होया था, उसयो दिखीकरी बड़े भरी डरी गे, कने बोलणा लग्गे, “ऐ तां सच्ची ही परमेश्वरे दा पुत्र था।” 55 ओथु मतियां जनानिया जडियां गलील प्रदेशे ला ही यीशुए दी सेबा करदियां उदे सोगी आईयां थियां, सै दुरे ला ही दिखा दियां थियां। 56 उना चे मरियम मगदलीनी, कने याकूब कने योसेस दी माता मरियम कने जब्दीये दे पुत्रां दी माता भी थी। 57 जालू संज होई तां यूसुफ नाऐ दा अरिमतिया शेहरे दा इक अमीर माणु जडा अपु भी यीशुए दा चेला था, ओथु आया। 58 उनी पिलातुस बाल जाई करी यीशुए दी लाश मंगी। कने पिलातुसे देंगे दा हुकम देई दिता। 59 यूसुफे लाश लेई कने उसयो चीटिया चादरा च लपेटया, 60 कने उसयो अपणिया नोईया कबरां च रख्या, जडी उनी चट्टाना च बंणबाइयो थी, कने कबरां दे दरबाजे पर बडा पथर रखीकरी चली गया। 61 कने मरियम मगदलीनी कने दुई मरियम ओथु कबरां दे सामणे बेठियां थियां। 62 दुऐ रोजे जडा तैयारिया दे

रोजे ला अगला दिन था, उस रोजे बड़े याजकां कने फरीसियां पिलातुसे बाल गिठे होईकरी बोलया, 63 “हे महाराजा, सांझो याद है, कि उनी भटकाणे बाले जालू जिंदे बेले बोलया था कि, मैं उना रोजां बाद फिरी जिन्दा होई जाणा है। 64 हुकम दे कि तिन्ना रोजां दीकर सिपाई कबरां दी रखबाली करन, कुथी इयां ना हो कि उदे चेले आई करी उसयो कडी नी लेई जान, कने लोकां जो बोलन कि सै मरयां चे जिन्दा होई गया है। तालू पिछला धोखा पेहले ला भी बुरा होणा है।” 65 पिलातुसे उना जो बोलया, “तुहाडे बाल सिपाई तां हेन जा कने अपणिया समझा दे अनुसार रखबाली करा।” 66 इस ताई उना जाई करी कबरा पर अपने निशाणे सोगी प्रवेश दरवाजे जो बंद करिरी सुरक्षित बनाई दिता ताकि कोई इसयो अपणिया जगा ला नी हटाए।

28 सब्ते दे रोजे बाद हफ्ते दे पेहले रोजे पौ फटदे ही मरियम मगदलीनी कने दुई मरियम कबरां जो दिखणा आईयां। 2 कने दिखा इक बडा हिलण होया, क्योंकि प्रभुए दा इक स्वर्गदूत स्वर्गे ला उतरया था, कने बखे आई करी उनी पथरे जो हटाई दिता, कने उस पर बेई गया। 3 उदा रूप बिजा सांई था कने उदे कपड़े बर्फा सांई चिट्टे थे। 4 उदे डरे ने पेहरेदार कम्मी पे, कने मुर्दयाँ सांई होई गे। 5 स्वर्गदूते जनानिया जो बोलया, “डरा मत, मिंजो पता है कि तुसां यीशुए जो तोपा दियां न जिसयो सूली पर चढाया था। 6 सै ऐथू नी है, सै तां अपने बचने दे अनुसार जिन्दा होई गया है। ओआ इसा जगा जो दिखा जिथू प्रभु रखया था, 7 झट जाई करी उदे चेलयां ने बोला कि, सै मरयां चे जिन्दा होई गया है; सै तुसां ला पेहले गलील प्रदेश जाई रिया है, ओथु तुहांजो उदे दर्शन होणे! दिखा, मैं तुसां ने बोली दिता है।” 8 कने सै डर कने बडिया खुशिया ने कबरा ला बापस जाई करी उदे चेलयां जो खबर देंगे ताई दोडी गियां। 9 तालू यीशु उना जो मिला। कने बोलया, “नमस्ते।” कने उना बखे आई करी उदे पैरां जो पकड़ी करी उसयो दण्डवत किता। 10 तालू यीशुए उना ने बोलया, “डरा मत; मेरे चेलयां जो जाई करी बोला, कि गलील प्रदेशे जो चली जा ओथु मिंजो दिखणा है।” 11 सै जनानियां चेलयां जो ऐ खबर देणा ही चलियां थियां कि, सिपाइयां जड़े कबरा दी रखबाली करा दे थे उना शेहरे च आई करी सारा हाल बड़े याजकां जो सुणाया। 12 तालू बड़े याजकां, यहूदी अगुवे सोगी गिठे होईकरी सलाह बनाई। उना सिपाइयां जो रिशवत दे रूप च मता सारा धन देणे दा फेसला किता, कने उना जो बोलया। 13 तुसां सारे लोकां ने ऐ

बोलनयो कि राती जालू असां सुतयो थे, तां उदे चेले आई करी उसयो चोरी लेईं
गे। 14 कने अगर ऐ गल्ल राज्यपाले दे कना दीकर पुजगी कि तुसां रखबाली दे
बकते सोई गियो थे, तां असां उसयो समझाई लेंगे कने तुसां जो चिंता करणे दी
जस्सरत नी है असां बचाई लेंगे। 15 उना पेसा लेईकरी जियां उना जो सिखया था,
तियां ही किता। ऐ गल्ल अजे दीकर यहदियां च प्रचलित है। 16 कने गयारा चेले
गलील प्रदेशे दे उस पाहडे पर गे, जड़ा यीशुऐ उना जो दसया था। 17 कने उना
उदे दर्शण पाई करी उसयो नमस्ते किते, पर कुसी-कुसी जो शक होया की यीशु
जिन्दा होया है। 18 यीशुऐ उना बाल आई करी बोलया, स्वर्ग कने धरतिया दा
सारा हक मिंजो दितया है। 19 इस तांई तुसां जाई करी सारियां जातियां दे लोकां
जो चेले बणा; कने उना जो पिता, पुत्र, कने पबित्र आत्मा दे नाऐ ने बपतिस्मा
दीया। 20 “कने उना जो सारियां गल्लां जिना दा मै तहांजो हुकम दितया है, उना
जो मनणा सिखा: कने दिखा, मै संसारे दे अंत दीकर हमेशा तुहाड़े सोगी है।”

(aiōn g165)

मरकुस

1 परमेश्वरे दे पुत्र यीशु मसीह दा शुभसमाचार इयां शुरू होया। **2** जियां परमेश्वरे दा संदेश देणेबाले यशायाह दिया कताबा च लिखया है: परमेश्वरे अपने पुत्र, मसीह जो बोलया, “दिख, मैं अपने संदेश देणेबाले दूते जो तेरे अग्रे भेजदा है, जिनी तेरे तांई रस्ता ठीक करणा है। **3** उसा सुनसान जगा च अब्राज सुणुआ दी है कि परमेश्वर दे ओणे तांई, अपने आपे जो तैयार करा, कने अपने मने दी सोच समझा जो खरा रखा उनी ओणा है।” **4** यूहन्ना जडा संदेश देणा आया था, सै सुनसान जगा च रेंदा था कने ऐ प्रचार करदा था की, अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया। **5** मते सारे यहूदिया प्रदेश दे लोक, कने यरुशलेम शहर दे रेणेबाले लोक निकली करी उदे बाल आये, कने अपने पापां जो मन्नी लिया कने यूहन्ने उना लोकां जो यरदन खड्डा च बपतिस्मा दिता। **6** यूहन्ना ऊंटे दे बालां दे बणयो कपडे पांदा था, कने अपने लके च चमड़े दा पट्टा बनी रखदा था कने टिट्टे कने मखिर खांदा था। **7** जालू यूहन्ना ऐ प्रचार करदा था की, “जडा मेरे बाद ओणे बाला है, सै मिंजो ला भी शक्तिशाली है, मैं तां उदे जुतयां दे तस्मे खोलणे दे काबिल भी नी है। **8** मैं तां तुहांजो पांणिए ने बपतिस्मा दिता है, पर उनी तुहांजो पबित्र आत्मा ने बपतिस्मा देणा है।” **9** उना दिना जालू यूहन्ना बपतिस्मा दिन्दा था तालू यीशु नासरत गांऐ ला गलील प्रदेशे च आया, जिथू यरदन खड्डा च यीशुऐ यूहन्ना ला बपतिस्मा लिया। **10** जालू यीशु पांणिये ला निकली करी बाहर आया तां यूहन्ने स्वर्गे जो खुलदे दिखया कने स्वर्ग ला इक पबित्र आत्मा जो कबुतरे दे स्पे च अपने उपर ओंदे दिखया। **11** कने परमेश्वरे स्वर्ग ला ऐ आकाशवाणी किती, “की तू मेरा प्यारा पुत्र है, कने तिजो ला मैं खुश है।” **12** यीशुऐ दे बपतिस्मा लेणे बाद पबित्र आत्मा उसयो झट सुनसान जगा पासे भेजी दिता। **13** यीशु उसा सुनसान जगा च चालियां रोजां दीकर रिया, ओथु शैताने उदी परख लेई। सै बंणे दे जानवरां सोगी रिया, कने स्वर्गदूत यीशुऐ दी सेवा करदे थे। **14** कुछ बकत बीतणे बाद राजा हेरोदेसे यूहन्ना जो पकड़ी लिया कने उसयो जेला च पाई दिता, तालू यीशु गलील प्रदेश च गिया कने उना लोकां जो परमेश्वरे दे राज्य दा शुभसमाचार सुणाया। **15** कने बोलया, “परमेश्वरे जडा बकत दसया था सै आई गिया है, स्वर्गे दा राज्य बखे आई रिया है, अपना मन बदला कने अपने पापां ला पश्चाताप करा, कने परमेश्वर

दे शुभसमाचारे पर भरोसा करा।” 16 इक दिन जालू यीशु गलील झिला दे बखे चलया था, तां उनी शमौन कने उदे छोटे भाई अन्द्रियास जो झिला च जाल पांटे दिखया: क्योंकि सै मच्छियां पकणने दा कम्म करदे थे। 17 यीशुए उना जो बोलया, “ओआ कने मेरे चेले बणा; मै तुहांजो सिखांगा कि लोकां जो मेरे बाल कियां लोणा कने कियां मेरे चेले बणणा है।” 18 उना झट जाल छडया कने उदे पिच्छे चली पे। 19 जालू यीशु थोड़ा अग्रे चलया, उनी होर दो भाईयां जो दिखया जिना दे ना याकूब कने यूहन्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे। 20 यीशुए उना जो दिखया कने उना जो बोलया मेरे सोगी चला कने मेरे चेले बणा; कने सै अपने पिता जब्दी कने मजदूरं जो किस्तिया पर छडी करी, उदे चेले वणने ताई उदे पीच्छे चली पे। 21 यीशु कने उदे चेले कफरनहूम शेहरे च आये, कने सै सब्त दे रोजे यहूदी जंज घरे च जाई करी उपदेश करणा लगा। 22 कने लोक उदे उपदेश सुणीकरी बड़े हेरान होए; क्योंकि सै उना जो यहूदी व्यवस्था जो सिखाणे बालयां सांई नी, पर अधिकारे ने उपदेश दिन्दा था। 23 जालू यीशु उपदेश दे दा था, तालू यहूदी जंज घर च इक माणु था, जिदे बिच इक बुरी आत्मा थी। 24 उनी जोरे ने बोलया, “हे नासरत दे यीशु मसीह, तु सांझो कजो तंग करदा है? तू क्या सांझो खत्म करणा आया है? मिंजो पता है की, तू कुण है? तु ही परमेश्वर दा पबित्र पुत्र मसिहा है, जड़ा परमेश्वरे ला आया है।” 25 यीशुए बुरिया आत्मा जो झिडकया कने बोलया, “चुप रे; कने इस माणुए ला निकली जा।” 26 तालू सै बुरी आत्मा उसयो मरोड़ी करी, कने जोरे ला चिलाई करी उदे चे निकली गई। 27 यहूदी जंज घरे च आयो सारे लोक हेरान होइ गे, कने इसा गल्ला जो इकी दुजे ला पुछणा लग्गे, “ऐ कदिया उपदेश है? असां कदी भी इतणे हके ला उपदेश दिन्दे नी सुणया है!” कने बुरी आत्मा इदियां गल्लां जो मंदियां भी हेन। 28 कने उदे बाद यीशुए जड़ा भी किता, उदे बारे च लोक इकी दुज्जे जो दसदे रे कने झट सारे गलील प्रदेशे दे लोकां ने यीशुए दे बारे च सुणी लिया। 29 जियां ही यीशु कने उदे चेले यहूदी जंज घर ला निकले, तां सै शमौन कने अन्द्रियास दे घरे जो गे कने याकूब कने यूहन्ना उदे सोगी थे। 30 उस बकत शमौने दिया ससु जो बड़ा भरी बुखार था कने सै बिस्तरे च पियो थी, जालू यीशु घरे पुज्जा तालू उसयो कुनकी चेले दसया कि शमौने दिया ससु जो बुखार है। 31 तालू यीशुए उसा दे बखे जाई करी उसा दा हथ पकड़ी करी उसा जो जगाया, कने

उसा दा बुखार खरा होई गया, कने सै उना दी सेबा करणा लगी पेई। 32 उसी रोजे संझा दे बकते जालू सब्ते दा दिन मुकी गया, उदे नगरे च मते लोक बिमार थे कने जिना च बुरियां आत्मा थियां, उना सारयां जो यीशुए बाल लेई आये। 33 मते सारे लोक घरे दे दरबाजे सामणे गिठे होई गये। 34 उनी मतयां जो जिना जो बडे प्रकार दियां बिमारियाँ थियां, उना जो ठीक किता, कने मतियां बुरियां आत्मा कडी दितियां, कने बुरियां आत्मा जाणदियां थियां की ऐ परमेश्वर दा पुत्र है, उना जो बोलणे दा हुकम नी था। 35 ब्यागा ध्याडा निकलने ला पेहले, यीशु उठया कने निकली करी इक सुनसान जगा पर जाई करी ओथु प्राथना करणा लग्गा। 36 तालू शमौन कने उदे सोगियां जो पता लग्गा, की सै चली गया, तां सै उसयो तोपणा गे। 37 जालू सै मिल्ला, तां उना उसयो दसया, “की मते सारे लोक तिजो तोपा दे थे।” 38 यीशुए उना जो बोलया, “चला; असां अखे बखे दे गांए च चलदे न ताकि ओथु भी परमेश्वर दे संदेश दा प्रचार करी सकन, क्योंकि मैं इसी तांई इसी संसारे च आया है।” 39 कने यीशु सारे गलील प्रदेश दे यहूदी जंज घरां च जाई-जाई करी उपदेश दिन्दा, कने बुरियां आत्मा जो कडदा था। 40 इक कोढी माणु था, सै यीशुए बाल आया, कने उदे सामणे गोडे भार बेईकरी, उसयो बिनती किती कने बोलया, “मैं जाणदा है कि तू चाआं तां मिंजो ठीक करी सकदा है।” 41 यीशुए उस पर तरस खाई करी अपणा हथ गां किता जिसयो कोढ था, कने उसयो छूता कने बोलया, “मैं चांदा है की तू ठीक होई जा।” 42 कने झट उदा कोढ ठीक होणा लगी पिया, कने सै ठीक होई गया। 43 तालू यीशुए उसी माणुए जो सकत चेतावनी देईकरी भेजया, 44 कने उसयो बोलया, “दिख, कुसी ने कुछ मत बोलदा, पर जाई करी अपणे आपे जो याजकां ने दस, की तु खरा होईया कने परमेश्वरे जो भेंट चढा जिदे बारे च मूसा बडी पेहले लिखया था, ताकि लोक जाणी सकन की तु खरा होई गया।” 45 पर सै बाहर जाई करी इसा गल्ला दा बडा भरी प्रचार करणा लग्गा कने उनी ऐ ऐथू दीकर फेलाई दिती, कि यीशुए उसयो खरा करी दिता कने यीशु शरेआम बाहर शेहरे च नी जाई सकदा था, फिरी सै बाहर सुनसान जगा च रिया; कने चारो पासे दे लोक उदे बाल ओंदे रे।

2 मतयां रोजां बाद जालू यीशु कफरनहम शेहरे च मुडी करी आया कने तां ओथु दे लोकां जो पता चली गया कि सै घरे आया है। 2 फिरी मते सारे लोक गिठे होए, उस बजा ने घरे मती भीड़ होई गई, ऐथू दिकर की दरबाजे बाल भी जगा नी रेई;

कने सै उना जो परमेश्वर दे बचने चे प्रचार करा दा था। 3 कने इक धरंग होयो मरीजे जो चार माणु मंझे पर चुकी करी उदे बाल लेई आये। 4 पर जालू सै भीड़ा दिया बजा ला यीशुऐ बखे नी जाई सके, तां उसा छती जो जिसा हेठ सै बैठया था, उना से पुटी करी रस्ता बणाई दिता, कने जालू सै पुटी बैठे, तां उना उसयो मंझे समेत छती ला थले लटकाई दिता। 5 यीशुऐ उना दा भरोसा अपने उपर दिखीकरी, उस धरंग होयो मरीजे जो बोलया, हे पुत्र, “मैं तेरे पापां जो माफ किता।” 6 तालू केई यहूदी व्यवस्था जो सिखाणे बाले ओथु बैठयो थे, सै अपने-अपने मने च सोचणा लग्गे, 7 “ऐ माणु ऐसियां गल्लां कजो बोला दा है? ऐ तां परमेश्वरे दी निंदा करा दा है। परमेश्वरे जो छडी करी होर कुण पापां जो माफ करी सकदा है?” 8 यीशुऐ अपनी आत्मा च झट जाणी लिया, की सै अपने मने च ऐसा सोचा दे न, कने उनी यहूदी गुरूआं जो बोलया, “तुसां ऐसा कजो सोचा दे न। 9 क्या धरंग होयो मरीजे जो ऐ बोलणा सोखा है, की तेरे पाप माफ होये, या ऐ बोलणा की, उठ अपने मंजे जो चुकी करी हंड फिर? 10 पर मैं तुहांजो दसणा चांदा है की मैं, माणुऐ दा पुत्र जिसयो धरतिया पर पाप माफ करणे दा हक है।” कने उस धरंग होयो मरीजे जो बोलया, 11 “मैं तिजो बोलदा है की, उठ, कने अपने मंझे जो चुक कने अपने घरे जो चली जा।” 12 सै झट उठया कने मंझा चुक्या कने चली गया, सारे लोक जड़े दिखा दे थे सै हेरान होए, कने सारे लोक परमेश्वर दी बड़ाई करिके बोलणा लग्गे, “असां इयोदिया कदी नी दिखया।” 13 इक बरी फिरी यीशु निकली करी झिला बखे गया, कने मते सारे लोक उदे बाल आए, कने सै उना जो परमेश्वर दे बचना दा उपदेश देणा लग्गा। 14 यीशु जियां ही अग्गे निकलया, तालू उनी लेवी नाये दे कर लेणेबाले माणुऐ जो दिखया, जिदा दुज्जा ना मत्ती था। उदे पिता दा ना हलफईस था। जड़ा अपणिया चौकियां पर बैठया था, जिथू से कर लेंदा था। कने यीशुऐ उसयो बोलया, “मेरे चले बणा।” कने सै उठी करी सारा कम्म कार छडी करी यीशु पिच्छे चली पिया, कने उदा चेला बणी गया। 15 उदे बाद यीशु कने उदे चले लेवी दे घरे राती रोटीयां खाणा बैठयो थे। तालू मते भरी चुंगी लेणेबाले कने पापी भी चेलयां सोगी रोटीयां खाणे तांई बैठयो थे। सै मते भरी थे जड़े यीशुऐ पिच्छे चलयो थे। 16 मूसा दिया व्यवस्था जो सिखाणे बाले कने फरीसियां जालू ऐ दिखया, की जिना जो लोक पापी बोलदे थे, सै उना सोगी रोटीयां खा दा है, तां उना लोका यीशुऐ दे

चेलयां जो बोलया, “ऐ तां चुंगी लेणेबाले कने पापियां सोगी खांदा पिंदा है।” 17 जालू यीशुऐ ऐ सुणया तां उना जो बोलया, “जड़े लोक खरे न उना जो वैघे दी जरूरत नी होंदी है, पर जड़े बिमार न उना जो है। मैं उना लोकां जो सदणे जो नी आया जड़े अपने आपे जो धर्मीं मंदे न, पर की जड़े लोक अपने आपे जो पापीं मंदे न, मैं उना तांई आया है।” 18 यूहन्ना दे चेले, कने फरीसी बरत रखदे थे सै बिना कुछ खादयो रेंदे थे; इक दिन उना चे कुछ चेले यीशुऐ बाल आये कने पुछया की, “यूहन्ना दे चेले कने फरीसियां दे चेले बरत कजो रखदे न, पर तेरे चेले तां बरत रखदे नी न?” 19 यीशुऐ उना जो बोलया, “मरे चेले कने मैं, लाड़ा कने उदे मित्रां सांई न। क्या लाड़े दे मित्र तालू दीकर बरत रखी सकदे ने जालू दिकर पुरे बियाये च उदे सोगी न? जालू दीकर लाड़ा उना सोगी है तालू दीकर सै बरत नी करी सकदे न। 20 पर सै दिन ओणे न, जालू लाड़ा उना ला लग कितया जाणा है, तालू इना बरत रखणे न। 21 लोक नोऐ कपड़े दा रफु पराणे कपड़यां च कोई नी पांदा है, नी तां उनी रफुये धोणे ने सुकड़ी जाणा, कने पुराणा कपड़ा होर जादा फटी जाणा। मेरियां गल्लां भी पुराणे रिती रिबाजां सोगी जोड़गे तां इसी कपड़े सांई से भी बेकार होई जाणियां। 22 नोऐ अंगूर दे रसे जो पराणिया खलडिया दे झोले च कोई नी रखदा है, नी तां नोआ अंगूर रस खलडिया जो फाडी दिन्दा है, कने अंगूर रस खलडिया जो खत्म करी दिन्दा है; तांई तां नोआ अंगूर रस नोईयां खलडिया च नी रखदे न।” 23 इयां होया की यीशु कने उदे चेले सब्ते दे रोजे खेतरां च होईकरी जा दे थे; कने उदे चेले चलदे-चलदे बेलां जो तोड़ी करी खाणा लग्गी पे। 24 तालू फरीसियां बोलया, “की तेरे चेले इयोदे कम्म कजो करदे न जड़े नियमा दे अनुसार सब्त दे दिने करणा ठीक नी होंदे न?” 25 यीशुऐ उना जो बोलया, “तुसां क्या कदी नी पढया की जालू साडे महान राजा दाऊदे जो जरूरत पेई, कने जालू सै कने उदे साथी भूखे थे तां उनी क्या किता था? 26 कि इक अबियातार नाऐ दा महायाजक था, जालू दाऊद कने उदे सोगी मित्र भुखे थे, तालू उना परमेश्वरे दे तम्बू च जाई करी रोटियां खादियां जडियां परमेश्वरे जो चढाईयां थियां, कने अपने सोगियां जो भी खुआईयां, इना रोटियां जो खांणे दा हक याजकां जो छडी करी होर कुसयो नी था।” 27 तालू यीशुऐ उना जो बोलया, “परमेश्वरे लोकां दिया भलाईया वासते सब्ते दा रोज बणाया है, उनी सब्ते बाले रोजे उना उपर भार पाणे तांई नी

बनाया है। 28 मैं, माणुए दा पुत्र ऐ बोलणे दा हक रखदा है कि लोकां जो सब्ते बाले रोजे जो क्या करणे दी अनुमति है।”

3 इक होर सब्ते बाले रोजे यीशु यहूदी जंज घर च आया; ओथु इक माणु था, जिदा इक हथ सुक्की कने बेकार होई गया था। 2 कने फरीसी यीशुए उपर कोई दोष लाणे ताई बहाना तोपा दे थे, तालू कुछ माणु यीशुए जो बडिया गोरा ने दिखणा लग्गे, की यीशु उसया सब्ते बाले रोजे खरा करगा की नी। 3 यीशुए उस सुक्को हथे बाले जो बोलया, “सारयां लोका दे बिच खड़ोई जा।” 4 कने उना ने बोलया, “क्या परमेश्वर सांझो सब्ते दे रोजे लोकां जो खरा कम्म करणे दा हुकम दिन्दा है, कि नीच कम्म करणे दा? क्या सांझो सै कुसी माणुए दे प्राण बचाणे दा हुकम दिन्दा कि मारणे दा?” पर सै सारे चुप रे। 5 यीशुए जो जालू गुस्सा आया तालू उनी उना लोकां दे चारों पासे दिखया। कने यीशु बड़ा उदास होया की सै बड़े कठोर कने जिद्दी माणु न। कने उस माणुए जो बोलया, “अपणा हथ कर रूआं।” उनी किता, कने उदा हथ खरा होई गया। 6 तालू फरीसी झट बाहर आई करी राजा हेरोदियां दे गिरोह दे कुछ लोकां कने मिली करी उदे खिलाफ सलाह करणा लग्गे, की उसयो कियां मारणा है। 7 कने उदे बाद यीशु अपने चेलयां सोगी झिल्ला दे पासे चली गया: कने गलील प्रदेशे ला बड़ी भरी भीड़ उदे पिच्छे चली पेई। 8 कने यहूदिया जिले, कने यरूशलेम शहर कने इदूमिया जिले ला, कने यरदन खड्डा दे पारे ला, कने सूर कने सैदा शेहरे दे अखे बखे लोक ऐ सुणीकरी यीशु वाली आये, कि यीशु बड़े हेरान कने चकित करणे बाले कम्म करदा है। 9 यीशुए अपने चेलयां जो बोलया, “मिजों बोणे ताई इक छोटी किस्ती लेईकरी ओआ, ताकि लोक मिंजो वाली भीड़ नी लगाई सकन।” 10 उनी उसी रोजे मतयां जो ठीक किता। उदिया बजा ला, मते सारे लोक जडे बिमार थे, सै यीशुए जो छुंणे दी कोशिश करा दे थे। 11 कने बुरियां आत्मा ला जकड़यो लोक, जालू यीशुए जो दिखदे थे, तां यीशुए जो इज्जत देणे ताई उदे पैरां अगगे डेई पोंदे थे, कने जोरे-जोरे ने बकदे थे, “की तू परमेश्वरे दा पुत्र है।” 12 कने यीशुए चेतावनी देईकरी बुरी आत्मां जो बोलया, “कि मेरे बारे च कुसी ने भी मत दसदे कि मैं परमेश्वर दा पुत्र है।” 13 उदे बाद यीशु इक धारा पर चढ़ी गया, कने उना जो अपने बाल सदया जिना जो सै चांदा था, कने सै उदे बाल आये। 14 तालू उनी बाहरां माणुए जो चुणयां। जडे उदे खास चले बणे, उनी उना जो प्रेरित दा ना दिता, कने सै चांदा की सै उदे सोगी-सोगी रैन,

कने यीशु उना जो भेजे की सै प्रचार करन, 15 कने बुरियां आत्मा जो कडणे दा हक दिता। 16 ऐ सै बाहरा चले न, जिना जो यीशुऐ चुणया था: शमौन जिदा ना उनी पतरस रखया; 17 ऐ दो भाई जिना दा ना याकूब कने यूहन्ना है, सै जब्दी दे पुत्र थे, जिसयो यीशु ने बुअनरगिस बोलया, कने उदा मतलव गडकने बाले माणु। 18 कने अन्द्रियास, कने फिलिप्पुस, कने बरतुलमै, कने मत्ती, कने थोमा, कने हलफईये दा पुत्र याकूब, कने तैदे, कने शमौन कनानी जडे क्रांति लयोणे बाले थे, 19 कने यहूदा इस्करियोती, जिनी उसयो दुशमणा दे हथे पकड़ाई भी दिता था। 20 कने यीशु गांऐ दे कुसी घरे च आया, कने ओथु इतणी भीड़ गिठी होई गई, की उसयो रोट्टी खाणे दा भी बकत नी मिला। 21 जालू उदे रिशतेदारां ऐ सुणया, तां सै उसयो घरे जो लेई जाणे तांई आये, क्योंकि सै बोलदे थे, की इदे होस ठीक होणे च नी है। 22 कने सै जडे मूसा दी व्यवस्था जो सिखाणे बाले थे, सै यरूशलेम शहरे ला आयो थे, सै भी ऐ बोलदे थे की, “इदे च शैतान है,” कने “सै बुरियां आत्मा दा सरदार है, कने शैताने दिया मददा ने बुरियां आत्मा जो कडदा है।” 23 इस तांई सै उना जो बखे सदीकरी, उना जो कहाणिया च बोलणा लग्गा, “क्या शैतान अपणी ही बुरी आत्मां जो लोकां ला बार कडणे तांई जोर पांगा? नी, जरा भी नी!” 24 अगर कुसी राज्य च लोक अपु च ही लडदे रेंगे तां सै राज्य बडे बकते तक नी टिकी सकदा है। 25 कने अगर कुसी घरे दे माणु अपु च ही लड्डी पोंगे तां सै घर नी चली सकदा। 26 अगर शैतान अपणा ही बैरी बणिया कने अपु ने ही लड्गा, तां उनी अपणा ही नाश करी लेणा है। 27 कोई भी माणु जोरे बाले माणुऐ दे घरे जो नी लुटी सकदा, जालू दीकर सै पेहले, उस माणुऐ जो बन्नी नी ले; तां जाई करी सै उदे घरे जो लुटी सकदा है। 28 “मैं तुसां ने सच्च बोलदा है, की माणुऐ दी ओलादी दे सारे पाप कने निंदा जडा सै परमेश्वर या कुसी दे खिलाफ करदे न, परमेश्वरे उना दे पाप माफ करी देणे न; 29 पर जडा कोई पबित्र आत्मा दे खिलाफ निंदा करगा, तां सै परमेश्वरे कदी भी माफ नी करणा है। कने परमेश्वर इसी पापे तांई उस माणुऐ जो हमेशा तांई दोषी मनणा है।” (aiōn g165, aiōnios g166) 30 यीशुऐ ऐ इस तांई बोलया क्योंकि सै ऐ बोलदे थे, की उसयो बुरिया आत्मा जकडया है। 31 तालू यीशु दी मां कने उदे भाई आये, कने उना बाहर खडोई करी उसयो बुलाबा भेजया। 32 भीड़ उदे अखे बखे बैठियो थी, कने उना उसला बोलया, “दिख, तेरी माता कने तेरे भाई तिजो तोपा दे न।” 33 यीशुऐ उना जो

जबाब दिता, “मेरी माता कने मेरे भाई कुण न?” 34 कने उनी उना पासे नजर दिती जड़े उदे अखे बखे बैठयो थे कने बोलया, “दिखा, मेरी माता कने मेरे भाई न। 35 सै सेई ही करदे न जड़ा परमेश्वर चांदा है, सै ही मेरे भाई, बेहण कने माता पिता न।”

4 यीशु फिरी गलील झिला दे बखे उपदेश देणा लग्गा, कने ओथु इतणी भरी भीड़ गिठी होई गेई, की सै झिला च इक किस्तिया पर चढी करी बेई गया, कने सारे लोक झिला दे बखे खडोई रे। 2 कने सै उना जो कहाणी सुणाणा लग्गा, कने अपने उपदेश च उना ने बोलया, 3 “सुणा इक किसान अपने खेतरे च बी रांणे ताई गया। 4 रांदे बेले थोड़े बी रस्ते दे बखे पेई गे कने सै तां पछियां आई करी चुगी ले। 5 कने थोड़े बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लुंगी पै। 6 कने जालू खडी धूप पेई, तां सै फकुई गे, क्योंकि उना दिया जड़ा डुगियां नी थियां तां सै सुकी गे। 7 कने थोड़े बी झिल्लां च पे, कने जालू झिल्ल बदे तां उना सै बी डकी ले, कने उना फल नी दिता। 8 पर थोड़े बी खरिया जमिना पर पे, कने सै बी लुंगे, कने मते सारे फल देणेबाले होए; केईयां ती गुणा, केईयां सठ गुणा, केईयां सौ गुणा।” 9 तालू उनी बोलया, “जिस बाल सुणने ताई कन्न न सै ध्यान लाईकरी गल्लां जो सुणे, कने इसा गल्ला जो समझी ले।” 10 जालू यीशु किल्ला रेई गया, तां बाहरा चले कने जड़े सोगी थे सै उसला इसा कहाणिया दा मतलब पुछणा लग्गे। 11 उनी उना जो बोलया, “तुसां तां परमेश्वरे दे राज्य दियां छुपियां होईयां सच्चियां गल्लां दसियां न, पर ऐ कहाणी बाहरे बाले लोकां ताई थी, सै जड़े मिजों पर भरोसा नी रखदे। 12 जियां कि पवित्रशास्त्र च लिखया है, सै तिनां जो मिलदे होए भी नी मिलदा कन्ना ने सुणदे होए भी सै नी सुणदे कने समझदे; इयां नी होऐ की सै अपने बुरे कम्मा जो छडी देन, कने उना जो माफ करणा पोऐ।” 13 फिरी यीशुए उना जो बोलया, “तुसां इना गल्लां जो नी समझगे, तां फिरी तुसां होरा कहाणियां जो कियां समझगे। 14 इसा कहाणिया दा ऐ मतलब है, बी राणे बाला इयोदिया है जियां कोई परमेश्वरे दे बचना दा प्रचार लोकां च करदा है। 15 जड़ा बी रसते च पिया उदी तुलना उना लोकां ने कितियो है, जड़ा परमेश्वर दे बचन सुणदे न। पर शैतान झट पट जादां कने उना दे मने ला बचन कडी दिन्दा है जड़ा उना सुणया था। 16 कने थोड़े लोक उस पथरे वालिया जमिना सांई न जिथू बी पिया था, ऐ सै माणु न, जड़े

बचना जो सुणीकरी उना जो झट खुशिया ने ग्रहण करी लेंदे न। 17 पर परमेश्वर दे
 बचना जो मने दिया गहराईया च बढणा नी दिन्दे, उदे बाद जालू बचने दिया बजा ने
 उना पर कला क्लेश या पेशानी होंदी है, तां सै बचना ला पिच्छे हट्टी जांदे न। 18
 जडे बी झिल्लां च पियो न, ऐ सै माणु न जिना बचन सुणया, 19 पर सै संसारे दियां
 चिंता जो लेईकरी दुखी, कने संसारिक चिंजा दिया मोहमाया च फसी जांदे न, ऐ
 सब कुछ परमेश्वरे दे बचन च स्कावट पांदा है। कने सै बचन उना तांई फायदेमंद
 नी होंदा। (aiōn g165) 20 कने जडे बी खरिया जमिना पर रायो थे, ऐ सै माणु न,
 जडे बचन सुणीकरी ग्रहण करदे न, कने फल दिन्दे न, कोई ती गुणा, कोई सठ
 गुणा, कने कोई सौ गुणा।” 21 यीशुऐ उना जो बोलया, “क्या कोई दिये जो
 जल्लाई करी उसयो इक टोकरू या मंजोलिया दे जिक इस तांई रखदा है की
 उदिया लौई जो लुकाई सके? ना जरा भी नी। दिये जो ताके उपर रखदे न, जिथू
 ला उदी लोअ चमकी सके।” 22 क्योंकि जडा कुछ भी लुकया है, सै सामणे
 करणा; कने हर इक गुप्त गल्ल सामणे आई जाणी है। 23 “जिस बाल सुणे तांई
 कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 24
 यीशुऐ उना जो बोलया, “ध्यान रखा, की जितणा तुसां ध्याने ने बचना जो सुणगे,
 तुसां जो उतणा ही जादा समझ ओणा है, उदे साबे ने परमेश्वरे तुहांजो देणा है। जिस
 नापे ने तुसां नापदे न उसी नापे ने तुहाड़े तांई नापया जाणा है, कने तुसां जो जादा
 दितया जाणा है। 25 जिना बाल जडा परमेश्वर सिखांदा है उसयो समझणे दी इच्छा
 है, उना जो परमेश्वरे होर समझ देणी, पर जडा समझणे दी इच्छा नी रखदा, की मै
 क्या सिखांदा, तां सै जडा समझया है, परमेश्वरे उसला सै भी लेई लेणा।” 26
 यीशुऐ उना जो बोलया, “परमेश्वरे दा राज्य ऐसा है, जियां कोई किसान खेतरे च
 बी रांदा है, 27 जालू उनी बी राई दिते उनी फिरी दुबारा मुडी करी बी नी दिखया
 कने अपणे रोजाने बाले कम्मा करदा रिया। पर जडा उनी बी राऐ थे, सै बी लुंगे
 कने बड्डे होए, कने से जाणदा भी नी की ऐ कियां होया। 28 धरती अपु ही फल
 दिन्दी है, पेहले लूंगा, फिरी सिल्ले, फिरी सिल्यां च तैयार दांणा। 29 पर जालू सै
 दाणे पकी जांदे न, तालू सै किसान ओंदा कने दराटिया ने बडणा लगदा, क्योंकि
 बडणे दा बकत आई गिया था।” 30 फिरी यीशुऐ कहाणी सुणाई, “असां परमेश्वरे
 दे राज्य दी तुलना इयां करी सकदे न, जियां तुसां जो मै कहाणी दसदा। 31 कने
 परमेश्वर दा राज्य धरती दे सारे बियां ला सबला छोटे बी राईऐ दे बियां सांई है। 32

पर जालू जमिना च रादे न, तां सै उगी करी सारे साग पतरां ला बडा होई जांदा है, कने उदियां इतणियां बडियां डालियाँ निकलदियां न की अम्बरे दे पंछी भी उदिया छोआं च रेहणे तांई डालियाँ च घोंसले बणाई सकदे न।” 33 कने सै लोकां जो परमेश्वरे दे राज्य दे बारे च दसणे तांई हरबरी कहाणिया दा इस्तेमाल करदा था, जडियां उना जो समझ आई जान। 34 कने सै हमेशा परमेश्वरे दे राज्य दियां गल्लां कहाणिया च बोलदा था, पर जालू सै किल्ला होंदा था, तां सै अपने चेलयां जो सारियां गल्लां दसदा था। 35 उसी दिने सझां दे बेले, उनी अपने चेलयां ने बोलया, “ओआ, असां गलील झीला दे पार चलदे न।” 36 कने चले भी भिडा जो छडी करी उसा किस्तिया पर चढी गे, जिसा पर यीशु बैठया था। कने सै यीशुए जो अपने कने लेई गे। ओथु उना सोगी होर भी किस्तियां थियां। 37 तालू सै झीला जो पार करा दे थे, तां बडा भरी तूफान आया कने लेहरां किस्ती ने बजियां, किस्तिया च पाणी भरूईया कने किस्ती डुबणे वाली थी। 38 कने यीशु पिछले हिस्से च सुतया था, तालू उना उसयो जगाई करी बोलया, “गुरू जी, तिजो क्या साडी कोई फिकर नी है, की असां मरणे बाले न?” 39 तालू उनी उठी करी तुफाने जो डांटया, कने लेरां जो बोलया, “शांत रिया, स्की जा!” कने हवा स्की गई कने झील शांत होई गई। 40 कने उनी तालू चेलयां ला पुछया, “तुसां कजो डरदे न? क्या तुहांजो हले दीकर मिजो पर भरोसा नी है?” 41 सै बडे भरी डरी गे कने अपु चे बोलणा लगगे, “ऐ कदिया माणु है? ऐथू तक की तूफान कने लैहरां भी इदा हुकम मंदे न।”

5 यीशु कने उदे चले गलील झिला दे पार गिरासे दे लोकां दिया जगा च पुज्जे, 2 जालू यीशु किस्तिया ला थले उतरया तालू इक माणु जिसयो बुरिया आत्मा जकड़या था, सै कब्रिस्तान ला निकलया कने यीशुए बाल आया। 3 सै कब्रिस्तान च रेंदा था कने लोक उसयो बन्नी करी नी रखी पांदे थे, ऐथू दिकर की लोहे दे सुंगला ने भी नी। 4 क्योंकि उसयो बडी बरी बेडियाँ कने सुंगला ने बनया था, पर सै उना सुंगला जो तोड़ी दिन्दा, कने बेडियाँ दे टोटे-टोटे करी दिन्दा था, कने उसयो कोई भी काबू च नी करी सकदा था। 5 सै रात दिन कब्रिस्तान कने पाहडा च जोरे-जोरे बकदा रेंदा, कने अपने आपे जो पथरा ने जखमी करदा रेंदा था। 6 सै यीशुए जो दुरे ला ही दिखीकरी दोड़या, कने यीशुए जो इज्जत देणे तांई उदे पैरां अग्रे डेई पिया। 7 उनी जोरे ने चिलाई करी बोलया, “यीशु जी, परमपिता

परमेश्वरे दे पुत्र, तू मिंजो कजो सता दा है? तू परमेश्वरे दे ना लेईकर कसम खा की तू मिंजो नी सतांगा।” 8 उनी ऐ बोलया क्योंकि यीशुऐ उसयो पेहले ही हुकम देई दितया था, “हे बुरी आत्मा, इस माणुऐ ला तू निकली जा।” 9 यीशुऐ उसा बुरिया आत्मा जो पुछया, “तेरा क्या ना है?” उनी बोलया, “मेरा ना सेना है, क्योंकि असां मते सारे ना।” 10 कने उना बुरियां आत्मा उसला बड़ी बिनती किती, “की सांझो गिरासे दे इलाके ला बाहर मत भेजा।” 11 ओथु धारा पर इक सूअरां दा झुण्ड चुग्गा दा था। 12 कने बुरियां आत्मा यीशुऐ ने बिनती करिके बोलया, “की सांझो इना सूअरां च भेजी दे ताकि असां इना दे अंदर जाई सकन।” 13 यीशुऐ उना जो हुकम दिता कने सै बुरियां आत्मा उसी माणु ला निकली करी सूअरां दे अंदर समाई गियां, कने उसी झुण्डे च कोई दो हजार सूअर थे, कने खड़े डडे पासे दौड़े कने रिडकी करी झिला च जाई पे कने डूबी करी मरी गे। 14 उना दे पुहालां नठी करी शहर कने गांऐ च ऐ खबर सुणाई, कने जडा होया था लोक उसयो दिखणा आये। 15 यीशुऐ बाल आई करी, उना उसयो दिखया जिदे च बुरियां आत्मा थियां, उसयो कपड़े पाई करी कने खरा बैठया दिखीकरी सै डरी गे। 16 दिखणे बालयां उदा जिदे बिच बुरियां आत्मा थियां, कने सूअरां दा पूरा हाल, बाकियां जो दसया। 17 तालू जड़े लोक दिखणा आयो थे, सै यीशुऐ ने बिनती करिके बोलणा लग्गे, कि साड़े इलाके ला चली जा। 18 जालू यीशु किस्तिया पर जाणे तांई चढया, तां सै जिदे च पेहले बुरियां आत्मा थियां, सै यीशुऐ ने बिनती करणा लग्गा, “की मिंजो भी अपु सोगी रेंणा दे जियां बाहरा चले उदे सोगी रेंदे थे।” 19 पर यीशुऐ उसयो अपणे सोगी चलणे तांई मना करी दिता, कने उसयो बोलया, “अपणे घरे जाई करी अपणे लोकां जो दस, की प्रभुऐ तिजो पर दया करिके तें तांई कदेया कम्म किता है।” 20 तालू सै माणु अपणे घरे दे इलाके च चली गिया। फिरी उनी सारे दिकापुलिस जिदा मतलब “दस शहर” च ऐ प्रचार करणा शरू किता, कि यीशुऐ मेरे तांई बडा कुछ कितया है, कने उसयो सुणनेबाले सारे लोक हेरान होऐ। 21 जालू यीशु दोबारा किस्तिया च गलील झिला पारे जो गिया, कने बड़े भरी लोक उस बाल गिठे होई गे। सै झिला बखे ही था, 22 यहूदी जंज घरे दे सरदारां चे इक याईर नाये दा सरदार आया, सै यीशुऐ दी इज्जत मान तांई यीशुऐ दे पैरां अग्रे डेई पिया, 23 कने उनी ऐ बोली करी बड़ी बिनती किती, “की मेरी लोकी कुडी मरणा लगियो है, कने तू साड़े घरे आई करी उसा जो छु,

ताकि सै ठीक होई जा कने मरणे ला बची जा।” 24 तालू ही यीशु उस सोगी चली पिया, कने मते भरे लोक उदे पिच्छे चली पे, सै यीशुए दे उपर डेई पोंदे थे। 25 भिडा च इक जनानी थी जिसा जो बाहरां सालां ला खून निकलने दी बिमारी थी। 26 उना मते वेघां हथा ला दुख झेलया था कने अपने सारे पेसे खर्चणे बाद भी सै खरी नी होई। कने उसा दा हाल बड़ा बुरा होई गया था। 27 जालू उना सुणया यीशुए लोकां जो खरा कितया है, तां उना सोचया, “कि मैं उदे कपड़यां जो छुई लें, तां मैं खरिया होई जाणा।” ताई तां उना भिडा च यीशु दे पिच्छे आईके उदे कपड़यां जो छुता। 28 क्योंकि सै बोलदी थी, “अगर मैं उदे कपड़यां जो भी छुई लेंगी, तां ही मैं ठीक होई जाणा।” 29 कने झट उसा दा खून चलणा बंद होई गया, उना अपने शरीर ला मेहसूस करी लिया की मैं इसा बिमारिया ला ठीक होई गियो है। 30 यीशु भिडा च पिच्छे मुड़या कने पुछया, “मेरे कपड़यां जो कुनी छुता?” उनी ऐसा इस ताई पुछया क्योंकि उसयो पता लगी गया की उदे चे सामर्थ्य निकली, कने कोई माणु खरा होया है। 31 उदे चेलयां उसयो बोलया, “तू दिखा दा है, की तेरे अखे बखे इतणी भरी भीड़ है, कने तू पुछदा है, की कुनी मिजो छुता?” 32 तालू यीशुए उसी माणुए जो दिखणे ताई जिनी ऐ कम्म कितया था, चारो पासे नजर दौड़ाई। 33 तालू सै जनानी जाणी गया की मैं खरी होई गियो, तालू सै आई कने यीशुए दे पैरां च पेई गेई कने पैर बंदे। कने यीशुए जो दसया की मैं तिजो छुतया था। उना सोचया कि उनी उसा पर गुस्सा होणा उसा गल्ला दिया वजा ला सै डरी कने कम्मी पियो थी। 34 यीशुए उसा जो बोलया, “कुडिये, तेरा भरोसा जड़ा मिजों पर था उनी भरोसे तिजो खरा कितया है, शांति ने चली जा, हुण तु अपणिया इसा बिमारिया ला बची करी रियां।” 35 यीशु हले उसा ने गल्ल करा दा ही था, यहदी जंज घरे दे सरदारे दे घरे ला कुछ लोकां आई करी बोलया, “की तेरी कुडी तां मरी गेई है” हुण गुरूए जो कजो तकलीफ दे दा है? 36 जड़ी गल्ल सै बोला दे थे, उसा गल्ला जो यीशुए अणसुणी करिके यहदी जंज घरे दे सरदारे जो बोलया, “डर मत, सिर्फ मिजों पर भरोसा रख।” 37 तालू यीशुए सिर्फ पतरस, याकूब कने याकूब दे भाई यूहन्ना कने याईर जो ही अपने कने ओणा दा हुकम दिता, होर कुसयो भी अपने सोगी ओणा नी दिता। 38 कने यहदी जंज घरे दे सरदारे दे घरे च पुज्जी करी, उनी लोकां जो रोंदे कने डडदे दिखया। 39 तालू यीशुए कमरे अंदर जाई करी उना जो बोलया, “तुसां इयां डडा कने रोआ

मत? कुड़ी मरियो नी है पर सुतियो है।” 40 सै सुणीकरी, सारे लोक यीशुए पर हसणा लग्गे, तालू उनी सारयां जो बाहर कडी दिता। कने कुडिया दे माता पिता कने अपने चेलयां जो सोगी लेईकरी कमरे अंदर गया जिथू कुड़ी पियो थी। 41 कने यीशुए कुडिया दा हथ पकड़ी करी उसा जो बोलया, “तलिता कूमी,” जिसदा मतलब है की, “हे छोटी कुडिऐ, मैं तिजो बोलदा है, उठ।” 42 कने कुड़ी झट उठी करी हंडणा लग्गी पेई, सै बाहरां सालां दी थी। जालू इयां होया तां सारे लोक कुडिया जो दिखीकरी हेरान होई गे। 43 फिरी यीशुए उसा दे माता पिता जो समझाई करी हुकम दिता की इसा गल्ला दा कुसयो पता नी लग्गे की उनी मरियो कुडियो जो जिन्दा कितया है। कने इसा कुडिया जो खांणे जो दिया कुछ।

6 तालू यीशु कफरनहम शेहरे ला चली गया, सै अपने ग्रां नासरत जो आया, कने उदे चले भी उदे सोगी आये। 2 यीशु सब्ते बाले रोजे यहूदी जंज घर च परमेश्वरे दे बचना दा उपदेश देणा लग्गा, कने मते लोक सुणीकरी हेरान होई गे कने बोलणा लग्गे, “इनी माणुए ऐ गल्लां कुथु ला सिखियां न? कने इसयो ऐ सारा ज्ञान कने चमत्कार करणे दी शक्तियां कुनी दितियां? कने सामर्थ्य दे कम्म कियां इदे ला होंदे न? 3 ऐ सिर्फ तरखाणे दा पुत्र है, जडा मरियम दा पुत्र, कने याकूब, योसेस, यहूदा कने शमौन दा भाई है। कने इदिया बेंहणा भी ऐथू साडे सोगी न” कने उना यीशुए पर भरोसा करणे जो मना करी दिता। 4 यीशुए उना जो बोलया, की परमेश्वरे दे संदेश देणेबालयां दा अपने ग्रां कने अपने रिशतेदारां अपने घरे छडी करी, हर कुथी उदी इज्जत मान होंदा है। 5 कने ओथु उसी पर कुनी भरोसा नी किता, इसा बजा ला उनी ओथु थोडे बिमारां पर हथ रखीकरी खरा किता उदे अलावा ओथु होर कोई चमत्कार नी करी सकया। 6 कने यीशु उना दे अविश्वास ने बडा हेरान होया कने उदे बाद यीशु अखे बखे दे ग्रांए च गया कने परमेश्वर दे बचना दा उपदेश दिता। 7 थोडे बकते बाद यीशुए बाहरां चेलयां जो अपने बाल सदया कने उना जो बुरी आत्मा कडणे दा हक दिता। उना जो दो-दो करिके लग-लग ग्रांए भेजणा लग्गा, कने उना जो बुरियां आत्मा जो लोकां चे कडणे दा हक दिता। 8 कने यीशुए उना जो हुकम दिता, की अपने रस्ते तांई सिर्फ इक सोठी लेनयो। ना तां खाणे तांई रोटी लेणी, ना तां झोला, ना ही बटुए च पेसे, 9 पर जुते पाई लेनयो कने होर कोई कपडे पाणे तांई मत लेंदे। 10 यीशुए उना जो बोलया, “की कोई तुहांजो अपने घरे रेहणे तांई सदगा, जालू दीकर तुसां उसी ग्रांए च रेगे, तालू दीकर उसी दे

घरे च परोणे बणी करी रिया। 11 जिसा जगा दे लोक तुहांजो अपनांगे नी कने तुहाडी सुणगे नी, ओथु ला जांदे बेले अपने पैरां दी धुड जाडी दिनयो, ताकि उना लोकां जो पता लग्गे की परमेश्वरे दिया तरफा ला मिलणे बाली सजा दे सै अपु ही जिम्मेबार न।” 12 तालू चेलयां जाई करी घोषणा किती की अपना मन बदला कने अपने पापां दा पश्चाताप करा, कने परमेश्वरे दे शुभसमाचार पर भरोसा करा, कने परमेश्वरे पासे मुडा। 13 कने उना मतियां बुरियां आत्मा जो कडया, कने मतयां बिमारां जो जैतुन दा तेल मली करी खरा किता। 14 कने हुण राजा हेरोदेसे यीशु दे कम्मा दी चर्चा सुणी जडे यीशु करा दा था, क्योंकि मते सारे लोक यीशुए जो जाणदे थे कने उदे बारे च चर्चा करा दे थे। कने बोला दे थे की ऐ सेई यूहन्ना बपतिस्मा देंगे वाला है, सै मरयां चे जिन्दा होई गया है, ऐई बजा है कि उदे बाल ऐ चमत्कार करणे तांई परमेश्वरे दी शक्ति है। 15 कने होरनी लोकां बोलया है, “परमेश्वरे दा संदेश दे बाला एलिय्याह है। कने बाकियां बोलया, ऐ सै परमेश्वरे दा संदेश देणेबाला है, जडे बडे जमाने पेहले रेंदे थे।” 16 हेरोदेसे ऐ सुणीकरी बोलया, “ऐ यूहन्ना बपतिस्मा देणेबाला है, मै अपु उदा मुंड बडबाया था, पर सै मरी करी फिरी जिन्दा होई गया है।” 17 हेरोदेस थोडे बक्ते पेहले अपने भाई फिलिप्पुस दी घरे बाली हेरोदियास ने बियाह करी लिया था। 18 तालू यूहन्ना उसयो बोलया, “ऐ तु खरा नी किता तु अपने भाईये दी लाडी लेई ली!” तांई तां हेरोदियास जो खुश करणे तांई, हेरोदेसे यूहन्ना जो पकड़ी करी उसयो जेला च पाई दिता। 19 तांई तां हेरोदियास यूहन्ना ने दुशमणी रखदी थी कने सै चांहदी थी, की उसयो मरवाई दे, पर ऐसा होई नी सकया, 20 हरबरी जालू हेरोदेस यूहन्ना जो बोलदे सुणदा था, तां सै डरदा था, क्योंकि यूहन्ना इक पबित्र कने धर्मी माणु था, पर तमी सै उसयो सुणना पसंद करदा था। कने सिपाहियां जो उदी रखाबाली करणे तांई रखया, हेरोदेस उदियां गल्लां सुणीकरी डरी जांदा था, पर सै खुशिया ने सुणदा था। 21 थोडे बक्ते बाद, हेरोदेसे अपना जन्म दिन मनाया। उनी अपने बड़े प्रधान अधिकारियां, सेना दे बड़े खास अगुवां कने गलील प्रदेशे दे अगुवां जो धामा च सदया। इसा धामा च हेरोदियास जो यूहन्ना जो मरवाणे दा मोका मिली गया। 22 कने हेरोदियास दी कुडी अंदर आई, कने नची करी हेरोदेस कने उदे सोगी धाम खाणा आये परोण्यां जो खुश किता, तालू राजे कुडिया जो बोलया, “तू जडा मजीं मिंजो ला मंग, मै तिजो दिगा।” 23 कने हेरोदेसे उसा ला ऐ बायदा किता, “की मेरे

अधे राज्य दीकर जड़ा कुछ तू मिजो ला मंगगी सै मै तिजो दिगा।” 24 उना बाहर जाई करी अपणिया माता ला पुछया, की मै क्या मंगे? माता बोलया की, “उसयो बोल की सै यूहन्ना बपतिस्मा देणेबाले दा मुंड बट्टी करी मिजो दे।” 25 कने सै झट अंदर राजे बाल आई, कने उसने बिनती किती की, “मै चांहदी है, की तू हुणी यूहन्ना बपतिस्मा देणेबाले दा मुंड बट्टी करी मिजो इक थालिया च दे।” 26 ऐ सुणीकरी राजा बड़ा उदास होया, पर अपणिया कसमां, कने सोगी बोणे बालयां दिया बजा ला उसा दिया गल्ला जो टालना नी चांदा था। 27 राजे इक सिपाइऐ जो हुकम दिता, कि जेला च जा, कने यूहन्ना दा मुंड बट्टी करी उदे बाल लेईकर आ। 28 सिपाइऐ जेला च जाई करी उदा सिर कटया, कने इक थालिया च रखीकरी लेई आया कने उसा कुडिया जो देई दिता, कने कुडिया अपणिया माता जो देई दिता। 29 जालू यूहन्ना दे चेलयां जो पता चला की उसयो मारी दितया है, यूहन्ना दे चेले आये, कने उना उदिया लाशा जो चुकी करी कबरा च रखी आये। 30 जालू सै प्रेरित जिना जो यीशुऐ भेजया था, सै यीशु बाल बापस आये कने उदे चारों बखे खड़ोइ गे, कने जड़ा कुछ उना किता, कने सिखया था, सारा कुछ उसयो दसया। 31 मते सारे लोक ओदे जांदे थे कने इसा बजा ला यीशु कने उदे चेलयां जो रोटियां खाणे दा बकत नी मिलदा था। तालू यीशुऐ चेलयां जो बोलया, “असां कुथी सुनसान जगा चलदे जिथू किल्ले रेई सकन कने थोड़ा बकत अराम करी सकन।” 32 इस तांई सै किस्तिया च बेईकरी सुनसान जगा च चली गे। 33 कने मतयां लोकां उना जो जांदे दिखया कने पछेणी लिया की सै कुथु जाणा लगयो न। कने अखे बखे दे नगरां दे लोक गिठे होईकरी यीशु कने उदे चेलयां ला पेहले ओथु पैदल दौड़ी करी पुज्जी गे। 34 यीशु किस्तिया ला उतरया कने उनी मती भरी भीड़ दिखी, कने उना पर तरस खादा, क्योंकि उना दा कोई अगुवा नी था, जड़ा उना दी रखबाली करी सके, जियां बिना गवाले भेडां होंदियां न, “फिरी सै उना जो परमेश्वर दे राज्य दियां मतियां गल्लां सिखाणा लग्गा।” 35 जालू संज होंणा लग्गी, तां उदे चेले उदे बखे आई करी बोलणा लग्गे, “ऐ सुनसान जगा है, कने दिन बड़ा ढली गया है। 36 इना जो भेजी दे, ताकि ऐ अखे बखे दे ग्रां कने बासियां च जाई करी, अपने तांई कुछ खाणे जो खरीदी लेन।” 37 यीशुऐ उना जो जबाब दिता, “तुसां ही इना जो खाणे जो दिया।” उना यीशुऐ जो बोलया, “की तू चांदा है की असां जान कने दो सौ दिना दी मजदुरिया बराबर दियां रोटियां खरदी

करी इना जो खुआन?” 38 यीशुए उना जो बोलया, “जाई करी दिखा तुहाडे बाल कितणियां रोटियां न?” उना पता करी के बोलया, “पंज रोटियां कने दो मछियां भी हेन।” 39 तालू यीशुए उना जो हुकम दिता की, सबना जो सेले घाए पर बैठाई दिया। 40 सै सौ-सौ करिके कने पंजा-पंजा करिके झुण्डा च बेई गे। 41 कने यीशुए सै पंज रोटियां कने दो मछियां लियां, कने स्वर्गे पासे दिखीकरी परमेश्वर दा धन्यवाद किता, कने रोटियां तोड़ी करी दो टोटे किते कने चेलयां जो दिन्दा गया, ताकि सै लोकां जो परोसन, कने सै दो मछियां भी उना च बंडी दितियां। 42 सारे खाई करी रजी गे। 43 कने जालू रोटि खायी बैठे तालू चेलयां बाकी बचियाँ रोटियां कने मछियां गिठेरेइयां कने उसला बाहरा टोकरियाँ भरई गियां। 44 जिना रोटियां खादियां सै पंज हजार सिर्फ मर्द थे, उना बच्चे कने जणासा जो गिणया नी था। 45 तालू यीशुए झट पट अपने चेलयां जो बोलया की सै किस्तिया पर चढ़ी जा कने झिला दे पारले पासे बैतसैदा शेहरे जो चली जा, जालू दीकर की सै सारे लोकां जो भेजी नी ले। 46 सारे लोका जो भेजणे बाद, यीशु पहाडे पर प्राथना करणे ताई गिया। 47 कने जालू संज होई, तालू किस्ति गलील झिला दे बिच थी, कने यीशु किला झिला बखे था। 48 जालू उनी दिखया की सै बडे घबराई गियो न, क्योंकि हवा उना दे खिलाफ चलियो थी, तां ब्यागा तडके यीशु झिला पर चली करी उना बाल आया, कने सै उना ला बखे ला निकलना चांदा था। 49 पर जालू उना उसयो झिला पर चलदे दिखया, तां से डडणा लग्गी पै, उना जो लगया की सै भुत है, तां सै दिखीकरी डरी गे, 50 क्योंकि सारे उसयो दिखीकरी घबराई गियो थे। पर यीशुए उना ने झट गल्लां कितियां कने बोलया, “हिम्मत रखा, डरा मत, मैं यीशु है।” 51 तालू सै उना बाल आया कने किस्तिया पर चढ़ी गिया, कने हवा स्की गई, कने सै बडे हेरान होणा लग्गे। 52 हाली उना दिखया भी था की पिछलिया धियाडिया यीशुए पंज रोटियां ने पंज हजार ला जादा लोकां जो खाणा खुआया था, सै हाली भी उसयो नी समझयो थे, की यीशु कुण है। क्योंकि उना दे मन कठोर थे। 53 जालू यीशु कने उदे चेले इक किस्तिया च गलील दिया झिल्ला च गन्नेसरत प्रदेशे दे बखे पुज्जे, कने किस्ति घाटे पर बन्नी दिती। 54 कने जालू सै किस्तिया ला उतरे, तां लोकां उसयो झट पछेणी लिया, 55 सै झट पट ही सारे इलाके च गे, कने बिमारां जो मंझयां पर चुकी करी लेई गे जिथू उना जो खबर मिली की यीशु ओथु है। 56 कने जिथू कुथी सै गां, शेहरां या बस्तियां च जांदा

था, तां लोक बिमारां जो बजारां च रखीकरी उसला बिनती करदे थे, की सै सिर्फ अपने कपड़यां जो छुणा दे, कने जितणे भी छुंदे थे, सै सारे ठीक होई जांदे थे।

7 तालू इक रोज फरीसी कने केई यहूदी व्यवस्था जो सिखाणे बाले जडे यरूशलेम शेहरे च आयो थे, उसयो सुणने तांई गिठे होऐ, **2** कने उना दिखया की उदे चले बिना हथ धोते रोटी खा दे थे, जडा की यहूदी रिबाजे अनुसार अपबित्र था। **3** फरीसी कने सारे यहूदी खाणा खाणे ला पेहले अपने बजुर्गा दे रीती रिबाजे पर चलदे थे कने जालू दीकर सै ढंगे ने हथ नी धोई लेन खाणां नी खांदे थे, **4** कने बजारे ला ओणे दे बाद, जालू दीकर से अपने रिती रिबाजा दे अनुसार नोई नी लेन, साफ नी होंदे तालू दीकर खाणां नी खांदे, कने उना दे वजुर्गा दे होर भी बतैरे रिबाज थे, जिना जो सै मंदे थे, जियां की कटोरे, लोटे, कने तांबे दे भांडयां जो धोणा कने मांजणा। **5** तांई तां उना फरीसियां कने व्यवस्था जो सिखाणे बालयां उसयो पुछया, “की तेरे चले साडे सियाणे दियां रिबाजां जो नी मंदे?” सै तां बिना हथ धोयो रोटी खांदे न? **6** यीशुऐ उना जो जबाब दिता, “यशायाहे ठीक था, जिनी पबित्र शास्त्र च तुहाड़े सांई कपटियां दे बारे च लिखया है, की ऐसे लोक गल्लां ने तां मेरा आदर करदे न, पर इना दे मन मिंजो ला बडे दूर न। **7** इना दी कितियो भक्ति मेरे तांई बेकार है, क्योंकि ऐ लोकां जो माणुऐ दियां दसियां गल्लां जो परमेश्वर दियां गल्लां दस्सी करी मनणे तांई बोलदे न। **8** क्योंकि तुसां परमेश्वरे दे हुकमा जो मनणा बंद करी दितया है, कने माणुऐ दे रिबाजां जो मंन दे न।” **9** कने यीशुऐ उना ने बोलया, “तुसां अपने बणायो नियमा जो मनणे तांई चलाकिया ने परमेश्वरे दे हुकम जो टाली दिन्दे न। **10** उदाहरण तांई, मूसा ने बोलया है, की अपने माता पिता दा आदर करा, कने जडा कोई अपने माता पिता जो श्राप दिगा, सै पक्का मारी देणा। **11** पर तुसां लोकां जो ऐ दसदे न की, अपने माता पिता दी मदद नी करणा कने उना दे हिस्से दियां चिंजा उना जो छडी करी परमेश्वर जो देणा ठीक है। कने तुसां लोकां जो इजाजत दिन्दे अपने माता पिता जो ऐ बोलणे दी की जडा कुछ मै तुहांजो देणा था, सै मै परमेश्वर जो देणे दी कसम खादियो है, कने मै हुण तुसां दी मदद नी करी सकदा, इसला तुसां लोकां जो ऐ बोलदे की हुणे ला तुसां जो माता पिता दी सेबा करणे दी कोई जरूरत नही है। **13** इयां बोली करी, जिना रीती रिबाजां जो तुसां लोकां दीकर पुजाया है, सै परमेश्वरे दियां बोलियां गल्लां जो बेकार होणे दी बजा बणी जांदा है।” **14** तालू यीशुऐ लोकां जो अपने बाल

सदीकरी उना जो बोलया, “तुसां सारे मेरी सुंणा, कने समझा। 15 ऐसी कोई चीज नी ऐ जड़ी माणुऐ च बाहर ला आई करी उसयो अशुद्ध करदी है, पर माणुऐ जो अशुद्ध सै करदा है जड़ा उदे अंदरे ला निकलदा है। 16 जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 17 जालू सै भीड़ा दे बखे ला घरे दे अंदर गया, तां उदे चेलयां यीशुऐ जड़ा बोलया था, उसा कहाणिया दा मतलब पुछया। 18 यीशुऐ उना ने बोलया, “क्या तुसां भी ऐसे ना समझन? क्या तुहांजो नी पता, की जड़ा भी खाणा माणु खांदा है, सै उसयो अशुद्ध नी करी सकदा। 19 क्योंकि सै उदे मने च नी, पर उदे पेटे च जांदी है, कने संडास च निकली जांदी है,” यीशुऐ दा बोलणे दा मतलब ऐ था, की सारियां खांणे बालियां चीजा ठीक न। 20 लोक जड़ा बुरा सोचदे न, “सै ही बोलदे न कने करदे, सै ही उना जो परमेश्वर दे सामणे अशुद्ध करदा है। 21 क्योंकि अंदर ला, मतलब की माणुऐ दा मन ही बुरियां चिजा दी जड़ है। बुरे-बुरे बिचार, व्यभिचार, चोरी, हत्या, परस्त्रीगमन, 22 लालच, बुराई, धोखा, लुचापन, बुरी नजर, निंदा, घमंड, कने मुखता निकलदी है। 23 ऐ सारियां गल्लां मने ला निकलदियां न कने माणुऐ जो अशुद्ध करदियां न।” 24 इदे बाद यीशु कने उदे चेले ओथु ला उठी करी सूर कने सैदा दे शेहरे दे अखे बखे बालिया जगा जो चली गे। ओथु सै इकी घरे च गया, कने सै चांदा था, की उसयो कोई नी जाणी सके की सै ओथु स्कया है। पर लोकां जो बड़ा तोला पता लग्गी गया था कि सै ओथु स्कया है। 25 कने इक जनानी उदी चर्चा सुणीकरी आई, जिसा दिया छोटिया कुडिया जो बुरिया आत्मा जकड़या था, सै झट उदे पैरां च पेई गई। 26 सै जनानी यहूदी नी थी। सै सीरिया ग्रांऐ दे सुरुफिनिकी नाये दे इलाके च जमियो थी। कने उना उसला बिनती किती, की मेरिया कुडिया चे बुरिया आत्मा जो कडी दे। 27 यीशुऐ उसा जो बोलया, “पेहले बचयां जो रजणा दे, क्योंकि बचयां ला रोटियां लेईकरी कुतयां दे अग्रे पाणा ठीक नी है।” 28 उना जबाब दिता, प्रभु ऐ सच्च है, पर कुत्ते भी तां बचयां दे मेजे हेठ रोटिया दे चूरे चारे जो खाई लेंदे न। 29 यीशुऐ उसा जो बोलया, “इसा गल्ला दा जबाब भरोसे ने दिता, उदिया बजा ने बुरी आत्मा तेरिया कुडिया चे निकली गियो है कने तु हुण घरे चली जा।” 30 कने उना अपने घरे आई करी दिखया कुडी मंजे पर पियो है, कने बुरी आत्मा कुडिया ला निकली गियो है। 31 फिरी यीशु कने उदे चेले अखे बखे दे इलाके जो छडी करी सिदोन शेहरे

जो निकलीं गे। फिरी सै दिकापुलिस “दस शेर” चे होईकरी गलील झिला बालिया जगा च पुज्जा। 32 कने लोक इक टोणे जो जडा थथलान्दा भी था, उसयो उस बाल लेईकरी आये कने बिनती किती की, इसयो खरा करी दे। 33 तालू सै उसयो भिडा ला लग लेई गया, कने अपणियां उंगलियां उदे कना च पाईयां, कने अपणा थुक अपणिया उंगलियां च लगाया कने उसी माणुऐ दी जीभा जो छूता। 34 कने स्वर्गे पासे दिखीकरी लम्बा साह लिया। फिरी उसी माणुऐ जो बोलया, “इप्फतह।” मतलब की “खुली जा” 35 कने इकदम ही सै साफ-साफ सुणना लगी पिया, कने बिना कुसी तंगिया ने सै साफ-साफ बोलणा लगी पिया। 36 तालू यीशुऐ उना जो समझाया की कुसी ने मत बोलदे, पर उनी जितना उना जो समझाया उतणा ही सै बोलणा लगी पिया। 37 सै बडे ही हेरान होईकरी बोलणा लग्गे, “यीशुऐ जडा कुछ किता सै सब कुछ खरा ही कितया है,” यीशु टोणयां जो सुणने दी, कने गुंगयां जो बोलणे दी शक्ति दिन्दा है।

8 उसी बकते दी गल्ल है जालू मते सारे लोक दिकापुलिस च यीशुऐ बाल गिठे होऐ, कने उना बाल खाणे तांई कुछ नी था, तां यीशुऐ अपणे चेलयां जो सदीकरी उना जो बोलया, 2 ऐ लोक मिजों सोगी तिन्ना रोजां ला रेह दे न। उना बाल खाणे तांई कुछ नी है कने मिजो इसा गल्ला पर तरस ओआ दा है। 3 कने इना च थोडे लोक बडे दुरे ला आयो थे। अगर मैं इना जो भूखा घरे भेजी दें, तां इना रस्ते च थकी जाणा कने बेहोश होई जाणा। 4 उदे चेलयां उसयो जबाब दिता की, ऐथू सुनसान जगा च इतणी रोटियां कुनी कतां ला लोंणियां, की ऐ सारे जणे रजी जान? 5 यीशुऐ उना जो पूछया, “तुहाडे बाल कितणियां रोटियां न?” उना बोलया, “साडे वाली सत रोटियां न।” 6 तालू यीशुऐ लोकां जो धरतिया पर बोंणे दा हुकम दिता कने सै बेई गे, कने उदे बाद सै सत रोटियां लियां, कने परमेश्वरे दा धन्यवाद करिके तोड़ियां, कने अपणे चेलयां जो रोटियां दे टुकड़े दिन्दा गया ताकि सै उना जो लोकां च बंडी देन। 7 उना बाल थोड़ियां छोटियां मछियां भी थियां, कने यीशुऐ परमेश्वरे दा धन्यवाद करिके सै अपणे चेलयां जो दितियां, कने लोकां जो परोसणे दा हुकम देई दिता। 8 फिरी सारे लोक खाई करी रजी गे कने उदे बाद चेलयां बाकी बचियाँ रोटियां दे टुकड़यां जो सत टोकरियां च भरी लिया। 9 कने सै लोक लगभग चार हजार थे, कने यीशुऐ उना लोकां जो विदा किता। 10 कने यीशु चेलयां सोगी किस्तिया पर चढी करी दलमनुता इलाके जो चली गया।

11 फिरी फरीसी आई करी यीशुए ने गल्ल बात करणा लग्गे, क्योंकि सै उसयो फसाणा चांदे थे इस ताई उना उसयो पूछया स्वर्गे दा कोई चमत्कार दस। जिसने ऐ साबित होई जां की परमेश्वरे तिजो शक्ति दितियो है। 12 उनी उना दे अविश्वास ला नराज होईकरी लम्बा साह लिया कने बोलया, “इस युगे दे लोक कजो चमत्कार तोपदे न? मै तहांजो ने सच्च बोलदा है, की इस युगे दे लोकां जो कोई चमत्कार नी देणा है।” 13 फिरी सै फरीसियों जो छडी करी, अपने चेलयां सोगी किस्तिया पर चडी गया कने गलील झिला दे चारों पासयां ला होंदे होए चली गया। 14 यीशुए दे चेले रोटियां लेणा भूली गियो थे, कने उदिया वजा ने उना बाल किस्तिया च इक रोटिया जो छडी करी कख भी नी था। 15 कने यीशुए उना जो चेतावनी दिती कि, “फरीसियां कने हेरोदेस दे खमिरे ला बचणे ताई चौकने रेनयो।” 16 सै अपु चे बिचार करिके बोलणा लग्गे, कि यीशुए ऐ इस ताई बोलया क्योंकि “साडे बाल रोटियां घट न।” 17 ऐ जाणी करी यीशुए उना ने बोलया, “तुसां कजो अपु चे बिचार करा दे कि साडे बाल रोटिया नी न? क्या तुसां अपने मने जो इतणा कठोर बणाई लिया, तुसां क्या हले दीकर समझे नी? 18 तुसां बाल हखी कने कन्न होंदे होए भी नी दिखी कने सुणी सकदे। कने क्या तहांजो कुछ भी याद नी है? 19 की तालू तुसां बचियाँ रोटियां दे टुकडयां जो कितणियां टोकरियां च भरया था, जालू मै पंज हजार लोकां जो पंज रोटियां ला खुयाया था?” उना बोलया, “बाहरा टोकरियाँ।” 20 “कने जालू चार हजार लोकां ताई सत रोटियां थियां तां कितणे टोकरे भरी करी चुके थे?” उना बोलया, सत टोकरे। 21 यीशुए उना जो बोलया, “तुसां हाली दीकर कजो नी समझदे की मै कुण है?” 22 तालू यीशु कने उदे चेले बैतसेदा शेहरे च आए, कने लोक इक अन्ने जो उदे बाल लेईकरी आए कने उसला बिनती किती की इसी माणुए जो छु कने खरा करी दे। 23 तालू यीशुए उस अन्ने दा हथ पकडी करी उसयो गां दे बाहर लेई गया। कने यीशुए अपना थुक उदिया हखी पराला लाया कने उस पर हथ रखे, कने उसयो पुछया, “क्या तिजो कुछ मिल्ला दा है?” 24 उनी नजरां उपर करी के बोलया, “मै माणुए जो दिखा दा है, पर सै साफ नी मिल्ला दे, सै मिंजो सूखां सांई चलदे मिला दे न।” 25 तालू यीशुए दोबारा उदियां हखी पर हथ रखे, कने अन्ने गोरा ने दिखया, कने उदियां हखी ठीक होई गियां, कने उसयो सब कुछ साफ-सुथरा मिलणा लगी पिया। 26 कने यीशुए उसयो हुकम दिता कि अपने घरे जो मुडी जा, पर ऐथू जडा होया गांऐ

बालयों जो दसणे ताई, गांऐ दे अंदर पैर भी मत रखदा। 27 यीशु कने उदे चेले
 बैतसैदा शेहरे जो छडी करी कैसरिया फिलिप्पी शेहरां दे बखे आले गां च चली गे,
 कने रस्ते च उनी अपने चेलयां जो पुछया, “की लोक मेरे बारे च क्या बोलदे न,
 की मैं कुण है? 28 चेलयां जबाब दिता कुछ लोक बोलदे ने कि तुसां यूहन्ना
 बपतिस्मा देणेबाले न; पर कोई-कोई एलियाह बोलदा, कने कोई-कोई बोलदे न
 कि पुराणे जमाने दे परमेश्वरे दा संदेश देणेबालयां चे कोई इक है।” 29 फिरी यीशुऐ
 पुछया, “पर तुसां मिंजो क्या बोलदे न?” पतरसे उसयो जबाब दिता, “तू मसीहा
 है, जडा परमेश्वरे दिया तरफा ला भेजया है।” 30 तालू यीशुऐ उना जो हुकम दिता
 की मेरे बारे च कुसी ने मत बोलदे की, मैं मसीहा है कने परमेश्वरे मिंजो भेजया है।
 31 तालू यीशु अपने चेलयां जो सिखाणा लग्गा, कि मैं, जडा माणुऐ दा पुत्र है,
 “मिंजो मते दुख सेहणे पोणे न, कने यहदी अगुवे, बड़े याजकां, कने यहदी व्यवस्था
 जो सिखाणे बालयां मिंजो अपनाणा नी है, कने मैं मारी देणा है, कने फिरी मैं तिन्ना
 रोजां बाद मरयां चे जिन्दा होई जाणा है।” 32 यीशुऐ उना जो ऐ गल्ल साफ
 तरिके ने बोली दिती। पतरस यीशुऐ जो बखिया लेई गया कने इसा गल्ला पर
 झिडकणा लग्गा। 33 तालू यीशु पिच्छे मुडया कने चेलयां जो दिखया कने पतरसे
 जो झिडकी करी बोलया, “शैताने सांई कम्म करणा बंद कर! मेरे सामणे ला दूर
 होई जा! क्योंकि तू परमेश्वरे दे सांई नी, पर तू माणुऐ सांई सोचदा है।” 34 यीशुऐ
 भिडा जो अपने चेलयां सोगी अपने बाल सदीकरी बोलया, “जडा कोई मेरा चेला
 बणना चांदा है, उसयो अपणिया शरीर दियां इच्छां कने जडियां तरकिबां बणाईयां
 उना जो छडी करी कने जडा मिजों तांई मरणे जो तैयार रेदा है, सेई मेरा चेला बणी
 करी मिजों पिच्छे चली सकदा है। 35 कोई माणु इयोदिया नी करगा कने अपने
 प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका
 गवाई देणा है। पर जडा माणु मिजों पर भरोसा करगा कने मेरे शुभसमाचार दिया
 बजा ने मरगा उस माणुऐ जो परमेश्वरे सोगी सदा तांई दी जिन्दगी मिलणी। 36
 अगर तुसां संसारे दा सब कुछ पाई लेंगे कने पर परमेश्वरे सोगी सदा दी जिन्दगी
 जिणे दा मोका गवाई दिंगे, तां उदा क्या फायदा? 37 इक माणु परमेश्वरे जो क्या
 देई सकदा है, जडा उदी हमेशा दी जिन्दगी खरिदगा? कुछ नी! 38 तुहाडे च
 अगर कोई माणु मिजों अपना परमेश्वर कने मेरियां शिक्षा दा पालन करणे जो मना
 करदा है, क्योंकि तुसां डरदे न की गैर विश्वासी कने पापी लोकां तुहाडा मजाक

उडाणा। फिरी जालू मै माणुऐ दे पुत्रे, पबित्र स्वर्गदूतां सोगी धरतिया पर ओणा है, तां मै उना लोकां जो भी अपणा चेला मनणे ला मना करी देणा है। तालू सारयां लोकां मेरी महिमा दिखणी जड़ी मेरे पिता दी है।”

9 यीशुऐ भिडा कने अपने चेलयां जो बोलया, मै तुहांजो ने सच्च बोलदा है, “ऐथू खड़ोतयो लोकां चे कुछ लोक ऐसे न, उना तालू दीकर जिन्दे रेणा है जालू दीकर सै परमेश्वरे दे राज्य जो शक्तिशाली स्पे च अपने बिच ओंदे नी दिखी लेन।” **2** इक हफ्ते बाद यीशु पतरस, याकूब कने यूहन्ना जो इक उच्चे पहाड़े पर लेई गया कने ओथु उना सिबा होर कोई नी था, कने उना दे सामणे यीशुऐ दा रूप बदलुई गया। **3** कने उदे कपड़े चिट्टे होईकरी चमकणा लग्गे। धरतिया पर इयोदे चिट्टे कपड़े कोई भी धोबी धोई करी नी करी सकदा। **4** तालू उना तिन्ना चेलयां, दो परमेश्वरे दे संदेश देणेबाले मूसा कने एलियाह जो, जड़े बड़े पेहले जिन्दा थे उना जो यीशुऐ सोगी गल्लां करदे दिखया। **5** ऐ सब दिखीकरी पतरसे यीशुऐ जो बोलया, “गुरू जी, साडा ऐथू रेंणा ठीक है, इस तांई असां ऐथू तीन तम्बू बणादे न, इक तेरे तांई, इक मूसा तांई, इक एलियाह तांई।” **6** पतरसे ऐ इस तांई बोलया की, सै कने दुज्जे दो चले डरी गियो थे, कने नी जाणदे थे क्या बोलणा क्या करणा। **7** तालू इक बदल आया कने उनी उना जो अपणी छाया हेठ ढकी लिया, कने उना बदले च परमेश्वरे जो बोलदे सुणया, “कि ऐ मेरा प्यारा पुत्र है, कने मै इसला खुश है, कने जडा ऐ बोलदा है, उसयो ध्याने ने सुणा।” **8** तालू उना अपने चारो पासे नजर मारी, तां मूसा कने एलियाह ओथु नी थे, कने उना जो सिर्फ यीशु ही मिल्ला। **9** जालू यीशु कने उदे तिन्न चले पहाड़े ला उतरा दे थे, तालू यीशुऐ उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मै, माणुऐ दा पुत्र मरयां चे जिन्दा ना होई जा।” **10** चेलयां जडा पहाड़े पर होया उदे बारे च कुसी जो भी नी दसया, पर सै इसा गल्ला दे बारे चर्चा करणा लग्गे की, “मरयां चे जिन्दा होई जाणा” इदा क्या मतलब था। **11** कने चेलयां उसला पुछया, “मूसा दी व्यवस्था दे अनुसार व्यवस्था जो सिखाणे बाले बोलदे थे, मसिहा ला पेहले एलियाह ओणा था? अगर ओणा था, तां हाली दिकर कजो नी आया सै?” **12** यीशुऐ उना जो जबाब दिता, ऐ तां सच्च है कि एलियाह पेहले आई करी सब कुछ सुधारणा है। पर कजो माणुऐ दे पुत्रे दे बारे च ऐसा लिखया है, की उनी बड़े दुख सेहणे न, कने उसयो निच समझणा है। **13** पर मै तुसां ने बोलदा है, एलियाह

ता पेहले ही आई चुकया था, साड़े अगुवां उदे कने बड़ा बुरा व्यवहार कितया। जियां सै करणा चांदे थे, जदिया की पबित्र शास्त्रां च बड़ी पेहले ही बोलया था की उना करणा। 14 जालू यीशु कने तिन्न चले बाकी चेलयां बाल मुड़ी करी आये, तां दिखया की उना दे चारो पासे तां बड़ी भरी भीड़ लगियो है, कने व्यवस्था जो सिखाणे बाले उना सोगी बेहस करा दे थे। 15 कने जियां ही सारे लोकां यीशुऐ जो दिखया, दिखदे ही बड़े हेरान होये, कने उदे बाल दौड़ी करी आये कने उसयो नमस्ते किते। 16 यीशुऐ उना ला पुछया, “तुसां इना सोगी बेहस कुसा गल्ला पर करा दे न?” 17 भिड़ा चे इकी माणुऐ उसयो जबाब दिता, “गुरु जी, मैं अपने पुत्रे जो तेरे बाल लेईकरी आया था, इदे च बुरी आत्मा है, जिना इसयो गंगा बनाई दितया है। 18 जालू भी बुरी आत्मा उदे अंदर ओदी है, तां सै उसयो गुस्से ने जमिना पर पटकी दिन्दी, कने उदे मुऐ ला झाग निकलदा, कने दंदा पिंदा, सकत होई जांदा। मैं तुहाड़े चेलयां जो बोलया की बुरिया आत्मा जो बाहर कड़ी दिया पर सै उना ला नी होया।” 19 ऐ सुणीकरी यीशुऐ उना जो जबाब दिता, “हे अविश्वासी लोकों, मैं कालू दीकर तुहाड़े सोगी रेंगा, कने कालू दीकर तुहाड़े अविश्वास जो सेहन करगा? उस जागते जो मेरे बाल लोआ।” 20 तालू सै जागते जो यीशुऐ बाल लेई आये कने जालू बुरिया आत्मा यीशुऐ जो दिखया, तां उना आत्मा जागते जो झट मरोड़या, कने धरतिया पर फकोड़ी दिता, कने सै मुऐ ला झाग निकालदे-निकालदे बिलटियां मारणा लग्गा। 21 यीशुऐ जागते दे पिता ला पुछया, “ऐ कालू ला होआ दा है?” कने उनी बोलया, “जालू ला ऐ लोका दिया नियाणा होंदा था। 22 मती बरी बुरिया आत्मा इसयो मारणे तांई अग्गी कने पाणिये च सुट्टी दितया था, पर अगर तू कुछ करी सके, तां सांझो पर तरस खाई करी साड़ी सहायता कर।” 23 यीशुऐ उना जो बोलया, “अगर तू करी सकदा है, ऐ क्या गल्ल होई? जड़ा मिंजो पर भरोसा करदा है, उदे तांई सब कुछ होई सकदा है।” 24 बच्चे दे पिते झट पैरां च पेईकरी जोरे ने बोलया, “प्रभु जी, मेरी सहायता करा की मैं तुसां पर भरोसा करे।” 25 जालू यीशुऐ दिखया, की मते सारे लोक उसयो दिखणे तांई गिठे होआ दे थे, तां उनी बुरिया आत्मा जो ऐ बोली करी झिड़कां दितियां की, “हे बुरी आत्मा, जड़ी इसी जागते जो गंगा कने बेहरा बना दी कने बोलणा नी दे दी, मैं तिजो हुकम दींदा है की, इसयो छडी दे, कने फिरी कदी मत ओदी।” 26 तालू बुरिया आत्मा चिलाई करी जागते जो मरोड़ी करी सटया, कने

निकली गईं कने सै जागत बिना हिल्ले ओथु लाशा सांई पेई रिया था, ऐथू दीकर की मते लोक बोलणा लग्गे की, ऐ तां मरी गया है। 27 पर यीशुए उदा हथ पकड़ी करी उसयो उठालया, कने सै खडोई गया। 28 बादे च जालू यीशु कने उदे चेले घरे च किले थे, तालू उदे चेलयां पुछया कि, “असां बुरिया आत्मा जो कजो नी कडी सके?” 29 यीशुए उना जो जबाब दिता, “ऐसियां बुरियाँ आत्मा जो प्राथना कने बरत कितयो बिना माणुआं ला बाहर नी कडी सकदे।” 30 बादे च यीशु कने उदे चेलयां उना जगा जो छडी दिता कने गलील प्रदेशे ला निकले। कने यीशु नी चांदा था की कोई उसयो जाणे की सै कुथु है। 31 क्योंकि यीशु अपने चेलयां सोगी मता बकत बिताणा चांदा था कने उना जो सिखाणा चांदा था। कने उना ने बोला दा था की, “माणुए दा पुत्र, मेरे दुशमणा दे हथे पकड़ाया जाणा है, कने उना लोका मिजो मारी देणा है, कने मरणे दे तरिये रोजे मरयां चे जिन्दा होई जाणा है।” 32 पर ऐ गल्ल उना दिया समझा च नी आई, कने चेले पूछणे ला डरदे थे जड़ा यीशुए बोलया था। 33 यीशु कने उदे चेले कफरनहम शेहरे च अपने घरे जो आये; कने जालू से घरे अंदर थे, तालू यीशु उना जो पुछणा लग्गा, “रस्ते च तुसां कुसा गल्ला पर बेहसा दे थे?” 34 सै चुप रे, क्योंकि उना रस्ते च ऐ बेहस कितियो थी कि, असां चे बडा कुण है। 35 तालू यीशु बेई गया कने बाहरां चेलयां जो अपने बाल गिठा होणे जो बोलया, कने उना जो बोलया, “जड़ा कोई सारयां ला महान बणना चांदा है, तां सै अपु जो सारयां ला निच समझे कने सारायां दा सेवक बणे।” 36 तालू यीशुए बखे इक बच्चा खुडोतया था, यीशुए बच्चे जो गल्ले लगाया कने चेलयां जो बोलया। 37 “जड़ा कोई माणु इयां ही इक बच्चे पर दया दसदा है, सै सच्ची मेरा इज्जत मान करदा है। कने कोई मेरी इज्जत मान करदा है, तां सै मेरा ही नी बल्कि मेरे परमेश्वरे दी इज्जत मान करदा है, जिनी मिजों भेजया है।” 38 तालू यूहन्ना उसयो बोलया, “गुरू जी, असां इकी माणुए जो तेरे नाए दी शक्ति ने बुरियां आत्मा जो कडदे दिखया है, कने असां उसयो मना भी किता, क्योंकि सै साड़े सांई तेरा चेला नी था।” 39 यीशुए बोलया, “उसयो मना मत करा अगर कोई मेरे नाये ने चमत्कार करदा है, क्योंकि ऐसा कोई नी है, जड़ा मेरे नाए ने सामर्थ्य दे कम्म करे, कने जल्दी मिजो बुरा बोली सके, 40 क्योंकि जड़े साड़े बेरी नी है, सै साड़े सोगी साथी ना।” 41 जड़ा कोई इक कटोरा पांणिये दा तुहांजो इस तांई पियां, की तुसां जो मसीह दे चेले बोलदे न, मै तुसां ने सच्च बोलदा हे की

उनी अपणा फल कुसा भी हालत च नी गवांणा है। 42 पर अगर कोई इना छोटयां चे, जड़े मिंजो पर भरोसा करदे न, उना दे पापां दी बजा बणे तां उना तांई ऐई ही खरा है की अपणे गले च पथर बन्नी करी दरियाये च छलांग लगाई दे। 43 सारियां बुराइयां जो छडी दिया जिना ने पाप होंदा है! बुराइयां जो पुरे तरीके ने छडी दिया, जियां की तुसां इक हथ बट्टा दे, जडा तुहाड़े पापां दी बजा बणदा है। अगर तुसां स्वर्ग जो जांदे न, भले ही तुसां बाल इक ही हथ है, सै तुसां तांई खरा है। कने अगर तुसां बाल दोनो हथ न, कने तुसां नरके जान, तां इसला भयानक कुछ नी है। (Geenna g1067) 44 नरके दिया उसा जगा पर जिथू सारयां दे जिस्मा जो खाणे बाले कीड़े कदी नी मरदे कने बलियो अग्न कदी नी बुझदी। 45 सारियां बुराइयां जो छडी दिया जिना ने पाप होंदा है, बुराइयां जो पुरे तरीके ने छडी दिया जियां की तुसां इक पैर बट्टा दे, जडा तुहाड़े पापां दी बजा बणदा है। अगर तुसां स्वर्ग जो जांदे न, भले ही तुसां बाल इक ही पैर है, सै तुसां तांई खरा है। कने अगर तुसां बाल दोनो पैर न, कने तुसां नरके जान, तां इसला भयानक कुछ नी है। (Geenna g1067) 46 नरके दिया उसा जगा पर जिथू सारयां दे जिस्मा जो खाणे बाले कीड़े कदी नी मरदे कने बलियो अग्न कदी नी बुझदी। 47 सारियां बुराइयां जो छडी दिया जिना ने पाप होंदा है, बुराइयां जो पुरी तरह छडी दिया जियां की तुसां इक हखी जो कडा दे, जडा तुहाड़े पापां दी बजा बणदा है। अगर तुसां स्वर्ग राज्य जो जांदे न, भले ही तुसां बाल इक ही हख है, सै तुसां तांई खरा है। कने अगर तुसां बाल दोनो हखी न, कने तुसां नरके जान, तां इसला भयानक कुछ नी है। (Geenna g1067) 48 नरके दी उसा जगा पर जिथू सारयां दे जिस्मा जो खाणे बाले कीड़े जड़े कदी नी मरदे कने बलियो अग्न कदी नी बुझदी। 49 क्योंकि हर इक जणा अग्नी ने शुद्ध किता जाणा, जियां की बलिदान नुणे ने शुद्ध होंदा है। 50 नुण इक जरूरी चिज है, पर अगर उदा स्वाद चली जा, तां उदा स्वाद कियां वापिस लोणा? तुसां च लूँणे सांई खुबियां होणी चाईदियां, कने अपु चे मिली झूली कने शांतिया ने रिया।

10 यीशुए अपणे चेलयां सोगी कपरनहूम शहर छडी दिता, सै यहूदिया प्रदेशे ला निकले कने यरदन खड्डा दे दुए पास्से चली गे। कने इक बरी फिरी भीड उदे बाल गिठी होई गई, कने सै उना जो हरबरी सांई उपदेश देणा लग्गा। 2 तालू फरीसी उदे बाल आए कने उसयो परखणे तांई उसला पुछया, “क्या मूसा दिया व्यवस्था च

इक मरदे जो अपणिया घरे बालिया जो तलाक देणे दा हक है?” 3 यीशुए उना जो जबाब दिता, “मूसा तुहांजो तलाक दे बारे च क्या हुकम दितया है?” 4 उना बोलया, “मूसा हुकम दितया की त्याग पत्र लिखी करी अपणी घरे बालिया जो देई दिया कने उसा जो छडी दिया।” 5 यीशुए उना जो बोलया, “तुसां हरबरी परमेश्वरे दे हुकमें जो मनणे तांई मुकरी जादे न, क्योंकि तुसां दा मन कठोर है, इस तांई मूसा ऐ लिखया था। 6 पर पबित्र शास्त्रां च लिखया है कि जालू परमेश्वरे संसार बणया था, तालू उनी इक मर्द तांई इक जनानी बणाई। 7 जालू इक मर्द जनानिया ने बियाह करदा है, तां सै दोनों इक होई जान्दे न, क्योंकि सै दोनो इक जान न। 8 कने सै दोनो हुण इक तन न, क्योंकि हुण सै दो जणे नी, पर इक माणुए सांई न। 9 इस तांई उसा जनानिया कने मर्दे जो बख नी करणा चाईदा जिना जो परमेश्वरे बियाह दे बंधना च बनया है।” 10 कने बादे च, जालू सै चेलयां सोगी घरे च किल्ला था, तालू चेलयां तलाक दे बारे च उसला पुछया। 11 यीशुए उना जो जबाब दिता, “जडा अपणिया घरे बालिया जो छडी करी दुईया ने बियाह करे तां सै उसा पेहलिया दे खिलाफ च व्यभिचार करदा है। 12 कने अगर घरे बाली अपणे घरे बाले जो छडी करी कुसी होरसी ने बियाह करे, तां सै व्यभिचार करदी है।” 13 फिरी लोक बचयां जो यीशुए बाल लोणा लग्गे ताकि सै उना पर हथ रखीकर उना जो आशीष दे, पर चेलयां उना लोकां जो डांटया। 14 यीशुए जो ऐ सब दिखीकरी गुस्सा आया कने उना जो बोलया, “बचयां जो मना मत करा कने इना जो मेरे बाल ओणा दिया, जडे इना बचयां सांई भरोसेमदं न उना परमेश्वरे दे राज्य च रेणा। 15 मै तुसां ने सच्च बोलदा है, परमेश्वरे अपणे राज्य च सिर्फ उना लोकां जो ओणा देणा है जडे परमेश्वरे दे राज्य जो बचयां सांई अपनांदे न।” 16 कने यीशुए बचयां जो गल्ले ने लाया, कने उना पर हथ रखीकरी यीशुए आशीष दिती। 17 जालू यीशु कने उदे चेलयां यात्रा करणा शुरू किती थी, तां इक माणु उदे बाल दौडी करी आया कने इज्जत मान तांई उदे पैरां अगगे डेई पिया कने उसला पूछणा लग्गा की, “हे उत्तम गुरु, मै क्या कम्म करां की परमेश्वर मिंजो हमेशा दी जिन्दगी दे? (aiōnios g166) 18 यीशुए उसयो बोलया, तुसां मिंजो कजो उत्तम बोलदे न, उत्तम तां सिर्फ इक ही है, सै परमेश्वर है।” 19 “तू परमेश्वर दे हुकमा जो तां जाणदा है की: हत्या नी करणी, व्यभिचार नी करणा, चोरी नी करणी, झूठी गबाई नी देंणी, बेईमानी नी करणी, कने अपणे माता पिता दा आदर करणा।” 20

उनी यीशुए बोलया, “गुरू जी, इना सबना हुकमा जो तां मै बचपने ला ही मनदा आया है।” 21 यीशुए उस पासे नजर करी के प्यारे ने दिखया कने उसयो बोलया, “इक कम्म है जडा तिजो हाली भी करणे दी जरूरत है। जा, कने जडा कुछ तेरा है उसयो बेची करी गरीबां जो देई दे, तां तिजो स्वर्गे दा धन मिलणा, इयां करणे बाद आ कने मेरा चेला बणिया।” 22 तालू माणुए यीशुए दी इसा गल्ला जो सुणया, कने उदे चेहरे पर उदासी छाई गई, कने सै दुखी होईकरी चली गया, क्योंकि सै बड़ा भरी अमीर था। 23 यीशुए चारो पासे दिखीकरी अपने चेलयां जो बोलया, “अमीरां दा परमेश्वरे दे राज्य च जाणा बड़ा मुशकिल है।” 24 तालू चले यीशुए दियां गल्लां सुणी की हेरान होई गे, यीशुए बोलया मेरे भाईयो, जडा कोई अपने पैसयां उपर भरोसा करदा है, उना तांई परमेश्वरे दे राज्य जो जाणा बड़ा मुशकिल है। 25 ऊंटे दा सुइया दे नाके चे निकलना असान है, पर अमीरां दा परमेश्वरे दे राज्य च जाणा बड़ा भरी मुशकिल है। 26 जालू चेलयां ऐ सुणया, तां सै बड़े हेरान होईकरी अपु चे बोलणा लग्गे, “तां कुण अपने पापां दी सजा मिलणे ला बची सकदा है?” 27 यीशुए उना दे पासे दिखीकरी बोलया, “जडा माणु नी करी सकदे, पर सै परमेश्वर करी सकदा है, क्योंकि परमेश्वरे सब कुछ करी सकदा है।” 28 पतरस यीशुए जो बोलणा लग्गा, सांझो क्या मिलणा? असां तां तुहाड़े चले बणने तांई अपना सारा कुछ छडी दितया है। 29 यीशुए चेलयां जो बोलया, “मै तहांजो ने सच्च बोलदा है, मेरे चले बणने तांई कने शुभसमाचार दा प्रचार करणे तांई तुसां च जिनी भी घरे जो छडया, या अपने भाई बेहण, माता-पिता, अपणिया जमिना जो छडया है। 30 उसयो इस बकते सौ गुणा ना मिल्ला हो, जिनी अपना टबर, भाई कने बेहणां, माता-पिता, बाल बचयां जो या खेतरां जो छडया हो। पर उसयो तकलिफां कने ओणे बाले बकते च हमेशा दी जिन्दगी मिलणी है। (aiōn g165, aiōnios g166) 31 पर मते लोक न जडे हुण महान कने अग्गे न, उसी बकते सै पीछे होणे, कने जडे पीछे न, सै उस बकते पेहले होणे न।” 32 सै यरूशलेम शहर जो जादे बेले जालू रस्ते च थे, तां यीशु उना दे अग्गे-अग्गे चलया था, कने उदे चले बड़े हेरान होऐ की जिथू सै चलयो थे, ओथु मते लोका उना दा बिरोध किता था, कने जडे लोक उदे सोगी थे, सै इसा गल्ला ला डरयो थे, की यरूशलेम शहर च उना दा क्या होणा। तालू सै फिरी उना बाहरां चेलयां जो इकी तरफा लेईकरी उना ने गल्लां बोलणा लग्गा, जडियां उस सोगी होणे बालियां थियां। 33

“दिखा, ध्याने ने सुणा, असां यरूशलेम शेहरे जो चलयो न, कने मै माणुऐ दा पुत्र बड़े याजकां कने यहूदी व्यवस्था जो सिखाणे बालयां दे हथे पकड़ाया जाणा है, कने उना मिंजो मौत दी सजा देणी है, कने होर जातियां दे हथे देई देणा है। 34 कने उना मेरा मजाक उड़ाणा है, मिंजो पर थुकणा, कने मिंजो कोड़े मारणे, कने मिंजो मारी देणा है, कने मै तिजे दिने मरयां चे जिंदे होई जाणा है।” 35 याकूब कने यूहन्ना दो भाई, जड़े जब्दी दे पुत्र थे उना यीशुऐ बाल आई करी बोलया, “गुरू जी, असां कुछ तिजो ला मंगणा चांदे न, सेई तू साड़े ताई कर।” 36 यीशुऐ उना ला पूछया, “तुसां क्या चांदे न की मै तुहाड़े ताई करे?” 37 उना यीशुऐ जो बोलया, “असां तुसां दे महिमामय राज्य च तुसां दे बखे इज्जत बाली जगा च बोंणा चांदे न। असां चे इक तुहाड़े खबे कने इक सज्जे हथे बखे बोंणा चांदे न।” 38 यीशुऐ उना जो बोलया, “तुसां जो नी पता कि तुसां क्या मंगा दे? हुण जड़े दुख मै सेहणे न, क्या तुसां उना दुखां जो सेहन करी सकदे न? क्या तुसां मरणे ताई तैयार न क्योंकि मै जल्दी ही मरणे बाला है?” 39 उना उसला बोलया, “असां करी सकदे न।” यीशुऐ उना ने बोलया, “तुसां भी सारे दुख सेहणे न, जियां मै सेहणे। तुसां जो भी मारया जाणा है, जियां मिजों मारणा है। 40 मिजों ऐ तय करणे दा हक नी है, की मेरे सज्जे कने खबे कुसयो सै जगा मिलणी है, सै जगा उना लोकां ताई न, जिना जो परमेश्वर चुणयां है।” 41 ऐ सुणीकरी बाकी दसो चले याकूब कने यूहन्ना पर गुस्सा करणा लग्यो। 42 तां यीशुऐ उना जो अपने बाल सदीकरी उना जो बोलया, “तुहांजो पता है ना, कि जड़े लोक प्रधान मने जादें थे, सै अपने अधिकारां दा इस्तेमाल अपने अधीन लोकां दे उपर हक जमाणे ताई करदे न। उना दे अगुवे लोक अपनी गल्ल मनाने ताई हक जतादे न। 43 पर तुहांजो उना सांई नी होणा चाईदा, तुहांजो चे जड़ा महान बणना चांदा है, उसयो बाकियां दी सेवा करणी चाईदी। 44 कने जड़ा कोई तुसां चे प्रधान बणना चांदा हो, सै सारायां दा नौकर बणे। 45 मै ऐ इस ताई बोलदा है क्योंकि मै, माणुऐ दा पुत्र, इस संसारे च सारयां दी सेवा करणे ताई आया है, मै इस ताई नी आया कि लोकां ला अपनी सेवा करां। मै तां लोकां जो पापां ला छुटकारा कराने ताई अपने प्राण कीमत च देणा आया है।” 46 यरूशलेम शेहर दे रस्ते च जांदे, यीशु कने चले येरीहो च आये, जालू सै कने उदे चले कने इक बड़ी भीड़ यरीहो शेहरे ला निकला दी थी, इक बरतिमाई नाऐ दा अन्ना भिखारी सड़का दे बखे बैठया था। सै तिमाई दा जागत था। 47 सै ऐ

सुणीकरी की यीशु नासरत शेहरे ला है, जड़ा रस्ते च चलया था, डडी-डडी करी बोलणा लग्गा, “हे यीशु, राजा दाऊदे दे बंशज, मिंजो पर दया कर।” 48 उसयो मतयां झिडकां दीतियां की चुप रे, पर सै होर जोरे ने बोलणा लग्गा की, “हे यीशु, राजा दाऊदे दे बंशज, मिंजो पर दया कर।” 49 तालू यीशुऐ ऐ सुणया कने स्की करी बोलया, “उसयो ऐथू लोआ।” कने लोकां उस अन्ने जो सदीकरी बोलया, “हिम्मत रख, उठ सै तिजो सदा दा है।” 50 कने अन्ने माणुऐ झट अपने उपर ओडियो चादर सूटी कने उठी करी यीशुऐ बाल आया। 51 यीशुऐ उसयो पुछया, “तू क्या चांदा है की मैं तैरे तांई करे?” अन्ने उसयो बोलया, “गुरु जी, ऐ की मिंजो मिलणा लगी पोऐ।” 52 यीशुऐ उसयो बोलया, “मैं तिजो ठीक करा दा क्योंकि तू मिजों पर भरोसा करदा है। हुण तू घरे जो जाई सकदा है” कने उसयो मिलणा लग्गी पिया, कने रस्ते च यीशुऐ पिच्छे चली पिया।

11 जियां यीशु कने उदे चले यरूशलेम शेहरे दे बखे पुज्जे, सै जैतून रुखां दे पाहडे दे कंडे बैतफगे कने बैतनिय्याह गांऐ च आये, तां यीशुऐ अपने दो चेलयां जो ऐ बोली करी भेजया, 2 “सामणे दे गां च जा, कने ओथु पुजदे ही तुहांजो इक गधिया दा बच्चा बन्नया मिलणा है, उदे उपर हली कोई नी बैठया था। सै खुंडे च बन्नया होणा उसयो खोली करी लेई ओआ। 3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जरूरत है। कने उनी जल्दी ही बापस करी देणा है।” 4 चेलयां गांऐ च जाई करी उस गधिया दे बच्चे जो इक घरे दे दरबाजे बखे खुंडे ने बनया दिखया, कने सै उसयो खोलणा लग्गे। 5 कने जडे ओथु खडुतयो थे उना चे कोई-कोई बोलणा लग्गे की ऐ क्या करा दे न, इस गधी दे बच्चे जो कजो खोला दे न? 6 जियां यीशुऐ बोलया था, तियां ही चेलयां उना जो बोली दिता उना गधिया दे बच्चे जो जाणा दिता। 7 कने दो चेलयां उस गधिया दे बच्चे जो यीशुऐ बाल लांदा, कने उस पर अपने उपरे बाले कपड़े उदिया पीठी पर पाई दिते कने यीशु उस पर बेई गया कने यरूशलेम शेहरे दी पाससे चलणा लग्गे। 8 तालू मतयां सारयां लोकां अपने कपड़े रस्ते च बछाई दिते कने उदा आदर मान किता। कने केईयां रस्ते च पत्रां बालियां डालियाँ बडी-बडी करी बछाई करी उदा मान आदर किता। 9 कने थोडे लोक यीशु दे अगो-अगो चलयो थे, कने थोडे लोक पिच्छे चलयो थे, सै सारे खुशिया ने जोरे ने बोला दे थे, “होशाना; परमेश्वर इसला खुश है जड़ा उदे हके सोगी ओंदा है। 10 परमेश्वरे दा अनुग्रह ओणे बाले

राज्य पर है, जड़े साड़े सियाणे राजा दाऊद दे राज्य सांई है, धन्य हे! परमेश्वर जड़ा स्वर्गे च रेदा है, उदी होशाना हो।” 11 जालू यीशु यरूशलेम शेहरे च पुज्जा कने तां सै परमेश्वरे दे मंदरे दे अंदर गया, कने सारे पासे दिखया कने सै अपने बाहरां चेलयां सोगी बैतनिय्याह ग्रांजे जो मुडी गया, क्योंकि संज होई गियो थी। 12 दुज्जे दिने जालू यीशु कने उदे चले बैतनिय्याह ग्रांजे ला यरूशलेम शेहरे जो चलयो थे, तालू यीशुएं जो भूख लग्गी। 13 कने उनी पतयां ने भरया होया अंजरी दा सूख दिखया कने सै उदे बखे गे, ताकि कुछ खाणे जो मिली जा, पर ओथु पतयां जो छडी करी होर कोई फल नी मिल्ला, क्योंकि फल देंगे दी रित नी थी। 14 कने यीशुएं उस सूखे जो बोलया, “अज्जे ला बाद तेरा फल कुनी नी खाणा। कने उदे चले सुणा दे थे।” (aiōn g165) 15 “उदे बाद यीशु कने उदे चले सै यरूशलेम शेहरे च आए,” उनी उना लोकां जो परमेश्वर दे मंदरे ला कडी दिता, जड़े ओथु जानवर कने चिजां खरीदणे बचने दा कम्म करा दे थे। यीशुएं पैसयां बदलने बाले मंजे जो, कने कबुतरां जो बेचणे बालयां दे पिंजरयां जो बाहर सुटी दिता। 16 “कने उनी लोकां जो हुकम दिता की मंदरे दे अंगणे ला होईकरी चिजां जो लिणा बंद करा। 17 कने यीशुएं उना जो बोलया, पबित्र शास्त्र ऐ बोलदा की, लोक मेरे घरे जो प्राथना दा घर बोलदे न, जिथू सारे लोक प्राथना तांई ओदे न? पर तुसां तां इसयो डाकुआं ला भरूईयो गुफा सांई बणाई दितया है।” 18 बड्डे याजकां कने यहूदियां दिया व्यवस्था जो सिखाणे बालयां ऐ सुणया, जड़ा यीशुएं बोलया कने कितया, तां सै इसयो मारणे दा मौका तोपणा लग्गे, पर सै लोकां ला डरा दे थे, क्योंकि सारे लोक यीशुएं दियां गल्लां ने हेरान थे। 19 जालू संझा दा बेला होया, तां यीशु कने उदे चले शहर छडी करी बैतनिय्याह ग्रां जो मुडी गे। 20 फिरी ब्यागा तडके बेले यीशु कने उदे चले यरूशलेम शेहरे जो ओआ दे थे, तालू उना अंजरी दे सूखे जो दिखया तां सै सुकी गया था। 21 पतरसे जो सै गल्ल याद आई, कने उनी यीशुएं जो बोलया, “गुरू जी, दिख। ऐ अंजरी दा सूख जिसयो तू श्राप दितया था सै सारा सुकी गया है।” 22 यीशुएं इसयो जबाब दिता की, “परमेश्वरे पर भरोसा रख जड़ा तुसां मंगे से सारा कुछ मिलणा। 23 मैं तुसां ने सच्च बोलदा है, की अगर कोई इस पहाड़े जो बोले की, की ऐथू ला उठ कने समुंद्रे च जाई करी पेई जा, कने अपने मने च कोई शक नी रखे, पर भरोसा रखे, की जड़ा मैं बोलदा है सै होई जा, तां उस तांई तदिया होई जाणा है। 24 इस तांई मैं तुहांजो बोलदा है की जड़ा कुछ

तुसां प्राथना करिके मंगा, तां भरोसा करी लिया की तुहांजो मिली गिया है, तां सै तुहांजो मिली जाणा। 25 जालू कदी तुसां प्राथना करदे न, तां अगर तुहाड़े मने च कुसी ताई बैर है, तां उसयो माफ करी दिया, इस ताई की तुहाड़ा पिता परमेश्वर जड़ा स्वर्गे च रेंदा है, उनी तुसां दे पाप माफ करी देणे। 26 पर अगर तुसां माफ नी करगे, तां तुहाड़े पिता परमेश्वरे जड़ा स्वर्गे च है, उनी भी तुहाड़ा पाप माफ नी करणा।” 27 यीशु कने उदे चेले यरूशलेम शेहरे जो मुडी करी आये, जालू सै मंदरे च गुमा दा था तां बड़े याजक कने यहूदी व्यवस्था जो सिखाणे बालयां कने यहूदी अगुवे उदे बाल आये कने पूछणा लग्गे, 28 “उना उसयो बोलया, ऐ कम्म तू कुसी हके ने करा दा है? कने तिजो ऐ हक कुनी दितया है?” 29 यीशुऐ उना जो बोलया, “मैं भी तुहांजो ला इक गल्ल पछदा है, अगर तुसां मिंजो जबाब दिंगे, तां मैं दसगा कि ऐ कम्म मैं कुसी हके ने करदा है। 30 यूहन्ना जो लोकां जो बपतिस्मा देणे ताई कुनी भेजया था? क्या सै परमेश्वरे भेजया था या माणुऐ? मिंजो दसा।” 31 तालू सै अपु चे बोलणा लग्गे कि अगर असां बोलया कि, “परमेश्वर जड़ा स्वर्गे च है उनी भेजया है, तां यीशुऐ सांझो ला पुछणा, कि तुसां यूहन्ना पर भरोसा कन्नी किता?” 32 अगर असां बोलया की, सै माणुऐ दे पाससे ला आया है, तां सै जबाब नी देई सके, क्योंकि सै उना लोकां ला डरदे थे, जड़े ऐ मंदे थे की यूहन्ना परमेश्वर दे पासे आया इक सच्चा परमेश्वरे दा संदेश देणेबाला था। 33 उना यीशुऐ जो जबाब दिता, सांझो नी पता कुन्नी यूहन्ना बपतिस्मा देणेबाले जो भेजया। यीशुऐ उना जो जबाब दिता, “मैं भी तुहांजो नी दसणा की मिंजो ऐसे कम्म करणे दा हक कुनी दितया है।”

12 इदे बाद, यीशु यहूदी अगुवां ने कहाणियां च गल्लां करणा लग्गा, इक माणुऐ बागे च अंगूर लाये। उनी अंगूरा दे बागे दे चारों पासे बाड़ लगवाया, कने इक जगा अंगूरा दे रसे जो निचोड़ने ताई बणाई, कने निगरानी रखणे ताई इक उचिया जगा पर कमरा बणाया। फिरी उनी बागे जो कुछ किसाना जो ठेके पर देई दिता, कने परदेस चली गिया। 2 फिरी जालू अंगूर पक्की गे, तां उनी अपणा इक नोकर ठेकेदारे बाल अपणा अंगूरे दे बागे दा हिस्सा लोणे ताई भेजया। 3 पर ठेकेदारां उसयो पकड़या कने मारी कुट्टी करी बिना कुछ दितयो खाली हथ भेजी दिता। 4 बागे दे मालिके इक होर नोकर भेजया, ठेकेदारां उदा सिर फोड़या कने उदी बेस्ती किती। 5 फिरी बागे दे मालिके इक होर नोकरे जो भेजया, कने उना उसयो मारी

दिता। तां उनी होर मतयां जो भेजया, पर ठेकेदारे उना चे केईयां जो कुटया, कने केईयां जो मारी दिता। 6 हुण बागे दे मालिके बाल भेजणे ताई सिर्फ इक ही माणु था। जड़ा उदा अपणा प्यारा जागत था। उना बाल भेजया की सै मेरे जागते दी इज्जत करगे। 7 पर उना ठेकेदारां उदे जागते जो ओदे दिखया, कने उना अपु चे सलाह किती की, ऐई तां बारिस है, इनी तां अंगरे दे बागे दा मालिक बणना, ओआ असां इसयो मारी दिन्दे न, तां सारी जयादात साडी होई जाणी। 8 कने उना उसयो पकड़ी करी मारी दिता, कने उदी लाशा जो अंगरे दे बागे बाहर फेंकी दिता। 9 “तां हुण, अंगर दे बागे दा मालिक क्या करगा? क्या उनी आई करी उना ठेकेदारां जो खत्म करी दिगां, कने दाखां दे बागे दा ठेका कुसी होरसी जो दिगा। 10 क्या तुसां पबित्र शास्त्रे दा ऐ हिस्सा नी पढया जिदे च मसीह दी तुलना इक खास पथरे ने करदा है? सै बोलदा है, जिस पथरे जो राजमिस्त्रियें बेकार बोलया था कने सुटी दितया, सै ही पथर, सबना ला खास पथर बणी गया। 11 प्रभु परमेश्वरे इयोदिया किता, कने साडिया नजरा च ऐ बड़ा ही अनोखा है।” 12 तां उना उसयो पकड़ना चाया, क्योंकि सै समझी गियो थे, उनी साडे बरोध च ऐ कहाणी बोलियो है। पर सै यीशुऐ जो पकड़ी नी सके क्योंकि सै लोकां ला डरा दे थे, इस ताई सै यीशुऐ जो किल्ला छडी करी चली गे। 13 तालू उना उसयो गल्लां च फसाणे ताई केई फरीसियां कने राजा हेरोदियां दे दले दे लोकां जो उस बाली भेजया। 14 उना आई करी उसयो बोलया, “गुरू जी, सांझो पता है की, तुसां हमेशा सच्च बोलदे न, कने तुसां इसा गल्ला ला नी डरदे की दुज्जे लोक तुहाडे बारे च क्या सोचदे न, कुसदी परबाह नी करदे न, क्योंकि तुसां सारयां कने इकोदिया व्यवहार करदे न, तू तां परमेश्वरे दा रस्ता सचाइया ने दसदा है। तां हुण सांझो दस। क्या महाराजा जो कर देणा साडिया व्यवस्था दे खिलाफ है या नही? 15 असां जो कर देणा चाईदा या नी देणा चाईदा?” यीशुऐ उना दा कपट जाणी करी उना जो बोलया, “तुसां मिजो ला कुछ गलत बुलबाई करी फसाणे दी कोशिश कजो करा दे न? इक चांदी दा सिक्का मिजो बाल लेईकरी ओआ, मै उसयो दिखें।” 16 सै लेई आए, कने यीशुऐ उना जो पुछया, “मिजों दसा की इस चांदी दे सिक्के च कुसदा चित्र बणया कने कुसदी मोहर लगियो?” उना बोलया, “महाराजा दा।” 17 यीशुऐ उना जो बोलया, “जड़ा महाराजा दा है, सै महाराजे जो दिया, कने जड़ा परमेश्वरे दा है, सै परमेश्वरे जो दिया।” तालू सै उस पर बडे हेरान होए। 18 यहूदियां दे धर्मी दल दे थोड़े लोक

जिना जो सदूकी भी बोलदे न, तालू थोड़े यहदी अगवे यीशुए बाल आये। कने सै भरोसा नी करदे थे, कि लोक मरणे दे बाद फिरी जिन्दे होई सकदे ने। उना यीशुए ला पुछया, **19** “गुरू जी, मूसा साडे तांई लिखया है, की अगर कुसी दा भाई बिना ओलादी मरी जा, कने उदी घरे बाली जिन्दा रे, तां उदा भाई उदिया घरे बालिया सोगी बियाह करिके अपने भाई तांई बंश पैदा करे। **20** स्टुकियां यीशुए जो इक कहाणी सुणाई की, इक घरे च सत भाई थे। सबते बडे भाईये इकी जनानिया ने बियाह किता, जालू सै मरी गया तां उदी कोई भी ओलाद नी थी। **21** तां दुऐ भाईये उसा सोगी ही बियाह करी लिया कने सै भी बिना ओलादी मरी गया, कने इयां ही तिजे भाईये किता, **22** कने सतां भाईयां उसा ने बियाह किता कने सतो भाई बिना ओलादी मरी गे। सबना दे बाद सै जनानी भी मरी गई। **23** हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी?” **24** यीशुए उना जो बोलया, “तुसां दो बजा ने गलत न, तुसां पबित्र शास्त्र जो नी जाणदे ने जडा मरणे दे बाद लोकां जो जिन्दा रेणे दे बारे च दसदा है। तुसां ऐ नी जाणदे न की परमेश्वरे बाल मरयो लोकां जो जिन्दा करणे दी शक्ति है। **25** क्योंकि जालू उना मरयां चे जिन्दा होणा, तां उना लोका दे बियाह नी होणे; जियां स्वर्गे च रेणेबाले स्वर्गदूत बियाह नी करदे। **26** मरयां चे जिन्दा होणे दे बारे च, तुसां क्या मूसा दिया कताबां च नी पढ़या जालू झाडिया जो अग्ग लगियो थी, तां उसा जगा पर क्या होया था, परमेश्वरे मूसा ने गल्ल किती कने बोलया, मै अब्राहम, इसहाक, कने याकूब दा परमेश्वर है, जिदी ऐ अराधना करदे थे। **27** तांई तां मरयो लोकां दा परमेश्वर नी है। पर जिन्दया दा परमेश्वर है, तुसां बडे गलत न।” **28** कने यहदी मूसा दी व्यवस्था जो सिखाणे बालयां चे इकी ऐ चर्चा सुणी, जडी यीशु कने सदूकी अपु चे करा दे थे, कने ऐ जाणी करी की यीशुए उना जो ठीक तरीके ने जबाब दिता, तां सै यीशुए बाल आया कने पुछया, “की परमेश्वरे जडे भी हुकम दितयो न, उना सारयां चे सारयां ला बडा हुकम कुण दिया है?” **29** यीशुए जबाब दिता, “सबना हुकमा ला बडा हुकम ऐ है: इम्राएल दे लोको तुसां सुणा। प्रभु साडा परमेश्वर जिसदी असां अराधना करदे न, सै इक ही प्रभु है। **30** कने तू अपने प्रभु परमेश्वर ने अपने सारे मने ने, कने अपने सारे प्राणा ने, कने अपणिया सारिया अकला ने, कने अपणिया सारिया शक्तियां ने प्यार रखनयो। **31** परमेश्वर दा दुज्जा हुकम ऐ है, की जितणा तुसां

अपणे आपे जो प्यार करदे न, दूजयां ने भी उतणा ही प्यार करा, परमेश्वरे इना दो हुकमा ला बड़े होर कोई हुकम नी दितया न।” 32 मूसा दिया व्यवस्था जो सिखाणे बालयां उसयो बोलया, “गुरू जी,” बिलकुल ठीक। तू सच्च बोलया है, सै ही परमेश्वर है, कने उसयो छडी करी होर कोई नी है। 33 कने उसला सारे मन, कने सारिया अकला ने, कने सारे प्राणा ने, कने सारिया ताकता ने प्यार रखणा, कने पडोसियां ने अपण्यां सांई प्यार रखणा, ऐ सब परमेश्वरे जो जानवरां दियां बलियाँ चढाणे ला जादा जरूरी है। 34 जालू यीशुऐ दिखया की उनी सोची समझीकरी जबाब दिता, तां यीशुऐ उसयो बोलया, “तू परमेश्वरे दे राज्य च प्रवेश करणे दे नेडे है।” कने फिरी होर कुसी जो उसला कुछ पूछणे दी हिम्मत नी होई। 35 फिरी यीशुऐ परमेश्वरे दे मंदरे च उपदेश दिन्दे होये बोलया की, व्यवस्था जो सिखाणे बाले कियां बोली सकदे न की मसीह राजा दाऊदे दा बंशज है? 36 ऐथू दिकर कि राजा दाऊद, जालू परमेश्वर दी पबित्र आत्मा उसयो बोलणे दी शक्ति दिती, तां उनी बोलया, “परमेश्वरे मेरे मसीह जो अपणे बखे इज्जत मान कने हक दी पदवी च बोणे तांई बोलया था, हालांकि उनी उदे सारे दुशमणा जो पूरी तरहा उदे अधीन करी दिता।” 37 “ऐथू दिकर कि राजा दाऊदे भी मसीह जो प्रभु करी के बोलया, तां सै दाऊद दा बंशज कियां होया?” कने लोक उसयो बड़े मजे ने सुणदे थे। 38 यीशुऐ अपणे उपदेश च उना ने बोलया, “व्यवस्था जो सिखाणे बालयां ला साबधान रिया, जड़े लोकां जो दसणे तांई लम्बे कने मंगे कपड़े पाणा पसंद करदे, कने उना जो बड़ा पसंद है की लोक उना जो बजारां च नमस्ते करन, 39 कने यहूदी जंज घरां च खास-खास आसना पर बोणा पसंद करदे न। कने खांदे बेले खास जगा चांदे न। 40 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे तांई बड़ी देरा दीकर प्राथना करदे न, परमेश्वरे ला इना जो बड़ी बुरी सजा मिलणी है।” 41 यीशु मंदरे दे भंडारे सामणे बेईकरी दिखा दा था की लोक परमेश्वरे दे मंदरे दे भंडारे च कियां पैसा पांदे न, कने मते अमीरां लोकां बड़ा सारा पैसा पाया। 42 इतणे च इक गरीब बिधवा आई करी दो तांबे दे सिक्के पाये, जिना दी कीमत बड़ी घट् थी। 43 तालू उनी अपणे चेलयां जो अपणे बखे सदीकरी बोलया, “मैं तुसां ने सच्च बोलदा कि इस मंदरे दे भंडारे च जितणया भी दान पाया है, उना सबना ला बदीकरी इना गरीब बिधवा पाया है।” 44 क्योंकि

सबना अपने भंडारे के थोड़ा दिया देता, पर इना गरीब बिधवा इसा बाल जितना भी था, सारा पाई दितया है।

13 जालू यीशु मंदरे ला निकला दा था, तां उदे चेलयां के इकी उसयो बोलया, “गुरू जी, दिख, कितणियां छेल ईमारता न कने बड़े-बड़े पत्थरां ने बणियां न कने कितणे-कितणे बड़े घर न।” 2 यीशुए उसयो बोलया, “तुसां इना बड़े-बड़े घरां जो दिखा दे न, इक दिन इना के ऐथू इक भी घर नी बचणा है, ऐथू दीकर की इक पथरे उपर पथर नी रेंणा है, जड़ा डायी नी जांणा।” 3 जालू यीशु मंदरे ला जैतून सखां दे पाहड़े पर चली गया कने मंदरे दे सामणे बेई गया, तां पतरस, याकूब, यूहन्ना कने अन्द्रियास यीशुए बाल आये कने तालू यीशुए बाल कोई नी था, कने उसला पुछया, 4 “सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होंगा तां उदा क्या निशान होणा है?” 5 यीशुए उना ने बोलया, ध्यान रख्यो की तुहांजो कोई धोखा न दे। 6 मते सारे लोकां मेरे नाए ने दाबा करिके ओणा है। उना बोलणा है, मै मसीहा हूँ कने उना मतयाँ लोकां जो भटकाणा है। 7 जालू तुसां लड़ाईयां, कने लड़ाईयां दियां गल्लां सुणगे तां डरदे मत; क्योंकि इना दा होणा जरूरी है, पर तालू संसारे दा खात्मा नी होणा है। 8 क्योंकि जातियां ने जातियां कने राज्यां ने राज्यां इक दुज्जे ने लड़ाईयां करणियां न। कने हर कुथी हिलण होणे न कने अकाल पोणे न। ऐ तकलीफ कने दुख ऐदिया होणा जदिया की जालू माँ बच्चे जो जन्म देणा लगदी है। 9 “पर तुसां जो हमेशा चौकने रेणा चाईदा, क्योंकि लोकां तुहांजो कैदी बनाना कने यहूदी जंज घरा च देणा कने तुहांजो मार पोणी, कने मेरिया बजा ने तुहांजो हाकिमा कने राज्यां सामणे न्याय तांई महासभा च पेश करणा है, ताकि तुसां उना जो मेरे तांई गबाई देन। 10 कने सारे देशां च, तुहांजो कने होर जड़े मिजों उपर भरोसा करदे न, तुहांजो संसारे दे अंत होणे दे पेहले सारयां लोकां जो शुभसमाचार सुणाणा है। 11 जालू तुहांजो कैदा च पाणा है, तां तुसां इदी चिंता मत करदे, की असां क्या बोलणा है। क्योंकि उस बेले पबित्र आत्मा तुसां दे जरिये गल्लां करणियां न। 12 उसी बेले, जड़े लोक मिजों पर भरोसा नी करदे न, उना अपने भाईयां जो जेला च करी लेणा, जड़े मिजों पर भरोसा करदे ने सै मरवाई देणे न। पिता अपने बचयां सोगी इयां ही करणा है, कने बचयां मां-प्यो दे खिलाफ होईकरी उना जो मारी देणा है। 13 क्योंकि तुसां मेरे चले न उदिया बजा ने सारे लोकां तुसां ने बैर करणा है, पर जड़े लोक मिजों पर

भरोसा रखदे न कने आखरी दीकर सेहन करगा, उना दा ही उद्धार होणा है।” 14 जालू तुसां इक मसीह बिरोधी जो यस्शलेम मंदरे च खड़ोतयो दिखणा, जिथू उसयो नी होणा चाईदा। यहूदिया प्रदेशे दे लोकां जो जान बचाणे तांई पाड़ा पर नसणा पोणा। 15 जड़ा कोई अपणी घरे दिया छती पर हो, तां सै समान लेणे तांई थले ना उतरे, ना ही अंदरे जो जा। 16 कने जड़ा खेतरां च होऐ, सै अपने कपड़े लेणे तांई मुडी करी घरे ना ओऐ। 17 ऐ उना जनानिया तांई बड़ा बुरा बकत होणा जड़ियां लैरथियां न, कने उना जनानियां तांई जड़ियां नियाणे जो दूध पियादियां न, उना जो अपणी जान बचाणे तांई नसणा बड़ा मुशकिल होई जाणा। 18 इस तांई प्राथना करा की ऐ बुरा बकत सर्दियां च ना हो, जालू सफर करणा मुशकिल हो। 19 क्योंकि उना दिना लोकां जो बड़े दुख होणे न, उना लोकां कदी भी ऐसे दुखां दा सामणा नी कितया होणा, जालू ला परमेश्वरे संसार बणाया है। 20 अगर परमेश्वरे उस बुरे बकते जो नी घटादां, तां कोई भी माणु नी बचदा। पर उना चुणयो होऐ लोकां दिया बजा ला, जिना जो परमेश्वरे चुणयां है, बकत घटाणा है। 21 अगर उस बेले कोई तुसां जो बोले, की दिखा, मसीह ऐथू है। या दिखा, ओथु है। तां उदा भरोसा मत करदे। 22 क्योंकि झूठे मसीह कने झूठे परमेश्वरे दा संदेश देणेबालयां ओणा है, उना लोकां जो धोखा देणे तांई जिना जो परमेश्वरे चुणयां है, उना चमत्कार कने अनोखे कम्म दसणे न। 23 पर तुसां चौकने रिया, दिखा मैं तुहांजो सारियां गल्लां होणे ला पेहले ही बोली दितियां न। 24 “उना दिना च, बुरा कने दुखे बाल बकत मुकी जाणे दे बाद, सूजे च अंधेरा होई जाणा, कने च चद्रमैं लौ नी देणी। 25 अम्बरे ला तारायां पेई जाणा, कने अम्बरे दियां शक्तियाँ हिलाईयां जाणियां। 26 तालू लोकां मिजों, माणुऐ दे पुत्रे जो धरतिया पर बदलां उपर ओदे कने उना मेरी शक्ति कने महिमा जो दिखणा। 27 मैं अपने स्वर्गदूतां जो धरतिया पर भेजगा, ताकि सै उना सारे लोकां जो गठेरी करी, जिना जो मैं चुणयां है, कने उना संसारे दे चारों पासयां ला लोका जो गठेरणा है।” 28 “अंजीर दे स्खे ला ऐ सिखा, जालू उदियां डालियाँ निकलदियां न कने पत्ते निकलना लगदे न, तां तुसां जो पता लगी जांदा है, की गर्मियां दी रित नेडे ओआ दी है।” 29 जालू तुसां इना चिजां जो होंदे होये दिखगे, तां तुसां जाणी लेनयो, की सै माणुऐ दा पुत्र ओणे बाला है, कने ऐ दुर नी है। 30 मैं तुसां ने सच्च बोलदा है, इसा पीढिया दे सारे लोकां तालू दिकर नी मरणा है, जालू दिकर ऐ सब होई ना जा। 31 अम्बर कने धरती खत्म होई जाणे,

पर मेरियां बोलियां गल्लां कदी नी टलनिया न, सै हमेशा रेंणियां न। 32 “ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गदूत कने ना ही मै, माणुऐ दा पुत्र, पर सिर्फ पिता परमेश्वर ही उसी रोजे कने घडिया जो जाणदा है। 33 दिखा, जागदे कने प्राथना करदे रिया; क्योंकि तुहांजो नी पता की कालू मै मुडी करी ओणा। 34 मेरा धरती छडणा कने बापिस ओणा इयां होणा है, जियां परदेस जांदे बेले अपणा घर छडी जाए, कने अपने नोकरां जो हक दे, कने सारायां जो अपणा-अपणा कम्म दसी दे, कने द्वार पालां जो पेहरेदारी करणे दा हुकम दिता कने उदे बापिस ओणे तांई तैयार रे। 35 तुसां नी जाणदे न कि घरे दे मुखिया कालू मुडी के ओणा है, तां तुसां पेरादारी करनयो, क्योंकि मै घरे दा मुखिया संझा जो या अधिया राती जो, या मुर्गे दिया बांगा देंगे दे बेले या ब्यागा जो कालू भी आई सकदा है। 36 इयां नी होऐ की मै अचानक ओऐ कने मै इयां नी दिखणा चांदा की तुसां विना तयारी दे होन। 37 कने जडा मै तुहांजो बोलदा है, सै ही सारायां जो बोलदा है, की मेरे ओणे दीकर तैयार रिया।”

14 दो दिना बाद फसह कने अखमीरी रोटिया दा त्योहार होणेबाला था। कने बड़े याजक कने व्यवस्था जो सिखाणे बाले इसा गल्लां दिया तोपा च थे, की यीशुऐ जो कियां धोखे ने पकड़ी करी मारी देन। 2 पर बोलदे थे की, “सांझो त्योहारे दे बेले ऐ नी करणा चाईदा। कुथी इयां ना हो की लोकां च रोला नी पेई जा।” 3 जालू सै बैतनिय्याह ग्रां च शमौन कोठी दे घरे था, जिसयो यीशुऐ कोढे दिया बिमारिया ला खरा कितया था। सै ओथु रोटि खांणा बैठया था, तां इक जनानी उदे घरे जो आई कने उना इक बोतल लांदियो थी; जड़ी संगमरमर दी थी, उसा बोतला च जटामासी तेले ने बणाया बड़ा मेहंगा इत्र था, कने उना बोतला दा मुह तोड़ी करी सारा इत्र यीशुऐ दे सिरे पर नियोरी दिता। 4 पर केई लोक मने च बोलणा लग्गे, “इस मेंगे इत्रे जो सत्यानाश नी करणा चाईदा था। 5 क्योंकि ऐ इत्र इतणा मेहंगा था की, इस इत्र दी कीमत इक साले दिया मजदुरिया बराबर थी, कने इसयो बेचिकरी गरीबां जो बंडी सकदे थे।” कने सै उसा जो बुरी हाले झिडकणा लग्गे। 6 यीशुऐ बोलया, “इसा जो किल्ली छडी दिया, इसा जो तंग करणा बंद करा, इयां तां मिंजो पर इत्र पाणा खरी गल्ल है। 7 गरीब तां हमेशा तुहाड़े सोगी रेंदे न, कने तुसां उना ने जालू मजीं खरा करी सकदे न, पर मै तुहाड़े सोगी सदा नी रेंणा है। 8 इना जनानिया मेरे तांई खरा कम्म कितया है, ऐ जडा कुछ करी सकदी थी, सै इना किता, इना मेरे

शरीर पर इत्र मलया है, इना मिजो मरणे ला पहले ही दफनाणे दी तैयारी किती है। 9 मैं तुसां ने सच्च बोलदा है, सारे संसार च जिथू भी शुभसमाचार दा प्रचार होंगा, इना जनानिया जड़ा कितया ओथु इसा दे इस कम्मे दी चर्चा भी उसा दिया यादा च किती जाणी है।” 10 तालू यहदा इस्करियोती जड़ा बाहरां चेलयां चे इक था, सै यीशुऐ जो पकड़ाणे च सहायता करणे तांई बड़े याजकां बाल गिया। 11 सै ऐ सुणीकरी खुश होए, कने उसयो पेसे देंगे जो मन्नी गे, कने सै यीशुऐ जो धोखे ने यहदी अगुवां दे हथे पकड़ाणे दा तां मौका तोपा दे थे। 12 अखमीरी रोटिया दे त्योहारे दे पेहले दिने, जिस रोजे फसह दी बलि दिन्दे थे, उदे चेलयां उसयो पुछया, “तुसां सांझो कुथु भेजणा चांदे न की असां फसह दे त्योहारे दा खाणा बणाई करी खाई सकन?” 13 उनी अपने दो चेलयां जो ऐ बोली करी भेजया, “की यरूशलेमे शेहरे जो जा, कने ओथु तुहांजो इक माणु घडे चुकी करी चलया मिलणा, उदे पिच्छे चली जानयो। 14 कने सै जिस घरे जो जांगा, उस घरे दे मालिके जो बोलयो: की गुरू जी ने पूछया है, की मेरा कने मेरे चेलयां दा फसह दा खाणा खाने बाला कमरा कुथु है? 15 उनी तुहांजो इक उपरे आला सजया सजाया कने तैयार कितया बडा कमरा दसी देणा है, कने तुसां ओथु साडे तांई तैयारी करा।” 16 दो चेले निकली करी नगरे च आये कने जियां यीशुऐ उना जो बोलया था, तियां ही था, कने उना फसह त्योहारे दा खाणा तैयार किता। 17 जालू संज होई, तां यीशु बारां चेलयां सोगी उदे घरे जो आया। 18 कने जालू सै रोटी खाणां बैठयो थे, तां यीशुऐ बोलया, “मैं तुसां ने सच्च बोलदा है, की तुहांजो चे इकी जणे, जड़ा मेरे सोगी रोटी खा दा है, मिजो पकड़ावणे तांई मेरयां दुशमणा दी सहायता करणी है।” 19 जालू उदे बाद उना ऐ गल्ला सुणिया तां उना पर उदासी छाई गई कने सै इक-इक करी के उसने बोलणा लग्गे, “क्या सै मैं है?” 20 यीशुऐ उना जो बोलया, “सै बाहरां चेलयां चे इक है, जड़ा मेरिया थालिया च डुबोई करी खा दा है। 21 क्योंकि मैं, माणुऐ दे पुत्रे मरी जाणा है, ऐ सब कुछ पबित्र शास्त्रां च लिखया है, पर उस माणुऐ जो बड़ी बुरी सजा होणी है, जड़ा मिजो धोखा दिन्दा है जिनी मिजो पकड़ावणे च सहायता करणी है, अगर उस माणुऐ दा जन्म ही नी होया होंदा तां ही उदे तांई खरा होंदा।” 22 जालू सै खा दे थे, तां यीशुऐ रोटी लेई, कने परमेश्वरे दा धन्यवाद करी के तोड़ी, कने अपने चेलयां जो देईकरी बोलया, “खाई लिया, ऐ मेरा शरीर है।” 23 फिरी उनी दाखरस दे कटोरे जो चुकी करी परमेश्वरे दा

धन्यवाद किता, कने चेलयां जो दिता, कने उना सारयां उस कटोरे च पीता। 24 कने यीशुए उना जो बोलया, “ऐ दाखरस मेरा खून है, मेरा खून केईयां लोकां दी भलाई ताई बहाया जाणा है, ऐ उसा बाचा जो साबित करगा, जड़ा परमेश्वरे अपने लोकां सोगी कितया है। 25 मैं तुहांजो ने सच्च बोलदा है, मैं उसी दिने बाद कदी भी धाखा दा रस नी पीणा, जालू दीकर परमेश्वरे दे राज्य च नोआ दाखरस नी पी लेंगा।” 26 फिरी यीशुए कने उदे चेलयां फसह दे त्योहारे दे भजन गाई करी यरूशलेम शहरे दे बाहर जैतून सूबां दे पाहड़े पर चली गे। 27 तालू यीशु पहाड़े दे पासे चलया था उनी चेलयां जो बोलया, तुसां सारयां मिजों छडी करी नसी जाणा है, क्योंकि पबित्र शास्त्रे च लिखया है, सै सच्च होणा है: “मैं रखवाले जो मारणा कने भेडां तितर बितर होई जाणा है।” 28 पर मैं मरी के जिन्दा होणे ला बाद तुहांजो ला पेहले गलील प्रदेश च पूजणा है, कने तुहांजो ने मिलणा है। 29 पर पतरसे यीशुए जो बोलया, “चाहे सारे छडी करी नसी जांगे पर मैं नी नसगा।” 30 यीशुए उसयो बोलया, “मैं तिजो ने सच्च बोलदा है, की अज ही इसा राती मुर्गे जो दो बार बांग देणे ला पेहले तू मिजो तीन बरी बोलणा है, की मिजो नी जाणदा है।” 31 पर उनी होर भी जोर देईकरी बोलया, “अगर मिजो तेरे सोगी मरणा भी पोंगा तमी मैं कदी नी बोलणा की मैं तिजो नी जाणदा।” इयां ही बाकी सारयां चेलयां भी बोलया। 32 फिरी जालू यीशु कने उदे अनुयायी गतसमनी नाए दे इक बागे च आये, कने उनी अपने चेलयां जो बोलया, “ऐथू बेई रिया, जालू दीकर मैं प्राथना करें। 33 कने यीशु पतरस, याकूब कने यूहन्ना जो बागे च थोड़ा दिया अग्रे लेई गया, कने सै बड़ा ही दुखी कने बेचेन होणा लग्गा, 34 कने उना ने बोलया, ‘मेरा मन बड़ा उदास है, ऐथू दीकर कि मेरे प्राण निकली चलयो न, तुसां ऐथू स्का कने जागदे रिया।’” 35 फिरी यीशु थोड़ा अग्रे गया, कने गोड़े भार बेई गया कने मुह धरतिया पाससे करी प्राथना करणा लग्गा, “की अगर होई सके तां ऐ घडी मिजो ला टली जा।” 36 कने बोलया, “पिता जी, तिजो ला सब कुछ होई सकदा है, ऐ जड़ा दुख ओणे बाला है, ऐ टली जाये पर जियां तुसां चांदे न तियां ही होऐ।” 37 फिरी जालू यीशु बापस आया कने तिन्न चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके? 38 जागदे कने प्राथना करदे रिया ताकि मिजों पर भरोसा रखणा नी छडन। आत्मा तां खरा करणा चांहदी है पर शरीर च जोरे दी कमी है।” 39 कने यीशु

फिरी बापिस चली गया, कने सै ही बोली करी प्राथना किती। 40 कने उनी फिरी आई करी उना जो सुतया दिखया, क्योंकि से जागते रेईकरी बडे थकी गियो थे, जालू यीशुए उना जो जगाया कने उना जो नी पता था की उसयो क्या बोलन। 41 फिरी तीजी बरी आई करी उना जो बोलया, “हुण सोंदे रिया कने अराम करा, तुसां बडा सोई लिया हुण से बकत आई गिया है, जालू मै, माणुए दा पुत्र पापियां दे हथे पकड़ाया जाणा है। 42 उठा कने चला। दिखा, जिनी माणुए मिजों पकड़वाणा है, सै बखे आई रिया है।” 43 जालू यीशु ऐ बोला दा ही था, तां यहूदा जडा बाहरां चेलयां चे इक था, सै ओथु आया, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड्डे याजकां, यहूदी व्यवस्था जो सिखाणे बाले कने यहूदी अगुवां भेजयो थे। 44 कने यीशुए जो पकड़ाणे बाले यहूदा उना दी सहायता किती, कने उना जो पेहले ही दस्सी दितया था, की जिसयो मै गुरू बोलगा कने गले लाईकरी चुम्मी लेंगा, तां उसयो पकड़ी करी ढंगे ने लेई जानयो। 45 कने यहूदा आया कने उनी झट यीशु दे बखे जाई करी बोलया, “गुरू जी।” कने गले लाईकरी उदी चुम्मी लेई। 46 तालू उना उसयो कस्सी करी पकड़ी लिया कने बन्दी बनाई लिया। 47 जडे उदे बखे खडोतयो थे, उना चे इकी जणे अपनी तलवार कडी कने महायाजके दे नोकरे पर चलाई दिती कने उदा इक कन बडी दिता। 48 यीशुए उना जो बोलया, “तुसां क्या मिजो डाकू समझीकरी तलवारां कने डांगा लेईकरी बन्दी बनाने तांई आयो? 49 मै तां रोज ही मंदरे च तुहाडे सोगी रेईकरी उपदेश दिन्दा था, तालू तां तुसां मिजो बन्दी नी बनाया पर ऐ इस तांई होया की पबित्र शास्त्रां च लिखया पुरा होऐ।” 50 जालू ऐ होया तां उदे सारे चेले उसयो छडी करी नसीं गे। 51 इक जवान अपने नंगे शरीर पर चादर ओडी करी उदे पिच्छे चली पिया; कने लोक उसयो यीशुए दा चेला समझीकरी पकड़ना लगा। 52 पर सै चादरा छडी करी नंगा ही नठी गया। 53 फिरी सै यीशुए जो महायाजके दे घरे बाल लेई आये; कने सारे बड्डे याजक, कने यहूदी अगुवे कने व्यवस्था जो सिखाणे बाले ओथु गिठे होईं गे। 54 पतरस भी उना दे पिच्छे-पिच्छे महायाजके दे अंगणे च जाई रिया, कने मंदरे दे सिपाईयां सोगी बेईकरी अग तपणा लगी पिया। 55 बड्डे याजक कने यहूदी महासभा दे सदस्य यीशुए जो मारी देंगे तांई उदे खिलाफ च गबाई तोपा दे थे, पर उना जो कोई गबाई नी मिली। 56 क्योंकि मते लोक उदे खिलाफ च झुठियां गबाईयां दिन्दे थे, पर

उना दियां गबाईयां इक दियां नी थियां। 57 तां कितण्यां ही लोकां उठी करी उदे खिलाफ ऐ झूठी गबाई दिती। 58 “असां इसयो ऐ बोलदे सुणया है, की मैं माणुऐ दे बणायो मंदिर जो डाई करी तिन्ना रोजां च नोआ मंदिर बणाई लेणा, जड़ा हथा ने नी बणया होणा है।” 59 ऐ गबाई भी उना दी इक देई नी निकली। 60 तालू महायाजके बिच खडोई करी यीशुऐ ला पुछया, तू कोई जबाब कनी दिन्दा? ऐ लोक तें खिलाफ क्या गबाई दिन्दे न? 61 पर सै चुप ही रिया, कने उनी कोई जबाब नी दिता: महायाजके उसयो फिरी पूछया, “क्या तु उस परमधन्य परमेश्वरे दा पुत्र मसीह है, जिदी असां अराधना करदे न?” 62 यीशुऐ बोलया, “हां मैं है: कने तुसां मिंजो माणुऐ दे पुत्रे जो सबते शक्तिशाली परमेश्वर दे सजे पासे हके कने बैठयो दिखणा, कने अम्बरे च बदलां सोगी ओंदे दिखणा है।” 63 जालू महायाजके यीशुऐ जो ऐ बोलदे सुणया तां उनी गुस्से च अपणे कपड़े फाड़ी दिते, कने बोलया, “हुण सांझो कुसी गबाह दी जरूरत नी है। 64 तुसां इसयो परमेश्वरे दी निंदा करदे सुणया, तुहाड़ी क्या सलाह है इसा गल्ला पर?” उना सारायां फेसला किता की यीशुऐ परमेश्वर दी निन्दा कितियो, इस तांई इसयो मौत दी सजा मिल्ले। 65 तालू कोई तां उस पर थुकणा लग्गे, कने कोई उदा मु ढकणा कने मूके मारणा, कने मजाक उडाई करी बोलणा लग्गे, “गुरू जी, अगर तु परमेश्वरे दा संदेश देणेबाला है, तां सांझो दस कुनी तिजो मारया, कने सिपाईयां उसयो पकड़ी करी थप्पड़ मारे।” 66 जालू पतरस थल्ले अंगणे च अग्गी सेका दा था, तां महायाजक दिया नोकराणियां चे इक ओथु आई, 67 कने उना पतरसे जो अग्ग तपदे दिखया कने उसयो ध्याने ने दिखीकरी बोलणा लग्गी, “तू भी तां इस यीशु नासरत बाले दा सोगी था।” 68 सै मुकरी गया, कने बोलणा लग्गा, मैं नी जाणदा इसयो कने मिंजो नी पता की तू क्या बोला दी है। फिरी सै बारले पासे चली गया, कने मुर्गे बांग देई दिती। 69 सै नोकराणी बखे खडोतयो बंदयां ने फिरी बोलणा लग्गी, की ऐ उदे चेलयां चे इक है। 70 पर सै फिरी मुकरी गया। कने थोडिया देरा बाद उना जडे बखे खडोतया थे, उना पतरसे जो बोलया, “पक्का तू उना चे ही इक है, जियां तु बोलदा है इसला लगदा तु भी गलील प्रदेश ला है, तु उदे चेलयां चे इक है।” 71 पतरस अपु जो कोसणा लग्गा, कसम खाणा लग्गा, की जिस माणुऐ दी तुसां गल्ल करा दे न उसयो मैं नी जाणदा। 72 तां तालू मुर्गे दुज्जी बरी बांग दिती: तालू पतरसे जो यीशुऐ दी गल्ल याद आई जड़ी उसयो बोलियो थी, “की मुर्गे जो दो बार बांग

देणे ला पेहले तू मिजो तिन्न बरी मुकरणा है।” तालू पतरस अपने दुखे जो नी संभाली पाया कने दुखी होईकरी जोर-जोर ने रोणा लगा।

15 कने ब्यागा तडके होंदे ही झट उना बड़े याजकां, कने यहूदी अगुवां, कने व्यवस्था जो सिखाणे बालयां कने महासभा दे सारे लोकां सलाह करिके के यीशुए जो बन्नया, कने न्याय करणे ताई यहूदिया प्रदेश दे राज्यपाल पिलातुस दे हबाले करी दिता। 2 कने पिलातुसे उसयो पुछ्या, “क्या तू यहूदियां दा राजा है?” यीशुए उसयो जबाब दिता, “जडा तू बोला दा है, ऐ सही है।” 3 कने बड़े याजक उस पर बडियां गल्लां दा दोष ला दे थे। 4 पिलातुसे उसयो फिरी पुछ्या, “तू क्या कोई जबाब नी देणा है, दिख ऐ तिजो पर कितणियां गल्लां दा दोष ला दे न?” 5 यीशु फिरी चुप रिया कने कोई जबाब नी दिता, ऐ दिखीकरी पिलातुस बडा हेरान होया। 6 हर साले फसह दे त्योहारे च, पिलातुस इक केदिये जो छडी दिन्दा था, जिसयो लोक चांदे थे की सै छूटे। 7 कने बरअब्बा नाए दा इक माणु बाकी क्रतिकारियां सोगी कैदा च था, जिना रोम सरकार दे खिलाफ च लोकां दी हत्या कितियो थी। 8 कने भीड पीतालुस दे बखे आई कने उसने बिनती करणा लग्गी, कने साडे ताई इक कैदी जो छडी दे जियां तू हरबरी करदा है। 9 पिलातुसे उना जो जबाब दिता, क्या तुसां चांदे न की, मैं तुहाडे ताई यहूदियां दे राजे जो छडी दें? 10 क्योंकि सै जाणदा था, की बड़े याजकां यीशुए जो जलनिया ने पकड़ाया था। 11 पर बड़े याजकां लोकां दिया भिडा जो भडकाया, कि पिलातुस ला यीशु जो छडणे दी बजाये बरअब्बा जो छडणे दी माँग करा। 12 ऐ सुणीकरी पिलातुसे उना ला फिरी पुछ्या, “तां जिसयो तुसां यहूदियां दा राजा बोलदे न, उदा मैं क्या करे?” 13 भीडा दे लोक चिलाणा लग्गे, “उसयो सूली पर चड़ाई करी मारी दिया।” 14 पिलातुसे उना जो बोलया, “कजो इनी क्या बुरा कितया है?” पर भीड होर भी जोरे ने चिलाणा लग्गी की, “इसयो सूली पर चढ़ाई करी मारी दिया।” 15 तालू पिलातुसे भिडा जो खुश करणे ताई बरअब्बा जो उना ताई छडी दिता, कने यीशुए जो कोडे लगबाई करी सूली पर चढ़ाणे ताई रोमी सिपाईयां दे हबाले देई दिता। 16 सिपाई उसयो किले दे अंदरे बाले अंगणे च लेई गे जिसयो प्रीटोरियुम बोलदे न, कने सारिया सिपाईयां दिया पलटना जो सदी लेई आये। 17 कने यीशुए दा मजाक उडाणे ताई उना उसयो बैगणी रंगे दे कपडे पहनाये, कने कंडयां दा मुकट बणाई करी उदे सिरे पर रखया, 18 कने सै यीशुए दा मजाक उडाणे ताई उसयो ऐ बोलदे

थे की, “हे यहूदियां दे राजा, नमस्ते।” 19 सै बार-बार उदे सिरे पर भारी सरकंडे ने मारदे थे, कने उदी बेजती करणे ताई उस पर थुका दे थे, कने उसयो इज्जत मान देणे ताई अराधना करणे जो गोडे भार बेईकरी उसयो नमस्ते करणे दा नाटक करा दे थे। 20 जालू सै उदा मजाक उड़ाई बैठे, तां उना सै बैगणी कपडे उतारी करी उदे अपने कपडे उसयो पेहनाए, फिरी उसयो सूली पर चढ़ाणे ताई शेहरे ला बाहर लेई गे। 21 जालू सै शेहरे बाहर चलयो थे, तां शमौन नाए दा माणु कुरेनी गांए ला ओआ दा था, उदे पुत्र सिकन्दर कने स्फुस थे। कने सिपाईयां शमोन जो हुकम दितया की सै सूली जो चुकी करी उसा जगा लेई जा जिथू उना यीशुए जो सूली पर चढ़ाणा था। 22 सिपाई यीशुए जो गुलगुता नाए दिया जगा पर लेई आये, जिदा मतलब है खोपड़ी दी जगा। 23 तालू सिपाईयां यीशुए जो गन्धरस नाए दी दवा, दाखरस च मिलाई करी पीणे ताई यीशुए जो दिता ताकि उसयो पीडा दा असर नी होऐ, पर उनी पीणे जो मना करी दिता। 24 फिरी उना यीशुए जो हथां पैरां पर किल्लां ठोकी करी सूली पर चढ़ाया, कने उदे कपडयां ताई पर्चियां पाईयां, ऐ दिखणे ताई की क्या कुसयो मिलदा है, कने कपडयां जो अपु चे बंडी लिया। 25 ब्यागा दे कोई नौ की बजे, जालू उना यीशुए जो सूली पर चढ़ाया। 26 सिपाईयां यीशुए दिया सूलिया उपर लकड़ी दी पट्टी लाई दिती। उदे च यीशुए दा दोष लिखया था, की ऐ “यहूदियां दा राजा।” 27 उना उदे सोगी दो डाकू, इक उदे सजे पासे कने इक उदे खबे पासे सूली पर चढ़ाये। 28 तालू सै पबित्र शास्त्रे दा बचन सच्च होई गया जडा मसीह दे बारे च बोलया था, की सै अपराधियां सांई गिणया जाणा, कने सै पुरा होया। 29 कने रस्ते च जाणे बाले सारे लोक सिर हिलाई-हिलाई करी, उदी ऐ बोली करी निंदा करदे थे, “वाह रे। मंदरे जो ढाणे बाले, कने तिन्ना रोजां च बणाणे बाले। 30 सूली ला उतरी करी अपने आपे जो बचाई ले।” 31 इयां ही बड्डे याजक कने मूसा दी व्यवस्था जो सिखाणे बाले अपु चे मजाके च बोलदे थे, “की इनी होरनी जो बचाया, पर अपने आपे जो नी बचाई सकदा। 32 ऐ माणु जडा इम्राएल दा राजा, मसीह होणे दा दाबा करदा है, हुण सूली ला उतरी आए तां, असां दिखीकरी भरोसा करी लेणा कि ऐ साडा राजा है।” कने जडे उदे सोगी दो जणे सूलिया पर चढ़ायो थे, सै भी उदी निंदा करा दे थे। 33 दोपहर बाहरा बजे ला तिन्न बजे दीकर सारे देशे च नेहेरा होई गया। 34 दोपेरा दे तिजे पेहर यीशुए बडे जोरे ने पुकारी करी बोलया, “इलोई, इलोई, लमा शबक्तनी?” जिसदा मतलब है,

“मेरे परमेश्वर, मेरे परमेश्वर, तू मिजो कजो छडी दिता?” 35 कने कुछ लोक जडे उदे बखे खडोटयो थे, उना सुणया जडा यीशुए बोलया पर सै समझे नी कने बोलणा लगे, “दिखा, ऐ एलिय्याह जो सहायता ताई पुकारा दा है।” 36 कने उना लोकां च इक जणा दौड़ी करी गया कने उनी स्पंज लेईकरी सिरके च डुबाया, कने सरकंडे दे उपर बन्नी करी यीशुए जो चुसाया, कने बोलया, “स्की जा कुछ मत करा, दिखदे न की, एलिय्याह इसयो उतारणे ताई ओंदा है की नी।” 37 तालू यीशु बडे ज़ोरे ने बोली करी मरी गया। 38 कने सै मोटा परदा जडा मंदरे च टंगया होया था, जडा सारयां जो परमेश्वर दी मोज़ुदगी च अंदर ओणे जो रोकदा था, उपरे ला थले दीकर फटी गया कने उदे दो टुकडे होई गे। 39 जडा सूबेदार उदे सामणे खडोटया था, उनी जालू यीशुए दी पुकार सुणी कने उसयो दिखया की सै कियां मरया, तां उनी बोलया, “सच्ची ऐ माणु, परमेश्वरे दा पुत्र था।” 40 कने केई जनानिया भी दुरे ला दिखा दियां थियां: उना चे इक मरियम भी थी जड़ी मगदल नाए दे शेहरे ला थी, सलोमी कने मरियम जडे छोटा याकूब कने योसेस दी मां थी। 41 जालू सै गलील प्रदेशे च था तां सै उदे पिच्छे चलदियां थियां, कने उदी सेवा करदियां थियां, कने होर भी मतियां जनानिया थियां, जडियां उदे सोगी यरूशलेम शेहर च आईयां थियां कने सै उसयो दुरे ला दिखा दियां थियां। 42 जालू संज होई गेई, तां इस ताई की सै तैयारिया दा दिन था, जडा सब्ते दे इक रोज पेहले होंदा है। 43 अरिमतिया शेहरे दा रेहणे बाला यूसुफ नाए दा इक माणु था, सै यहूदी सभा दा इक बडा मनया तनया मंत्री था, कने अपु भी परमेश्वरे दे राज्य दी नियाल रखदा था। सै हिम्मत करिके पिलातुस बाल गया कने उनी यीशुए दी लाश दफनाणे ताई मंगी। 44 पिलातुस जो भरोसा नी होया, की यीशु इतणी तोल्ली मरी गया, कने उनी सुबेदारे जो सदीकरी पूछया, की क्या ऐ सच्च है, की यीशुए मरयो बड़ी देर होई गियो है? 45 जालू उनी सुबेदारे ला हाल पता करी लिया, तां पिलातुसे यूसुफे जो लाश लेई जाणे दी अनुमति देई दिती। 46 तालू उनी इक मलमल दी चादर खरीदी, कने लाश उतारी करी यहूदी रिबाजां सांई मलमल दिया चादरा च लपेटी लिया, कने दफनाणे ताई कबरां च रखया कने सै कबर चटाना जो कटी करी बणाईयो थी, कने उनी कबरां दा मु बंद करणे ताई इक गोल पथर लुडकाई करी रखी दिता। 47 मरियम जड़ी मगदलीनी शेहरे ला थी कने योसेस दी मां मरियम दिखा दियां थियां की, सै कुथु रखया है।

16 अगली संझा जालू सब्ते दे दा रोज होई गया, तां उना जनानियां जिना दे नां मरियम मगदलीनी, याकूबे दी मां मरियम, सलोमी उना सुगंध बालियां चिंजा खरीदियां, ताकि यीशुए दिया लाशा पर मलन, क्योंकि ऐ सारा यहूदियां दा रिती रिबाजा था। 2 ब्यागा तड़के तुआरे बाले दिने, सै कबरां पर गियां, 3 कने अपु चे बोला दियां थियां की, “साड़े ताई कबरां दे रखयो बडे कने भारी पथरे जो कुण हटांगा?” 4 पर जालू उना यीशुए दी कबरा पासे दिखया, तां दिखया की सै पथर तां पेहले ला ही हटया होया है। 5 कने जालू सै कबरा दे बखे पुजियां कने अंदर गियां, उना ओथु इक नौजवान जागते जो चिट्टे चमकदार कपड़े पाई करी उदे सजे पासे बैठया दिखया, कने सै बडियां हेरान होईयां कने डरी गियां। 6 उनी जवान माणुए उना जनानियां जो बोलया, डरा मत, तुसां यीशु नासरत बाले जो तोपा दियां न, जिसयो सूली पर चढ़ाया था। सै जिन्दा होई गया है, ऐथू नी है; दिखा ऐ सेई जगा है, जिथू उना उसयो रखया था। 7 पर हुण तुसां जा, कने ऐ गल्ल तुसां पतरस कने यीशुए दे बाकी चेलयां जो बोला की यीशुए तुहांजो ला पेहले गलील प्रदेशे जो जाणा है, जियां उनी तुहांजो ने बोलया था, तुसां उसयो ओथु दिखणा है। 8 जालू उना ऐ सुणया, तालू सै कबरां ला निकली करी नठी गियां क्योंकि सै घबराई करी कमी पियां थियां। कने उना रस्ते च कुसी होरसी ने कुछ नी बोलया। 9 (note: The most reliable and earliest manuscripts do not include Mark 16:9-20.) हफ्ते दे पेहले तुआरे ब्याग होंदे ही सै जिन्दा होईकरी सबना ला पेहले यीशु मरियम मगदलीनी जो मिल्ला, जिसा चे उनी सत बुरियां आत्मा कडियां थियां। 10 सै यीशु दे चेलयां बाली गई, चेले बडे भरी गमे च थे कने रोआ दे थे, उना जड़ा कुछ उना दिखया था, सै उना जो सुणाया। 11 पर जालू उना उसा ला सुणया की यीशु जिन्दा है, कने उना उसयो दिखया है, उना भरोसा नी किता। 12 उदे बाद यीशु दुज्जे दो होर चेलयां सामणे आया, जडे यरूशलेमे शेहरे ला अपने घरे जो ओआ दे थे, पर पेहले उना उसयो नी पछाणा, क्योंकि उदी भेस भुशा पेहले ला लग थी। 13 जालू उना जाणी लिया सै कुण है, तालू सै दौडी करी दुज्जयां जो दसणा गे, पर उना भी भरोसा नी किता। 14 इदे बाद यीशु उना गयारां चेलयां जो भी मिल्ला, जालू सै रोटी खाणां बैठयो थे, तां यीशुए उना जो झिड़कया, क्योंकि यीशुए जो जिन्दा होणे बाद दिखया, फिरी भी उना भरोसा नी कितया था। 15 कने यीशुए उना जो बोलया, “तुसां सारे संसार च जाई करी लोकां जो परमेश्वर दे

शुभसमाचार दा प्रचार करा। 16 जड़ा कोई मिजों पर भरोसा करगा कने बपतिस्मा लेंगा परमेश्वरे उसयो उदे पापां दी सजा ला बचाणा, पर जड़ा मिजो पर भरोसा नी करगा तां उसयो सजा मिलणी है। 17 कने जड़े लोक मिजों पर भरोसा करगे सै चमत्कारी निशाण उना दे बाली होणे न, उना मेरे नाए ने बुरियां आत्मा जो कडणा, कने मै उना जो नोईयां-नोईयां भाषा बोलणे दे काबील बणागां। 18 मै उना जो बचाणा है, जड़े सप्पां जो भी चुकी लेंगे, कने जहरीली चीज भी पी लेंगे, मै तमी उना जो मरणा नी दिगां, उना बिमारां पर हथ रखणा कने उना जो मेरे नाए ला खरा करणा है।” 19 तालू उदे बाद प्रभु यीशु उना ने गल्लां करणे बाद परमेश्वरे यीशुए जो स्वर्ग च सदी लिया, कने यीशु परमेश्वरे दे सजे पासे इज्जत बाले सिहांसन पर बैठी गया। 20 तालू चेले सारयां पाससे गे कने हर जगा परमेश्वरे दा प्रचार किता, कने प्रभु उना सोगी कम्म करदा रिया, कने उना चमत्कारां दे जरिये जड़े सोगी-सोगी होंदे थे, बचना जो पुरा करदा रिया। आमीन।

लूका

1 श्रीमान थियुफिलस ताई मतयां लोकां साडे बिच होइयां घटना दे बारे च इक दस्तावेज लिखणे दी कोशिश कितियो है। **2** उना बिलकुल सेई लिखया जड़ा सान्झो उना लोकां दसया था, जिना शुरू ला ही यीशुए दी सेबकाई जो अपणी हखी ने दिखया था कने जड़े बादे च परमेश्वरे दे बचने दे सेवक बणे। **3** इस ताई श्रीमान थियुफिलस मैं भी इना सारियां गल्लां दी जांच परख किती कने मिंजो ऐ ठीक लग्गा की तुहाड़े ताई इना घटना जो क्रमानुसार लिखें। **4** मैं ऐ इस ताई करा दा ताकि तुहांजो हर उसा गल्ला दा पता पुरिया सचाइया ने लग्गे जड़ियां लोकां तुहांजो दसियां न। **5** जालू हेरोदेस यहूदिया प्रदेश दा राजा था, अबिय्याह दी टोलिया च जकर्याह नाए दा इक याजक था, कने उदी घरे बालिया दा ना एलीशिबा था कने सै भी इस्राएल दे पेहले याजक हारून दे बंशे ला थी। **6** सै दोयो ही परमेश्वरे दे सामणे धर्मी थे, कने सै प्रभु दे सारे हुकम कने नियम पर सच्चे चलणे बाले थे। **7** पर उना दी कोई ओलाद नी थी, क्योंकि एलीशिबा बच्चा पैदा नी करी सकदी थी, कने सै दोयो ही बुढ़े थे। **8** इक दिन जालू जकर्याह यरूशलेम शेहरे दे मंदरे च परमेश्वरे दे सामणे याजके दे स्पे च सेवा करा दा था, क्योंकि उस हफ्ते उदिया टोलिया दी याजक सेवा दी बारी थी। **9** याजकां दे पर्ची पाणे बाले रिबाजे दे हिसावे ने जकर्याह दे नाए दी पर्ची निकली की प्रभु दे मंदरे च जाई करी धूप बाल्ले। **10** जालू सै धूप लगाणे दे बेले सारे लोक बाहर अंगणे च खडोई करी प्रार्थना करा दे थे। **11** तालू जकर्याह जो प्रभु दा स्वर्गदूत धुपे दिया बेदिया दे सजे पासे खडोतया दुसा। **12** कने जकर्याह उसयो दिखीकरी घबराई गया कने सै बड़ा भरी डरी गया। **13** पर स्वर्गदूते उसयो बोलया, “ओ जकर्याह डर मत क्योंकि परमेश्वरे तेरी प्रार्थना सुणी लिइयो है, तेरिया घरे बालिया एलीशिबा इक जागत जमणा है, कने तू उदा ना यूहन्ना रखयां। **14** कने तिजो खुशी होणी: कने मते लोकां उदे पैदा होणे दिया बजा ने खुश होणा। **15** क्योंकि उनी परमेश्वरे दे सामने बड़ा महान होणा; कने उनी कदी भी कोई ऐसी चीज नी खाणी पिणी जिसने कोई नशा होंदा है; कने उनी अपने पैदा होणे ला पेहले ही पबित्र आत्मा ने परिपूर्ण होई जाणा है। **16** कने उनी इस्राएलियां च मतयां लोकां जो उना दे प्रभु परमेश्वरे दे बाल बापस लोणा है। **17** यूहन्ना इक ऐसा माणु होणा है उनी परमेश्वरे दा संदेश देणेबाले एलिय्याह सांई आत्मा च शक्तिया ने भरपूर होणा है कने प्रभु दा रस्ता तैयार करणा

है। ताकि माता पिता दा मन बाल बचयां दे पासे फेरी दे, कने हुकम नी मनणे बालयां जो धर्मियां सांई जीणा सिखाणा; कने प्रभु तांई इक खरी प्रजा तैयार करे। 18 जकर्याह स्वर्गदूते ला पुछ्या, ऐ मै कियां यकीन करे की साडे ने ऐसा होणा? क्योंकि मै तां बुझा है, कने मेरी घरे बाली भी बुझी होई गियो है।” 19 स्वर्गदूते उसयो जबाब दिता, “मै जिब्राईल है, जड़ा परमेश्वरे दे सामने खडोई रेंदा है, कने मिंजो तेरे ने गल्लां करणा कने तिजो ऐ शुभसमाचार सुणाणें तांई भेजया है। 20 कने दिख जीस दिने दीकर ऐ बच्चा पैदा नी होंगा कने मेरियां बोलियां गल्लां सही बकत पर पुरियां नी होंगिया उसी रोजे दीकर तिजो ला बोली नी होंगा, क्योंकि जड़ियां गल्लां मै तिजो बोलियां न तू उना गल्लां दा भरोसा नी किता।” 21 लोक जकर्याह जो नियाला दे थे क्योंकि याजक मंदरे च धुप लगाणे बाद बाहर आई करी लोकां जो आशीर्वाद दिन्दा था, पर उसयो बड़ी देर होई गई थी अंदर, तां लोक बडे हेरान होऐ? 22 जालू सै मंदरे ला बाहर आया, तालू सै उना ने बोली नी सकया, तालू सै समजी गे, की इसयो मंदरे च कोई दर्शन होया है, कने सै उना ने इशारे च गल्लां करा दा था, सै गूंगा होई गिया। 23 जालू मंदरे च उदिया याजक सेवा दे दिन पूरे होई गे, तां सै यरूशलेम शेहरे ला अपने घरे जो चली गिया। 24 कुछ दिना बाद उदी घरे बाली एलीशिबा लेरथी होई; कने पंज महीने दीकर अपने आपे जो लोकां ला लुकाई रखया। 25 की प्रभुऐ मेरे तांई भला कम्म किता है, माणुआं च मेरिया बांजपन दिया बदनामिया जो दुर करणे तांई इना दिना च प्रभुऐ मेरे उपर कृपा करिके मिंजो तांई ऐसा किता है। 26 जालू एलीशिबा जो छेमा मिना लगया था तालू परमेश्वरे दिया तरफा ला जिब्राईल स्वर्गदूत गलील प्रदेश दे नासरत शेहरे च इक कुवारिया बाल गिया, 27 जिसा दी मंगणी राजा दाऊदे दे बंशे दे यूसुफ नाऐ दे इक मरदे ने होईयो थी; उसा कुवारिया दा ना मरियम था। 28 कने स्वर्गदूते अन्दर आई करी उसा जो बोलया, “खुशी कने तेरी जय हो, परमेश्वरे तिजो पर कृपा किती है! परमेश्वर तेरे सोगी है।” 29 सै इस बचने ला बड़ी घबराई गई, कने सोचणा लग्गी की इसा गल्ला दा क्या मतलब है? 30 स्वर्गदूते उसा जो बोलया, “हे मरियम, डर मत, क्योंकि तिजो पर परमेश्वरे दी कृपा होईयो है। 31 कने दीख, तू लेरथिया होणा है, कने तिजो इक जागत पैदा होणा है; कने तू उदा ना यीशु रखयां। 32 कने उनी बड़ा महान होणा; कने उसयो परमेश्वरे दा पुत्र बोलया जाणा; कने प्रभु परमेश्वरे उसयो उदे पूर्वज दाऊदे सांई राजा बणाना है। 33 कने

उनी इस्राएल दे लोकां पर हमेशा राज करणा; कने उदे राज्य दा कदी अंत नी होणा।” (aiōn g165) 34 मरियमा स्वर्गदूते जो बोलया, ऐ कियां होणा? मेरा तां अजे बियाह भी नी होया है। 35 स्वर्गदूते उसा जो जबाब दिता, पबित्र आत्मा तिजो पर उतरणा है, कने परमेश्वरे दिया शक्तिया तिजो पर छां करणी है, ताई तां तेरा जन्म लेणे बाला जागत पबित्र होणा है, सै परमेश्वरे दा पुत्र बोलया जाणा। 36 कने सुण तेरी रिशतेदार एलीशिबा दे भी बूडे बारे बच्चा होणेबाला है, ऐ इसा दा छेमा महिना है जिसा जो लोक बांज बोलदे थे। 37 क्योंकि परमेश्वर सब कुछ करी सकदा है। 38 मरियमा बोलया, “दीख, मैं प्रभु दी दासी है, जियां तू बोलया है सेई मेरे सोगी हो।” तालू स्वर्गदूत ओथु ला चली गया। 39 कुछ दिना बाद मरियम उठी करी यहूदिया प्रदेश दे इक पाहड़ी इलाके दे इकी गां जो गई। 40 कने जकर्याह दे घरे पुजिकरी एलीशिबा जो नमस्ते किते। 41 जियां ही एलीशिबा मरियमा दे नमस्ते सुणे, तियां ही बच्चा उसा दे पेटे च उछली पिया, कने इलीशिबा पबित्र आत्मा ने परिपूर्ण होई गई। 42 कने तिन्ना बड़े जोरे ने बोलया, “तू सारियां जनानिया चे बड़ी भरी धन्य है, कने जड़ा बच्चा तू जमणा है सै धन्य है। 43 कने मैं बड़ी सोभाग्यशाली है, की मेरे प्रभु दी माँ मिजो ने मिलणा आई है? 44 दिख जियां ही तेरे नमस्ते बोलणे दी अबाज मेरे कना च पेई तियां ही मेरे पेटे च बच्चा खुशिया ने उछली पिया। 45 कने तू धन्य है, क्योंकि तू भरोसा किता जड़ियां गल्ला प्रभुये दी तरफा ने बोलियां न, कने सै परमेश्वरे पुरियां करणियां न।” 46 तालू मरियमा बोलया, मैं परमेश्वरे दी स्तुति करदी है। 47 कने मैं अपने उद्धार करणे बाले परमेश्वरे ला बड़ी खुश है। 48 क्योंकि उनी मिजो अपणिया दासियाँ दिया दीनता पर नजर किती है; इस ताई दिखा, हुण सारे युगां-युगां दे लोकां मिजो धन्य बोलणा है। 49 क्योंकि उनी अपणिया शक्तिया ने मिजो ताई बड़े-बड़े कम्म कितयो न, कने उदा ना पबित्र है। 50 जड़े परमेश्वरे दा डर मंदे न, उना पर उदी दया पीढियाँ ला पीढियाँ दीकर बणी रेंदी है। 51 उनी अपणी महान शक्ति ने बड़े-बड़े कम्म किते न, कने जड़े बड़े घमंडी थे उना जो हराई दिता। 52 परमेश्वरे राजयां ला राज करणे दा हक लेई लेणा है; कने गरीबां जो उच्चा करदा है। 53 उनी भुखयाँ जो खरियाँ-खरियाँ चीजा ने रजाया, कने अमीरां जो खाली हथ कडी दिता। 54 परमेश्वरे साडे पूर्वजां ने कितयो बायदे जो याद किता कने अपने सेवक इस्राएल दे लोकां दी मदद करणा आया है। 55 उनी अब्राहम जो कने उदे सारे

बंशजा जो हमेशा ताई दया दसणे ताई याद कितया है! (aiōn g165) 56 मरियम पूरे
 तिन मिहने उसा सोगी रेईकरी घरे जो बापस गई। 57 तालू एलीशिबा दा बच्चा पैदा
 करणे दा बकत पूरा होया, कने उना इक पुत्र जमया। 58 उसा दे पड़ोसियां कने
 रिश्तेदारां ऐ गल्ल सुणीकरी की प्रभुये उसा पर बड़ी बड़ी दया किती है, कने सै
 उसा सोगी बड़े खुश होऐ। 59 कने जालू सै अठमे रोजे उदा खतना करणे ताई
 आये। तालू सै उदा ना उदे पिता दे नाऐ पर जकर्याह रखणा लगे, 60 तां उदिया
 माता एलीशिबा बोलया, “नी; इदा ना यूहन्ना रखा।” 61 उना उसा जो बोलया,
 “ऐ ना तां तेरिया रिश्तेदारिया च कुसी दा भी नी है।” 62 तालू उना उदे पिता जो
 इशारा करी के पूछया की तू इदा ना क्या रखणा चांदा है? 63 कने उनी लिखणे
 बाली पट्टी मंगाई करी लिख्या, इदा ना यूहन्ना है, कने सारे हेरान होऐ। 64 तालू
 ही उदी अबाज बापस आई गई; कने सै परमेश्वरे दा धन्यवाद करणा लग्गा। 65
 कने उदे अखे-बखे दे लोकां पर डर बेठी गया; कने उना सारियां गल्लां दी चर्चा
 यहूदिया प्रदेशे दे पाहड़ी इलाकयां च फेली गई। 66 कने सारयां सुणने बालयां
 लोकां अपने मने च बिचार करिके बोलया, ऐ बच्चा कदिया होंगा? “क्योंकि इदे
 सोगी प्रभु दी शक्ति है। 67 कने उदा पिता जकर्याह पबित्र आत्मा ने परिपूर्ण होई
 गया, कने भविष्यवाणी करणा लग्गा। 68 प्रभु, इस्राएल दे परमेश्वर दी स्तुति करा,
 क्योंकि सै अपने लोकां जो मिलणा आया है, कने अपने लोकां जो छुड़ाया है। 69
 जड़ा प्रभु दे सेवक, राजा दाऊद दा बंशज है उनी साडे ताई इक शक्तिशाली उद्धार
 करणे बाले जो भेजया है। 70 बड़े पेहले प्रभुये अपने पबित्र परमेश्वरे दा संदेश
 देणेबाले दे जरिये बोलया, जड़े संसार दे आदि ला होंदे आए न, मतलब की उनी
 सांझो साडे दुश्मणा ला कने उना सारियां शक्तियाँ ला बचाणा जड़े सान्झो ने
 नफरत करदे न। (aiōn g165) 72 उनी अपने पबित्र बायदे जो याद करिके साडे
 पूर्वजां पर दया करणी, 73 उनी साडे पूर्वज अब्राहम ने कसम खाई करी बायदा
 किता, 74 की उनी सांझो साडे दुश्मणा ला बचाणा, 75 ताकि असां उदे सामणे
 पबित्रता, धार्मिकता कने बिना कुसी डरे जिन्दगी भर उदी सेवा करी सकन। 76
 कने हे बच्चे, तिजो परम प्रधान परमेश्वरे दा संदेश देणेबाला बोलया जाणा है
 क्योंकि तू प्रभु दे अगे-अगे चलणा कने माणुआं जो तैयार करणा, 77 कने इनी
 अपने लोकां जो सिखाणा की पापा दी माफी दे जरिये छुटकारा पाई सकदे न। 78
 ऐ साडे परमेश्वरे दिया उसा दया ने होणा है; जियां सूरज सांझो रोशनी देणे ताई

चमकदा है, तियां ही मसीह भी साड़े बाल स्वर्गे ला ओणा है। 79 पाप च कने मौता दी छोआं च बोंणे बालयों जो रोशनी देणी है, इना रोशनिया सान्झो जिनंदगी च मार्गदर्शन करणा, जड़ा सांझो परमेश्वर सोगी शांति दिन्दा है।” 80 कने सै जागत यूहन्ना बडा होईकरी आत्मा च बलशाली होंदा गया, कने इस्राएल दे लोकां दे सामणे ओणे दीकर सै सुनसान जगा च रिया।

2 उना दिना च रोमी महाराजा औगुस्तस कैसरे सारे रोमी सम्राज्य दी जनगणना करणे दा हुकम दिता। 2 ऐ पैली जनगणना उस बेले होई, जालू क्विरिनियस सीरिया प्रदेश दा राज्यपाल था। 3 कने सारे लोक जनगणना च ना लिखाणे ताई अपने-अपणे शेहरे जो गे जिथू उना दे पूर्वज थे। 4 यूसुफ भी ताई तां गलील प्रदेश दे नासरत शेहरे ला यहूदिया प्रदेशे दे राजा दाऊद दे शहर बैतलहम शेहरे जो गया था, क्योंकि सै राजा दाऊद दा बंशज कने परिवारे दा था। 5 ताकि अपनी मगैतर मरियम जड़ी लेरथी थी, उसा सोगी जाई करी ना लिखाइ दे। 6 जालू सै बैतलहम शेहरे च थे तां उसा दे बच्चा जमणे दे दिन पुरे होई गे। 7 कने उना अपना जेठा पुतर जमया कने उसयो कपड़े च लपेटी करी खुरलिया च रखया; क्योंकि उना ताई सरां च जगा नी थी। 8 कने उस देशे च कुछ पुआल थे, जड़े मैदाना च रेईकरी अपने धंणे दा पैरा दिन्दे थे। 9 कने प्रभु दा इक स्वर्गदूत उना बखे आई खडोता; कने प्रभु दी चमक उना दे चारो पास्से चमकी, कने सै बडे डरी गे। 10 तालू स्वर्गदूते उना ने बोलया, “डरा मत; दिखा मै तुहांजो इक बड़ी खुशिया दा शुभसमाचार सुणांदा है; जड़ा सारे लोकां ताई होणा, 11 की अज राजा दाऊद दे शहर बैतलहम च तुहाडे ताई इक उद्धारकर्ता जमया है, सेई मसीह प्रभु है। 12 मै तुहाडे ताई उना दी ऐ पछेण दिन्दा की सै बच्चा कुण है, तुहांजो इक बच्चा फालडु च लपेटया कने खुरलिया च पिया मिलणा है।” 13 तालू उस स्वर्गदूते सोगी इक स्वर्गदूतां दी टोली परमेश्वरे दी स्तुति कने ऐ बोलदे होए प्रगट होई, 14 “स्वर्ग च परमेश्वरे दी महिमा कने धरतिया पर जिना लोकां ला सै खुश हे शांति हो।” 15 जालू स्वर्गदूत उना बखे ला स्वर्गे जो चली गे, तालू पुआलां अपु चे बोलया, “ओआ, असां बैतलहम शेहरे च जाई करी ऐ गल्ल जड़ी होइयो है, कने जड़ा प्रभुये सांझो ने दसया है, उसयो दिखन।” 16 कने उना झट पट जाई करी मरियम कने यूसुफ जो कने खुरलिया च उस बच्चे जो पिया दिखया। 17 इना जो दिखीकरी उना सै गल्लां जडियां उस बच्चे दे बारे च स्वर्गदूतां ने बोलिया थी, सै

सबना जो दसणा लग्गे। 18 कने सारे लोकां जालू ऐ गल्लां सुणियां जडियां गल्लां उना पुआलां बोलियां, तां सै बडे हेरान होऐ। 19 पर मरियम इना सारियां गल्लां जो मने च रखीकरी सोचदी रेई। 20 कने जियां उना स्वर्गदूतां पुआलां जो बोलया, तियां ही सारा सुणिकरी कने दिखीकरी परमेश्वरे दी महिमा कने स्तुति करदे बापस चली गे। 21 जालू यीशुऐ जो पैदा होयो अठ रोज पुरे होऐ, कने उदे खतने दा बकत आया, तां उदा ना यीशु रखया, जडा स्वर्गदूते उदे पेटे च ओणे ला पेहले बोलया था। 22 जालू मूसा दिया व्यवस्था दे अनुसार उना दे शुद्ध होणे दे दिन पुरे होऐ तां सै उसयो यरूशलेम शेहरे दे मंदरे च लेई गे, ताकि उसयो प्रभु दे सामणे लेई ओन। 23 जियां की मूसा दिया व्यवस्था च लिखया है: “हर जेठा पुतर प्रभु ताई पबित्र होणा।” 24 मूसा दिया व्यवस्था दे बचना दे अनुसार, “पंडुकों दा इक जोडा, या कबुतरां दे दो बच्चां दी बलि दिया।” 25 उस बकते यरूशलेम शेहरे च शमौन नाऐ दा इक माणु था। कने सै माणु बडा धर्मी कने भक्त था। कने बडिया बेसबरिया ने मसीह दे ओणे दी नियाल रखा था की सै आए कने इस्राएल दे लोकां जो तसल्ली दे, कने पबित्र आत्मा उस सोगी थी। 26 कने उसयो पबित्र आत्मा दसया था कि, तू प्रभु दे मसीह जो दिखणे ला पेहले मरणा नी है। 27 उस दिन उसयो आत्मा अगुवाई किती तां सै मंदरे च आया। कने जालू माता-पिता यीशुऐ जो अंदर लेई आये, ताकि उस ताई व्यवस्था दे रीती रिबाजां दे अनुसार करन, 28 तां उनी बच्चा यीशु जो गोदा च लिया कने परमेश्वरे दा धन्यवाद करिके बोलया, 29 प्रभु जी, हण तू मिजो अपने सेवके जो अपने बायदे दे अनुसार शांतिया ने मरणा दे; 30 क्योंकि मैं उस उद्धारकर्ता जो दिखी लिया है। 31 जिसयो तू सारे लोकां जो बचाणे ताई भेजया है। 32 ताकि सै होर जातियां जो परमेश्वरे दा रस्ता दसणे ताई लौ बणे, कने तेरे अपने लोक इस्राएल दी महिमा करन। 33 कने यीशुऐ दे माता पिता उना गल्लां जो जडियां शमौने उदे बारे च बोलियां, सै उना गल्लां ने बडे हेरान हूंदे थे। 34 तालू शमौने उना जो आशीष देईकरी, उदिया माता मरियम ने बोलया, दिख, सै तां इस्राएल च मतयां लोकां दे विनाश कने उद्धार ताई, इसयो परमेश्वरे दिया तरफा ला इक नशाण दे स्पे च भेजया है, जिदे खिलाफ च गल्लां कितियां जाणियां न। 35 इक भयंकर दुखे कने इक तलबारा साई विनी देणा इसला मतयां लोकां दे दिले दे बिचार सामणै होणे न। 36 कने आशेर दे गोत्र ला हन्नाह नाऐ दी फनुएल दी इक कुडी परमेश्वरे दा संदेश देणेबाली थी: कने सै बडी बुद्धी

थी, सै बियाह होणें ला सतां साला दीकर अपणे घरे बाले ने रेई सकी थी। 37 सै चोरासियाँ सालां दी बिधबा थी: कने सै मंदरे जो नी छडती थी पर दिन रात बरत कने प्राथना करी-करी भक्ति करदी थी। 38 सै उस बेले ओथु आई करी परमेश्वर दा धन्यवाद करणा लग्गी, कने उना सारयां ने, जडे यरूशलेम शेहरे दे लोकां जो छुडाणे ताई मसीह जो भेजणे ताई परमेश्वरे दी राह दिखदे थे, उदे बारे च गल्लां करणा लग्गी। 39 कने जालू यूसुफ कने मरियम प्रभु दीया व्यवस्था दे अनुसार सारा कुछ करी बेठे तां सै गलील प्रदेश च अपणे शेहर नासरत जो बापस चली गे। 40 बच्चा बडा कने जोरे बाला होंदा गया; कने अकला बाला होंदा गया; कने परमेश्वरे दा अनुग्रह उस पर था। 41 यीशुए दे माता पिता हर साल फसह दा त्योहार मनाणे ताई यरूशलेम शेहरे जो जांदे थे। 42 जालू सै बाहरां सालां दा होया, तालू सै त्योहारे दे रिबाजे ने अनुसार यरूशलेम शेहरे जो गे। 43 जालू यीशुए दे माता-पिता उना दिना जो पूरा करिके के बापस ओणा लग्गे, तां सै जागत ओथु यरूशलेम शेहरे च ही रेई पिया, कने उदे माता पिता जो इसा गल्ला दा पता नी था। 44 सै ऐ समझीकरी, की सै होर यात्रियां सोगी होंणा, कने इक दिन होई गया कने सै अपणे रिश्तेदार कने जान पछेणा बालयां च तोपणा लग्गे। 45 पर जालू नी मिल्ला, तां सै तोपदे-तोपदे यरूशलेम शेहरे जो बापस चली गे। 46 कने तिन्ना रोजां बाद उना उसयो यरूशलेम शेहरे दे मंदरे दे अंगणे च उपदेशकां दे बिच बैठया, कने उना जो सुणदे कने उना ला सबाल पुछदे दिखया। 47 कने जडे भी उसयो सुणा दे थे, सै उदिया समझा कने उदे जबाबा ला हेरान थे। 48 तालू यीशुए दे माता पिता उसयो दिखीकरी हेरान होऐ, कने उदिया माता उसयो बोलया, “पुत्र, तू सांझो ने इयोदिया व्यवहार कजो किता? दिख, तैरे पिता कने मैं, तिजो तोपा दे कने बेचेन थे।” 49 उनी उना ने बोलया, “तुसां मिंजो कजो तोपा दे थे? क्या तुहांजो पता नी था, की मिंजो अपणे पिता दे घरे होना जरूरी है?” 50 पर जड़ी गल्ल उनी उना ने बोली, उना सै गल्ल समझी नी। 51 तालू सै उना कने गया, कने नासरत नगर च आया, कने उना दे कुले च रिया; कने उदिया माता ऐ सारियां गल्लां मने च रखियाँ। 52 कने यीशु अकला कने डील-डौल च कने परमेश्वर कने माणुए दे अनुग्रह च अग्रे बददा गया।

3 रोमी महाराजा तिबिरियुस कैसर दे राज्य दे पद्रम साले च, जालू पुन्तियुस पिलातुस यहूदिया प्रदेश दा राज्यपाल था, कने गलील प्रदेश च राजा हेरोदेस राज

करा दा था कने इतुरैया कने त्रखोनितिस दे इलाके च उदा भाई फिलिप्पुस, कने अबिलेने प्रदेश च राजा लिसानियास राज्य करा दे थे। 2 कने जालू हन्ना कने कैफा बड़े याजक थे, उस बकते परमेश्वरे दा बचन सुनसान जगा च जकर्याह दे पुत्र यूहन्ना बाल पुज्जा। 3 कने यूहन्ना यरदन खड्डा दे अखे-बखे दे सारे देशां च जाई करी प्रचार करदा था, की अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया। 4 जियां यशायाह परमेश्वरे दा संदेश देणेबाले दे बचना दीया कताबां च लिखया है, “सुनसान जगा च इक पुकारणे बाले दी अबाज सुणुआ दी है की प्रभु दा रस्ता तैयार करा, कने उदियां सडकां सिदियां बणा।” 5 हर इक घाटी भरी दिती जाणी, कने हर इक पहाड़ कने टीला थले करी देणा; कने जड़ा ढेरा है सै सीधा, कने जड़ा उच्चा सै नीठा है सै पढ़रा रस्ता बणाना। 6 कने सारे लोकां उसयो दिखणा है जिसयो परमेश्वरे उना जो बचाणे तांई भेजया है। 7 जड़ी भीड़ा दी भीड़ उसला बपतिस्मा लेणे तांई निकली करी ओंदी थी, सै उना जो बोलदा था की, “तुसां लोक जहरीले सांपा सांई बुरे न, तुहाड़ा ऐ सोचणा गलत है की सिर्फ तुसां बपतिस्मा लेणे ने अपने पापां दी सजा ला बची जाणा जड़ी परमेश्वरे तुसां जो देणी है। 8 सजा ला बचने तांई ऐसे कम्म करा जिना ने पता चले की तुसां सच्ची ही पश्चाताप किता है; कने अपने-अपने मने च ऐ मत सोचा, परमेश्वरे सान्झो सजा नी देणी क्योंकि साड़ा पिता अब्राहम है; क्योंकि मैं तुसां ने बोलदा है की, परमेश्वर तुहाड़ी जगा लेणे तांई इना पथरां ला भी अब्राहम तांई ओलाद पैदा करी सकदा है। 9 कने हुण कुहाड़ी सूखां दिया जड़ा च रखियो है, हर इक माणु उस सूखे सांई है जड़ा खरा फल नी दिन्दा है, उसयो परमेश्वरे दोषी बोलणा है कने सै सूख बड्डी करी अग्गी च फूकी देणा।” 10 कने लोकां उसला पुछया, “तां असां परमेश्वरे दिया सजा ला बचणे तांई क्या करन?” 11 युहन्ना उना जो जबाब दिता, “जिसदे बाल दो कुरते न, सै उसयो बंडी दिया जिना बाल नी न, कने जिसदे बाल खाणां है, सै भी इयां करन।” 12 कने कर लेणेबाले भी बपतिस्मा लेणा आये, कने उसला पुछया, “गुरू जी, असां क्या करन?” 13 यूहन्ने उना जो बोलया, “जितणा तुहांजो अधिकारियां बोलया लेणे तांई, उसला जादा चुंगी मत लेदे।” 14 कने सिपाईयां भी उसला पुछया, असां क्या करन? उनी उना जो बोलया, कुसी ने लड़ाई मत करदे, कने कुसी पर झूठा दोष मत लांदे, कने अपणिया तनखाई पर खुश रेणा। 15 जालू सारयां लोकां मसीह

दे तोल्ली ओणे दी आस लगाईयो थी, कने सारे अपणे-अपणे मने च यूहन्ना दे बारे
 च सोचा दे थे, की सै ही मसीहा ता नी है। 16 तां यूहन्ने उना सारयों जो जबाब
 दिता, “मैं तां तुहांजो पाणिये ने बपतिस्मा दिन्दा है, पर सै ओणेवाला है, सै मिंजो
 ला भी शक्तिशाली है; मैं तां उस जोगा भी नी है की उदे जुतयां दे तस्मे भी खोली
 सके, उनी तुहांजो पबित्र आत्मा ने कने अग्गी ने बपतिस्मा देणा है। 17 उदा सूप, उदे हथे च है; कने उनी अपणा खेतर ढंगे ने साफ करणा; कने कणका जो अपणे
 खेतेरे च गिठेरगा, पर भुऐ जो अग्गी च फुकी देणा है, सै अग्ग कदी नी बुझदी
 है।” 18 सै बडियाँ सारियां शिक्षा देईकरी लोकां जो शुभसमाचार सुणांदा रिया।
 19 पर जालू यूहन्ना गलील प्रदेश दे इलाके दे राजा हेरोदेस जो उदे भाई फिलिप्पुस
 दिया घरे बाली हेरोदियास दे बारे च, कने उना दे सारे बुरे कम्मा दे बारे च जडे
 उनी कितयो थे, उना दी निंदा किती। 20 तां ही तां राजा हेरोदेसे सारयां ला बड़ी
 करी बुरा कम्म किता, की यूहन्ना जो जेला च पाई दिता। 21 जालू सारे लोकां
 बपतिस्मा लिया, कने यीशु भी बपतिस्मा लेईकरी प्राथना करा दा था, तां स्वर्ग
 खुली गया। 22 कने पबित्र आत्मा शरीर दे स्मे च कबुतर बणी करी उस पर उतरी,
 कने आकाशवाणी होई: तू मेरा प्यारा पुत्र है, तिजो ला मैं खुश है। 23 जालू यीशु
 अपु उपदेश करणा लग्गा तां सै लगबग तियां सालां दा था कने (जदिया समझया
 जांदा है) की यूसुफ दा पुत्र था; कने यूसुफ एली दा पुत्र, 24 कने एली मत्तात दा
 पुत्र, कने मत्तात लेवी दा पुत्र, कने लेवी मलकी दा पुत्र, कने मलाकी यन्ना दा, कने
 यन्ना यूसुफ दा पुत्र, 25 कने यूसुफ मत्तित्याह दा, कने मत्तित्याह आमोस दा पुत्र,
 कने आमोस नह्म दा, कने नह्म असल्याह दा पुत्र, कने असल्याह नोगह दा
 पुत्र, 26 कने नोगह मात दा पुत्र, कने मात मत्तित्याह दा पुत्र, कने मत्तित्याह
 शिमी दा, कने शिमी योसेख दा पुत्र, कने योसेस योदाह दा पुत्र, 27 कने योदाह
 यूहन्ना दा पुत्र, कने यूहन्ना रेसा दा पुत्र, कने रेसा जरूबाबेल दा, कने जरूबाबेल
 शालतियेल दा पुत्र, कने शालतियेल नेरी दा पुत्र, 28 कने नेरी मलकी दा पुत्र, कने
 मलकी अद्दी दा पुत्र, कने अद्दी कोसाम दा पुत्र, कने कोसाम इलमोदाम दा पुत्र, कने
 इलमोदाम एर दा पुत्र, 29 कने एर येशू दा पुत्र, कने येशू एलीएजेर दा पुत्र, कने
 एलीएजेर योरीम दा पुत्र, कने योरीम मत्तात दा पुत्र, कने मत्तात लेवी दा पुत्र, 30
 कने लेवी शमौन दा पुत्र, कने शमौन यहदा दा पुत्र, कने यहदा यूसुफ दा पुत्र, कने
 यूसुफ योनान दा, कने योनान एलयाकीम दा पुत्र, 31 कने एलयाकीम मलेआह दा

पुत्र, कने मलेआह मिन्नाह दा पुत्र, कने मिन्नाह मन्तता दा पुत्र, कने मन्तता नातान दा पुत्र, कने नातान दाऊद दा पुत्र, 32 कने दाऊद यिशै दा पुत्र, कने यिशै ओबेद दा पुत्र, कने ओबेद बोअज दा पुत्र, कने बोअज सलमोन दा पुत्र, कने सलमोन नहशोन दा पुत्र, 33 कने नहशोन अम्मीनादाब दा पुत्र, कने अम्मीनादाब अरनी दा पुत्र, कने अरनी हिस्त्रोन दा पुत्र, कने हिस्त्रोन पेरस दा पुत्र, कने पेरस यहदा दा पुत्र, 34 कने पेरस याकूब दा पुत्र, कने याकूब इसहाक दा पुत्र, कने इसहाक अब्राहम दा पुत्र, कने सै तेरह दा पुत्र, कने तेरह नाहोर दा पुत्र, 35 कने नाहोर सस्मा दा पुत्र, कने सस्मा रूऊ दा पुत्र, कने रूऊ फिलिग दा पुत्र, कने फिलिग एबिर दा पुत्र, कने एबिर शिलह दा पुत्र, 36 कने शिलह केनान दा पुत्र, कने केनान अरफक्षद दा पुत्र, कने अरफक्षद शेम दा पुत्र, कने सै नूह दा पुत्र, कने नूह लेमेक दा पुत्र, 37 कने लेमेक मथूशिलह दा पुत्र, कने मथूशिलह हनोक दा पुत्र, कने हनोक यिरिद दा पुत्र, कने यिरिद महललेल दा पुत्र, कने महललेल केनान दा पुत्र, 38 कने केनान एनोश दा पुत्र, कने एनोश शेत दा पुत्र, कने शेत आदम दा पुत्र, कने शेत परमेश्वरे दा पुत्र था।

4 फिरी यीशु पबित्र आत्मा ने परिपूर्ण होईकरी यरदन खड्डा ला बापस आया; कने आत्मा दी अगुवाई ने सुनसान जगा च रिया; 2 कने शैतान चालियां रोजां दीकर उदी परख करदा रिया। उना रोजां च उनी कुछ नी खादा कने जालू सै रोज पुरे होई गे, तालू उसयो भूख लग्गी। 3 कने शैताने उसयो बोलया, “अगर तू परमेश्वरे दा पुत्र है तां इसी पथरे जो बोल की, तू रोटी बणी जा।” 4 यीशुऐ उसयो जबाब दिता, “पबित्र शास्त्र च लिखया है: माणुऐ सिर्फ रोटियां ने ही जिंदे नी रेणा।” 5 तालू सै शैतान उसयो लेई गया कने पल भर च ही सारे संसारे दे राज्य उसयो दस्से। 6 कने उसयो बोलया, मैं ऐ सारे हक, कने सारा धन दौलत तिजो दिंगा, क्योंकि सै मिंजो दितया है: कने जिसयो दिल करदा उसयो देई दिन्दा है। 7 इस तांई अगर तू मिंजो नमस्ते करगा, तां ऐ सारा तेरा होई जाणा। 8 यीशुऐ उसयो जबाब दिता, “पबित्र शास्त्र च इयां लिखया है: तू अपने परमेश्वरे जो नमस्ते कर; कने उदी ही उपासना कर।” 9 तालू उनी उसयो यरूशलेम शहर च लेईजाई करी मंदरे दिया चुडिया पर खड़ेरया, कने उसयो बोलया, “अगर तू परमेश्वरे दा पुत्र है, तां अपने आपे जो ऐथू ला थले फेंकी दे। 10 क्योंकि पबित्र शास्त्र च लिखया हे, उनी तेरे तांई अपने स्वर्गदूतां जो हुकम देणा, की सै तिजो बचान। 11 कने उना तिजो हथो हथ सभांली लेणा पर इयां ना हो की तेरे पैरां च पथरे ने चोट लग्गी जा।” 12 यीशुऐ उसयो

जबाब दिता, पबित्र शास्त्र च ऐ भी लिखया है: तू अपणे प्रभु परमेश्वरे दी परख मत करदा। 13 जालू शैतान सारियां परखां करी बैठा, तालू सै थोड़ी देरां ताई उदे बखे ला चली गया। 14 फिरी यीशु आत्मा दिया शक्तिया ने परिपूर्ण होईकरी गलील प्रदेश जो बापिस गया, कने उदी चर्चा अखे-बखे दे देशां च फेली गई। 15 कने सै उना ही यहूदी जंज घरां च उपदेश करदा रिया, कने सारे उदी बड़ाई करदे थे। 16 कने सै नासरत च बापस आया; जिथू पलया बडोयो था; कने अपणे रिबाजे दे अनुसार सन्त दे रोजे पबित्र शास्त्र पढने ताई यहूदी जंज घर च जाई करी खडोई गया। 17 परमेश्वरे दा संदेश देणेबाले यशायाह दी कताब पढने जो उसयो दिती। कने उनी कताब खोलिकरी सै जगा कडी जिथू ऐ लिखया था: 18 “प्रभु दी आत्मा मिंजो सोगी है, इस ताई उनी कंगालां जो शुभसमाचार सुनाणे ताई मेरा अभिषेक कितया है, कने मिंजो इस ताई भेजया है, की केदियां जो छुटकारे दा कने अन्नयां जो नजर मिलणे दा शुभसमाचार दा प्रचार करे कने कुचले होया जो छुडां। 19 कने प्रभु दे खुश रेणें दे साले दा प्रचार करे।” 20 तालू उनी कताब बंद करी के सेवके दे हथे च देई दिती, कने बैठी गया: कने यहूदी जंज घर दे सारे लोकां दियां नजरां उस पर थियां। 21 तालू सै उना ने बोलणा लग्गा, “अज ही तुहाड़े सुणने ने ऐ लेख पूरा होया है।” 22 कने सारयां लोकां उदी प्रशंशा किती, जडियां अनुग्रह दियां गल्लां उदे मुऐ ला निकलदियां थियां, उना ला हेरान होए; कने बोलणा लग्गे, “क्या ऐ यूसुफे दा पुत्र नी है?” 23 उनी उना जो बोलया, “तुसां मिंजो पर ऐ कहावत जस्स बोलणी है, की हे बैघ, अपणे आपे जो खरा कर। जड़ा कुछ असां सुणाया है की तू कफरनहम शेहरे च कितया है, उसयो अपणे देशे च भी कर।” 24 कने उनी बोलया, “मैं तुहांजो ने सच्च बोलदा है, कुसी भी परमेश्वरे दा संदेश देणेबालयां जो अपणे देशे च इज्जत नी मिलदी। 25 मेरी गल्ल सुणा। की परमेश्वरे दा संदेश देणेबाले एलियाह दे दिना च जालू साडे तिन्ना सालां दीकर कोई बरखा नी होई, ऐथू दीकर की सारे इस्राएल देशे च बड़ा भरी अकाल पिया, तां इस्राएल देशे च मतियां बिधवा थियां। 26 पर एलियाह जो इस्राएल च उना चे कुसी बाल भी नी भेजया गया, सिर्फ सिदोन शेहर दे बखे साफरत दे इलाके च इक होर जाति दी बिधवा बाल भेजया। 27 कने परमेश्वरे दा संदेश देणेबाले एलीशा दे बक्ते इस्राएल देशे च बतरे कोठी थे, पर सीरिया दा वासी नामान जो छडी करी उना चे कोई भी ठीक नी किता, नामान होर जाति दा था।” 28 ऐ सारियां गल्लां सुणिकरी

जितणे भी यहदी जंज घर च थे, सारे गुस्से होईं गे। 29 कने उना उठी करी उसयो शेहरे ला बाहर कडया, कने जिस पाहडे पर उना दा शेहर बसया था, उसयो उदिया चुडिया पर लेईं चले, ताकि उसयो ओथु ला थले फेंकी करी मारी देन। 30 पर सै उना दे बिचे ला निकली करी चली गया। 31 फिरी यीशु गलील प्रदेश दे कफरनहम शेहर च गया, कने सब्त दे रोजे लोकां जो उपदेश दिन्दा था। 32 सै उदे उपदेशे ने हेरान होईं गे क्योंकि यीशु बचन अधिकारे ने बोलदा था। 33 तालू ही यहदी जंज घर च इक माणु था, जिदे बिच इक बुरी आत्मा थी। 34 उनी जोरे ने बोलया, “हे नासरत दे यीशु, तु सांझो कजो परेशान करदा है? तू क्या सांझो खत्म करणा आया है? मिजो पता है की, तू कुण है? तु ही परमेश्वर दा पबित्र पुत्र मसिहा है, जडा परमेश्वरे ला आया है।” 35 यीशुए बुरिया आत्मा जो झिडकया कने बोलया, चुप रे; कने इस माणुए ला निकली जा, तालू सै बुरी आत्मा उसयो बिच पटकी करी बिना नुकसान कितयो उस बन्दे ला निकली गई। 36 इस पर सबना जो हेरानी होईं, कने सै अपु चे गल्लां करी के बोलणा लग्गे, “ऐ कदिया बचन है? की सै हक कने सामर्थ्य ने बुरियां आत्मा जो हुकम दिन्दा है, कने बुरी आत्मा इसदियां गल्लां जो मंदियां भी ना।” 37 इदे बाद यीशुए दी चर्चा सारे पासे होणा लग्गी पेई। 38 सै यहदी जंज घर ला उठी करी शमौने दे घरे जो गया कने शमौने दिया ससु जो बुखार चडया था, कने उना उसा तांई यीशुए ने बिनती किती। 39 उनी उसा बखे खडे होईं करी बुखारे जो डांटया कने बुखार उतरी गया कने सै झट पट उठी करी उदी सेवा करणा लग्गी पेई। 40 सूरजे डुबणे दे बेले जिना -जिना लोकां जो लग-लग तरा दियां बमारियां थियां उना सारयां लोका जो यीशुए बाल लेईं आये, कने उनी इकी-इकी पर हथ रखी करी सारयां जो ठीक किता। 41 कने बुरियां आत्मा चिखदियां कने बोलदियां होइयां मतयां लोकां ला निकली गयां की, “तू परमेश्वरे दा पुत्र है” पर सै उना जो डांटदा था, कने बोलणा नी दिन्दा था, क्योंकि उना जो पता था की ऐ मसीह है। 42 जालू दिन होया तां सै निकली करी इक सुनसान जगा पर चली गया, कने भिडा दी भीड़ उसयो तोपदे उस बाल आई, कने उसयो रोकणा लग्गी, की ऐथू ला ना जा। 43 पर यीशुए उना ने बोलया, “मिजो होर-होर शेहरां च भी परमेश्वरे दे राज्य दा शुभसमाचार सुणाणा जरूरी है, क्योंकि मै इसी तांई संसारे च भेजया है।” 44 कने सै गलील प्रदेश दे यहदी जंज घर च प्रचार करदा रिया।

5 इक दिन जालू यीशु गलील दे झिला दे कंडे पर खडोतया था, तां भीड़ परमेश्वरे दा बचन सुणने ताई उस पर डेई पोआ दी थी। **2** की उनी झिला दे बखे दो किस्तिया लगियां दिखियां, कने मछबारे उना ला उतरी करी मच्छियां पकड़णे बाले जाले जो धोआ दे थे। **3** उना किस्तिया चे इकी पर, जड़ी शमौने दी थी, चढी करी यीशुए उसला बिनती किती की, किनारे ला थोड़ी हटाई ले, तालू सै किस्तिया पर बेईकरी लोकां जो उपदेश देणा लगा। **4** जालू यीशु लोकां ने गल्लां करी बैठा, तां उनी शमौने जो बोलया, “डुगे पाणिऐ च लेई चल, कने मच्छियां पकड़ने ताई अपने जाले जो फेंक।” **5** शमौने उसयो जबाब दिता, “हे मालिक, असां सारी रात मेहनत किती कने कुछ नी पकड़या; पर तेरे बोलने ने असां जाल फेंका दे न।” **6** जालू पतरस कने उदे साथियां जाल पाया, तां मतियां भरी मछियां जाले च फसी गियां, कने उना दे जाल फटना लग्गी पिया थे। **7** इस पर उना अपने साथियां जो इशारा किता जडे दुईयां किस्तिया पर थे, ताकि आई करी साडी मदद करा: कने उना आई करी, दोनो किस्तिया मच्छियां ने इतणियां भरी लियां की सै डूबणा लग्गी पियां थियां। **8** ऐ दिखीकरी शमौन पतरस यीशुए दे पैरां च पेई गिया, कने बोलया, “प्रभु जी, मेरे बखे ला चली जा, क्योंकि मैं पापी माणु हूँ।” **9** क्योंकि इतणियां मछियां पकड़णे ने उसयो कने उदे साथियां जो बड़ी हेरानी होई; **10** कने तियां ही उदे साथी जब्दी दे पुत्र याकूब कने यूहन्ना भी बड़े हेरान होऐ। तालू यीशुए शमौने ने बोलया, “डरा मत, हुण ला तुसां माणुआं जो मेरे चले बणना सिखाणा है।” **11** कने सै किस्तिया जो किनारे पर लेई आए, कने सब कुछ छडी करी उदे पिच्छे चली पे। **12** जालू यीशु कुसी शेहरे च था, तां दिखा, ओथु इक माणु था, जिसयो कोढ होया था कने सै यीशुए जो दिखीकरी मुऐ दे भार पेई गिया, कने बिनती करणा लगा कि, “प्रभु जी अगर तू चा तां मिंजो ठीक करी सकदा है।” **13** यीशुए हथ अग्रे करी के उसयो छुता कने बोलया, “मैं चांदा हूँ की तू ठीक होई जा” कने तालू ही उदा कोढ ठीक होई गिया। **14** तालू उनी उसयो समझाया, “कुसी ने कुछ मत बोलदा, पर जाई करी अपने आपे जो याजकां जो दस, की तू खरा होईया कने परमेश्वरे जो भेंट चढा जिदे बारे च मूसा हुकम दितया है, ताकि लोक जाणी सकन की तू खरा होई गिया।” **15** पर यीशु दे बारे च खबर होर भी जादा फेलदी गेई, कने भिडा दी भिड उसयो सुणने ताई कने अपणियां बिमारियाँ ला ठीक होणे ताई गिठी होई। **16** पर यीशु मसीह हमेशा सुनसान जगा च जाई करी किल्ला प्राथना

करदा था। 17 कने इक रोज ऐसा होया की सै उपदेश दे दा था, कने फरीसी कने व्यवस्था जो सिखाणे बाले ओथु बैठयो थे, जडे गलील प्रदेश कने यहूदिया प्रदेशे दे इलाके दे हर इक गां ला कने यरूशलेम शहरे ला आयो थे; कने ठीक करणे ताई प्रभु दी शक्ति उस सोगी थी। 18 कने दिखा लोक इक माणुऐ जो मंझे पर चुकी लेई आए, कने सै धरंगे दा मरीज था, कने सै उसयो अंदर लेई जाणे कने यीशुऐ दे सामणे रखणे दी तरकीब तोपा दे थे। 19 कने जालू भिडा दिया बजा ने अंदर नी लेईजाई सके तां उना छती पर चडी करी कने खपैरैलां जो हटाई करी, उना उसयो मंझे समेत कमरे बिच यीशु दे सामणे उतारी दिता। 20 उनी उना दा भरोसा दिखीकरी बोलया, “हे माणु, तेरे पाप माफ होऐ।” 21 तालू व्यवस्था जो सिखाणे बाले कने फरीसी गल्लां करणा लग्गे, “ऐ कुण है, जडा परमेश्वरे दी निंदा करा दा है? परमेश्वरे जो छडी करी होर कुण पापां जो माफ करी सकदा है?” 22 यीशुऐ उना दे मने दियां गल्लां जो जाणी करी बोलया, “की तुसां अपने मने च क्या गल्लां करा दे न? 23 क्या बोलणा असान है? क्या इयां बोलणा, की तेरे पाप माफ होये, या की इयां बोलणा की उठ कने हंड फिर? 24 पर ऐ इस ताई की तुहांजो पता लग्गे की मिजो, माणुऐ दे पुत्रे जो धरतिया पर पाप माफ करणे दा हक भी है।” उनी उस धरंगे दे मरिजे जो बोलया, “मैं तिजो ने बोलदा है, उठ कने अपने मंझे जो चुकी करी अपने घरे चली जा।” 25 सै झट पट उदे सामणे उठया, कने जिस पर सै लेटया था उसयो चुकी करी, परमेश्वरे दी बड़ाई करदा होया अपने घरे जो चली गया। 26 तालू सारे हेरान होऐ कने परमेश्वरे दी बड़ाई करणा लग्गे, सारे डरीकरी बोलणा लग्गे, “अज असां बड़ियाँ अनोखियां गल्लां दिखियां।” 27 कने उदे बाद यीशु बाहर गया, कने उनी लेवी नाऐ दे इक कर लेणेबाले जो चुंगिया दिया चोकिया पर बैठया दिखया, कने उसयो बोलया, “की मेरा चेला बण।” 28 तालू सै सब कुछ छडी करी उठया कने उदे पिच्छे चली पिया। 29 कने लेवी अपने घरे यीशुऐ ताई इक बडी बडी धाम दिती; कने चुंगी लेणेबाले कने होर मते भरी लोकां उदे सोगी खाणां खादा था। 30 कने फरीसी कने मूसा दी व्यवस्था जो सिखाणे बाले उदे चेलयां जो ऐ बोली करी गल्लां करणा लग्गे, “की तुसां चुंगी लेणेबाले कने पापियाँ सोगी कजो खांदे पिदे न?” 31 यीशुऐ उना जो जबाब दिता, वैघ भले चंगे लोका ताई नी होंदा, पर सै बिमारां ताई जरूरी होंदा है। 32 मैं धर्मियों जो नी, पर पापियों जो मन बदलने ताई सटणा आया है। 33 फरीसी कने मूसा दिया व्यवस्था

जो सिखाणे बालयां यीशुए जो बोलया, “यहन्ना दे चले तां बराबर बरत रखदे कने प्राथना करदे न, कने तियां ही फरीसियाँ दे भी करदे न, पर तेरे चले तां खांदे पिंदे न।” 34 यीशुए उना जो बोलया, “क्या तुसां बरातियां ला बरत करवाई सकदे न जालू दीकर लाडा उना सोगी होऐ? 35 पर सै दिन ओणे न, जिना च लाडा उना ला बख कितया जाणा है, तालू बरातियां उना रोजां च बरत रखणे न।” 36 यीशुए उना ने इक होर कहाणी बोली: कोई भी माणु नोऐ कपडयां जो फाड़िकरी पराणे कपडयां च रफु नी लांदा है, अगर कोई इयां करदा है तां नोआ कपडा धोणे बाद छोटा होई जांदा है, जिसने पराणे कपडे होर फटी जाणा कने सै पराणा कपडा उस सोगी मेल नी खाणा। 37 नोऐ अंगूर दे रसे जो पराणिया खलडिया च कोई नी रखदा है नी तां नोआ अंगूर रस पराणिया खलडिया जो फाड़ी करी निकली जांदा है, कने अंगूर रस खलडिया जो बरबाद करी दिन्दा है, 38 ताई तां नोआ अंगूर रस नोईयां खलडिया च ही रखणा चाईदा। 39 कोई माणु पराणा अंगूर रस पी करी नौआ नी पिणा चांदा क्योंकि सै बोलदा है, की पराणा ही खरा है।

6 फिरी सै सब्ते दे रोजे खेतारां चे होईकरी चलया था, कने उदे चले बेलां तोड़ी-तोड़ी करी कने हथा ने मल्ली-मल्ली करी खांदे जा दे थे। 2 तालू फरीसियाँ चे कोई बोलणा लग्गे, “तुसां सै कम्म कजो करदे न जडा सब्ते दे रोज करणा ठीक नी है?” 3 यीशुए उना जो जबाब दिता, की तुसां ऐ नी पढया, कि राजा दाऊदे जालू सै कने उदे साथी भूखे थे तां उना क्या किता? 4 दाऊद कियां परमेश्वरे दे घरे गिया, कने भेंट चढाईयां रोटियां लेईकरी खादियां कने अपने साथियां जो भी दितियां, जिना जो सिर्फ याजक लोक ही खाई सकदे थे? 5 कने यीशुए उना ने बोलया, “मैं माणुए दा पुत्र ऐ बोलणे दा हक रखदा है कि लोकां जो सब्ते बाले रोजे क्या करणा चाईदा कने क्या नी करणा चाईदा।” 6 कने इक दिन इयां होया की सै कुसी होर सब्ते दे रोजे यहदी जंज घर च जाई करी उपदेश देणा लग्गा; कने ओथु इक माणु था, जिदा सज्जा हथ सुक्या था। 7 व्यवस्था जो सिखाणे बालयां कने फरीसी उस पर दोष लगाणे दे मोके दीया ताका पर थे, की दिखदे न की सै सब्त दे रोजे ठीक करदा है की नी। 8 पर सै उना दे बिचार जाणदा था; ताई तां उनी सुक्यो हथे बाले माणुए जो बोलया, “उठ, खडोई जा।” सै उठी होया। 9 यीशुए उना जो बोलया, “मैं तुसां ला ऐ पुछदा है की सब्त दे रोजे क्या ठीक है, भला करणा या बुरा करणा; जान बचना या मारणा?” 10 तालू यीशुए उना लोकां पासे दिखया।

कने उस माणुऐ जो बोलया, “अपणा हथ कर रुआं।” उनी किता, कने उदा हथ खरा होई गया। 11 पर ऐ दिखीकरी फरीसी कने मूसा दी व्यवस्था जो सिखाणे बाले बडे गुस्सा होई गे कने अपु चे बोलणा लग्गे की असां यीशुऐ दा क्या करन? 12 उदे बाद यीशु धारा पर प्राथना करणे तांई गया, कने परमेश्वरे ने प्राथना करणे च सारी रात बिताई। 13 जालू दिन होया, तां उनी अपने चेलयां जो सदीकरी उना चे बाहरा चुणी ले, कने उना जो प्रेरित बोलया। 14 कने सै ऐ नः शमौन जिदा ना उनी पतरस भी रखया; कने उदा भाई अन्द्रियास, कने याकूब, कने यूहन्ना, कने फिलिप्पुस, कने बरतुलमै, 15 कने मत्ती, कने थोमा, कने हलफई दा पुत्र याकूब, कने शमौन जिसयो जेलोतेस बोलदे न, 16 कने याकूब दा पुत्र यहूदा, कने यहूदा इस्करियोती, जडा उसयो पकड़वाणे बाला बणया। 17 तालू सै उना सोगी उतरिकरी चौरस दिया जगा पर खडोता, कने उदे चेलयां दी मती भीड़ कने सारे यहूदिया प्रदेश, कने यरूशलेम शहर, कने सूर कने सैदा शहरां दे कने समुद्रे दे बखे ला बतैरे लोक, 18 जडे उदी सुणना कने अपणियां बमारियां ला ठीक होणे तांई उस बाल आयो थे, ओथु थे। कने बुरियां आत्मा दे सताये होऐ लोक भी ठीक होंदे थे। 19 कने सारे उसयो छूणा चांदे थे, क्योंकि उसला शक्ति निकलदी थी जड़ी सबना जो ठीक करदी थी। 20 तालू उनी अपने चेलयां पासे दिखीकरी बोलया, “धन्य न तुसां, जडे दीन न, क्योंकि परमेश्वरे दा राज्य तुहाडा है।” 21 “धन्य न तुसां, जडे की हुण भूखे न; क्योंकि तुसां रजाऐ जाणे न। धन्य न तुसां, जडे की हुण रोदे न, क्योंकि तुसां हसणा है।” 22 “धन्य न तुसां, जालू माणुऐ दे पुत्रे दिया बजा ने लोकां तुहांजो ने दुशमणी रखणी है, कने तुसां जो कडी देणा, कने तुहाडी निंदा करणी, कने तुहाडा ना बुरा समझीकरी तुहांजो बडी देणा है।” 23 “उस रोजे खुश होनयो, क्योंकि तुहाडे तांई स्वर्गे च बडा इनाम है। उना दे बाप-दादे भी परमेश्वरे दा संदेश देणेबालयां सोगी इयां ही करदे थे।” 24 “पर तुहाडे तांई बडी बुरी सजा होणी जडे बडे अमीर न, क्योंकि तुहांजो पेहले ही अपनी खुशी मिली गियो है।” 25 “तुहाडे तांई बडी बुरी सजा होणी जडे हुण रजी करी खांदे न, क्योंकि उना भूखे रेणा है। तुहाडे तांई बडी बुरी सजा होणी; जडे हुण हसदे न, क्योंकि बादे च शोक करणा कने रोणा है।” 26 “तुहाडे तांई बडी बुरी सजा होणी, जालू सारे माणु तुहांजो खरा बोलगे, क्योंकि तुहाडे पूर्वजां उना लोकां दे बारे च खरियाँ गल्लां बोलियां जडे परमेश्वरे दे संदेश देणेबाले झूठे लोक थे। इसला पता

चलदा की तुसां भी परमेश्वरे दे संदेश देणेबाले झूठे लोक न।” 27 पर तुसां सुणने बालयां जो मैं बोलदा है, की अपने दुश्मना ने प्यार रखा; जड़े तुहांजो ने बैर करन, उना दा भला करा। 28 जड़े तुहांजो श्राप देन, उना जो आशीष दिया; जड़े तुहाड़ी बेजती करन, उना ताई प्राथना करा। 29 जड़ा तेरिया इकी खाडिया पर थपड़ मारगा तां तू दूजी भी उस पासे करी दे, कने जड़ा तेरी चादर खोई ले, उसयो अपना कुरता देणे ला भी मत रोक। 30 जड़ा कोई तिजो ला मंगे, उसयो देई दे; कने जड़ा तेरी चिज खोई ले, उसला मंगदा मत। 31 कने जियां तुसां चांदे न की लोक तुहांजो ने करन, तुसां भी उना ने तदिया ही करा। 32 अगर तुसां अपने ने प्यार रखणेबाले ने प्यार रखन, तां तुहाड़ी क्या बडाई? क्योंकि पापी भी तां अपने ने प्यार रखणे बालयां सोगी प्यार रखदे न। 33 कने अगर तुसां अपने ने भलाई करणे बाले ने ही भलाई करदे न, तां तुहाड़ी कोई कजो बडाई करे? क्योंकि पापी भी तां इयां ही करदे न। 34 कने अगर तुसां उसयो ही उधार दिन्दे न, जिसला बापस मिलणे दी आस रखदे न, तां तुहाड़ी कोई कजो बडाई करे? क्योंकि पापी भी पापियां जो उधार दिन्दे न, ताकि उतणा ही बापस मिल्ले। 35 अपने दुश्मना ने प्यार रखा, कने भलाई करा, कने फिरी बापस नी मिलणे दी इच्छा नी रखीकरी उधार दिया; कने तुहाडे ताई बडा इनाम होणा है; कने तुसां परम प्रधान परमेश्वर दे सन्तान बणना, क्योंकि सै उना पर जड़े परमेश्वरे दा धन्यवाद नी करदे न कने बुरे लोकां पर भी दया करदे न। 36 जियां तुहाडा पिता दयावान है, तियां ही तुसां भी दयावान बणा। 37 “कुसी पर दोष मत लगा; तां तुहांजो पर भी परमेश्वरे दोष नी लगाणा: कुसी जो सजा नी देणी, तुसां भी दुजयां जो माफ करगे तां तुहांजो भी परमेश्वरे माफ करणा।” 38 दिया करा, तां तुहांजो भी मिलणा। लोकां पूरा नाप दबाई-दबाई करी कने हिलाई-हिलाई करी कने उभरदा होया तुहाडिया गोदा च पांणा, क्योंकि जिस नापे ने तुसां नापदे न, उसी नापे ने तुहाडे ताई भी नापया जाणा। 39 फिरी यीशुए उना ने न इक होर कहाणी बोली: क्या कोई अन्ना माणु, कुसी अन्ने जो रस्ता दसी सकदा है? क्या इना दोना खड्डे च नी पोंणा? 40 चेला अपने गुर्रे ला बडा नी होंदा, पर जड़ा कोई पूरा शिक्षित होंगा, सै ही अपने गुर्रे सांई होणा। 41 तू कजो अपने भाईए दियां छोटियां-छोटियां गलतियां जो दिखदा है, जडियां उदिया हखी च पिये छोटे दे कखे सांई न, कने तिजो अपणियां बडियां-बडियां गलतियां नी मिलदियाँ, जडियां तेरियां हखी च इक लठे सांई न। 42 जद की तिजो अपनी ही

हखी दा लठा नी मिलदा है, तां अपने भाईये जो कियों बोली सकदा है, भाई स्क मैं तेरी हखी दे तिनके जो कडी दिन्दा है? हे कपटी मने दे लोको पेहले तां अपणी हखी दे लठे जो कडा, तां जडा तिनका तेरे भाईए दी हखी च है, उसयो ढंगे ने दिखीकरी कडी सकदे न। 43 कोई ऐसा खरा रख नी है, जडा बेकार फल दे, कने ना ही तां कोई बेकार रख है, जडा खरा फल दे। 44 हर कोई रख अपने फले ने पछयेणा जांदा है; क्योंकि लोक झिल्लां चे अंजीर नी तोडदे न, कने ना बेरी दे झीले ला अंगूर तोडदे न। 45 भला माणु अपने मने दे भले भंडारे ला खरियाँ गल्लां कडदा है; कने बुरा माणु अपने मने दे बुरे भंडारे ला बुरियाँ गल्लां ही कडदा है; क्योंकि जडा मने च भस्या होंदा हे सेई मुए च ओदा है। 46 जालू तुसां मेरा बोलया नी मंदे, तां कजो मिंजो प्रभु-प्रभु बोलदे न? 47 जडा कोई मेरे बाल ओदा है, कने मेरियां गल्लां सुणीकरी उना जो मनदा है, मैं तुहांजो दसदा है की सै कुसदे सांई है? 48 सै उस माणुए सांई है, जिनी घर बणादे बेले दुगी जमीन खणीकरी पथरां दी नियां बणाईयां न, कने जालू बाढ आई तां पांणी उस घरे ने लग्गा, पर उसयो हिलाई नी सकया, क्योंकि सै पक्का बणया था। 49 “पर जडे सुणीकरी नी मंदे न, सै उस माणुए सांई न, जिनी मिटीया पर बिना नियां दा घर बणाया है, जालू उस पर पांणी लगया, तालू सै झट ढेई गया, कने सै ढेईकरी टूटी भजी गया।”

7 जालू सै लोकां जो अपणिया सारियां गल्लां सुणाई बैठा, तां कफरनहम शहर च आया। 2 कने ओथु कुसकी सूबेदारे दा इक सेवक जडा उदा बडा खास सेवक था, सै बमारिया ने मरणे बाला था। 3 उनी यीशु मसीह दे बारे च सुणया कने सुणिंकी केई बड़े यहदी अगुवां जो उसला ऐ बिनती करणे तांई उदे बाल भेजया, की आई करी मेरे दासे जो ठीक करी दे। 4 सै यीशु बाल आये कने उसला बडी बिनती करी के बोलणा लग्गे, “ऐ सेनापति इस काबील है की, तू उस तांई ऐ कम्म करे, 5 क्योंकि सै साडिया जातियां ने प्यार रखदा है, कने उनी ही साडे यहदी जंज घर जो बणाया है।” 6 यीशु उना सोगी-सोगी चलया, पर जालू सै घरे ला थोड़ी दूर था, तां सूबेदारे उसयो अपने केई साथियां बाल बोली भेजया, प्रभु जी, इतणा कष्ट मत कर, क्योंकि मैं इस लायक नी है की, तू मेरे घर आये। 7 इसा बजा ला मैं अपने आपे जो इसी लायक नी समझया की, तेरे बाल ओए, पर तू बचन ही बोली दे तां ही मेरा सेवके ठीक होई जाणा। 8 मैं भी अधिकारियां दे थल्ले कम्म करणे बाला माणु है, कने मेरे अधीन सपाई कम्म करदे न, कने जालू इकी सपाईऐ जो

बोलदा है कि, तू जा, तां सै चली जांदा है; कने दुऐ जो बोलदा है कि, तू ऐथू आ, तां सै आई जांदा है; कने जालू मैं अपने नोकरे जो बोलदा, कि ऐ कर, तां सै करी दिन्दा है। 9 ऐ सुणिकरी यीशु हेरान होया, कने उनी मु फेरिकरी उसा भिडा ने जड़ी उदे पिच्छे ओआ दी थी बोलया, “मैं तुहांजो ने बोलदा है, कि मैं इम्राएल च भी ऐदिया भरोसा नी दिखया।” 10 कने जड़े साथी भेजयो थे सै घरे बापस आये, कने उस सेवके जो दिखया तालू सै ठीक होई गया था। 11 थोड़े रोजां बाद सै नाईन नाऐ दे इक शहरे जो गया, कने उदे चेले कने बड़ी भरी भीड़ उदे सोगी चलियो थी। 12 जालू सै शहरे दे फाटके बखे पुज्जा, तां ओथु लोक इकी मुर्दे जो बाहर लेई चलयो थे कने सै अपणिया माऊ दा इकलोता पुत्र था, कने सै बिधवा थी, कने शहरे दे मते लोक उसा सोगी थे। 13 उसा जो दिखीकरी प्रभु जो उसा पर बडा तरस आया, कने यीशुऐ उसा जो बोलया की, “रो मत।” 14 तालू यीशुऐ जाई करी अर्थिया जो छुता; कने जड़े अर्थिया लेईकरी चलयो थे सै स्की गे, तालू यीशुऐ बोलया, “हे जवान, मैं तिजो बोलदा है, की उठ जा!” 15 तालू सै मुर्दा जिंदा होई गया, कने बोलणा लगी पिया: कने उनी उसयो उदिया माऊ जो देई दिता। 16 ऐ सब कुछ दिखीकरी सै सारे डरी गे; कने सै परमेश्वरे दी बडाई करी के बोलणा लग्गे, “साडे बिच इक परमेश्वरे दा संदेश देणेबाला बडा महान माणु आया है, कने परमेश्वर अपने लोकां दी मदद करणे तांई आया है।” 17 कने उदे बारे च ऐ गल्ल सारे यहूदिया प्रदेशे दे इलाके कने अखे-बखे दे देशे च फेली गई। 18 कने यूहन्ना जो उदे चेलयां इना सारियां गल्लां दी खबर दिती। 19 तालू यूहन्ने अपने चेलयां चे दो चेलयां जो सदीकरी प्रभु बाल ऐ पुछणे तांई भेजया, “की क्या तू ही मसीह है, जिसयो भेजणे दा बायदा परमेश्वरे कितया था या असां कुसी दुजे दी नियाल रखन?” 20 उना यीशुऐ बाल जाई करी बोलया की, “यूहन्ना बपतिस्मा देणेबाले सांझो तरे बाल ऐ पूछणे तांई भेजया है, की क्या तू ही मसीह है, जिसयो भेजणे दा बायदा परमेश्वर ने कितया था या असां कुसी दुजे दी नियाल रखन?” 21 उसी बेले यीशुऐ मतयां जो बिमारियाँ कने पीडा, कने बुरियां आत्मा ला छुड़ाया; कने मते अन्नयां जो हखी दितियां। 22 कने यीशुऐ उना ने बोलया, जडा कुछ तुसां दिखया कने सुणाया है, जाई करी यूहन्ना जो बोली दिया, “की जड़े अन्ने थे उना जो मिलणा लग्गी पिया, कने जड़े लंगड़े थे सै चलदे फिरदे न, कने कोढियां दा कोढ ठीक होई गया है, कने जड़े टोणे थे सै सुणना लगी पे, कने मुर्दे जिन्दे होई

जड़े न, कने कंगालां जो शुभसमाचार सुणाया जांदा है। 23 धन्य न सै, जड़े मिंजो पर शक नी करदे न।” 24 जालू यूहन्ना दे भेजयो संदेश देणेबाले दूत चली गे, तां यीशु यूहन्ना दे बारे च लोकां ने बोलणा लग्गा, की तुसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो? 25 तां फिरी तुसां क्या दिखणा गियो थे? क्या नरम कपड़े लायो माणु जो? जड़ा मेंगे कपड़े पांदा है, कने ठाठ-बाठ ने मेहलां च रेंदा है। 26 तां फिरी क्या दिखणा गियो थे? क्या कुसी परमेश्वरे दा संदेश देणेबाले जो? हां, मैं तुहांजो ने बोलदा है, की तुसां परमेश्वरे दे संदेश देणेबाले ला भी बड़े जो दिखया है। 27 ऐ सै ही है, जिसदे बारे च पबित्र शास्त्रां च लिखया है: “दिख, मैं अपने संदेश देणेबाले दूते जो तेरे अगो-अगो भेजदा है, जिनी तेरा अगो दा रसता तैयार करणा है।” 28 “मैं तुहांजो ने बोलदा है, जड़े जनानिया ला जमयो न, उना च यूहन्ना ला बडा कोई नी: पर जड़ा परमेश्वरे दे राज्य च छोटे ला छोटा है, सै उसला भी बडा है।” 29 जालू उना यीशुऐ दियां बोलियां गल्लां जो सुणया, तां सारयां लोकां ऐथू दीकर की कर लेणेबालयां भी यूहन्ना ला बपतिस्मा लेईकरी परमेश्वरे जो सच्चा मनी लिया है। 30 पर फरीसियां कने व्यवस्था जो सिखाणे बालयां उसला बपतिस्मा लेणे ला मना करी दिता कने परमेश्वरे दिया मर्जिया जो जड़ी उना तांई थी उसा जो अपनाणे ला मना करी दिता। 31 मैं इस युगे दे लोकां दी तुलना कुसने दें कि सै कुदे सांई न। 32 सै उना जागतां सांई न, जड़े बजारां च बेईकरी इकी दुजे जो पुकारी करी बोलदे न। की असां तुहाडे तांई खुशिया दे गाणे गाऐ, कने तुसां नचे नी; असां रोए, कने तुसां छाती नी पिटी। 33 क्योंकि यूहन्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है। 34 मैं माणुऐ दा पुत्र खांदा पिंदा है; कने तुसां बोलदे न, दिखा, पेटू कने शराबी माणु, कने कर लेणेबालयां दा कने पापियां दा साथी है। 35 “पर ज्ञान दी सच्चाई उदियां सारियां ओलादी दे सामणे आई है।” 36 फिरी कुनकी फरीसीऐ उसला बिनती किती, की मरे सोगी खाणां खा; कने यीशु उस फरीसीऐ दे घरे जाई करी रोटी खाणां बैठा। 37 कने दिखा, उस शेहरे दी इक पापी जनानिया जो जालू ऐ पता लग्गा की फरीसी दे घरे यीशु रोटी खाणां आया है, तां सै संगमरमर दे भांडे च बड़ा मेंगा इत्र लेई आई। 38 कने उदे पैरां बखे बेईकरी रोई-रोई करी, पैरां जो आंसुआं ने सेड़णा लग्गी कने अपने बाला ने पुंजया कने उदे पैरां जो बार-बार चुमणा लग्गी कने इत्र यीशुऐ दे पैरां च मलया। 39 ऐ दिखीकरी,

सै फरीसी जिनी यीशुऐ जो सदया था, अपने मने च सोचणा लग्गा, “अगर ऐ परमेश्वरे दा संदेश देणेबाला होंदा तां इसयो पता लगी जांदा, की ऐ जड़ी उसयो छुआ दी है, सै कुण है कने कदेई जनानी है? क्योंकि सै तां पापी जनानी है।” 40 यीशुऐ उदे बिचारां जो जाणी करी उना जो जबाब च बोलया, हे शमौन, मिंजो तिजो ने कुछ बोलणा है। उनी बोलया, “गुरू जी, बोला।” 41 तालू यीशुऐ इक कहाणी सुणई, “कुसकी महाजने दे दो देंणदार थे, इक पंजसो दिना दी मजदुरिया दा कने दुआ पंजा दिना दी दियाड़ी दा देंणदार था।” 42 पर जालू उना बाल बापस करणे जो कुछ नी रिया, तां उनी महाजने दोनो जणयां दा कर्ज माफ करी दिता। उना दोनों चे कुनी उस महाजने ने जादा प्यार रखणा। 43 शमौने जबाब दिता, “मेरिया समझा च तां सै माणु जिदा जादा कर्ज माफ करी दिता।” यीशुऐ उसला बोलया, तू ठीक जबाब दिता है। 44 कने उसा जनानिया पासे फिरी करी उनी शमौने ने बोलया, “क्या तू इसा जनानिया जो दिखया इना क्या किता? मैं तेरे घरे जो आया पर तू मिंजो पैरां धोणे तांई पाणी नी दिता, पर इना मेरे पैर आंसुआं ने धोते, कने अपने बाला ने पूंजे।” 45 तू गले लाईकरी मेरा स्वागत नी किता, पर जालू ला मैं आया है तालू ला इना मेरी इज्जत करणा नी छडी है। 46 तू मेरे सरे च तेल नी मलया; पर इना मेरे पैरां च इतणा मेहंगा इत्र मली करी मेरा इज्जत मान किता है। 47 “तांई ता मैं तिजो ने बोलदा है; की मते सारे पाप जड़े इना कितयो न, सारे माफ होऐ, क्योंकि इना जादा प्यार किता है; पर जिदा थोड़ा माफ होया है, सै घट प्यार करदा है।” 48 कने उनी जनानिया ने बोलया, “तेरे पाप माफ होऐ।” 49 तालू जड़े लोक ओथु रोटी खाणां बैठयो थे, सै अपने-अपने मने च सोचणा लग्गे, “ऐ कुण ऐ जडा पापां जो भी माफ करदा है क्योंकि परमेश्वर ही ऐ करी सकदा है।” 50 पर उनी जनानिये ने बोलया, “परमेश्वरे तिजो बचाई लिया है क्योंकि तू मिंजो पर भरोसा किता है, कने शांतिया ला चली जा।”

8 उदे बाद यीशु शेहरे-शेहरे च कने गांऐ-गांऐ च जाई करी प्रचार करदे होऐ कने परमेश्वरे दे राज्य दा शुभसमाचार सुणाणे लग्गा कने सै बाहरा चेले भी उदे सोगी थे। 2 कने कुछ जनानिया भी जिना जो बुरियां आत्मा कने बिमारियाँ ला ठीक कितया था, कने उना दे ना ऐ न: मरियम जड़ी मगदल गां ला थी, जिसा ला सत बुरियां आत्मा निकलियाँ थियां। 3 कने राजा हेरोदेस दे भण्डारी खोजा दी घरेबाला योअन्ना कने सूसन्नाह कने मतियां जनानिया अपणिया कमाईया ने यीशु कने उदे

चेलयां दी सेबा करदियां थियां। 4 जालू मती भरी भीड गिठी होई, कने शेहरे-शेहरे दे लोक उदे बाल चली ओदे थे, तां उनी इक कहाणी उना जो सुणार्: 5 इक किसान अपणे खेतरे च बी राणे ताई निकलया: रांदे बेले थोडे बी रस्ते दे बखे पेयी गे कने सै तां पंछियां आई करी चुगी ले। 6 कने थोडे बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लूंगी पै, कने जालू खडी धुप पेई, तां सै फकुई गे, क्योंकि उना दियां जडा डुगियां नी थियां तां सै सुकी गियां। 7 कने थोडे बी झिल्लां च पै, कने जालू झिल्ल बदे तां उना से बी डकी ले, कने उना फल नी दिता। 8 पर थोडे बी खरिया जमिना पर पे, कने सै बी लुंगे, कने मते सारे फल देणेबाले होए; केईयां ती गुणा, केईयां सठ गुणा, केईयां सौ गुणा फल दिता। “ऐ बोलिकरी उनी जोरे ने बोलया, जिस बाल सुणे ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 9 उदे चेलयाँ उसयो पुछया, “की इसा कहाणिया दा क्या मतलब है?” 10 उनी बोलया, तुहांजो परमेश्वरे दे राज्य दे भेदां जो समझणे दी समझ दितियो है, पर ऐ कहाणियां बाकियां ताई सुणादा है, इस ताई की “सै दिखदे होऐ भी ना दीखन, कने सुणदे होऐ भी ना समझन।” 11 इसा कहाणिया दा मतलब ऐ की: बी तां परमेश्वरे दा बचन है। 12 रस्ते बखे बाले सै न, जिना सुणाया; पर शैतान झट पट जादां कने उना दे मने ला बचन कडी दिन्दा है, ताकि कुथी इयां ना होये की सै भरोसा करी लेन कने उना दा उद्धार होई जा। 13 कने जडा पथरिलिया जमिना च राया था, ऐ सै माणु न, जडे बचना जो सुणीकरी उना जो झट खुशिया ने ग्रहण करी लेंदे न। पर परमेश्वर दे बचना जो मने दिया गहराईया च बदणा नी दिन्दे, उदे बाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हट्टी जांदे न। 14 जडे बी झिल्लां च पियो न, ऐ सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रेंदा है, ऐ सब परमेश्वरे दे बचना च स्कावट पांदा है। कने सै बचन उना ताई फायदेमंद नी होंदा। 15 कने खरियाँ जमिना बाले बी सै न, जडे बचन सुणीकरी भले कने खरे मने ने सम्भाली करी रखदे न, सै सबर ने फल दिन्दे न। 16 कोई दिय्या वाली करी भांडे ने नी ढकदा है, कने ना मंझे हेठ रखदा है, पर धारिया पर रखदे न, ताकि अंदर ओणे बालयां जो लौ होऐ। 17 “क्योंकि जडा कुछ भी लुकया है, सै सामणे करणा है; कने हर इक गुप्त गल्ल सामणे आई जाणी है। 18

जिना बाल समझणे दी इच्छा है जडा परमेश्वर सिखांदा है, उसयो परमेश्वरे होर समझ देणी, पर जडा समझणे दी इच्छा नी रखदा, की मैं क्या सिखांदा, तां सै जडा समझया है, परमेश्वरे सै भी उसला लेई लेणा।” 19 उदी माता कने उदे भाई उस बाल आए, पर भीडा दिया बजा ने मिली नी सके। 20 कने उसयो बोलया, “तेरी माता कने तेरे भाई बाहर खडोतयो न कने तिजो ने मिलणा चांदे न।” 21 उनी उदे जबाब च बोलया, “मेरी माता कने मेरे भाई ऐ ही न, जडे परमेश्वरे दे बचना जो सुणदे कने मंदे न।” 22 फिरी इक रोज सै कने उदे चेले किस्तिया पर चढे, कने उनी उना ने बोलया, “ओआ, गलील झीला दे पार चलदे न।” कने उना किस्ति खोली दिती। 23 जालू किस्ति चलियो थी तां सै सोई गया: कने झीला च तूफान आई गया, कने किस्ति पाणिऐ ने भस्णा लगी पेई कने सै खतरे च थे। 24 तालू उना यीशुऐ बखे आई करी उसयो जगाया, कने बोलया, “हे स्वामी। हे स्वामी। असां डूबणा लगी पियो न।” तालू उनी उठी करी पाणिऐ कने तुफाने जो डांटया कने सै स्की गे, कने सै शान्त होई गया। 25 यीशुऐ उना ने बोलया, तुहाडा भरोसा कुथु था? पर सै डरी गे, कने हेरान होईकरी अपु चे बोलणा लग्गे, “ऐ कदिया माणु है? ऐथू दीकर की तूफान कने लैहरां भी इदा हुकम मंदे न।” 26 फिरी सै गिरासे दे लोकां दे देशे च पुज्जे, जडा उसी पार गलील प्रदेशे दे सामणे है। 27 जालू सै किनारे पर उतरया, तां उस गांऐ दा इक माणु उसयो मिल्ला, जिदे च बुरी आत्मा थी। कने सै कपडे नी पांदा था, कने ना घरे रेंदा था, सै कब्रिस्तान च रेंदा था। 28 सै यीशुऐ जो दुरे ला ही दिखीकरी दोडया, कने यीशुऐ जो इज्जत देणे तांई उदे पैरां अगगे डेई पिया। उनी जोरे ने चिलाई करी बोलया, “हे यीशु, परमपिता परमेश्वरे दे पुत्र। मिजो तिजो ने क्या कम्म? मैं तिजो ने बिनती करदा है, मिजो दुख ना दे।” 29 क्योंकि सै उसा बुरिया आत्मा जो उस माणुऐ ला निकलने दा हुकम दे दा था, क्योंकि सै उदे च बार-बार प्रबल होंदी थी। लोक उसयो रसियाँ कने सुंगला ने बनदे थे, तमी सै सब केसी जो तोड़ी दिन्दा था, कने बुरी आत्मा उसयो सुनसान जगा जो नठाई लेई जांदी थी। 30 यीशुऐ उसयो पुछया, “तेरा क्या ना है?” उनी बोलया, “मेरा ना सेना है, क्योंकि मतियां बुरियां आत्मा उदे च समाई गियां थियां।” 31 कने उना उसला बिनती किती की, “सांझो अथाह कुंडे च जाणे दा हुकम मत दींदा।” (Abyssos g12) 32 ओथु पाहडे पर इक बड़ा बड़ा सूअरां दा झण्ड चुग्गा दा था, उना उसला बिनती किती, “सांझो उना च समाणा दे।” कने

यीशुए उना जो जाणा दिता। 33 तालू सै बुरियां आत्मा उस माणुए ला निकली करी
 सूअरां दे झुण्डे च समाई गियां कने सै झुण्ड पहाड़े ला रिडकी करी दरियाये च
 पेई गिया कने सारे सूअर डूबी करी मरी गे। 34 उना दे पुहालां नठी करी शेहर कने
 गांए च ऐ खबर सुणाई। 35 कने जडा होया था लोक उसयो दिखणा आये कने
 जिस माणुए ला बुरियां आत्मा निकलियाँ थियां, उसयो यीशुए बखे कपड़े पाइकरी
 कने ठीक -ठाक बैठया दिखीकरी सै डरी गे। 36 कने दिखणे बालयां उना जो
 दसया, की सै बुरियां आत्मा ने सताया होया माणु कियां ठीक होया। 37 तालू
 गिरासे दे लोकां दे देशे अखे-बखे दे लोकां यीशुए ने बिनती किती, की साड़े ऐथू
 ला चली जा: क्योंकि सै बड़े डरी गियो थे। कने सै किस्तिया पर चढ़ी करी चली
 गिया। 38 जिस माणुए चे बुरियां आत्मा निकलियाँ थियां, सै यीशुए ने बिनती
 करणा लग्गा, की मिजो अपने सोगी रेंणा दे, पर यीशुए उसयो भेजी करी बोलया।
 39 “की अपने घरयो बापस चली जा कने लोकां ने बोली दे, की परमेख्वरे तेरे ताई
 कदे बड़े-बड़े कम्म किते न।” कने सै जाई करी सारे शेहरे च प्रचार करणा लग्गा,
 की यीशुए मेरे ताई कदे बड़े-बड़े कम्म किते न। 40 जालू यीशु बापस ओआ दा था,
 तां लोक उसला खुशिया ने मिल्ले; क्योंकि सै यीशुए जो नियाला दे थे। 41
 यहदी जंज घर दे सरदारां चे इक याईर नाये दा सरदार आया, सै यीशुए दी इज्जत
 मान ताई यीशुए दे पैरां अग्रे डेई पिया, कने उनी ऐ बोली करी बड़ी बिनती किती,
 “मेरे घरे जो चल।” 42 क्योंकि उदी बाहरां सालां दी इक ही कुडी थी, कने सै
 मरणे बाली थी। जालू सै चलदा था, तां लोक यीशुए पर डेई पोंदे थे। 43 कने इक
 जनानी जिसा जो बाहरां सालां ला खून चलणे दी बिमारी थी, कने उना अपणी
 सारी कमाई वेघां पिच्छे खचीं बैठियो थी कने तमी कूदे भी हथे ला ठीक नी
 होइयो थी, 44 उना पिच्छे ला आई करी उदे कपड़े दे कुंणे जो छुता, झट उसा दा
 खून निकलन बंद होई गिया। 45 इस पर यीशुए बोलया, मिजो कुनी छूता? जालू
 सारे मुकरणा लग्गे, तां पतरस कने उदे साथियां बोलया, “हे स्वामी, तू दिखा दा
 हे की तेरे अखे बखे इतणी भरी भीड़ है, कने तिजो पर डेई पोंदे न।” 46 पर
 यीशुए बोलया, “कुनकी मिजो छुता है मिजो पता लगी गिया है की मिजो ला
 शक्ति निकली है।” 47 जालू जनानिया दिखया, की मैं लुकी नी सकदी, तालू
 कमदी होई आई, कने उदे पैरां पर पेईकरी सारे लोकां सामणे दसया, की मैं तिजो
 कजो छुता है, कने कियां मैं झट ठीक होई गई। 48 उनी उसा जो बोलया, “बेटी

तेरा भरोसा जड़ा मिजों पर था उनी भरोसे तिजो ठीक कितया है, शांतिया ला चलिया।” 49 यीशु हले उसा ने गल्ल करा दा ही था, यहूदी जंज घरे दे सरदारे दे घरे ला कुछ लोकां आई करी बोलया, “की तेरी कुडी तां मरी गई है” हुण गुप्पे जो कजो तकलीफ दे दा है? 50 जड़ी गल्ल सै बोला दे थे, उसा गल्लां जो यीशुऐ अणसुणी करिके यहूदी जंज घर दे सरदारे जो बोलया, “डर मत, सिर्फ मिजों पर भरोसा रख, तां उना ठीक होई जाणा।” 51 घरे आई करी उनी पतरस, कने यूहन्ना, कने याकूब कने कुडिया दे माता-पिता जो छडी करी होर कुसयो भी अंदर नी ओणा दिता। 52 कने सारे उसा तांई रोआ दे थे, पर उनी बोलया, “रोआ मत; सै मरियो नी है पर सुतियो है।” 53 सै ऐ जाणी करी, की मरी गियो है उदा मजाक उडाणा लग्गे। 54 पर उनी उसा कुडिया दा हथ पकड़या कने पुकारिकरी बोलया, “हे कुडी उठ।” 55 तालू उदे प्राण बापस आई गे कने सै झट उठी बैठी; फिर उनी हुकम दिता की, इसा जो कुछ खाणे जो दीया। 56 उसा दे माता-पिता हेरान होऐ, पर उनी उना जो चेतावनी दिती, की ऐ जड़ा होया है, सै कुसी ने मत बोलदे।

9 फिरी यीशुऐ उना बाहरां चेलयां जो सदिकरी उना जो सारियां बुरियां आत्मा जो कडणे कने बमारियाँ जो दूर करणे दी शक्ति कने हक दिता। 2 कने उना जो परमेश्वरे दे राज्य दा प्रचार करणे, कने बिमारियाँ जो ठीक करणे तांई भेजया। 3 कने उनी उना ने बोलया, की अपने रस्ते तांई सिर्फ इक सोठी लेनयो। ना तां खाणे तांई रोटी लेणी, ना तां झोला, ना ही बटुए च पेसे, पर जुते पाई लेनयो कने होर कोई कपडे पाणे तांई मत लेंदे। 4 अगर कोई तुहांजो अपने घरे रेहणे तांई सदगा, जालू दीकर तुसां उसी गांऐ च रेंगे, तालू दीकर उसी दे घरे च परोणे बणी करी स्की रिया। 5 “जिसा जगा दे लोक तुहांजो अपनांगे नी कने तुहाडी सुणगे नी, ओथु ला जांदे बेले अपने पैरां दी धुड जाडी दिनयो, ताकि उना लोकां जो पता लग्गे की परमेश्वरे दिया तरफा ला मिलणे बाली सजा दे सै अपु ही जिम्मेबार न।” 6 सै निकलिकरी गांऐ-गांऐ च जाई करी शुभसमाचार सुणा दे, कने हर कुथी लोकां जो ठीक करदे फिरदे थे। 7 कने देशे दी चौथाई दा राजा हेरोदेस ऐ सारा कुछ सुणिकरी घबराई गया, क्योंकि मतयां बोलया, की यूहन्ना मरी करी जिन्दा होई गया है। 8 कने मतयां ऐ बोलया, की एलिय्याह दिखया है: कने केईयां बोलया की पराणे परमेश्वरे दा संदेश देणेबाले चे कोई जिन्दा होया है। 9 पर राजा हेरोदेसे बोलया, “यूहन्ना बपतिस्मा देणेबाले दा तां मै सिर कटबाया था तां हुण ऐ कुण है, जिसदे

बारे च ऐसिया गल्लां सुणादा मै?” कने हेरोदेसे जो उसयो दिखणे दी इच्छा होई।
 10 जालू सै प्रेरित जिना जो यीशुए भेजया था, सै यीशुए बाल मुडी करी आये कने
 उदे चारों बखे खडोई, कने जडा कुछ उना किता, कने सिखया था, उसयो दसी
 दिता, कने सै उना जो लग करिके बैतसैदा नाए दे इकी शेहरे जो लेई गया। 11 ऐ
 जाणी करी भीड़ उदे पिच्छे चली पेई, कने सै खुशिया ने उना ने मिला, कने उना
 सोगी परमेश्वरे दे राज्य दियां गल्लां करणा लग्गा, कने जडे ठीक होणा चांदे थे
 उना जो ठीक किता। 12 जालू संज होणा लग्गी, तां उना बाहरां आई करी उसयो
 बोलया, “भिडा जो बिदा कर, ताकि असां अखे बखे दे गां कने बस्तियां च जाई
 करी अपणे रेणें तांई कने रोटिया दा इंतजाम करन, क्योंकि असां ऐथू सुनसान जगा
 च न।” 13 यीशुए उना जो बोलया, “तुसां ही उना जो खाणे जो दिया।” उना
 बोलया, “साडे बाल पंज रोटियां कने दो मछियां जो छडी करी कुछ होर कुछ नी
 है; पर हाँ, अगर असां जाई करी इना सारयां लोकां तांई रोटियां खरीदी लेई ओन,
 तां होई सकदा है।” 14 (क्योंकि ओथू लगबग पंज हजार मर्द थे।) कने उनी
 अपणे चेलयां ने बोलया, उना जो पंजा-पंजा करिके झुण्डा च बठाई दिया। 15
 उना तियां ही किता, कने सबना जो बठाई दिता। 16 तालू उनी सै पंज रोटियां कने
 दो मछियां लिईयां, कने स्वर्गे पासे दिखीकरी धन्याबाद किता, कने तोड़ी-तोड़ी
 करी चेलयां जो दिन्दा गया ताकि सै लोकां जो परोसी दें। 17 सारे खाई करी
 रजी गे। कने जालू रोटी खायी बैठे तालू चेलयां बाकी बचियाँ रोटियां कने मछियां
 गिठेरेइयां कने उसला बाहरा टोकरियाँ भरई गियां। 18 जालू यीशु एकांत च प्राथना
 करा दा था, कने चेले उदे सोगी थे, तां उनी उना ला पुछया, “लोक मिंजो क्या
 बोलदे न?” 19 चेलयां जबाब दिता कुछ लोक बोलदे ने कि तुसां यूहन्ना बपतिस्मा
 देणेबाले न; पर कोई-कोई बोलदे एलिय्याह है, कने कोई-कोई बोलदे न कि पुराणे
 जमाने दे परमेश्वरे दा संदेश देणेबालयां चे कोई इक है। 20 यीशुए उना ला पुछया,
 “पर तुसां मिंजो क्या बोलदे न?” “पतरसे जबाब दिता, परमेश्वरे दा मसीहा।” 21
 तालू यीशुए उना जो समझाई करी बोलया, “ऐ कुसी ने मत बोलदे।” 22 कने उनी
 बोलया, कि मै, जडा माणुए दा पुत्र है, “मिंजो मते दुख सेहणे पोणे न, कने यह्दी
 अगुवे, बड़े याजकां, कने यह्दी व्यवस्था जो सिखाणे बालयां मिंजो अपनाणा नी है,
 कने मै मारया जाणा है, कने फिरी मै तिन्ना रोजां बाद मरयां चे जिन्दा होई जाणा
 है।” 23 यीशुए उना सबना जो बोलया, “जडा कोई मेरा चेला बनणा चांदा है,

उसयो अपणिया शरिर दियां इच्छां कने जडियां तरकिबां बणाईयां न उना जो छडी करी! कने जडे मिजों ताई मरणे जो तैयार रेंदे न सेई मेरे चले बणी करी मिजों पिच्छे चली सकदे न। 24 कोई माणु ऐसा नी करगा कने अपने प्राणा जो बचाणा चाहंगा, उनी परमेश्वरे सोगी आत्मिक जिन्दगी जिणे दा मोका गवाई देणा है। पर जडा माणु मिजों पर भरोसा करगा कने मेरे शुभसमाचार दिया बजा ने मरगा उस माणुए जो परमेश्वरे सोगी सदा ताई दी जिन्दगी मिलणी। 25 अगर तुसां संसारे दा सब कुछ पाई लेंगे कने पर परमेश्वरे सोगी हमेशा दी जिन्दगी जिणे दा मोका गवाई दिगे, तां उदा क्या फायदा? इक माणु परमेश्वरे जो क्या देई सकदा है, जडा उदी हमेशा दी जिन्दगी खरिदगा? कुछ नी! 26 तुहाडे च अगर कोई माणु मिजों अपना परमेश्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विश्वासी कने पापी लोकां तुहाडा मजाक उडाणा। फिरी जालू मैं माणुए दा पुत्र, पबित्र स्वर्गदूतां सोगी धरती पर ओणा है, तां मैं उना लोकां जो भी अपना चेला मनणे ला मना करी देणा है, तालू सारयां लोकां मरी महिमा दिखणी जडी मेरे पिता दी है।” 27 “मैं तुसां ने सच्च बोलदा है, की जडे ऐथू खडुतयो न, उना चे कोई-कोई ऐसे न, की जालू दीकर परमेश्वरे दा राज्य नी दिखी लेंगे, तालू दीकर उना मौत दा स्वाद नी चखणा है।” 28 इना गल्लां दे कोई अठ रोज बाद सै पतरस, कने यूहन्ना कने याकूब जो सोगी लेईकरी प्राथना करणे ताई पहाडे पर गया। 29 जालू सै प्राथना करा दा ही था, तां उदे चेहरे दा रूप बदलुई गया, कने उदे कपडे चिट्टे होईकरी चमकणा लग्गे। 30 कने दिखा, दो परमेश्वरे दे संदेश देणेबाले मूसा कने एलिय्याह जो, जडे बडे पेहले जिन्दा थे उना जो यीशुए सोगी गल्लां करदे दिखया। 31 ऐ महिमा सोगी मिल्ले, कने उदे मरणे दी चर्चा करा दे थे, जडा यरूशलेम च होणेबाला था। 32 पतरस कने उदे साथी निद्रा ने भस्यो थे, जालू ढंगे ने उठी होऐ, तां उदी महिमा; कने उना दो आदमियां जो, जडे उदे बखे खडुतयो थे, दिखया। 33 जालू सै उदे बखे ला जाणा लग्गे, तां पतरसे यीशुए जो बोलया, “प्रभु जी, साडा ऐथू रेंणा ठीक है, इस ताई असां ऐथू तीन तम्बू बणादे न, इक तेरे ताई, इक मूसा ताई, इक एलिय्याह ताई।” पतरसे ऐ इस ताई बोलया की, सै कने दुज्जे दो चले डरी गियो थे, कने नी जाणदे थे क्या बोलणा क्या करणा। 34 सै ऐ बोला दा ही था, की इक बदले आई करी उना जो डकी लिया, जालू सै उस बदले ने धिरणा लग्गे तां सै डरी गे। 35 कने उस बदले चे ऐ अब्राज निकली, “ऐ मेरा

प्यारा पुत्र है, कने मैं इसला खुश है, कने जड़ा ऐ बोलदा है उसयो ध्याने ने सुणा।”

36 ऐ अबाज होंदे ही यीशुऐ जो उना किल्ला दिखया; कने सै चुप रे, कने जड़ा कुछ उना दिखया था, उदी कोई गल्ल उना रोजा च कुनी नी किती। 37 कने दुऐ रोजे जालू सै पहाड़े ला उतरे, तां इक बड़ी बड़ी भीड़ उसला मिलणा आई। 38 तालू भिडा चे इक माणुऐ जौरे ने बोलया, गुरू जी, मैं तिजो ने बिनती करदा है, की मेरे पुत्रे पर दया कर; क्योंकि सै मेरा इकलोता पुत्र है। 39 कने इक बुरी आत्मा उसयो पकड़ी लेंदी है, कने सै इकदम बकणा लगी पोंदा है, कने सै आत्मा उसयो ऐसा मरोड़दी है, की उदे मुऐ ला झाग निकली पोंदा है; कने उसयो गेची करी बड़िया मुशकिला ने छडदी है। 40 कने मैं तेरे चेलयां ने बिनती किती, की इसा जो कडी दिया; पर सै कडी नी सके। 41 ऐ सुणीकरी यीशुऐ उना जो जबाब दिता, “हे अविश्वासी लोकों, मैं कालू दीकर तुहाड़े सोगी रेंगा, कने कालू दीकर तुहाड़े अविश्वास जो सेहन करगा उसी जागते जो मेरे बाल लोआ।” 42 सै ओआ दा ही था की बुरिया आत्मा उसयो पटकी करी मरोड़या, पर यीशुऐ बुरिया आत्मा जो डांटया कने जागते जो ठीक करिके उदे पिता जो देई दिता। 43 तालू सारे लोक परमेश्वरे दी इसा शक्तिया ला हेरान होऐ। पर जालू सारे लोक उना सारे कम्मा ने जड़े सै करदा था, हेरान होआ दे थे, तां उनी अपने चेलयां ने बोलया, 44 “ऐ गल्लां तुसां मत भुलदे, क्योंकि माणुऐ दा पुत्र, मेरे दुशमणा दे हथे पकड़ाया जाणा है।” 45 पर ऐ गल्ल उना दिया समझा च नी आई, कने ऐ उना ला छिपी रेई; ताकि उना जो पता नी लग्गे, कने सै इसा गल्ला दे बारे च पुछणे ला डरदे थे। 46 फिरी उना च ऐ बेहस होणा लग्गी की, की सांझो चे बडा कुण है? 47 पर यीशुऐ उना दे मने दी गल्ल जाणी लेई, कने इक बच्चे जो लेईकरी अपने बखे खड़ेरया, 48 कने उना ने बोलया, “जड़ा कोई मेरे नाऐ ने इस बच्चे जो अपनांदा है, सै मिंजो अपनांदा है, कने जड़ा कोई मिंजो अपनांदा है, सै मिंजो भेजणे बाले जो अपनांदा है, क्योंकि जड़ा तुहाड़े चे सबना ला छोटा है, सेई बडा है।” 49 तालू यूहन्ने बोलया, “प्रभु जी, असां इकी माणुऐ जो तेरे नाऐ दिया शक्तिया ने बुरियां आत्मा जो कडदे दिखया है, कने असां उसयो मना भी किता, क्योंकि सै साड़े सांई तेरा चेला नी था।” 50 यीशुऐ उसयो बोलया, “उसयो मना मत करा; क्योंकि जड़े साड़े बैरी नी है, सै साड़े सोगी साथी न।” 51 जालू यीशुऐ दे स्वर्ग जाणे दे दिन पुरे होणे बाले थे, तालू उनी यरूशलेम जाणे दा बिचार पका किता। 52 यीशुऐ ओथु

जाणे ला पेहले अपने अग्रे संदेश देणेबाले दूत भेजे: सै सामरियों दे इक ग्रांए जो गे, ताकि उदे ताई जगा तैयार करन। 53 पर उना लोकां उसयो उतरणा नी दिता, क्योंकि सै यरूशलेम शेहरे जो चलया था। 54 ऐ दिखीकरी उदे चलयां याकूब कने यूहन्ना ने बोलया, “प्रभु जी; क्या तू चांदा है, की असां हुकम देन, की अम्बरे ला अग्रे पोये कने उना जो भस्म करी दे?” 55 पर यीशुए उना जो मुड़ी करी डांटया कने बोलया, “तुसां नी जाणदे न की तुसां कदेई आत्मा दे न। 56 क्योंकि माणुए दा पुत्र लोकां दे प्राणा जो खत्म करणे ताई नी पर बचाणे ताई आया है।” कने सै कुसकी होरसी ग्रांए जो चली गे। 57 जालू सै रस्ते च चलयो थे, तालू कुनकी उसयो बोलया, “जिथू-जिथू तू जांगा, मैं भी तेरे पिछे जाणा।” 58 यीशुए उसयो बोलया, “लोमड़ियां जो रेहणे ताई कुडी न, कने अम्बरे दे पंछियां दे घोंसले होंदे न; पर मिंजो, माणुए दे पुत्रे बाल इक भी घर नहीं है, जिथू मैं सोई सकें।” 59 उनी दूरे ने बोलया, “मेरे चेले बणी जा।” उनी बोलया, “प्रभु जी, मिंजो पेहले जाणा दे ताकि मैं अपने पिता जो दबी ओए।” 60 उनी उसला बोलया, “जड़े लोक आत्मिक स्वे ने मरयो न, उना जो अपने मुर्दे दबाणा दे, पर तू जाई करी परमेश्वरे दे राज्य दा शुभसमाचार सुणा।” 61 इक होरनी बन्दे बोलया, “प्रभु जी, मैं तेरे पिछे ओंगा; पर पेहले मिंजो जाणा दे ताकि मैं अपने घरे दे लोकां ने बिदा लेई ओए।” 62 यीशुए उसयो बोलया, “जड़ा कोई अपना हथ हले पर रखीकरी पिछे दिखदा है, सै परमेश्वरे दे राज्य जोगी नी है।”

10 इदे बाद प्रभुए सत्तर होर चले रखे कने जीसी-जीसी शेहरे कने जगा पर उनी अपु जाणे दी योजना बनाईयो थी ओथु उना जो दो-दो करिके अग्रे भेजया। 2 कने उनी उना जो बोलया, “पकियो फसला दे खेतर बड़े न; पर मजदूर थोड़े न: इस ताई खेते दे मालिके ने बिनती करा, की सै अपने खेतरां जो बडणे ताई मजदूर भेजी दे।” 3 जा; दिखा मैं तुहांजो भेडां सांई भेड़ियां दे बिच भेजदा है। 4 इस ताई ना बटुआ, ना झोली, ना जुते; कने ना ही रस्ते च कुसयो नमस्ते करा। 5 जिसदे भी घरे जा, पेहले बोला, इस घरे दा कल्याण हो। 6 अगर ओथु कोई मेहमाना दा आदर करणे बाला होंगा; तां तुहाड़ी आशीष उस पर होणी, नी तां तुहाड़े बाल बापस आई जाणी। 7 उसी घरे च रिया, उस घरे ला तुहांजो जड़ा कुछ मिलदा है, सेई खा पिया; क्योंकि मजदूरे जो तां अपनी मजदूरी मिलणा चाईदी; घरे-घरे मत फिरदे। 8 कने जिसी शेहरे च जांगे, कने ओथु दे लोक तुहांजो अपने घरे खुशिया

ने अपनांगे, तां जडा कुछ तुहाड़े सामणे रखगे सै ही खा। 9 ओथु दे बिमारां जो ठीक करा: कने उना जो बोलणा, परमेश्वरे दा राज्य तुहाड़े बखे आई रिया है। 10 पर जिस शेहरे च जांगे, कने ओथु दे लोक तुहांजो अपनांगे नी, तां उना दे बजारां च जाई करी बोला, 11 तुहाड़े शेहरे दी धुड भी, जड़ी साड़े पैरां च लगियो है, असां तुहाड़े सामणे झाड़ी दिन्दे न, तमी ऐ समझी लिया, की परमेश्वरे दा राज्य तुहाड़े बखे आई रिया है। 12 “मैं तुसां ने सच्च बोलदा है, की न्याय बाले रोजे सै शेहरे जिथू दे लोक परमेश्वरे दा बचन नी मंदे, उना दी हालत सदोम दे लोकां दी हालत ला भी जादा भयानक होणी है।” 13 “हाय! खुराजीन शहर कने बैतसैदा शहर दे लोको! जडे अनोखे कम्म तुहाड़े शेहरे च कितयो न, अगर सै कम्म सूर कने सैदा शेहरे च किते जांदे, तां सै ऐ दसणे तांई की उना अपने पापां ला पश्चाताप करी लिया है, तां बड़े पेहले टाट ओढी लेंदे, कने धुड़ी अपने उपर छिड़की लेंदे।” 14 की परमेश्वरे दे न्याय दे रोज जड़ी सजा सूर कने सैदा शेहरे दे लोकां जो देणी है, सै सजा तुहाड़िया सजा ला घट होणी है। 15 हे कफरनहम शेहरे दे लोको तुसां क्या स्वर्गे दीकर उच्चे किते जाणे न? तुसां तां पताल लोक दीकर थले किते जाणे न।

(Hadēs g86) 16 “जडा तुहाड़ी सुणदा है, सै मेरी सुणदा है, जडा तुहांजो तुच्छ समजदा है, सै मिंजो भी तुच्छ समझदा है; कने जडा मिंजो तुच्छ समजदा है, सै मेरे भेजने बाले जो भी तुच्छ समजदा है।” 17 सै सत्तर चले खुशिया ने बापस आई करी बोलणा लग्गे, प्रभु जी, बुरियां आत्मा भी साड़ी गल्ल मन्नी जालू असां उना जो तेरे नाए ने हुकम दिता। 18 यीशुऐ उना ने बोलया, जालू बुरियां आत्मा तुहाड़ा हुकम मनया, तां मैं शैताने जो बिजलिया सांई स्वर्गे ला पोंदे दिखया। 19 मैं तुहांजो सपां कने बिच्छुआं जो मारणे, कने शैताने दी शक्तिया पर हक दितया है; कने कुसा भी चीजा ने तुहांजो कोई नुकसान नी होणा। 20 पर तुसां इसला खुश मत होआ, की बुरियां आत्मा तुहाड़ा हुकम मंदियां न, पर इसला खुश होआ की तुहाड़े ना स्वर्गे च लिखयो न। 21 तालू सै पबित्र आत्मा च होईकरी खुश होई गया, कने बोलया, पिता जी, स्वर्गे कने धरतिया दे प्रभु, मैं तेरा धन्यवाद करदा है, की तू इना गल्लां जो ज्ञानिया कने समजदारां ला लुकाई रखया, कने बचयां पर प्रगट कितया है, पिता जी, क्योंकि तिजो ऐई खरा लग्गा। 22 “मेरे पिता मिंजो सब कुछ देई दितया है; कने कोई नी जाणदा है की पुत्र कुण है सिर्फ पिता ही जाणदा है, कने पिता कुण है ऐ भी कोई नी जाणदा, सिर्फ पुत्र जाणदा कने सै जिदे पर पुत्र उसयो

प्रकट करणा चांगा।” 23 तालू यीशुऐ चेलयां पासे मुडी करी उना जो एकांत च बोलया, “धन्य न सै हखी, जडियां गल्लां तुसां दिखदे न उना गल्लां जो सै भी दिखदियां न। 24 क्योंकि मैं तुहांजो ने बोलदा है, की परमेश्वरे दे संदेश देणेबाले मते लोक कने राजे चांदे थे, की जडियां गल्लां तुसां दिखदे न उना जो दिखा; पर नी दिखियां कने जडियां गल्लां तुसां सुणदे न उना जो सुंणा, पर नी सुणियां।” 25 इक दिन जालू यीशु लोकां जो सिखा दा था तां इक यहूदी मूसा दी व्यवस्था जो सिखाणे बालयां चे उठया; कने ऐ बोली करी उदी परख लेंणा लगा, “गुरू जी, हमेशा दी जिन्दगिया दा बारिस बणने ताई मैं क्या करे?” (aiōnios g166) 26 यीशुऐ उसयो बोलया, “मूसा दी व्यवस्था च क्या लिखया है? तू उना जो कियां समझदा है?” 27 उनी जबाब दिता, “तू अपने प्रभु परमेश्वरे सोगी अपने सारे तन मन कने अपने सारे प्राण कने अपने सारे जौरे ने कने अपणिया सारिया अकला ने प्यार कर; कने अपने पड़ोसिये ने अपणयां साईं प्यार रख।” 28 यीशुऐ उसयो बोलया, “तू ठीक जबाब दिता, ऐई कर तां तिजो हमेशा दी जिन्दगी मिलणी।” 29 पर उनी अपने कम्मा जो सही ठेहराणे ताई यीशुऐ ला पुछया, तां मेरा पड़ोसी कुण है? 30 यीशुऐ उसयो इक कहाणिया दे जरिये जबाब दिता, इक माणु यरूशलेम शहर ला यरीहो शहर जो चलया था, कने डाकुर्याँ उस पर हमला करी दिता कने उदे कपडे उतारी दिते, कने उसयो मारी-कुट्टी करी अदमरा करी के छडी गे। 31 कने इयां होया की उस रस्ते चे इक यहूदी याजक चलया था, पर याजके उसयो दिखीकरी उदी कोई मदद नी किती कने ओथु ला चली गया। 32 इयां ही इक लेवी जड़ा यहूदी मंदरे च कम्म करदा था उसा जगा पर आया, उनी भी उसयो दिखीकरी उदी कोई मदद नी किती कने दुज्जे पासे ला चली गया। 33 पर इक सामरिया प्रदेश दा इक माणु उसा जगा ला निकलया जिथू सै जख्मी माणु पिया था, उसयो दिखीकरी उस पर तरस आई गया। 34 कने उदे बखे आई करी उनी उदे जखमा पर तेल कने दाखरस लाईकरी पट्टी बन्नी, कने अपणिया सवारिया पर चड़ाई करी उसयो सरा च लेई गया, कने उदी सेवा किती। 35 दूऐ रोजे उनी दो दीनार (दो दीनार मतलब दो दिना दी मजदूरी) देईकरी उसा सरां दे मालके जो दिते, कने बोलया, इसदी सेवा करनयो, कने जड़ा कुछ तेरा होर लगा, सै मैं तिजो बापस आई करी देई दिंगा। 36 तालू यीशुऐ पुछया “हुण तेरिया समझा च जिस पर डाकुरां हमला कितया था, उदा इना तिन्ना चे पड़ोसी कुण होया?” 37 उनी

बोलया, “सै ही जिनी उस पर तरस खादा था।” यीशुए उसयो बोलया, “जा, तू भी इयां ही कर।” 38 यीशु कने उदे चेले जालू चलयो थे, तां सै इक गांए च गया, ओथु मार्था नाए दी इकी जनानिया उसयो अपने घरे ओणे दा नियोता दिता। 39 कने मरियम नाए दी उसा दी इक बेंहण थी; सै प्रभु दे पैरां बखे बेईकरी उदी शिक्षा जो सुणा दी थी। 40 पर मार्था रोटियां बणादे-बणादे घबराई गई कने उदे बखे आई करी बोलणा लग्गी, प्रभु जी, क्या तिजो जरा भी चिंता नी है की मेरिया बेंहणा मिंजो सारे कम्म करणे तांई किल्ला छडी दितया है? इस तांई उसा जो बोल, की मेरी मदद कर। 41 यीशुए उसा जो जबाब दिता, “मार्था, हे मार्था; तू बड़ियां गल्लां तांई चिन्ता करदी कने घबरांदी है। 42 पर इक ही गल्ला दी चिंता करणे दी जरूरत है, कने मरियमा से कम्म तोपी लिया है, कने इसा जो इसला दूर नी किता जाणा है।”

11 यीशु कुसकी जगा पर प्राथना करा दा था। कने जालू सै प्राथना करी बैठा, तां उदे चेलयां चे इकी चेले उसयो बोलया, “प्रभु जी, जियां यूहन्ने अपने चेलयां जो प्राथना करणा सिखया है तियां ही सांझो सिखाई दे।” 2 यीशुए उना ने बोलया, तुसां इस तरीके ने प्राथना करणा चाइदी की: है साडे पिता परमेश्वर, जडा तू स्वर्गे च है; तेरा ना सारे लोकां च पबित्र मनया जा, कने तेरा राज्य सांझो च ओए। 3 सांझो हर रोज सै खाणा दे जडा सांझो उस दिने तांई चाइदा है। 4 कने जियां असां सांझो सोगी गलत करणे बालयां जो माफ कितया है, तियां ही तू भी साडियां गलतियां जो माफ कर कने सांझो परख च फसणे ला बचा। 5 कने यीशुए उना ने बोलया, तुसां चे कुण है, जिसदा इक मित्र हो, कने सै अधिया राती जो उदे घरे जाई करी उसयो बोले, मिंजो तिन्न रोटियां दे। 6 क्योंकि मेरा इक मित्र हुणी मिंजो मिलणे तांई आया है कने मिंजो बाल उसयो खुआणे तांई कुछ नी है। 7 कने सै अंदरे ला जबाब दिन्दा है, मिंजो तंग मत कर; हुण तां दरबाजा बंद है, कने मेरे बच्चे मेरे सोगी बिस्तरे च सुतयो न, इस तांई मैं उठीकरी तिजो कुछ नी देई सकदा। 8 मैं तुहांजो ने जडा बोलदा है उसयो समझा, अगर सै उदा मित्र होणे पर भी उसयो उठी करी री नी देणा चा, फिरी भी उस दोस्ते दे बार-बार बिनती करणे पर उदिया जरूरतां दे अनुसार उतणा उठी करी जरूर दिगा। 9 “तुसां जो जडा चाइदा सै परमेश्वरे ला मंगा कने उनी तुसां जो देणा; अगर तुसां तोपगे, तां तुसां जो मिलणा; अगर खटखटांगे, तां तुहाडे तांई खुलणा।” 10 क्योंकि जडा कोई मंगदा है,

उसयो मिलदा है; जड़ा तोपदा है, उसयो मिलदा है; कने जड़ा खटखटादां है, उदे ताई खुलदा है। 11 तुहाड़े चे कुण ऐदिया पिता होंगा, की जालू उदा पुत्र रोटी मंगे, तां उसयो पथर दे: या मच्छी मंगे तां मछिया दे बदले सप दे? 12 या अंडा मंगे तां उसयो बिच्छु देई दे? 13 “अगर तुसां बुरे होईकरी अपने बचयां जो खरियाँ चिजा देणा जाणदे न, तां तुहाड़े स्वर्गीय पिता परमेश्वरे अपने मंगणे बाले जो केई जादा बदीकरी पबित्र आत्मा देणे ताई तैयार है।” 14 फिरी उनी इक गूंगी बुरी आत्मा जो कडया; जालू सै बुरी आत्मा निकली गई, तां सै गूंगा बोलणा लगी पिया; कने लोकां जो हेरानी होई। 15 पर उना चे कितणयां ही बोलया, “ऐ तां बुरियां आत्मा दे सरदार शैताने दी मदद लेईकरी बुरियां आत्मा जो कडदा है।” 16 होरनी उदी परख लेणें ताई उसला स्वर्गे दा कोई निशाण दसणे ताई बोलया। 17 पर उनी, उना दे मने दियां गल्लां जो जाणी करी, उना ने बोलया, “अगर कुसी राज्य च लोक अपु चे ही लड़दे रेंगे तां सै राज्य उजड़ी जांदा है। कने अगर कुसी घरे दे माणु अपु चे ही लड़दे रेंगे तां सै घर भी उजड़ी जांदा है।” 18 अगर शैतान अपनी ही बुरी आत्मा दे खिलाफ लड़गा, तां उनी अपना ही नाश करी लेणा है, तां फिरी उदा राज्य कियां बदी सकदा है? क्योंकि तुसां मेरे बारे च तां बोलदे न, की ऐ तां शैताने दिया मददा ने बुरिया आत्मा जो कडदा है। 19 “भला अगर मैं शैताने दिया मददा ने बुरियां आत्मा जो कडदा है, तां तुहाड़ी ओलाद कुसदिया मददा ने बुरियां आत्मा जो कडदी है? इस ताई तुहाड़िया ओलादी ही तुहाड़ा न्याय करणा है।” 20 पर अगर मैं परमेश्वरे दिया शक्तिया ने बुरियां आत्मा जो कडदा है, तां परमेश्वरे दा राज्य तुहाड़े बखे आई रिया है। 21 जालू जोरे बाला माणु हथियार लेईकरी अपने घरे दी रखबाली करदा है, तां उदी संमति बची रेंदी है। 22 पर जालू उसला जादा जोरे बाला उसला लड़ी करी उसयो जीती लेंदा है, तां उदे सै हथियार जिना पर उसयो भरोसा था, उना जो खोई लेंदा है कने उदिया संपतिया जो लुटी करी बंडी दिन्दा है। 23 “जड़ा मेरे सोगी नी है सै मेरे खिलाफ है, कने जड़ा मेरे सोगी नी बटोलदा है सै खलारदा है।” 24 जालू बुरी आत्मा माणुऐ ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है। तां सै अपने आपे ने बोलदी है, कि मैं अपने तिस्सी घरे जो बापस चली जाणा है, जिस माणुऐ ला निकली थी, 25 “जालू सै बापस ओंदी है तां उस माणुऐ जो उस घरे सांई पांदी है, जिसयो खेल करी साफ कने सजाया हो।” 26 तालू सै बुरी आत्मा जाई

करी अपने ला होर बुरियाँ सत आत्मा जो अपने सोगी लेई ओदी है, कने सै उदे अंदर बड़ी करी ओथु रेंदियां न, कने उस माणुए दी हालत पहले ला भी बुरी होई जांदी है। 27 जालू यीशु ऐ सब गल्लां बोला दा ही था तां भिडा चे इकी जनानिया उचिया अबाजा ने बोलया, “धन्य हे सै जनानी जिना तिजो पैदा किता कने तिजो अपना दूध पियाया।” 28 उनी बोलया, “हाँ, पर धन्य न सै, जडे परमेश्वरे दा बचन सुणीकरी मंदे न।” 29 जालू बडे भरी लोकां दी भीड़ गिठी होआ दी थी तां सै बोलणा लगा, “इस युगे दे बुरे लोक चिन्न चमत्कार तोपदे न, पर परमेश्वरे दा संदेश देणेवाले योना दे चिन्न चमत्कार जो छडी करी उना जो कोई होर कोई चिन्न नी मिलणा।” कने यीशु उना जो छडी करी चली गया। 30 जियां योना नीनवे शेहे दे लोकां तांई चिन्न बणया, तियां ही मै माणुए दा पुत्र भी इस युगे दे लोकां तांई चिन्न होणा है। 31 दक्षिणे दिया राणिया न्याय दे रोजे इस बेले दे आदमियां दे सोगी उठी करी, उना जो दोषी बोलणा है, क्योंकि सै राजा सुलेमान दा ज्ञान सुणने तांई बड़ी दुरे ला आई, कने दिखा ऐथू सै है जडा सुलेमान ला भी बडा है। 32 नीनवे शेहे दे लोकां न्याय दे रोजे इस बेले दे लोकां सोगी खडे होईकरी, इसा पीढी दे लोकां जो दोषी बोलणा है; क्योंकि उना योना दा प्रचार सुणिक्री मन बदलया है कने दिखा, ऐथू सै है जडा योना ला भी बडा है। 33 “कोई माणु दिया बाली करी थले या टोकसे हेठ नी रखदा है, पर धारिया पर रखदा हे ताकि अंदरे ओणे बालयां जो लौ होऐ।” 34 तेरियां हखी तेरे शरीर तांई इक दिये सांई न, इस तांई अगर तेरी हख साफ है, तां तेरा सारा शरीर भी लौ लुआन है; पर अगर सै बुरी है, तां तेरा शरीर भी नेहे च है। 35 तांई तां ध्यान रखा, की जड़ी लौ तिजो च है सै नेहेरा ना होई जाये। 36 इस तांई अगर तेरा सारा शरीर लौ लुआन हो, कने उदा कोई हिंसा नेहे च नी रे, तां सारे दा सारा शरीर ऐसा लौ लुआन होणा, जियां उस बेले होंदा है, जालू दिया अपणिया लौइ ने तिजो लौ दिन्दा है। 37 जालू यीशु अपना प्रचार खत्म करी बेठा, तां इकी फरीसिये उसला बिनती किती, की मेरे घरे रोट्टी खाणां चल; कने सै अंदर जाई करी रोट्टी खाणां बैठा। 38 फरीसी जो ऐ दिखीकरी बड़ी हेरानी होई की यीशुऐ खाणां खाणे ला पहले अपने रिती रिबाजा ने हथ पैर नी धोते। 39 प्रभु यीशुऐ उसयो बोलया, “हे फरीसियों, तुसां ऐसे भांडे न, जडे तां उपरे-उपरे ला तां साफ न, पर तुसां दे मने अंदर लालच कने बुराई भरईयो है।” 40 हे मुखी, जिनी बाहरे दा हिंसा बणाया है, क्या उनी ही अंदरे दा हिंसा नी

बणाया है? 41 गरीब लोकां जो दान देईकरी अपणा मन अंदरे ला साफ करा, तां दिखा सब कुछ तुहाड़े ताई पबित्र होई जाणा। 42 “पर हे फरीसियों, तुहाड़े ताई बड़ा बुरा होणा है! तुसां पुदीने कने ज़ीर दा, कने सारिया भान्तिया दे साग पतयां दा दसमां हिसा दिन्दे न, पर न्याय जो कने परमेश्वरे दे प्यारे जो टाल्ली दिन्दे न; तुहांजो इयां करणा चाईदा था की इना जो भी करदे रेंदे कने उना जो भी नी छडदे।” 43 हे फरीसियों, तुहांजो ताई बड़ा बुरा होणा है! तुसां यहूदी जंज घर च खास-खास जगा च आसन कने ऐ चांदे न की बाजारां च लोक तुहांजो नमस्ते बोलन। 44 “तुहांजो ताई बड़ा बुरा होणा है। क्योंकि तुसां उना लुकियां कबरां दे साईं न, जिना पर लोक चलदे न, पर जाणदे नी ना।” 45 तालू इकी व्यवस्था जो सिखाणे बाले उसयो जबाब दिता, “गुरू जी, ऐसिया गल्लां बोली करी तू साड़ी निंदा करा दा है।” 46 उनी बोलया, “हे व्यवस्था जो सिखाणे बालयो, तुहांजो ताई बड़ा बुरा होणा है। तुसां ऐसे बोझे जो माणुऐ पर लददे न, जिसयो चुकणा बड़ा मुशकिल है, पर तुसां अपु उना बोझां जो अपणिया इकी उंगलियां ने भी नी हिलांदे ना।” 47 तुहांजो ताई बड़ा बुरा होणा है। तुसां उना परमेश्वरे दा संदेश देणेबालयां दियां कबरां बणांदे न, जिना जो तुहाड़े बाप दादयां मारी दितया था। 48 इसा गल्ला दे तुसां गबाह न, कने अपने बाप दादयां दे कम्मा ने सहमत न; क्योंकि उना तां उना जो मारी दिता कने तुसां उना दियां कबरां बणादे न। 49 इस ताई तां परमेश्वरे दिया अकला भी बोलया है, की मैं उना बाल परमेश्वरे दा संदेश देणेबालयां कने प्रेरितां जो भेजगी, कने उना इना चे कितणयां जो मारी देणा, कने कितणयां जो सताणां है। 50 ताकि जितणे भी परमेश्वरे दा संदेश देणेबालयां दा खून इस संसारे दे शुरू ला बहाया है, सबना दा लेखा, इस युगे दे लोका ला लेंणा है। 51 हाबिल दिया हत्या ला लेईकरी परमेश्वर दा संदेश देणेबाले जकर्याह दिया हत्या दीकर जिसयो बेदी कने मंदरे दे बिच मारया था; मैं तुसां ने सच्च बोलदा है; उदा लेखा इस बकते दे लोकां ने लेंणा है। 52 “व्यवस्था जो सिखाणे बालयां लोकां पर लानत है! क्योंकि तुहांजो बाल स्वर्ग जाणे दा रस्ते दा पता था। पर तां भी तुसां उसी रस्ते पर नी चले कने दुजे लोकां जो भी जाणे ला रोकी लिया है।” 53 जालू सै ओथु ला निकलया, तां व्यवस्था जो सिखाणे बाले कने फरीसी बड़े पिच्छे पेई गे, कने छेड़ना लग्गे, की सै बड़ियां गल्लां दी चर्चा करे, 54 कने उदिया ताका पर लग्गी रे, की उदे मुऐ दी कोई गल्ल पकड़न।

12 इतणे च ओथु जालू हजारां दी भीड होई गई, ऐथू दीकर की लोक इकी दुऐ पर डेई पोंदे थे, तां यीशुऐ सबना ला पेहले अपने चेलयां ने बोलया, फरीसियां दी कपटरूपी जिन्दगी ला जड़ी खमिरे सांई है उसा ला बची करी रेनयो। **2** क्योंकि कुछ भी ढक्या नी है, जड़ा खोलया नी जाणा है; कने कुछ छुपया नी है, जड़ा सामणे नी ओणा है। **3** तांई तां जड़ा कुछ, तुसां नेहरे च बोलया है, सै लौइ च सुणाया जाणा, कने जड़ा तुसां अंदर कमरयां च कन्ना च बोलया है, उदा छती पर चढी करी प्रचार होंणा। **4** “पर मैं तुसां ने बोलदा है, जड़े मेरे साथी न, कि जड़े शरीर जो मारी सकदे न, पर सै आत्मा जो नी मारी सकदे न, उना ला डरदे मत।” **5** मैं तुहांजो चेतावनी दिन्दा है की तुहांजो कुसने डरना चाईदा, तुहांजो उस परमेश्वरे ला डरणा चाईदा जिसयो तुहांजो मारणे ला बाद नरके च भेजणे दा हक है। (Geenna g1067) **6** “क्या बड़ी घट कीमत च पंज चीड़ियाँ नी बिकदियां? तमी परमेश्वर उना चे इकी जो भी नी भुलदा।” **7** बल्कि तुहाड़े सिरे दे सारे बाल भी गिणयो न, इस तांई डरा मत, तुसां परमेश्वरे तांई मतियां चीड़ियाँ ला भी बदीकरी कीमती न। **8** मैं, माणुऐ दे पुत्र तुहांजो बोलदा है जड़े कोई बोलदे न, की सै मेरे चले न, उसयो मैं भी अपने स्वर्गीय पिता परमेश्वर दे सामणे अपने चले मनी लेंगा। **9** पर अगर सै दूजयां दे सामणे ऐ बोलणे ला डरदे न, कि असां यीशुऐ दे चले न, तां परमेश्वरे भी अपने स्वर्गदूतां सामणे तुहांजो चेला नी मनणा है। **10** पर जड़ा कोई माणुऐ दे पुत्रे दे बारे च कोई बुरी गल्ल बोलगा, उदा ऐ अपराध माफ होई जाणा, पर जड़ा कोई पबित्र आत्मा दे बारे च बुरा बोलगा, उदा अपराध माफ नी होणा है। **11** “जालू लोक तुहांजो यहूदी जंज घर च कने हाकिमां कने अधिकारियां दे सामणे लेई जागे, तां चिंता मत करदे की असां कियां या क्या जबाब दें, या क्या बोलन।” **12** क्योंकि पबित्र आत्मा तुहांजो तालू ही सिखाई देणा, की क्या बोलणा चाईदा। **13** फिरी भिडा चे इकी माणुऐ यीशुऐ बोलया, “गुरू जी, मेरे भाईऐ जो बोल, की पिता दी जमीन जयादात मिंजो देई दे।” **14** यीशुऐ उसयो बोलया, “हे माणु, कुनी मिंजो तुहाड़ा न्याय करणे बाला या धन बंडणे बाला बणाया है?” **15** कने यीशुऐ उना जो बोलया, “ध्यान रखा, कने हर तरा दिया मोहमाया ने अपने आपे जो बचाई रखा; क्योंकि कदी भी जिन्दगी उदिया जमीन जायदाद ला जादा नी होंदी।” **16** यीशुऐ उना जो इक कहाणी सुणाई, कुसकी अमीर दिया जमिना च मती भरी फसल होई। **17** तालू सै अपने मने च

सोचणा लग्गा, की मिजो नी समझ ओआ दी की मैं क्या करे, क्योंकि मेरे बाल तां
 इतणी जगा ही नी है, जिथू मैं अपणी सारिया फसला जो रखी सके। 18 कने उनी
 बोलया, मैं इयां करणा है की अपणे गोदामें दियां बखारियां जो तोड़ी करी उना ला
 बडियां बणाणियां न; कने ओथु अपणी सारी संपति कने फसल रखणी; 19 कने इदे
 बाद अपणे आपे ने बोलणा, की तेरे बाल मते साला तांई मती धन दौलत कने फसल
 रखियो है; मजे ने खा पी, सूखे ने रे। 20 पर परमेश्वरे उसयो बोलया, हे मुखी! इसा
 राती तू मरी जा; तां तालू जड़ा कुछ तू गठेरया है, सै कुसदा होणा? 21 “इयां ही
 उस माणुए ने भी होणा है जड़ा सब कुछ अपणे तांई गठेरदा, पर परमेश्वरे दिया सेबा
 करणे तांई अपणी क्षमता कने धन दौलत खर्च नी करदा।” 22 फिरी उनी अपणे
 चेलयां ने बोलया, तांई तां मैं तुहांजो बोलदा है, अपणी जिन्दगी दी चिंता मत करा,
 की असां क्या खांगे; ना ही अपणे शरीर दी की असां क्या पांगे। 23 क्योंकि
 रोटिया ला जिन्दगी कने कपडयां ला शरीर जादा बदीकरी है। 24 कोयां पर ध्यान
 दिया; ना सै रातें न, ना सै बडदे न, न उना बाल खेतर; ना उना दे गोदाम होंदे न
 जिथू से गठेरी सकन, तमी परमेश्वर उना जो पालदा है। तुहाड़ी कीमत पंछियां ला
 भी बदीकरी है। 25 तुसां चे ऐसा कुण है, जड़ा चिंता करणे ने अपणिया जिन्दगिया
 च इक घड़ी भी बधाई सकदा है? 26 इस तांई अगर तुसां सबना ला छोटा कम्म भी
 नी करी सकदे, तां जिन्दगी च दुजियां गल्लां दी कजो चिंता करदे न? 27 “जंगली
 फुलां दे बारे च सोचा की सै कियां बडुदें न, सै ना तां मेहनत करदे न, कने ना ही
 कपडे पांदे न, तमी मैं तुसां ने बोलदा है, की जालू राजा सुलैमान बाल धन दौलत
 थी, तालू भी उनी जंगली फुलां चे कुसी सांई भी कपडे नी पायो थे।” 28 इस तांई
 अगर परमेश्वर दरबडे दे घाए जो, जड़ा अज है, कने कल अग्गी च फुकया जाणा,
 तमी परमेश्वर घाए जो इतणी सुन्दरता दिन्दा है, तां हे अल्पविश्वासियों, तां उनी
 पक्का तुहाड़ी देखभाल करणी है, तुहाड़ा भरोसा इतणा घट कजो है? 29 कने तुसां
 इसा गल्लां दिया तोपा च मत रिया, की क्या खांगे कने क्या पीगे, कने ना ही शक
 करा। 30 क्योंकि जड़े लोक परमेश्वरे जो नी जाणदे सै इना चिजां जो तोपदे रेंदे न;
 कने तुहाड़ा पिता जाणदा है, तुहांजो इना चिजां दी जरूरत है। 31 पर उदे राज्य
 दिया तोपा च रिया, तां ऐ चिजां भी तुहांजो मिली जाणियां। 32 तुसां मेरे तांई भेडां
 दे झुण्ड सांई न, इस तांई कुसा भी गल्ला दे बारे च मत डरा; क्योंकि तुहाड़े
 परमेश्वर पिता जो ऐ खुशी है, की तुहांजो राज्य दे। 33 अपणिया जमीन जयादात

जो बेचिकरी दान करी दीया; कने अपने ताई ऐसे बटुए बणां, जड़े पराणे नी होदे, इदा मतलब की स्वर्गे च ऐसा धन गटेरा जड़ा घटदा नी है कने जिसदे नेडे चोर नी जांदा है, कने खराब करणे बाला कीड़ा नी लगदा। 34 क्योंकि जिथू तुहाड़ा धन है, ओथु तुहाड़ा मन भी लगया रेंदा है। 35 हमेशा सेबा करणे ताई तैयार रिया कने सारी रात तुहाड़े दिये बलदे रेंन। 36 कने तुसां उना माणुए सांई बणा, जड़े अपने मालिके जो नियाला दे होन, की सै बियाह ला कालू बापस ओंगा; की सै जालू आई करी दरबाजा खट खटाणां तां झट उदे ताई खोली देन। 37 धन्य न सै सेवक, जिना जो मालिक आई करी उदे बापस ओणे दी नियाल रखदे दिखे; मैं तुहांजो ने सच्च बोलदा, की उनी इक सेवके सांई कपड़े पाई करी उना जो रोटी खाणां बठाणा, कने अपु उना जो खांणे ताई परोसणा। 38 अगर सै अधिया राती या ब्यागा पेहर च आई करी उना जो जागदा दिखे, तां सै सेवक धन्य न। 39 पर तुसां ऐ जाणी लिया, की अगर घरे दा मालिक जाणदा, की चोरे कुसा घड़िया ओणा है, तां सै जागदा रेंदा, कने अपने घरे च चोरी नी होणा दिन्दा। 40 तुसां भी मेरे बापस ओणे ताई तैयार रिया; क्योंकि मैं, माणुए दे पुत्रे ऐसिया घड़िया स्वर्गे ला ओणा जालू तुसां मेरे ओणे दी उम्मीद नी कितियो होणी है। 41 तालू पतरसे बोलया, “प्रभु जी, क्या ऐ कहाणी तू सांझो ही बोला दा है की सबना जो बोलदा है।” 42 प्रभु यीशुए बोलया, “सै भरोसे लाइक कने अकला बाला भंडारी कुण है, मालिक जिसयो नोकरां-चाकरां दा सरदार बणाए ताकि सै उना जो टेमे दा खांणे पिणे दा समान दे।” 43 धन्य है सै सेवक, जिसयो उदा मालिक आई करी ऐसा ही करदा दिखे। 44 मैं तुहांजो ने सच्च बोलदा; उनी उसयो अपणिया सारिया संपतिया दा मालिक बणाई देणा। 45 पर अगर सै सेवक सोचणा लग्गे, की मेरे मालिके जो ओणे च हल्ले बडा बकत है, कने सै दासां कने दासियाँ जो मारणा-कुटणा कने खाणां-पिणा कने शराबी होणा लग्गे। 46 तां उस दासे दे मालिके ऐसे रोजे ओणा है जिस दिने सै उसयो नियाला दा नी होणा, कने ऐसी घड़ी जिसा जो सै जाणदा ना होणा, तालू उदे मालिके ओणा, उसयो खरियाँ झिडकां देईकरी उदी गिणती अविश्वासियां सोगी करी देणा। 47 कने सै सेवक जड़ा मालिके दी इच्छा जाणदा था, कने तैयार नी रिया कने ना उदिया मरजिया चलया, उनी बड़ी मार खांणी। 48 पर जिसयो पता नी होईकरी मार खाणे जोगा कम्म करे उनी घट मार खांणी, ताई तां जिसयो जादा दितया है उसला जादा मंगया जाणा है; कने जिसयो जादा सौंपया

है, उसला जादा दा हिसाब लेणा है। 49 मैं धरतिया पर अगग लगाणा आया है; बस ऐ ही चांदा है, की हुण ही लगी जांदी! 50 मिंजो जल्द ही इक भयंकर पीड़ झेलणा पोणी है; कने जालू दीकर सै पीड़ नी झलगा तालू दीकर मैं बड़ा बेचेन है। 51 तुसां क्या सोचदे न की मैं धरतिया पर लोकां बिच मेल मिलाप करणा आया है? मैं बोलदा है, नी मैं लग करणा आया है। 52 क्योंकि अगर कुसी इकी घरे दे पंज जणे न, तां उना अपु चे बख रेणा है, तिन्ना जाणया जड़े मिंजो पर भरोसा नी करदे उना दो जणयां दा बिरोध करणा जड़े मिंजो पर भरोसा करदे न। 53 पिता पुत्रे ने, कने पुत्रे पिता ने बेर रखणा; माता कुडिया ने, कने कुडिया माता ने, ससु नुआ ने, कने नुआ ससु ने बैर रखणा है। 54 कने यीशुए भिड़ा ने भी बोलया, जालू तुसां बदलां जो पश्चिम ला उठदे दिखदे न, तां झट बोलदे न, की बरखा होणी है, कने इयां ही होंदा है। 55 कने जालू दक्षिणी होआ चलदी दिखदे न तां बोलदे की लू चलणी, कने इयां ही होंदा है। 56 हे कपटियों, तुसां धरती कने अम्बरे दे स्पे च भेद करी सकदे न, पर इस युगे च परमेश्वर क्या करा दा है, उदे बारे च भेद कजो नी जाणदे न। 57 तुसां जो अपु ही फेसला करणा चाईदा की तुहाड़े ताई क्या ठीक है? 58 जालू तू अपने मुड़ई सोगी न्याय करणे बाले बाल चलया है, तां रस्ते च ही उसला छुटणे दी कोसिस करी ले इयां ना हो, की सै तिजो जजे बाल लेई जाए, कने जज सिपाई बाल देई दे कने सिपाई तिजो जेला च पाई दे। 59 मैं तुहांजो बोलदा है, कि जालू दीकर तू दमड़ी-दमड़ी नी देई दिगा तालू दीकर ओथु ला नी छुटी सकणा है।

13 उस बेले कुछ लोक आई रे, कने उना यीशुए ने बोलया, की रोमी राज्यपाल पिलातुसे गलील प्रदेशे दे थोड़े लोकां दी हत्या करी दितियो थी, जालू से मंदिर च बलि चढ़ा दे थे। 2 ऐ सुणीकरी यीशुए उना जो जबाब च ऐ बोलया, “क्या तुसां ऐ समझदे न, की ऐ गलील प्रदेशे दे लोक, बाकी सारयां गलीली लोकां ला जादा पापी थे की उना पर ऐ मुशकिल पेई?” 3 मैं तुसां ने बोलदा, की नी थे; पर अगर तुसां भी अपने पापां जो नी मनगे कने मन नी बदलगे तां तुसां भी इयां ही खत्म होणा है। 4 या क्या तुसां समजदे न, की उना ठारा जणयां दे बारे च तुहाड़ा क्या बोलणा है जालू उना पर शीलोह दा गुम्मट पिया, कने सै दबुई करी मरी गे: क्या सै यरूशलेम शेहरे दे होर सारे रेणे बालयां ला जादा पापी थे? 5 “मैं तुसां ने बोलदा है, की नी थे; पर अगर तुसां मन नी बदलया तां तुसां भी इना साई ही खत्म होणा।” 6 फिरी उनी ऐ कहाणी भी सुणाई, की कुसकी अंगूरा दे बागे च इक अंजरी दा रख

लगाया था: सै उदे च फल तोपणा हर साल आया, पर नी मिल्ले। 7 तालू उनी बागे दे रखबाले जो बोलया, दिख मै तिन्ना सालां ला इस अंजीर दे स्खे च फल तोपणा ओदा है, पर मिलदे नी न, इसयो बडी दे क्योंकि ये खरिया जमिना जो खराब करा दा है। 8 “उनी उसयो जबाब दिता, की हे मालिक इसयो इस साल तां रेणी दे; की मै इदे चारो पासे खूणी करी खाद पां। 9 अगली बरी अगर ऐ फलगा तां ठीक नितां इसयो बडी दियां।” 10 सब्ते दे रोजे यीशु इकी यहूदी जंज घर च उपदेश दे दा था। 11 कने ओथु इक जनानी थी, जिसा जो ठारां सालां ला इक बुरी आत्मा बिकलांग करी रखया था, कने सै बडी जादा कुबडी होई गियो थी, कने कुसी भी तरीके ने सिदी नी होई सकदी थी। 12 यीशुऐ उसा जो दिखीकरी सदया, कने बोलया, “हे नारी, तू इसा अपणिया बिमारिया ला छुटी गई।” 13 तालू उनी उसा पर हथ रखे, कने सै झट सीधी होई गई, कने परमेश्वरे दी बड़ाई करणा लग्गी। 14 इस ताई की यीशुऐ उसा जो सब्ते दे रोजे ठीक किता था, यहूदी जंज घरे दा सरदार लोकां ने बोलणा लग्गा, “इक हफ्ते च छे रोज न, जिना च असां कम्म करी सकदे न, इना रोजा च आई करी ठीक होआ; पर सब्ते दे रोजे नी।” 15 ऐ सुणिकरी प्रभु यीशु जबाब दिता, “हे कपटियों, क्या सब्ते दे रोजे तुसां सारे जणे अपने दांदा या गधे जो बेकां ला खोलिकरी पाणी पिणा नी लेई जांदे?” 16 ऐ जनानी जडी अब्राहमे दे बंशज है, जिसयो शैताने ठारां सालां ला बन्नी रखया था, क्या ठीक नी था की सब्ते दे रोजे अपने बंधने ला छुड़ाई जांदी? 17 जालू उनी ऐ गल्लां बोलियाँ, तां उदे सारे बिरोधी शर्मिदा होई गे, कने सारी भीड़ उना महान कम्मा ने जडे सै करदा था, खुश होई। 18 फिरी यीशुऐ बोलया, “परमेश्वरे दा राज्य कुसदे सांई है? कने मै उदी तुलना केसने करे?” 19 “सै राईया दे इकी दाणे सांई है, जिसयो इकी माणुऐ लेईकरी अपणिया जमिना च राया है: कने सै बडोईकरी स्ख बणी गया; कने अम्बरे दे पंछियां उदियां डालियाँ पर अपने घोंसले बणाऐ।” 20 उनी फिरी बोलया, मै परमेश्वरे दे राज्य दी तुलना केसने करें? 21 “सै खमिरे सांई है, जिसयो इकी जनानिया लेईकरी बडे सारे आटे च पाया, कने होंदे-होंदे सारा अटा खमीर बणी गया।” 22 सै शेहर-शेहर, कने अपने चेलयां सोगी गां-गां होईकरी उपदेश दिन्दा होया यरूशलेम शेहर दे पासे जा दा था। 23 कने कुंनकी यीशुऐ पुछया, “प्रभु जी, क्या परमेश्वरे कुछ लोकां जो ही अनन्तकाल दी सजा ला बचाणा है?” उनी उना जो बोलया, 24 परमेश्वरे दे राज्य च जाणे दी कोशिश

करा, क्योंकि परमेश्वरे दे राज्य च अंदर जाणा सुंगडे दरबाजे ला अंदर जाणे सांई है, क्योंकि मैं तुसां ने बोलदा है, की मतयाँ अंदर जाणे दी कोशिश करणी है, पर जाई नी सकणा है। 25 जालू परमेश्वर जड़ा घरे दा मालिक है उठी करी दरबाजा बंद करी बैठया हो, कने तुसां बाहर खड़ोई करी दरबाजा खट खटाई करी कने बिनती करी बोलन, प्रभु जी, साडे तांई खोली दे, कने सै जबाब दे की मैं तुहांजो नी जाणदा, तुसां कुथु ला आयो न? 26 “तालू तुसां बोलणा लगणा, की असां तेरे सामणे खादा पीता कने तू साडे बजारां च उपदेश दिता।” 27 पर परमेश्वरे बोलणा, मैं तुसां ने बोलदा है, मैं नी जाणदा तुसां कुथु ला न। हे बुरे कम्म करणे बालयों, तुसां सारे मिंजो ला दूर होई जा। 28 ओथु रोणा कने दंद पीणे: जालू तुसां पूर्वज अब्राहम कने इसहाक कने याकूब कने सारे परमेश्वरे दे संदेश देणेबालयां जो परमेश्वरे दे राज्य च बैठया कने अपने आपे जो बाहर कडया दिखणा। 29 तालू पुरे संसारे ला लोक आई करी परमेश्वरे दे राज्य दिया दावता च हिस्सेदार होंगे। 30 “कने दिखा, जडे पिछले न, उना पेहले होई जाणा, कने जडे पेहले न, उना पिछले होणा।” 31 उसा घडिया कितणे ही फरीसियां आई करी उसयो बोलया, ऐथू ला निकली करी चली जा; क्योंकि राजा हेरोदेस तिजो मारी देणा चांदा है। 32 उनी उना ने बोलया, जाई करी उस माणुए जो बोली दिया जड़ा लोमडियां सांई चलाक है, की दिख मैं अज कने कल सारी बुरी आत्मा जो कडदा कने बिमारां जो ठीक करदा है कने तिजे रोजे अपना कम्म पूरा करणा है। 33 तमी मिंजो अज कने कल कने परसु सफर करणा जरूरी है, क्योंकि इक परमेश्वरे दा संदेश देणेबाला सिर्फ यरूशलेम शेहरे च ही मारया जाणा है। 34 “हे यरूशलेम शेहर दे लोको! तुसां इना परमेश्वरे दा संदेश देणेबालयां जो मारी दिता है, जडे पेहले रेंदे थे कने उना लोकां जो पथरां ने मारदे न जिना जो तुहाडे बाल भेजया; कितणी ही बरी मैं ऐ चाया, की जियां मुर्गीं अपनां बचयां जो अपने फंगा थले गिठे करदी है, तियां ही मैं भी तेरे बचयां दी रखबाली करे, पर तू ऐ नी चाया।” 35 “दिखा, तुहाडा मंदिर तुहाडे तांई उजाड़ी छडया है, कने मैं तुसां ने बोलदा है; जालू दीकर तुसां नी बोलगे, की धन्य है सै, जड़ा प्रभु दे नाए ने ओंदा है, तालू दीकर तुसां मिंजो कदी नी दिखणा है।”

14 फिरी यीशु सब्ते दे रोजे फरीसियां दे सरदारां चे कुसकी दे घरे रोटी खाणां खाणे तांई गिया: कने सै यीशु जो ढंगे ने ताका दे थे की कोई गलती तोपी सकन। 2

ओशु इक माणु था, जिसदे हथ कने पैर सूजी गियो थे। 3 इसा गल्ला पर यीशुए व्यवस्था जो सिखाणे बालयां कने फरीसियों ने बोलया, “क्या सब्ते दे रोजे लोकां जो ठीक करणे दी अनुमति व्यवस्था च है, की नी है?” 4 पर सै चुपचाप ही रे। तालू यीशुए उस पर हथ रखीकरी ठीक किता, कने जाणा दिता। 5 कने उना जो बोलया, “मन्नी लिया कि तुसां चे कुसकी दा जागत या दांद सब्ते दे रोजे खुए च पेई जा कने उसयो उस रोजे झट बाहर ना कडे?” 6 सै इना गल्लां दा कोई भी जबाब नी देई सके। 7 तालू उनी दिखया, की सदयो लोक कियां सै जगा चुणी लेंदे जिथू सब्ते खास लोक बोंदे न, तां यीशुए उना जो इक कहाणी सुणाई करी उना ने बोलया, 8 जालू कोई तिजो बियाये दिया धामा च सदगा, तां तुसां उना खास आसना च मत बोंदा, कुथकी इयां ना हो की उनी तिजो ला भी बडे खास बंदे जो न्युंद्र दितियो हो। 9 कने जिनी तिजो कने उसयो दोनो जो न्युंद्र दितियो है, सै आई करी तिजो ने बोले, की इसयो जगा दे, तालू तिजो शरमिंदा होईकरी सारयां ला पिच्छे बालिया जगा च बोणा पोए। 10 पर जालू तिजो सदगे, तां सारयां ला पिच्छे बालिया जगा जाई करी बेई जा, की जालू सै, जिनी तिजो सदया हे सै ओए, कने तिजो ने बोले की हे मित्र, अग्रे जाई करी खास बाली जगा च बैठ; तालू तेरे सोगी बोंणे बालयां दे सामणे तेरी बडाई होंणी। 11 “क्योंकि जडा कोई अपने आपे जो बडा महान बणांगा, उसयो छोटा किता जाणा; कने जडा कोई अपने आपे जो छोटा बणांगा, सै सब्ते महान कितया जाणा।” 12 तालू यीशुए अपने न्युंद्र देणेबाले फरीसियो जो भी बोलया, “जालू तू दिने दा या राती दा खाणां खांगा, तां अपने दोस्तां या भाईयां या रिश्तेदारां या अमीर पड़ोसियां जो मत सददा, की इयां ना हो, की सै भी तिजो सदन, कने जडा तू खाणा खुआया उदा बदला होई जाए।” 13 “पर जालू तू रोटी खाए, तां गरीबां जो, लंगड़यां जो कने अन्नयां जो सदी लियां। 14 तालू तू धन्य होणा, क्योंकि उना बाल तिजो देंगे तांई कुछ नी है, पर जालू धर्मी लोकां दे फिरी जिन्दा होई जाणा तालू परमेश्वरे तुहांजो इदा इनाम देणा।” 15 उदे सोगी रोटी खाणे बालयां चे इकी ऐ गल्लां सुणिकरी उसयो बोलया, “धन्य है सै, जडा परमेश्वरे दे राज्य दिया धाम च शामिल होंगा।” 16 उनी उसयो बोलया, कुनकी माणुए बड़ी बड़ी धाम दिती कने मतयां जो सदया। 17 जालू खाणां तैयार होई गिया, तां उनी अपने नोकरे जो भेजया कि जिना जो न्युंद्र दितियो उना लोकां जो बोली ओआ, की ओआ, खाणां तैयार है। 18 पर सै सारे दे सारे माफी मंगणा

लगे, पेहले माणुए उसला बोलया, मैं खेतर खरीदया है कने जरूरी है की मैं उसयो दिखें; मैं तिजो ने बिनती करदा है, की मिंजो माफ करी दे। 19 दूए माणुए बोलया, मैं पंज जोड़ी दांद खरिदयो न, कने उना जो परखणा जाणा है; मैं तिजो ने बिनती करदा है की मिंजो माफ करी दे। 20 इकी होरनी बोलया, की मैं बियाह कितया है, इस ताई मैं नी आई सकदा है। 21 उनी सेवके आई करी अपने मालिके ने ऐ गल्ल सुणाई। तालू घरे दे मालिके गुस्से च आई करी बोलया, शेहरे दे बजारां कने गलियां च जाई करी झट कंगालां, टुंडे, लंगडयां कने अन्नयां जो ऐथू लेई ओआ। 22 सेवके फिरी बोलया, हे मालिक, जियां तू बोलया था, तियां ही कितया है; फिरी भी जगा है। 23 “मालिके सेवके ने बोलया, सड़कां कने बागां च जाई करी लोकां जो मजबूर करी के लेई आए ताकि मेरा घर भरू जा। 24 क्योंकि मैं तुसां ने बोलदा है, की पेहले सदयो होए लोकां चे कोई भी मेरिया रोटिया जो नी चखगा।” 25 कने जालू मती भीड़ यीशुए सोगी चलियो थी, तां उनी पिच्छे मुडी करी उसला बोलया। 26 “जडे लोक मेरे बाल ओदे न, सै तालू दीकर मेरे चले नी बणी सकदे, जालू दिकर अपने माता-पिता कने घरे बाली कने बच्चे कने भाई बेंहण कने अपने आपे ला जादा प्यारा मिंजो ने नी करदे।” 27 जडा मेरिया बजा ला दुख सेहन कने मरणे ताई तैयार नही है, सै भी मेरा चेला बणने दे लायक नही है। 28 “अगर तुसां चे कोई इक बड़ा बड़ा घर बणाणा चांदा हो, तां उनी सबते पेहले बेईकरी इसा गल्ला दा हिसाब लाणा की इसयो बणाणे च कितणा खर्चा ओणा, कने दिखणा की इसयो पूरा करणे ताई पूरा पैसा है की नी।” 29 अगर उनी इयां नी किता, तां उनी जालू नियां पाई करी घरे जो पूरा तैयार नी करी सकणा, तां सारे दिखणे बाले ऐ बोलिकरी उदा मजाक उडाणा, 30 की इनी माणुए घर बणाणा तां शुरू किता, पर पूरा बणाई नी सकया? 31 “अगर इक राजा दस हजार माणुआं जो लेईकरी दूए राजे ने लडना चलया हो, जडा बी हजार माणुआं जो लेईकरी उस पर हमला करणा ओआ दा हो, तां सबते पेहले बेईकरी इसा गल्ला पर बिचार करे की जडा बी हजार लेईकरी मिंजो ने लडना ओआ दा है, क्या मैं उदा सामणा करी सकदा है की नी?” 32 नितां उदे दूर रेंदे ही, उसला संधी करणे दे बारे च गल्ल बात करणे ताई सै दूतां जो भेजे। 33 इयां ही तुसां चे जडा कोई अपना सब कुछ छडी दे, सै ही मेरा चेला होई सकदा है। 34 लूँ तां खरा होंदा है, पर अगर उदा स्वाद बिगडी जा, तां उदा स्वाद कियां नमकीन करणा? 35 “सै तां ना जमिना दे

ना तां खादी दे कम्मे ओंदा है: उसयो तां लोक बाहर फेंकी दिन्दे न। जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।”

15 सारे कर लेणेबाले कने पापी लोक यीशु बाल ओंदे थे ताकि उदी सुणन। 2 कने फरीसी कने व्यवस्था जो सिखाणे बाले बोलणा लग्गे, “ऐ तां पापी लोकां ने मिलदा है कने उना सोगी खाणा खांदा है।” 3 तालू उनी उना जो ऐ कहाणी सुणाई; 4 “अगर तुसां चे कुसी बाल सो भेडां होन, कने उना चे इक गबाची जाये तां सै उना नडिनुऐ भेडां जो सुनसान जगा च छडी करी, उसा गबाचिया जो तालू दीकर तोपे जालू दीकर सै मिल्ली न जा।” 5 कने जालू मिली जांदी है, तां सै बडिया खुशिया ने उसा जो मुंडे पर चुकी लेंदा है। 6 कने अपने घरे आई करी दोस्तां कने पडोसियां जो गिठे करी के बोलदा है, मेरे सोगी खुशी मना क्योंकि मेरी गबाचियो भेड मिली गई है। 7 मैं तुसां ने बोलदा है; की इयां ही इक मन बदलने बाले पापिये दे बारे च स्वर्गे च इतणी ही खुशी होणी, जितनी की उना नडिनुए धर्मियां दे बारे च नी होंदी जडे सोचदे न की सै धर्मी न, कने जिना जो पञ्चाताप दी जरूरत नी है। 8 तालू यीशुऐ इक होर कहाणी सुणाई अगर कुसी जनानिया बाल दस चांदी दे सिक्के होन, कने उना चे इक सिक्का गबाची जाए; तां सै दिय्या वाली करी कने पूरे घरे च बोंखरिया ने सोतया, तालू दीकर सै ध्यान लगाई करी तोपदी रेई जालू दीकर तोपी ना ले। 9 कने जालू मिली जांदा है, तां सै अपणियां सेलियौ कने पडोसियां जो गठेरी करी बोलदी है, की ओआ मरे सोगी खुशी मना क्योंकि मेरा गबाचया सिक्का मिली गया है। 10 “मैं तिजो ने बोलदा है; की इयां ही इक पापी माणु जालू अपने पापां जो मन्नी लेदां है, तां परमेश्वरे दे स्वर्गदूत उस पापी ताई खुशी मनादे न।” 11 फिरी उनी इक होर कहाणी सुणाई, इकी माणुऐ दे दो पुत्र थे। 12 उना चे छोटे जागते पिता ने बोलया, पिता जी, की जडा हिंसा मेरा जमीन जयादात च है, सै हुण मिंजो देई दिया। कने पिता उना जो अपणी सारी जमीन जयादाद दोनो जागतां बिच बंडी दिती। 13 “कने कुछ दिना बाद की छोटा पुत्र सारा कुछ गठेरी करी दूर कुसी देशे जो चली गया कने ओथु बुरे कम्मा कने खाणे पिणे च अपणी सारी धन दौलत उडाई दिती।” 14 जालू सै सारा कुछ खचीं बैठा, कने उसी देशे बडा बडा अकाल पेई गया, कने उस बाल खाणे पीणे जो कुछ नी बचया। 15 कने सै उसी देशे दे रेहणे बाले इक माणुऐ दे घरे कम्म करणे ताई गया।

उनी उसयो अपने खेतरां च सूअरां जो चुगाणे ताई भेजया। 16 कने सै इतणा भूखा था, की सै उना फलियाँ जो खाणे ने इतणा खुश था जिना जो सूअर खांदे थे, क्योंकि उसयो कोई कुछ नी दिन्दा दा खाणे जो। 17 जालू उसयो समझ आई तां सोचणा लग्गा कने बोलणा लग्गा, की मेरे पिता दे कितणे ही मजदुरां जो खाणे ला जादा रोटी मिलदी है, पर मैं ऐथू भूखा मरा दा। 18 मैं हुण उठी करी री अपने पिता बाल जाणा है कने बोलणा की पिता जी मैं परमेश्वर दे खिलाफ च कने तेरिया नजरा च पाप कितया है। 19 हुण इसी जोगा नी है की तेरा पुत्र बणे, मिजो अपने इकी मजदूरे साईं ही रखी ले। 20 तालू उनी उस देशे जो छडी दिता कने अपने पिता बाल जाणे ताई बापस चली पिया, सै अजे दूर ही था, की उदे पिता जो उसयो दिखीकरी तरस आई गया, कने उस पासे दोड़ी करी उसयो गल्ले लाई लिया, कने बडे चूमे ले। 21 पुत्रे उसला बोलया, पिता जी, मैं परमेश्वरे दे खिलाफ च कने तेरिया नजरा च पाप कितया है; कने मैं हुण तेरा पुत्र होणे जोगा नी रिया है। 22 पर पिता अपने नोकरां ने बोलया, झट छेल दे कपडे कडी करी इसयो पेहना, कने इदिया उंगलियां च गुन्ठिया कने पैरां च जूतियां पेहना, 23 कने इक बड़ी बडी धाम तैयार करा ताकि असां खाई करी खुशी मनान। 24 क्योंकि मैं सोचया था की मेरा ऐ पुत्र मरी गया है, पर ऐ मरया नी है: गवाची गया था, पर हुण मिली गया है। कने सै खुशी मनाणा लग्गे। 25 जालू ऐ सब होआ दा था पर उदा जेठा पुत्र खेतरां च कम्म करा दा था। कने सै जालू घरे बखे पुज्जा, तां उनी गाणे-बजाणे कने नचणे दा रोल्ला सुणया। 26 कने उनी इकी नोकरे जो सदीकरी पुछया, ऐ क्या होआ दा है? 27 उनी उसला बोलया, तेरा भाई घर बापस आया है, कने तेरे पिता बड़ी धाम तैयार कितयो है, क्योंकि सै भला चंगा घर बापस आया है। 28 ऐ सुणिक्री उसयो बडा गुस्सा आई गया कने सै घरे अंदर नी जादा था, इस ताई उदा पिता बाहर आई करी उसयो अंदर चलणे ताई मनाणा लग्गा। 29 उनी पिता जो जबाब दिता, की दिख; की मैं इतणे सालां ला तेरी सेबा करा दा है, कने कदी तेरी गल्ल नी टाल्ली, तमी तू मिजो अजे दीकर कदी तू मिजो कुछ खरा नी दिता, की मैं अपने दोस्तां सोगी खुशी मनां। 30 पर जालू तेरा ऐ पुत्र आया, जिनी तेरी सारी धन दौलत कन्जरियां पिच्छे उडाई करी आया है, तां तू इदे ताई बडी धाम लगायी। 31 “उनी उसला बोलया, मेरा पुत्र तू हेमेशा मेरे सोगी है; कने जडा कुछ मेरा है सै सब कुछ तेरा ही है। 32 पर हुण तिजो खुशी मनाणी कने मगन होणा

चाईदा क्योंकि तेरा ऐ भाई मरी गया था पर ऐ मरया नी है: गवाची गया था, पर हुण मिली गया है।”

16 फिरी उनी चेलयां जो भी कहाणी सुणाई, कुसकी इक अमीर बन्दे दा इक भंडारी था, कने लोकां उदे सामणे उस पर इलजाम लगाया की ऐ तेरिया धन दौलत जो उडाई दिन्दा है। 2 कने उनी अमीर बंदे अपने भंडारी जो सदीकरी बोलया, ऐ क्या है जडा मैं तेरे बारे च मैं क्या सुणादा है? तू मेरे पैसयां दा क्या कितया है सारा हिसाब दे; क्योंकि तू अजे बाद भंडारी नी है। 3 “तालू भंडारी सोचणा लग्गा, की हुण मैं क्या करे? क्योंकि मेरा मालिक मिंजो भंडारी दे कम्मे ला कडा दा है: कोई मेहनत बाला कम्म तां मिंजो ला होंदा नी, कने भीख मंगणे ने मिंजो शर्म ओदी है।” 4 मिंजो पता है की क्या करणा ताकि जालू मिंजो भंडारिये दे कम्मे ला कडया जांगा तां लोक मेरी मदद करन। 5 कने उनी अपने मालिके दे देणदारां जो इक-इक करी के सदया कने पेहले ला पुछया, की तिजो पर मेरे मालिके दा कितणा कर्ज है? 6 उनी बोलया, 3,700 लिटर तेल, तालू उनी उसला बोलया, की अपणी खाता बही ले कने बेईकरी झट 1,850 लिटर तेल लिखी दे। 7 फिरी दुज्जे ला पुछया, तिजो पर कितणा कर्ज है? उनी उसला बोलया, 20,000 किलो कणक, तालू उनी उसयो बोलया, अपना बही खाता ले कने 16,000 किलो कणक लिखी दे। 8 मालिके उस अधर्मी भंडारी दी तारीफ किती, की उनी चलाकिया ने कम्म कितया है; क्योंकि इसा दुनिया दे लोक अपने बकते दे लोकां सोगी व्यवहार करणे च ज्योति दे लोकां ला जादा चलाक न। (aiōn g165) 9 कने मैं तुसां ने बोलदा है, की संसारिक पेसे ने अपने ताई मित्र बनाई लिया; ताकि जालू ऐ पैसा नी रेंगा तां अनन्तकाल दे घरे च तुहांजो रेहणे ताई जगा दे। (aiōnios g166) 10 जडा छोटिया-छोटिया गल्लां च भरोसे दे लायक है, सै बडियां गल्लां च भी भरोसे दे लायक है: छोटिया-छोटिया गल्लां च भरोसे दे लायक नी है, सै बडियां गल्लां च भी भरोसे दे लायक नी है। 11 इस ताई जालू तुसां संसारिक पेसे च भरोसे दे लायक नी, तां तुहांजो स्वर्गे दा धन कुनी देणा? 12 अगर तुसां होरसी दे पैसे च भरोसे दे लायक बणी रे, तां जडा तुहाडा है, उसयो तुहांजो कुण दिंगा? 13 “कोई सेवक दो मालिकां दी सेवा नी करी सकदा: क्योंकि उनी इकी ने बेर कने इकी ने प्यार रखणा; या इकी ने मिली की रेंगा कने दुज्जे जो बुरा समझणा: तुसां परमेश्वर कने धन दौलत दोनो दी सेवा नी करी सकदे।” 14 फरीसी जडे लालची थे, ऐ

सारियां गल्लां सुणिकरी उदा मजाक उडाणा लग्गे। 15 यीशुए उना ने बोलया, “तुसां तां माणुए दे सामणे अपणे आपे जो सही दसदे न: पर परमेश्वर तुहाडे मने जो जाणदा है, जडी चीज आदमियां दिया नजरा च बडी जरूरी है, सै परमेश्वरे दिया नजरा च बुरी है।” 16 जालू यूहन्ना बपतिस्मा देणेबाला आया, उसला पेहले मूसा दी व्यवस्था कने परमेश्वरे दा संदेश देणेबाले तुहाडे मार्गदर्शक थे, पर परमेश्वरे दे राज्य दा शुभसमाचार दा प्रचार सुणाया जादा है, कने हर कोई परमेश्वरे दे राज्य अंदर जाणे तांई उताबले न। 17 “परमेश्वरे दिया व्यवस्था दे इक बिन्दुए दे मिटी जाणे ला, अम्बर कने धरतिया दा खत्म होई जाणा असान है।” 18 उदाहरण तांई जडा कोई अपणिया घरे बालिया जो छडी करी दुजिया ने बियाह करदा है, सै ब्यभिचार करदा है, कने जडा कोई ऐदिया जनानिये ने बियाह करदा है, सै भी ब्यभिचार करदा है। 19 यीशुए इक होर कहाणी सुणाई इक अमीर माणु था सै बडे मेंगे कने मलमले दे कपडे पेहनदा था कने हर रोज शानदार खाणा खादां कने ठाठ बाठ ने रेंदा था। 20 कने लाजर नाए दा इक गरीब जिदे शरीर च फोड़े थे उसयो लोक उस अमीर माणुए दे घरे बाहर छडी दिन्दे थे। 21 कने सै चांदा था, की अमीर माणुए दे खाणे बाद बचयो जूठे टुकड़यां ने अपणा पेट भरे, कने कुत्ते भी आई करी उदे जखमा जो चटदे थे। 22 कने इयां होया की सै गरीब मरी गया, कने स्वर्गदूत लाजर जो पूर्वज अब्राहम बाल लेई गया। कने सै अमीर भी मरया कने दबी दिता, 23 कने पताल च पीडा ने तड़फदे होए उनी उपर दिखया कने दुरे ला लाजर जो अब्राहमे दे बखे बैठया दिखया। (Hadēs g86) 24 कने उनी जोरे ने अब्राज लाईकरी बोलया, हे पिता अब्राहम, मिंजो पर दया करी के लाजरे जो मिंजो बाल भेजी दे, ताकि सै मिंजो अपणिया उंगलियां दे सिरे जो सेडी करी मेरिया जीभा जो ठंडा करे, क्योंकि मैं इसा अग्गी ने तड़पा दा है। 25 पर अब्राहमे बोलया, हे पुत्र याद कर, की तू अपणिया जिंदगियां च खरियाँ चिजा लेई बैठया है, कने तियां ही लाजर जो सारियां बुरियां चिजां पर इसयो हुण ऐथू शांति मिल्ला दी है, कने तू तड़फा दा है। 26 कने इना सारियां गल्लां जो छडी करी साडे कने तुहाडे बिच इक बडी बड्डी खाई है ताकि जडा ऐथू ला उस पार जाणा चा सै ना जाई सके, कने ना कोई ओथु ला इस पार साडे बाल आई सके। 27 उनी बोलया, हे पिता जी, मैं तिजो ने बिनती करदा है, की तू लाजर जो मेरे पिता दे घरे भेज, 28 क्योंकि मेरे पंज भाई न, मैं चांदा है की लाजर जाए कने मेरे भाईयां जो

चेताबनी दे, इयां ना होऐ की सै भी इसा पीड़ा दिया भयानक जगा च ओन। 29 अब्राहमे उसला बोलया, उना बाल चेताबनी देणे ताई तां मूसा दी व्यवस्था कने परमेश्वरे दा संदेश देणेबाले न, उना जो इना जो सुणना चाईदा। 30 “उनी बोलया, नि, पिता अब्राहम; पर अगर कोई उना जो चेताबनी दे, तां उना अपने पापां दा पश्चाताप करणा है। 31 अब्राहमे उसयो बोलया, जद सै मूसा कने परमेश्वरे दा संदेश देणेबालयां दी नी मंदे न, तां अगर कोई मरयां चे जिन्दा होई जा तां उना उदी गल्लां दा भी भरोसा नी करणा।”

17 फिरी यीशुऐ अपने चेलयां बोलया, ऐ गल्ल ता पक्की है कि परिक्षां माणुऐ पर जस् ओणियां न जड़ा उना जो पाप करणे दी बजा बणगा, पर हाय उसी माणुऐ पर, जिदिया बजा ने सै ओदियां न। 2 पर जड़ा कोई इना छोटयां चे कुसी इकी जो भी भरोसे ला भटकांदा है या उना दे पाप करणे दी बजा बणदा है, उदे ताई तां खरा होंदा, कि उदे गले च बट्टे घराटे दा पथर लटकाया जाए, कने डुगे समुंद्रे च डोबया जाए। 3 “ध्यान रखा; अगर तेरा मसीह भाई गलत कम्म करे तां उसयो समजाआ, कने अगर सै पछतांगा तां उसयो माफ करी दे।” 4 “अगर सै दिन भर च सत बरी तिजो ने गलत करे कने सतों बरी तेरे बाल आई करी बोले, की मैं पछतादां है, तां उसयो माफ करी दे।” 5 तालू प्रेरितां प्रभु यीशु ने बोलया, “साडे भरोसे जो होर जादा बढ़ा कने मजबूत करा।” 6 प्रभुऐ बोलया, अगर तुहाड़ा भरोसा राईया दे दांणे बराबर भी होंदा, तां अगर तुसां इस तुते दे रखे जो बोलदे की तू जड़ा ला उखड़ी करी समुंद्रे च लगी जा, तां उनी तुहाड़ी मनी लेणी। 7 अगर तुहाड़ा सेवक हल जोती करी, या भेडां चुगाई करी बापस घरे जो ओऐ, तां उसयो बोले, झट आ कने रोटी खाई ले? 8 ना, उनी तां इयां बोलणा, की मिंजो ताई रोटी बणा कने जालू दीकर मैं रोटी खां तालू दीकर मेरी सेबा करणे ताई तैयार रे इदे बाद तू भी खाई लियां? 9 क्या तुसां अपने सेवके जो उस कम्मे जो करणे ताई धन्यवाद नी करगे जड़ा तुसां उसयो करणे ताई बोलया था? 10 “इयां ही जालू तुसां सै सब कुछ करी लिया हो जड़ा तुसां जो करणे ताई बोलया था, तां तुसां जो ऐ बोलणा चाईदा, असां निकम्मे सेवक न; की जड़ा सांझो करणा चाईदा था सेई असां कितया है।” 11 जालू यीशु कने उदे चेले यरूशलेम शहरे जाणे बाले रस्ते पर चलयो थे, सै सामरियां कने गलील प्रदेश ला होईकरी जा दे थे। 12 कने कुसकी गांऐ ला जांदे बेले उसयो दस कोढ़ी मिल्ले। 13 कने उना दुरे ला ही खडोई करी, “जोरे

ने बोलया, यीशु जी, मालिक जी, सांझो पर दया कर।” 14 यीशुए उना जो दिखीकरी बोलया, “यस्शलेम दे मंदिर च जाओ; कने अपने आपे जो याजकां जो दस्सा कि तुसां खरे होई गियो न” कने सै जादे-जादे ही ठीक होई गे। 15 तालू उना चे इकी ऐ दिखया की मैं ठीक होई गया है, सै जोरे ने बोली करी परमेश्वरे दी बड़ाई करदा यीशुए बाल बापस आया; 16 कने यीशुए दे पैरां पर झुकी करी धन्याबाद करणा लगा; कने सै सामरी था। 17 इसा गल्ला पर यीशुए बोलया, क्या सै दसो जणे ठीक नी होऐ, तां सै होर नौ जणे कतां न? 18 “क्या इस गैर यहूदी जो छडी करी कोई होर नी निकलया, जडा परमेश्वरे दी बड़ाई करदा है?” 19 तालू यीशुए उसला बोलया, “उठी करी चली जा; क्योंकि तू भरोसा कितया है की तू ठीक होई गया है।” 20 जालू फरीसियां उसयो पुछया, की परमेश्वरे दा राज्य कालू ओणा है? तां यीशुए उना जो जबाब दिता, “परमेश्वरे दा राज्य इयोदिया नी है, जिसयो तुसां दिखी सकदे न। 21 कने लोकां ऐ नी बोलणा, की दिखा, ऐथू है, या ओथु है। क्योंकि दिखा, परमेश्वरे दा राज्य तुहाड़े बिच है।” 22 कने यीशुए चेलयां ने बोलया, सै दिन ओणे न, जिना च तुसां माणुऐ दे पुत्रे दे रोजां चे इकी रोजे जो दिखणा चाणा है, पर नी दिखी सकणा है। 23 लोकां तुसां ने बोलणा, दिखा मसीह ओथु है! या दिखा ऐथू है! पर तुसां चली मत जांदे कने पिच्छे ही मत होई जांदे। 24 क्योंकि जियां बिजली अम्बरे दे इकी छोरे ला दुए छोरे दीकर चमकदी है, तियां ही मैं माणुऐ दे पुत्रे भी अपने रोजे च सामणे ओणा है। 25 पर पेहले बड़ा जरूरी है, की सै बड़े जादा दुख झेले, कने उसयो इसा पीढी दे लोक निच बोलन। 26 जियां साड़े पूर्वज नूह दे रोजां च होया था, तियां ही माणुऐ दे पुत्रे दे रोजां च होणा है। 27 जिस रोजे दीकर नूह जहाजे पर नी चढ़या, उस दिने दीकर लोक खांदे पिंदे थे, कने उना च बियाह शादियां होंदिया थियां; तालू जल-प्रलय आई कने सब कुछ खत्म करी दिता। 28 कने तियां रिती ला ही साड़े पूर्वज लूत दे रोजां च होया था जडा सदोम शेहरे च रे दा था, की लोक खांदे-पिंदे कने लेंग देंग करदे, कने पेड़ लागादे कने घर बणादे थे; 29 पर जिस रोजे लूत सदोमे ला निकलया, उस रोजे अम्बरे ला अग्ग गन्धक बरसी कने सारे लोकां जो जड़े शहर च रेंदे थे खत्म करी दिता। 30 कने सै रोज भी इयोदिया होणा, जालू मैं माणुऐ दे पुत्रे इयां ही इकदम दोबारा बापिस ओणा है। 31 उस रोजे जडा छती पर होंगा, कने उदा समान घरे हो, तां सै उसयो लेंगे ताई थले ना उतरे, कने तियां ही जडा खेतेरे जो गया हो

सै बापस नी ओऐ। 32 साड़े पूर्वज लूत दी घरे आली जो याद रखा, की उसा कने क्या होया था। 33 जड़ा कोई अपने प्राणा जो बचाणा चाहंगा, उनी परमेश्वरे सोगी आत्मिक जिन्दगी जिणे दा मोका खोई देणा है। जड़ा कोई मेरे ताई अपनी जान गबांगा उसयो परमेश्वरे सोगी सदा ताई दी जिन्दगी मिलणी। 34 मैं तुसां ने बोलदा है, उसा राती दो माणु इकी मंझे पर होणे, पर इक लेई जाणा कने दुज्जे जो छडी देणा है। 35 “दो जनानिया सोगी चक्की पियाँ दियां होणियां, इक लेई जाणी कने दुई छडी देणी। 36 (दो जणे खेतेरे च होणे न, इक लेई जाणा कने दूजा छडी देणा।)” 37 ऐ सुणीकरी उना उसला पुछया, हे प्रभु ऐ कुथु होणा है? उनी उना ने बोलया, हर कोई जाणदा है ऐ कुथु होणा है तियां सारे जाणदे न जिथू लाश है, ओथु इल्लां गिठियां होंदियां न।

18 फिरी यीशुऐ अपने चेलयां जो इदे बारे बोलया की रोज प्राथना करणा कने कदी हिम्मत नी छडणी चाईदी, इस ताई उना ने ऐ कहाणी सुणाई: 2 “कुसकी शेहरे च इक न्यायधीश रेंदा था; सै ना परमेश्वरे ला डरदा था ना कुसी माणुऐ दी परवाह करदा था।” 3 कने उसी शेहरे च इक बिधवा भी रेंदी थी: जड़ी उदे बाल आई करी बोलदी थी, की मेरा न्याय करी के मिजो दुशमणे ला बचाई ले। 4 कने बडे दिना दीकर तां मनया नी पर आखरी च मने च सोची करी बोलया, मैं ना परमेश्वरे ला डरदा, कने ना आदमियां दी परवाह करदा है; 5 तमी ऐ बिधवा मिजो तंग करदी रेंदी है, इस ताई मैं इसा दा न्याय करणा है, कुथी इयां ना हो की बार-बार आई करी आखरी च मिजो बुरी तरह थकाई दे। 6 प्रभु ने बोलया, सुणा, की इनी अधर्मी न्यायधीशे क्या बोलया है, उस बारे च ध्याने ने सोचा। 7 क्या परमेश्वर अपने चुणयो लोकां दा न्याय नी करणा, जड़े रात-दिन उदे सामणे रोंदे न; परमेश्वरे उना दी मदद करणे च देर नी करणी है? 8 “मैं तुसां ने बोलदा है; उनी झट उना दा न्याय करणा; तमी जालू मैं, माणुऐ दे पुत्रे बापस धरती ओणा, तां मिजो हेरानी होंदी है की क्या मिजो धरतिया पर ऐसा माणु मिलगा जड़ा मिजो पर भरोसा करदा हो।” 9 कने यीशुऐ उना लोकां ने जड़े अपने बारे च सोचदे न, की असां धर्मी न, कने दुजयां जो निच बोलदे थे, ऐ कहाणी सुणाई 10 “दो माणु मंदरे च प्राथना करणा गे; इक फरीसी था कने दूजा कर लेणे बाला था। 11 फरीसी खडोई करी अपने मने च इयां प्राथना करणा लगा, की हे परमेश्वर, मैं तेरा धन्यवाद करदा है, की मैं होरनी माणुऐ सांई बुरा करणे बाला, अन्यायी कने व्यभिचारी नी है, कने ना ही इस कर

लेणेबाले सांई है। 12 मैं हफ्ते च दो बरी बरत रखदा है; मैं अपणिया कमाईया दा दसमां हिसा भी तुसां जो दिन्दा है। 13 पर कर लेणेबाले दुर खडोई करी, स्वर्गे पासे दिखणा भी नी चाया, पर सै दुखे ने अपणिया छातिया पिटी-पिटी करी बोलणा लग्गा, हे परमेश्वर मैं पापी है, मिंजो पर दया कर, मिंजो माफ कर। 14 यीशुऐ बोलया मैं तुसां ने बोलदा है, की ऐ चुंगी लेणे वाला था ना की फरीसी माणु जड़ा परमेश्वरे सामणे धर्मी दसया; क्योंकि जड़ा कोई अपने आपे जो बड़ा महान बणागा, सै छोटा करी देणा है; कने जड़ा अपने आपे जो छोटा बणागा, उसयो आदर मान मिलणा।” 15 फिरी लोक अपने बचयां जो यीशुऐ बाल लोणा लग्गे, ताकि सै उना पर हथ रखे; कने चेलयां दिखीकरी उना जो डांटया। 16 यीशुऐ बचयां जो अपने बाल सदीकरी बोलया, बचयां जो मना मत करा कने इना जो मेरे बाल ओणा दिया, क्योंकि परमेश्वरे दा राज्य उना दा है जड़ा इना बचयां सांई है। 17 मैं तुसां ने सच्च बोलदा है, परमेश्वरे अपने राज्य च सिर्फ उना लोकां जो ओणा देणा है जडे परमेश्वरे दे राज्य जो बचयां सांई अपनांदा है। 18 कुंनकी यहूदी अधिकारिये उसला पुछ्या, “उत्तम गुरू जी, मैं क्या कम्म करां की परमेश्वर मिंजो हमेशा दी जिन्दगी दे?” (aiōnios g166) 19 यीशुऐ उसयो बोलया, तुसां मिंजो कजो उत्तम बोलदे न, उत्तम तां सिर्फ इक ही है, सै परमेश्वर है। 20 तू परमेश्वरे दे हुक्मा जो तां जाणदा है की: “व्यभिचार नी करणा, झूठी गबाई नी देणी, अपने माता पिता दा आदर करणा।” 21 उनी बोलया, “मैं तां इना सबना हुक्मा जो तां बचपन ला मनदा आया है।” 22 ऐ सुणीकरी, यीशुऐ उसला बोलया, तिजो च अजे भी इक गल्ला दी कमी है, जा, कने जड़ा कुछ तेरा है उसयो बेची करी गरीबां जो देई दे, तां तिजो स्वर्गे दा धन मिलणा, इयां करणे बाद आ कने मेरा चेला बणिया। 23 सै ऐ सुणीकरी बड़ा उदास होई गया, क्योंकि सै बड़ा अमीर था। 24 यीशुऐ उसयो दिखीकरी बोलया, अमीरां दा परमेश्वरे दे राज्य च जाणा बड़ा मुशकिल है। 25 ऊंटे दा सुइया दे नाके चे निकलना असान है, पर अमीरां दा परमेश्वरे दे राज्य च जाणा बड़ा भरी मुशकिल है। 26 कने सुणने बालयां बोलया, “अगर ऐसा है तां कुण अपने पापां दी सजा मिलणे ला बची सकदा है?” 27 यीशुऐ जबाब दिता, “जड़ा माणुऐ ला नी होई सकदा है सै परमेश्वरे ला होई सकदा है।” 28 पतरसे यीशुऐ जो पुछ्या, दिख, असां तां घर-बार छडी करी तेरे पिच्छे चलयो न। 29 यीशुऐ उना जो जबाब दिता, “मैं तुसां ने सच्च बोलदा है, जिनी भी परमेश्वरे दे

राज्य ताई घर, या घरे बाली, या भाई, या माता पिता, या बाल बचयां जो छडी दितया हो। 30 कने इस बेले केई गुणा जादा मिलणा; पर परलोके च हमेशा दी जिन्दगी मिलणी।” (aiōn g165, aiōnios g166) 31 फिरी यीशुए बाहरां चेलयां जो एकांत च लेईजाई करी उना ने बोलया, दिखा, असां यरूशलेम शहरे जो जाणा है, कने जितणियां भी गल्लां मेरे, माणुए दे पुत्रे ताई परमेश्वरे दा संदेश देणेबालयां लिखियां न सै सारियां पुरियां होणियां न। 32 “क्योंकि सै होर जातियां दे हथे देई देणा है। कने उना मेरा मजाक उड़ाणा है, कने मेरी निंदा करी के मिंजो पर थुकणा, 33 कने मिंजो कोड़े मारणे, कने मिंजो मारी देणा है, कने मैं तिजे दिने मैं मरयां चे जिंदे होई जाणा है।” 34 कने चेलयां इना गल्लां चे कोई भी गल्ल नी समझ आई: कने ऐ गल्ल उना च ही लुक्की रेई, कने जड़ा बोलया था सै उना दिया समझा च नी आया। 35 जालू यीशु यरीहो शहरे दे बखे पुज्जा, तां इक अन्ना सड़का कंडे बेईकरी भिख मंगा दा था। 36 कने भिड़ा दी चलने दी अबाज सुणीकरी पुछणा लगा, ऐ क्या होआ दा है? 37 उना उसयो दसया, “नासरत दा यीशु मसीह जा दा है।” 38 तालू उनी अबाज लाईकरी बोलया, “हे यीशु, राजा दाऊदे दे बंशज, मिंजो पर दया कर।” 39 जड़े अगो-अगो चलयो थे, सै उसयो डांटणा लग्गे की चुप रे: पर सै होर जोरे ने बकणा लगा, “हे राजा दाऊदे दी बंशज मिंजो पर दया कर।” 40 तालू यीशुए ऐ सुणया कने स्की करी बोलया, “उसयो ऐथू लोआ।” कने तालू सै बखे आया तां यीशुए उसयो पुछया, 41 “तू क्या चांदा है की मैं तेरे तांई करे?” अन्ने उसने बोलया, गुरू जी, ऐ की मिंजो मिलणा लगी पोए। 42 यीशुए उसयो बोलया, “दिखणा लग, तेरे भरोसे जड़ा मिंजो पर है तिजो ठीक करी दिता है।” 43 कने सै झट मिलणा लगी पिया; कने परमेश्वरे दी बड़ाई करदा होया उदे पिच्छे चली पिया, कने सारे लोंका ऐ दिखीकरी परमेश्वरे दी स्तुति किती।

19 यीशु यरीहो शहर ला होईकरी जा दा था। 2 कने दिखा, जक्कई नाए दा इक माणु था जड़ा चुंगी लेणेबालयां दा सरदार कने अमीर था। 3 सै यीशुए जो दिखणा चांदा था की सै कुण दिया है? पर भिड़ा दिया बजा ने सै दिखी नी सका दा था। क्योंकि सै छोटे कदे दा माणु था। 4 तालू सै उसयो दिखणे तांई अगो दोडी करी इक गल्ल दे स्रखे पर चढी गया, क्योंकि यीशु उसी रस्ते ला जाणे बाला था। 5 जालू यीशु उसा जगा पर पुज्जा जिथू जक्कई था, तां यीशुए उपरे पासे दिखीकरी बोलया, हे जक्कई, झट उतरी आ; क्योंकि अज मिंजो तेरे घरे रेणा जरूरी है। 6

सै झट सखे ला उतरया कने यीशुऐ जो खुशिया ने अपने घरे जो लेई गया, कने खुशिया सोगी उदा स्वागत किता। 7 ऐ दिखीकरी सारे लोक बुडबड़ाणा लग्गे, “की सै तां इक पापी माणुऐ दे घरे चली गया है।” 8 जक्कई खाणे दे बक्ते खड़ोई करी यीशु ने बोलणा लग्गा, “प्रभु जी, दिख मिंजो बाल जडा कुछ है सै गरीबां जो दिन्दा है, कने अगर मैं लोकां ला चुंगी लेणे च बेईमानी कितियो है तां उसयो चार गुणा बापस करी दिन्दा है।” 9 तालू यीशुऐ उसला बोलया, अज इसी घरे दे लोकां बिच उद्गार आया है, क्योंकि ऐ भी अब्राहमे दा बंशज है। 10 “क्योंकि मैं, माणुऐ दा पुत्र गवाचयां जो तोपणा कने उना जो अनन्त सजा ला बचाणे तांई आया है।” 11 जालू लोक ऐ गल्लां सुणा दे थे तां यीशुऐ उना जो इक कहाणी सुणाई, इस तांई की सै यरूशलेम शेहरे दे नेडे था, कने लोकां जो लगया की परमेश्वरे दा राज्य बस हूण ओणे बाला है। 12 यीशुऐ बोलया, इक अमीर माणु दूर देशे जो चलया ताकि राजपद पाई करी बापस आई जा। 13 कने उनी अपने दस सेवकां जो दस मुहरां दितियां, कने उना ने बोलया, मेरे बापस ओणे दीकर लेण देण करनयो। 14 पर उदे शेहरे बाले उसला बैर रखदे थे, उदे पिच्छे संदेश देणेबाले दूतां ने बोली भेजया, की असां नी चांदे न की ऐ सांझो पर राज करे। 15 जालू सै राजपद लेईकरी बापस आया, तां इयां होया की उनी अपने सेवकां जो जिना जो मुहरां दितियां थियां, अपने बाल सदया ताकि पता लग्गे की लेणे देणे ने उना क्या-क्या कमाया है। 16 तालू पेहले आई करी बोलया, हे मालिक तेरियां मुहरां ने मैं दस होर मुहरां कमाईया न। 17 उनी उसला बोलया, उत्तम सेवक, बड़ा खरा किता, तू बडे ही थोडे च भरोसे बाला निकलया हुणे ला तू दसां नगरां दा अधिकारी। 18 दुज्जे आई करी बोलया, हे मालिक तेरिया मुहरां ने मैं पंज होर मुहरां कमाईया न। 19 उनी उसला बोलया, जा तू भी पंजा नगरां दा अधिकारी। 20 कने तिजे आई करी बोलया, हे मालिक दिख, तेरी मोहर ऐ है, जिसा जो मैं गमछे च बनी करी रखया था। 21 क्योंकि मैं तिजो ला डरदा था, क्योंकि तू बड़ा सकत माणु है: जडा तू नी रखया होदा उसयो तू चुकी लेंदा, कने जडा तू नी राया है, उसयो तू बडदा है। 22 उनी उसला बोलया, हे निकम्मे सेवक, मैं तेरियां ही गल्लां ने तिजो दोषी बणादा है: तू मिजो जाणदा था की मैं सकत माणु है, जडा मैं नी रखदा है उसयो चुकी लेंदा है, कने जडा मैं नी राया उसयो बडी लेंदा है? 23 तां तू मेरे पैसे बयाजे पर महाजना बाल कनी रखी दिते, इयां करदा तां मैं आई करी

बयाजे समेत लेई लेँदा। 24 कने जडे लोक उदे बखे खडोतयो थे, मालिके उना ने बोलया, इसला मुहरां जो लेई लिया, कने जिसदे बाल दस मुहरां न उसयो देई दिया। 25 उना मालिके ने बोलया, हे मालिक, उस बाल दस मुहरां तां हेन। 26 मालिके उना जो बोलया, “जिना बाल समझणे दी इच्छा है जडा परमेश्वर सिखांदा है, उसयो परमेश्वरे होर समझ देणी, पर जडा समझणे दी इच्छा नी रखदा, की मैं क्या सिखांदां, तां थोडा जडा उसयो समझ आया से भी उसला लेई लेणा।” 27 “पर मेरे उना बैरियां जो जडे नी चांदे थे की मैं उना दा राजा बणा, उना जो मेरे सामणे लेई ओआ कने मारी दिया।” 28 ऐ गल्लां बोली करी यीशु अपने चेलयां सोगी यरूशलेम शहरे दे पासे उना दे अगे-अगे चलया। 29 कने सै जालू जैतून सूखां दे पाहडे पर बैतफगे कने बैतनिय्याह गांऐ दे बखे पुज्जा, तां उनी अपने दो चेलयां जो ऐ बोली करी भेजया, 30 सामणे दे गां च जा, कने ओथु पुजदे ही तुहांजो इक गधिया दा बच्चा बन्नया मिलणा है, उदे उपर हिली कोई नी बैठया था, सै खुंढे च बन्नया होणा उसयो खोली करी लेई ओआ। 31 “कने अगर कोई तुहांजो ला पुच्छे, की कजो खोला दे न, तां ऐ बोली देणा, कि प्रभु जो इसदी जरूरत है।” 32 जडे चले भेजयो थे, उना जाई करी सियुदा ही दिखया, जियां यीशुऐ बोलया था। 33 जालू सै गधे दे बच्चे जो खोला दे थे, तां उदे मालिके उना ला पुछया, “इसयो कजो खोला दे न?” 34 उना बोलया, “प्रभु जो इसदी जरूरत है।” 35 सै उसयो यीशुऐ बाल लेई आये कने अपने कपडे उदे उपर पाई दिते कने यीशु उस पर बैठी गया। 36 जालू यीशु गधे पर बेईकरी जा दा था, तां मतयां लोकां अपने कपडे रस्ते च बछाई दिते। 37 यरूशलेम शहरे जांदे बेले जालू यीशु जैतून सूखां दे पाहडे दिया उतराईया च पुज्जा, तां चेलयां दी सारी मंडली उना सारे अनोखे कम्मा दिया बजा ने जडे उना दिखयो थे, खुश होईकरी जोरे ने सारे परमेश्वरे दी स्तुति करणा लग्गे: 38 “धन्य हो सै राजा, जडा प्रभु दे नाऐ ने ओंदा है। स्वर्गे च शांति कने अम्बरे च महिमा हो।” 39 तालू भिडा चे कितणे ही फरीसी उसयो बोलणा लग्गे, “गुरू जी, अपने चेलयां जो ऐ गल्लां बोलणे तांई डांट।” 40 यीशुऐ जबाब दिता, “मैं तुसां ने बोलदा है, अगर ऐ लोक चुप रे, तां पथरां बोली पोणा है।” 41 जालू यीशु यरूशलेम शहरे बखे आया तां उस शहरे जो दिखीकरी रोया। 42 कने बोलया, की तेरे तांई कितणा भला होंदा, कि तू, इस रोजे तू परमेश्वरे दिया शांतिया दियां गल्लां समझदा जडियां तिजो शान्ति दिन्दियां, पर

हुण सै तेरिया नजरा ला लुक्की गियां न। 43 “क्योंकि सै दिन तिजो पर ओणे न जालू तेरे दुशमणा हर तरफा ला शेहर पर हमला करणा है, कने चारो पासे ला तुहांजो दबाई देणा है। 44 तेरे दुशमणा पूरी तराह ने शेहरे जो खत्म करी देणा कने तेरे सारे लोकां जो मारी देणा, कने तिजो च पथरे पर पथर भी नी छडणा है; क्योंकि तू सै मोका नी पछेणया जालू परमेश्वर तिजो बचाणे ताई आया था।” 45 तालू सै मंदरे च जाई करी बेचणे बालयां जो बाहर कडणा लग्गा। 46 कने यीशुऐ उना जो बोलया, पबित्र शास्त्र च लिखया है की, मेरा घर प्राथना दा घर होणा, पर तुसां तां इसयो डाकुआं ला भस्ईयो गुफा सांई बणाई दितया है। 47 कने सै हर रोज मंदरे च उपदेश दिन्दा था: कने बड्डे याजक कने यहूदी व्यवस्था जो सिखाणे बालयां कने बड्डे लोक उसयो मारणे दा मोका तोपदे रेंदे थे। 48 पर कोई तरिका नी तोपी सके; की ऐ कियां करणा, क्योंकि सारे लोक उसयो बड्डे चाऐ ने सुणदे थे।

20 इक रोज ऐसा होया की जालू यीशु लोकां जो मंदरे च उपदेश दे दा था, कने शुभसमाचार सुणा दा था, तां बड्डे याजक कने यहूदी व्यवस्था जो सिखाणे बाले कने यहूदी अगुवे यीशुऐ बाल आया। 2 कने बोलणा लग्गे, “सांझो दस, तू इना कम्मा जो कुस अधिकारे ने करदा है, कने सै कुण है, जीनी तिजो ऐ हक दितया है?” 3 यीशुऐ उना जो जबाब दिता, “मैं भी तुसां ला इक सबाल पुछदा है, मिंजो दसा तां मैं भी दसगा: 4 यूहन्ना जो लोकां जो बपतिस्मा देणे तांई कुनी भेजया था? क्या सै परमेश्वरे भेजया था या माणुऐ? मिंजो दसा।” 5 तालू सै अपु चे बोलणा लग्गे कि अगर असां ऐ बोलया कि, “परमेश्वर जडा स्वर्गे च है उनी भेजया है, तां यीशुऐ सांझो ला पुछणा, कि तुसां यूहन्ना पर भरोसा कन्नी किता?” 6 “अगर असां बोलया, माणुऐ दिया तरफा ला, तां सारे लोकां सांझो पथर मारणे, क्योंकि सारे लोक सची जाणदे न की यूहन्ना सच्चा परमेश्वरे दा संदेश देणेबाला था।” 7 उना जबाब दिता, “असां नी जाणदे, की सै कुसदिया तरफा ला था।” 8 यीशुऐ उना ने बोलया, “तां मैं भी नी दसणा की मैं ऐ कम्म कुसदे हके ने करदा है।” 9 तालू यीशु लोकां जो इक कहाणी सुणाणा लग्गा, इकी माणुऐ अंगूरा दा बाग लगाया, कने किसाना जो उदा ठेका देईकरी कने मतयां रोजां तांई परदेस जो चली गिया। 10 फिरी जालू अंगूर पक्की गे, तां उनी अपणा इक नोकरे जो ठेकेदारे बाल अपणा अंगूरे दे बागे दा हिस्सा लोणे तांई भेजया। पर ठेकेदारां उसयो पकड़या कने मारी कुट्टी करी बिना कुछ दितयो खाली हथ भेजी दिता। 11 फिरी मालिके इक होर

नोकर भेजया, कने उना उसयो भी मारी कुट्टी करी कने बेजती करिके खाली हथे भेजी दिता। 12 फिरी मालिके तिजे नोकरे जो भेजया, कने उना उसयो भी मारी कुट्टी करी बाहर कडी दिता। 13 “तालू अंगूरा दे बागे दे मालिके बोलया, मैं क्या करे? मैं अपने प्यारे पुत्रे जो उना बाल भेजदा है शायद सै मेरे पुत्रे दा आदर करन।” 14 जालू ठेकेदारां उसयो दिखया तां अपु चे बिचार करणा लग्गे, ऐ तां बारिस है; ओआ, असां इसयो मारी दिन्दे, ताकि सब कुछ साडा होई जा। 15 कने उना उसयो अंगूरा दे बागे ला बार कडी करी मारी दिता: तां दाखे दे बागे दे मालिके उना सोगी क्या करणा? 16 “उनी आई करी उना ठेकेदारां दा नाश करणा, कने अंगूरा दे बागे जो कुसकी होरसी जो देई देणा। ऐ सुणीकरी लोकां बोलया, हे परमेश्वर इयां मत करदा।” 17 उनी उना पासे दिखीकरी बोलया, फिरी पबित्र शास्त्र च ऐ क्या लिखया है: जिसी पथरे जो राजमिस्त्रियां बेकार बोलया था, सेई कुणे दा सिरा बणया। 18 “जडा कोई उस पथरे पर पोंगा उदे टोटे-टोटे होई जाणे, कने जिदे पर सै पोंगा, उनी सै पिई देणा।” 19 तालू ही बड़े याजक कने यहूदी व्यवस्था जो सिखाणे बाले यीशुऐ जो पकड़ना चांदे थे, क्योंकि सै समझी गे, की उनी सांझो पर ऐ कहाणी बोलियो है, पर सै लोकां ला डरदे थे। 20 सै यीशुऐ जो फसाणे दिया ताका च थे। कने उना गुप्तचर भेजे, की सै धर्मी दा भेस बणाई करी उदी कोई गल्ल पकड़न, ताकि उसयो राज्यपाल कने अधिकारियां दे हथे देई दें। 21 उना उसला ऐ पुछया, गुरू जी, असां जाणदे न की, तुसां हमेशा सच्च बोलदे न कने सिखांदा भी है, कने कुसदा भी पक्षपात नी करदा है; कने परमेश्वरे दा रस्ता सच्चाईया ने दसदा है। 22 “इस तांई सांझो दस की महाराजा जो कर देणा ठीक है की नी?” 23 उनी उना दी चलाकी दिखीकरी उना ने बोलया, 24 इक दीनार मिंजो दस्सा। इस पर कुसदी छाप कने ना है? उना बोलया, “महाराजा दा।” 25 यीशुऐ उना ने बोलया, “तां जडा महाराजा दा है, उसयो महाराजा जो दिया कने जडा परमेश्वरे दा है उसयो परमेश्वरे जो दिया।” 26 सै लोका सामणे उसा गल्ला जो पकड़ी नी सके, कने उदे जबाबे ने हेरान होईकरी चुप होई गे। 27 फिरी सदूकी जडे बोलदे न, की मरयां दा जिन्दा होणा हेई नी, उना चे थोड़यां यीशुऐ बाल आई करी पुछया। 28 गुरू जी, मूसा दिया व्यवस्था च साडे तांई ऐ लिखया है, “अगर कुसकी दा भाई अपणिया घरे वालिया दे होंदे बिना बच्चे दे मरी जा, तां उदा भाई उदिया घरे वालिया जो ब्याई ले, कने उदे तांई बंश पैदा करे।” 29 इक घरे च सत

भाई थे, पेहला भाई बियाह करिके बिना ओलादी दे मरी गया। 30 तां दुऐ भाईऐ उसा ने ही बियाह करी लिया कने से भी बिना ओलादी मरी गया, 31 कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे। 32 बादे च सै जनानी भी मरी गई। 33 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी? 34 यीशुऐ उना ने बोलया, इसी युगे दे लोकां च तां बियाह होंदे न। (aiōn g165) 35 पर जिना लोकां इस लाइक होणा है, की उसी युगे च कने मरयां चे जिन्दे होणा है, उना च बियाह नी होणे न। (aiōn g165) 36 फिरी उना मरणा भी नी; क्योंकि सै स्वर्गदूते सांई होणे, कने मरयां चे जिन्दा होणे ने सै परमेश्वरे दी ओलाद होणे न। 37 पर इसा गल्ला जो की मरयो होऐ भी जिन्दा होई जांदे न, मूसे झाड़ी बालिया कथा च सिखाया है, इस तांई “सै परमेश्वर जो अब्राहम दा परमेश्वर, कने इसहाक दा परमेश्वर, कने याकूब दा परमेश्वर बोलदा है।” 38 “परमेश्वर तां मुर्दयां दा नी पर जिंदया दा परमेश्वर है: क्योंकि उदे तांई सारे जिंदे न।” 39 तालू ऐ सुणिकरी कितणयां ही व्यवस्था जो सिखाणे बालयां बोलया, “गुरू जी, तू ठीक बोलया है।” 40 कने उना जो होर कुछ पूछणे दी हिम्मत नी होई। 41 फिरी यीशुऐ उना ला पुछया, मसीह जो राजा दाऊदे दा बंशज कियां बोलदे न? 42 राजा दाऊदे अपु भजन संहिता दिया कताबां च बोलया है: “प्रभुऐ मेरे प्रभु ने बोलया, 43 तू मेरे सिंहासने दे सजे पासे बो, जालू दीकर मै तेरे बैरियां जो तेरे पैरां हेठ करी दें।” 44 “राजा दाऊद तां उसयो प्रभु बोलदा है तां सै फिरी उदा बंशज कियां होया?” 45 जालू सारे लोक सुणा दे थे, तां यीशुऐ अपने चेलयाँ ने बोलया। 46 “व्यवस्था जो सिखाणे बालयां ला साबधान रिया, जड़े लोकां जो दसणे तांई लम्बे कने मेंगे कपड़े पाणा पसंद करदे, कने उना जो बड़ा पसंद है की लोक उना जो बजारां च नमस्ते करन, कने यहूदी जंज घरां च कने खांदे बेले खास-खास आसना पर बोणा पसंद करदे न। 47 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे तांई बड़ी देरा दीकर प्राथना करदे न, परमेश्वरे ला इना जो बड़ी बुरी सजा मिलणी है।”

21 फिरी यीशुऐ मंदरे दे भंडारे दे सामणे बेईकरी अमीरां जो अपना-अपना दान पेटिया च पांदे दिखया। 2 इतणे च इक गरीब बिधवा आई करी दो तांबे दे सिक्के

पाये, जिना दी कीमत बड़ी घट थी। 3 तालू उनी बोलया, मैं तुसां ने सच्च बोलदा है, की इना गरीब बिधवा सबना ला बदीकरी इस भंडारे च पाया है। 4 क्योंकि सबना अपने भंडारे चे थोड़ा दिया दिता, पर इना गरीब बिधवा इसा बाल जितना भी था सारा ही पाई दिता है। 5 जालू कुछ चले मंदरे दे बारे च गल्लां करा दे थे, की सै कदे छेल पथरां ने कने चढ़ाईयां चिजां ने सवारया है, तां यीशुए बोलया, 6 “सै दिन ओणे न, जिना चिंजा दी तुसां बड़ी तारीफ करा दे न, इक दिन ओणा है इना भवना दे इक भी पथरे पर पथर नी रेणा है, जड़ा डायी नी जाणा है।” 7 चेलयां यीशुए ला पुछया, “गुरू जी, सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होगा तां उदा क्या निशान होणा है?” 8 यीशुए बोलया, ध्यान रख्यो की तुहांजो कोई धोखा न दे। मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ; कने ऐ भी बोलणा की टेम नेडे आई गिया है: तुसां उना पिच्छे मत चली जांदे। 9 जालू तुसां लड़ाईयां, कने दंगया दियां गल्लां सुणगे तां डरी मत जांदे; क्योंकि इना दा होणा जरूरी है, पर तालू संसारे दा खात्मा नी होणा है। 10 तालू यीशुए उना ने बोलया, क्योंकि जातियां ने जातियां ने कने राज्य ने राज्यां ने इक दुजे ने लड़ाईयां करणियां न। 11 कने हर कुथी हिलण होणे न कने अकाल पोणे, कने महामारियां पोंणिया न, कने अम्बरे च गल्लां कने बड़े-बड़े निशाण प्रगट होणे न। 12 पर इना सबना गल्लां ला पेहले उना लोकां तुहांजो कैदी बणाना कने यहूदी जंज घरे च देणा कने तुहांजो मार पोंणी, कने मेरिया बजा ने तुहांजो हाकिमा कने राजयां दे सामणे न्याय ताई पेश किते जाणे न, 13 पर ऐ तुहाडे ताई गबाई देणे दा मोका बणी जाणा है। 14 इस ताई सब अपने-अपने मने च पेहले ही ठाणी लिया की असां जबाब देणे दी चिंता नी करणी है। 15 क्योंकि मैं तुहांजो ऐसे बोल कने दिमाग दिगा, की तुहाडे सारे बिरोधियां सामणा कने टाल्ली नी सकणा है। 16 कने तुहाडे माता-पिता कने भाई कने रिश्तेदारां, कने दोस्तां भी तुहांजो पकड़ाणा है; ऐथू दीकर की तुहांजो चे कितणयां जो मरवाई देणा है। 17 कने मेरे नाए दिया बजा ला सबना लोकां तुहांजो ने बैर करणा है। 18 पर तुहाडे सरे दा, इक बाल भी बांका नी होणा। 19 पर जड़ा जिंदगी दे अंत दीकर मिंजो पर भरोसा रखगा सै ही बचाया जाणा है। 20 जालू तुसां यरूशलेम जो सेना ने धिरया दिखन, तां समझी लिया की उदा बिनाश होणेबाला है। 21 यहूदिया प्रदेशे दे लोकां जो जान बचाणे ताई पहाड़ा जो नसणा पोणा। कने जडे यरूशलेम दे अंदर

होन सै बाहर नसी जान; कने जड़े ग्रां च होंन सै उना च मत जांदे। 22 क्योंकि ऐ बदला लेणे दे ऐसे रोज होणे न, जिना च सारियां लिखियाँ होइयां गल्लां पुरियां होणियां न। 23 ऐ उना जनानिया ताई बड़ा बुरा बकत होणा जडियां लैरथियां न, कने उना जनानियां ताई जडियां नियाणे जो दूध पियादियां न। क्योंकि देशे च बड़ा बड़ा क्लेश कने इना लोका पर बड़ी मुसीबत होणी है। 24 उना जो तलबारां ने मारयां जाणा है, कने केई देशां दे लोक गुलाम बणाई करी लेई जाणे न, कने जालू दीकर बाकी जातियां दा बकत पूरा नी होंगा, तालू दीकर यरूशलेम बाकी जातियां दा गुलाम रेणा है। 25 कने सुरज कने चन्द्रमा कने तारयां च अनोखे निशाण मिलणे न, कने धरतिया पर, देशे-देशे दे लोकां जो परेशानी होणी है; क्योंकि उना उफणदे समुद्रे दियां लेहरां ने घबराई जाणा है। 26 कने डरे दिया बजा ने कने दुनिया च ओणे बालियां घटना दी राह दिखदे-दिखदे लोकां दीया जानी च जान नी रेंणी हे क्योंकि अम्बरे दियां शक्तियाँ हिलाईयां जाणियां न। 27 तालू उना मिजों माणुऐ दे पुत्रे जो सामर्थ्य कने बड़ी महिमा दे सोगी बदले पर ओदे दिखणा है। 28 “जालू ऐ गल्लां होणा लगन, तां सीधे होईकरी अपने सिरे जो उपरे उठाणा; क्योंकि तुहाड़ा छुटकारा नेडे होणा।” 29 यीशुऐ उना जो इक कहाणी सुणाई, अंजरि कने सारे स्खां जो दिखा। 30 जियां ही उना दियां कुम्बलियां निकलदियां न, तां तुहांजो ऐ दिखीकरी पता लग्गी जांदा है, की गर्मियां ओणे बालियां न। 31 इयां ही जालू तुसां ऐ गल्लां होंदे दिखन, तां समझी लिया की परमेश्वरे दा राज्य नेडे है। 32 “मै तुसां ने सच्च बोलदा है, कि जालू दीकर ऐ सारियां गल्लां पुरियां नी होई जांदियां न, तालू दीकर इसा पीढिया दा अंत नी होणा है।” 33 “अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंणियां न।” 34 इस ताई साबधान रिया, ऐसा ना हो की तुहाडे मन नशे च संसारे दियां मोहमाया च कने इसा जिन्दगिया दिया चिंता च सुस्त होई जान, कने सै दिन तुहांजो पर फंदे सांई इकदम आई पोऐ। 35 क्योंकि उनी सारिया धरतिया पर रेंणेबालयां पर इयां ही आई पोणा है। 36 “इस ताई जागदे रिया कने हर बेले प्राथना करदे रिया ताकि तुसां ओणे बालियां परेशानियां ला बचणे कने मिजों माणुऐ दे पुत्रे दे सामणे खडोणे लाइक बणन।” 37 कने सै दिने मंदरे च उपदेश करदा था; कने राती जैतून स्खां दे पाहडे पर जाई करी रेंदा था। 38 कने ब्यागा उसयो सुणने ताई मंदरे च उदे बाल ओदे थे।

22 अखमीरी रोटिया दा त्योहारे जिसयो फसह बोलदे न, नेडे ही था। 2 कने बड़े याजक कने व्यवस्था जो सिखाणे बाले इसा गल्ला दिया तोपा च थे की, उसयो कियां मारन, पर सै लोकां ला डरदे थे। 3 कने शैतान यहदा च बड़ी गया, इसयो इस्करियोती भी बोलदे न कने सै बाहरां चेलयां चे इक था। 4 उनी जाई करी बड़े याजकां कने सरदारां ने गलबात किती, की उसयो कियां उना दे हथे पकड़ा। 5 सै खुश होऐ, कने उसयो पेसे देंगे दा बचन दिता। 6 उनी मन्नी लिया, कने मोका तोपणा लगा, की बिना बुरा कितयो यीशुऐ उना दे हथे पकड़ाई दे। 7 तालू अखमीरी रोटिया दे त्योहारे दा दिन आया, जिदे च फसह दे मेमने दी बलि देणा जरूरी थी। 8 कने यीशुऐ पतरस कने यूहन्ना जो ऐ बोली करी भेजया, “जाई करी साडे खाणे तांई फसह दा खाणा तैयार करा।” 9 उनी यीशुऐ पुछया, “तू कुथु चांदा है, की असां फसह दा खाणा तैयार करन?” 10 उनी अपणे दो चेलयां जो ऐ बोली करी भेजया, की यरूशलेमे शेहरे जो जा, कने ओथु तहांजो इक माणु घडे चुकी करी चलया मिलणा, उदे पिछे चली जानयो। 11 कने सै जिस घरे जो जांगा, उस घरे दे मालिके जो बोलयो: की गुरू जी ने पूछया है, की मेरा कने मेरे चेलयां दा फसह दा खाणा खाने बाला कमरा कुथु है? 12 “उनी तहांजो इक उपरे आला सजया सजाया कने तैयार कितया बडा कमरा दसी देणा है, कने तुसां ओथु साडे तांई तैयारी करा।” 13 उना जाई करी, जियां यीशुऐ उना ने बोलया था, सियुदा ही था, कने उना उसा जगा फसह दा खाणा तैयार किता। 14 जालू बकत होया, तां यीशु बारह प्रेरितां सोगी रोटि खाणां बैठा। 15 कने यीशुऐ उना ने बोलया, “की मिंजो बड़ी इच्छा थी, की दुख भोगणे कने मरणे ला पेहले फसह दे त्योहारे दा खाणा तुहाडे सोगी खां। 16 क्योंकि मैं तुसां ने बोलदा है, की जालू दीकर सै परमेश्वरे दे राज्य च पूरा नी होंगा तालू दीकर मैं फसह दे त्योहारे दा खाणा दुबारा नी खांगा।” 17 तालू उनी अंगूर दे रस दा कटोरा लेईकरी परमेश्वरे दा धन्याबाद किता कने बोलया, “इसयो लिया कने अपु चे बंडी करी पी लिया। 18 क्योंकि मैं तुसां ने बोलदा है, की जालू दीकर परमेश्वरे दा राज्य नी ओगा तालू दीकर मैं अंगूरा दा रस कदी नी पिंगा।” 19 फिरी उनी रोटि लेई, कने धन्याबाद करिके तोड़ी, कने उना जो ऐ बोली करी दिती, ऐ मेरा शरीर है, जड़ी तुहाडे तांई दितया जांदा है: मिंजो याद करणे तांई ऐई करा-करा। 20 इयां ही उनी खाणां खाणे बाद कटोरा भी ऐ बोलदे दिता, ऐ अंगूर दे रसे दा कटोरा मेरे उस खूने च कोई बाचा है

जडा तुहाडे ताई भाया जाणा है। 21 पर दिखा, मिंजो पकड़वाणे बाले दा हथ मेरे सोगी मेरिया थालिया च है। 22 “क्योंकि मिंजो, माणुए दे पुत्रे दा जियां उदे ताई तय है तियां करदा है, पर हाय उस माणुए पर, जिसदिया बजा ने पकड़ाया जांदा है।” 23 तालू सै अपु चे बोलणा लग्गे की, “असां चे कुण है, जडा ऐ कम्म करगा?” 24 उना चे ऐ भी बेहस होई की, सांझो चे कुण बडा समझया जांदा है? 25 यीशुए उना ने बोलया, बाकी जातियां दे राजे उना पर प्रभुता करदे न; जडे उना पर हक रखदे न, उना जो उपकारक बोलदे न। 26 पर तुसां ऐ दे मत बणदे; नितां जडा तुसां चे बडा है, सै छोटे दे बराबर कने जडा सबते बड्डा है सै सेबक दे बराबर बणे। 27 क्योंकि बडा कुण है; सै जडा रोटी खाणां बैठया या सै जडा सेबा करदा है? क्या सै नी जडा रोटिया खाणां बैठया है? पर मैं तुहाडे बिच सेवके सांई है। 28 पर तुसां ही न, जडे मेरियां परिक्षां च लगातार मेरे सोगी रे; 29 कने जियां मेरे पिता मिंजो ताई इक राज्य दितया है, तियां ही मैं भी तुहाडे ताई राज्य दिन्दा है। 30 ताकि तुसां मेरे राज्य च मेरिया मेजा पर खा पिया; कने सिंहसनां पर बेईकरी झगले देशे दे बाहरां गोत्रों दे लोकां दा न्याय करा। 31 “शमौन, हे शमौन, दिख, शैताने तुसां लोकां जो परखणे ताई परमेश्वर ला आज्ञा मंगी लियो है, कि भलाई जो बुराई ला बख करणा जियां किसान कणका ला भुए जो बख करदा है। 32 पर मैं तेरे ताई परमेश्वरे ला प्राथना किती है, की तेरा भरोसा मिजों ला नी जा: कने जालू तु पश्चाताप करें, तां अपने भाईयां जो भी मिजों पर भरोसा करणे ताई मजबूत करें।” 33 पतरसे यीशुए बोलया, “प्रभु जी, मैं तेरे सोगी जेला जाणे कने मरणे जो भी तैयार है।” 34 पर यीशुए बोलया, “हे पतरस मैं तिजो ने बोलदा है, की अज मुर्गे तालू दीकर बांग नी देणी जालू दीकर तू तिन्न बरी मिंजो पछेणने ला मना करी बोंणा है।” 35 कने यीशुए उना ने बोलया, “जालू मैं तुहांजो बटुए, कने झोली, कने जुते बिना शुभसमाचार प्रचार करणे भेजया था, तां क्या तुहांजो कुसा भी चिजा दी कमी होई थी?” उना बोलया, “नी होई कुसा भी चिजा दी।” 36 उनी उना ने बोलया, “पर हुण लोक साडे खिलाफ न हुण जिसदे बाल बटुआ है सै उसयो लेई ले, कने तियां ही झोली भी, कने जिसदे बाल तलबार नी है सै बाहरे दे कपडे बेची करी खरीदी ले।” 37 क्योंकि मैं तुसां ने बोलदा है, की ऐ जडा पबित्र शास्त्र च लिखया है सै पूरा हो की, “सै अपराधियां सांई मनया गया है, उदा पूरा होणा जरूरी है: क्योंकि मेरे बारे जडियां गल्लां लिखियां न सै पुरियां होंगे बालियां

ना।” 38 चेलयां बोलया, “प्रभु जी, दिख, ऐथू दो तलबारां ना।” यीशुऐ उना ने बोलया, “बतेरियाँ ना।” 39 तालू सै बाहर निकली करी रोजे सांई जैतून रुखां दे पाहडे पर गया, कने चेले उदे पिच्छे गे। 40 उसा जगा पर पुज्जी करी यीशुऐ उना ने बोलया, “प्राथना करा, की तुसां दी परख ना होऐ।” 41 फिरी यीशु थोड़ा अगगे गया, कने गोडे भार बेईकरी प्राथना करणा लग्गा, 42 “पिता जी अगर तू चा तां इस कटोरे जो बखे ला हटाई ले, पर तमी मेरी नी पर तेरी इच्छा पुरी हो।” 43 तालू स्वर्गे दे इक स्वर्गदूते ओथु प्रगट होया जड़ा उसयो सामर्थ्य दिन्दा था। 44 कने सै बड़ा परेशान कने व्याकुल होईकरी कने दुखे ने प्राथना करणा लग्गा; कने उदा पसीना मना की खूने दियां बडियां-बडिया बूदा सांई धरतिया पर पोआ था। 45 तालू सै प्राथना ला उठया कने अपने चेलयां बखे आई करी उना जो उदासिया दे मारयो सुतया दिखया। 46 कने उना ने बोलया, “कजो सोआ दे न? उठा, प्राथना करा, की तुहाड़ी परख ना होऐ।” 47 जालू यीशु ऐ बोला दा ही था, की दिखा मते सारे लोक आए, यहदा जड़ा बाहरां चेलयां चे इक था सै अगगे-अगगे ओआ दा था, सै यीशुऐ दे बखे आया, ताकि उदा चूमा लेई सके। 48 यीशुऐ उसयो बोलया, “हे यहदा, क्या तू चूमा लेईकरी मिंजो, माणुऐ दे पुत्रे जो पकड़वा दा है?” 49 उदे साथियां जालू दिखया की क्या होणे वाला है, तां बोलया, “प्रभु जी, क्या असां तलबार चलान?” 50 कने चेलयां चे इकी महायाजके दे नोकरे पर तलबार चलाई करी उदा सजा कन उड़ाई दिता। 51 इस पर यीशुऐ बोलया, “हंण बस करा।” कने उदा कन छुई करी उसयो ठीक किता। 52 तालू यीशुऐ बड़े याजकां कने मंदरे दे रखबालयां दे अगुवां कने यहदी अगुवां जो बोलया, तुसां क्या तलबारां कने डांगा लेईकरी मिंजो डाकुआं सांई पकड़ना आयो न। 53 “मैं जालू हर रोज मंदरे च बेईकरी उपदेश दिन्दा था, तालू तां तुसां मिंजो नी पकड़या; पर ऐ तुहाड़ा बकत है, कने नेहरे दा हक है।” 54 फिरी सै उसयो पकड़ी करी लेई चले, कने महायाजक दे घरे जो लेई आये कने पतरस दूरे-दूरे ला ही उना दे पिच्छे चलया था। 55 कने जालू सै अंगणे च अगग वाल्ली करी गिठे बैठे, तां पतरस भी उना दे बिच बेई गया। 56 कने इक दासिया उसयो अगगी दी लौई च बैठया दिखीकरी कने उदे पासे दिखीकरी बोलणा लग्गी, “ऐ भी तां यीशुऐ सोगी था।” 57 पर पतरसे ऐ बोली करी मना किता, की मैं इसयो नी जाणदा। 58 थोड़ी देरा बाद फिरी कुनकी होरनी उसयो दिखीकरी बोलया, “तु भी तां उना चे है।” पतरसे बोलया,

“सै माणु मै नी है।” 59 कोई इक घंटे बाद इक होर माणु बोलणा लग्गा, “पक्का ऐ भी उना सोगी ही था; क्योंकि ऐ भी गलीली है।” 60 पतरसे बोलया, “मिंजो नी पता की ऐ क्या बोला दा है?” पतरसे दे इयां बोलदे ही, मुर्गे झट बांग देई दिती। 61 तालू प्रभु यीशुऐ मुडी करी पतरसे पासे दिखया, कने पतरसे जो सै गल्ल याद आई जडी उनी बोलियो थी, “अज मुर्गे जो बांग देंगे ला पेहले, तू तिन्न बरी मिंजो मना करणा है।” 62 कने पतरस बाहर निकली करी बड़ा भरी रोणा लग्गा। 63 जिना माणुआं यीशुऐ जो पकड़या था, सै उदा मजाक उड़ाई करी उसयो कूटणा लग्गे; 64 कने उदियां हखी पर पट्टी बन्नी करी पुछया, “अगर तू परमेश्वरे दा संदेश देणेबाला है! तां सांझो दस कुनी तिजो मारया।” 65 कने उना होर भी बुरियां गल्लां उदे बारे च बोलियां। 66 जालू ब्याग होई तां यहूदी अगुवां कने बड़े याजक कने व्यवस्था जो सिखाणे बाले गिठे होऐ, कने उसयो अपणिया महासभा च आंणी करी पुछया, 67 अगर तू मसीह है, तां सांझो ने बोली दे। यीशुऐ उना ने बोलया, “अगर मै तुहांजो ने बोलें तां तुसां मनणा नी। 68 अगर मै कोई सबाल पृछां, तां तुसां जबाब नी देणा। 69 पर हुणे ला मै, माणुऐ दे पुत्रे सबते शक्तिशाली परमेश्वरे दे सजे पासे बेई रेणा।” 70 इस पर सारयां बोलया, “तां तू क्या परमेश्वरे दा पुत्र है?” यीशुऐ उना ने बोलया, “तुसां अपु ही बोलदे न, क्योंकि मै है।” 71 तालू उना बोलया, “हुण सांझो गबाई दी क्या जरूरत है क्योंकि असां अपु ही इदे मुऐ ला सुणी लिया है।”

23 तालू सारी सभा उठी करी उसयो पिलातुस बाल लेई गई। 2 कने सै ऐ बोली करी उस पर दोष लगाणा लग्गे, “असां इसयो साडे लोकां जो बेहकांदे कने महाराजा जो कर देंगे ला मना करदे, कने अपणे आपे जो मसीह, कने राजा बोलदे सुणया है।” 3 पिलातुसे उसला पुछया, “क्या तू यहूदियां दा राजा है?” उनी उसयो जबाब दिता, “तू अपु ही बोला दा है।” 4 तालू पिलातुसे बड़े याजकां कने लोकां ने बोलया, “मिंजो इस माणुऐ च कोई दोष नी मिलदा है।” 5 पर सै होर भी दबाब पाई करी जोरे ने बोलणा लग्गे, “यहूदिया प्रदेशे दे सारे लोकां च इदिया शिक्षा दिया बजा ने दंगे हो दे न, कने गलील प्रदेश च भी इयां ही किता कने हुण ऐथू आई गया है।” 6 ऐ सुणीकरी पिलातुसे पुछया, “क्या ऐ माणु गलील प्रदेश दा रेणे बाला है?” 7 कने ऐ जाणी करी की सै उस प्रदेश दा है जिथू राजा हेरोदेस राज करदा है, तां उसयो हेरोदेसे बाल भेजी दिता, क्योंकि उना दिना राजा हेरोदेस भी यरूशलेम

च था। 8 हेरोदेस यीशुए जो दिखीकरी बड़ा खुश होया, क्योंकि सै उसयो बड़े रोजां ला दिखणा चांदा था: उनी उदे बारे च सुणाया था, कने हेरोदेस यीशुए ला कुछ चमत्कार दिखणे दी आस रखदा था। 9 सै उसला मतियां गल्लां पुछदा रिया, पर उनी उना दा कोई भी जबाब नी दिता। 10 कने बड़े याजक कने व्यवस्था जो सिखाणे बाले खडोई करी पुरे जोर शोर लाईकरी उस पर दोष लांदे रे। 11 तालू राजा हेरोदेसे अपने सिपाईयां सोगी उदी बेजती करिके उदा मजाक उड़ाया, कने चटकिले कपड़े पहनाइ करी उसयो पिलातुस बाल बापस भेजी दिता। 12 उस बकते दीकर पिलातुस कने हेरोदेस इकी दुऐ दे दुशमण थे, पर दोनो उसी रोजे मित्र बणी गे। 13 पिलातुसे बड़े याजकां कने सरदारां कने लोकां जो सदीकरी बोलया, 14 तुसां इस माणुए जो मेरे बाल लेई आये कने बोलया की दंगा कराणे तांई लोकां जो भटकांदा था। पर दिखा, मैं तुहाड़े सामणे इसदी जाँच किती, पर जिना गल्लां दा तुसां इदे पर दोष लगा दे न, मिंजो उना गल्लां दे बारे च उदे च कोई भी दोष नी मिल्ला है; 15 कने ना ही हेरोदेसे उस पर कोई दोष लाया, क्योंकि उनी इसयो साड़े बाल बापस भेजी दितया है क्योंकि इनी माणुए ऐसा कुछ नी कितया की इसयो मौत दी सजा मिल्ले। 16 “इस तांई मैं इसयो कोड़े मरवाई करी छडी देणा है।” 17 पिलातुस फसह दे त्योहारे दे बेले उना दे इकी केदिये जो छडी दिन्दा था। 18 तालू सारे मिली करी बोलणा लग्गे, इसयो मौत दी सजा दिया, कने साड़े तांई बरअब्बा जो छडी दे। 19 सै कुसकी दंगे दिया बजा ने जड़ा शेहरे च होया था, कने हत्या दिया बजा ने जेला च पाया था। 20 पर पिलातुसे यीशुए जो छडणे दिया इच्छा ने लोकां जो फिरी समझाया। 21 पर सै जोरे-जोरे ने बोलणा लग्गे, “इसयो सूली पर चढाई दिया! इसयो सूली पर चढाई दिया!” 22 उनी तिजी बार फिरी बोलया, “कजो उनी क्या बुरा कितया है? पर मिंजो इदे च मौत दी सजा देंगे जोगी कोई गल्ल नी मिल्ला दी है, मैं इसयो मारी कुट्टी करी छडी देणा है।” 23 पर सै चिलाई-चिलाई करी पिच्छे ही पेई गे, की इसयो सूली पर चढाई दिया, कने सै होर जोरे-जोरे ने बोलणा लग्गे। 24 पिलातुसे हुकम दिता, की इना दिया बिनतिया दे अनुसार करा। 25 कने उनी उस माणुए जो जड़ा दंगे कने हत्या दिया बजा ने जेला च था, जिसयो सै मंगदे थे, छडी दिता; कने यीशुए जो उना दिया इच्छा अनुसार उना जो देई दिता। 26 जालू सिपाई यीशुए जो लेई चल्यो थे, तां उना शमौन नाए दे इक कुरेनी जो जड़ा गांए ला ओआ दा था, उसयो पकड़ी करी उस पर सूली लदी

दिती ताकि उसयो यीशुऐ दे पिच्छे-पिच्छे लेई चले। 27 कने लोका दी बडी बडी भीड़ उना दे पिच्छे चली पेई, कने उना चे जनानिया भी मतियां थियां, जड़ियां उदे तांई छातिया पिटी करी रोआ दियां थियां। 28 यीशुऐ उना पासे मुडी करी बोलया, “हे यरूशलेम शहरे दियां कुड़ियो, मेरे तांई मत रोआ; पर अपने तांई कने अपने बचयां तांई रोआ।” 29 क्योंकि दिखा, सै दिन दुख भरे दिन ओणे न, जिना च लोकां बोलणा है, “धन्य न सै जनानियां जिना दे कदी बच्चे नी थे, कने जिना कदी बच्चे जम्मे नी, जिना ना कदी उना जो दूध पियाया।” 30 उस बेले, उना लोकां पहाड़ा ने बोलणा लगणा है, की सांझो पर पेई जा, कने पहाड़ियां ने की सांझो ढकी लिया। 31 “क्योंकि अगर सै मिजो इस तरीके ने मारदे न जडा हरे सखे सांई है, तां जड़े लोक सुके सखे सांई न उना ने क्या कुछ नी करणा।” 32 सै होर दो माणुआं जो यीशुऐ सोगी मारणे तांई लेई चले जिना बुरे कम्म कितयो थे। 33 जालू सै उसा जगा पर पुज्जे जिना जो खोपड़ी बोलदे न, तां उना ओथु उसयो कने उना दो बुरे कम्म करणे बालयां जो भी इकी जो सजे पासे कने दुज्जे जो खबे पासे सूली पर लटकाया। 34 तालू यीशुऐ बोलया, “हे पिता, इना जो माफ कर, क्योंकि ऐ जाणदे नी न की ऐ क्या करा दे न?” कने उना पर्चियां पाई करी उदे कपड़े बंडी ले। 35 लोक खडोई करी दिखा दे थे, कने सरदार भी मजाक करिके बोलदे थे, इनी होरां जो बचाया, अगर ऐ परमेश्वरे दा मसीह है, कने उदा चुणयां होया है, तां अपने आपे जो बचाई ले। 36 सिपाई भी बखे आई करी यीशुऐ जो पिणे तांई सिरका देईकरी उदा मजाक करिके बोलदे थे। 37 “अगर तू यहूदियां दा राजा है, तां अपने आपे जो बचा।” 38 कने उदे उपर इक दोष पत्र भी लगाया था: “ऐ यहूदियां दा राजा है।” 39 जड़े बुरे कम्म करणे बाले यीशुऐ सोगी लटकाये थे, उना चे इकी निंदा करिके बोलया, “क्या तू मसीह नी है? तां फिरी अपने आपे जो कने सांझो बचा।” 40 इसा गल्लां पर दुज्जे उसयो डांटया, “क्या तू परमेश्वरे ला भी नी डरदा है?” तिजो भी तां से ही सजा मिलियो है, 41 “कने सांझो तां न्याय दे अनुसार सजा मिलियो है, क्योंकि सांझो तां अपने कम्मा दा ठीक फल मिला दा है; पर इनी तां कोई गलत कम्म नी कितया है।” 42 तालू उनी बोलया, “यीशु जी, जालू तू अपने राज्य च राजा होईकरी ओगा, तां मिजो याद रखयां।” 43 यीशुऐ उसला बोलया, “मैं तिजो ने सच बोलदा है की अज ही तू मेरे सोगी स्वर्गलोक च होणा है।” 44 कने लगभग दोपेहर ला लेईकरी तिन्न बजे दीकर सारे देशे च नेहेरा

रिया, 45 कने सूरजे दी लोओ चली गई, कने मंदरे दा मोटा परदा बिचे ला फटी करी दो टुकड़े होई गया, 46 कने यीशुए ज़ोरे ने बोलया, “पिता, मैं अपनी आत्मा तेरे हथों च दिन्दा हे।” ऐ बोली करी अपने प्राण छडी दिते। 47 सुबेदारे जडा कुछ होया था दिखीकरी परमेश्वरे दी बडाई किती, कने बोलया, पका ऐ कोई धर्मी माणु था। 48 भीड़ जडी ऐ दिखणे तांई गिठी होईयो थी, इसा घटना जो दिखीकरी छातियां पिटदे होए अपने घरों जो बापस चली गई। 49 कने यीशुए दे सारे जाणने पछेणने बाले मित्र, कने जड़ियां जनानिया गलील प्रदेश ला उदे सोगी आईयां थियां, दूर खडोई करी जडा कुछ होया था सारा कुछ दिखा दियां थियां। 50 कने ओथु यूसुफ नाए दा इक माणु था सै महासभा दा सदस्य था कने सज्जन कने धर्मी था। 51 कने सै यहूदी अगुवां दे बिचारां कने उना दे कम्मा ला खुश नी था; कने सै यहूदियां दे शेहर अरिमतिया शेहरे दा रेहणे बाला कने परमेश्वरे दे राज्य दी नियाल्ल रखणे बाला था। 52 उनी पिलातुस दे बाल जाई करी यीशुए दी लाश मंगी, 53 कने लाशा जो सूली ला उतारी करी मलमले दिया चादरा च लपेटया, कने उसयो इक कबरा च रखया, जडी पथरे च खंणियो थी; कने उसा च कदी भी कोई नी रखया था। 54 सै रोज शुकवार था, जडा तैयारी वाला दिन था कने सब्ते दा रोज शुरू होणेबाला था। 55 कने उना जनानियां जड़ियां उदे सोगी गलील प्रदेशे ला आईयां थियां, पिच्छे-पिच्छे जाई करी कबर दिखी कने ऐ भी की उदी लाश कियां रखी है। 56 कने अपने घरों जो बापस आई करी उना सुगंध बालियां चिजां कने इन यीशुए दिया लाशा पर मलणे तांई तैयार किता; कने सब्ते दे रोजे उना मूसा दिया व्यवस्था दे अनुसार अराम किता।

24 पर हबते दे पेहले रोजे सै बड़ी ब्यागा ही उना सुगंधित चिजां जो जड़ियां उना तैयार कितियां थियां, लेईकरी कबरां पर आईयां। 2 कने उना दिखया की कबरा दे दरबाजे ला पथर पेहले ला ही हटया होया है, 3 कने सै अंदर गियां कने दिखया पर यीशुए दी लाश ओथु नी थी। 4 जालू सै इसा गल्ला ने हेरान थियां तां दिखा, दो माणु चिट्टे चमकीले कपड़े पायो उना बखे खडोतयो थे। 5 जालू सै डरी गियां, कने उना मु धरतिया पासे हेठ करी दिते; तां उना स्वर्गदूतां जनानिया ने बोलया, “तुसां जिन्दया जो मरयां चे कजो तोपदे न?” 6 “सै ऐथू नी है, पर जिन्दा होई गिया है। याद कर उनी गलील प्रदेशे च रेदे बेले तुसां ने बोलया था, 7 की जस्री हे, की मैं, माणुए दा पुत्र पापियां दे हथे पकड़या जा, कने सूली पर चड़ाया जाए,

कने तिजे दिने मरयां चे जिन्दा होई जाऐ।” 8 तालू यीशुऐ दियां गल्लां उना जो याद आईयां। 9 कने कबरा ला बापस आई करी उना गयारां चेलयां जो, कने बाकियां सबना जो, ऐ सारियां गल्लां सुणाई दीतिंयां। 10 जिना प्रेरितां ऐ गल्लां बोलियां, सै मरियम मगदलीनी कने योअन्ना कने याकूबे दी मां मरियम कने उना सोगी दियां सारियां जनानिया भी थियां। 11 पर उना दियां गल्लां उना जो कहाणियां सांई लगियां, कने चेलयां उना दा भरोसा नी किता। 12 तालू पतरस उठी करी दोडी करी यीशुऐ दिया कबरा पर गिया, कने निठे होईकरी अंदर दिखया ओथु उनी सिर्फ बस कपडे पियो दिखे, कने जडा होया उसला हेरान होईकरी बापस घरे चली गिया। 13 उसी रोजे यीशु दे दो चेले इम्माऊस नाऐ दे इक ग्राऐ जो चलयो थे, जडा यरूशलेम शेहरे ला कोई गयारा किलो मीटर दूर था। 14 कने सै इना सारियां गल्लां पर अपु चे गल्ल बात करा दे थे, जडियां होईयां थियां। 15 कने सै जालू अपु चे गल्ल बात कने पूछताछ करा दे थे, तां यीशु अपु आई करी उना सोगी चलणा लग्गा। 16 पर परमेश्वरे उना जो यीशुऐ जो पछेणने ला रोकी रखया था, ताकि सै उसयो पछेणी नी सकन। 17 तालू यीशुऐ उना ने पुछया, “ऐ क्या गल्लां न, जडियां तुसां चलदे-चलदे अपु चे करा दे न?” सै स्क्की गे कने उना दे मु बडे उदास लग्गा दे थे। 18 ऐ सुणीकरी, उना चे क्लियुपास नाऐ दे इकी माणुऐ बोलया, “शायद तू यरूशलेम च किल्ला ही परदेसी है; की जिसयो पता नी है की, पिछले इना रोजां च ऐथू क्या-क्या होया है?” 19 यीशु उना ला पुछया, “क्या-क्या होया है?” उना उसला बोलया, नासरत गां दे यीशु दे बारे च जडा असल च परमेश्वरे कने सारे लोंका दे बखे कम्म कने बचन च सामर्थी परमेश्वरे दा संदेश देणेबाला था। 20 बड्डे याजकां कने साडे सरदारां उसयो पकड़ाई दिता, की उसयो मारणे दा हुकम दिता; कने उसयो सूली पर चढाई दिता। 21 पर सांझो आस थी, की इनी ही इस्त्राएले देश दे लोकां जो रोम देश ला छुटकारा देणा, कने इना सारियां गल्लां दे सिवा इसा गल्लां जो अज तिजा दिन होई गिया। 22 कने हुण केई जनानिया सांझो हेरानिया च पाई दिता है, जडियां अज ब्यागा कबरा पर गियां थियां। 23 कने जालू उना जो उदी लाश नी मिल्ली, तां ऐ बोलदियां आईयां, की असां जो स्वर्गदूतां दे दर्शन होऐ, उना बोलया की यीशु जिन्दा है। 24 “तालू साडे साथियां चे केई कबरा पर गे कने जियां उना जनानिया बोलया था, तियां ही ओथु था; पर यीशुऐ जो उना नी दिखया।” 25 तालू यीशुऐ उना दोनो चेलयां ने बोलया,

“हे मुखी, जडा कुछ परमेश्वरे दा संदेश देणेबालयां दिया कताबां च लिखया है तूसां लोकां जो इना सारियां गल्लां पर भरोसा करणा बडा कठिन लगदा है।” 26 “ऐ जरूरी था, की मसीह ऐ सारे दुख झेले कने फिरी करी अपणिया महिमा च प्रवेश करे।” 27 तालू यीशुऐ उना जो पुरे पबित्र शास्त्रां चे, उनी मूसा ला शुरू करिके सारे परमेश्वरे दा संदेश देणेबालयां जितणियां गल्लां उदे बारे च बोलियां दियां, सै उना जो समजाइयां। 28 इतणे चे सै उस ग्रांऐ बखे पुज्जे, जिथू सै चलयो थे, कने यीशुऐ दे व्यवहारे जो दिखीकरी ऐसा लग्गा था, की सै चेलयां ला अग्रे बदणा चांदा है। 29 पर उना ऐ बोली करी उसयो रोकया, “साडे सोगी रे; क्योंकि संज होई चलियो है, कने दिन बडा डली गया है।” तालू सै उना सोगी रेहणे तांई अंदर गया। 30 जालू यीशु उना सोगी रोटी खाणां बैठा, तां उनी रोटी लेईकरी धन्यवाद किता, उसा जो तोड़ी करी उना जो देणा लग्गा। 31 तालू उना दियां हखी खुली गयां; कने उना उसयो पछेणी लिया, कने सै उना दी हखी अग्रे ला गायब होई गया। 32 उना अपु चे बोलया, “जालू सै रस्ते च सांझो ने गल्लां करा दा था, कने सांझो पबित्र शास्त्रां दा मतलब समझा दा था, तां क्या साडे मना च उतेजना नी जागी?” 33 सै उसी बेले उठी करी यरूशलेम शेहरे जो बापस चली गे, कने उना गयारां चेलयां कने उदे साथियां जो गिठे दिखया। 34 जडे गिठे होयो थे सै ऐ बोला दे थे, “प्रभु सची जिन्दा होई गया है, कने शमौने जो मिलया है।” 35 तालू उना रस्ते दियां गल्लां उना जो दसियां कने ऐ भी बोलया की जालू सै रोटी तोडा दा था तां उना उसयो पछेणी लिया की सै यीशु है। 36 सै ऐ गल्लां करा दे ही थे, की यीशु अपु ही उना बिच प्रकट हुआ; कने उना ने बोलया, “तुहांजो शांति मिल्ले।” 37 पर सै घबराई गे, कने डरी गे, कने सोचणा लग्गे की असां भूते जो दिख दे न। 38 यीशुऐ उना ने बोलया, कजो घबरा दे न? कने तुहाडे मने च कजो शक होंदा है? 39 “मेरे हथ कने पैरां जो दिख, की मै सै ही है, मिजो छुई करी दिख; क्योंकि भुत दी हड्डी कने मास नी होंदा है जियां मिंजो च दिखदे न।” 40 ऐ बोली करी उनी उना जो अपणे हथ पैर दस्से। 41 जालू खुशिया दे मारे उना जो भरोसा नी होया की यीशु जिन्दा है, कने हेरान होआ दे थे, तां यीशुऐ उना ला पुछया, “क्या ऐथू तुहाडे बाल कुछ खाणे जो है?” 42 उना उसयो भुनियो मछिया दा टुकड़ा दिता। 43 यीशुऐ सै मछिया दा टुकड़ा लेईकरी उना दे सामणे खादा। 44 फिरी यीशुऐ उना ने बोलया, “ऐ मेरियां सै गल्लां न, जडियां मै तुहाडे सोगी रेईकरी

तुहांजो ने बोलियां थियां, की जरूरी हे, की जितणियां गल्लां मूसा दिया व्यवस्था कने परमेश्वरे दा संदेश देणेबालयां कने भजना दियां कताबां च मेरे बारे च लिखियां न, सै सारियां सच्च साबित होन।” 45 तालू यीशुऐ उना जो पबित्र शास्त्र समझणे ताई मदद किती। 46 कने उना ने बोलया, की पबित्र शास्त्रां च ऐसा लिखया है की मसीह जो दुख झेलणे न, कने तिजे दिने मरयां चे जिन्दा होई जाणा है, 47 कने यरूशलेम शेहरे ला लेईकरी सारियां जातियां दे पापां दी माफी ताई शुभसमाचार दा प्रचार उदे नाए ने होणा है। 48 “तुसां इना सारियां गल्लां दे गबाह न। 49 कने मै अपु तुहांजो पर पबित्र आत्मा जो भेजणा है, जिसदा बायदा मेरे पिता कितया है। तालू दीकर शेहरे च इतंजार करणा होणा जालू दीकर तुहांजो स्वर्गे ला सामर्थ्य नी मिलदी।” 50 तालू सै उना जो बैतनिय्याह गांऐ दीकर शेहर ला बाहर लेई गया, कने उना जो हथ चुकी करी आशीष दिती; 51 कने उना आशीष दिन्दे ही उना ला लग होई गया कने स्वर्गे जो चली गया। 52 कने सै उसयो दण्डवत करिके बडिया खुशिया ने यरूशलेम शेहरे जो बापस चली गे। 53 कने सै लगातार मंदरे च जाई करी परमेश्वरे दी स्तुति करदे थे।

यूहन्ना

1 इस सारे संसारे दे बणने ला पेहले बचन था, कने बचन परमेश्वरे सोगी था कने सै बचन परमेश्वर था। **2** बचन इस सारे संसारे दे बणने ला पेहले ला ही परमेश्वरे सोगी था। **3** परमेश्वरे सारा कुछ उसी बचन ने ही बणाया है कने जड़ा कुछ भी बणाया है इदे चे कोई भी चीज बचन बिना नी बणियो है। **4** साड़ी शारीरिक कने आत्मिक जिन्दगी उना च ही थी, कने सै जिन्दगी सारे लोकां जो लौ दिन्दी जोत थी। **5** कने लौ नेहे च चमकदी है; कने नेहरा उसा लौइ जो बुझाई नी सकया। **6** परमेश्वरे यूहन्ना नाए दे इक माणुए जो भेजया। **7** सै लौइ दे बारे च दसणे ताई आया था ताकि सारे लोक उदे जरिये उसा जोती पर भरोसा करन। **8** यूहन्ना अपु तां सै लौ नी था, पर सै उसा लौ दी गबाई देणा आया था। **9** “सै जड़ी सच्ची लौ है” जड़ी हर इक माणुए जो लौ करदी है, सै संसार च ओणे बाली थी। **10** सै संसार च था, कने संसार उदे ने पैदा होया है, कने संसारे दे लोकां उसयो नी पछेणया। **11** सै अपणे लोकां च आया पर उसयो उदे अपणे लोकां नी अपनाया। **12** पर जितणया उसयो अपनाया, उनी उना जो परमेश्वरे दी ओलाद होंणे दा हक दिता, मतलब की सै जड़े उस पर भरोसा रखदे नः **13** सै ना तां माता-पिता दी इच्छा ला, कने ना तां माणुए दिया इच्छा ने, ना शरीर दिया इच्छा ने, ना इक माणुए दिया ओलाद दी इच्छा ने, पर परमेश्वरे ला पैदा होया है। **14** कने बचन इक माणु बणया कने असां लोकां बिच रिया, कने असां उदी ऐसी महिमा दिखी, जदेई पिता दे इकलोते दी महिमा। जो पिता परमेश्वरे ला सचाइया कने अनुग्रह ने भरपूर होईकरी आया। **15** यूहन्ना उदे बारे च गबाई दिती, कने पुकारी करी बोलया, की ऐ सेई है, जिदे बारे च मै बोलया था, की उनी मेरे बाद ओणा है, सै मिंजो ला भी बदीकरी है, क्योंकि सै मिंजो ला पेहले इस संसारे च मौजूद था। **16** क्योंकि उदी परीपूर्णता ने सांझो सारयां जो मिलया है मतलब अनुग्रह पर अनुग्रह। **17** व्यवस्था तां मूसा ने दितियो है, पर परमेश्वरे यीशु मसीह दे जरिये अनुग्रह कने सचाई दस्सी। **18** परमेश्वरे जो कुनी भी कदी नी दिखया है, सिर्फ उदे इकलोते पुत्रे जड़ा असल च परमेश्वर है, कने पिता परमेश्वर दे सबते नेडे है, उनी सांझो दसया है, की परमेश्वर कदिया है। **19** यूहन्ना दी गबाई ऐ है, की जालू यहदी अगुवां यरूशलेम शेहरे ला याजकां कने लेवियां जो उसला ऐ पुछणे ताई भेजया, “तू कुण है?” **20** यूहन्ना उना जो साफ-साफ बोलया, “मै मसीह नी है।” **21** तालू उना उसला

पुछया, “तां फिरी कुण है? क्या तू परमेश्वरे दा संदेश देणेबाला एलिय्याह है?”
 उनी बोलया मैं नी है। तां क्या तू सै परमेश्वरे दा संदेश देणेबाला है जिसदा पिता
 परमेश्वरे बायदा कितया था? उनी जबाब दिता की, “नी।” 22 तालू उना यूहन्ना
 ला पुछया, “तां फिरी है कुण तू। ताकि असां अपने भेजणे बालयां जो जबाब देई
 सकन। तू अपने बारे च क्या बोलदा है?” 23 उनी बोलया, “जियां यशायाह
 परमेश्वरे दा संदेश देणेबाला बोलया है, की मैं सुनसान जगा च इक हक पांणे बाले
 दी अबाज है की तुसां प्रभुए दा रस्ता सीधा करा।” 24 ऐ लोक फरीसियां दे पासे
 ला भेजयो थे। 25 उना उसला ऐ सबाल पुछया, की अगर तू मसीह नी है, कने ना
 एलिय्याह है, कने ना ही सै परमेश्वरे दा संदेश देणेबाला है जडा ओणे बाला था, तां
 फिरी तू बपतिस्मा कजो दिन्दा है? 26 यूहन्ना उना जो जबाब दिता, की मैं तां
 पांणिए ने बपतिस्मा दिन्दा है, पर तुहाडे बिच इक माणु खडोतया है, जिसयो तुसां
 नी जाणदे न। 27 मतलब की मेरे बाद ओणे बाला है, मैं तां उदे जुतयां दे तस्मे
 खोलणे दे काबील नी है। 28 ऐ गल्लां यरदने खड्डा दे पार बैतनिय्याह शेहर च
 होईयां, जिथू यूहन्ना लोकां जो बपतिस्मा दिन्दा था। 29 यूहन्ने दुज्जे रोजे यीशुए
 जो अपने पासे ओदे दिखीकरी बोलया, “दिखा, ऐ परमेश्वरे दा मेमना है, जिनी
 संसारे दे पाप चुकी लेई जाणे न। 30 ऐ सेई है जिदे बारे च मैं बोलया था, की इकी
 माणुए मेरे पिच्छे ओणा है, सै मिंजो ला भी बडा है, क्योंकि सै मिंजो ला भी पेहले
 था। 31 कने मैं उसयो पछेणदा नी था की सै मसीह था, इस्राएल देश दे लोकां जो
 ऐ दसणे तांई की सै कुण है, तां मैं पांणिए ने बपतिस्मा दिन्दा आया।” 32 कने
 यूहन्ने ऐ गबाई दिती की, मैं पबित्र आत्मा जो कबुतरे सांई स्वर्गे ला उतरदे दिखया
 है, कने सै उस पर स्क्की गई। 33 पर मैं तां उसयो पछेणदा नी था सै मसीह था, पर
 जिनी मिंजो पांणिए ने बपतिस्मा देणा भेजया, उनी ही मिंजो ने बोलया, की जिस पर
 तू आत्मा जो उतरदे कने स्क्रदे दिखगा; सेई पबित्र आत्मा ने बपतिस्मा देणेबाला है।
 34 कने मैं दिखया, कने गबाई दिती है की मैं तुसां ने सच्च-सच्च बोलदा की ऐई
 परमेश्वरे दा पुत्र है। 35 दुज्जे रोजे फिरी यूहन्ना कने उदे दो चेले खडोतयो थे। 36
 कने यीशु चलया था, तां उनी उदे पासे नजर करिके बोलया, “दिखा, ऐ परमेश्वरे
 दा मेमना है।” 37 तालू सै दोनो चेले यूहन्ना दी गल्ल सुणीकरी यीशुए दे पिच्छे
 चली पे। 38 यीशुए पिच्छे मुडी करी उना जो पिच्छे ओदे दिखीकरी उना ला
 पुछया, तुसां कुदिया तोपा च न? उना उसला बोलया, “गुरू जी, तू कुथु रेंदा है?”

39 यीशु मसीह उना ने बोलया, “चला दिखी लिया।” तालू उना आई करी उदे रेहणे दी जगा दिखी, कने उस रोजे सै सोगी रे; कने ऐ दोपहर दे लगबग चार बजयो थे। 40 उना दोना चे इक तां शमौन पतरस दा भाई अन्द्रियास था, जडे यूहन्ना दियां गल्लां सुणीकरी उदे पिच्छे आया था। 41 उनी पेहले अपने सगे भाई शमौन ने मिली करी उसला बोलया, की सांझो मसीह मिली गया है। 42 अन्द्रियास शमौने जो यीशुए बाल लेई आया: यीशुए उस पासे नजर करिके बोलया, तू यूहन्ना दा पुत्र शमौन है, तिजो पतरस बोलणा है। 43 दुज्जे रोजे यीशुए गलील प्रदेशे जो जाणे दा फेसला किता, कने फिलिप्पुस ने मिली करी बोलया, “मेर चले बणने तांई मेरे पिच्छे चली पो।” 44 फिलिप्पुस तां अन्द्रियास कने पतरसे दे शेहर बैतसैदा दा रेंगेबाला था। 45 फिलिप्पुसे नतनएल ने मिली करी बोलया, “सांझो सै माणु मिल्ली गया है जिदे बारे च मूसा दिया व्यवस्था च कने परमेश्वरे दा संदेश देणेबालयां लिखया था। सै नासरत शेहरे ला यूसुफे दा पुत्र यीशु है।” 46 नतनएले उसला बोलया, क्या कोई खरी चीज भी नासरत शेहर ला निकली सकदी है? फिलिप्पुसे उसला बोलया, “चली करी दिखी ले।” 47 यीशुए नतनएल जो अपने बाल ओदे दिखीकरी उदे बारे च बोलया, दिखा, ऐ सची इस्राएल दा भरोसे बाला बंशज है: इदे च कोई कपट नी है। 48 नतनएले यीशुए जो बोलया, “तू मिंजो कियां जाणदा है?” यीशुए उसयो जबाब दिता, फिलिप्पुसे तिजो जालू सदया, उसला पेहले जालू तू अंजीरि दे स्रखे थले था, तालू मैं तिजो दिखया था। 49 नतनएले उसयो जबाब दिता, “गुरू जी, तू परमेश्वरे दा पुत्र है; तू इस्राएल दा महाराजा है।” 50 यीशुए उसयो जबाब दिता, “मैं तां तिजो ने बोलया, की मैं तिजो अंजीरि दे स्रखे थले दिखया, क्या तू तां भरोसा करा दा है? तू इसला भी बड़े कम्म दिखणे न।” 51 फिरी यीशुए उसयो बोलया, “मैं तुसां ने सच्च-सच्च बोलदा है की तुसां स्वर्गे जो खुलया कने परमेश्वरे दे स्वर्गदूते जो उपर जांदे कने मिंजो, माणुए दे पुत्रे उपर उतरदे दिखणा।”

2 फिरी दो दिन बाद गलील प्रदेशे दे काना शेहर च कुसकी दा बियाह था, कने यीशुए दी माता भी ओथु थी। 2 यीशु कने उदे चले भी उसी बियाह च सदया थे। 3 जालू दाखरस घटी गया, तां यीशुए दिया माता उसला बोलया, “की इना बाल दाखरस नी रिया।” 4 यीशुए उसला बोलया, “माता जी तुसां मिंजो कजो दस्सा दे? अजे मेरा टेम नी आया है की लोक मिंजो मसीह से स्पे च पछेणन।” 5 पर

उदिया माता सेवकां ने बोलया, “जड़ा कुछ सै तुहांजो बोलगा, सेई करनयो।” 6 ओथु यहूदियां दे अपने धार्मिक रिबाजां दे अनुसार हथ धोणे दा रिबाज था। उना हथ धोणे तांई पथरे दे छे घड़े रखयो थे। जिना च लगभग सौ-सवा-सौ लिटर पांणी ओंदा था। 7 यीशुए उना ने बोलया, “घड़यां च पांणी भरी दिया।” उना घड़यां जो उपरे दीकर भरी दिता। 8 तालू यीशुए उना जो बोलया, “हूंण पाणी निकाली करी धामा दे प्रधाने बाल लेई जा।” सेबकां तियां ही कितया जियां उना जो करणे तांई बोलया। 9 जालू धामा दे प्रधाने सै पांणी चखया, तां सै दाखरस बणी गया था कने उसयो नी पता था की सै कुथु ला आया है; पर जिना सेवकां पांणी कडया था सै जाणदे थे, तां धामा दे प्रधाने लाड़े जो सदीकरी, उसयो बोलया। 10 हर इक माणु पेहले सबना ला खरा दाखरस दिन्दा है, कने जालू लोक उसयो पी करी रजी जादे न, तालू घटिया बाला दाखरस दिन्दा है; पर तू सबना ला बदिया दाखरस हले दीकर रखया है। 11 यीशुए गलील प्रदेशे दे काना शेहर च अपना ऐ पेहला चमत्कार दसी करी अपना महिमा दसी कने उदे चेलयां उस पर भरोसा किता की सै ही मसीह है। 12 इदे बाद सै कने उदी माता, उदे भाई, उदे चेले, कफरनहम शेहर जो गे कने ओथु थोड़े दिन रे। 13 यहूदियां दा फसह दा त्योहारे नेडे था, कने यीशु यरूशलेम शेहर जो गया। 14 कने उनी मंदरे च दांद, कने भेडां, कने कबुतरां जो बेचणे बालयां जो बैठया दिखया। 15 तालू उनी रसियां जो कोडा बणाई करी, सारियां भेडां कने दांदा जो मंदरे ला कडी दिता, कने साहुकारां दे पेसे खलारी दिते, कने पिढां जो पुठा सुटी दिता, 16 कने कबुतरां बेचणे बालयां ने बोलया, “इना जो ऐथू ला लेई जा। मेरे पिता दे घरे जो व्यापारे दा घर मत बणा।” 17 तां उदे चेलयां जो याद आया की पबित्र शास्त्र च लिखया है, “तेरे घरे दा जन्न मेरे अंदर अग्नी सांई बलदा है।” 18 इस पर यहूदी अगुवां उसला बोलया, “तू सांझो क्या चमत्कार दसी सकदा है की जिसने साबित हो की तिजो परमेश्वरे दिया तरफा ला हक है।” 19 यीशुए उना जो जबाब दिता, “इसी मंदरे जो तोड़ी दीया, कने मैं इसयो उना रोजां च दोबारा बणाई दिंगा।” 20 यहूदी अगुवां बोलया, “इस मंदरे जो बणाणे जो छयाली साल लगयो न, कने तू क्या इसयो उना रोजां च बणाई दिगा?” 21 पर यीशु जिस मंदरे दे बारे च बोला था, सै उदा शरीर था। 22 जालू यीशु मरी करी जिंदा होया था, तालू उदे चेलयां जो याद आया था की उनी ऐ बोलया था; कने पबित्र शास्त्र कने सै बचन जड़ा यीशुए बोलया था, उस पर भरोसा किता। 23

जालू यीशु यरूशलेम शहर च फसह दे त्योहारे च था, तां मतयां उना चमत्कारां जो जड़े सै दसदा था दिखीकरी उस पर भरोसा किता। 24 पर यीशुए भरोसा नी किता की उना उस पर भरोसा कितया है, 25 कने उसयो कुसदी भी जरूरत नी थी जड़ा उसयो लोकां दे बारे च दस्से क्योंकि सै जाणदा था की उना दे दिलां च कने उना दे क्या इरादे न?

3 फरीसियां चे नीकुदेमुस नाए दा इक माणु था, जड़ा यहदियां दा धार्मिक अगुवा था, सै इक फरीसी था। 2 उनी राती यीशुए बाल आई करी उसयो बोलया, “गुरु जी, असां जाणदे न, की परमेश्वरे तुहांजो सांझो सिखाणे तांई भेजया है, क्योंकि कोई भी इना चमत्कार जो जड़े तू दसदा है, अगर परमेश्वर दा साथ ना हो तां नी दसी सकदा है।” 3 यीशुए उसयो जबाब दिता, “मैं तिजो ने सच्च-सच्च बोलदा है, अगर कोई नोए सिरे ला नी जम्मे तां सै परमेश्वरे दा राज्य नी दिखी सकदा है।” 4 नीकुदेमुसे उसला बोलया, “माणु जालू बुद्धा होई जांदा है तां सै कियां जन्म लेई सकदा है? क्या सै अपणिया माता दे पेटे च दुज्जी बरी जाई करी जन्म लेई सकदा है?” 5 यीशुए जबाब दिता, मैं तिजो ने सच्च-सच्च बोलदा है, जालू दीकर कोई माणु पांणिऐ कने पबित्र आत्मा ने नी पैदा होए तालू दीकर सै परमेश्वरे दे राज्य च प्रवेश नी करी सकदा है। 6 माणु अपने बचयां जो जन्म दिन्दे न। फिरी भी सिर्फ परमेश्वरे दी आत्मा ही तुसां जो परमेश्वरे दी ओलाद दे स्मे च बदली सकदा है। 7 हेरान मत हो, की मैं तिजो ने बोलया, तिजो दोबारा ला पैदा होणा जरूरी है। 8 हवा जिस पासे चांहदी है उस पासे चलदी है, कने तू उदी अबाज सुणदा है, पर ऐ पता नी की सै कुथु ला ओदी है कने कुस पासे चली जांदी है? जड़ा कोई पबित्र आत्मा ने जमया है सै ऐदिया ही है। 9 नीकुदेमुसे उसयो जबाब दिता, “क्या ऐ गल्लां होई सकदियां न?” 10 ऐ सुणीकरी यीशुए उसयो जबाब दिता, तू इस्राएलियां दा इक महान गुरु है, तिजो तां असल च इना गल्लां जो समझणा चाईदा है? 11 मैं तिजो ने सच्च-सच्च बोलदा है की सांझो जड़ा पता है, सै बोलदे न, पर जिसयो असां दिखदे न उदी गबाई दिन्दे न, कने असां जड़ा बोलदे न उस पर तुसां भरोसा नी करदे न। 12 जालू मैं तुसां ने धरतिया पर होणे बालियां गल्लां बोलियां, तां तुसां भरोसा नी किता, अगर मैं तुसां जो दस्से की स्वर्गे च क्या होणा है, तां क्या तुसां भरोसा करोगे? 13 कोई स्वर्गे पर नी गया, “पर सिर्फ मैं, माणुए दा पुत्र स्वर्गे ला थल्ले आया है।” 14 कने जियां मूसे सुनसान जगा च पितल दे सप्पे जो उपर

चढ़ाया, तियां ही जरूरी है की मैं, माणुए दे पुत्रे जो भी उपर चढ़ाया जाए। 15 ताकि जड़ा कोई मिंजो पर भरोसा करे उदे च उसयो हमेशा दी जिन्दगी मिल्ले। (aiōnios g166) 16 “क्योंकि परमेश्वरे संसारे दे लोकां ने ऐसा प्यार किता की उनी अपणा इकलोता पुत्र देई ता, ताकि जड़ा कोई उस पर भरोसा करे, उदा नाश ना होऐ, पर उसयो हमेशा दी जिन्दगी मिल्ले। (aiōnios g166) 17 क्योंकि परमेश्वरे अपणे पुत्रे जो संसारे दे लोकां पर सजा देंगे ताई नी भेजया है, पर इस ताई भेजया की उदे जरिये संसारे दे लोकां दा उद्धार होऐ। 18 जड़ा परमेश्वरे दे पुत्रे पर भरोसा करदे न, उस पर सजा दा हुकम नी होंदा, पर जड़े परमेश्वरे दे पुत्रे पर भरोसा नी करदे न, सै दोषी न क्योंकि उनी परमेश्वरे दे इकलोते पुत्रे दे नाऐ पर भरोसा नी किता। 19 कने सजा दा हुकम देंगे दी बजा ऐ की लौ संसारे च आई है, कने लोकां नेहरे जो लौइ ला जादा प्यार किता क्योंकि उना दे कम्म बुरे थे। 20 क्योंकि जड़ा कोई बुराई करदा है, सै लौइ ने बैर रखदा है, कने लौइ च नी ओंदा है, इयां ना हो कि उदे कम्मा पर दोष लगन। 21 पर जड़ा सचाइया पर चलदा है सै लौइ च ओंदा है, ताकि उदे कम्म प्रगट होन जड़ा परमेश्वरे चांदा की सै करन।” 22 इदे बाद यीशु कने उदे चले यहूदिया प्रदेश च आये; कने सै ओथु उना सोगी रेईकरी बपतिस्मा देणा लग्गा। 23 कने यूहन्ना भी ऐनान ग्रां च जड़ा सामरिया इलाके दे शालेम शहर दे नेडे है ओथु बपतिस्मा दिन्दा था। क्योंकि ओथु मता पांणी था, कने लोक आई करी बपतिस्मा लेंदे थे। 24 क्योंकि यूहन्ना तालू दीकर जेला च नी पाया था। 25 ओथु यूहन्ना दे चेलयां दा कुसकी यहूदिये सोगी रिबाजा दे हिसावे ने शुद्धी दे बारे च बेहस होई। 26 कने यूहन्ना दे चेलयां उस बाल आई करी उसला बोलया, “गुरू जी, जड़ा माणु यरदन खड़ा दे पारले पासे तैरे सोगी था, जिसदे बारे च तुसां गबाही दिती थी; दिख, सै बपतिस्मा दिन्दा है, कने सब उस बाल ओंदे न।” 27 यूहन्ने जबाब दिता, जालू दीकर माणुए जो स्वर्गे ला ना दितया जाए, उसयो तालू दीकर कुछ नी मिल्ली सकदा। 28 तुसां अपु मेरे गबाह न की क्या बोलया था, की मैं मसीह नी है, पर उदे पहले भेजया गया है। 29 लाड़ा लाडिये ने बियाह करी लेंदा है, पर लाड़े दा मित्र सोगी खडोई करी उदी सुणदा है, लाड़े दियां गल्लां ने बड़ा खुश होंदा है; तियां ही मेरा दिल खुश होई गया है। 30 जरूरी है सै होर जादा खास होई जा कने मैं घट खास होई जां। 31 “जड़ा स्वर्गे ला ओंदा है सै सबना ला बडा है, जड़ा धरतिया ला ओंदा है सै धरतिया दा है; कने

धरती दियां गल्लां करदा है: जड़ा स्वर्गे ला ओंदा है, सै सबना ला उपर है। 32 जड़ा कुछ उनी दिखया, कने सुणाया है, उदी गबाई दिन्दा है; पर बड़े घट लोक उदे संदेश जो मंदे न। 33 पर जिना लोकां उदा संदेश मन्नी लिया उनी इसा गल्ला पर प्रमाण देई दिता की परमेश्वर सच्चा है। 34 क्योंकि जिसयो परमेश्वरे भेजया है सै परमेश्वरे दे बचना दा प्रचार करदे न क्योंकि ऐ सेई है जिसयो परमेश्वरे बिना नापी-तोली करी पबित्र आत्मा दिन्दा है। 35 पिता परमेश्वर पुत्रे ने प्यार करदा है, कने उनी सारियां चिंजा उदे हथां च देई दितियां। 36 जड़ा परमेश्वरे दे पुत्रे पर भरोसा रखदा है, हमेशा दी जिन्दगी उदी है; पर जड़ा पुत्रे जो नी मनदा है, उसयो अनन्त जिन्दगी नी मिलणी, पर परमेश्वरे दी सजा उसयो मिलणी है।” (aiōnios g166)

4 फिरी जालू यीशुऐ जो पता लगा की फरीसियां सुणाया है की यीशु यहून्ना ला जादा चेले बणांदा कने बपतिस्मा दिन्दा है। 2 यीशु नी पर उदे चेले बपतिस्मा दिन्दे थे, 3 तालू सै यहूदिया प्रदेश जो छडी करी फिरी अपने चेलयां सोगी गलील प्रदेशे दे इलाके जो चली गया, 4 कने उसयो सामरियां प्रदेश ला होईकरी जाणा जरूरी था, क्योंकि परमेश्वर भी ऐई चांदा था। 5 तांई तां सै सामरिया प्रदेश दे खूखार शेहरे दीकर आया, जड़ा उसा जमिना दे बखे है जड़ी याकूबे अपने पुत्र यूसुफे जो दितियो थी। 6 कने याकूबे जड़ा खु ओथु बणाया था, सै हले दीकर भी ओथु ही था। कने यीशु रस्ते च थकी करी उस खुऐ पर इयां ही बेई गया। कने ऐ गल्ल दोपहर दे बकते होई थी। 7 इतणे च इक सामरी जनानी पांणी भरना आई। यीशुऐ उसा जो बोलया की “मिंजो पीणे तांई पांणी दे।” 8 क्योंकि उदे चेले तां शेहरे च खाणा खरीदणा गियो थे। 9 इना सामरी जनानिया उसला बोलया, तू यहूदी होईकरी सामरी जनानिया ला पांणी कजो मंगा दा है? क्योंकि यहूदी सामरियां सोगी कुछ भी रिश्ता नी रखदे। 10 यीशुऐ जबाब दिता, “तू नी जाणदी है की परमेश्वर तिजो क्या देणा चांदा, कने ऐ भी नी जाणदी की कुण तिजो ला पांणी मंगा दा है। अगर तू जाणदी, तां तू मिंजो ला मंगदी, कने मै तिजो जिन्दगिया दा पांणी दिन्दा जड़ा जिन्दगी दिन्दा है।” 11 जनानिया उसला बोलया, प्रभु जी, तेरे बाल पांणिए भरने तांई तां कुछ हे भी नी है, कने खु तां बड़ा डुगा है; तां फिरी सै जिन्दगिया दा पांणी तेरे बाल कुथु ला आया? 12 क्या तू साडे पूर्वज याकूबे ला बडा है, जिनी सांझो ऐ खु दिता; कने उनी कने उदे बचयां कने डंगरां समेत इस खुऐ ला पीता? 13

यीशुए उसा जो जबाब दिता, जडा कोई इस पांणिए जो पिंगा उसयो फिरी त्रे लगी पोंणी, 14 पर जडा कोई उस पांणिए जो पिंगा जडा मैं उसयो देणा, तां उनी फिरी अनन्तकाल दीकर कदी त्रिणा नी होणा। जडा पांणी मैं उसयो दिंगा, सै उदे च इक पांणिए दा खु बणी जाणा, जडा उस पांणिए जो दिन्दा रेंदा है कने उसयो हमेशा दी जिन्दगी देणी। (aiōn g165, aiōnios g166) 15 उना जनानिया उसला बोलया, “प्रभु जी, सै पांणी मिंजो दे ताकि मिंजो त्रे ना लग्गे कने ना पांणी भरणे ताई बार-बार इतणी दुरे जो ओऐ।” 16 यीशुए उसा जो बोलया, “जा, अपने घरे बाले जो ऐथू सदी लेई ओ।” 17 जनानिया जबाब दिता, “मेरा घरे बाले नी है।” यीशुए उसा ने बोलया, “तू ठीक बोलदी है, की मेरा घरेबाला नी है। 18 क्योंकि तू पंज घरे बाले करी बेठियो है, कने हुण तू जिस माणुए बाल है सै भी तेरा घरेबाला नी है; ऐ तू सच्च बोलया है।” 19 जनानिया उसला बोलया, “प्रभु जी, मिंजो लगदा है तू परमेश्वरे दा संदेश देणेबाला है। 20 साडे सामरी पूर्वज इसी पाहेडे पर परमेश्वरे दी भक्ति करदे थे, कने तुसां यहूदी लोक बोलदे न की सै जगा जिथू अराधना करणी चाईदी सै यरूशलेम शहर च है।” 21 यीशुए उसा ने बोलया, “हे जनानिये, मेरिया गल्लां पर भरोसा कर की सै बकत ओणा है, ना तां तुसां इसी पाहेडे पर पिता दी भक्ति करणी है ना तां यरूशलेम शहर च। 22 तुसां सामरी लोक जिसयो नी जाणदे न, उदी भक्ति करदे न; कने असां यहूदी लोक जिसयो जाणदे न उदी अराधना करदे न; क्योंकि उद्धार करणे बाले यहूदियां चे ही ओणा है। 23 पर सै बकत ओणा है, मतलब अजे भी है, जिदे च सच्चे भक्त पिता परमेश्वरे दी भक्ति आत्मा कने सचाइया ने करणी है, क्योंकि पिता परमेश्वर अपने ताई ऐदे ही अराधना करणे बालयां जो तोपदा है। 24 परमेश्वर आत्मा है, कने जरूरी है की उदी अराधना करणे बाले आत्मा कने सचाइया ने भक्ति करन।” 25 जनानिया उसला बोलया, “मैं जाणदी है की मसीह जिसयो ख्रिस्तुस बोलदे न, ओणे बाला है; जालू उनी ओणा है, तां उनी सांझो सारियां गल्लां दसी देणियां न।” 26 यीशुए उसा ने बोलया, “मैं जडा तिजो ने बोला दा है, सेई है।” 27 इतणे च उदे चेले आईं गे, कने हेरान होणा लग्गे की सै जनानिया ने गल्लां करा दा है; पर तमी कुनी नी पुछया, तू क्या चांदा है? “कने कजो इसा ने गल्लां करा दा है?” 28 तालू सै जनानी अपना घडा छडी करी शेहरे जो चली गई, कने लोंका ने बोलणा लग्गी, 29 “ओआ, इक माणुए जो दिखा, जिनी सब कुछ दसी दिता जडा मैं कितया।

कुथी ऐई तां मसीह नी है?” 30 तालू सै शेहरे ला निकली करी यीशुऐ जो दिखणा औणा लग्गे। 31 इतणे च उदे चेले आई करी उसला बिनती करणा लग्गे, “गुरू जी, कुछ खाई ले।” 32 पर यीशुऐ उना ने बोलया, “मेरे बाल खांणे तांई ऐसा खांणा है जिसयो तुसां नी जाणदे न।” 33 तालू चेलयां अपु चे बोलया, “क्या कुनी इदे तांई कुछ खांणे जो लांदया है?” 34 यीशुऐ उना ने बोलया, मेरा खांणा परमेश्वरे दी इच्छा दा पालन करणा है जिनी मिंजो भेजया है, कने उस कम्मे जो पूरा करणा है जड़ा उनी मिंजो सौपया। 35 क्या तुसां नी बोलदे, बडाई करणे जो अजे भी चार महीने पियो न? दिखा, मैं तुसां ने बोलदा है, अपणियां हखी खोला कने ओणे बाले लोकां जो दिखा। सै खतरां च पकियो फसला सांई न, कने बडाई तांई तैयार न। 36 पेहेले ला ही बडणे बाले कम्म करा दे न कने उना जो अपणी मजदूरी मिल्ला दी है। कने बी राणे बाला कने बडणे बाला दोनों मिलिकरी खुशी मनान। (aiōnios g166) 37 क्योंकि इसा गल्ला पर ऐ कहावत ठीक बोंदी है: राणे बाला कोई होर है कने बडणे बाला कोई होर है। 38 मैं तुहांजो उस खेतरे जो बडणे तांई भेजया जिस च तुसां मेहनत नी कितियो होरनी मेंहनत कितियो है, “तुसां उसा फसला जो गठेरणा (जिस तांई उना कम्म कितया है)।” 39 कने उस शेहरे दे मतयां सामरियां उसा जनानिया दे बोलणे ने यीशुऐ पर भरोसा किता; जिना ऐ बोलया था, की उनी सब कुछ दसी दिता, जड़ा मैं कितया है। 40 जालू से सामरी उदे बाल आये, तां उसला बिनती करणा लग्गे की साडे ऐथू रे। तां सै ओथु दो रोज रिया। 41 कने उदे संदेश दिया बजा ने मतयां यीशुऐ पर भरोसा किता। 42 कने उना जनानिया बोलया, हुण असां तरे बोलणे ने ही भरोसा नी करदे न, क्योंकि असां अपु ही सुणी लिया, कने असां जाणदे न की ऐई सच्ची दा संसारे दा उद्धार करणे बाला है। 43 फिरी सै उना दो रोजां बाद सै ओथु ला निकली करी गलील प्रदेश जो गया। 44 क्योंकि यीशुऐ अपु ही बोलया था की परमेश्वरे दा संदेश देणेबाले दी अपणे देशे च इज्जत नी होंदी है। 45 जालू सै गलील प्रदेश गया, तां गलील बासी खुशिया ने उसला मिल्ले; क्योंकि जितणे भी कम्म उनी यरूशलेम शहर च त्योहारे बेले कितयो थे, उना सारयां कम्मा जो दिखया था, क्योंकि सै भी त्योहारे जो गियो थे। 46 तालू सै फिरी गलील प्रदेश दे काना शहर च आया, जिथू उनी पाणिऐ जो दाखरस बणाया था। ओथु राजे दा इक सेवक था जिसदा पुत्र कफरनहम शहर च बीमार था। 47 सै ऐ सुणीकरी की यीशु यहूदिया प्रदेश ला गलील प्रदेशे च आया है, उदे बाल गया

कने उसला बिनती करणा लग्गा की चली करी मेरे पुत्रे जो ठीक करी दे: क्योंकि सै मरणे बाला था। 48 यीशुए उसयो बोलया, जालू तुसां चमत्कार कने अनोखे कम्म नी दिखी लेंगे तालू दीकर तुसां मिजो मसीहा नी मनणा। 49 राजे दे सेवके उसला बोलया, “प्रभु जी, मेरे जागते दी मौत होणे ला पेहले चल।” 50 यीशुए उसयो बोलया, “जा तेरा जागत जिन्दा है।” उनी माणुए यीशुए दी गल्ल मन्नी कने चली गया। 51 सै अजे रस्ते च ही चलया था, की उदे सेवक उस बाल आई रे कने बोलणा लग्गे, “तेरा जागत जिन्दा है।” 52 उनी उना ला पुछया, “की कुस बकते सै खरा होणा लग्गा?” उना उसला बोलया, “कल दोपहर इक बजे उदा भुखार उतरी गया।” 53 तालू उस जागते दा पिता समझी गया की ऐ उस बकते ही होया है जिस बकते यीशुए बोलया, तेरा जागत जिन्दा है, “कने उनी कने उदे सारे घरे बालयां यीशुए पर भरोसा किता।” 54 ऐ दुज्जा चमत्कार था जडा यीशुए यहूदिया प्रदेश ला गलील प्रदेश च बापस आई करी किता।

5 इना गल्लां दे बाद यहूदियां दा इक त्योहार होया, कने यीशु यरूशलेम शहर जो गया। 2 यरूशलेम च भेडां दे फाटके बखे इक तलाब है जिसयो इब्रानी भाषा च बैतहसदा बोलदे न, कने उदे चारो पास्से पंज बरांडे न। 3 उना च मते बीमार, अन्ने, लंगडे कने सुकयो अंगा बाले, पाणिऐ हिलणे दिया आसा च ओथु बेई रेंदे थे। 4 क्योंकि परमेश्वरे दे नियुक्त बकते पर स्वर्गदूत तलाब पर उतरी करी पाणिऐ जो हिलादें थे: पाणी हिलणे बाद जडा कोई भी पेहले अंदर जांदा था सै ठीक होई जांदा था चाऐ उदी कोई भी बिमारी हो। 5 ओथु इक माणु था, सै ठतियां सालां ला बीमारिया च था। 6 यीशुए उसयो पिया दिखीकरी कने जाणी करी की ऐ इसा हालता च बडे रोजां ला है, उसला पुछया, “क्या तू ठीक होणा चांदा है?” 7 उनी बिमारे जबाब दिता, “प्रभु जी, मेरे बाल कोई माणु नी है, की जालू पांणी हिले, तालू मिजो तलाब दे अंदर जाणे तांई मदद करे, मै तलाब दे अंदर जाणे दी कोशिश करदा है, हमेशा मेरे पुजणे ला पेहले ही कोई होर मेरला पेहले तलाब अंदर चली जांदा है।” 8 यीशुए उसला बोलया, “उठ, अपणिया चटाईया जो चुकी करी हंड फिर।” 9 सै माणु झट ठीक होई गया, कने अपणिया चटाईया जो चुकी करी चलणा फिरणा लग्गी पिया। 10 जिस रोजे ऐ सब होया सै सब्ते दा दिन था। इस तांई यहूदी अगुवे उसला जडा ठीक होया था, बोलणा लग्गे, “मूसा दिया व्यवस्था दे अनुसार सब्ते दे रोजे, तिजो चटाईया जो चुकी करी लेई जाणा ठीक नी है।”

11 उनी उना जो जबाब दिता, “जिनी मिंजो ठीक किता उनी मिंजो बोलया है, अपणिया चटाईया चुकी करी चल फिर।” 12 उना उसला पुछया, “सै कुण माणु है जिनी तिजो ऐ बोलया, चटाई जो चुक कने चल फिर?” 13 पर जड़ा ठीक होई गया था, सै नी जाणदा था की सै कुण है; क्योंकि उसा जगा पर भीड़ होंगे दिया बजा ने यीशु ओथु भिड़ा ने मिली गया कने उना जो मिल्ला नी। 14 कुछ बकते बाद सै यीशुऐ जो मंदरे दे अंगणे च मिला, तालू उनी उसला बोलया, “दिख, तू तां ठीक होई गया है; हुण दोबारा पाप मत करदा, इयां ना हो की इसला भी बडी मुसिबत तिजो पर आई जा।” 15 उनी माणुऐ जाई करी यहूदी अगुवां ने बोली दिता की जिनी मिंजो ठीक कितया है सै यीशु है। 16 इसा बजा ने यहूदी अगुवे यीशुऐ जो सताणां लग्गे, क्योंकि सै ऐसे-ऐसे कम्म सब्ते दे रोजे करदा था। 17 इसा गल्लां पर यीशुऐ उना ने बोलया, मेरा पिता परमेश्वर हले दीकर कम्म करदा है कने मिंजो भी कम्म करणा चाईदा। 18 यीशुऐ ऐ बोलया इसा बजा ने यहूदी अगुवे उसयो होर भी जादा मारणे दी कोशिश करणा लग्गे, की सै सिर्फ ऐई नी की सब्ते दे दिने दे रिबाजे जो तोड़ा दा, पर सै परमेश्वरे जो भी अपणा पिता बोली करी, अपने आपे जो परमेश्वर दे बराबर बोला दा था। 19 इसी पर यीशुऐ उना ने बोलया, मैं तुसां ने सच्च-सच्च बोलदा है, मैं अपु ला कुछ नी करी सकदा है, सिर्फ सेई जड़ा सै पिता परमेश्वर जो करदे दिखदा है, क्योंकि जिना-जिना कम्मा जो सै करदा है उना जो मैं भी तियां ही करदा है। 20 इस तांई पिता परमेश्वर मिंजो ने प्यार करदा है कने जड़े-जड़े कम्म सै अपु करदा है, सै सारे उसयो दसदा है; कने उनी इना ला भी बड़े कम्म उसयो दसणे न, ताकि तुसां हेरान होन। 21 क्योंकि जियां मेरा पिता परमेश्वर मरयां लोकां जो जिन्दा करदा है, तियां ही मैं भी जिना जो चांदा है उना जो जिन्दा करदा है। 22 पिता परमेश्वर कुसी दा भी न्याय नी करदा है, पर न्याय करणे दा सारा कम्म मिंजो देई दितया है, 23 इस तांई जियां सारे लोक पिता परमेश्वर दा आदर करदे न तियां ही मेरा भी आदर करन जड़ा मेरा आदर नी करदा, सै पिता परमेश्वर दा आदर भी नी करदा है जिनी उसयो भेजया है। 24 मैं तुसां ने सच्च-सच्च बोलदा है, जड़ा मेरा बचन सुणीकरी मेरे भेजणे बाले पर भरोसा करदा है, हमेशा दी जिन्दगी उदी है, कने उसयो सजा नी मिलणी है पर सै तां अनन्त मौता ला बची गया है कने उनी पेहले ला ही जिन्दगी च प्रवेश करी लिया है। (aiōnios g166) 25 “मैं तुसां ने सच्च-सच्च बोलदा है, सै बकत ओणा

है, कने हुण है, जिदे च मरयां परमेश्वरे दे पुत्र, मेरी अबाज सुणनी, कने जडे सुणगे उना हमेशा ताई जी पोणा है।” 26 क्योंकि जियां पिता परमेश्वर अपने अंदर जिन्दगी रखदा है, तियां ही उनी अपने पुत्र, जो भी हक दितया है की सै अपने आपे च जिन्दगी रखे; 27 क्योंकि मैं माणुए दा पुत्र है, इस ताई पिता परमेश्वरे मिंजो सारे लोकां जो न्याय करणे दा अधिकार दितया है। 28 इसला हेरान मत होआ, क्योंकि सै बकत ओणा है, की सै सारे लोक जडे मरी गियो न, उना मेरी मतलब की, माणुए दे पुत्रे दी अबाज सुणीकरी जिन्दे होई जाणा है। 29 जिना बाल अच्छी जिन्दगी थी, उना हमेशा दी जिन्दगी ताई जिन्दे होई जाणा है, सै जडे बुराई च जिन्दगी बितान्दे न, उना दोषी होणे ताई जी पोणा है। 30 “मैं अपने आपे ला कुछ नी करी सकदा; मैं लोकां दा न्याय तियां ही करदा है जियां पिता परमेश्वर मिंजो उना दा न्याय करणे ताई बोलदा है, कने मेरा न्याय सही है; क्योंकि मैं अपनी मरजी नी, पर अपने भेजणे बाले दी मर्जी चांदा है। 31 अगर मैं अपु ही अपनी गबाई दें, तां मेरी गबाई सच्ची नी है। 32 इक होर है जडा मेरा पिता परमेश्वर है, सै भी मेरे बारे च गबाई दिन्दा है, कने मैं जाणदा है की मेरी जड़ी सै गबाई दिन्दा है, सै सच्ची है। 33 तुसां यूहन्ना बपतिस्मा देणेबाले बाल संदेश देणेबाले भेजे कने उनी सचाइया दी गबाई दितियो है। 34 पर मैं अपने बारे च माणुआं दी गबाई नी चांदा है; तमी मैं इसा गबाई दे बारे च दसया है जड़ी यूहन्ना दिती थी ताकि तुहाडा उद्धार होऐ। 35 यूहन्ना इक दिये साई था; कने तुहांजो थोडिया देरा ताई उदिया लौई च, मगन होणा खरा लग्गा। 36 पर मेरे बाल यूहन्ना ला भी बड़ी गबाई है: क्योंकि जडा कम्म पिता परमेश्वरे मिंजो पूरा करणे ताई दितया सै मेरे बारे च गबाई दिन्दा है। जडा कम्म मैं करी सकदा है, सै गबाई दिन्दा है की मिंजो पिता परमेश्वरे भेजया है। 37 कने पिता परमेश्वर जिनी मिंजो भेजया है, उना ही मेरी गबाई दितियो है तुसां ना तां उदी कदी अबाज सुणी, कने ना उसयो आमणे सामणे दिखया है। 38 कने उदे संदेशा जो मने च टिकाई करी नी रखदे, क्योंकि जिसयो परमेश्वरे भेजया है तुसां उदा भरोसा नी करदे। 39 तुसां पबित्र शास्त्रां च ध्याने ने पढी करी तोपदे न, क्योंकि तुसां समझदे न की उना ने हमेशा दी जिन्दगी मिलदी है, कने ऐ सेई बचन है, जडा मेरी गबाई दिन्दा है; (aiōnios g166) 40 पर ऐ सब होणे पर भी अनन्त जिन्दगी पांणे ताई मेरे बाल नी ओणा चांदे न। 41 मैं माणुए ला आदर दी आस नी रखदा है। 42 क्योंकि मैं तुसां जो जाणदा है

की तुसां अपने मने च परमेश्वरे ताई प्यार नी रखदे न। 43 मैं अपने पिता परमेश्वर दे अधिकारे ने आया है, कने तुसां मिजो अपनांदे नी अगर कोई होर अपने ही अधिकारे ने ओऐ, तां उसयो तुसां अपनाई लेंदे न। 44 तुसां मिजो पर भरोसा नी करी सकदे न, क्योंकि तुसां इकी दुज्जे ला अपनी आदर मान चांदे न, कने तुसां इकलोते परमेश्वरे ला आदर मान पाणे दी कोशिश नी करदे न। 45 ऐ मत समझा, की मैं पिता परमेश्वरे दे सामणे तुसां पर दोष लगा दा: मूसा, जिस पर तुसां आस रखियो है, उनी तुसां पर दोष लगाणे न। 46 क्योंकि अगर तुसां मूसा दा भरोसा करदे, तां मेरा भी भरोसा करदे, इस ताई की उनी भी मेरे बारे च पबित्र शास्त्र च लिखया है। 47 क्योंकि तुसां उदियां लिखियां गल्लां दा भरोसा नी करदे, तां तुसां पक्का ही मेरियां गल्लां दा भी नी करी सकदे।”

6 इना गल्लां दे बाद यीशु गलील झिला च मतलब की तिबिरियासे दिया झिला बखे गया। 2 कने बड़ी भरी भीड़ उदे पिछ्छे चली पेई क्योंकि जडे अनोखे कम्म सै बिमारां पर दसदा था सै उना जो दिखदे थे। 3 तालू यीशु पहाड़े पर चढ़ी करी अपण्यां चेलयां सोगी ओथु बैठा। 4 कने यहूदियां दे फसह दा त्योहारे नेडे ही था। 5 तालू यीशुऐ नजरा चुकी करी मती भरी भिड़ा जो अपने बाल ओदे दिखया, कने फिलिप्पुस ने बोलया, “असां इना जो खांणे ताई रोटी कुथु ला खरदी लोणी?” 6 पर यीशुऐ ऐ गल्ल उसयो परखणे ताई बोली; क्योंकि सै अपु जाणदा था की मैं क्या करणा है। 7 फिलिप्पुसे उसयो जबाब दिता, “इतणी रोटियां दी कीमत दो सो दिना दिया मजदुरिया दे बराबर होणी, सै भी उना ताई पूरी नि होणी की उना चे हर इकी जणे जो थोड़ी-थोड़ी मिल्ली जा।” 8 उदे चेलयां चे शमौन पतरस दे भाई अन्दियासे उसयो बोलया, 9 “ऐथू इक जागत है जिदे बाल जौ दियां पंज रोटियां न कने दो मछियां न, पर ऐ इतणे लोका ताई काफी नी है।” 10 यीशुऐ बोलया, “लोकां जो बठाई दिया।” उसा जगा पर मता घा था: तालू सै लोक बैठी गे, कने सै गिणतिया च लगबग पंज हजार थे। 11 तालू यीशुऐ रोटियां लियां, कने धन्यवाद करिके जडे बैठयो थे उना जो बंडी दितियां: कने तियां ही मछियां जो भी जितणियां सै चांदे थे बंडी दितियां। 12 जालू सै खाई करी रजी गे तां उनी अपने चेलयां ने बोलया, “बचयां टुकड़ां जो गठेरी लिया, ताकि कुछ बर्बाद ना होऐ।” 13 उना सै रोटियां दे टुकड़े गठेरे, कने सै पंज रोटियां दे टुकड़े जडे खांणे बालयां ला बची गियो थे उना ने बाहरा टोकरियाँ भरियां। 14 तालू जडा अनोखा कम्म

उनी करी के दसयो दिखीकरी लोक बोलणा लग्गे; की सै परमेश्वरे दा संदेश देणेबाला है जड़ा संसारे च ओणे बाला था, सै पका ऐई है। 15 यीशु ऐ जाणी करी की लोक मिंजो राजा बणाणे ताई आई करी पकड़ना चांदे न, फिरी पहाड़े पर किला ही चली गया। 16 फिरी जालू संज होई, तां उदे चेले झिला कंडे पर आये, 17 कने किस्तिया पर चढ़ी करी झिला पार कफरनहम शहर जो जाणा लग्गे: उस बेले नेहरा होई गया था, कने यीशु हले दीकर उना बाल नी पुजया था। 18 कने तुफाने दिया बजा ने झिला च लेहरां उठणा लगियां। 19 जालू सै चलदे-चलदे लगबग चार मील निकली गे, तां उना यीशुऐ जो झिला पर चलदे कने किस्तिया बखे ओदे दिखया, कने चेले डरी गे। 20 पर यीशुऐ उना ने बोलया, “मैं है; डरा मत।” 21 सै उसयो किस्तिया पर चढ़ाणे ताई तैयार होऐ कने झट सै किस्ति उसा जगा जाई पुज्जी जिसा जगा सै चलयो थे। 22 दुज्जे रोजे उना भिड़ा, जड़ी झिला पार खड़ोतियो थी, ऐ दिखया की ऐथू इकी जो छड़ी करी होर कोई लोकी किस्ति नी थी, कने यीशु अपणयां चेलयां सोगी इसा किस्तिया पर नी चढ़या था, बस उदे चेले ही गियो थे। 23 होर लोकी किस्तियां तिबिरियास शेहरे ला उसा जगा पर आईयां, जिथू उना प्रभु दा धन्यवाद करणे बाद रोटी खादी थी। 24 जालू भिड़ा दिखया, की ऐथू ना यीशु है, ना उदे चेले, तां सै भी लोकियाँ-लोकियाँ किस्तिया पर चढ़ी करी यीशुऐ जो तोपदे कफरनहम शहर च जाई पुज्जे। 25 कने झिला दे पार उसला मिली करी उसयो बोलया, “गुरू जी, तू ऐथू कालू आया?” 26 यीशुऐ उना जो जबाब दिता, “मैं तुसां ने सच्च-सच्च बोलदा है, तुसां मिंजो इस ताई नी तोपा दे की तुसां अनोखे कम्म दिखयो, पर इस ताई की तुसां रोटियां खाई करी रजी गे। 27 खत्म होणे बाले खांणे पिच्छे मेहनत मत करा, पर उस खांणे ताई करा जड़ा हमेशा दिया जिन्दगिया दीकर रेंदा है, जड़ा मैं माणुऐ दे पुत्रे तुहांजो ऐ खाणा देणा है, क्योंकि पिता परमेश्वरे मिंजो ऐसा करणे दा हक दितया है।” (aiōnios g166) 28 उना यीशुऐ ला पुछया, “परमेश्वरे दा कम्म करणे ताई असां क्या करन?” 29 यीशुऐ उना जो जबाब दिता, “परमेश्वर चांदा है की तुसां उस पर भरोसा करन जिसयो उनी भेजया है।” 30 तालू उना उसला पुछया, “फिरि तू कुण दिया चमत्कार दसदा है, कि असां उसयो दिखीकरी तिजो पर भरोसा करन? तू कुण दिया कम्म दसदा है? 31 साइयां पूर्वजां सुनसान जगा च मन्ना खादा; जियां पबित्र शास्त्र च लिखया है, मूसा उना जो खांणे ताई स्वर्गे ला रोटी दिती।” 32

यीशुए उना बोलया, “मैं तुसां ने सच्च-सच्च बोलदा है तुहांजो सै रोटी स्वर्गे ला
 मूसा नी दितियो, पर मेरे पिता परमेश्वर तुहांजो स्वर्गे ला सच्ची रोटी दिन्दा है। 33
 क्योंकि परमेश्वरे दी रोटी सेई है, जड़ी स्वर्गे ला उतरी करी संसारे दे लोकां जो
 जिन्दगी दिन्दी है।” 34 तालू उना उसला बोलया, “प्रभु जी, ऐ रोटी सांझो रोज ही
 दे कर।” 35 यीशुए उना ने बोलया, “रोटी जड़ी हमेशा दी जिन्दगी दिन्दी है सै
 रोटी मैं है: जड़ा मेरे बाल ओगा उनी कदी भूखे नी होणा कने जड़ा मिंजो पर
 भरोसा करगा, सै कदी तरिणा नी होणा। 36 पर मैं तुसां ने पेहले ही बोलया था, की
 तुसां मिंजो दिखी भी लिया है तमी भरोसा नी करदे। 37 जड़ा कुछ पिता परमेश्वरे
 मिंजो दिन्दा है, सै सब मेरे बाल ओणा है, कने जड़ा कोई मेरे बाल ओगा उसयो मैं
 कदी नी कडगा। 38 क्योंकि मैं अपनी इच्छा नी, पर अपने भेजणे बाले दी इच्छा
 पुरी करणे तांई स्वर्गे ला उतरया है। 39 कने मेरे भेजणे बाले दी इच्छा ऐ है की
 जड़ा कुछ उनी मिंजो दितया है, उदे चे मैं कुछ नी गबां पर उसयो आखरी रोजे
 इसयो फिरी ला जिन्दा करे। 40 क्योंकि मेरे पिता परमेश्वरे दी इच्छा ऐ है, की
 जड़ा कोई मिंजो दिखदा है, कने मिंजो पर भरोसा करे, उसयो हमेशा दी जिन्दगी
 मिल्ले; कने मैं उसयो आखरी रोजे फिरी जिन्दा करी दिगा।” (aiōnios g166) 41
 तालू यहूदी अगुवे उस पर बुडबडाणा लग्गे, इस तांई की उनी बोलया था, “जड़ी
 रोटी स्वर्गे ला उतरियो है सै मैं है।” 42 कने उना बोलया, “क्या ऐ यूसुफे दा पुत्र
 यीशु नी है, जिसदे माता-पिता जो असां जाणदे न? तां सै कजो बोलदा न की मैं
 स्वर्गे ला उतरया है?” 43 यीशुए उना जो जबाब दिता, “अपु चे मत बुडबुडा। 44
 कोई मेरे बाल नी आई सकदा है, जालू दीकर पिता परमेश्वर, जिनी मिंजो भेजया
 है, उसयो अपने बाल खिची नी ले; कने मैं उसयो आखरी रोजे फिरी जिन्दा करी
 देणा है। 45 परमेश्वरे दा संदेश देणेबालयां लेखां च ऐ लिखया है, सै सारे परमेश्वरे
 दीया तरफा ला सिखाए होणे न। जिनी कुनी पिता परमेश्वर ला सिखया कने सुणाया
 है, सै मेरे बाल ओदा है। 46 कुनी भी पिता परमेश्वर जो नी दिखया। मैं किल्ला ही
 है, जड़ा परमेश्वर दिया तरफा ला आया है, जिनी उसयो दिखया है। 47 मैं तुसां
 ने सच्च-सच्च बोलदा है, की जड़ा कोई मिंजो पर भरोसा करदा है, हमेशा दी
 जिन्दगी उदी है। (aiōnios g166) 48 रोटी जड़ी जिन्दगी दिन्दी है सै मैं है। 49
 तुहाडे पूर्वजां सुनसान जगा च मन्ना खादा कने मरी गे। 50 ऐ जिन्दगी दी रोटी है
 जड़ी स्वर्गे ला उतरदी है ताकि माणु इसयो खा कने कदी मेरे ना। 51 जिन्दी रोटी

जड़ी स्वर्गे ला उतरी सै मैं है। अगर कोई इसा रोटिया चे खा, तां हमेशा जिन्दा रेणा, कने जड़ी रोटी मैं संसारे दिया जिन्दगिया ताई दिंगा, सै मेरा मास है।” (aiōn g165) 52 इस पर यहदी अगुवे ऐ बोली करी अपु चे लड़ना लग्गे, “ऐ माणु सांझो कियां अपना मास खांणे जो देई सकदा है?” 53 यीशुऐ उना ने बोलया, “मैं तुसां ने सच्च-सच्च बोलदा है जालू दीकर मेरा, माणुऐ दे पुत्रे दा मास नी खांणे, कने उदा खून नी पीगे, तुसां च जिन्दगी नी है। 54 जड़ा मेरा मास खांदा है, कने मेरा खून पिंदा है, हमेशा दी जिन्दगी उदी ही है, कने न्याये दे रोजे उसयो फिरी जिन्दा करणा। (aiōnios g166) 55 क्योंकि मेरा शरीर सच्ची खांणे दी चीज है कने मेरा खून भी सच्ची पिंणे दी चीज है। 56 जड़ा मेरा मास खांदा है कने मेरा खून पिंदा है सै मिंजो च टिकी रेदा है, कने मैं उदे च रेदा है। 57 मेरा पिता परमेश्वर जिनी मिंजो भेजया है, सै जिन्दगी दिन्दा है। जियां उनी मिंजो जिन्दगी दितियो, तियां ही मैं भी उस माणुऐ जो जिन्दगी देणी जड़ा मेरे शरीर जो खांदा है।” 58 ऐ सै रोटी है, जड़ी स्वर्गे ला उतरी होई है; पर तुहाड़े पूर्वजां मन्ना खादा, कने मरी गे: जड़ा कोई ऐ रोटी खांगा, उनी हमेशा जिंदे रेणा। (aiōn g165) 59 ऐ गल्लां उनी कफरनहम शेहरे दे इक यहदी जंज घर च उपदेश दिन्दे बेले बोलियां। 60 ताई तां यीशुऐ दे चेलयां चे मतयां ऐ सुणीकरी बोलया, ऐ समझणा बड़ा मुश्किल है; की कुण इसयो मन्नी सकदा है? 61 यीशुऐ अपने मने च ऐ जाणी करी की मेरे चेले अपु चे इसा गल्ला दे बारे च बुडबुडा दे न, उना ला पुछया, “क्या ऐ गल्ल तुहांजो मिंजो पर भरोसा करणे ला रोकदी है? 62 कने अगर तुसां मिंजो माणुऐ दे पुत्रे जो स्वर्गे जांदे दिखगे, जिथू सै पेहले था, तां क्या होंगा? 63 परमेश्वरे दी आत्मा तां जिन्दगी देणेबाली है, शरीर ने कोई फायदा नी है: जडियां गल्लां मैं तुसां ने बोलियाँ सै पबित्र आत्मा ने बोलियां न, कने ऐ गल्लां माणुआं जो जिन्दगी दीदियां न। 64 पर तुसां चे कितणे ऐसे न जडे भरोसा नी करदे न।” क्योंकि यीशु तां पेहले ही जाणदा था की जडे भरोसा नी करदे न, सै कुण न; कने कुनी उसयो पकड़वाणा है। 65 कने यीशुऐ बोलया, इसी ताई मैं तुसां ने बोलया था की जालू दीकर पिता परमेश्वर दिया तरफा ला ऐ बरदान ना होऐ, तालू दीकर सै मेरे बाल नी आई सकदा है। 66 इसी पर उदे चेलयां चे मते बापस फिरी गे कने उदे बाद कदी उस सोगी नी चले। 67 तालू यीशुऐ उना बाहरां चेलयां ने बोलया, “क्या तुसां भी चली जाणा चांदे न?” 68 शमौन पतरसे उसयो जबाब दिता, प्रभु जी, असां कुसदे बाल जाणा?

हमेशा दिया जिन्दगिया दियां गल्लां तां तेरे बाल ही न। (aiōnios g166) 69 कने असां भरोसा कितया है, कने जाणी गियो न, की परमेश्वरे दा पबित्र जन कने मसीहा तू ही है जिसयो परमेश्वरे भेजया है। 70 यीशुऐ उसयो जबाब दिता, “क्या मैं तुसां बाहरां चेलयां जो नी चुणयां है? तमी तुसां च इक माणु बुरा है।” 71 ऐ उनी शमौन इस्करियोती दे पुत्र यहूदा दे बारे च बोलया, क्योंकि ऐई जडा उना बाहरां च था, जिनी उसयो पकड़वाणा था।

7 इना गल्लां बाद यीशु गलील प्रदेश च गुमदा रिया, क्योंकि यहूदी अगुवे उसयो मारणे दी कोशिश करा दे थे, इस ताई सै यहूदिया प्रदेश च गुमणा नी चांदा था। 2 कने यहूदी लोकां दा इक त्योहारे ओणे बाला था जिसयो झोपड़ियां दा त्योहार बोलदे थे। 3 इस ताई यीशुऐ दे भाईयां उसयो बोलया, “ऐथू ला यहूदिया प्रदेश जो चली जा, की जड़े कम्म तू करदा है, उना जो तेरे चले भी दिखन। 4 क्योंकि कोई भी जडा प्रसिद्ध होणा चांदा है सै लुकी करी कम्म नी करदा, अगर तू ऐ कम्म करदा है, तां अपने आपे जो संसारे च सबना दे सामणे कर।” 5 क्योंकि यीशुऐ दे भाई भी उस पर भरोसा नी करदे थे। 6 तालू यीशुऐ उना ने बोलया, “मेरा बकत हले नी आया है; पर तुहाड़े ताई कोई भी बकत सही है। 7 संसारे दे लोक तुसां ने बैर नी करी सकदे न, पर सै मिंजो ने बैर करदे न, क्योंकि मैं उदे खिलाफ ऐ गबाई दिन्दा है, की उना दे कम्म बुरे न। 8 तुसां त्योहारे जो जा; मैं हले इसी त्योहारे जो नी जाणा, क्योंकि हले दीकर मेरा बकत पूरा नी होया है।” 9 सै उना ने ऐ गल्लां बोली करी गलील प्रदेश च ही रिया। 10 पर जालू उदे भाई त्योहारे जो चली गे, तां सै बादे च लुकी करी ओथु गिया। 11 यहूदी लोक त्योहारे च ऐ बोली करी यीशुऐ जो तोपणा लग्गे की सै कुथु है? 12 कने लोकां च उदे बारे च लुकी-लुकी करी मतियां गल्लां बोलियां: कुछ बोलदे थे की, “सै भला माणु है।” कने कितणे ही बोलदे थे, की नी सै लोकां जो भटकांदा है। 13 यहूदी अगुवे दे डरे दिया बजा ने कोई भी माणु उदे बारे च खुली करी नी बोलदा था। 14 कने जालू त्योहारे दा अधा रोज होई गिया; तां यीशु मंदरे च जाई करी उपदेश देणा लग्गा। 15 तालू यहूदी लोक हेरान होईकरी बोलणा लग्गे, की ऐ माणु बिना पबित्र शास्त्र पढयो ज्ञानी कियां बणी गिया? 16 यीशुऐ उना जो जबाब दिता, “मेरा उपदेश मेरा अपना नी है, पर परमेश्वरे दिया तरफा ला है जीनी मिंजो भेजया है। 17 अगर कोई उदिया इच्छा पर चलणा चा, तां उनी जाणी लेणा की मेरी शिक्षा परमेश्वरे दिया तरफा ला ओदी

है, पर उपदेशे दे बारे च जाणी लेंणा की सै परमेश्वरे दिया तरफा ला है। 18 जड़ा अपणिया तरफा ला कुछ बोलदा है, सै अपणी ही इज्जत मान चांदा है; पर जड़ा अपने भेजणे बाले दा इज्जत मान चांदा है सै ही सच्चा है, कने उदे च धोखा नी है। 19 क्या मूसा परमेश्वरे दा संदेश देणेबाले तुहांजो व्यवस्था नी दितियो है? तमी तुसां चे कोई भी व्यवस्था पर नी चलदा है। तुसां कजो मिंजो मारी देणा चांदे न?” 20 लोंका जबाब दिता; “तिजो च बुरी आत्मा है! कुण तिजो मारणा चांदा है?” 21 यीशुऐ उना जो जबाब दिता, “मैं इक कम्म सब्ते बाले दिने किता, कने तुसां सारे हेरान होई गे। 22 इसा बजा ने मूसा तुहांजो खतने दा हुकम दितया है, ऐ नी की सै मूसा दिया तरफा ला है पर ऐ पूर्वजां ला चली आईयो है, कने सब्ते दे रोजे तुसां माणुऐ दा खतना करदे न। 23 जालू सब्ते दे रोजे माणुऐ दा खतना करदे न ताकि मूसा दिया व्यवस्था दा हुकम न टली जा, तां तुसां मिंजो पर कजो इस ताई गुस्सा करदे न, की मैं सब्ते दे रोजे इकी माणुऐ जो पुरी तरा ठीक किता। 24 तुसां बाहरी रूप दिखीकरी न्याय मत करा, पर सच्चाईया ने न्याय करा।” 25 तालू कितणे यरूशलेम शहर दे रेणेबाले बोलणा लग्गे, “क्या ऐ सै ही नी है, जिसयो साडे अगुवे मारणे दी कोशिश करा दे न? 26 पर दिखा, सै तां शेराम गल्लां करदा है कने कोई उसयो कोई कुछ नी बोलदा है; क्या होई सकदा की यहूदी अगुवां सच्ची जाणी लिया है की, ऐई मसीह है? 27 इसयो तां असां जाणदे न, की ऐ कुथु दा है; पर मसीह जालू ओणा है, तां कुसयो नी पता होणा है सै कुथु दा है।” 28 तालू यीशुऐ मंदरे च उपदेश दिन्दे होऐ जेरे ने बोलया, “तुसां मिंजो जाणदे न, कने ऐ भी जाणदे न की मैं कुथु दा है: मैं तां अपु ला नी आया है पर मिंजो भेजणे बाला भरोसेमंद है, उसयो तुसां नी जाणदे न। 29 पर मैं उसयो जाणदा है; क्योंकि मैं उदिया तरफा ला है कने मिंजो उनी ही भेजया है।” 30 इसा गल्ला पर अगुवां उसयो पकड़ना चाया पर तमी कुनी भी उसयो गिरफ्तार नी किता, क्योंकि उदा मरणे दा सही बकत हले दीकर नी आया था। 31 कने भिड़ा चे मतयां यीशुऐ पर भरोसा किता, कने बोलणा लग्गे, की जालू मसीहे ओणा है, तां उनी क्या इदे भी जादा अनोखे कम्म दसणे जड़े इनी दसे न? 32 फरीसियां लोंका जो उदे बारे च ऐ गल्लां बल्ले-बल्ले करदे सुणाया; कने बड़े याजकां कने फरीसियां उसयो पकड़ने ताई मंदरे दे रखबाले भेजे। 33 इस पर यीशुऐ बोलया, “मैं थोड़िया देरा दीकर तुहाड़े सोगी है; फिरी मैं अपने भेजणे बाले दे बाल बापस चली जाणा है। 34 तुसां

मिंजो तोपणा है, पर मैं मिलणा नी है; कने जिथू मैं है, ओथु तुसां आई नी सकदे।”

35 यहदी अगुवां अपु चे बोलया, इनी कुथु जाणा की सांझो इनी मिलणा ही नी है। क्या सै उना बाल जांगा जड़े यूनान शेहरे च लग-लग जगा च रेदे न, कने यूनान दे लोकां जो भी उपदेश दिंगा? 36 सै क्या बोलणा चांदा है, जड़ी उनी बोली, की तुसां मिंजो तोपणा है, पर मैं नी मिलणा है: कने जिथू मैं है, ओथु तुसां नी आई सकदे? 37 फिरी त्योहारे दे आखरी रोजे, जड़ा खास दिन है, यीशु खडोता कने जोरे ने बोलया, “अगर कोई त्रिणा है तां मेरे बाल ओऐ कने पांणी पिए? 38 जड़ा मिंजो पर भरोसा करगा, जियां पबित्र शास्त्रां च लिख्या है, उदे मने चे पाणिए दियां खड्डां जड़ियां जिन्दगी दिन्दियां सै चली पोणियां न।” 39 जालू यीशुऐ ऐ गल्ल बोलि, तां सै पबित्र आत्मा दे बारे च बोला दा था, सै उना सारयां जो मिलदा है जड़े उस पर भरोसा करदे थे, क्योंकि पबित्र आत्मा हल्ले दीकर नी उतरया था। क्योंकि परमेश्वरे हले दीकर यीशु दी महिमा जो प्रगट नी कितया था। 40 तालू भिड़ा चे केई लोकां ऐ सुणीकरी बोलया, “सच्ची ऐई है सै परमेश्वरे दा संदेश देणेबाला है, जिसदी असां उम्मीद रखियो है।” 41 लोकां बोलया, ऐ मसीह है, पर कुनी बोलया, “कजो? क्या मसीह गलील प्रदेश ला ओणा है? 42 पर पबित्र शास्त्रां च लिख्या है, की मसीहे दाऊदे दे बंशे ला कने बैतलहम शेहरे ला ओणा है, जिथू दाऊद रेंदा था?” 43 इयां यीशुऐ दिया बजा ने लोकां च फूट पेई गेई। 44 उना चे कितणे ही उसयो पकडाणा चांदे थे, पर कोई भी उसयो गिरफ्तार नी करी सकया। 45 तालू सपाई बड्डे याजकां कने फरीसियां बाल बापस आए, कने उना सिपाईयां ला पुछया, “तुसां उसयो कनी लंदा?” 46 सिपाईयां जबाब दिता, की कुनी माणुऐ कदी भी ऐदिया गल्लां नी बोलियां। 47 फरीसियां उना जो जबाब दिता, “क्या तुसां भी भटकी गियो न? 48 क्या सरदारां या फरीसियां चे कुनी भी उस पर भरोसा किता है? 49 पर ऐ लोक जड़े मूसा दी व्यवस्था जो नी जाणदे, उना जो परमेश्वरे श्राप दितया है।” 50 नीकुदेमुसे, (जड़ा राती यीशुऐ बाल आया था कने उना चे इक था), उना ने बोलया, 51 “क्या साडी व्यवस्था कुसी माणुऐ जो जालू दीकर पेहले उदे बारे च सुणीकरी समझी ना ले की सै क्या करदा है, उसयो सजा दिन्दी है?” 52 उना उसयो जबाब दिता, “क्या तुमी गलील प्रदेशे दा है? पबित्र शास्त्र च तोप कने तां तिजो पता चलणा, की गलील दे इलाके ला कोई परमेश्वरे दा संदेश देणेबाले प्रगट नी होणा है।” 53 तालू सारे अपने-अपने घरे जो चली गे।

8 पर यीशु अपने चेलयां सोगी जैतून सूखां दे पाहड़े पर गया। **2** यीशु अगली ब्यागा तड़के मंदरे दे अंगणे च बापस आया, कने मते सारे लोक उदे बाल आये; कने सै बेठी करी उना जो उपदेश देणा लग्गा। **3** जालू सै बोला दा ही था, तां धार्मिक व्यवस्था जो सिखाणे बाले कने फरीसी इक जनानिया जो लेई आये जड़ी व्यभिचार च पकड़ियो थी, कने उसा जो सामणे खरेड़ी करी यीशुए बोलया, **4** “गुरू जी, ऐ जनानी व्यभिचार करदे पकड़ियो है। **5** व्यवस्था च मूसा सांझो हुकम दितया है की ऐसे माणुए जो पथर मारी करी मारी दिया: तां तू क्या बोलदा है की सांझो क्या करणा चाईदा?” **6** उना यीशुए जो परखणे तांई ऐ गल्ल बोली थी ताकि उना जो यीशुए पर दोष लाणे तांई कोई गल्ल मिल्ले, पर यीशु झुकी करी उंगलियां ने जमिना पर लिखणा लग्गा। **7** जालू सै उसला पूछदे रे, तां उनी सिधे होईकरी उना ने बोलया, “तुसां चे जिनी भी कदी पाप नी कितया है, सै ही पेहले इसा जो पथर मारे।” **8** कने फिरी झुकी करी उंगलियां ने जमिना पर लिखणा लग्गा। **9** पर ऐ सुणीकरी बडयां ला लेईकरी छोटयां दीकर सारे इक-इक करी के निकली गे क्योंकि सै जाणदे थे की सै पापी न, कने सिर्फ यीशु कने सै जनानी ओथु रेई गई। **10** यीशुए सिधे होईकरी उसा ने बोलया, “हे जनानी, सै कुथु गे? क्या कुनी तिजो सजा देंगे दा हुकम नी दिता?” **11** उना बोलया, “प्रभु जी, कुनी भी नी।” यीशुए बोलया, “मैं भी तिजो सजा देणे दा हुकम नी दिन्दा; हुण बापस घरे चली जा, कने हुण दोवारा कदी जिंदगी च पाप मत करदी।” **12** तां यीशुए लोंका ने फिरी बोलया, “संसार दी लौ मैं है; जडा मेरियां गल्लां पर चलगा, उनी नेहरे च नी चलणा है, कने उसयो सै लौ मिलणी जड़ी हमेशा दी जिन्दगी दिन्दी है।” **13** फरीसियां उसला बोलया; “तू अपणी गबाई अपु ही दिन्दा है, तेरी गबाई सच्ची नी है।” **14** यीशुए उना जो जबाब दिता, “अगर मैं अपणी गबाई अपु दिन्दा है, तमी मेरी गबाई ठीक है, क्योंकि मैं जाणदा है, की मैं कुथु ला आया है कने कुथयो जांणा है? पर तुसां नी जाणदे की मैं कुथु ला ओंदा है या कुथयो जांणा है। **15** तुसां लोक इन्सानी सोच ने बाकी लोकां दा न्याय करदे न; मैं कुसदा भी न्याय नी करदा है। **16** कने अगर मैं न्याय करे भी तां मेरा न्याय सच्चा है; क्योंकि मैं किल्ला नी है, पर मैं पिता परमेश्वरे सोगी है, जिनी मिंजो भेजया है। **17** कने मूसा दिया व्यवस्था च लिखया भी है; दो जणया दी गबाई मिली करी ठीक होंदी है। **18** इक तां मैं अपु अपणी गबाई दिन्दा है, कने दूजा मेरा पिता परमेश्वर मेरी गबाई दिन्दा है

जिनी मिंजो भेजया है।” 19 उना यीशुए ला पुछया, तेरा पिता कुथु है? यीशुए जबाब दिता, “ना तुसां मिंजो जाणदे न, ना तुसां मेरे पिता परमेश्वर जो, अगर मिंजो जाणदे होदें तां मेरे पिता परमेश्वर जो भी जाणदे।” 20 ऐ गल्लां उनी मंदरे दे अंगणे च उपदेश दिन्दे भंडार घरे च बोलियां, कने कुनी भी उसयो नी पकड़या; क्योंकि उदे मरणे दा बकत हले दीकर नी आया था। 21 यीशुए फिरी उना ने बोलया, “मैं चली जाणा है, कने तुसां मिंजो तोपणा है कने तुसां अपने पाप माफ होयो बिना ही मरी जाणा। जिथू मैं जांदा है, ओथु तुसां नी आई सकदे न।” 22 इस पर यहूदी अगुवां बोलया, क्या इनी अपने आपे जो मारी लेणा है, की ऐ बोला दा है, “जिथू मैं जांदा है ओथु तुसां नी आई सकदे न?” 23 यीशुए उना ने बोलया, “तुसां इस संसारे च पैदा होयो न, पर मैं स्वर्गे ला आया है, तुसां इस संसारे द न, मैं संसारे दा नी है। 24 इस तांई मैं तुसां ने बोलया, कि तुसां अपने पापां माफ होयो बिना ही मरी जाणा है, अगर तुसां भरोसा नी करदे की मैं सै ही है जड़ा ओणे बाला है, तां तुसां मरी जाणा, कने तुहाडे पाप माफ नी किते जाणे न।” 25 यहूदी अगुवां उसला पुछया, “तू कुण है?” यीशुए उना ने बोलया, जालू ला मैं उपदेश देणा शुरू कितया है तालू ला मैं दसदा आया है की मैं सेई है। 26 मिंजो तुहाडे न्याय दे बारे च तुसां जो मता कुछ बोलणा है, पर मिंजो भेजणे बाला सच्चा है। कने जड़ा मैं उसला सुणदा है, सै ही संसारे दे लोकां जो बोलदा है। 27 सै हले दीकर ऐ नी समझी सके थे की सांझो ने पिता परमेश्वर दे बारे च बोला दा है। 28 तालू यीशुए बोलया, “जालू तुसां मिंजो, माणुए दे पुत्रे जो उपर चढ़ांगे, जालू ला मैं उपदेश देणा शुरू कितया है तालू ला मैं दसदा आया है की मैं सेई है, कने अपने आपे ला कुछ नी करदा है, पर जियां मेरे पिता परमेश्वरे मिंजो सिखया है, तियां ही ऐ गल्लां बोलदा है। 29 कने मिंजो भेजणे बाला मेरे सोगी है, उनी मिंजो किल्ला नी छडया; क्योंकि मैं हमेशा ला ही कम्म करदा है, जिस ने सै खुश होदा है।” 30 मतयां लोकां जिना यीशु जो ऐ गल्लां बोलदे सुणया, उस पर भरोसा किता। 31 तालू यीशुए उना यहूदी लोकां ने जिना उस पर भरोसा कितया था, बोलया, “अगर तुसां मेरी गल्लां च बणी रेंगे, तां सच्ची मेरे चले न। 32 तुसां सच्च जो जाणना, कने सच्च ने तुहांजो अजाद करणा।” 33 उना उसयो जबाब दिता, “असां तां अब्राहम दे बंशज न, कने कदी कुसदे गुलाम नी रे; फिरी तू कजो बोला दा, की तुसां अजाद होई जाणा?” 34 यीशुए उना जो जबाब दिता, “मैं तुसां ने सच्च-सच्च बोलदा है

की जड़ा कोई पाप करा दा है सै पापे दा गुलाम है। 35 कने सेवक हमेशा घरे च नी रेंदा है; पर पुत्र हमेशा घरे च रेंदा है। (aiōn g165) 36 इस ताई अगर पुत्र तुहांजो अजाद करगा तां, तुसां सच्ची दे अजाद होणा है। 37 मैं जाणदा है की तुसां अब्राहम दे बंशज दे न; तमी मेरे उपदेशां दा पालन नी करणा, ताई तां तुसां मिंजो मारी देणा चांदे न। 38 मैं उना चिंजा जो दस्सा दा है जिना जो मैं दिखया है जालू मैं पिता परमेश्वरे सोगी था, कने तुसां सै ही करदे रेंदे न जड़ा तुसां अपने पिता ला सुणाया है।” 39 उना उसयो जबाब दिता, “साड़ा पूर्वज तां अब्राहम है।” यीशुऐ उना ने बोलया, अगर तुसां अब्राहम दे बंशज होंदे, तां जड़ा अब्राहम करदा था सै कम्म तुसां भी करदे। 40 अब्राहमे जड़ा किता, सै करणे दिया बजाऐ तुसां मिंजो मारणे दी कोशिश करा दे न, जिनी तुहांजो सच्चा बचन सुणाया जड़ा परमेश्वरे ला सुणाया ऐसा तां अब्राहमे नी कितया था। 41 तुसां अपने पिता साईं कम्म करदे न, उना उसयो बोलया, “असां व्यभिचारे ने नी जमयो न, साड़ा सिर्फ इक ही पिता है सै ही परमेश्वर है।” 42 यीशुऐ उना ने बोलया, “अगर परमेश्वर तुहाड़ा पिता होंदा, तां तुसां मिंजो ने प्यार रखदे; क्योंकि मैं परमेश्वरे दिया तरफा ला आया है; मैं अपणिया इच्छा ने नी आया है, उनी ही मिंजो भेजया है। 43 जड़ा मैं कुछ बोलदा है सै तुसां कजो नी समझदे न? इस ताई तुसां मेरे संदेश जो मनणे ताई मना करदे न। 44 तुसां अपने पिता शैताने ला न, कने अपने पिता दियां जस्रतां जो पूरा करणा चांदे न। सै तां शुरू ला ही हत्यारा है, कने सै कदी भी सच्चा नी था, क्योंकि सच्च उदे अंदर है ही नी: जालू सै जूठ बोलदा है, तां सै अपने सभावे ने जूठ बोलदा है; क्योंकि सै जूठा है, बल्कि जूठ दा पिता है। 45 पर मैं सच्च बोलदा है, इस ताई तुसां मेरा भरोसा नी करदे? 46 तुसां चे कुण मिंजो पापी साबित करी सकदा है? अगर मैं सच्चा है, तां तुसां मिंजो पर भरोसा कनी करदे? 47 जड़ा कोई भी परमेश्वरे ने रिश्ता रखदा है, सै परमेश्वरे दियां गल्लां सुणदा है; कने तुसां इस ताई नी सुणदे क्योंकि तुहाड़ा परमेश्वरे सोगी कोई रिश्ता नी है।” 48 ऐ सुणीकरी यहूदी अगुवां उसयो बोलया, “क्या असां ठीक नी बोलदे न, की तू सामरी है, कने तेरे अंदर बुरी आत्मा है?” 49 यीशुऐ जबाब दिता, “मिंजो च बुरी आत्मा नी है; पर मैं अपने पिता परमेश्वर दा आदर करदा है, कने तुसां मेरा निरादर करदे न। 50 मैं अपना आदर मान नी चांदा है, पर इक है जड़ा चांदा है मिंजो आदर मान मिल्ले, कने सै सेई है जड़ा न्याय भी करदा है। 51 मैं तुसां ने सच्च-

सच्च बोलदा है, अगर कोई माणु मेरियां शिक्षा पर चलगा, तां उनी कदी नी मरणा है।” (aiōn g165) 52 यहदी अगुवां उसयो बोलया, “हुण सांझो पता लगी गया की तिजो अंदर बुरी आत्मा है: अब्राहम मरी गया है, कने परमेश्वरे दा संदेश देणेबाले भी मरी गियो न कने तू बोलदा है, अगर कोई मेरे संदेश जो मनगा तां उनी अनन्तकाल दीकर मरणा नी है।” (aiōn g165) 53 साड़ा पूर्वज अब्राहम तां मरी गया है, क्या तू उसला भी बडा है? कने परमेश्वरे दा संदेश देणेबाले भी मरी गियो न, तू अपने आपे जो क्या समझदा है। 54 यीशुए जबाब दिता, “अगर मैं अपु अपनी तारीफ करूं, तां मेरी तारीफ कुछ नी, पर जडा मिंजो आदर मान दिन्दा है, सै मेरा पिता परमेश्वर है, कने जिसयो तुसां बोलदे न, की सै तुहाडा परमेश्वर है। 55 कने तुसां तां उसयो नी जाणया, पर मैं उसयो जाणदा है, कने अगर मैं बोले की मैं उसयो नी जाणदा है, तां मैं तुहाडे सांई जूठा बणना: पर मैं उसयो जाणदा कने उदे हुकम मनदा है। 56 तुहाडा पूर्वज अब्राहम मेरा दिन दिखणे दिया आसा च बडा मगन था; कने उनी दिखया कने खुश होया।” 57 यहदी अगुवां उसयो बोलया, “हले दीकर तू पंजा सालां दा भी नी है, फिरी भी तू अब्राहम जो दिखया है?” 58 यीशुए उना ने बोलया, मैं तुसां ने सच्च-सच्च बोलदा है, अब्राहम पैदा होणे ला पेहले, मैं है। 59 तालू लोकां यीशुए जो मारणे तांई पथर चुके, पर यीशु लुकी करी मंदरे ला निकली गया।

9 फिरी यीशुए जांदे बेले इक माणुए जो दिखया, जडा जमदा ही अन्ना था। 2 कने उदे चेलयां उसला पुछया, “गुरू जी, कुनी पाप कितया था की ऐ अन्ना जमया, इनी माणुए, या उदे माता पिता?” 3 यीशुए जबाब दिता, ना तां इनी पाप कितया था, ना तां इदे माता पिता: पर ऐ इस तांई अन्ना जमया, की परमेश्वरे दी शक्ति इदे च प्रगट होऐ। 4 जिनी मिंजो भेजया है; सांझो झट ही उदे दितयो कम्मा जो पूरा करणा है: सै रात ओणे बाली है जिदे च कोई कम्म नी करी सकदा है। 5 जालू दीकर मैं संसारे च है, तालू दीकर संसारे दी लौ मैं है। 6 ऐ बोली करी उनी जमिना पर थूक्या कने उसी थूके ने मिटी सेड़ी कने सेई मिटी उस अन्ने दिया हखी पर लगाई करी। 7 उसयो बोलया, “जा, कने अपना मु शील्लोह दे कुण्डे च धोई ले” (शील्लोह दे कुण्डे दा मतलब है भेजया है) तां उनी जाई करी धोता, कने जालू सै घरे जो बापस ओणा लग्गा तां उसयो मिलणा लगी पिया। 8 तालू उदे पड़ोसी कने होर लोक जिना उसयो पेहले भीख मंगदे दिखया था, इक दुज्जे ने बोलणा

लगे, “क्या ऐ से ही नी है, जड़ा बेईकरी भीख मंगदा था?” 9 केईयां लोका बोलया, ऐ सेई है, होरनी बोलया, नी, पर उदे सांई है उनी बोलया, “मैं सेई है जड़ा बेईकरी भीख मंगदा था।” 10 तां सै उसला पूछणा लगे, “तेरियां हखी दी लौ कियां बापस आई?” 11 उनी जबाब दिता, “यीशु नाऐ दे इकी माणुऐ मिट्टी सेड़ी, कने मेरियां हखी पर लगाई करी मिंजो बोलया, शील्लोह दे कुण्ड च जाई करी मु धोई ले, मैं गया कने धोई करी मिंजो मिलणा लगी पिया।” 12 उना उसयो पुछया, सै माणु कुथु है? उनी बोलया, “मैं नी जानदा।” 13 लोक उस मांणुऐ जो जड़ा पेहले अन्ना था उसयो फरीसियाँ बाल लेई गे। 14 जिस दिने यीशुऐ मिट्टी सेड़ी करी उदियां हखी ठीक कितियां थियां सै सब्ते दा रोज था। 15 फिरी फरीसियां भी उसयो पुछया; तेरी हखी कियां ठीक होईयां? उनी उना जो बोलया, “उनी मेरी हखी पर मिट्टी लाई, फिरी मैं धोई लेई, कने हुण मिंजो मिलणा लगी पिया।” 16 इस पर केई फरीसी बोलणा लगे, “ऐ माणु परमेव्वरे दिया तरफा ला नी है, क्योंकि सै सब्ते दे रोजे जो नी मंनदा है।” होरनी बोलया, इस सांई पापी माणु इस तरीके ने चमत्कार कियां दस्सी सकदा है? इसा गल्ला जो लेईकरी उना च फुट पेई गेई। 17 उना उस अन्ने ने फिरी बोलया, उनी तेरियां हखी ठीक कितियां न, तू उदे बारे च क्या बोलदा है? उनी बोलया, “सै परमेव्वरे दा संदेश देणेबाला है।” 18 पर यहदी अगुवां जो भरोसा नी होया की ऐ अन्ना था कने हुण दिखणा लग्गी गया है जालू दीकर उदे माता पिता जो सदया जिदियां हखी ठीक होईयां थियां। 19 कने उना ला पुछया, “क्या ऐ तुहाडा पुत्र है, इसयो तुसां बोलदे थे की अन्ना जमया था? फिरी इसयो कियां मिलणा लगी पिया है?” 20 उदे माता पिता जबाब दिता, “असां तां जाणदे न की ऐ साडा पुत्र है, कने अन्ना जमया था। 21 पर असां ऐ नी जाणदे की हुण कियां करी इसयो मिलणा लगी पीया है; कने ना ऐ जाणदे की कुनी इसदियां हखी ठीक कितियां; सै अपने जबाब देणे तांई काफी बडा है; उसी ला पूछी लिया; उसी ला पुच्छी लिया उनी अपने बारे च अपु बोली देणा है।” 22 ऐ गल्लां उदे माता पिता तां बोलियां क्योंकि सै यहदी अगुवां ला डरदे थे; क्योंकि यहदी अगुवे एका करी के बैठयो थे, की अगर कोई भरोसा करे की सै मसीह है, तां सै यहदी जंज घर ला कडी देणा। 23 इसा बजा ने उदे माता पिता बोलया की सै सबालां दा जबाब देणे तांई बतेरा बडा है, उसला ही पूछी लिया। 24 तालू यहदी अगुवां उस माणुऐ जो फिरी सदया जड़ा अन्ना था उसयो बोलया, “परमेव्वरे दे

सामने बायदा कर की तू सच्च बोलगा; असां तां जाणदे न की सै माणु पापी है।”

25 उनी जबाब दिता, “मैं नी जाणदा सै पापी है या नी: मैं तां बस इक गल्ल जाणदा है की मैं अन्ना था कने हुण दिखदा है।” 26 उना उसला फिरी पृछया, “उनी तरे ने क्या किता? उनी तिजो कियां ठीक किता?” 27 उनी उना ने बोलया, “मैं तां तुसां ने बोली बैठया है, कने तुसां नी सुणाया; हुण दुई बरी कजो सुणना चांदा न? क्या तुसां भी उदे चेले बणना चांदे न?” 28 तालू उना उसयो बुरा भला बोलया कने बोलया, तू ही उदा चेला है; असां तां परमेश्वर दे संदेश देणेबाले मूसा दे चेले न। 29 असां जाणदे न की परमेश्वरे मूसा ने गल्लां कितियां न; पर इस माणुए जो नी जाणदे न की कुथु ला आया है। 30 उनी उना जो जबाब दिता, ऐ तां हेरानिया दी गल्ल है की तुसां नी जाणदे कुथु दा है पर तमी उनी मेरियां हखी ठीक करी दितियां। 31 असां जाणदे न की परमेश्वर पापियां दी नी सुणदा है पर अगर कोई परमेश्वरे दा भक्त हो, कने उदिया इच्छा पर चलदा है, तां सै उदी सुणदा है। 32 जालू ला इस संसारे जो बणाया है तालू ला ऐ कदी नी सुणाया, की कुनी भी जनमे दे अन्ने दियां हखी ठीक कितियो होन। (aiōn g165) 33 अगर ऐ माणु परमेश्वरे दिया तरफा ला नी होंदा, तां उनी कुछ भी नी करी सकणा था। 34 उना उसयो जबाब दिता, तू तां बिलकुल पापां च जमया है, तू क्या सांझो सिखा दा है? तालू उना उसयो यहूदी जंज घर ला बाहर कडी दिता। 35 यीशुए सुणया, की उना उसयो यहूदी जंज घरे ला बाहर कडी दितया है; कने जालू उसला मिलया तां बोलया, “क्या तू परमेश्वरे दे पुत्रे पर भरोसा करदा है?” 36 उनी जबाब दिता, “श्रीमान जी, मिंजो दस की ऐ परमेश्वरे दा पुत्र कुण है, ताकि मैं उस पर भरोसा करी सके?” 37 यीशुए उसला बोलया, मैं, “तू मिंजो पेहले भी दिखया है कने मैं ही सै परमेश्वरे दा पुत्र है, जडा हुण तिजो ने गल्लां करा दा है।” 38 उनी बोलया, “प्रभु जी, मैं तिजो पर भरोसा करदा है।” कने उसयो दण्डवत किता। 39 तालू यीशुए बोलया, “मैं इस संसारे च इस न्याय जो करणे ताई आया है: ताकि अन्ने लोकां जो मिलणा लग्गी पोणा कने जिना लोकां जो मिलदा है सै अन्ने होई जाणे।” 40 जडे फरीसी उदे सोगी थे, उना ऐ गल्लां सुणीकरी उसला बोलया, “क्या तू बोला दा है की असां भी अन्ने न?” 41 यीशुए उना ने बोलया, अगर तुसां अन्ने होंदे तां पापी नी होणा था पर हुण बोलदे न, की सांझो मिलदा है, इस ताई तुहाडे पाप माफ नी किते जाणे न।

10 'मैं तुसां ने सच्च-सच्च बोलदा है, की अगर कोई भेड़ा दिया गुराला दे दरबाजे ला नी अंदर ओए, पर होर कुसी पासे ला चढी करी अंदर ओए, सै चोर कने डाकू है। 2 पर जडा दरबाजे चे जांदा है सै भेड़ा दा पुआल है। 3 उदे ताई द्वारपाल दरबाजा खोली दिन्दा है, कने भेड़ा उदी अबाज पछेणदियां न, कने सै अपणियां भेड़ा जो ना लेई-लेईकरी सददा है कने बाहर लेई जांदा है। 4 कने जालू सै अपणिया सारियां भेड़ा जो बार कडी बोंदा है, तां उना दे अग्गे-अग्गे चलदा है, कने भेड़ा उदे पिच्छे-पिच्छे चली पोंदिया न; क्योंकि सै उदी अबाज पछेणदियां न। 5 पर सै होरसी दे पिच्छे नी जांदियां, पर उना ला नठदियां न, क्योंकि सै होरसी दी अबाज नी पछेणदियां न।' 6 यीशुए उना ने ऐ कहाणी बोली, पर सै नी समझे की ऐ बोलणे दा क्या मतलब है। 7 तालू यीशुए उना ने फिरी बोलया, मैं तुसां ने सच्च-सच्च बोलदा है, की भेड़ा दा मैं ही दरबाजा है जिदे चे भेड़ा अंदर ओदियां न। 8 जितणे मिंजो ला पेहले आये; सै सारे चोर कने डाकू न, पर मेरियां भेड़ा उना दी नी सुणी। 9 मैं ही दरबाजा है; अगर कोई मिंजो चे अंदर जा तां परमेश्वरे उदा उद्धार करणा कने उनी अंदर बाहर ओदे जांदे रेणा कने उसयो खाणे पिणे जो मिलदी रेंणी। 10 चोर सिर्फ भेड़ा जो चोरणे कने मारणे कने खत्म करणे ताई ओदा है। पर मैं इस ताई आया की उना जो सच्चाई च जिन्दगी कने भरपूरी दी जिन्दगी मिल्ले। 11 खरा पुआल मैं है; खरा पुआल भेड़ा ताई अपणी जान देई दिन्दा है। 12 भाडे पर रखयो होया मजदूर जालू सै भेड़िये जो ओदे दिखणा तां उनी नठी जाणा। उनी भेड़ा जो छडी देणा क्योंकि सै उना दा पुहाल नी है कने भेड़ा उदियां नी न। इस ताई भेड़िया उना पर हमला करदा है कने झुण्ड जो बखेरी दिन्दा है। 13 सै इस ताई नठी जांदा है की सै भाड़े दा मजदूर है, कने उसयो भेड़ा दी चिंता नी है। 14 खरा पुआल मैं है, मैं अपणियां भेड़ा जो जाणदा है कने मेरियां अपणियां भेड़ा मिंजो जाणदियां न, 15 जियां पिता परमेश्वर मिंजो जाणदा है, कने मैं पिता परमेश्वरे जो जाणदा है। कने मैं भेड़ा ताई मरणे ताई तैयार है। 16 कने मेरियां होर भी भेड़ा न, जडियां इसा गुराला दियां नी न, मिंजो उना जो लोणा भी जरूरी है, उना मेरी अबाज पछेणनी है; तां फिरी इक झुण्ड कने इक ही पुआल होणा है। 17 मैं अपणिया मरजिया ने जान दिन्दा है, इस ताई पिता परमेश्वर मिंजो ने प्यार करदा है, ताकि मैं दोबारा जिन्दा होई जा। 18 कोई मेरिया जिन्दगिया जो मिंजो ला नी लेई सकदा है, इसयो मैं अपणिया इच्छा ने दिन्दा है। मिंजो अपणी

जिंदगी देणे दा भी हक है, कने उना जो फिरी बापस लेणे दा भी हक है: क्योंकि ऐ सेई हुकम है जडा मिंजो मेरे पिता परमेश्वरे ला मिलया है। 19 इना गल्लां दिया बजा ने यहदी लोकां च फिरी फुट पेई गेई। 20 उना चे मते बोलणा लग्गे, इदे च बुरी आत्मा है, कने सै पागल है; इसदी मत सुणा? 21 होरनी बोलया, ऐ गल्लां ऐसे माणुऐ दियां नी न जिदे च बुरी आत्मा हो: इक बुरी आत्मा कदी भी नी इक अन्ने माणुऐ दी हखी ठीक करी सकदी है? 22 यस्सलेम शेहर च यहदी मंदरे दी स्थापना दा त्योहार था, कने सर्दियां दी रित थी। 23 यीशु मंदरे दे अंगणे च घुमा दा था, जिसयो लोक सुलैमान राजे दा ओसारा बोलदे न। 24 तालू यहदी अगुवां उसयो घरोटी लिया कने पुछया, “तू सांझो बडे लम्बे बकते दीकर दुबिधा च रखया है। हुण सांझो साफ-साफ दस। क्या तू मसीह है।” 25 यीशुऐ उना जो जबाब दिता, “मैं तुसां ने बोली दितया है, कने तुसां मेरा भरोसा करदे ही नी न, जडे कम्म मैं अपने पिता परमेश्वरे दे हके ने करदा है सै ही मेरे गबाह न। 26 पर तुसां इस तांई मेरा भरोसा नी करदे न क्योंकि तुसां मेरियां भेडां चे नी न। 27 मेरियां भेडां मेरी अबाज पछेणदियां न, कने मैं उना जो जाणदा है, कने सै मेरे पिच्छे-पिच्छे चलदियां न। 28 मैं उना जो हमेशा दी जिन्दगी दिन्दा है, कने उना दा कदी नाश नी होणा, कने कोई उना जो मेरे हथां ला नी खोई सकदा है। (aiōn g165, aiōnios g166) 29 मेरा पिता परमेश्वर, जिनी उना जो मिंजो दितया है, सबना ला बडा है, कने कोई उना जो पिता परमेश्वरे दे हथे ला खोई नी सकदा। 30 मैं कने पिता परमेश्वर इक ही न।” 31 यहदी अगुवां उसयो मारणे तांई फिरी पथर चुके। 32 इस पर यीशुऐ उना ने बोलया, “मैं पिता परमेश्वरे दिया तरफा ला तुहांजो मते भले कम्म दसयो न, उना चे कुस कम्मे तांई तुसां मिंजो पथर मारा दे न?” 33 यहदी अगुवां यीशुऐ जबाब दिता, “भले कम्म तांई असां तिजो पथर नी मारा दे न, पर परमेश्वरे दी निंदा करणे दिया बजा ने कने इस तांई की तू माणु होईकरी अपने आपे जो परमेश्वरे बोलदा है।” 34 यीशुऐ उना जो जबाब दिता, क्या पबित्र शास्त्र च ऐसा नी लिखया है की परमेश्वरे अपने लोकां दे अगुवां ने बोलया की, तुसां ईश्वर न? 35 तुसां जाणदे न की पबित्र शास्त्र च कुछ भी बदलया नी जाई सकदा। इस तांई अगर उदे लोकां दे अगुवां जो “ईश्वर” बोलया गया हो। 36 तां जालू मैं बोलदा है, मैं परमेश्वरे दा पुत्र है तां तुसां मिंजो कजो बोलदे न, “तू निंदा करा दा है।” मैं सै ही है जिसयो पिता परमेश्वरे लग कितया कने मिंजो संसार च भेजया है।

37 अगर मैं अपने पिता दा कम्म नी करदा तां, तुसां मेरा भरोसा मत करा। 38 पर अगर मैं करदा है, तां चाऐ मेरा भरोसा ना भी करा, पर उना कम्मा दा तां भरोसा करा, तालू तुसां जो पता चलणा कने समझणा की पिता परमेश्वर मिंजो च रेदा है, कने मैं पिता परमेश्वर च रेदा है। 39 तालू उना फिरी यीशुऐ जो पकड़ने दी कोशिश किती पर सै उना दे हथे ला बची करी निकली गया। 40 फिरी यीशु यरदने खड़ा दे पार उसा जगा पर चली गया, जिथू यूहन्ना पेहले बपतिस्मा दिन्दा था, कने ओथु रिया। 41 कने मते लोक उदे बाल आई करी उसला बोलदे थे, “यूहन्ना तां कोई चमत्कार नी दसया, पर जड़ा कुछ यूहन्ना इदे बारे च बोला दा सै सारा सच्च था।” 42 कने ओथु मतयां उदे पर भरोसा किता।

11 बैतनिय्याह गां च इक लाजर नाऐ दा माणु बीमार था। मरियम कने मार्था उदियां बेहणा थियां। 2 ऐ सै ही मरियम थी जिना बादे च प्रभुऐ दे पैरा उपर इन्न नियोरी करी उदे पैरां जो अपने बाला ने पुंजया था, उसा दा ही भाई लाजर बीमार था। 3 उसा दिया बेहणा यीशुऐ जो बोली भेजया, “प्रभु जी, दिख, जिसयो तू प्यार करदा है, सै बीमार है।” 4 ऐ सुणीकरी यीशुऐ बोलया, “ऐ बिमारी मौत ने नी मुकणी, पर परमेश्वरे दिया महिमा तांई है, ताकि उसला मिंजो, परमेश्वरे दे पुत्रे दी महिमा हो।” 5 कने यीशु मार्था कने उदी बेहण कने लाजरे ने प्यार करदा था। 6 पर उनी सुणाया, की सै बीमार है, जिसा जगा सै था, ओथु दो रोज होर स्की गया। 7 फिरी दो दिन बाद उनी चेलयां ने बोलया, “ओआ, असां फिरी यहूदिया प्रदेश दे इलाके दे बैतनिय्याह शेहरे जो चलदे न।” 8 चेलयां उसयो बोलया, “गुरू जी, हुंणी तां यहूदी अगुवे तिजो पथर मारणा चांदे थे, क्या फिरी भी तू ओथु चलया है?” 9 यीशुऐ जबाब दिता, “क्या दिने दे बाहरा घंटे नी होंदे न? अगर कोई दिने चले, तां उसयो ठोकर नी लगदी, क्योंकि सै इस संसारे दी लौई ने मतलब की सूरजे दी लौई ने दिखदे न। 10 पर अगर कोई राती जो चले, तां उसयो ठोकर लगणी, क्योंकि तालू उदे च लौ नी है।” 11 इदे बाद यीशुऐ उना ने बोलया, “साड़ा मित्र लाजर सोई गया है, पर मैं उसयो जगाणा चलया है।” 12 तालू चेलयां उसयो बोलया, “प्रभु जी, अगर सै सोई गया है, तां उनी ठीक ठाक होई जाणा।” 13 यीशुऐ तां उदिया मौता दे बारे च बोलया था: पर सै समझे की उनी निद्रां ने सोई जाणे दे बारे च बोलया। 14 तालू यीशुऐ उना ने साफ बोली दिता की, लाजर मरी गया है। 15 कने मैं तुहाडे फायदे तांई खुश है की मैं ओथु नी था

जिसने तुसां भरोसा करन। पर हुण ओआ, असां उदे बाल चलदे न। 16 तालू थोमा जिसयो दिदुमुस बोलदे न, अपने सोगी बाले चले ने बोलया, “ओआ, असां भी उदे सोगी मरणे ताई चलदे न।” 17 जालू यीशुए जो बैतनिय्याह गां च आई करी ऐ पता चला की उसयो चार दिन पेहले ही कबरा च दफनाई दितया है। 18 बैतनिय्याह गां यरूशलेम शहर दे नेडे लगभग कोई तिन किलो मीटर था। 19 कने मते यहदी लोक मार्था कने मरियम बाल उदे भाईऐ दे बारे च शान्ति देणे ताई आयो थे। 20 जालू मार्था यीशुए दे ओणे दी खबर सुणीकरी यीशुए ने मिलणा गई, पर मरियम घरे बेई रेई। 21 मार्था यीशुए जो बोलया, “प्रभु जी, अगर तू ऐथू होंदा, तां मेरा भाई कदी नी मरदा। 22 कने हुण भी जाणदी है, की जड़ा कुछ तू परमेश्वरे ला मंगगा, परमेश्वरे तिजो देणा।” 23 यीशुए उसा जो बोलया, “तेरा भाई फिरी जिंदा होई जाणा।” 24 मार्था उसयो बोलया, मैं जाणदी है, “न्याय दे रोजे जालू हर कोई जिन्दा होई जाणा तालू उनी भी जिन्दा होई जाणा।” 25 यीशुए उसा ने बोलया, “मैं सै है जड़ा मरयो लोकां जो जिन्दगी च बापस लोंदा है, जड़ा कोई मिजो पर भरोसा करदा है सै अगर मरी भी जा तमी, उनी जी पोंणा। 26 कने जड़ा कोई मिजो पर भरोसा करदा है सै जिन्दा है, कने उनी अनन्तकाल दीकर नी मरणा। मार्था तू क्या इसा गल्ला पर भरोसा करदी है?” (aiōn g165) 27 उनी उसयो बोलया, “हाँ, प्रभु जी, मैं भरोसा करी लिया है, की परमेश्वरे दा पुत्र मसीह जड़ा संसारे च ओणे बाला था, सै तू ही है।” 28 ऐ बोली करी सै चली गई, कने अपनी बेंहण मरियम जो होले करी सदीकरी बोलया, “गुरू ऐथू ही है, कने तिजो सदा दा है।” 29 सै सुणदे ही झट उठी करी उदे बाल आई। 30 (यीशु हले दीकर भी गांऐ ला बाहर ही था, पर उसा ही जगा च था जिथू मार्था उसला मिल्ली थी)। 31 तालू जडे यहदी लोक मरियम सोगी उसा दे घरे थे, कने उसा जो दिलासा देदे थे, कने दिखया की मरियम झट उठी करी बाहर चली गई। इस ताई सै उसा दे पिच्छे-पिच्छे गे, ऐ सै समझीकरी की सै कबरा पर रोंणे ताई जा दी है। 32 जालू मरियम ओथु पुज्जी जिथू यीशु था, तां उसयो दिखदे ही उदे पैरां च पेईकरी बोलया, “प्रभु जी, अगर तू ऐथू होंदा तां मेरा भाई नी मरदा।” 33 जालू यीशुए उसा जो कने उसा सोगी आयो यहदी लोकां जो रोंदे दिखया, तां यीशुए बड़ा ही दुखी होईकरी उना ला पुछया, 34 कने बोलया, तुसां उसयो कुथु दफनाया है? उना उसयो बोलया, “प्रभु जी, चली करी दिखी ले।” 35 यीशुए दियां हखी चे आंसू निकलना लग्गे। 36 तालू

यहूदी लोक बोलणा लग्गे, “दिखा, सै उसने कदेया प्यार रखदा था।” 37 पर उना
 चे कितणे ही बोलया की, “इनी तां उस अन्ने दियां हखी ठीक कितियां न, क्या ऐ
 लाजरे जो मरणे ला नी बचाई सकदा था?” 38 यीशु मने च बड़ा ही दुखी होया
 कने कबरा पर आया, सै इक गुफा थी, कने गुफा दे मुऐ पर इक पथर रखया होया
 था। 39 यीशुऐ बोलया, “पथरे जो हटा।” उस मरयो दी बेहण मार्था बोलणा
 लग्गी, “प्रभु जी, उदे चे तां हुण मुस्क ओआ दी है, क्योंकि उसयो मरयो चार रोज
 होई गियो न।” 40 यीशुऐ उस जो बोलया, “क्या मैं तिजो ने बोलया नी था की
 अगर तू मिंजो पर भरोसा करगी तां तू परमेश्वरे दी महिमा जो दिखगी।” 41 तालू
 उना सै पथर हटाया, फिरी यीशुऐ स्वर्ग पासे दिखीकरी के बोलया, “पिता परमेश्वर
 जी, मैं धन्याबाद करदा है की तू मेरी सुणी लेई है।” 42 पर जड़ी भीड़ अखे बखे
 खडोतियो है, उना दिया बजा ने यीशुऐ जोरे ने बोलया, “मैं जाणदा है, की तू हमेशा
 मेरी सुणदा है, जिसने की सै भरोसा करन, की तू मिंजो भेजया है।” 43 ऐ बोली
 करी उनी जोरे ने पुकारया, “हे लाजर बाहर निकली आ।” 44 जडा मरी गिया
 था, सै बाहर आया, कने उदा सारा शरीर पट्टियाँ च कने मु कपड़े च लपेटया होया
 था कने यीशुऐ उना जो बोलया, “इसयो खोली करी जाणा दिया।” 45 तालू जडे
 यहूदी लोक मरियमा दे सोगी आयो थे, उना उदा ऐ कम्म दिखया कने उना चे
 मतयां उदे पर भरोसा किता। 46 उना चे कितणयां ही फरीसियां बाल जाई करी
 यीशुऐ दे कम्मा दी खबर दिती। 47 इस पर बड़े याजकां कने फरीसियां दी महासभा
 दे लोंका जो गठेरी करी बोलया, “असां क्या करगे? ऐ माणु तां बड़े चमत्कार
 दसदा है। 48 अगर असां इसयो हुण भी नी रोकदे न, तां सारयां उस पर भरोसा
 करी लेंणा की सै ही मसीहा है, कने रोमी लोकां आई करी साडे मंदरे कने देशे पर
 कब्जा करी लेंणा।” 49 तालू उना दिया सभा चे कैफा नाऐ दा इक माणु जडा उस
 साले दा महायाजक था, उनी बोलया, “तुसां कुछ भी नी जाणदे; 50 कने ना ऐ
 समझदे न, तुहाडे तांई ऐ ठीक है, की साडे लोकां तांई इक माणु मरे, नी की सारे
 इस्राएल देशे दे लोकां दा नाश होई जा।” 51 ऐ गल्ल उनी अपणे आपे ला नी
 बोली, पर उस साले दे महायाजक दे स्पे च, उनी ऐ भविष्यवाणी किती, की यीशुऐ
 पुरे इस्राएल देशे तांई मरणा। 52 कने ना सिर्फ इना तांई ही नी। पर उनी परमेश्वरे दी
 होर ओलादी तांई भी मरणा जडे इस संसारे च बिखरयो न, ताकि उना जो गठेरी
 सके। 53 यहूदी अगुवे उस रोजे ला ही उसयो मारने दी सलाह करणा लग्गी पे।

54 इसा साजिशा दिया बजा ने यीशुए यहूदियां दे बिच सरेआम घुमणा बंद करी दिता; यीशु ओथु ला सुनसान जगा दे नेडे बाले प्रदेश दे इफ्राईम नाए दे इकी शेहरे जो चली गया, कने अपने चेलयाँ सोगी ओथु ही रेंणा लगा। 55 कने यहूदिया दे फसह दे त्योहारे दा बकत नेडे था, कने मते लोक फसह ला पेहले यरूशलेम शहर जो गे ताकि मंदरे च अपने आपे जो शुद्ध करन। 56 कने यीशुए जो तोपदे कने मंदरे च खड़ोई करी अपु चे बोलणा लग्गे, “तुसां क्या समझदे न? क्या सै त्योहारे च नी ओगा?” 57 कने बड़े याजकां कने फरीसियां ऐ हुकम दितया था, की अगर कुस्यो पता लग्गे की यीशु कुथु है तां दसनयो, ताकि उसयो गिरफ्तार करी सकन।

12 फिरी यीशु फसह दे त्योहारे ला छे रोज पेहले बैतनिय्याह गां च आया, जिथू लाजर जो मरयां चे जिन्दा किता था। 2 ओथु उना उदे ताई धाम तैयार किती, कने यीशुए जो आदर मान देणे ताई मार्था सेबा करा दी थी, कने लाजर भी उना चे इक था, जडे उदे सोगी रोटी खाणे ताई बैठयो थे। 3 तालू मरियमा जटामासी दा अधा सेर मेंहगा इत्र लेईकरी यीशुए दे पैरां पर नियोरया, कने अपने बालां ने उदे पैर पूंजे, कने इत्रे दिया खुशबुआ ने सारा घर सुगन्धित होई गया। 4 पर उदे चेलयाँ चे यहूदा इस्करियोती नाए दा इक चेला था जडा उसयो पकड़वाणा चांदा था, बोलणा लग्गा, 5 “ऐ इत्र तिनसो दीनारां च बेची करी गरीबां जो कनी देई दिता?” 6 उनी ऐ गल्ल इस ताई नी बोली की, की उसयो गरीबां दी चिंता थी, पर इस ताई की सै चोर था कने उदे बाल उना दे पैसयां दी थेली रेंदी थी, कने उसा च कोई कुछ पांदे थे, सै कडी लेंदा था। 7 यीशुए बोलया, “इसा जो तंग मत करा, इना बकत ला पहले मिंजो दफनाणे दी तैयारी ताई ऐ करा दी है। 8 गरीबां तां तुहाडे सोगी हमेशा रेंणा है, पर मैं तुहाडे सोगी हमेशा नी रेंणा।” 9 जालू लोकां सुणया की यीशु ओथु था तां तालू लोकां दी बड़ी भीड़ ओथु आई। सै सिर्फ यीशु जो ही नी पर लाजर जो भी दिखणा आयो थे जिसयो उनी मरयां चे जिन्दा कितया था। 10 तालू बड़े याजकां लाजरे जो भी मारणे दी योजना बणाई। 11 क्योकि उदिया बजा ने मते लोक उना जो नी अपनांदे थे, क्योकि उना यीशुए पर भरोसा कितया। 12 दुज्जे दिने मतयां लोका जडे त्योहारे च आयो थे, ऐ सुणीकरी, की यीशु यरूशलेम शहर च ओआ दा है। 13 इस ताई उना खजूरी दियां डालियाँ लियां, कने उसला मिलणे ताई निकले, कने चिलाणा लग्गे, “होशाना। इस्राएले दा राजा धन्य हो, जडा प्रभु दे नाए ने ओदा है।” 14 जालू यीशुए जो इक गधे दा बच्चा मिल्ला तां सै उस पर

बैठी करी यरूशलेम शहर च आया, ऐ तियां ही होया जियां की पबित्र शास्त्र च लिखया है। 15 “हे यरूशलेम शहर दे लोकों, मत डरा; दिख तेरा राजा गधे दे बच्चे च सवार होईकरी ओआ दा है।” 16 यीशुऐ दे चले, ऐ गल्लां पेहले नी समझे थे; पर जालू यीशुऐ दी महिमा प्रगट होई, तां उना जो याद आया, की जड़ा कुछ भी यीशुऐ ने होया सै ठीक तियां ही होया जियां की पबित्र शास्त्र च लिखया था; कने लोंका उदे कने ऐदिया व्यवहार कितया था। 17 तालू भिड़ा दे लोकां जड़े उस बेले यीशुऐ सोगी थे, सै दुज्जे लोकां जो दसणा लग्गे की उनी लाजरे जो कबरा ला सदीकरी, उसयो जिन्दा करी दिता। 18 मते लोक यीशुऐ ने मिलणे तांई आए, क्योंकि उना इस चमत्कार दे बारे च सुणाया था। 19 तालू फरीसियां अपु चे बोलया, “सोचा असां कुछ नी करी सकदे न, दिखा, संसार च हर कोई उदे पिच्छे होई चलया है।” 20 ओथु कुछ यूनानी लोक थे जड़े फसह दे त्योहारे बेले भक्ति करणे तांई यरूशलेम शहर च आयो थे। 21 उना गलील प्रदेश दे बैतसैदा शेहरे दे रेणेबाले फिलिप्पुस दे बाल आई करी उसला बिनती किती, “श्रीमान असां यीशुऐ ने मिलणा चांदे न।” 22 फिलिप्पुसे आई करी अन्द्रियास ने बोलया; तालू अन्द्रियास कने फिलिप्पुसे दोनो जाई करी यीशुऐ जो बोलया। 23 इस पर यीशुऐ उना जो बोलया, सै बकत आई गया है, की मेरी, माणुऐ दे पुत्रे दी महिमा हो। 24 मैं तुसां ने सच्च-सच्च बोलदा है, की जालू दीकर कणका दा दाणा जमिना च पेईकरी मरी नी जांदा है, सै किला ही रेंदा है पर जालू मरी जांदा है, तां मते फल दिन्दा है। 25 जड़ा अपने प्राणा ने प्यार करदा है, सै उना जो गबाई दिन्दा है; पर जड़ा इस संसारे च अपने प्राणा जो प्यार नी करदा है; तां उनी हमेशा दिया जिन्दगिया तांई उदी रक्षा करणी है। (aiōnios g166) 26 अगर कोई मेरी सेवा करे, तां मेरा चेला बणे; कने जिथू मैं है ओथु मेरे सेवके भी होणा; अगर कोई मेरी सेवा करे, तां पिता परमेश्वरे उदा आदर करणा। 27 हुंण मैं बड़ा बेचेन होआ दा है। इस तांई मैं क्या बोलें? पिता जी, मिंजो इसा दुखे दिया घडिया ला बचाई ले? पर मैं संसार च इस तांई आया की दुख झेले कने मरी जां। 28 हे पिता परमेश्वर तू प्रगट कर की तू कितणा महिमामय है। तालू ऐ आकाशवाणी होई, “मैं प्रगट कितया है की मैं कितणा महिमा बाला है कने मैं ऐ फिरी प्रगट करगा।” 29 तालू सै लोक जड़े खडोई करी अबाज सुंणा दे थे, उना बोलया, की बदल गरजया, कने होरनी बोलया, “कोई स्वर्गदूत उसने बोलया।” 30 इसी पर यीशुऐ बोलया, “ऐ अबाज

तुहाडे भले ताई थी, मेरे ताई नी है। 31 हुण सै बकत है जालू परमेख्वरे संसारे दे लोकां दा न्याय करणा, कने हुण सै बकत है जालू यीशुऐ इस संसारे दे सरदार शैताने दी शक्ति जो खत्म करणा। 32 कने अगर मैं धरतिया ला उपर चढाया जांगा, तां सारयां जो अपने बाल लेई ओणा।” 33 इयां बोली करी उनी ऐ प्रगट करी दिता, की सै कियां मरणे बाला था। 34 इसा पर लोकां उसला बोलया, “असां पबित्र शास्त्र दी ऐ गल्ल सुणियो है, की मसीहे हमेशा जिन्दा रेंणा है, फिरी तू कजो बोला दा है, की माणुऐ दे पुत्रे जो उच्चे पर चड़ाणा जरूरी है? ऐ माणुऐ दा पुत्र कुण है?” (aiōn g165) 35 यीशुऐ उना ने बोलया, “(लौ) हुण थोड़िया देरा दीकर तुहाडे बिच है, जालू दीकर लौ तुहाडे सोगी है तालू दीकर चली रिया; इयां ना होए की नेहेरा तुहांजो घेरी ना ले; जड़ा नेहेरे च चलदा है उसयो नी पता होंदा की कुथयो चलया है। 36 जालू दीकर लौ तुहाडे सोगी है, लौ पर भरोसा करा की तुसां लौ दी ओलाद बणन।” ऐ गल्लां बोली करी यीशु चली गया कने अपने आपे जो उना ला लुकाई रखया। 37 कने यीशुऐ उना दे सामणे इतणे चमत्कार दस्से, तमी उना उदे पर भरोसा नी किता; 38 ऐ इस ताई होया ताकि जड़ा यशायाह परमेख्वरे दा संदेश देणेबाले बोलया था सै सच्च होई जा; “प्रभु जी, साडे संदेश पर कुनी भरोसा किता है? कने परमेख्वर दी पराक्रमी शक्ति कुदे पर प्रगट होई?” 39 इसा बजा ने सै भरोसा नी करी सके, क्योंकि यशायाहे फिरी बोलया: 40 परमेख्वरे उना दी हखी अन्निया करी दितियां ताकि सै दिखी नी सकन, कने उना दे दिमाग बंद करी दिते ताकि सै समझी नी सकन। नितां उना मिंजो पर भरोसा करी लेणा कने मैं उना जो ठीक करी दिन्दा। 41 यशायाहे ऐ गल्लां इस ताई बोलियां, की उनी बकते ला पेहले उदी महिमा दिखी, कने उदे बारे च गल्लां कितियां। 42 मते अगुवां भी उदे पर भरोसा किता, पर फरीसियां दिया बजा ने सबना सामणे नी मंनदे थे, इस डरे ने नी की उना जो यहूदी जंज घर ला कड़ी दिगे। 43 क्योंकि उना जो परमेख्वरे दी तारीफ ला, माणुऐ दी तारीफ जादा प्यारी लगदी थी। 44 यीशुऐ भिडा जो पुकारी करी बोलया, “जड़ा मेरे पर भरोसा करदा है, सै सिर्फ मिंजो पर नी पर मिंजो भेजणे बाले परमेख्वरे पर भरोसा करदा है। 45 कने जड़ा मिंजो दिखदा है, सै मिंजो भेजणे बाले परमेख्वरे जो दिखदा है। 46 मैं संसारे च इक लौ बणी करी आया है ताकि जड़ा मिंजो पर भरोसा करगा सै कदी नेहेरे च नी रेंगा। 47 अगर कोई मेरियां गल्लां सुणीकरी उना दा पालन नी करे, तां मैं उसयो दोषी नी बोलणा है, क्योंकि मैं

संसारे दे लोकां जो दोषी ठहराणे ताई नी आया, पर संसारे दा उद्धार करणे ताई आया है।” 48 जडा मिंजो तुच्छ समझदा है कने मेरियां गल्लां जो नी मनदा है, उना दा न्याय करणे बाला तां इक ही है, मतलब की जडा बचन में बोलया है, उनी उसयो आखरी दिना च दोषी बणाणा। 49 क्योंकि मैं अपने हक ने ऐ गल्लां नी कितियां न, पर पिता परमेश्वर जिनी मिंजो भेजया है उनी मिंजो हुकम दितया है की क्या-क्या बोलें? 50 कने मैं जाणदा है, की उदे हुक्मा जो मनणा हमेशा दिया जिन्दगिया दा रस्ता है, इस ताई मैं तुसां जो सेई बोलदा है जडा पिता परमेश्वर मिंजो बोलदा है।

(aiōnios g166)

13 फसह दे त्योहरे ला पेहले जालू यीशुऐ जाणी लिया, की मेरा सै बकत आई गिया है की मैं संसारे जो छडी करी अपने पिता परमेश्वर बाल बापस चली जां, यीशु अपने चेलयां सोगी हमेशा प्यार करदा रिया, जडे संसार च यीशुऐ सोगी थे, जदिया प्यार सै करदा था, आखरी दीकर सियुदा ही प्यार रखदा रिया। 2 यीशु कने उदे चेले राती दा खाणा खा दे थे। शैताने पेहले ही यीशुऐ जो धोखा देणे ताई शमौन दे पुत्र यहूदा इस्करियोती दे मने च ऐ पाई दितया था, की उसयो पकड़वाई दे। 3 जालू यीशु ऐ जाणदा था की पिता परमेश्वरे मिंजो हर चिजा पर हक दितया है कने मैं परमेश्वरे दे बखे ला आया है, कने परमेश्वरे बाल बापस जाणा है। 4 खाणा खांदे बेले उठी करी यीशुऐ अपने बाहरी कपड़े खोली दिते, कने अंगोछा लेईकरी अपना लक्के च बन्नी लिया। 5 तालू भांडे च पांणी लेईकरी चेलयां दे पैर धोई करी कने जडा अंगोछा लक्के च लपेटया था उसला पुंजणा लग्गा। 6 जालू यीशु शमौन पतरस दे बखे आया तालू पतरसे उसयो बोलया, “प्रभु जी, तू कजो मेरे पैरां धोणा लगया है?” 7 यीशुऐ उसयो जबाब दिता, “जडा मैं करदा है, तू हुण इदा मतलब नी जाणदा है, पर कुछ बकते बाद जाणना है।” 8 पतरसे उसयो बोलया, मैं तुसां जो अपने पैरां जो कदी नी धोणा देणा। ऐ सुणीकरी यीशुऐ उसयो बोलया, “अगर तू मिंजो अपने पैर नी धोणे नी दिते, तां तू मेरा चेला नी है।” (aiōn g165)

9 शमौन पतरसे उसयो बोलया, “प्रभु जी, तां मेरे पैर ही नी बल्कि हथ कने सर भी धोई दे।” 10 यीशुऐ उसयो बोलया, “इक माणु जडा नोहोई बैठया है, सै बिल्कुल साफ है, उसयो सिर्फ अपने पैरा जो धोंगे दी जरूरत है। कने तुसां सारे शुद्ध न सिर्फ इकी जो छड़ी करी।” 11 सै तां अपयों पकड़ाणे बाले जो जाणदा था ताई तां उनी बोलया, “तुसां सारे दे सारे शुद्ध नी न।” 12 जालू यीशु उना दे पैरां जो धोई बैठा तां

सै अपने बाहरे बाले कपड़े पाई करी फिरी बेई गया कने उना ने बोलणा लग्गा,
 “क्या तुसां समझे की मैं तुहाड़े सोगी क्या कितया है? 13 तुसां मिंजो गुरू, कने
 प्रभु, कने ठीक ही बोलदे न, क्योंकि मैं तुहाड़ा गुरू कने प्रभु है। 14 अगर मैं प्रभु
 कने गुरू होईकरी तुहाड़े पैर धोते, तां तुहांजो भी नम्र होईकरी इक दुज्जे दे पैर धोई
 करी मिंजो ला सिखणा चाईदा। 15 क्योंकि मैं तुहांजो इक नमूना दस्सी दितया है,
 की जियां मैं तुहाड़े सोगी किता, तुसां भी तियां ही करा। 16 मैं तुसां ने सच्च-सच्च
 बोलदा है, नोकर अपने मालिके ला बड़ा नी होंदा, कने ना भेजया होया अपने
 भेजणे बाले ला बड़ा होंदा। 17 हुण तां तुसां इना गल्लां जो जाणदे न, तां इना जो
 करा ताकि तुसां भी धन्य होन। 18 मैं तुसां सबना दे बारे च नी बोला दा है: जिना
 जो मैं चुणयां है, उना जो मैं जाणदा है: पर ऐ इस ताई होआ दा है ताकि पबित्र शास्त्रां
 च जड़ा लिखया है सै पूरा हो, जिनी मेरे सोगी रोटी खादी, उनी मिंजो धोखा दिता
 है। 19 हुण मैं तुहांजो उदे होणे ला पेहले दसी दिन्दा है ताकि जालू होई जांगा तां
 तुसां भरोसा करनयो की मैं सेई है। 20 मैं तुसां ने सच्च-सच्च बोलदा है, की जड़ा
 मेरे भेजयां जो अपनांदा है, सै मिंजो भी अपनांदा है, कने जड़ा मिंजो अपनांदा है,
 सै मेरे भेजणे बाले जो भी अपनांदा है।” 21 ऐ गल्लां बोलणे बाद यीशु बड़ा ही
 दुखी होया कने अपने चेलयां जो दसया, “मैं तुसां ने सच्च-सच्च बोलदा है, की
 तुसां चे इकी जणे मिंजो पकड़ाणा है।” 22 चले ऐ शक करदे होऐ, इकी दुऐ पासे
 दिखणा लग्गे, ऐ कुसदे बारे च बोला दा है। 23 उदे चेलयां चे इक जिसने यीशु
 प्यार रखदा था, यीशुऐ दे बखे बैठया था। 24 तालू शमौन पतरसे उदे पासे इशारा
 करी के पुछया, “दसी दे तां, सै कुसदे बारे च बोला दा है?” 25 तालू उनी भी
 यीशुऐ दे बखे जाई करी पुछया, “प्रभु जी, सै कुण है?” 26 यीशुऐ जबाब दिता,
 “जिसयो मैं ऐ रोटिया दा टुकड़ा चटनिया च डोबी करी दिंगा, सै ही है।” कने
 उनी टुकड़ा चटनिया च डोबी करी शमौने दे पुत्र यहदा इस्करियोती जो दिता। 27
 कने जियां ही यहदा टुकड़ा खादा, यीशुऐ उसयो बोलया, “जड़ा तू हुण करणा जा
 दा है, सै झट कर, तालू ही शैतान उदे च बड़ी गया। 28 खाणा खाणे बालयां चे
 बाकी कुसियो भी पता नी था की यीशुऐ उसयो ऐसा कजो बोलया। 29 यहदा बाल
 पैसयां दी थेली रेंदी थी, इस ताई कुनी-कुनी समझया, की यीशु उसयो बोला दा है,
 की जड़ा कुछ सांझो त्योहारे ताई चाईदा सै खरीदी ले, या गरीबां जो कुछ दे। 30
 तालू सै रोटी दे टुकड़े जो खाई करी झट बाहरे जो चली गया, कने राती दा बकत

था। 31 जालू सै बाहर चली गया तां यीशुए बोलया, हुण मेरी, माणुए दे पुत्रे दी महिमा होई, कने परमेश्वरे दी महिमा मिंजो च होई; 32 कने परमेश्वरे अपने पुत्रे दी महिमा करणी, कने तोल्ली ही करणी है। 33 हे प्यारे बच्चो, मैं होर थोड़ी देर तुहाड़े बखे है; फिरी तुसां मिंजो तोपणा, कने जियां मैं यहदियाँ जो बोलया, जिथू मैं जाणा, ओथु तुसां नी आई सकदे न, तियां ही मैं हुण तुहांजो भी बोलदा है। 34 मैं तुहांजो इक नौआं हुकम दिन्दा है, इक दुज्जे ने तियां ही प्यार करा: जियां मैं तुसां ने प्यार करदा है, तियां ही तुसां भी इक दुज्जे ने प्यार करा।” 35 अगर तुसां इक दुज्जे ने प्यार करगे, तां हर कुसी जो पता चलणा की तुसां मेरे चेले न। 36 शमौन पतरसे उसयो बोलया, “प्रभु जी, तू कुथु जाणा है?” यीशुए जबाब दिता, जिथू मैं जाणा है, ओथु तू मेरे पिच्छे नी आई सकदा? पर बादे च तुसां मेरे पिच्छे ओणा। 37 पतरसे उसयो बोलया, “प्रभु जी, हुण मैं तेरे पिच्छे कनी आई सकदा है? मैं तां तेरे ताई अपनी जान देणे ताई तैयार है।” 38 यीशुए जबाब दिता, क्या तू मेरे ताई मरणा है? मैं तिजो ने सच्च-सच्च बोलदा है की मुर्गे जो बांग देणे ला पेहले तू मिंजो तिन्न बरी बोलणा की तू मिंजो नी जाणदा।

14 “तुहाड़ा मन दुखी ना हो, तुसां परमेश्वरे पर भरोसा रखा कने मिंजो पर भी भरोसा रखा। 2 मेरे पिता परमेश्वर दे घरे रेहणे दियां मतियां जगा न, अगर नी हुंदियां, तां मैं तुसां ने बोली दिन्दा क्योंकि मैं तुहाड़े ताई जगा तैयार करणा जांदा है। 3 मेरे जाणे कने तैयारी करणे बाद, तां मैं फिरी आई करी तुहांजो अपने सोगी लेई जांगा, ताकि जिथू मैं रे ओथु ही तुसां भी रेन। 4 उसा जगा दा रस्ता जिथू मैं जाणा है ओथु दा रस्ता तुसां जाणदे न।” 5 थोमे उसला बोलया, “प्रभु जी, सांझो नी पता तू कुथु जाणा है, तां सांझो रस्ता कियां पता होणा?” 6 यीशुए उना जो बोलया, “रस्ता कने सचाई कने जडा जिन्दगी दिन्दा है सै मैं ही है, मेरे बिना कोई भी पिता परमेश्वरे बाल नी पुज्जी सकदा है। 7 अगर तुसां मिंजो जाणया होदा, तां मेरे पिता परमेश्वरे जो भी जाणदे, कने हुण उसयो जाणदे भी हेन, कने उसयो दिखया भी है।” 8 फिलिप्पुसे उसला बोलया, “प्रभु जी, पिता परमेश्वर दे दर्शण करवाई दे: इतणा ही साडे ताई काफी है।” 9 यीशुए उसयो बोलया, हे फिलिप्पुस, मैं इतणे रोजां ला तुहाड़े सोगी है, क्या तू मिंजो नी जाणदा? जिनी मिंजो दिखया है उनी पिता परमेश्वर जो भी दिखया है: तू कजो बोला दा की पिता परमेश्वर दे दर्शण करवाई दे? 10 क्या तू भरोसा नी करदा है, की मैं पिता परमेश्वर च है, कने पिता

परमेश्वर मिजो च है। ऐ गल्लां जडियां मैं तुसां ने बोला दा है, अपणिया तरफा ला नी बोला दा, पर पिता परमेश्वरे मिजो च रेईकरी जडा चांदा है सै ही करदा है। 11 मेरा ही भरोसा करा, की मैं पिता परमेश्वर च है; कने पिता परमेश्वर मिजो च है; नितां जडे चमत्कार मैं कितयो न उना दिया बजा ने मेरे पर भरोसा करा। 12 मैं तुसां ने सच्च-सच्च बोलदा है, की जडा मिजो पर भरोसा करदा है, ऐ कम्म जडे मैं करदा है उनी भी करणे, क्योंकि मैं पिता परमेश्वर बाल जाणा है। 13 कने जडा कुछ तुसां मेरे नाए ने मंगगे, सेई मैं करगा ताकि पुत्रे दे जरिये पिता परमेश्वर दी महिमा होऐ। 14 अगर तुसां मिजो ला मेरे नाए ला कुछ मंगगे, तां मैं सै पूरा करणा। 15 अगर तुसां मिजो ने प्यार करदे न, तां मेरे हुक्मा जो मनगे। 16 कने मैं पिता परमेश्वर ने बिनती करगा, की सै तुहांजो इक होर मददगार दे, ताकि सै हमेशा तुहाडे सोगी रे। (aiōn g165) 17 सै सच्च दी आत्मा, जडी पबित्र आत्मा है, सै परमेश्वरे दे बारे च सच्च जो प्रगट करदा है, क्योंकि संसार ना पबित्र आत्मा जो दिखदा है कने ना उसयो जाणदा है: तुसां पबित्र आत्मा जो जाणदे न, क्योंकि सै तुहाडे सोगी रेंदा है कने उनी तुसां च होणा है। 18 “मैं तुहांजो अनाथ नी छडणा है, मैं तुहाडे बाल बापस ओणा। 19 थोडे ही बकते च संसारे दे लोकां मिजो नी दिखणा, पर तुसां मिजो दिखणा क्योंकि मैं फिरी ला जिन्दा होणा है, इस ताई तुसां भी जिन्दा रेंणा है। 20 जिस रोजे मैं जिन्दे होईकरी बापस ओणा उसी दिने तुहांजो पता लगणा, की मैं अपने पिता परमेश्वर च है कने तुसां मिजो च न, कने मैं तुसां च है। 21 जडे मेरे हुक्मा जो जाणदा है, कने सै हुक्मा जो मनदा है, सै ही मिजो ने प्यार करदा है, कने मैं भी उसला प्यार करणा है कने जडा मिजो ने प्यार करदा है, उसला मेरे पिता परमेश्वरे भी प्यार करणा, कने मैं उसला प्यार रखणा, कने मैं अपने आपे जो उदे पर प्रगट करणा है।” 22 उनी यहदे जडा इस्करियोती नी था, उनी बोलया, “प्रभु जी, क्या होया की तू अपने आपे जो सांझो पर प्रगट करणा चांदा है, कने संसारे दे लोकां पर नी?” 23 यीशुऐ उसयो जबाब दिता, मैं अपने आपे जो ऐसे लोकां जो दसदा है जडे कोई मिजो ने प्यार करदे न, कने मेरियां सिखाईयां गल्लां जो मंदे न। कने मेरे पिता उसने प्यार रखणा कने असां आई करी उदे सोगी रेणा है। 24 जडा मिजो ने प्यार नी करदा, सै मेरी सिखाईयां गल्लां जो नी मनदा है, कने जडा मेरी शिक्षा तुसां सुणदे न, सै मेरियां नी न पर मेरे पिता परमेश्वर दी शिक्षा न, जिनी मिजो भेजया है। 25 ऐ गल्लां मैं तुहाडे सोगी रेईकरी

तुसां ने बोलियां न। 26 मददगार मतलब की पबित्र आत्मा जिसयो पिता परमेश्वरे मेरी जगा लेणे ताई भेजणा है, पबित्र आत्मा तुहांजो सारियां गल्लां सिखाणियां न, कने जड़ा कुछ मैं तुसां ने बोलया है, सै सब कुछ तुहांजो याद कराणा है। 27 मैं तुहांजो शांति दिन्दा है, मैं अपणी शांति तुहांजो दिन्दा है; ऐ सै शांति नी है जड़ी संसार देई सकदा है। तुसां अपने मने जो दुखी कने डरया होया मत होणा दिया। 28 तुसां सुणाया, की मैं तुहांजो ने बोलया, “मैं जाणा है। कने तुहाड़े बाल फिरी बापस आई जाणा है अगर तुसां मेरे ने प्यार करदे न, तां इसा गल्लां ने खुश होंदे न, की मैं पिता परमेश्वर बाल जाणा है क्योंकि पिता परमेश्वर मिंजो ला बड़ा महान है।” 29 कने मैं हुण ऐ सब गल्लां होणे ला पेहले तुहांजो ने बोली दितियां न, की जालू सै होई जांगियां, तां तुसां मिंजो पर भरोसा करन। 30 हुण मेरे बाल तुसां ने तुहाड़े सोगी गल्लां करणे ताई जादा बकत नी क्योंकि इसी संसारे दे सरदारे शैताने ओणा है, कने मिंजो पर उदा कोई हक नी है। 31 मैं तियां ही करदा है जियां पिता परमेश्वरे मिंजो हुकम दिता, ऐ इस ताई की संसार दे लोकां जो पता लग्गे की मैं पिता परमेश्वरे ने प्यार करदा है। कने जियां पिता परमेश्वर मिंजो हुकम दिन्दा, मैं तियां ही करदा है। उठा, ऐथू ला चलदे न।

15 सच्ची दाखा दी बेल मैं हे; कने मेरा पिता परमेश्वर किसान है। 2 हर इक डाली जड़ी मिंजो ने लगियो है, कने नी फल्दी है, उस जो सै बडी दिन्दा है, कने जड़ी डाली फल्दी है उसा जो सै छांडदा है ताकि सै होर जादा फले। 3 जड़ी शिक्षा मैं तुसां जो दितियो है, उसा दिया बजा ने तुसां शुद्ध न। 4 तुसां मिंजो च बणी रिया, कने मैं तुहांजो च: जियां कोई डाली अगर दाखा दिया बेला ला टूटी जा, तां सै अपु नी फली सकदी, तियां ही तुसां मिंजो च बणी नी रेगे तां, तुसां कुछ नी करी सकदे। 5 मैं दाख बेल है: कने तुसां डालियाँ न; जड़ा मिंजो च बणी रेदा है, कने मैं उदे च, सै मता फलदा है, क्योंकि मिंजो ने लग होईकरी तुसां कुछ नी करी सकदे। 6 अगर कोई मिंजो च बणी नी रे, तां उसा डालियाँ जो बड़ी करी फेंकी दिन्दे न, कने जालू सै डालियाँ सुकी जांदियां न; कने लोक उना जो गठेरी करी अग्गी च पाई दिन्दे न, कने सै फकुई जान्दियां न। 7 अगर तुसां मिंजो ने बणी रेन, कने मेरियां शिक्षा च तुसां बणी रेगे तां तुसां जड़ा चांगे सै मंगा कने सै तुहाड़े ताई होई जाणा। 8 मेरे पिता परमेश्वर दी महिमा इसी ने होंदी है, की तुसां बड़ा जादा फल लोंगे, ऐई तुहाड़ा मेरे चले होणे दा सबूत है। 9 जियां पिता परमेश्वरे मिंजो ने प्यार

रख्या, तियां ही मैं भी तुहांजो ने प्यार किता, मेरे प्यारे च बंणी रिया। 10 अगर
 तुसां मेरे हुकमा जो मनगे, तां मेरे प्यारे च बंणी रेणा जियां की मैं अपने पिता
 परमेश्वरे दे हुकमा जो मनया है, कने उदे प्यारे च बणी रेंदा है। 11 मैं ऐ गल्लां
 तुहांजो इस ताई बोलियां न, ताकि तुसां च भी सेई खुशी हो जड़ी मिंजो च है, कने
 तुहाडी खुशी पुरी होई जा। 12 मेरा हुकम ऐ है, की जियां मैं तुसां ने प्यार रखया है
 तियां ही तुसां भी इकी दुज्जे ने प्यार रखा। 13 कुसी बाल ऐ दसणे ताई की सै
 अपने मित्रां ने प्यार करदा है, इसला बडा होर कोई तरिका नी है की सै अपने
 मित्रां जो बचाणे ताई अपनी जान देई दे। 14 जडा भी हुकम मैं तुहांजो दिन्दा है,
 अगर तुसां उसयो करन, तां तुसां मेरे मित्र न। 15 हुण मैं तुहांजो सेवक नी बोलणा,
 क्योंकि सेवक नी जाणदा है, की उदा स्वामी क्या करदा है: पर मैं तुहांजो मित्र
 बोलया है, क्योंकि मैं जडियां गल्लां अपने पिता परमेश्वरे ला सुणियां, सै सारियां
 तुहांजो दस्सी दितियां न। 16 तुसां मिंजो नी चूंणया है पर मैं तुहांजो चूंणया है कने
 तुहांजो नियुक्त कितया है ताकि तुसां जाई करी फल देन; कने तुहाडा फल टिकाऊ
 रे, ताकि तुसां मेरे चले न, इस ताई जडा कुछ तुसां मेरे ना ने मंगगे, सै तुहांजो दे।
 17 इना गल्लां दा हुकम मैं इस ताई दिन्दा है, ताकि तुसां इकी दुज्जे ने प्यार रखन।
 18 अगर संसार दे लोक तुहांजो ने बैर रखदे न, तां तुसां जाणदे न, की इना तुसां ला
 पेहले मिंजो ने भी बैर रखया। 19 अगर तुसां संसारे दे लोकां सांई होदे, तां संसारे दे
 लोक अपणयां ने प्यार करदे न, पर इसा बजा ने की तुसां इस संसारे दे लोकां ने
 रिश्ता नी रखदे, कने मैं तुहांजो इस संसारे ला चूंणया है, इस ताई संसारे दे लोक
 तुहांजो ने बैर रखदे न। 20 जडा मैं तुसां जो दसया है, सेवक अपने मालिके ला
 बडा नी होदा है, इसयो याद रखा अगर उना मिंजो सताया, तां तुहांजो भी सताणां
 है; अगर उना मेरियां शिक्षा जो मनया, तां तुहाडी शिक्षा जो भी मनणा। 21 पर ऐ
 सारा कुछ लोकां इसा बजा ने तुहाडे सोगी करणा क्योंकि तुसां मेरे चले न, कने सै
 मेरे भेजणे बाले परमेश्वरे जो नी जाणदे न। 22 अगर मैं नी ओंदा कने उना ने गल्लां
 नी करदा, तां सै पापी नी बणदे पर हुण उना जो उना दे पापां ताई कोई भाना नी।
 23 जडा मिंजो ने बैर रखदा है, सै मेरे पिता परमेश्वर ने भी बैर रखदा है। 24 अगर
 मैं उना च सै चमत्कार नी करदा, जडे कुनी होरनी नी किते तां सै पापी नी बणदे,
 पर हुण उना मिंजो दिखी लिया है फिरी भी सै मिंजो कने मेरे पिता परमेश्वरे दोनो ने
 बैर करदे न। 25 ऐ इस ताई होया की जडा उना दे पबित्र शास्त्र च लिखया है ऐ इना

गल्लां जो पूरा करदा है, उना बिना कुसी बजा ने मिंजो ने नफरत किती। 26 पर जालू सै मददगार ओगा, जिसयो मैं तुहाड़े बाल पिता परमेश्वरे दिया तरफा ला भेजगा, मतलब की सच्च दी आत्मा जड़ी पिता परमेश्वरे दिया तरफा ला निकलदी है, तां उनी मेरी गबाई देंगी। 27 कने तुसां भी गबाह न क्योंकि तुसां शुरू ला मेरे सोगी न।

16 ऐ गल्लां मैं तुहांजो ने इस ताई बोलियां की कुथी तुसां भरोसा करणा ना छडी देन। 2 उना तुहांजो यहूदी जंज घर ला कडी देणा, कने सै बकत ओणा है, की अगर कोई तुहांजो मारी दिंगा, तां तुहाड़े हत्यारे ऐ समझणा है की सै परमेश्वरे दी सेवा करा दा है। 3 कने उना ऐ इस ताई करणा क्योंकि उना ना पिता परमेश्वर जो जाणया है कने ना ही मिंजो जाणदे न। 4 पर मैं ऐ गल्लां इस ताई तुसां ने बोलियां, ताकि जालू उना दा बकत ओऐ तां तुहांजो याद आई जा, मैं ऐ सब तुसां जो शुरू च इस ताई नी बोलया, क्योंकि उस बकत मैं तुहाड़े सोगी था। 5 हुण मैं अपने भेजणे बाले बाल जाणा है कने तुसां चे कोई मिंजो ला नी पूछदा है, की मैं कुथु चलया है? 6 पर मैं जड़ियां ऐ गल्लां तुसां ने बोलियां न, इस ताई तुहाडा मन बड़ा दुखी होया है। 7 तमी मैं तुसां ने सच्च बोलदा है, की मेरा जाणा तुहाड़े ताई खरा है, क्योंकि अगर मैं नी जांगा, तां उनी दिलासा देणेबाले तुहाड़े बाल नी ओणा, पर अगर मैं जांगा, तां उसयो तुहाड़े बाल भेजी दिंगा। 8 कने उनी आई करी संसारे दे लोकां जो पाप कने धार्मिकता कने न्याय दे बारे च यकीन दिलाणा। 9 पापे दे बारे च यकीन दिलाणा की सै मिंजो पर भरोसा करणे ने मना करदे न; 10 कने ऐ साबित करदा है की यीशु धर्मी था, इस ताई की मैं पिता परमेश्वर बाल चलया है, कने तुसां मिंजो फिरी नी दिखणा है, 11 कने न्याय दे बारे च भी यकीन दिलाणा की इस संसारे दे सरदार शैताने जो दोषी ठहराया है। 12 मैं तुहांजो ने होर भी मतियां गल्लां बोलणा चांदा है, पर हले तुसां इना जो सेहन नी करी सकदे न। 13 पर जालू सै मतलब की सच्च दिया आत्मा ओणा है, तां आत्मा तुसां जो परमेश्वर दे बारे च जड़ा सच्च है सै समझणा है, क्योंकि उनी अपने अधिकारे ने नी बोलणा है, पर जड़ा कुछ परमेश्वरे ला सुणगा, सै ही उनी बोलणा है, कने होणे बालियां गल्लां तुहांजो दसणियां। 14 उनी मेरी महिमा करणी, क्योंकि उसयो मेरिया तरफा ला जड़ा मिलया है, उनी तुसां जो सै ही सिखाणा। 15 जड़ा कुछ पिता परमेश्वर दा है, सै सब मेरा है; ताई तां मैं बोलया था की, उनी मेरियां गल्लां चे लेईकरी तुहांजो दसणा

है। 16 “थोड़े बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है।” 17 तालू उदे कितणयां ही चेलयां अपु चे बोलया, “ऐ क्या है, जड़ा सै सांझो ने बोला दा है, थोड़े बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है? कने ऐ इस ताई की मैं पिता परमेश्वर बाल चलया है?” 18 चले इकी दुज्जे ला पुछदे रे, “की सै क्या बोला दा है। क्या है ऐ थोड़े बकत बाद जिसदे बारे च सै बार-बार बोला दा है।” 19 यीशुऐ ऐ जाणी करी, की सै मिंजो ला इना गल्लां दा मतलब पूछणा चांदे न, उना जो बोलया, क्या तुसां अपु चे मेरिया इना गल्लां दे बारे च पूछा दे न, थोड़े बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है? 20 मैं तुसां ने सच्च-सच्च बोलदा है; मेरिया मौता दे बाद तुसां रोंणा कने दुखी होणा है, पर संसारे दे लोकां खुश होणा है: तुसां जो दुख होणा, पर जालू मैं मरी करी दुबारा जिन्दा होणा तालू तुहाड़ा दुख खुशी च बदली जाणा। 21 जालू जनानी बच्चे जो जमणा लगदी है तां उसा जो बड़ी पिढ होंदी है, क्योंकि उसा दे दुखे दी घड़ी आईयो है, पर जालू सै बच्चा जम्मी बोंदी है तां इसा खुशिया ने की संसारे च इक माणु पैदा होया है, उस दुखे जो फिरी कदी याद नी करदी। 22 इयां ही हुण तुहांजो भी दुख है, पर मैं तुसां ने फिरी मिलणा है कने तुसां खुश होणा; कने तुहाड़ी खुशी तुहांजो ला कुनी नी खोंणी। 23 जालू मिंजो तुसां दोबारा दिखणा तालू मिंजो ला कुछ नी पूछणा: मैं तुसां ने सच्च-सच्च बोलदा है, अगर पिता परमेश्वरे ला कुछ मंगगे, तां उनी मेरे चले होणे दिया बजा ने तुहांजो देणा। 24 हले दीकर तुसां मेरे नाऐ ने पिता परमेश्वरे ला कुछ नी मंगया; पर मंगगे तां मिलणा ताकि तुहाड़ी खुशी पूरी होई जा। 25 “मैं तुहांजो ने ऐ गल्लां कहाणियां च बोलियां न, पर सै बकत ओणा है, की मैं तुसां ने होर कहाणियां च नी बोलणा है पर खुली करी पिता परमेश्वर दे बारे च दसणा। 26 उस बेले तुसां अपु मेरे नाऐ ने मंगणा, क्योंकि तुसां मेरे चले न कने मैं तुसां जो बोलदा है, की मैं तुहाड़े ताई पिता परमेश्वर ने बिनती नी करणी। 27 क्योंकि मेरे पिता परमेश्वर तां अपु ही तुसां ने प्यार करदा है, इस ताई की तुसां मिंजो ने प्यार रखया है, कने ऐ भी भरोसा किता की, मैं पिता परमेश्वर दिया तरफा ला निकलया है। 28 मैं पिता परमेश्वर ला निकली करी संसारे च आया है, फिरी संसारे जो छडी करी पिता परमेश्वरे बाल जाणा है।” 29 उदे चेलयां बोलया, “दिख, हुण तां तू खुली करी बोला दा है, कने कोई कहाणी नी बोली।” 30 हुण असां जाणी गियो न, की तू

सारा कुछ जाणदा है, कने तिजो कुसी दी जरूरत ही नी की कोई तिजो ला सबाल पुच्छे, इसला असां भरोसा करदे न, की तू परमेश्वरे ला निकलया है। 31 ऐ सुणीकरी यीशुऐ उना ने बोलया, “की क्या तुसां हुण भरोसा करदे न? 32 दिखा, सै बकत ओणा है बस आई रिया है की तुसां सारयां बख-बख होईकरी अपने-अपने रस्ते जाणा है, कने मिंजो किल्ला छडी देणा है, तमी मैं किल्ला नी क्योंकि मेरा पिता परमेश्वर मेरे सोगी है। 33 मैं ऐ गल्लां तुसां ने इस ताई बोलियां न, ताकि तुसां जो अंदरूनी शांति मिल्ले क्योंकि तुसां मेरे सोगी रिश्ता रखया, संसार च तुहांजो दुख होणा है, पर सबर रखा, मैं इस संसारे च राज करणे बाले शैताने जो हराई दीतया है।”

17 यीशुऐ अपने चेलयां ने ऐ गल्लां बोलणे बाद कने अपणियां नजरां स्वर्गे पासे करिके बोलया, पिता परमेश्वर, सै बकत आई गया है, की तू अपने पुत्रे दी महिमा कर, ताकि पुत्र भी तेरी महिमा करे, 2 क्योंकि तू मिंजो सारयां लोकां पर हक दितया है, की जिना जो तू मिंजो दितया है, उना सबना जो सै हमेशा दी जिन्दगी दे। (aiōnios g166) 3 कने हमेशा दी जिन्दगी ऐ है कि लोक तिजो जाणी सकन यानी कि इकलोते सच्चे परमेश्वरे जो। कने ऐ भी की सै मिंजो जाणन, यानी यीशु मसीह जो, जिसयो तू भेजया है। (aiōnios g166) 4 जडा कम्म तू मिंजो करणे जो दितया था, उसयो पूरा करिके मैं धरतिया पर तेरी महिमा किती है। 5 इस ताई पिता परमेश्वर तू मिंजो अपनी महिमा ने महिमित कर, महिमा जडी संसारे दे होणे ला पेहले मेरी महिमा तेरे सोगी थी। 6 मैं तुसां जो उना चेलयां पर प्रगट कितया है, जडे तुसां मिंजो संसारे चे दितयो न। सै तुहाडे थे, कने तू उना जो मिंजो दिता। कने उना तेरे बचना जो मनया है। 7 हुण सै जाणी गियो न, की जडा कुछ तू मिंजो दितया है, सब कुछ तेरिया तरफा ला है। 8 क्योंकि जडा संदेश तू मिंजो दिता, मैं उना जो उना बाल देई दिता कने उना इना गल्लां पर भरोसा किता: कने सच्ची जाणी लिया है, की मैं तेरिया तरफा ला आया है, कने भरोसा करी लिया है की तू ही मिंजो भेजया है। 9 मैं उना ताई बिनती करदा है, सिर्फ उना ताई ही करदा है जडे तू मिंजो दितयो न क्योंकि सै तेरे न। पर जडे संसारे ने रिश्ता रखदे न उना ताई बिनती नी करदा है। 10 कने जडा कुछ मेरा है सै सब कुछ तेरा है; कने जडा तेरा है सै मेरा है; इना ने मेरी महिमा प्रगट होई है। 11 हुण मैं संसारे च नी रेणा है, कने मैं तेरे बाल ओआ दा है पर मेरे चेलयां इस संसारे च रेणा है; हे पबित्र पिता, अपने

नाए दिया शक्तिया ने उना दी रक्षा कर, ताकि उना दा इक ही मन हो जियां साड़ा इक ही मन है। 12 जालू मैं उना सोगी था, तां मैं तेरे उस नाए ने जड़ा तू मिंजो दितया है, उना दी रक्षा किती। मैं उना दी देख रेख किती, कने बिनाशे दे पुत्रे जो छडी करी उना चे कूसदा भी नाश नी होया, इस ताई की पबित्र शास्त्रे च लिखियो गल्ल पुरी हो। 13 पर हूण मैं तेरे बाल ओणा है, कने ऐ गल्लां मैं संसारे च रेंदे होए बोलदा है, ताकि उना जो मेरी खुशी भरपूरी ने मिल्ले। 14 मैं तेरा संदेश उना बाल पुजाई दितया है, कने संसारे दे लोकां उना ने बैर किता, क्योंकि जियां मैं संसार दा नी है, तियां ही से भी संसारे दे नी न। 15 मैं ऐ बिनती नी करदा, की तू उना जो संसारे ला चुकी ले, पर ऐ की तू उना दी शैताने ला रक्षा कर। 16 जियां मैं संसारे दा नी है, तियां ही से भी इस संसारे दे नी न। 17 तेरा बचन सत्य है। उना जो सच्चाई च अपने ताई लग कर। 18 जियां तू मिंजो संसारे च भेजया, तियां ही मैं भी इना जो संसारे च भेजया है। 19 कने मैं उना दे फायदे ताई अपने आपे जो पबित्र करदा है ताकि सै भी सच्च ने पबित्र होन। 20 मैं बस अपने चेलयां ताई ही बिनती नी करदा है, पर जडे इना दी शिक्षा ने मिंजो पर भरोसा करगे उना ताई भी बिनती करदा है। 21 की सै सारे इक होन; जियां पिता तू मिंजो च है, कने मैं तिजो च है, तियां ही सै भी सांझो च होन, इस ताई की संसार दे लोक भरोसा करन, तू ही मिंजो भेजया है। 22 कने सै महिमा जड़ी तू मिंजो दिती, कने मैं उना जो दितियो है की सै तियां ही इक होन जियां असां इक न। 23 मैं उना च कने तू मिंजो च ताकि सै सिद्ध होईकरी इक होई जान, कने संसार जाणे की तू ही मिंजो भेजया है, कने जियां तू मिंजो ने प्यार रखया है, तियां ही उना ने भी प्यार रख। 24 पिता परमेश्वर, मैं चांदा है की जिना जो तू मिंजो दितयो है, जिथू मैं है, ओथु भी मेरे सोगी होन ताकि सै मेरिया उसा महिमा जो दिखन जड़ी तू मिंजो दितयो है, क्योंकि तू मिंजो संसारे दे बणने ला पेहले ला ही मिंजो ने प्यार रखया है। 25 हे धार्मिक पिता, संसारे दे लोकां तिजो नी जाणया, पर मैं तिजो जाणदा है कने चेलयां भी जाणया की तू मिंजो भेजया है। 26 कने मैं तेरा ना उना जो दसया कने दसदे रेणा है ताकि जड़ा प्यार तिजो मिंजो ने था, सेई उना चे रे कने मैं उना च रेणा।

18 जालू यीशुए प्राथना करणे बाद अपने चेलयां सोगी किद्रोन दे नाल्ले पार गया। ओथु इक बाग था, यीशु कने उदे चेले उस बागे दे अंदर गो। 2 उसयो पकड़बांणे बाला यहूदा भी उसा जगा जो जाणदा था, क्योंकि यीशु ओथु अपने

चेलयां सोगी जांदा था। 3 तालू यहदा, सिपाईयां दी इक टोलिया सोगी कने बड़े याजकां कने फरीसियां दे सेवकां जो लेईकरी उस बागे च आया कने हथां च दिये, मशालां, कने हथियार लियो थे। 4 तालू यीशु, उना सबना गल्लां जो जाणी करी जडियां उसने होंगे बालियां थियां, अगो आई करी उना ला पुछया, की कुसयो तोपा दे न? 5 उना उसयो जबाब दिता, “नासरत नगर ला यीशुऐ जो।” यीशुऐ उना जो बोलया, की मैं ही यीशु है। उसयो पकड़वाणे बाला यहदा भी उना सोगी खडोतया था। 6 यीशुऐ जो ऐसा बोलदे ही, की मैं ही नासरत दा यीशु है, सै पिच्छे हटी करी धरतिया पर ढेई पे। 7 तालू यीशुऐ उना ला फिरी पुछया की, तुसां कुसयो तोपा दे न, “उना बोलया, नासरत नगर दे यीशु जो।” 8 यीशुऐ जबाब दिता, “मैं तां तुसां जो बोली बैठया है की हों मैं ही यीशु है, अगर तुसां मिंजो तोपा दे न तां इना लोकां जो जाणा दिया, ऐ मेरे चले न।” 9 ऐसा इस तांई होया की, यीशुऐ जडा पेहले बोलया था सै सच्च होई जा: “जिना जो तू मिंजो दितया है उना चे मैं इकी जो भी नी गबाया है।” 10 तालू शमौन पतरसे अपणी तलवार कडी कने, महायाजके दे इकी नोकरे पर चलाई दिती कने उस दा इक कन उड़ाई दिता। उस सबके दा ना मलखुस था। 11 तालू यीशुऐ पतरसे ने बोलया, “अपणिया तलवारा जो मयाना च रख। जडा कटोरा मेरे पिता परमेख्वरे मिंजो दितया है, क्या मैं उसयो नी पिएँ?” 12 तालू सिपाईयां कने उना दे सबेदारां कने यहदी अगुवां दे नोकरां यीशु जो पकड़ी करी बन्नी दिता, 13 कने पहले उसयो हन्ना बाल लेई गे, क्योंकि सै उस साले दे महायाजक कैफा दा सौरा था। 14 ऐ सेई कैफा नाऐ दा इक माणु था, जिनी यहदी अगुवां जो सलाह दिती थी की साडे लोकां तांई मरणा इक माणुऐ दा खरा है। 15 शमौन पतरस कने इक होर चेला भी यीशुऐ दे पिच्छे चली पे, इस चले जो महायाजक जाणदे पछेणदे थे। इस तांई सै यीशुऐ पिच्छे-पिच्छे महायाजक दे अंगणे दीकर गया, 16 पर पतरस बाहर दरबाजे पर खडोई रिया, तालू सै दुज्जा चेला जिसयो महायाजक जाणदे थे सै बाहर आया, कने उनी दरबाजे पर खडोतियो नोकराणियां जो बोली करी पतरसे जो अंदर लेई ओदा। 17 उना नोकराणिया जडी दरबाजे पर खडोतियो थी, पतरसे जो बोलया, “की तू भी इस माणुऐ दे चेलयां चे तां नी ऐ?” उनी बोलया, “मैं नी है।” 18 सर्दियां दिया बजा ने मंदरे दे रखबाले कने सिपाई अगु बाली करी तपा दे थे, कने पतरस भी उना सोगी खडोई करी अगु तपा दा था। 19 तालू महायाजके यीशुऐ ला उदे चले कने उदे उपदेशां दे बारे

च पछताछ किती। 20 यीशुए उसयो जबाब दिता, “मैं सबना च खुली करी गल्लां कितियां, मैं यहदी जंज घर कने मंदरे च जाई करी हमेशा उपदेश दिता जिथू यहदी गिठे होंदे थे, कने कुछ भी लुकी करी कुछ नी बोलया। 21 तू मिंजो ला ऐ सबाल कजो पूछा दा है? सुणने बालयां ला पुछ की मैं उना ने क्या बोलया है। सै जाणदे न की मैं क्या-क्या बोलया है।” 22 जालू यीशुए ऐसा बोलया, तां बखे खडोटयो मंदरे दे रखबालयां चे इकी रखबाले, यीशुए जो थपड़ मारी करी बोलया, “क्या तू महायाजक जो इयां जबाब दे दा?” 23 यीशुए उसयो जबाब दिता, अगर मैं गलत बोलया, तां साबित कर की मैं गलत बोलया; पर अगर खरा बोलया है तां मिंजो कजो मारा दा है। 24 यीशुए अजे भी बनया ही था, कने हन्ने उसयो तियां ही कैफा महायाजक बाल भेजी दिता। 25 शमौन पतरस खडोई करी अगग तपा दा था, तालू उस सोगी खडोटयो लोकां उसयो पुछया की, “कुथी तू भी तां उदे चेलयां चे तां नी है?” उनी बोलया, “मैं नी है।” 26 महायाजक दे नोकरां चे इकी नोकरे, जडा उदा रिशतेदारां चे था, कने उदा कन पतरसे बडी दितया था, उनी बोलया की तिजो तां मैं यीशुए सोगी बागे च नी दिखया था? 27 पतरसे फिरी मना करी दिता, कने तालू झट मुर्गे बांग देई दिती। 28 फिरी यहदी लोक यीशु जो कैफा बाल लेई आए कने किल्ले जो लेई गे, ऐ रोमी राज्यपाल पिलातुस दा मेहल था, कने ब्यागा दा बकत था पर सै अपु किले अंदर नी गे अगर जांदे तां उना अशुद्ध होई जाणा था, क्योंकि पिलातुस यहदी नी था। अगर अशुद्ध होई जांदे तां फसह दी रोटी नी खाई सकदे थे। 29 तालू पिलातुस बाहर निकली करी उना बाल आया कने बोलणा लग्गा, “तुसां इस माणुए पर कुसा गल्लां दा आरोप लगा दे न?” 30 उना उसयो जबाब दिता, अगर ऐ अपराधी माणु नी होंदा तां असां इसयो तेरे बाल नी लोंदे। 31 पिलातुसे उना जो बोलया, “तुसां ही इसयो लेईजाई करी अपणिया व्यवस्था दे अनुसार इसयो सजा दिया।” यहदी अगुवां उसयो बोलया, “की सांझो कोई हक नी है की असां कुसी जो मौत दी सजा देई सकन।” 32 ऐ इस तांई होया की यीशु दी सै गल्ल पूरी हो जडी उनी ऐ इशारा करदे बोली थी मेरी मौत कियां कुस तरीके ने होणी है। 33 तालू पिलातुस फिरी किल्ले दे अंदर गया, कने यीशुए जो अंदर सदीकरी पुछया, “तू क्या यहदी लोकां दा राजा है?” 34 यीशुए जबाब दिता, “तू क्या ऐ गल्ल अपणिया तरफा ला बोला दा है, की कुनी होरनी ऐ गल्ल तिजो मेरे बारे च बोली है?” 35 पिलातुसे जबाब दिता, “तू जाणदा है की मैं यहदी नही है?”

तेरिया ही जाति कने बड़े याजकां तिजो मेरे हथे दितया है, तू क्या कितया है?” 36

यीशुऐ जबाब दिता, मेरा राज्य इस संसारे दा नी है, अगर मेरा राज्य इस संसारे दा होदा तां मेरे चेलयां लड़णा था, कने मै यहदी अगुवां दे हथे गिरफ्तार नी होदा: पर मेरा राज्य ऐथू दा नी है। 37 पिलातुसे उसयो बोलया, तू क्या राजा है? यीशुऐ जबाब दिता, “तू बोलदा है, की मै राजा है, मेरा जन्म लेणा कने संसार च ओणे दी बजा ऐ है की मै सच्च दे बारे च सिखाई सके। जड़ा कोई परमेश्वरे ने सच्चा प्यार करदा है, कने मेरा बचन सुणदा है।” 38 पिलातुसे उसयो बोलया, “सच्च क्या है?” ऐ बोली करी सै फिरी यहदी अगुवां बाल चली गया कने उना ने बोलया, “मिंजो उदे च कोई भी दोष नी लग्गा दा है। 39 पर तुहाडा ऐ रिबाज है की मै फसह दे त्योहारे च तुहाडे तांई इक कैदी छडी दें। तुसां क्या चांदे न की मै तुहाडे तांई यहदियां दे राजे जो छडी दें?” 40 तालू उना फिरी जोरे ने बोलया, “इसयो नी, पर साडे तांई तू बरअब्बा जो छडी दे।” कने बरअब्बा इक डाकू था।

19 इसा गल्ला पर पिलातुसे सिपाईयां जो हुकम दिता की यीशुऐ जो लेई जा कने कोडे मारा। 2 कने सिपाईयां कंडयां दा मुकट बणाया कने उदे सिरे पर रखया, कने उसयो बैगणी कपड़े पेनाऐ, 3 कने उदे बखे आई करी बोलणा लग्गे, नमस्ते, यहदियाँ दे राजा कने उसयो थपड़ मारे। 4 तालू पिलातुसे फिरी बाहर निकली करी लोंका ने बोलया, “मै उसयो तुहाडे बाल फिरी लोंदा है, ताकि तुहांजो पता लग्गे की मिंजो इदे च कुछ भी गलत नजर नी आया।” 5 तालू यीशुऐ जो कंडयां दा मुकट कने बैगणी कपड़े पेनाइ करी बाहर लांदा कने पिलातुसे उना ने बोलया, “इस माणुऐ जो दिखा।” 6 जालू बड़े याजकां कने मंदरे दे रखबालयां उसयो दिखया, तां चीलाई करी बोलया, “इसयो सूली पर चढ़ा, सूली पर चढ़ा!” पिलातुसे उना जो बोलया, “तुसां ही इसयो सूली पर चढ़ा, क्योंकि मिंजो इदे च कुछ भी गलत नी मिल्ला है।” 7 यहदी अगुवां उसयो जबाब दिता, “साड़ी भी व्यवस्था है कने उसा व्यवस्था दे अनुसार सै मारी देणे दे जोगा है क्योंकि उनी अपने आपे जो परमेश्वरे दा पुत्र बोलया है।” 8 जालू पिलातुसे ऐ गल्ल सुणी तां सै होर भी जादा डरी गया। 9 कने फिरी किले दे अंदर गया कने यीशुऐ जो बोलया, “तू कुथु दा है? पर यीशुऐ उसयो कोई भी जबाब नी दिता।” 10 पिलातुसे उसयो बोलया, “मिंजो ने कनी बोला दा है? क्या तू जाणदा नी की तिजो छड़णे दा हक मिंजो है कने तिजो सूली पर चड़ाणे दा हक भी मिंजो है।” 11 यीशुऐ जबाब दिता,

“अगर तिजो परमेश्वर दिया तरफा ला नी दितया होंदा, तां तेरा मिंजो पर कोई हक नी होंदा, इस ताई जिनी मिंजो तेरे हथे पकड़ाया है, उदा पाप जादा है।” 12 ऐ जबाब सुणीकरी पिलातुसे उसयो छडणा चाया, पर यहदियां चीलाई-चीलाई करी बोलया, “अगर तू इसयो छडी दिगा तां तू महाराजा कैसरे दा मित्र नी है; जडा कोई भी राजा होणे दा दाबा करदा है कने अपने आपे जो राजा बोलदा है सै महाराजा दा दुश्मण है।” 13 ऐ गल्लां सुणीकरी पिलातुस यीशुऐ जो बाहर लेई आया कने न्याय दे सिंहासने पर बैठा, कने सै जगा इक चबूतरा था जिसयो इब्रानी भाषा च गब्बता बोलदे न। 14 ऐ फसह दे त्योहारे दे हफ्ते सबते दिया तयारियां दा रोज था कने दोपहर दे बकते: तालू उनी यहदी लोकां जो बोलया, “ऐ ही है, तुहाडा राजा।” 15 पर सै चिलाणा लग्ये, इसयो मारी दे, इसयो मारी दे! कने इसयो सूली पर चढा। पिलातुसे उना जो बोलया, क्या मैं तुहाडे राजे जो सूली पर चढा? बड़े याजकां जबाब दिता, “महाराजा जो छडी करी साड़ा होर कोई राजा नी है।” 16 तालू पिलातुसे यीशुऐ जो उना दे हबाले करी दिता ताकि सै उसयो सूली पर चडाण। 17 तालू सै यीशुऐ जो लेई गे। उना यीशुऐ ला अपणी सूली अपु चुकबाई कने उसयो यरूशलेम शेर दे बाहर खोपड़ी नाऐ दिया जगा जो लेई गे, कने जिसयो इब्रानी भाषा च गुलगुता बोलदे न। 18 ओथु उना उसयो कने उदे सोगी दो माणुऐ जो सूली पर चढाया, इकी जो इक पास्से कने, दुजे जो दुऐ पास्से, कने बिच यीशुऐ जो। 19 कने राज्यपाल पिलातुसे इक्की फटिया पर लिखी करी सूलिया पर लगाई दिती कने उसा पर ऐ लिखया था, “नासरत दा यीशु मसीह यहदियाँ दा राजा।” 20 ऐ फट्टी मते यहदियाँ पढी क्योकि जिथू यीशुऐ जो सूली पर चढाया था सै जगा यरूशलेम शेर दे बखे थी कने इब्रानी भाषा च कने लतीनी भाषा कने यूनानी भाषा च लिखियो थी। 21 तालू यहदियाँ दे बड़े याजक पिलातुसे बोलया, “यहदियां दा राजा मत लिख पर ऐ की उनी बोलया, मैं यहदियाँ दा राजा है।” 22 पिलातुसे जबाब दिता, “मैं जडा लिखी दितया है, सै नी बदलया जाणा है।” 23 जालू सिपाई यीशुऐ जो सूली पर चडाई बैठे, तां उदे कपडे लेईकरी उना चार हिसयां च किते, चारो सिपाईयां ताई इक-इक हिसा कने कुरता भी लेई लिया, पर कुरते जो सितया नी था पर सै उपरे लेईकरी थले दीकर इक ही कपडे ने बुणया था। 24 इस ताई उना अपु चे बोलया, “असां ऐ नी फाडना, पर इदे पर पर्चियां पांदे न की ऐ कुसदा होणा।” ऐ इस ताई होया, ताकि पबित्र शास्त्रे च लिखया गया सच्च

हो, “उना मेरे कपड़े अपु चे बंडी ले कने मेरे कपड़यां पर पर्चियां पाईयां, कने सिपाईयां इयां ही किता।” 25 पर यीशुए दे सूली बाल उदी माता कने उदिया माता दी बेहण, क्लोपास दी घरे बाली मरियम कने मगदल ग्रां दी मरियम खडोतियो थी। 26 यीशुए अपणिया माता जो कने उस चेले जो जिसने सै प्यार रखदा था उसयो बखे खडोतया दिखीकरी अपणी माता ने बोलया, “हे नारी, दिख, ऐ तेरा पुत्र है।” 27 तालू उनी चेले बोलया, “ऐ तेरी माता है।” कने उसी बेले सै चेला, उसा जो अपणे घरे लेई गया। 28 इदे बाद यीशुए ऐ जाणी करी की मेरा सारा कम्म खत्म होई गया है; इस ताई की पबित्र शास्त्रां दियां गल्लां सच्च साबित होन बोलया, “मैं तरिणा है।” 29 ओथु इक सिरके ने बस्या बांडा रखया था, तां उना चे कुनकी सिरके ने सेइयो स्पंजे जो जुफे दे स्खे दे डंडे पर रखीकरी उदे मुए ने लाया। 30 जालू यीशुए सै सिरका चखया, तां बोलया, “पूरा होया,” कने सर झुकाई करी अपणे प्राण छडी दिते। 31 हुण ऐ तैयारिया दा दिन था, कने अगले दिन सब्त कने फसह दोनों ही थे। ऐ यहूदी लोकां ताई इक खास दिन था, सै नी चांदे थे इस दिने लाशा सूली उपर रेन। इस ताई उना पिलातुसे ने बोलया की उना माणुआं दियां जंगा तोडी दिया ताकि उना दी मौत झट होई जा ताकि लाशां जो थले उतारया जाई सके। 32 तां सिपाईयां आई करी पेहले बाले दियां जंगा तोडियां फिरी दुजे दियां भी, जडे यीशुए सोगी सूली पर चढायो थे। 33 पर जालू यीशुए बाल आई करी दिखया की सै मरी गया है, तां उदियां जंगा नी तोडियां। 34 पर सिपाईयां चे इकी बरछे ने उदा पंजर बेधया कने उदे च खून कने पांणी निकलया। 35 जिनी माणुए ऐ सब दिखया, उनी ऐ गबाई दिती है, ताकि तुसां भी यीशुए पर भरोसा करी सकन। कने उदी गबाई सच्ची है, कने सै जाणदा है, की सच्च बोला दा है। 36 ऐ गल्लां इस ताई होईयां की पबित्र शास्त्रे च जडा लिखया है सै सच्च होई जा, “उदी कोई हड्डी नी तोडी जाणी।” 37 फिरी इक होर जगा पबित्र शास्त्र च लिखया है, “जिसयो उना बेधया है, उदे पर नजर करणी।” 38 इना गल्लां दे बाद अरिमतिया शेहरे दे यूसुफे, जडा यीशुए दा चेला था, (पर यहूदी अगुवां दे डरे ने इसा गल्ला जो लुकाई रखदा था), उनी पिलातुसे ने बिनती किती, की मैं यीशुए दिया लाशा जो लेई जां, कने पिलातुसे उदी बिनती सुणी, कने सै आई करी उदी लाशा जो लेई गया। 39 नीकुदेमुस भी जडा पेहले यीशुए बाल राती गया था कने लगबग तेती किलो गन्धरस कने एलवा लेई आया। 40 तालू इना दोनों यीशुए दी

लाश लेई कने यहूदियां दे रिबाजे ने उस पर सै मुस्का बालियां चिंजा लगाई करी कपड़े दियां पट्टियां च लपेटया। 41 उसा जगा पर जिथू यीशु सूली पर चड़ाया था, ओथु इक बारी थी; कने उसा सो बारिया च इक नोई कबर थी, उसा च पेहले कदी कोई नी दफनाया था। 42 इस ताई उना यीशुए जो उसा कबरा दिया गुफा च रखी दिता क्योंकि सै बखे ही थी कने सै यहूदियां दे सब्त दी तैयारिया दा दिन भी था।

20 तुआरे ब्यागा तडके मरियम जडी मगदल गां दी थी, सै कने उसा सोगी होर भी जनानियां कबरा पर आईयां, उना कबरा दे दरबाजे ला पथरे जो हटया दिखया। 2 तालू सै दोड़ी कने शमौन पतरसे कने उसी दुए चेले बाल जिसने प्रभु प्यार रखदा था, आई करी बोलया, “सै प्रभु यीशुए दी लाशा जो कबरा ला कडी लेई गे; कने मै नी जाणदी की उसयो कुथु रखया है।” 3 तालू पतरस कने सै दुज्जा चेला कबरा पासे चली पे। 4 कने दोनो सोगी-सोगी दोड़यो थे, पर दुआ चेला पतरसे ला तेज दौड़ी करी पेहले कबरा पर पुज्जी गया। 5 कने निठा होईकरी अंदर दिखया की ओथु कपड़े दियां पट्टियां दा डेर लगया था: पर सै अंदर नी गया। 6 तालू उदे पिच्छे-पिच्छे शमौन पतरस भी पुज्जी गया कने कबरा दे अंदर गया कने कपड़े पियो दिक्खे। 7 कने सै अंगोछा जडा सिरे पर लपेटया था, सै कपड़े सोगी नी पिया था पर सै इक लग जगा च मिल्ला। 8 तालू दुआ चेला भी जडा कबरा च पेहले पुजया था, अंदरे जो गया कने दिखीकरी भरोसा किता कि यीशु मरयां चे जिन्दा होई गया था। 9 पबित्र शास्त्रां च यीशु दे बारे च ऐ लिखया था की उनी मरणे बाद जिन्दा होणा है, पर सै हले दीकर नी समझी पायो थे। 10 तालू सै चेले अपने घरे जो बापस चली गे। 11 पर मरियम रौंदी होई कबरा दे बाहर ही खड़ोई रेई कने रौंदे-रौंदे कबरा पास्से निठे होईकरी, 12 दो स्वर्गदूतां जो चमकदे कपड़े पाई करी इकी जो सोंदिया कने दुज्जे जो पोंदियां बैठया दिखया, जिथू यीशुए दी लाश रखियो थी। 13 स्वर्गदूतां मरियम ला पुछया, ओ जनानिये, तू कजो रोआ दी है? उनी उना जो बोलया, “सै मेरे प्रभु दिया लाशा जो चुकी लेई गे कने मिंजो नी पता की उसयो कुथु रखया है।” 14 ऐ बोलणे दे बाद सै पिच्छे मुडी कने यीशुए जो खड़ोतया दिखया कने पछेणया नी की सै यीशु है। 15 यीशुए उसा ने बोलया, जनानिये तू कजो रौंदी है? कुसयो तोपा दी है? उना माली समझीकरी उसयो बोलया, “श्रीमान जी, अगर तू उदे शरीर जो चुकया है तां मिंजो दसी दे की कुथु रखया है कने मै उसयो लेई जांगी।” 16 यीशुए उसा जो बोलया, मरियम। उना

उस पासे मुडी करी उसला इब्रानी भाषा च बोलया, गुरू जी। 17 यीशुऐ उसा जो बोलया, “मेरे पैरां च पेईकरी मिंजो मत रोक क्योंकि मैं हले दीकर उपर पिता परमेश्वर बाल नी गया है, कने मेरे चेलयां बाल जाई करी उना जो बोली दे, की मैं अपने पिता, कने तुहाडे पिता, कने अपने परमेश्वर, कने तुहाडे परमेश्वरे बाल उपर चलया है।” 18 मरियम जडी मगदल गां दी थी उना जाई करी चेलयां जो दसया, “मैं प्रभु जो दिखया, कने उनी मिंजो ने गल्लां कितियां।” 19 उसी तुआरे दिया संझा बेले सारे चेले इकी जगा गिठे होए, उना दरबाजे बंद करी ले क्योंकि यहूदी अगुवां ला डरयो थे, तालू यीशु आया कने बिच खडोई करी उना जो बोलया, “तुहांजो शांति मिल्ले।” 20 कने ऐ बोली करी उनी अपने हथां कने पैरां दे जखम दस्से: तालू चेले प्रभु जो दिखीकरी खुश होऐ। 21 यीशुऐ फिरी उना जो बोलया, “तुहांजो शांति मिले; जियां पिता परमेश्वरे मिंजो संसार च भेजया है, तियां ही मैं भी तुहांजो संसारे च भेजा दा है।” 22 ऐ बोली करी उनी उना पर फुंक मारी कने बोलया, “पबित्र आत्मा जो अपनाओ। 23 अगर तुसां कुसी दे पाप माफ करगे, उना दे पाप माफ होए न, कने जिना दे पाप तुसां माफ नी करगे, उना अपने पापां च फसी रेणा है।” 24 पर बाहरां चेलयां चे इक माणु थोमा जिसयो दिदुमुस बोलदे न, जालू यीशु आया तां सै उना सोगी नी था। 25 जालू होर चेले उसला बोलणा लग्गे, असां प्रभु जो दिखया है, तालू उनी उना जो बोलया, “जालू दीकर मैं उदे हथां च मेखां दे जखम कने उना मेखां दे छेदां च कने उदे पसलियां च हथ नी पाई लेंगा, तालू दीकर मैं भरोसा नी करणा की सै मरयां च जिन्दा होई गया है।” 26 अठां रोजा बाद उदे चेले फिरी घरे अंदर थे, कने थोमा उना सोगी था, कने दरबाजे बंद थे, तालू यीशुऐ आई करी कने बिच खडोई करी बोलया, “तुहांजो शांति मिल्ले।” 27 तालू उनी थोमा जो बोलया, अपणिया उंगलियां ने मेरे हथां जो छूईकरी दिख कने अपने हथे जो अगगे करी के मेरियां पसलियां च पा; कने शक करणा बंद कर कने भरोसा कर की मैं मरयां चे जिन्दा होई गया है। 28 ऐ सुणीकरी थोमे जबाब दिता, “मेरे प्रभु जी, मेरे परमेश्वर।” 29 यीशुऐ उसयो बोलया, “तू तां मिंजो दिखीकरी भरोसा किता है। धन्य न सै जडे बिना दिखयो मिंजो भरोसा करदे न।” 30 यीशुऐ होर भी चमत्कार चेलयां दे सामणे दस्से, जडे इसा कताबां च नी लिखयो न। 31 पर ऐ इस ताई लिखयो न, ताकि तुसां भरोसा करन, की यीशु ही

परमेश्वरे दा पुत्र मसीह है: कने उस पर भरोसा करी के उदे नाए ने तुहांजो हमेशा दी जिन्दगी मिल्ले।

21 इना गल्लां दे बाद यीशुए अपने आपे जो तिबिरियास झिला दे बखे चेलयां जो दर्शण दिते कने इस तरीके ने दर्शण दिते। 2 शमौन पतरस कने थोमा जिसयो दिदुमुस बोलदे न, कने गलील प्रदेश दे काना शेहरे दा नतनएल कने जब्दी दे पुत्र, कने उदे चेलयां चे दो जणे होर गिठे होए थे। 3 शमौन पतरसे उना जो बोलया, मै मछियां पकड़ना चलया है। उना उसला बोलया, “असां भी तैरे सोगी चलदे न।” तां सै निकली करी किस्तिया पर चढ़ी गे, पर उसा राती उना कुछ नी पकड़या। 4 अगले दिने ब्याग होंदे ही यीशु कनारे पर खड़ोतया था, पर चेलयां उसयो पछेणया नी की ऐ यीशु है। 5 तालू यीशुए उना जो बोलया, हे मेरे प्यारो, क्या तुहाड़े बाल कुछ खाणे जो है? उना जबाब दिता, “नी।” 6 यीशुए उना जो बोलया, “किस्तिया दे सजे पाससे जाल फेंका, तां मिलणियां।” तालू उना जाल फेंकया, कने हुण मछियां जादा होणे दिया बजा ने उना ला जाल नी खिची होया। 7 इस ताई उस चले ने जिसने प्रभु प्यार रखदा था पतरसे जो बोलया, “ऐ तां प्रभु है।” जालू शमौने ऐ सुणया की प्रभु यीशु है, तां उनी अपने सै कपड़े पाई ले जड़े उनी कम्म करदे बेले उतारी दितयो थे कने पाणिये च छाल देई दिती। 8 पर होर चले डोंगिया पर मछियां ने भरए जाले जो खिज्जी लेई आए, क्योंकि सै कनारे ला जादा दूर नी थे, कोई सो मीटर दूर थे। 9 जालू सै कनारे पर पुज्जे, तां उना कोलयां दिया अग्गी पर मछियां कने उदे बखे रोटियां रखियां दिख्यां। 10 यीशुए उना जो बोलया, “जड़ियां मछियां तुसां हुण पकड़िया न, उना चे थोड़िया लेई ओआ।” 11 शमौन पतरसे डोंगिया पर चढ़ी करी इकसो त्रियूँजा मछियां ने भरया जाल कनारे पर खिचया, कने इतणियां मछियां होंणे ने भी जाल नी फटया। 12 यीशुए उना जो बोलया, “ओआ रोटि खाई लिया।” कने चेलयां चे कुसयो भी होंसला नी होया, की उसला पूछन, तू कुण है? “क्योंकि सै जाणदे थे की ऐ प्रभु ही है।” 13 यीशुए रोटि लेईकरी उना जो दिती, कने तियां ही मच्छी भी दिती। 14 ऐ तिजी बरी है की यीशुए मरी करी जिंदा होणे बाद चेलयां जो दर्शण दिते न। 15 रोटि खाणे बाद यीशुए शमौन पतरसे जो पुछया, हे यूहन्ना दे पुत्र शमौन, क्या तू सच्ची इना बाकियां ला जादा मिंजो ने प्यार करदा है? उनी यीशुए जो बोलया, हां प्रभु; तू तां जाणदा है, की मै तिजो पर भरोसा रखदा है, उनी उना जो बोलया, “मेरे छेलुआं दी

रखबाली कर।” 16 यीशुए फिरी दूजी बरी उसयो पुछया, “हे यूहन्ना दे पुत्र शमौन, क्या तू मिंजो ने प्यार रखदा है?” उनी उसयो बोलया, “हाँ, प्रभु तू तां जाणदा हे की मैं तिजो ने प्यार करदा है?” उनी उसयो बोलया, “मेरियां भेडां दा पुआल बण।” 17 यीशुए तीजी बरी उसयो पुछया, “यूहन्ना दे पुत्र शमौन, क्या तू मिंजो ने प्यार करदा है?” पतरस उदास होई गया, की उनी उसयो तीजी बरी ऐसा बोलया, “क्या तू मिंजो ने प्यार करदा है।” कने उनी बोलया, “प्रभु जी, तू तां सब कुछ जाणदा है की मैं तिजो ने प्यार करदा है।” यीशुए उसला बोलया, “मेरियां भेडां जो चुगा।” 18 “मैं तुसां ने सच्च-सच्च बोलदा है, जालू तू जवान था, तां अपने लक्के जो बन्नी करी जिथू चांदा था, ओथु गुमदा था; पर जालू तू बुडा होइ जाणा, तां तू अपने हथां जो फेलांगा, कने कोई तिजो बन्नी लेंगा कने तिजो ओथु लेई जाणा जिथू तू जाणा नी चांदा।” 19 यीशुए ऐसा ऐ दसणे तांई बोलया की पतरसे कियां मरणा कने परमेश्वरे दी महिमा करणी है; ऐ बोली करी, उसयो बोलया, “मेरा चेला बणी रे।” 20 पतरसे मुडी करी उस चेले जो पिच्छे ओदे दिखया जिसने यीशु प्यार रखदा था। ऐ सै ही है जिनी फसह दी रोटी खाणे बेले यीशुए बखे बेईकरी पुछया था, “प्रभु जी, तिजो पकड़ाणे बाला कुण है?” 21 उसयो दिखीकरी पतरसे यीशुए जो बोलया, “प्रभु जी, इदे सोगी क्या होणा है?” 22 यीशुए उसयो बोलया, “अगर मैं चां की सै मेरे ओणे दीकर जिन्दा रे, तां तिजो क्या? तू मेरा चेला बणी रे।” 23 तांई तां भाईयां च ऐ गल्ल फेली गेई की उनी दुज्जे चेले नी मरणा है; तमी यीशुए उसयो ऐ नी बोलया, की इनी नी मरणा है, पर ऐ की “अगर मैं चां की ऐ मेरे ओणे दीकर जिन्दा रे, तां तिजो इसला क्या?” 24 जिनी माणुए ऐ सब कुछ दिखया, उनी ऐ गबाई दिती है, ताकि तुसां भी यीशु पर भरोसा करी सकन। कने उदी गबाई सच्ची है। कने असां जाणदे न की सै सच्चाईया ने बोलदा है। 25 यीशुए होर भी मते कम्म किते, अगर उना सारे कम्मा जो लिखया जांदा, तां मिंजो लगदा की सारे संसार च इतणी भी जगा नी होणी थी की उना सारियां कताबां जो रखी सके।

प्रेरितां दे कम्म

1 प्रिय थियुफिल्स, मैं अपणिया पेलिया कताबा च उना सारियां गल्लां दे बारे च दसया है, जडियां यीशुए स्वर्ग च जाणे ला पेहले करणा कने सिखाणियां शुरू कीतियां। **2** पर परमेश्वरे दे जरिये यीशुए जो स्वर्ग च चुकणे ला पेहले, यीशुए दुख झेले कने मरी गया। उनी मते पक्के सबुतां ला उनी अपणे आपे जो जिन्दा दसया, कने चालियां रोजां दीकर सै उना चुणयां चेलयां जो मिलदा रिया, कने परमेश्वरे दे राज्य दियां गल्लां करदा रिया। यीशुए पबित्र आत्मा दिया सहायता ला प्रेरितां जो हुकम दिता कने उदे बाद परमेश्वरे उसयो स्वर्ग च चुकी लिया। **4** इक बरी यीशुए चेलयां ला मिली करी उना जो हुकम दिता की, “यरूशलेमे शेहरे ला बाहर मत जांदे, पर उस दान दी नियाल रखा जडा मेरे पिता परमेश्वरे तुहांजो देंगे दा बायदा कितया था, तुसां मिंजो उदे बारे च पेहले भी बोलदे सुणया है। **5** यहन्ने तां पाणिऐ ला बपतिस्मा दितया है, पर थोड़े रोजा बाद परमेश्वरे तुहाड़े सोगी रेणे तांई पबित्र आत्मा जो भेजणा।” **6** बादे च जालू प्रेरित दोबारा यीशुए जो मिल्ले, तां उना यीशुए जो पुछया, “प्रभु जी, क्या तू हुण ही इस बकत इस्राएले जो रोमियां दी गुलामी ला अजाद करणे कने साड़े राज्य जो फिरी ला बसाणे दी योजना बणा दा है?” **7** यीशुए उना जो बोलया, “ऐ सारियां चिंजा कालू होणियां कने कुस बकत होणियां, ऐ सब कुछ तय करणे दा हक सिर्फ मेरे पिता परमेश्वर जो है, ऐ सब कुछ जाणने दी तुहांजो जरूरत नी है। **8** पर जालू पबित्र आत्मा तुहाड़े पर ओणा तालू तुहांजो शक्ति मिलणी; कने यरूशलेम शेहरे च कने सारे यहूदिया कने सामरिया प्रदेशां च, कने संसारे दियां हर जगा दे लोकां मेरे बारे च गबाही देंगी है।” **9** ऐ बोली करी उना दे दिखदे-दिखदे ही परमेश्वर यीशुए जो स्वर्ग च लेई गया, कने इक बदले दिया बजा ला सै उसयो दिखी नी सके। **10** उदे जांदे बेले जालू सै अम्बरे पास देखा दे थे, तां अचानक दो माणु चिट्टे कपड़े पाई करी उना बखे प्रगट होए। **11** कने बोलणा लग्गे, “हे गलीली प्रदेशे दे माणुआं, तुसां कजो खडोई करी अम्बरे पास देखा दे न? ऐई यीशु, जिसयो परमेश्वर स्वर्ग लेई गया है, जियां तुसां उसयो स्वर्ग जांदे दिखया तियां ही उनी फिरी ओणा है।” **12** ऐ सारियां गल्लां जैतुन नाए दे पहाड़े पर होईयां जडा यरूशलेम शेहरे ला लगभग इक किलो मीटर दिया दुरिया पर था कने प्रेरित पहाड़े ला यरूशलेम शेहरे जो बापस आई गे। **13** कने जालू प्रेरित शेहरे च पुज्जे तां सै उपरे बाले कमरे च गे, जिथू सै रे दे थे। जडे

प्रेरित ओथु मोजूद थे सै ऐ न पतरस कने यूहन्ना कने याकूब कने अन्दियास कने फिलिप्पुस कने थोमा कने बरतुल्मै कने मत्ती कने हलफईऐ दा पुत्र याकूब, शमौन जडा क्रान्तिकारी था कने याकूब दा पुत्र यहूदा थे। 14 ऐ सारे हमेशा गिठे होंदे थे कने सारे इक मन होईकरी लगातार प्राथना करदे थे। उना चे यीशु दे भाई कने यीशुऐ माता मरियम कने कुछ जनानियां भी थियां जिना यीशुऐ दी सहायता कितियो थी। 15 कने उना रोजां च इक रोज, जालू लगभग इक सौ बी मसीह भाई बेहण गिठे थे, तां पतरस उना दे बिच खडोई करी बोलणा लग्गा। 16 हे मसीह भाईयो बेहणो, पबित्र आत्मा बडे पेहले राजा दाऊदे दे जरिये यहूदा दे बारे च दसया था, जिनी यीशुऐ जो गिरफ्तार करणे बालयां दी अगुवाई किती। ऐ जरूरी था की यहूदा दे बारे च पबित्र शास्त्रे च लिखया लेख पूरा हो। 17 बेशक यहूदा सांझो चे इक था, कने इसा सेवकाईया च भी हिस्सेदार बणया। 18 जियां की तुसां जाणदे न की उस पेसे ला जडे यहूदा यीशुऐ जो चलाकिया ला पकड़ाणे तांई लियो थे, उनी उस पेसे ला इक खेतर लिया। जालू यहूदा फा लेई लिया तां सै थल्ले सिरे भार पेई गिया कने उदा पेट फटी गिया, कने उदियां सारियां आंतडियां बाहर आई गियां। 19 कने इसा गल्ला दे बारे च यरूशलेम शेहरे दे सारे लोकां जो पता लगी गिया, इस तांई सै लोक उस जगा जो अपणी भाषा च हलकदमा मतलब की खूने दा खेतर बोलणा लगी पे। 20 क्योंकि राजा दाऊदे भजन संहिता दिया कताबा च लिखया है, “उदा घर उजड़ी जा कने उस घरे च कोई नी बसे,” कने राजा दाऊदे दुज्जी जगा च ऐ भी लिखया है की, “उदी जगा कोई होर लेई ले।” 21 इस तांई ऐ जरूरी है की प्रभु यीशु जो मरयां चे जिन्दे होणे दा, साडे सोगी गबाह बणने तांई इक माणुऐ जो चुणयां जा। सै माणु ऐसा होणा चाईदा जडा प्रभु यीशु दे सारे कम्मा दे बकते च मतलब की प्रभु यीशु जो यूहन्ना ला बपतिस्मा लेणे ला लेईकरी उसयो स्वर्गे च जाणे दीकर साडे सोगी था। 23 तालू उना दो जणयां जो खरेडया इक यूसुफे जो, जिसयो बरसब्बास बोलदे न, जिदा दुआ ना युसतुस है, कने दुआ मत्तियाह जो। 24 कने ऐ बोली करी प्राथना किती, “प्रभु जी, तू तां सारयां दे मना जो जाणदा है, ऐ प्रगट कर की इना दो जणयां चे तू कुण चूणया है, 25 की सै इस सेबा दे कम्मे जो कने उस प्रेरित दी सै खाली जगा ले, जिसा जगा जो यहूदा छडी करी चली गिया जिथू उसयो जाणा चाईदा।” 26 तालू उना दोनो दे बारे च

चिठियां पाईयां, कने चिट्ठी मलियाह दे नाए दी निकली, कने सै उना गयारां प्रेरितां दे सोगी गिणया गया।

2 जालू यहूदियां दे पिन्तेकुस्ते त्योहारे दा दिन आया, तां सारे भरोसा करणे बाले इकी जगा पर गिठे थे। **2** तालू अचानक अम्बरे ला इक अबाज सुणोई, सै अबाज तेज होआ सांई थी, कने उसा ने सारा घर जिथू सै बैठयो थे गूंजी पिया। **3** तालू उना दे सामणे अग्गी सांई चीजां दा झण्ड प्रगट होया जडा जीभा दे अकारे दा लगा दा था, जडा लग होईकरी उना चे हर इक माणुए पर स्कदी गई। **4** कने सै सारे पबित्र आत्मा ला भरूई गे, कने जियां ही पबित्र आत्मा उना जो बोलणे दी शक्ति दिती, सै होर-होर भाषा च बोलणा लग्गे। **5** उस बकत परमेश्वरे दा डर मनणे बाले केई यहूदी थे, जडे की संसारे दे हर इक देशे ला त्योहारे मनाणे तांई आयो थे कने यरूशलेम शेहरे च रेंदे थे। **6** जालू उस तेज होआ दी अबाज होई थी तां भीड़ लगी गई कने लोक हेरान होई गे, क्योंकि हर इक अपणी-अपणी भाषा च चेलयां जो बोलदे सुणा दे था। **7** कने सै सारे हेरान होईकरी बोलणा लग्गे, “दिखा, ऐ जडे लोक इस तरिके ला बोला दे न ऐ गलील प्रदेशे दे बासी न।” **8** तां ऐ क्या होआ दा है, जडा सांझो चे हर इक जणा इना जो अपणी-अपणी बोली च गल्लां करदे होये सुणा दे है। **9** असां चे कुछ लोक पारथी इलाके ला न; कने कुछ मेदी कने कुछ लोक एलामी कने मेसोपोटामिया कने यहूदिया प्रदेशे कने कप्पदूकिया कने पुन्तुस कने आसिया प्रदेश, **10** कने फ्रूगिया कने पंफूलिया कने मिस्र देश कने लीबिया देशे कुछ इलाकयां दे न। जडे कुरेने शहर दे बखे न, कने इना सारे देशां दे रेणेबाले कने रोम शहर ला ओणे बाले लोक, **11** मतलब की क्या यहूदी, कने क्या ही होर जातियां दे लोक जिना यहूदी धर्म अपनाई लिया था, क्रेती टापू दे लोक कने अरबी देश दे लोक भी न, पर अपणिया-अपणिया बोलिया च उना ला परमेश्वरे दे चमत्कारी कम्मा दी चर्चा सुणदे न। **12** कने सै सारे हेरान होए, कने उना जो समझ नी ओआ दा था की क्या होआ दा है। **13** पर केईयां मजाक करदे होए बोलया, “सै तां नोईया शराबा दे नशे च न।” **14** पतरस उना गयारां प्रेरितां सोगी खडोता, कने जोरे ला बोलणा लग्गा, “तुसां लोक जडे साडे सांई यहूदी न कने यरूशलेम शेहरे दे बासियों, मेरियां गल्लां ध्याने ला सुणा मै तुहांजो दसदा है की इसा घटना दा क्या मतलब है। **15** तुहांजो लगदा है की असां नशे च न, पर असां नशे नी न क्योंकि हले तां ब्यागा दे नौ बजे न। **16** पर ऐ चमत्कार जडा साडे सोगी होया है,

ऐ उसा गल्ला जो पूरा करदा है, जड़ी योएल परमेश्वरे दा संदेश देणेबाले दे जरिये पबित्र शास्त्र च परमेश्वरे बोलियो है: 17 परमेश्वर बोलदा है की, ‘आखरी दिना च ऐसा होणा है, की मैं अपनी आत्मा सारे माणुऐ जो देणी है कने तुहाड़े पुत्रां कने कुड़ियां भविष्यवाणियां करणियां, कने तुहाड़े जवाना दर्शण दिखणे कने तुहाड़े बुढ़े मर्दा सुपने दिखणे।’ 18 उना दिना च मैं अपने नोकरां कने नोकराणियां जो अपनी आत्मा देणी, कने उना भविष्यवाणी करणी। 19 कने मैं उपर अम्बरे च अनोखे कम्म, कने थले धरतिया पर चमत्कार, मतलब की खून कने अग्न कने धूँऐ दे बदल दसणे। 20 प्रभु दा दिन ओणे ला पेहले सूरजे नेहरा होई जाणा कने चांदे खूने सांई होई जाणा। सै दिन महान कने तेजस्वी दिन होणा। 21 कने जड़ा कोई प्रभुऐ दा ना लेंगा, उदा उद्धार होणा।” 22 हे इस्राएल दे लोको इना गल्लां जो सुंगा: परमेश्वरे नासरत दे यीशु मसीह दे जरिये चमत्कार कने अनोखे कम्म किते कने तुसां अपु जाणदे न की ऐ सच्च है। इयां करिरी परमेश्वरे तुसां जो दसया की यीशु परमेश्वरे दा भेजया माणु है। 23 उसयो ही, जालू सै परमेश्वरे दी बणाईयो योजना कने पेहले ला ही ज्ञाने दे अनुसार पकड़ाया गया, तां तुसां उसयो बुरे लोकां दे हथां ला किल्लां ठोकी करी सूली पर चढ़ाई करी मारी दिता। 24 फिरी भी परमेश्वरे उसयो मरणे दे बाद फिरी ला जिन्दा करी दिता। यीशु मरी गया था पर परमेश्वरे उसयो मुर्दा रेणे ला बचाई लिया क्योंकि उदे तांई मरया रेणा संभव नी था। 25 क्योंकि राजा दाऊद यीशुऐ दे बारे च बोलदा है, “मैं प्रभु जो हमेशा अपने सामणे दिखदा रिया क्योंकि सै मेरे सजे पास्से है, ताकि मैं उना लोकां ला नी डेरें जड़े मिंजो नुक्सान पूजाणा चांदे न। 26 मेरा मन बड़ा खुश होया, कने मैं खुशिया ला बोलदा है; कने मेरे शरीर जो भी आस लग्गी रेणी। 27 क्योंकि तू मिंजो मुर्दा नी रेणा देणा। कने ना ही अपने पबित्र जण दिया लाशा जो सड़ना देणा। (Hades 986) 28 तू मिंजो जिन्दगिया दा रस्ता दसया है; तू मिंजो अपणिया मोजुदगी च खुशिया ला भरी देणा।” 29 “हे मसीह भाईयो, मैं उस कुलपति राजा दाऊदे दे बारे च पुरिया हिम्मत ला बोली सकदा है की सै मरी गया है कने दबया भी है कने उदी कबर अजे दीकर भी साड़े बिच है। 30 सै परमेश्वरे दा संदेश देणेबाला भी था, कने सै जाणदा था की परमेश्वरे मिंजो ने कसम खाई करी बायदा कितया है, ‘मैं तेरे बंशे चे इकी माणुऐ जो तेरे सिंहासने पर बठांगा।’” 31 ऐ जाणी करी की भविष्य च परमेश्वर क्या करणा जा दा था, राजा दाऊदे यीशु मसीहे जो मरणे बाद जिन्दा होणे

दी गल्ल किती है। उनी बोलया ना तां उनी उसयो मुर्दा रेणा दिता, कने ना ही अपणे पबित्र जण दिया लाशा जो सडना दिता। (Hadēs g86) 32 इसी यीशुए जो परमेश्वरे जिन्दा किता, जिदे असां सारे गबाह न। 33 हुण सै स्वर्गे च परमेश्वरे दे सजे हथे सबना ला बड्डे इज्जता दे पदे पर बैठया है। कने पिता परमेश्वरे जदिया उसला बायदा कितया था, उनी अपणा पबित्र आत्मा यीशुए जो दिता कने यीशुए उदारता ला सै पबित्र आत्मा सांझो दिता है, जियां की तुसां अज दिखदे कने सुणदे न। 34 क्योंकि राजा दाऊद यीशु मसीह सांई शरीरि च स्वर्गे पर नी चढया; पर सै अपु ही बोलदा है, प्रभु परमेश्वरे मेरे प्रभु ला बोलया; मेरे सजे पास्से बैठ, 35 जालू दीकर मै तेरे दुश्मणा जो तेरे पैरां थले दिया चौकिया सांई नी बणाई दें। 36 इस तांई इस्त्राएले दे सारे लोक इसा गल्ला दे बारे च पका ही जाणी लेन: की परमेश्वरे इसी यीशुए जो जिसयो तुसां सूली पर चढाया, उसयो प्रभु भी कने मसीह भी बणाया। 37 जालू लोकां ऐ सुणया तां उना अपणे आपे जो दोषी महसूस किता, कने सै पतरस कने बाकी प्रेरितां ला पृछणा लग्गे, “हे मसीह भाईयो, असां क्या करन?” 38 पतरसे उना जो बोलया, “मन बदला, कने तुसां सारे अपणे-अपणे पापां दी माफी तांई यीशु मसीह दे नाए ला बपतिस्मा लिया; तां तुसां जो पबित्र आत्मा दा दान मिलणा। 39 क्योंकि ऐ प्रतिज्ञा तुसां, कने तुहाडिया ओलादा कने उना सारे दुरे-दुरे दे लोकां तांई भी है जिना जो साडे प्रभु परमेश्वरे अपणे बाल सदया।” 40 पतरसे होर भी मतियां गल्लां दी गबाई देईकरी उना जो समझाया कने बिनती किती की अपणे इस्त्राएली साथियां सांई मत बणा जडे परमेश्वरे पर भरोसा नी करदे कने परमेश्वरे ला बिनती करा की सै तुहांजो बचाए। 41 कने जडा कुछ पतरसे बोलया, उस पर जिना भरोसा किता कने उना बपतिस्मा लिया; कने उसी दिने लगभग तिन जार माणु उना ने शामिल होई गे। 42 कने सै प्रेरितां ला शिक्षा लेंगे च, उना सोगी संगती रखणे च, प्रभु भोज कने प्राथना करणे च लीन रेणा लग्गे। 43 कने प्रेरित जडे अनोखे कम्म कने अनोखे चमत्कार करदे थे, इना ला यरूशलेम शहर दे लोक डरे कने हेरान होए। 44 कने सै सारे भरोसा करणे बाले गिठे रेंदे थे, कने जडा कुछ भी उना बाल होंदा था सै सब कुछ सांझा करदे थे। 45 कने सै अपणिया-अपणिया जगा जमिना कने समाने जो बेची करी जदेई जिसयो जरूरत होंदी थी उसयो बंडी दिन्दे थे। 46 कने सै हर रोज इक मन होईकरी मंदरे च गिठे होंदे थे, कने रोटी खाणे तांई कने प्रभु भोज तांई इक दुज्जे दे घरे साफ मने ला खुशिया ला गिठे होंदे

थे। 47 कने परमेश्वरे दी स्तुति करदे थे, कने सारे लोक उना ला खुश थे; कने जिना दा उद्धार होंदा था, उना जो प्रभु हर रोज उना च मिलाई दिन्दा था।

3 इक दिन पतरस कने यूहन्ना दोपहर दे तिन बजे प्राथना दे बेले मंदरे जो चलथो थे। 2 कने लोक इकी जन्म ला ही लंगड़े जो लोआ दे थे, जिसयो सै रोज ही मंदरे दे उस दरबाजे बाल बैठाई दिन्दे थे जिसयो सुंदर दरबाजा बोलदे न, ताकि सै मंदर जाणे बालयां ला भीख मंगी सके। 3 जालू उनी पतरस कने यूहन्ना जो मंदरे च जांदे दिखया, तां उनी उना ला भीख मंगी। 4 पतरसे कने यूहन्ने उदे पास्से ध्याने ला दिखीकरी बोलया, “साडे पास्से दिख।” 5 सै उना ला कुछ मिलणे दी आसा च उना पास्से दिखणा लग्गा। 6 तालू पतरसे बोलया, “चांदी कने सोना तां साडे बाल है नी, पर जड़ा मेरे बाल है सै तिजो दिन्दा है; नासरत दे यीशु मसीह दे नाए ला उठ कने चल फिर।” 7 कने पतरसे उदा सजा हथ पकड़ी करी उसयो उठाया; कने झट उदे पैरा कने गोडयां च जोर आई गया। 8 कने सै उछली करी खडोई गया, कने चलणा फिरणा लगी पिया; कने चलदा, कने छलांगा मारदे परमेश्वरे दी स्तुति करदा होया उना सोगी मंदरे दे अंगणे च गया। 9 सारे लोकां उसयो चलदे फिरदे कने परमेश्वरे दी स्तुति करदे दिखीकरी, 10 उसयो पछेणी लिया की सै ही लंगड़ा भिखारी है, जड़ा मंदरे दे सुंदर दरबाजे पर बेईकरी भीख मंगदा था; कने इसा घटना ला जड़ी उदे सोगी होईयो थी, बड़े हेरान होए। 11 सै उस ओसारे च थे जिसयो सुलैमान दा ओसारा बोलदे न, कने सै लंगड़ा भिखारी जड़ा ठीक होई गया था सै पतरस कने यूहन्ने दा साथ नी छडा दा था। सै सारे लोक उना पासे दौड़े कने उसयो दिखीकरी बड़े हेरान होए। 12 ऐ दिखीकरी पतरसे लोकां जो बोलया, हे इस्राएलियां, तुसां इस माणुए पर कजो हेरान होआ दे, कने साडे पास्से कजो घुरा दे न, जियां मन्ना की असां ही अपणिया भक्तिया कने शक्तिया ने इसयो चलणे फिरणे जोगा बणाई दितया है। 13 साड़ा परमेश्वर कने जड़ा अब्राहम, इसहाक, याकूब, कने साडे पूर्वजां दा भी परमेश्वर है उनी अपने सेवक यीशुए दी महिमा किती, पर तुसां यीशुए जो मरवाणे तांई रोमी अधिकारियां बाल पकड़ाई दिता, कने जालू पिलातुसे उसयो छडणे दा बिचार किता, तालू तुसां उदे सामणे यीशुए जो नकारी दिता। 14 तुसां यीशु मसीह जो नी अपनाया, जड़ा पबित्र कने धर्मी था। कने तुसां पिलातुसे ला चांदे थे की इक हत्यारे जो तुहाड़े तांई छडी दिया। 15 कने तुसां उसयो जड़ा हमेशा दी जिन्दगी दिन्दा है मारी दिता, पर परमेश्वरे उसयो फिरी ला

जिन्दा किता, कने इसा गल्ला दे असां गबाह न। 16 यीशुऐ दे नाऐ पर भरोसा करणे दे जरिये ही इस माणुऐ जो ताकत मिल्ली है, जिसयो तुसां जाणदे न कने हुण तुहाड़े सामणे है। ऐ यीशु दा ना है कने जड़ा भरोसा उदे जरिये ओंदा है जिनी उसयो बिलकुल ठीक-ठाक करी दितया है, जियां की तुसां अपु भी दिखी सकदे न। 17 कने हे भाईयो, मै जाणदा है की जालू तुसां कने तुहाड़े अगुवां यीशु मसीह जो मारी दिता तालू तुसां उदे बारे च अनजाण थे की सै कुण था। 18 पर जिना गल्लां जो सारे परमेश्वरे अपने संदेश देणेबाले दे जरिये पेहले ही दसया था, की उदे मसीह जो दुख होणा कने सै मारी देणा है; तुहाड़े जरिये परमेश्वरे इना गल्लां जो पूरा करी के दसया। 19 इस ताई मन बदला कने परमेश्वर बाल बापस ओआ ताकि तुहाड़े पाप मिटी जान, तालू परमेश्वरे दिया तरफा ला आत्मिक शान्ति दा बकत ओणा। 20 कने उनी यीशुऐ जो भेजणा, जड़ा सै मसीह है जिसयो परमेश्वरे तुहाड़े ताई चुणया है। 21 यीशुऐ दा स्वर्गे च रेणा उस बेले दीकर जस्री है जालू परमेश्वर उना सारियां चिंजा जो नोआ बणाई दीगा जड़ियां उनी बणाईयां न। बड़े बकत पेहले परमेश्वरे लोकां जो ऐ दसणे ताई पबित्र परमेश्वरे दे संदेश देणेबाले दे जरिये ऐसा करणे दा बायदा किता। (aiōn g165) 22 जियां की मूसा बोलया, “प्रभु परमेश्वरे तुहाड़े भाईयां चे तुहाड़े ताई मिंजो सांई इक परमेश्वरे दा संदेश देणेबाला भेजणा,” जड़ा कुछ सै तुसां ने बोलगा, उदी सुणनयो। 23 पर हर इक माणु जड़ा उस परमेश्वरे दा संदेश देणेबाले दी नी सुणे, लोकां चे उदा नाश होई जाणा। 24 कने शमूएल ला लेईकरी उदे बाद बालयां दीकर जितणे भी परमेश्वरे दे संदेश देणेबालयां ऐ गल्ल बोली उना सारयां इना दिना दा संदेश दितया है। 25 तुसां सारे परमेश्वरे दे संदेश देणेबालयां दी ओलाद कने उस बायदे दे हिस्सेदार न, जड़ा परमेश्वरे तुहाड़े पूर्वजां ला किता, जालू उनी अब्राहमे जो बोलया, “तेरे खानदाने ला धरतिया दे सारे घरानया जो आशीष मिलणी।” 26 जालू परमेश्वरे अपने सेवक यीशुऐ जो चुणया, कने उनी उसयो सबना ला पेहले तुसां इस्राएली लोकां बाल भेजया, ताकि परमेश्वर तुसां चे हर इक जणे जो पाप दे रस्ते ला दुरे करिरी आशीष दे।

4 जालू पतरस कने यूहन्ना लोकां जो ऐ बोला दे थे, तां याजक कने मंदरे दे रखबालयां दा सरदार कने सदूकी उना बाल आए। 2 क्योंकि सै बड़े गुस्सा होऐ की पतरस कने यूहन्ना लोकां जो यीशुऐ दे बारे च सिखान्दे थे, की जड़े लोक मरी गियो न परमेश्वरे उना जो फिरी जिन्दा करी देणा, जियां उनी यीशुऐ जो मरयां चे

फिरी जिन्दा करी दिता। 3 कने उना पतरस कने यूहन्ना जो गिरफ्तार करी अगले
 रोजे दीकर जेला च रखया क्योंकि संज होई गियो थी। 4 पर संदेश सुणने बालयां
 चे मतयां यीशुए पर भरोसा किता, उना भरोसा करणे बाले माणुआं दी संख्या
 लगभग पंज हजार होई गई। 5 अगले रोजे उना दे सरदार कने यहूदी अगुवे कने
 व्यवस्था जो सिखाणे बाले यरूशलेम शहर च इकी जगा पर गिठे होए। 6 कने जडे
 लोक ओथु गिठे होए उना चे महायाजक हन्ना कने सारे महायाजके दे घराने दे
 लोक, जिना चे कैफा, यूहन्ना, सिकन्दर भी ओथु थे। 7 कने पतरस कने यूहन्ना
 जो बिच खरेडी करी पूछणा लग्गे, “इस माणुए जो ठीक करणे तांई कुनी शक्ति
 कने हक दिता?” 8 तालू पतरसे पबित्र आत्मा ला भरई करी उना जो बोलया, “हे
 लोकां दे सरदारो कने यहूदी अगुवां, 9 असां इक कमजोर माणुए दी भलाई किती
 है, कने अज सांझो ला इदे बारे च पूछताछ करा दे न, की सै कियां ठीक होया।
 10 तां तुसां सब कने सारे इस्राएले दे लोक जाणी लिया की ऐ नासरत दे यीशु मसीह
 दे नाए ला ठीक होया है। इसी यीशुए जो तुसां सूली पर चढाया था, पर परमेश्वरे
 उसयो मरयां चे जिन्दा किता। अज उसी दे नाए ने ऐ माणु तुहाडे सामणे भला चंगा
 खडोतया है। 11 यीशु मसीह सै ही पथर है जिसयो तुसां मिश्रियाँ फेंकी दितया था
 कने सेई पथर कुंणे दा सिरा बणी गिया। 12 यीशु जो छडी करी होर कुसी दुज्जे ला
 उद्धार नी है; क्योंकि स्वर्गे दे हेठ माणुए चे कोई होर दुआ ना नी दितया है, जिसला
 असां उद्धार पाई सकन।” 13 जालू उना पतरसे कने यूहन्ना दी हिम्मत दिखी, कने
 उना जो ऐ पता लग्गा की ऐ पढ्यो लिखयो नी न कने आम माणु न, फिरी उना जो
 ऐहसास होया, ऐ इस तांई है क्योंकि ऐ यीशुए सोगी थे। 14 पर उस माणुए जो
 जडा खरा होया था, पतरस कने यूहन्ना सोगी खडोतया दिखीकरी, सै सभा उना दे
 खिलाफ कुछ नी बोली सकी। 15 पर उना जो महासभा ला बाहर जाणे दा हुकम
 देईकरी, सै अपु चे बिचार बिमर्श करणा लग्गे, 16 “असां इना माणुए सोगी क्या
 करन? क्योंकि ऐ तां साफ है की इना ऐ अदभुत चमत्कार कितया है कने सारे
 यरूशलेम शहर दे रेणे बालयां जो पता है, कने असां ऐ दाबा नी करी सकदे की ऐ
 गल्ल नी होइयो है। 17 पर लोकां च ऐ गल्ल होर जादा नी फेलणा चाइदी, असां
 इना जो धमकाने, की ऐ इसी नाए ला फिरी कुसी माणुए ने गल्ल ना करन।” 18
 तालू उना पतरस कने यूहन्ना जो सदया कने चेताबनी देईकरी बोलया, “यीशुए दे
 नाए ला कुछ नी बोलणा कने ना सिखाणा।” 19 पर पतरस कने यूहन्ने उना जो

जबाब दिता, “तुसां ही न्याय करा, की क्या ऐ परमेश्वरे दिया नजरा च ठीक है, की असां परमेश्वरे दिया गल्लां ला बड़ी करी तुहाडियां गल्लां मनन? 20 क्योंकि ऐ तां सांझो ला होई नी सकदा, की जडा असां दिखया कने सुणाया है, सै ना बोलन।” 21 तालू उना पतरस कने युहन्ना जो दुबारा धमकाया कने छडी दिता। ऐ प्रेरित लोकां बिच मशहूर थे इसा बजा ला उना जो इना प्रेरितां जो सजा देणे दा कोई तरिका नी मिला, इस ताई की जडी घटना होईयो थी उदिया बजा ला सारे लोक परमेश्वरे दी बड़ाई करदे थे। 22 सै माणु, जडा अदभुत चमत्कारे ला ठीक होया था, उदी उग्र चाली सालां ला जादा थी। 23 पतरस कने यूहन्ना छुटी करी अपने साथियां बाल आये, कने जडा कुछ बड़े याजकां कने यहूदी अगुवां उना ने बोलया था, उना जो सुणाई दिता। 24 ऐ सुणीकरी, उना इक मन होईकरी उच्चिया अबाज ला परमेश्वरे ला प्राथना किती, “हे प्रभु, तू ही है जिनी स्वर्ग कने धरती कने समुंद्रे कने जडा कुछ उना च है बणाया है।” 25 तू पबित्र आत्मा ला अपने सेवक कने साड़े पूर्वज राजा दाऊदे दे मुऐ ला बोलया, “होरनी जातियां कजो गुस्सा किता? कने देशां-देशां दे लोकां कजो बेकार गल्लां सोचियां? 26 कने राजा दाऊदे ऐ भी बोलया था की, धरतिया दे राजयां अपने आपयो तैयार करणा, कने हाकिमा, प्रभु कने उदे मसीह दे बिरोध च गिठे होणा।” 27 कने ऐ गल्ल यरूशलेम शेहरे च सच्च होई की तेरे पबित्र सेवक यीशुऐ दे खिलाफ, जिदा तू अभिषेक किता, राजा हेरोदेसे कने पुन्तियुस पिलातुस राज्यपाल भी होर जातियां कने इस्राएलियां सोगी इसी शेहरे च गिठे होए, 28 उना सेई कितया जडा तेरिया शक्तिया कने इच्छा पेहले ही तय करी लिया था की होणा चाईदा। 29 प्रभु जी हुण, उना दियां धमकियां जो सुण कने अपने दासां जो ऐ बरदान दे की तेरा बचन बडिया हिमतां ने सुणान। 30 कने ठीक करणे ताई अपना हथ गां कर ताकि चमत्कार कने अनोखे कम्म तेरे पबित्र सेवक यीशु दे नाऐ ला होन। 31 जालू सै प्राथना करी बैठे, तां सै जगा जिथू सै गठुयो थे हिली पेई, कने सै सारे पबित्र आत्मा ला भरई गे, कने परमेश्वरे दा बचन हिम्मत ने सुणादे गे। 32 भरोसा करणे बालयां दी मंडली इक चित कने इक मने दे थे, उना दा सब कुछ साझे दा था कने ऐथू दीकर की कोई भी अपणिया धन दौलता पर अपना होणे दावा नी करदा था। 33 कने प्रेरित बडिया शक्तिया ला प्रभु यीशुऐ दे मरी करी जिन्दा होणे दी गबाई दिन्दे रे कने उना सारयां पर परमेश्वरे दा बडा अनुग्रह था। 34 कने उना चे कोई भी गरीब नी था, क्योंकि

जिना बाल जमीन या घर थे, सै उना जो बेची करी, बिकियां चिजां दे पैसे लोंदे थे कने उसयो प्रेरितां बाल जमा करवाई दिन्दे थे। 35 कने जदेई जिसयो भी जस्सरत होंदी थी उसयो बंडी दिन्दे थे। 36 कने यूसुफ नाए दा इक माणु था, सै लेवी गोत्र दा था कने साइप्रस टापू ला था। जिदा ना प्रेरितां बरनबास रखया, जिदा मतलब ऐसा माणु जड़ा दुजयां जो प्रोत्साहित करदा है। 37 उदे बाल कुछ जमीन थी, जिसा जो उनी बेचया, कने सै पैसे लोकां जो बंडणे ताई प्रेरितां जो देई दिते।

5 हनन्याह नाए दे इकी माणुए, कने उदिया घरे बालिया सफीरा अपणिया जमिना दा छोटा दिया हिस्सा बेचया। 2 कने हनन्याये जो जडे पैसे बेची करी मिल्ले उदे चे उनी कुछ अपणे ताई रखी लिया; कने ऐ गल्ल उदी घरे बाली भी जाणदी थी कने उना बाकी बचयो पैसे प्रेरितां जो देई दिते। 3 पर पतरसे बोलया, “हे हनन्याह! जड़ा शैताने तैरे मने च पबित्र आत्मा ला झूठ बोलणे दा बिचार पाया है कने तू अपणी बेचियो जमिना दे पैसे चे इक हिस्सा अपणे ताई रखी लिया है?” 4 क्या बेचणे ला पेहले सै जमीन तेरी नी थी? कने जालू जमीन बिकी गई तां उसा दी कीमत क्या तैरे बशे च नी थी? तिजो इस बुरे कम्मे दे बारे च कदी नी सोचणा चाईदा था! तू सांझो ला नी, पर परमेश्वरे ला झूठ बोलया। 5 ऐ गल्लां सुणदे ही हनन्याह जमिना पर पेई गया, कने सै मरी गया; कने जिना भी इस बारे च सुणया सै सारे डरी गे। 6 फिरी जवान माणु आए कने उसयो कफन च लपेटया करी कने बाहर लेईजाई करी दबी दिता। 7 लगबग तिन घंटे बाद उदी घरे बाली अंदर आई, ओथु जड़ा कुछ होया था उसा जो नी पता था। 8 तालू पतरसे उसा जो बोलया, “क्या तुसां दोना सै जमीन इतणे च ही बेचियो थी?” उना बोलया, “हाँ, इतणे च ही।” 9 पतरसे उसा जो बोलया, “ऐ क्या गल्ल है, की तुसां दोना प्रभुए दिया आत्मा जो परखने ताई इक सलाह कितयो है? दिख, जिना जवान माणुआं तैरे घरे बाले जो दबया है सै दरबाजे बार खडोतयो न, कने इना तिजो भी बाहर लेई जाणा।” 10 तालू सै झट जमिना पर पेई गई, कने मरी गई, कने उना जवान माणुआं अंदर आई करी दिखया तां सै मरी गियो थी, कने उना उसा जो बाहर लेईजाई करी उसा दे घरे बाले दे बखे दबाई दिता। 11 कने कलीसिया दे सारे लोक कने जितणयां इना गल्लां जो सुणया सै बडे डरी गे। 12 प्रेरित मते चिन्न कने अदभुत कम्म लोकां दे बिच करदे थे, कने जडे मसीह च भरोसा करणे बाले थे। सै अक्सर सारे इक चित होईकरी सुलैमाने दे ओसारे च गिठे होंदे थे। 13 पर जिना

हल्ले दीकर यीशुए पर भरोसा नी कितया था उना चे कुसयो भी ऐ हिम्मत नी होंदी थी की, उना सोगी जाई मिलन; फिर भी लोक उना दी बड़ी इज्जत करदे थे। 14 कने प्रभु पर भरोसा करणे बाले मर्दा कने जनानियां दी गिणती बददी ही गई। 15 जड़ा कुछ प्रेरित करा दे थे उसा बजा ला लोक बिमारां जो सड़का पर आंणी करी, मंझे कने पन्दी पर सुआई दिन्दे थे, ताकि जालू पतरस उस रस्ते ला जांगा, तां उदा प्रछोंआ उना चे कुसकी पर पेई जा। 16 कने यरूशलेम शेहरे दे अखे बखे दे नगरां दे लोक भी गिठे होंदे थे। कने सै बिमारां कने बुरियां आत्मा ला सताए लोकां जो लोंदे थे, कने सै सारे ठीक होई जांदे थे। 17 तालू महायाजक कने सारे यहूदी अगुवां दी टोली जिना जो सदूकी बोलदे न दे, सै प्रेरितां ला जलन करणा लग्गे। 18 तां अगुवां मंदरे दे रखबालयां जो हुकम दिता की प्रेरितां जो पकड़ी करी जेला च बंद करी दिया। 19 पर राती दे बकत प्रभु दे इकी स्वर्गदूते जेला दे दरबाजे खोली करी उना जो बाहर कडया कने प्रेरितां जो बोलया, 20 “जा कने मंदरे च खडे होईकरी, लोकां जो इस हमेशा दिया नोईया जिन्दगिया दा पूरा संदेश सुणा।” 21 कने प्रेरित बड़ी ब्यागा ही मंदरे च गे जियां उना जो स्वर्गदूते दसया था जाई करी सिखाणा शुरू किता। जालू महायाजक कने उदे साथी आए कने उना महासभा जो कने इस्राएलियां दे सारे यहूदी अगुवां जो गिठा किता, कने जेला च बोली भेजया की प्रेरितां जो लोआ। 22 पर मन्दरे दे रखबालयां ओथु पुजिकरी दिखया की सै जेला च नी न, कने उना बापस आई करी दसया, 23 “जेल ढंगे ला बंद थी, कने बाहर दरबाजे पर पेहेरेदार खरेडयो थे, पर जालू असां दरबाजा खोलया, तां अंदर कोई नी था।” 24 जालू मंदरे दे रखबालयां दे सरदारां कने बड्डे याजकां ऐ खबर सुणी, तां हेरान होई गे कने उलझन च पेई गे की इदा क्या नतीजा होणा। 25 इतणे च कुनकी आई करी उना जो दसया, “दिखा, जिना जो तुसां जेला च बंद कितया था, सै माणु मंदरे च खडोई करी उपदेश देद न।” 26 जालू उना ऐ सुणया, तालू मंदरे दे रखबालयां दा सरदार कुछ रखबालयां जो सोगी लेईकरी मंदरे च गया, कने प्रेरितां जो पकड़ी करी महासभा च लेई आया, पर उना सोगी कोई जोर जबरदस्ती नी किती, क्योंकि रखबाले लोकां ला डरा दे थे की लोक पथर मारी-मारी करी उना जो मारी ना देन। 27 जालू उना प्रेरितां जो महासभा दे सामणे खरेडया तालू महायाजके उना ला पुछया, 28 “क्या असां तुहांजो हुकम नी दितया था, की तुसां इस नाऐ ला शिक्षा मत दिन्दे? फिरी भी, तुसां सारे यरूशलेम शेहरे जो

अपणिया शिक्षा ला भरी दिता है कने तुसां उस माणुए दी हत्या दा दोष जबरदस्ती सांझो पर लांणा चांदे न।” 29 तालू पतरसे कने, बाकियां प्रेरितां जबाब दिता, “माणुए दे हुकमे ला बदीकरी परमेश्वरे दे हुकमे जो मनणा ही साडा कम्म है। 30 साडे पूर्वजां दे परमेश्वरे यीशुए जो मरयां चे जिन्दा करी दिता, जिसयो तुसां सूली पर लटकाई करी मारी दितया था। 31 उसयो ही परमेश्वरे प्रभु कने उद्धार करणे बाला बणाया है, कने अपने सजे हथे ने सारयां ला उच्चे सिंहासने पर बेठाया है, ताकि इस्राएले दे लोक अपने बुरे सोच बिचार कने बुरे रस्तयां जो छडी करी परमेश्वरे बाल मुडी ओन कने उदे जरिये उना जो अपने पापां दी माफी मिल्ले। 32 असां कने पबित्र आत्मा भी इना गल्लां दे गबाह न, जिसा जो परमेश्वरे उना जो दितया है, कने जडे उदा हुकम मंदे न।” 33 जालू महासभा दे लोकां ऐ सुणया तां उना जो बडा जादा गुस्सा आई गया, कने प्रेरितां जो मारी देणा चांदे थे। 34 पर गमलीएल नाए दा इक फरीसी था, जडा व्यवस्था जो सिखाणे बाला कने सारे लोक उसयो बडा मंदे थे, उनी महासभा च खड़ाई करी प्रेरितां जो थोडिया देरा तांई बाहर करी देंगे दा हुकम दिता। 35 तालू उनी महासभा दे लोकां जो बोलया, “हे इस्राएलियो, जडा कुछ भी इना माणुए ला करणा चांदे न सोची समझीकरी करनयो। 36 क्योंकि इना रोजां ला पेहले थियुदास ऐ बोलदा था, की मैं भी कुछ है; कने कोई चारसो माणु उदे सोगी होई गे, पर सै मारी दिता, कने जितणे लोक उदी मंदे थे सारे तितर बितर होई गे कने खत्म होई गे। 37 उदे बाद जनगणना दे दिना च गलील प्रदेशे दा बासी यहूदा आया, कने कुछ लोक अपने पासे करी ले, सै भी मरी गया, कने जितणे लोक उदे चले थे, सारे लोक तितर बितर होई गे। 38 इस तांई तां मैं हुण तुसां जो बोला दा है, इना माणुए ला दूर ही रिया कने उना ला कोई कम्म मत रखा; क्योंकि अगर ऐ कम्म कने योजना माणुए दिया तरफा ला होंदी तां इना अपने आप ही खत्म होई जाणा; 39 पर अगर परमेश्वरे दिया तरफा ला है, तां तुसां कदी नी मिटाई सकणा है, कुथी इयां ना हो की तुसां परमेश्वरे ला लडने बाले बंनन।” 40 तालू महासभा गमालिएल दी गल्ल मनी लेई, कने इस तांई प्रेरितां जो सदीकरी मारया कुटया; कने उना जो ऐ हुकम दिता की सै हुण यीशुए दे नाए च कुछ मत बोलदे कने फिरी उना जो छडी दिता। 41 कने जालू सै महासभा जो छडी करी चली गे, तालू प्रेरित इसा गल्ला ला खुश होए की परमेश्वरे उना जो यीशुए तांई बेइजत होणे जोगे समझया। 42 कने हर रोज मंदे च कने घरे-

घरे च, प्रेरित लोकां जो सिखादे रे कने शुभसमाचार दा प्रचार करदे रे की यीशु ही मसीह है।

6 उना रोजां च चेलयां दी गिणती लगातार बढ़ा दी थी, तालू यूनानी बोली बोलणे बाले यहूदी विश्वासी इब्रानी बोली बोलणे बाले यहूदी विश्वासियां दे खिलाफ शिकायत करणा लग्गे, की रोज खाणा कने पैसे बंडदे बकते यूनानी बिधवां जो सबना साईं खाणा कने पैसे नी दिन्दे। **2** तालू बाहरां प्रेरितां यरूशलेम शहर दे बाकी चेलयां दी मंडलिया जो अपने बाल सदीकरी बोलया, “असां प्रेरितां जो अपना बकत परमेश्वरे दा बचन सिखाणे च लाणा चाईदा, ना की खुआणे पियाणे दी सेवा करणे च। **3** इस ताईं हे मसीह भाईयो, अपने चे सत्त ऐसे माणुआं जो चुणा जिना दे बारे च सब जाणदे न की सै पबित्र आत्मा ने कने अकला ने भस्यो न, ताकि असां ऐ जिम्मेदारी उना जो देई दें। **4** पर असां तां प्राथना, बचन दा प्रचार कने शिक्षा देणे च लगीं रेन।” **5** ऐ गल्ल सारिया मंडलिया जो खरी लग्गी, कने उना स्तिफनुस नाऐ दे इक माणुऐ जो जडा भरोसे कने पबित्र आत्मा ला भरूई गया था, कने फिलिप्पुस कने प्रुखुस कने निकानोर कने तीमोन कने परमिनास कने अन्ताकिया बासी नीकुलाउस जो जडा यहूदी धर्म च आई गया था, इना जो चुणी लिया। **6** कने इना जो सै प्रेरितां दे सामणे लेई आये कने उना ताईं प्राथना किती कने उना पर हाथ रखीकरी उस कम्मे ताईं नियुक्त किता। **7** कने परमेश्वरे दा बचन फेलदा गया कने यरूशलेम शहरे च चेलयां दी गिणती बढ़दी गई, कने केई यहूदी याजकां भी यीशु मसीह पर भरोसे दे इस संदेशे जो मन्नी लिया। **8** स्तिफनुस अनुग्रह कने शक्तिया ला भरूई करी लोकां च बड़े-बड़े अनोखे कम्म कने चमत्कार दसदा था। **9** पर कुछ लोक जडे उस यहूदी जंज घरे दे थे, जिसयो गुलाम मुक्त यहूदी जंज घर बोलदे थे, सै स्तिफनुसे दे खिलाफ होई गे। कने इना चे कुछ लोक कुरेने कने सिक्ंदरिया दे शहरां ला आयो थे, कने कुछ लोक किलिकिया प्रदेश कने आसिया प्रदेश ला आयो थे। ऐ लोक स्तिफनुसे सोगी बेहस करणा लग्गे। **10** स्तिफनुसे जडा कुछ भी बोलया सै उदा जबाब नी देई सके क्योंकि पबित्र आत्मा उसयो बड़ी ही समझा ला बोलणे च सहायता किती। **11** इस ताईं गुलाम मुक्त लोकां छुपके ला केई मर्दा जो रिश्वत देईकरी स्तिफनुसे दे बारे च झूठ बोलणे ताईं भड़काया, “की असां इसयो मूसा कने परमेश्वरे दे खिलाफ च निंदा करदे सुणाया है।” **12** कने उना स्तिफनुसे दे खिलाफ लोकां जो, यहूदी अगुवां जो, कने व्यवस्था जो

सिखाणे बालयां जो भडकाया कने उना आई करी स्तिफनुसे जो पकडया कने उसयो महासभा दे सामणे लेई आये। 13 कने ओथु जूठे गबाह पेश किते, जिना स्तिफनुसे पर ऐ इलजाम लाया, “ऐ माणु इस पबित्र मन्दिर कने मूसा दिया व्यवस्था दे खिलाफ बोलणा नी छडदा है। 14 क्योंकि असां इसयो ऐ बोलदे सुणाया है, की नासरत बासी यीशुऐ इस मंदरे जो ढाई देणा है, कने रीती रिबाजां जो बदली देणा है जडे मूसा सांझो दितयो न।” 15 तालू सारयां लोकां जडे महासभा च बैठयो थे, उदे पासे घुरी करी दिखया तां उदा मु स्वर्गदूते दे मुऐ सांई चमका दा था।

7 तालू महायाजके स्तिफनुसे ला पूछया, “क्या ऐ इलजाम सच्च न?” 2 उनी बोलया, “हे भाईयो कने पितरो सुंणा, साडे पूर्वज अब्राहम जो हारान गां च आई करी बसणे ला पेहले जालू सै मेसोपोटामिया प्रदेश च था; कने तेजोमय परमेश्वरे उसयो दर्शन दिते। 3 कने उसयो बोलया, ‘तू अपने देशे कने अपने रिश्तेदारां ला निकली करी उसी देशे जो चली जा, जिसयो मैं तिजो दसगा।’ 4 तालू सै कसदियों दे देशे ला निकली करी हारान गांऐ च जाई बसया; कने उदे पिता दिया मौता दे बाद परमेश्वरे उसयो ओथु ला आंणी करी इस देशे च बसाया जिदे च हुण तुसां बसदे न, 5 पर परमेश्वरे उसयो ऐथू विरासत च कुछ नी दिता, ऐथू दीकर की इक फुट जगा भी नी दिती, कने उस बेले उदी कोई ओलाद भी नी थी। फिर भी परमेश्वरे बायदा किता, की मैं ऐ देशे तेरे कने तेरे बाद तेरे बंशे दे हथे दिगा।” 6 कने परमेश्वरे ऐ भी बोलया, तेरे बंशे दे लोक पराये देशे च परदेशी होणे, कने उना लोकां उना जो गुलाम बणाई लेणा, कने चारसो सालां दीकर उना सोगी बुरा बर्ताब करणा। 7 फिरी परमेश्वरे बोलया, “जिसा जातियां दे उना गुलाम होणा है, उना जो मैं सजा देणी, कने उना उस देशे ला निकली करी इसी इस्राएल च मेरी भक्ति करणी।” 8 कने परमेश्वरे अब्राहम सोगी इक बायदा किता कने उसने बोलया की सै अपने घरे दे सारे मर्दा दा खतना बायदे दे चिन्ह दे तौर पर करबाऐ; कने बादे च जालू इसहाक पैदा होया, तां अठमे रोजे उदा खतना किता, कने इसला बाद ऐ परमपरा चलदी रेई कने इसहाक ला याकूब कने याकूब ला साडे बारा पूर्वज पैदा होऐ। 9 जलन दिया बजा ने यूसुफे दे भाईयां उसयो मिस्र देशे जाणे बालयां जो इक गुलाम दे रूपे च बेची दिता, पर परमेश्वर उदे सोगी था। 10 कने परमेश्वरे यूसुफे जो उदे सारियां मुसीबतां ला छुड़ाई करी मिसरे दे राजा फिरौन दे अग्रे अनुग्रह कने अकल दिती, कने फिरौन राजे उसयो मिस्र देशे पर कने अपने सारे घरे दा अधिकारी बणाया। 11

जालू यूसुफ मिस्र देशे दा गवर्नर था तालू सारे मिस्र कने कनान देशे च अकाल पिया; जिसने बडा भरी क्लेश होया, कने साडे पूर्वजां जो खाणे जो नी मिलदा था। 12 पर याकूबे ऐ सुणाया, की मिस्र देशे च अनाज है, उना साडे पूर्वजां जो अनाज लेणे ताई भेजया कने सै यूसुफे ने मिल्ले कने अनाज खरीदया पर उना यूसुफे जो नी पछेणया। 13 कने दुई बरी जालू सै अनाज लेणा गे, तां यूसुफ अपने भाईयां जो दसया की मैं तुहाडा भाई यूसुफ है, कने यूसुफे दे परिवार दे बारे च फिरौन जो पता लग्गी गया। 14 तालू यूसुफे अपने पिता याकूब कने अपने सारे रिश्तेदारां जो, जडे पचतर माण थे, उना जो मिस्र देश च ओणे ताई बुलाबा भेजया। 15 तालू याकूब मिस्र देश गया; कने ओथु कुछ बकते बाद सै कने साडे बाप दादे मरी गे। 16 कने उदे बंशज याकूब कने उदे पुत्रां दियां लाशां जो साडे देश कनान च लेई गे, कने याकूब दिया लाशा जो उसा कबरा च दफनाया, जिसा जो अब्राहमे इक सही कीमता च खरीदया था, कने उना याकूब दे पुत्रां जो शेकेम शेहरे दिया उसा जमिना च दफनाया, जिसयो याकूबे हामौर दे पुत्रां ला खरीदया था। 17 पर जालू उस बायदे जो पूरा होणे दा बकत नेडे आया जडा परमेश्वरे अब्राहम ने कितया था, तां मिस्र देश च लोक बदी गे, कने मते सारे होई गे। 18 तालू मिस्र देश च दुआ राजा राज करणा लग्गा जडा यूसुफे जो नी जाणदा था। 19 उनी साडिया जातियां सोगी चलाकी करिरी साडे पूर्वजां ला इसा हदा दीकर बुरा व्यवहार कितया की, उना दे माता पिता जो अपने बचयां जो फेंकणा पेई गया ताकि सै मरी जान। 20 कने उस बेले मूसा पैदा होया, कने सै परमेश्वरे दिया नजरा च बडा ही छेल था; कने उसयो उना तिन मिहनयां दीकर उसयो उदे माता-पिता लुकाई करी पालया। 21 पर जालू सै उसयो होर जादा लुकाई नी सके, तां उना उसयो घरे बाहर रखी दिता कने तालू फिरौने दीया कुडिया उसयो गोद लेई लिया, कने उसयो अपने पुत्रे साई पालया। 22 कने मूसा जो मिस्रियां दी सारी बिघा पडाई, कने सै बडा ही प्रभावशाली तरीके ने गल्लां कने कम्म करदा था। 23 जालू मूसा चालियां सालां दा होया, तां उदे मने च आया की अपने इस्राएली रिश्तेदारां ने मिल्ले। 24 कने उनी ओथु इक मिस्री माणुऐ जो इक इस्राएली माणुऐ सोगी बदसलूकी करदे दिखया, कने उसयो बचाया, कने मिस्री माणुऐ जो मारी करी उदा बदला लिया। 25 उनी सोचया, की मेरे भाईयां समझणा की परमेश्वरे मेरे हथे ने उना जो गुलामी ला अजाद करदा, पर उना नी समझया। 26 दुऐ रोजे मूसा दो इस्राएलियां बाल आया जडे अपु चे लडा दे थे,

कने उना बिच सुला कराणे ताई ऐ बोलया, की हे मर्दो, तुसां तां भाई-भाई न, तुसां कजो इकी दुऐ जो मारा दे न? 27 पर जडा अपने पड़ोसीऐ जो मारा दा था, उनी मूसा जो धक्का दिता कने बोलया, तिजो कुनी सांझो पर राजा कने न्याय करणे बाला बणाया है? 28 क्या जियां कल तू मिस्र देशे दे माणुऐ जो मारी दिता क्या मिंजो भी मारणा चांदा है? 29 ऐ गल्ल सुणीकरी, मूसा मिस्र देश ला नठया कने मिधान देशे च परदेसी बणी करी रेणा लग्गा: कने ओथु उदे दो पुत्र पैदा होए। 30 मिधान देशे च पुरे चाली साल रेहणे बाद, मूसा जो परमेश्वरे इक स्वर्गदूते दे स्पे च सीने पहाड़े दिया सुनसान जगा च जलदिया झाड़िया दिया अग्गी बिच दर्शन दिते। 31 जालू मूसा उसा अग लगियो झाड़िया जो दिखया जड़ी भस्म नी होआ दी थी, तां सै हेरान होया, कने जालू दिखणे ताई बखे गया, तां प्रभु दी ऐ अबाज सुणोई, 32 “मैं तेरे पूर्वज, अब्राहम, इसहाक कने याकूब दा परमेश्वर है, जिदी सै अराधना करदे थे।” तालू तां मूसा डरे ने कमी पिया, ऐथू दीकर की उसयो दिखणे दी हिम्मत नी रेई। 33 तालू प्रभुऐ उसयो बोलया, अपने पैरां ला जुतयां उतारी दे, क्योंकि जिसा जगा तू खड़ोतया है, सै पबित्र जगा है। 34 मैं सची अपने लोकां दी दुर्दशा जो दिखया है, जड़ी मिस्र देश च है, कने उना दी तकलीफ कने उना दे रोणे जो सुणया है, इस ताई उना जो छुड़ाणे ताई उतरया है। हुण आ, मैं तिजो मिस्र देश च भेजणा। 35 ऐ सै ही मूसा है जिसयो इस्राएलियां नकारी दितया था कने जिना बोलया, तिजो कुनी सांझो पर राजा कने न्याय करणे बाला बणाया है? उसयो ही परमेश्वरे राजा कने छुड़ाणे बाला बणाई करी, उस स्वर्गदूते दे जरिये भेजया जिनी उसयो झाड़िया च दर्शन दिते थे। 36 सै उना जो मिस्र देशे ला बाहर लेई आया कने उनी मिस्र देशे च कने लाल समुंद्रे पर कने सुनसान जगा च चालियां सालां दीकर अदभुत कम्म कने चिन्ह दस्से। 37 ऐ सेई मूसा हे, जिनी इस्राएली लोकां जो बोलया, परमेश्वरे तुहाड़े भाईयां चे तुहाड़े ताई मिंजो सांई इक परमेश्वरे दा संदेश देणेबाला बणाणा है। 38 मूसा इक अगुवे दे स्पे च साडे पूर्वजां दे सोगी था जालू सै सुनसान जगा च गिठे थे, तालू स्वर्गदूते सीने पहाड़े पर मूसा ने गल्लां कितियां, कने ओथु मूसा जो जिन्दगी देणेबाले बचन मिल्ले कने उनी सै बचन सांझो दीकर पूजाऐ। 39 पर साडे पूर्वज उदी मनणा नी चांदे थे; सै मने-मने च ही मिस्र देशे जो बापस जाणा चांदे थे, 40 कने उना मूसा दे भाई हारून ने बोलया, साडे ताई ऐसा देवता बणा, जडा मिस्र देशे जो बापस जाणे ताई साडे अगे-अगे चले; क्योंकि ऐ

मूसा जड़ा सांझो मिस्र देशे ला कडी लेई आया है, असां नी जाणदे उसयो क्या होया है। 41 उना रोजां च उना इक बछड़े दी मूर्ति बणाई करी, उदिया मूर्तियां अगो बलि चढाई, कने अपने हथां दे कम्मा पर खुश होणा लगगे। 42 फिरी परमेश्वरे उना जो अम्बरे दे तारे, चन्द्रमा, सूरजे जो अपने देवतयां दे स्पे च पूजणे ताई छडी दिता, जियां परमेश्वरे दे संदेश देणेबालयां दीया कताबा च परमेश्वरे बोलया है, हे इस्राएल दे लोको, क्या तुसां सिर्फ मेरे ताई ही चालियां सालां दीकर सुनसान जगा च पशु बलि कने अन्नबली चढादें रे? 43 नहीं, तुसां उस तम्बूए जो डोता जिदे च तुहाड़े देवता मोलेक दी मूर्ति थी; कने तुसां अपने देवता रिफान दे तारे जो चुकया, मतलब की उना मूर्तियाँ जो जिना जो तुसां भक्ति करणे ताई बणाया था। इस ताई मैं तुहांजो बाबेल देश च गुलाम बनाणा। 44 गबाई दा तम्बू रेगिस्तान च साडे पूर्वजां बिच था; जियां की परमेश्वरे मूसा जो बोलया, जड़ा अकार तू दिखया है, उदे सांई इसयो बणा। 45 बडे सालां बाद उसी तम्बूए जो साडे पूर्वज यहोशुए सोगी ऐथू लेई आये। उस बकत ऐ देश होरनी जातियां दे हथे च था, पर परमेश्वरे उना जो साडे पूर्वजां दे सामणे ला कडी दिता, कने सै तम्बू राजा दाऊदे दे बकते दीकर रिया। 46 दाऊद पर परमेश्वरे अनुग्रह किता; दाऊदे याकूब दे परमेश्वरे जो रेहणे ताई मंदर बणाने दी बीनती किती। 47 पर जिनी परमेश्वरे दे मंदरे जो बणाया सै दाऊदे दा पुत्र सुलैमान था। 48 पर परमेश्वर हथा ने बणायो मंदरा च नी रेंदा है, जियां की यशायाह परमेश्वरे दे संदेश देणेबाले बोलया की, 49 परमेश्वर बोलदा है, स्वर्ग मेरा सिहांसन है कने धरती मेरे पैरां थल्ले दी चौकी है, मेरे ताई तुसां कदिया मंदर बणांगे? कने मिंजो अराम करणे दी कुण देई जगा होणी? 50 मैं खुद स्वर्ग कने धरती दोनों जगा पर सब कुछ बणाया है। 51 “हे जिदी लोको, तुसां परमेश्वरे दियां गल्लां मनणे कने सुणने ला मना करदे न, तुसां हमेशा पबित्र आत्मा दा बिरोध करदे न। जियां तुहाड़े पूर्वज करदे थे, तियां ही तुसां भी करदे न। 52 तुहाड़े पूर्वजां परमेश्वरे दे संदेश देणेबालयां चे हर कुसी जो सताया कने जिना ऐ भविष्यबाणी किती की मसीह जड़ा धर्मी है ओणा है, उना जो भी मारी दिता, पर जालू मसीह आया, तां तुसां उसयो धोखा दिता कने उदी हत्या करी दिती। 53 तुहांजो स्वर्गदूते दी बणाईयो व्यवस्था तां मिली, पर उदा तुसां पालन नी किता।” 54 ऐ गल्लां सुणीकरी यहूदी अगुवे स्तिफनुसे पर बडे जादा गुस्सा होए कने स्तिफनुसे पर ददां जो पिणा लगगे। 55 पर स्तिफनुसे पबित्र आत्मा ने भरई करी स्वर्गे पासे दिखया

कने परमेश्वरे दिया महिमा जो कने यीशुए जो परमेश्वरे दे सजे पासे खडोतया दिखीकरी, 56 बोलया, “दिखा, मैं स्वर्गे जो खुलया कने माणुए दे पुत्रे जो परमेश्वरे दे सजे पासे खडोतया दिखा दा है।” 57 जालू उना ऐ सब सुणया तालू उना जोरे ला चिलाया कने अपने कना पर हथ रखी ले, ताकि सै स्तिफनुसे दी नी सुणन कने गिठे होईकरी स्तिफनुसे पर टूटी पे। 58 कने उसयो यरूशलेम शेहरे दे बाहर कडी करी पथर मारणा लग्गे, कने स्तिफनुसे पर इल्जाम लगाणे बाले लोकां अपने बाहरे बाले कपडे खोली करी शाऊले नाए दे जवान आदमिये बाल रखी दिते। 59 कने सै स्तिफनुसे जो पथर मारदे रे, कने सै ऐ बोली करी प्राथना करदा रिया, “प्रभु यीशु, मेरिया आत्मा जो लेई ले।” 60 फिरी गोडे भार बेईकरी जोरे ने पुकारया, “प्रभु जी, इस पापे ताई इना जो सजा मत दिन्दे।” कने ऐ बोली करी मरी गया।

8 शाऊल स्तिफनुसे दिया हत्या च पूरा सहमत था। उसी रोजे ला यरूशलेम शेहरे दिया कलीसिया पर बड़ा जुल्म होणा लग्गा कने प्रेरितां जो छडी करी सारे दे सारे यहूदिया प्रदेशे च कने सामरिया प्रदेशां च तितर बितर होई गे। 2 कने कुछ मर्दा जडे परमेश्वरे दी इज्जत करदे थे उना स्तिफनुसे जो दफनाई दिता, कने उदे ताई मते रोये। 3 शाऊल कलीसिया जो सता दा था, कने घरे-घरे जाई करी विश्वासी मर्दा कने जनानिया जो घसीटी-घसीटी करी जेलां च पाई दिन्दा था। 4 जडे भरोसा करणे बाले तितर बितर होयो थे, सै जिथू कुथु भी गे लगातार शुभसमाचार सुणादे गे। 5 कने फिलिप्पुस सामरिया प्रदेशे दे इक शेहरे च जाई करी लोकां च मसीह दा प्रचार करणा लग्गा। 6 जालू उना फिलिप्पुसे जो बोलदे सुणया कने उदे कितयो चिन्हा जो दिखया, तां उना सारयां मिलिकरी उदे संदेशे जो ध्याने ला सुणया। 7 क्योंकि जालू फिलिप्पुसे हुकम दिता तां मतयां चे बुरियां आत्मा जोरे ने चिलांदियां होइयां निकली गियां कने मते लकवे दे रोगी कने लंगड़े भी ठीक होए। 8 तां उस शेहरे दे मते सारे लोक खुश होए। 9 उस शेहरे च इक शमौन नाए दा माणु था, कने सै काफी बकत ला सामरियां दे लोकां पर जादू टोंणा करा दा था, सै उदी काबिलियत ला बडे हेरान थे, कने सै दावा करदा था की सै इक महान आदमी है। 10 कने सारे छोटयां ला लेईकरी बड़े दीकर उसयो इज्जता ने बोलदे थे, “ऐ माणु परमेश्वरे दी सै शक्ति है, जिसयो महान बोलदे न।” 11 उनी मते रोजां ला उना जो अपने जादूए दे कम्मा ने हेरान करी रखया था, ताई तां सै उसयो बडे मंदे थे। 12 पर जालू लोकां परमेश्वरे दे राज्य कने यीशु मसीह दे ना दा शुभसमाचार फिलिप्पुस

ला सुणया कने भरोसा किता, तालू सारे मर्दा कने जनानिया बपतिस्मा लिया। 13 तालू शमौने अपु भी फिलिप्पुसे दे शुभसमाचार पर भरोसा किता कने बपतिस्मा लेईकरी हर जगा फिलिप्पुसे सोगी जाणा लग्गा कने चमत्कार कने बड़े-बड़े कम्म होंदे दिखीकरी सै हेरान होंदा था। 14 जालू यरूशलेम शहर च प्रेरितां सुणयां की सामरिया प्रदेश दे लोकां परमेश्वरे दा बचन मन्नी लिया है तां पतरसे कने यूहन्ना जो उना बाल भेजया। 15 कने उना ओथु जाई करी उना तांई प्राथना किती ताकि उना जो पबित्र आत्मा मिल्ले। 16 क्योंकि पबित्र आत्मा हले दीकर उना च कुसदे पर भी नी उतरया था, उना तां बस यीशुऐ दे नाऐ ने बपतिस्मा लिया था। 17 तालू पतरस कने यूहन्ने तिना पर हथ रखे कने उना जो पबित्र आत्मा मिल्ली। 18 जालू शमौने दिखया की प्रेरितां दे हथ रखणे ने पबित्र आत्मा मिलदी है, तां उनी पेसे देईकरी बोलया, 19 “ऐ शक्ति मिंजो भी दिया, ताकि मैं जिसदे पर हथ रखें, उसयो पबित्र आत्मा मिल्ले।” 20 पतरसे उसयो बोलया, “तू कने तैरे पैसे दोनों नाश होन, क्योंकि तू परमेश्वरे दा दान पैसयां ने खरीदणे दा बिचार किता। 21 इसा सेबा च ना तेरी हिस्सेदारी है, ना हिस्सा है; क्योंकि तेरा मन परमेश्वरे दे सामणे सच्चा नी है। 22 इस तांई तू अपने मने ला इसा बुरिया सोचा जो कडी दे कने प्रभु ने प्राथना कर, तां होई सकदा प्रभु तेरी इसा बुरिया सोचा तांई तिजो माफ करे। 23 तू अपने पापां ला पश्चाताप कर क्योंकि तू कड़वाट ने भ्रम्या है कने पाप ने जकड़या होया है।” 24 शमौने जबाब दिता, “तुसां मेरे तांई प्राथना करा ताकि जडियां गल्लां तुसां बोलियां न, ऐसा कुछ भी मेरे सोगी न हो।” 25 पतरस कने यूहन्ना उस शेहरे च गबाई दिती कने प्रभु दे बचना दा प्रचार किता कने फिरी यरूशलेम शेहरे जो बापस चली गे। कने जादे-जादे बेले सामरिया प्रदेशे दे मतयां गां च शुभसमाचार दा प्रचार किता। 26 फिरी प्रभु दे इकी स्वर्गदूते फिलिप्पुसे जो बोलया, “उठी करी दक्षिणे पासे उस रस्ते पर जा, जड़ा यरूशलेम शेहरे ला गाजा शहर जो जांदा है, ऐ रेगिस्तानी रस्ता है।” 27 फिलिप्पुस उठी करी चली पिया, कने उसयो रस्ते च इक माणु मिल्ला सै इक खोजा कने कूशियों दी राणी कन्दाके दा मंत्री कने खजांची था, कने भक्ति करणे तांई यरूशलेम शहर आया था। 28 कने सै रथे पर अपने देशे जो बापस चलया था, कने परमेश्वरे दा संदेश देणेबाले यशायाह दी कताबा जो जौरे ने पढा दा था। 29 तालू पबित्र आत्मा फिलिप्पुसे ने बोलया, “नेडे होईकरी इसी रथे ने चली पो।” 30 फिलिप्पुस दोड़ी करी उस रथे बखे आया कने उसयो

परमेश्वरे दा संदेश देणेबाले यशायाह दी कताबां जो पढदे सुणाया, तां उसला पुछया,
 “तू जडा पढा दा है क्या उसयो समझदा भी है?” 31 उनी बोलया, “मैं इसयो नी
 समझी सकदा जालू दीकर मिंजो कोई इसयो समझांगा नी।” कने उनी फिलिप्पुसे
 ने बीनती किती की, रथे पर चढी करी मेरे बखे बो। 32 पबित्र शास्त्रे दा जडा
 अध्याय सै पढा दा था, सै ऐ था, “उसयो भेडां सांई मारणे तांई लेई गे, कने जियां
 मेमना ऊन कतरने बाले दे सामणे चुपचाप रेंदा है, तियां ही जालू लोकां उसयो दुख
 दिता तां उनी भी अपणा मु नी खोलया, 33 उदिया दीनता दिया बजा ला उदी
 बेईजती किती कने उसयो न्याय नी मिल्ला, शायद कोई भी उदे बंशजा दे बारे च
 नी दस्सी सकदा है, क्योंकि इदे ला पेहले की धरती पर उदा कोई बंश होंदा,
 लोकां उसयो मारी दिता।” 34 इसी पर खोजे फिलिप्पुसे ला पुछया, “मैं तिजो ने
 बिनती करदा है, मिंजो ऐ दस की परमेश्वरे दा संदेश देणेबाला कुसदे बारे च बोला
 दा है, अपने या कुसी होरसी दे बारे च?” 35 तालू फिलिप्पुसे बोलणा शुरू किता,
 कने इस पबित्र शास्त्रे ला शुरू करिरी उसयो यीशुऐ दा शुभसमाचार सुणाया कने उनी
 खोजे ऐ गल्लां समझी लियां कने यीशुऐ पर भरोसा किता। 36 रस्ते च चलदे-
 चलदे सै कुसकी तलाबे बाल पुज्जे, तालू खोजे बोलया, “दिख ऐथू तलाब है, हुण
 मिंजो बपतिस्मा लेणे तांई क्या कमी है?” 37 फिलिप्पुसे बोलया, “अगर तू सारे
 मने ने भरोसा करदा है तां लेई सकदा है।” उनी जबाब दिता “मैं भरोसा करदा है
 की यीशु मसीह ही परमेश्वरे दा पुत्र है।” 38 तालू उनी रथ खरेडने दा हुकम दिता,
 कने फिलिप्पुस कने खोजा दोनो तलाबे दे पांणिए च उतरी गे, कने फिलिप्पुसे
 उसयो बपतिस्मा दिता। 39 जालू सै तलाबे ला निकली करी उपर आये, तां प्रभुऐ
 दी आत्मा फिलिप्पुसे जो चुकी लेई गेई, कने खोजे उसयो दोबारा नी दिखया, कने
 सै खुश होया की प्रभुऐ उसयो बचाया है कने अपने देशे जो बापस चली गया। 40
 फिरी फिलिप्पुस अशदोह शहर च प्रगट होया कने तालू ओथु ला यात्रा शुरू किती
 कने ग्रां-ग्रां च कने नगरां-नगरा च शुभसमाचार दा प्रचार करदा रिया जालू दीकर
 सै कैसरिया शहरे च नी पूजी गया।

9 शाऊल पर हले दीकर प्रभु यीशु दे चेलयां जो धमकांणे कने मारणे दा खून सबार
 था, इस तांई सै महायाजक बाल गया। 2 कने उसला दमिश्क शहरे दे यहूदी जंज
 घरा दे नाए पर अधिकार पत्र मंगे, की कोई भी मर्द कने जनानी जडे यीशु मसीह
 दी शिक्षा जो मंदे न उना जो बन्नी करी यरूशलेम शहर जो लेई ओए। 3 पर जालू

शाऊल कने उदे साथी दमिशक शेहरे बखे पुज्जे, तां अचानक अम्बरे ला शाऊले दे चारो पासे इक लौ चमकी, 4 सै धरती पर पेई गया, कने अब्राज सुणी, जड़ी उसयो बोला दी थी, “हे शाऊल, हे शाऊल मिंजो कजो सता दा है?” 5 शाऊले पुछया, “प्रभु जी, तू कुण है?” उनी बोलया, “मैं यीशु है, जिसयो तू सता दा है।” 6 पर हुण उठी करी शहरे जो जा, कुनी तिजो दस्सी देणा, की तिजो क्या करणा है। 7 जडे माणु उदे सोगी थे, चुपचाप रेई गे, क्योंकि उना जो अब्राज सुणोदी थी, पर कोई मिलदा नी था। 8 तालू शाऊल धरती ला उठया, पर जालू हखी खोलियां तां उसयो कुछ भी नी मिल्ला दा था कने सै उदा हथ पकड़ी करी दमिशक शेहर लेई गे। 9 कने सै तिन्ना रोजां दीकर दिखी नी सकया, कने ना उनी कुछ खादा कने ना पीता। 10 दमिशक शेहर च हनन्याह नाए दा इक चेला था, उसयो प्रभु यीशुए दर्शण च बोलया, हे हनन्याह। उनी बोलया, “हांजी प्रभु जी।” 11 तालू प्रभु यीशुए उसयो बोलया, “उठी करी सीधा नाए दिया गलिया च जा, कने यहदा दे घरे शाऊल नाए दे इकी तरसुस शेहरे दे बासिये जो पूछी ले; क्योंकि सै प्राथना करा दा है, 12 उनी दर्शण च दिखया है की हनन्याह नाए दे इकी माणुए आई करी उस पर हथ रखे ताकि सै दोबारा दिखणा लग्गी पोए।” 13 हनन्याह जबाब दिता, “प्रभु जी, मैं इस माणुए दे बारे च मतयां लोकां ला सुणया है, की इनी यरूशलेम शेहर च तेरे पबित्र लोकां सोगी बड़ा बुरा कितया है; 14 कने ऐथू भी इसयो बड़े याजकां दिया तरफा ला हक मिलया है, की जडे लोक तिजो पर भरोसा करदे न, उना जो बन्नी करी यरूशलेम शेहर जो लेई जा।” 15 पर प्रभुए उसयो बोलया, “तू चली जा; क्योंकि ऐ तां, मैं होरनी जातियां, कने राजयां, कने इस्राएलियां दे सामणे मेरे बारे च प्रचार करणे कने मेरी सेबा करणे ताई चूणया है। 16 कने मैं उसयो दसणा है, की लोकां जो मेरे बारे च प्रचार करणे दिया बजा ला उसयो कदिया-कदिया दुख झेलणा पोणा है।” 17 तालू हनन्याह उठी करी उस घरे च आया, जिथू शाऊल रे दा था, कने उदे पर अपणा हथ रखीकरी बोलया, “हे भाई शाऊल, प्रभु यीशुए मिंजो तेरे बाल भेजया है, जड़ा तिजो उस रस्ते च मिलया था, जालू तू ऐथू ओआ दा था। कने उनी मिंजो इस ताई भेजया ताकि तू फिरी दिखी सके, कने पबित्र आत्मा ने भरई जाऐ।” 18 कने झट उदियां हखी ला छिलकयां सांई कुछ पिया, कने उसयो मिलणा लग्गी पिया, कने सै उठया कने उनी बपतिस्मा लिया, 19 फिरी खांणा खाई करी उसयो जोर आया। सै केई रोजां दीकर उना चेलयां सोगी

रिया जडे दमिशक शेहर च थे। 20 कने झट दमिशक शेहरे दे यहदी जंज घरां च यीशुए दा प्रचार करणा लग्गी पिया, की यीशु ही परमेश्वरे दा पुत्र है। 21 कने सारे सुणनेबाले हेरान होईकरी बोलणा लग्गे, “क्या ऐ सेई माणु नी है, जडा यरूशलेम शेहरे च उना जो सतांदा था, जडे लोक यीशु नाए दे बंदे पर भरोसा करदे थे, कने ऐथू भी तांई ही आया था, की उना लोकां जो बन्नी करी बड्डे याजकां बाल लेई जाऐ?” 22 पर शाऊल प्रचार करणे च होर भी जादा सामर्थी होंदा गया, कने इसा गल्ला दा सबूत देई-देईकरी की यीशु ही मसीह है, दमिशक शेहरे दे रेहणे बाले यहदियां दा मु बंद करदा रिया। 23 जालू शाऊले जो दमिशक शेहरे च रेंदे होए मते रोज होई गे, तां यहदियां मिली करी उसयो मारणे दी तरकीब बणाई। 24 कने सै उसयो मारणे तांई दिन रात फाटकां पर इंतजार करदे रे, पर उना दी तरकीब शाऊले जो पता चली गई। 25 इक राती चेले शाऊले जो पथरे दिया उचिया दिबारा पर लेई आए, जडी शेहरे दे चारो पासे बणियो थी। तालू उना दिबारां दे खुले हिस्से ला रस्सियां दे सहारे इक बडिया दिया टोकरिया च उसयो थले उतारी दिता। इयां करिरी सै दमिशक शेहरे ला बची करी निकली गया। 26 शाऊल यरूशलेम शेहरे जो गया कने ओथु पुज्जी करी उनी चेलयां सोगी मिलणे दी कोशिश किती, पर सारे उसला डरदे थे, क्योंकि उना जो भरोसा नी होंदा था, की सै भी चेला है। 27 पर बरनबासे उसयो अपने सोगी प्रेरितां बाल लेईजाई करी उना जो बोलया, की इनी कियां दमिशक शेहर जाणे बाले रस्ते च प्रभु जो दिखया, कने प्रभु यीशुए उसला गल्लां कितियां; कने फिरी दमिशक शेहरे च इनी कितणिया हिम्मत ला यीशुए दे नाए दा प्रचार किता। 28 प्रेरितां बरनबास पर यकीन किता, इस तांई शाऊल स्की गया कने उना सोगी यरूशलेम शेहरे दियां हर जगा पर गया कने बिना डरयो यीशु मसीह दे बारे च प्रचार करदा था। 29 कने यूनानी बोली बोलणे बाले यहदियां सोगी गल्ल बात कने बेहस करदा था; पर सै उसयो मारणे दी कोशिश करणा लग्गे। 30 तालू बाकी चेलयां जो इसा गल्ला दे बारे च पता चला तां सै शाऊले जो कैसरिया शेहरे च लेई आये, कने ओथु उना उदे तांई जहाजे ला तरसुस शेहर जाणे दा इंतजाम किता, जडा उदा अपना शेहर था। 31 इयां सारे यहदिया प्रदेश, कने गलील प्रदेश, कने सामरी प्रदेशां च कलीसिया जो चैन मिल्ला, कने सै मुजबुत होंदे गे, कने सै प्रभु यीशु मसीह दे डरे च जिन्दगी जिन्दे थे कने उना जो पबित्र आत्मा दे जरिये सहायता मिल्ली कने मतयां लोकां यीशु मसीह

पर भरोसा किता। 32 फिरी इयां होया की पतरस हर प्रदेशे च फिरदा होया, इक रोज लुद्दा शेहरे च रेणेबाले पबित्र लोकां ला मिलणे ताई उना बाल पुज्जा। 33 ओथु उसयो ऐनियास नाए दा इक लकवे दा रोगी माणु मिल्ला, सै अठां सालां ला मंजे पर पिया था। 34 पतरसे उसयो बोलया, “हे ऐनियास। यीशु मसीह तिजो ठीक करदा है। उठ कने, अपणा बछाण चुक।” तालू सै झट उठी खडोता। 35 उसयो ठीक होया दिखीकरी सारे लुद्दा कने शारोन शेहरां दे सारे रेहणे बालयां प्रभु यीशुए पर भरोसा किता। 36 याफा शेहरे च इक तबीता नाए दी जनानी रेंदी थी, जड़ी यीशुए पर भरोसा करदी थी, जिसा दा यूनानी भाषा च ना “दोरकास” था। (जिदा मतलब की इक हिरण।) कने सै बड़े भरी भले कम्म कने गरीबां दी सहायता करदी थी। 37 उना रोजां च ही जालू पतरस लुद्दा शेहरे च था, तालू तबीता बीमार होईकरी मरी गई, कने लोकां उसा जो नोहाई करी उपरे बाले कमरे च रखी दिता। 38 लुद्दा शेहर याफा शेहर दे नेडे था, चेलयां ऐ सुणीकरी की पतरस ओथु है तां दो माणु भेजी करी उसला बिनती किती की, “साड़े बाल ओणे जो देर मत कर।” 39 तालू पतरस उठी करी उना सोगी चली पिया, कने जालू पुज्जी गया, तां सै उसयो उसी उपरे बाले कमरे च लेई गे। कने सारियां बिधवा रोंदिया उदे बाल आईयां, कने जड़े कपड़े दोरकास उना सोगी रेंदे बणायो थे, उना जो दसणा लगियां। 40 तालू पतरसे सारयां जो बाहर करी दिता, गोडयां दे भार बेईकरी प्राथना किती, कने लाशा पासे दिखीकरी बोलया, “हे तबीता उठ।” तालू उना अपणिया हखी खोली दितियां, कने पतरसे जो दिखीकरी उठी बैठी। 41 उनी हथ देईकरी उसा जो उठाया कने पबित्र लोकां कने बिधवां जो सदीकरी उसा जो जिन्दा करी दसया। 42 ऐ गल्ल सारे याफा शेहर च फेली गई, कने मतयां प्रभु यीशु पर भरोसा किता। 43 कने पतरस याफा शेहरे च शमौन नाए दे कुसकी चमड़े दा धंधा करणे बाले दे ओथु मते रोजां दीकर रिया।

10 कैसरिया शेहरे च कुरनेलियुस नाए दा इक माणु था, सै इतालियानी नाए दिया पलटना दा सूबेदार था। 2 सै परमेश्वरे दा भक्त था, कने सै कने उदा सारा खानदान परमेश्वरे ला डरदा था, कने सै गरीब यहूदी लोंका जो बड़ा दान दिन्दा था, कने हर बकत परमेश्वरे ला प्राथना करणा लगी रेंदा था। 3 इक रोज, उनी दिने दे लगभग तिन बजे दे करीब इक दर्शण च बिलकुल साफ दिखया की परमेश्वरे दे इकी स्वर्गदूते उदे बाल अंदर आई करी बोलया, “हे कुरनेलियुस।” 4 कुरनेलियुसे

स्वर्गदूत जो ध्याने ला दिखया कने डरीकरी बोलया, प्रभु जी क्या हुकम है? उनी उसयो बोलया, “तेरियां प्राथना कने तेरे दान याद ताई परमेश्वरे सामणे पुज्जे न। 5 हुण याफा शेहर च माणु भेजी करी शमौन जो, जिसयो पतरस बोलदे न, सदी ले। 6 सै शमौन, चमड़े दा धंधा करणे बाले दे ओथु परोंणा है, जिसदा घर समुद्रे बखे है।” 7 जालू सै स्वर्गदूत जिनी उसला गल्लां कितियां थियां चली गया, तां उनी दो सेवकां कने इक भक्त सिपाइए जो सदया जड़े उदी सेवा ताई ओथु रेंदे थे, 8 कने उसयो सारियां गल्लां दसी करी याफा शेहरे जो पतरसे जो लोंणे ताई भेजया। 9 दुऐ रोजे कुरनेलियुस दे भेजयो सै तिन माणु चलदे-चलदे लगभग दोपेरा दे बकत शेहरे बखे पुज्जे, तां उसी बकत पतरस छती पर प्राथना करणा चढ़या। 10 उसयो भूख लग्गी कने सै कुछ खांणा चांदा था, कने जालू सै खांणा तैयार करा दे थे, तां सै बेसुध होई गया। 11 कने उनी दिखया, की अम्बर खुली गया, कने इक बडिया चादरा साई कोई चीच चारो कुंणा ला रस्सिया ला बनियो धरती पासे उतरा दी है। 12 जिसा च धरतिया दे सै चारा पैरां बाले कने रेंगणेबाले जानवर कने अम्बरे दे पंछी थे, जिना दे बारे च मूसा दिया व्यवस्था च लिख्या है की सै अशुद्ध कने अपबित्र न कने यहूदिया जो इना जो खाणे ताई मना है। 13 कने उसयो इक अबाज सुणोई, “हे पतरस उठ, मार कने खा।” 14 पर पतरसे बोलया, “नी प्रभु, कदी नी, क्योंकि मैं कदी भी कोई अपबित्र या अशुद्ध चीज नी खादियो है।” 15 फिरी दूजी बरी उसयो अबाज सुणोई, “जड़ा कुछ परमेश्वरे शुद्ध करी दितया है, उसयो अशुद्ध मत बोल।” 16 तिन बरी इयां ही होया, तालू सै चादर अम्बरे जो बापस चली गया। 17 जालू पतरस अपने मने च परशानिया च था, की ऐ जड़ा मैं दर्शन दिखया ऐ क्या है? उसी बकत सै माणु जिना जो कुरनेलियुसे भेजया था, शमौने दे घरे दा पता लगाई करी दरबाजे पर आई खड़ोते। 18 कने पुकारी करी पूछणा लग्गे, “क्या शमौन जिसयो पतरस बोलदे न, ऐथू प्रोंणा है?” 19 पतरस जड़ा उस दर्शने दे बारे च सोचा दा ही था, की पबित्र आत्मा उसयो बोलया, “दिख, तिन माणु तिजो तोपा दे न। 20 भले ही सै होर जाति दे न, उठी करी थले जा, कने बिना सोचया उना सोगी चली जा, मैं ही उना जो भेजया है।” 21 तालू पतरसे थले उतरी करी उना माणुए जो बोलया, “दिखा जिसयो तुसां तोपा दे न, सै मैं ही है, तुहाड़े ओणे दी क्या बजा है?” 22 उना बोलया, कुरनेलियुस सबेदार जड़ा धर्मी कने परमेश्वरे ला डरने बाला कने सारिया यहूदी जाति च सुनाम माणु

है, उसयो इक पबित्र स्वर्गदूते ऐ बोलया है, की तिजो अपने घरे सदीकरी तिजो ला उपदेश सुणे। 23 तालू उनी उना जो अंदर सदीकरी उना जो रेहणे ताई जगा दिती। कने दुऐ रोजे सै उना सोगी गया, कने याफा शेहरे दे मसीह भाईयां चे कुछ उदे सोगी चली पे। 24 तिजे रोजे सै कैसरिया शेहरे च पुज्जे, कने कुरनेलियुस अपने रिश्तेदारां कने प्यारे दोस्तां जो गिठे करिरी उना दा इंतजार करा दा था। 25 जालू पतरस अंदर ओआ दा था, तां कुरनेलियुस उसने मिल्ला, कने उदे पैरां च पेईकरी नमस्ते किता। 26 पर पतरसे उसयो चुकी करी बोलया, “खड़ा हो, मेरी अराधना मत कर मैं भी तां माणु ही है।” 27 कने उसने गल्लां करदे अंदर गया, कने मतयां लोकां जो गिठे दिखीकरी 28 पतरसे उसयो बोलया, तुसां जाणदे न, की होरनी जातियां दी संगती करणा या उना दे ओथु जाणा भी असां यहदियां ताई साडिया व्यवस्था दे खिलाफ है। पर परमेश्वरे मिंजो दसया है कुसी भी माणुऐ जो अपबित्र या अशुद्ध नी बोलणा। 29 इस ताई जालू मिंजो सदया तालू मैं बिना कुछ बोलयो चली आया। हुण मैं पुछदा है की मिंजो कुसी कम्मे ताई सदया है? 30 कुरनेलियुसे बोलया, तिन रोज पेहले, इसी बकत, मैं अपने घरे च लगभग दोपेरा दे तिन बजे दे करीब प्राथना करा दा था, तां इक मर्द चमकीले कपड़े पाई करी, मेरे सामणे आई खड़ोता। 31 कने उनी मिंजो बोलया, “हे कुरनेलियुस, तेरी प्राथना सुणी लियो है कने तेरे दान परमेश्वरे दे सामणे याद किते गे न। 32 इस ताई कुसकी जो याफा शेहर भेजी करी शमौने जो जिसयो पतरस बोलदे न, सद। सै समुद्रे दे बखे शमौन जडा चमड़े दा धंधा करणे बाले दे घरे च परोणा है, जालू उनी ओणा, तां उनी तिजो परमेश्वरे दिया तरफा ला इक संदेश दसणा। 33 तां मैं झट तेरे बाल लोक भेजे, कने तू खरा किता की जडा तू आई गया। हुण असां सारे ऐथू परमेश्वरे दे सामणे न, ताकि जडा कुछ परमेश्वरे तिजो बोलणे ताई बोलया है, असां उसयो सुणना।” 34 तालू पतरसे मु खोली करी बोलया, हुण मिंजो पक्का यकीन होया, की परमेश्वर कूसदा भी पक्ष नी करदा, 35 हर जातियां च जडा परमेश्वरे ला डरदा है कने धर्म दे कम्म करदा है, उसयो परमेश्वर अपनाई लेंदा है। 36 तुसां उस संदेश जो जाणदे न जडा परमेश्वरे सांझो, मतलब की इस्राएल दे लोकां जो भेजया। उनी शान्ति दे बारे च शुभसमाचार सुणाया जडी लोकां जो यीशु मसीह पर भरोसा करणे ला मिली सकदी है। सै सारयां दा प्रभु है। 37 तुहांजो उस बचने दे बारे च पता है, जडा यूहन्ना दे बपतिस्मा दे प्रचारे बाद गलीले प्रदेश ला शुरू होईकरी सारे

यहूदिया प्रदेशे च फेली गया, 38 तुसां नासरत बासी यीशुऐ दे बारे च जाणदे न की परमेश्वरे कियां पबित्र आत्मा कने शक्तिया ला उदा अभिषेक किता; सै भलाई करदा कने जिना जो शैताने तंग कितया था, उना सारयां जो ठीक करदा गया, क्योंकि परमेश्वर उदे सोगी था। 39 कने असां प्रेरितां उना सारियां चीजां दे बारे च लोकां जो दसया, जडियां यीशुऐ साडे यहूदिया प्रदेश कने यरूशलेम शेहरे च कितियां, कने यरूशलेम शेहर च यहूदी अगुवां उसयो सूली पर लटकाई करी मारी दिता। 40 पर उसयो परमेश्वरे तिजे रोजे मरयां चे जिन्दा करी दिता, कने उसयो प्रगट भी किता है। 41 सारयां लोकां उसयो नी दिखया, पर उना गबाहां जो जिना जो परमेश्वरे पेहले ही प्रेरित चुणी लिया था, मतलब की सांझो जिना मरयां चे जिन्दा होणे बाद उदे सोगी खादा पीता। 42 कने उनी सांझो हुकम दिता की सारे लोकां जो शुभसमाचार दा प्रचार करा कने गबाई दिया, की यीशु सेई है जिसयो परमेश्वरे जिंदे कने मरयां दा न्याय करणे तांई बणाया है। 43 उदी सारे परमेश्वरे दे संदेश देणेबाले गबाई दिन्दे न की जडा कोई उदे पर भरोसा करगा, उसयो जडा मसीहे सूली पर किता उदिया बजा ला ही पापां दी माफी मिलणी है। 44 जालू पतरस ऐ गल्लां बोला दा ही था की सारे बचन सुणने बालयां पर पबित्र आत्मा उतरी आई। 45 कने जितणे भी यहूदी भरोसा करणे बाले पतरसे सोगी आयो थे, सै सारे हेरान होऐ की होरनी जातियां जो भी पबित्र आत्मा दा तोफा दिता है। 46 क्योंकि उना जो भांति-भांति दियां बोलियां कने परमेश्वरे दी बडाई करदे सुणाया। इस पर पतरसे बोलया, 47 “क्या इना जो हुण कोई पांणिऐ ला रोकी सकदा है की इना जो बपतिस्मा ना मिल्ले, जिना जो साडे सांई परमेश्वरे दिया तरफा ला पबित्र आत्मा मिलियो है?” 48 कने पतरसे उना जो हुकम दिता जडे लोक कुरनेलियुस दे घरे गठुयो थे की यीशु मसीह दे नाऐ ने बपतिस्मा लिया। तालू उना पतरसे ला बिनती किती की थोड़े रोज होर रेई जा साडे सोगी कने इस तांई सै कुछ रोजां तांई रेई पिया।

11 प्रेरितां कने चेलयां जडे यहूदिया प्रदेशे च थे, उना सुणाया, की होरनी जातियां भी परमेश्वरे दा बचन मनी लिया है। 2 कने जालू पतरस यरूशलेम शेहर च आया, तां यहूदी विश्वासी उसला शिकायत करणा लग्गे, 3 “तू होर जातियां दे लोकां दे घरे जाई करी उना सोगी रोटी खादी।” 4 तालू पतरसे उना जो शुरू ला सारियां गल्लां सुणाईयां, जडियां ओथु होइयां थियां; 5 “मै याफा शेहरे च प्राथना करा दा

था, कने बेसुध होईकरी इक दर्शण दिखया, की इक बडिया चादरा सांई कोई चीच चारो कुंणा ला रस्सियां ला बनूईयो अम्बरे ला धरती पासे उतरी करी मेरे बाल आई। 6 जालू मै उस पर ध्यान दिता, तां मै धरतिया दे चारा पैरां बाले जानवर कने जंगली जानवर कने रेंगणेबाले जीव कने अम्बरे दे पंछी दिखे; 7 कने मै इक अबाज सुणी जड़ी मिंजो बोला दी थी की, हे पतरस उठ मार कने खा। 8 मै बोलया, ‘नी प्रभु जी! क्योंकि कोई अपबित्र या अशुद्ध चीज मेरे मुए च कदी नी गेई।’ 9 इदे जबाब च अम्बरे ला दूजी अबाज आई, जडा कुछ परमेश्वरे शुद्ध बणाया है, उसयो अशुद्ध मत बोल। 10 तिन बरी ऐदिया होया, तालू सारा कुछ अम्बरे पासे दोबारा चली गया। 11 कने झट तिन माणु जडे कैसरिया शेहरे ला मेरे बाल भेजयो थे, सै घरे दे दरबाजे पर आई खडोते, जिस घरे च असां थे। 12 तालू पबित्र आत्मा मिंजो बेझिझक उना सोगी चली जाणे जो बोलया, कने ऐ छे भाई भी मेरे सोगी चली पे, कने असां उस माणुऐ दे घरे पुज्जी गे। 13 कने उनी दसया, की मै स्वर्गदूते जो अपने घरे खडोतया दिखया, जिनी मिंजो बोलया, याफा शहर जो इक माणु भेजी करी शमौने जो जिसयो पतरस बोलदे न, सदी ले। 14 उनी तिजो ने ऐसिया गल्लां बोलणियां न, जिना ने परमेश्वरे तिजो कने तेरे सारे घराने दे लोकां जो बचाणा। 15 जालू मै गल्लां करणा लग्गा तां पबित्र आत्मा उना पर तियां ही उतरी, जियां शुरू च पिन्तेकुस दे त्योहारे दे बकत सांझो पर उतरियो थी। 16 तालू मिंजो प्रभु दा सै बचन याद आया, जडा उनी बोलया, यूहन्ना तां पांणिऐ ला बपतिस्मा दिता, पर परमेश्वरे तुहाडे सोगी रेणे तांई पबित्र आत्मा जो भेजणा। 17 इस तांई ऐ साफ है की परमेश्वरे उना होर जातियां जो भी सेई दान दिता, जडा सांझो प्रभु यीशु मसीह दे नाऐ पर भरोसा करणे ला मिल्ला, तां मै कुण था जडा परमेश्वरे जो रोकी सकदा था?” 18 ऐ सुणीकरी, यहूदी विश्वासी चुप रे, कने परमेश्वरे दी बडाई करी बोलणा लग्गे, “तां परमेश्वरे होर जातियां जो भी हमेशा दी जिन्दगी अपने बुरे कम्मा जो छडी करी यीशु मसीह पर भरोसा करणे ने दान दिता है।” 19 स्तिफनुसे दे मारे जाणे बाद, केई यीशु मसीह पर भरोसा करणे बालयां यरूशलेम शेहरे जो छडी दिता कने तितर बितर होई गियो थे, सै चलदे-चलदे फीनीके इलाके कने साइप्रस द्वीप कने सीरिया प्रदेशे दे अन्ताकिया शहर च पुज्जे, पर यहूदियां जो छडी करी कुसी होरसी जो परमेश्वरे दा बचन नी सुणादें थे। 20 पर उना च कुछ विश्वासी साइप्रस बासी कने कुरेनबासी थे, जडे अन्ताकिया शेहरे च आए कने होर

जातियां जो भी प्रभु यीशु दे शुभसमाचार दियां गल्लां सुणाणा लग्गे। 21 कने प्रभु दिया शक्तिया दा हथ उना पर था, कने मते लोकां उना दे प्रचार पर भरोसा किता कने प्रभु यीशु मसीह पर भरोसा करणा लग्गी पे। 22 तालू इना होईयां गल्लां दी खबर यरूशलेम शेहरे दिया कलीसिया सुणी, कने उना बरनबास जो अन्ताकिया शेहर भेजया। 23 सै ओथु पुज्जी करी, कने परमेश्वरे दे अनुग्रह जो दिखीकरी खुश होया, सारयां जो उपदेश दिता की तन मन लाईकरी प्रभु सोगी लिपटी रिया। 24 बरनबास इक भला माणु था, कने पबित्र आत्मा कने भरोसे ने भरई गिया था, कने होर मते लोकां प्रभु यीशु मसीह पर भरोसा किता। 25 तालू बरनबास अन्ताकिया शेहर छडी करी शाऊल जो तोपणे तांई तरसुस शेहर जो चली गिया। 26 कने जालू उसने मिल्ला तां उसयो अन्ताकिया शेहर जो लेई आया, कने इयां होया की शाऊल कने बरनबास इक साले दीकर कलीसिया सोगी मिलदे कने मते लोकां जो यीशु मसीह दे बारे च सिखांदे रे, कने चेलयां जो सारयां ला पेहले अन्ताकिया शेहर च ही मसीही बोलया। 27 उना रोजां च केई भरोसा करणे बाले जडे परमेश्वरे दा संदेश देणेबाले थे, यरूशलेम शेहर ला अन्ताकिया शेहर जो आए। 28 उना चे अगबुसे नाए दे परमेश्वरे दा संदेश देणेबाले खडे होईकरी पबित्र आत्मा दिया प्रेरणा ला ऐ दसया, की सारे संसारे च बड़ा बड़ा अकाल पोंणा है, कने सै अकाल सम्राट कलौदियुस दे बेले पिया। 29 तालू चेलयां यहूदिया प्रदेश दे मसीह पर भरोसा करणे बालयां तांई अपणी पौंच दे साबे ला सहायता देंगे दा फेसला किता। 30 कने उना इयां ही किता, कने बरनबास कने शाऊल दे हथे अगुवां बाल कुछ पैसे भेजी दिते।

12 उस बकत हेरोदेस राजे कलीसिया दे कुछ लोकां जो दुख देंगे तांई बन्दी बणाई लिया। 2 कने उनी प्रेरित याकूबे जो तलवारा ला मरवाई दिता, जडा प्रेरित यूहन्ना दा भाई था। 3 जालू उनी दिखया, की यहूदी लोक इसला खुश होंदे न, तां उनी पतरसे जो भी पकड़ी लिया। सै अखमीरी रोटिया दे त्योहारे दा बकत था। 4 कने राजा हेरोदेसे उसयो पकड़ी कर जेला च पाई दिता, कने उदी रखबालिया तांई, चार-चार सिपाईयां दे चार दलां दा पेहरा लाइ दिता। कने सै चांदा था की फसह दे त्योहारे बाद लोकां सामणे उदा न्याय करे। 5 पतरसे जो कुछ दिना तांई जेला च रखया, पर कलीसिया उदे तांई मन लाईकरी परमेश्वरे ला प्राथना करा दी थी। 6 कने जालू राजा हेरोदेसे उदा न्याय करणे तांई उसयो लोकां सामणे लोंणे बाला था, उसला इक रात पेहले पतरस दों सुंगला ला बनया, दों स्पाईयां दे बिच सुतया था,

कने पहेरे दार दरबाजे पर जेला दी रखबाली करा दे थे। 7 तां अचानक प्रभु दा इक स्वर्गदूत पतरसे बखे आई खड़ोता कने उस कोठरी च इक चमकीली लौ होई गई, कने उनी पतरसे दियां पसलिया पर हथ मारी करी उसयो जगाया, कने बोलया, “उठ, जल्दी उठ।” कने उदे हथां ला सुंगल खुली करी पेई गे। 8 तालू स्वर्गदूते उसयो बोलया, “लके बन, कने अपने जुतयां पाई ले।” उनी तियां ही किता, फिरी स्वर्गदूते उसयो बोलया, “अपणे बाहरी कपड़े जो पाई करी मेरे पिच्छे चली पो।” 9 सै निकली करी उदे पिच्छे चली पिया, पर सै ऐ नी जाणदा था की जड़ा कुछ स्वर्गदूत करा दा है, ऐ सच्च था, पर सै ऐ समझा दा था की मैं दर्शन दिखा दा है। 10 तालू सै चली करी पेहले कने दुऐ पहेरे ला निकली करी उस लोहे दे फाटके पर पुज्जे, जड़ा शेहरे पासे लेई जांदा था, सै फाटक उना तांई अपु ही खुली गया, कने सै निकली करी इकी गलिया च होईकरी गे, इतणे च स्वर्गदूत उसयो छडी करी चली गया। 11 तालू पतरसे होशा च आई करी बोलया, “हुण मिंजो सच्च पता लगी गया है, की प्रभुऐ अपना स्वर्गदूत भेजी करी मिजों राजा हेरोदेसे दे हथे ला छुड़ाई लिया है, कने यहूदी अगुवां दी सारी आस तोड़ी दिती।” 12 ऐ जाणी करी की परमेश्वरे उसयो बचाई लिया है, तां सै मरियम दे घरे गया, जड़ी यूहन्ना दी माता थी, कने उदा दुज्जा ना मरकुस भी था। ओथु मते चेले गिठे होईकरी प्राथना करा दे थे। 13 जालू पतरसे बाहरे बाले दरबाजे जो खड़काया तां स्दे नाऐ दी इक दासी सुणने तांई आई। 14 कने पतरसे दी अबाज पछेणी करी, खुशिया दे मारे उना दरबाजा नी खोलया, पर दोड़ी करी अंदर गई, कने दसया की पतरस दरबाजे पर खड़ोतया है। 15 उना उसा जो बोलया, तू पागल है। पर सै अड़ी रेई की सै पतरस ही है, तालू उना बोलया, “सै पतरसे दा स्वर्गदूत होणा।” 16 पर पतरस दरबाजा खड़कांदा रिया कने उना दरबाजा खोलया, कने उसयो दिखीकरी हेरान होई गे। 17 तालू पतरसे उना जो हथे ला इशारा किता की चुप रिया, कने उनी दसया की प्रभुऐ कियां मिंजो जेला ला कडी लयोंदा है। फिरी बोलया, “याकूब कने भाईयां जो ऐ गल्ल दसी दिनयो।” तालू पतरस निकली करी दुज्जी जगा जो चली गया। 18 ब्यागा जेला दे सिपाईयां च बड़ा हल्ला पेई गया की, पतरस कुथु गया। 19 जालू राजा हेरोदेसे उसयो तोपणे दा हुकम दिता पर सै तोपी नी सके, तां पहेरे दारां ला पूछताछ किती कने जालू सै जबाब नी देई सके तां उना जो मारणे दा हुकम देई दिता, कने पतरस यहूदिया प्रदेशे जो छडी करी कैसरिया शेहरे च जाई करी रेणा

लगा। 20 राजा हेरोदेस सूर कने सैदा शेहरे दे लोकां ला बड़ा जादा गुस्सा था। इस ताई उना शेहरां दे लोक राजा हेरोदेस ला मिलणे ताई इक मन होईकरी आये। सारयां ला पेहले, उना बलास्तुस ला सहायता मंगी जडा राजे दा खास कर्मचारी था। तां उना राजा हेरोदेसे ला शान्ति स्थापना ताई बोलया क्योकि सै अपने खांणे पिणे दियां जुररतां ताई राजे दे देशे पर निर्भर थे। 21 जिस रोजे राजा हेरोदेसे उना शेहरे दे लोकां ने मिलणे दा फेसला किता, उस रोज सै राज कपडे पाई करी सिहांसने पर बैठा, कने प्रजा जो भाषण देणा लग्गा। 22 कने लोक उदी बड़ाई करणे ताई ऐ बोलणा लग्गे कि, “ऐ तां माणुऐ दी नी, पर कुसी देवते दी अबाज है।” 23 उसी बेले प्रभुऐ दे इकी स्वर्गदूते आई करी राजा हेरोदेस पर वार किता क्योकि उनी परमेश्वरे दी महिमा नी किती कने उदे शरीर च कीड़े पेई गे कने सै मरी गया। 24 पर परमेश्वरे दा बचन फलदा गया कने भरोसा करणे बालयां दी गिणती बददी गई। 25 जालू बरनबास कने शाऊले यहूदिया प्रदेशे च अपनी सेवा दे कम्मे जो पूरा करी लिया तां सै यरूशलेम शेहरे ला अन्ताकिया शेहरे जो मुडी आए। यूहन्ना जिसयो मरकुस भी बोलदे न सै सोगी था।

13 अन्ताकिया शेहरे दिया कलीसिया च परमेश्वरे दा संदेश देणेबाले कने गुरु थे; मतलब की बरनबास कने शमौन जिदा दुज्जा ना निगर भी था; कने लूकियुस कुरेनी शेहर, कने चौथाई देशे दे राज हेरोदेसे दा दूध भाई मनाहेम कने शाऊल। 2 जालू सै बरत रखीकरी प्रभु दी भक्ति करा दे थे, तां पबित्र आत्मा बोलया, “मेरे ताई बरनबास कने शाऊल जो मेरी सेवा करणे ताई लग करा जिदे ताई मैं उना जो सदया है।” 3 तालू उना बरत कने प्राथना करिरी कने उना पर हथ रखीकरी उना जो परमेश्वरे दा कम्म करणे ताई भेजया। 4 शाऊल कने बरनबास पबित्र आत्मा दे जरिये भेजे गे, सै अन्ताकिया शेहर ला सिलुकिया शेहरे दिया बन्दरगाह जो गे, कने ओथु ला जहाजे पर चढी करी साइप्रस टापू दी सलमीस बंदरगाह जो चली गे। 5 सलमीस शेहर च पुज्जी करी, उना परमेश्वरे दा बचन यहूदी जंज घरां च सुणाया, कने यूहन्ना जिसयो मरकुस भी बोलदे थे सै उना दी सहायता करणे ताई उना सोगी था। 6 इदे बाद उना पुरे टापूऐ च इक शेहर ला दुज्जे शेहर दी यात्रा किती कने आखिर च पाफुस शेहरे च पुज्जे। ओथु उना जो बार-यीशु नाऐ दा इक जादूगर मिल्ला जडा यहूदी कने झूठा संदेश देणेबाला था। 7 सै टापूऐ दे राज्यपाल सोगी था, जिदा ना सिरिगियुस पौलुस था, कने सै बड़ा बुद्धिमान माणु था। राज्यपाले

बरनबास कने शाऊल जो परमेश्वरे दा बचन सुणने ताई अपणे बाल सदया। 8 पर जादूगर बार-यीशु, जिसया युनानी भाषा च एलीमास बोलदे न, उना दा बिरोध करदा रिया, उदी कोशिश थी की सै राज्यपाल जो यीशु मसीह पर भरोसा करणे ला रोके। 9 तालू शाऊले जिदा ना पौलुस भी है, पबित्र आत्मा ला भस्ई करी जादूगरे पासे इक टक लाईकरी दिखीकरी बोलया, 10 “हे सारे कपट कने चलाकिया ला भस्यो सैताने दी ओलाद, सारिया धार्मिकता दे दुशमण, क्या तू प्रभु दिया सचाइया जो भ्रष्ट करणा नी छडणा? 11 हुण दिख, प्रभु तिजो सजा देंगे बाला है, कने तू थोड़े बकते ताई अन्ना रेंणा कने तू सूरजे जो नी दिखी सकणा।” तालू झट धुंधलापन कने उदे अगगे नेहेरा होई गया, कने सै रूआं प्रां टटोलणा लग्गा ताकि कोई उदा हथ पकड़ी करी उदी सहायता करे। 12 तालू राज्यपाले जडा कुछ होया था, दिखीकरी कने प्रभु दियां शिक्षा ला हेरान होईकरी उनी यीशु मसीह पर भरोसा किता। 13 पौलुस कने उदे साथियां पाफुस शेहरे ला समुंदी यात्रा शुरू किती कने सै पंफूलिया प्रदेशे दे पिरागा शेहरे च जाई पुज्जे, कने यूहन्ना मरकुस उना जो छडी करी यरूशलेम शेहरे जो बापस आई गया। 14 कने पिरागा शेहरे ला अगगे चली करी गलातिया प्रदेशे दे पिसिदिया जिल्ले दे बखे अन्ताकिया शेहर च पुज्जे; कने सब्ते दे रोजे च यहूदी जंज घर च जाई करी बैठी गे। 15 मूसा दी व्यवस्था कने परमेश्वरे दे संदेश देणेबालयां दी कताबां ला पढने बाद यहूदियों दे जंज घरे दे सरदारां उना जो बोली भेजया, “हे भाईयो, अगर तुसां चे कुसी बाल लोकां जो शिक्षा देंगे ताई तूहाड़े मने च कोई बचन है तां बोला।” 16 तालू पौलुस खडा होया कने उना जो हथे ला चुप रेणे दा इशारा करिरी बोलया, “हे इस्राएलियां, कने परमेश्वरे ला डरने बाले होर जाति दे लोको, सुंणा।” 17 इना इस्राएली लोकां दे परमेश्वरे साडे पूर्वजां जो चूणी लिया है, कने जालू ऐ मिस्र देशे च परदेसी होईकरी रेंदे थे, तां उना जो गिणतिया च बढ़ाई दिता; कने उना जो अपणिया शक्तिया ला उस देशे ला कडी लांदा। 18 कने सै कोई चालियां साला दीकर सुनसान जगा च उना दी सेहदां रिया, चाहे सै बार-बार परमेश्वरे दे हुकम दे खिलाफ जांदे थे। 19 कने कनान देशे च सत जातियां जो खत्म करिरी उना दा इस्राएली लोकां जो बिरासत च देई दिता। 20 साडे पूर्वजां मिस्र देशे च पुज्जे बाद चार सौ पजां सालां बाद कनान देशे पर अधिकार करणा शुरू किता, इदे बाद परमेश्वरे दे संदेश देणेबाले शमूएल दे ओणे दीकर परमेश्वरे इस्राएल दे लोकां पर राज करणे ताई

मुखिए नियुक्त किते। 21 जालू शमूएल हले दीकर उना दा अगुवा ही था, उना इक राजा मंगया, तालू परमेस्वरे बिन्यामीन दे गोत्र चे इक माणुए जो मतलब की कीश दे पुत्र शाऊले जो उना दा राजा बणाया, उनी चालियां सालां दीकर इस्राएल दे लोकां पर राज किते। 22 फिरी परमेस्वरे शाऊल जो राजे दे पद ला हटाई करी उदिया जगा पर दाऊदे जो उना दा राजा बणाया, जिदे बारे च उनी गबाई दिती, मिंजो इक माणु, यिशै दा पुत्र दाऊद, मेरे मने दिया इच्छा दा माणु मिली गया है। उनी मेरियां सारियां इच्छा पुरियां करणियां। 23 उदे ही बंशे चे परमेस्वरे अपणे बायदे दे अनुसार इस्राएले तांई इक उद्धारकर्ता, मतलब की यीशु भेजया। 24 जिदे ओणे ला पेहले यूहन्ने प्रचार किता की सारे इस्राएली लोकां जो अपणे पापां दा पश्चाताप करणे कने परमेस्वरे पासे फिरणे कने बपतिस्मा लेंणे दी जरूरत है। 25 जालू यूहन्ना अपणी सेबा पुरिया करणे पर था, तां उनी बोलया, तुसां मेरे बारे च क्या सोचदे न? मैं मसीह नी है! दिखा, मेरे बाद इक ओणे बाला है, सै बड़ा जादा महान है, मैं तां उदे जुतयां दे तस्मे खोलणे दे काबील भी नी है। 26 “हे मसीह भाईयो, तुसां जडे अब्राहमे दी ओलाद न कने परमेस्वरे ला डरणे बाले होर जाति दे लोको, परमेस्वरे साडे बाल यीशु दे बारे च ऐ संदेश भेजया है जडा लोकां जो बचांदा है। 27 यरूशलेम शेहरे दे लोकां कने उदे अगुवां मसीह जो पछेणया नी कने उना परमेस्वरे दे संदेश देणेबालयां दे बचना जो नी समझया जिना जो सै हर सब्त दे रोजे पढ़े थे। इस तांई उना उसयो दोषी बोली करी परमेस्वरे दे संदेश देणेबालयां दे बचना जो पूरा किते। 28 उना जो मौत दी सजा देंणे दे लायक उदे च कोई दोष नी मिल्ला, फिरी भी उना राज्यपाल पिलातुसे ला बिनती किती, की उसयो मारी दे। 29 कने जालू उना सै सब कुछ किता जडा पबित्र शास्त्र उदे बारे च बोलदा है, तां उदिया लाशा जो सूली ला उतारी करी कबरा च रखया। 30 पर परमेस्वरे उसयो मरयां चे जिन्दा किते, 31 कने जडे चेले यीशुए सोगी गलील प्रदेश ला यरूशलेम शेहरे च आयो थे, उना जो बडे रोजां दीकर मिलदा रिया; सै हुण लोकां सामणे उदे गबाह न। 32 असां तुहांजो उसा प्रतिज्ञा दे बारे च जड़ी पूर्वजां ला कितियो थी, ऐ शुभसमाचार सुणादें न, 33 की परमेस्वरे यीशुए जो मरयां ला जिन्दा करिरी, साडे सोगी वायदे जो पूरा कितया, जडे उना दी संतान न; जियां दुज्जे भजन संहिता च परमेस्वरे मसीह दे बारे च बोलया है की, तू मेरा पुत्र है, अज ही मैं तेरा पिता बणी गया है। 34 परमेस्वरे यीशुए जो मरयां चे जिन्दा करणे दा बायदा कितया था, कने उसयो

कबर च सडना नी दिता, परमेश्वरे ऐ बोलया है, मैं तिजो सै पबित्र कने पक्की आशीष देंगी जिना जो देंगे दा बायदा मैं राजा दाऊदे जो कितया था।” 35 राजा दाऊदे ऐ गल्ल होर भजन संहिता च भी बोलदा है की, “तू अपने पबित्र जन जो सडना नी देणा।” 36 क्योंकि राजा दाऊद तां परमेश्वरे दिया इच्छा दे अनुसार अपने बकते ने सेबा करिरी मरी गया, कने अपने पूर्वजां बाल जाई रिया, कने सडी भी गया, इसला सांझो पता लगदा है की दाऊद इस भजन च अपने बारे च गल्ल नी करा दा था। 37 पर सै यीशु मसीह दे बारे च बोला दा है जिसयो परमेश्वरे मरयां चे जिन्दा किता, कने सै सडया भी नी। 38 इस ताई, हे यहूदी भाईयो; मैं चांदा है की तुसां ऐ जाणी लिया की यीशु मसीह दे जरिये ही तुहांजो पापां दी माफी मिलदी है। 39 तुसां कदी भी मूसा दिया व्यवस्था दे जरिये परमेश्वरे दिया नजरा च धर्मी नी बणी सकदे। पर हर इक जणा जडा यीशु मसीह पर भरोसा करदा है, सै परमेश्वरे दिया नजरा च धर्मी है। 40 इस ताई ध्यान रखा, की जडा परमेश्वरे दे संदेश देणेबालयां बोलया है, सै तुहाडे सोगी ना हो: 41 हे निंदा करणे बालयो, दिखा, हेरान होआ, कने मिटी जा; क्योंकि मैं तुहाडे दिना च इक कम्म करदा है; ऐसा कम्म, की अगर कोई तुसां ला उदी चर्चा करे, तां तुसां कदी भरोसा नी करणा। 42 जालू पौलुस कने बरनबास यहूदी जंज घरे ला बाहर निकला दे थे, तां लोक उना ला बिनती करणा लगे की, अगले सब्ते दे रोजे ऐ गल्लां सांझो दोबारा सुणानयो। 43 जालू सभा खत्म होई, तां मते यहूदी कने मते होर जातियां दे लोक जडे यहूदी मते चे आयो थे पौलुस कने बरनबासे पिच्छे चली पे, कने उना जो गल्लां करिरी समझाया, की परमेश्वरे दे अनुग्रह च बणी रिया। 44 अगले सब्ते दे रोज शेहरे दे लगभग सारे लोक परमेश्वरे दा बचन सुणने जो गिठे होई गे। 45 पर जालू यहूदी अगुवां बडिया भिडा जो दिखया तां सै प्रेरितां ला जलना लगे, कने पौलुसे दे बचना दे बिरोध च बोलया कने उदी बेईजती किती। 46 तालू पौलुस कने बरनबासे बिना डरयो बोलया, जस्री था, की परमेश्वरे दा बचन पेहले तुहांजो सुणाया जांदा, पर तुसां उसयो नकारी दिता, कने अपने आपे जो हमेशा दिया जिन्दगिया दे लायक नी समझदे न, तां हुण, असां होरनी जातियां बाल जाणा।

(aiōnios g166) 47 क्योंकि प्रभु यीशुऐ सांझो ऐ हुकम दितया है, “मैं तिजो होरनी जातियां ताई ज्योति बणाया है, तुहांजो संसार च हर जगा लोकां जो दसणा है की मैं कियां उना जो बचाई सकदा है।” 48 ऐ सुणीकरी होर जातियां खुश होइयां, कने सै

परमेश्वरे दे बचने दी बड़ाई करणा लग्गे, कने जितणे लोक हमेशा दिया जिन्दगिया ताई बणायो थे, उना भरोसा किता। (aiōnios g166) 49 तालू प्रभु यीशु दा बचन उस इलाके च सारे पासे फेलणा लग्गा। 50 पर यहूदियां दे अगुवां भक्त कने कुलीन जनानिया जो कने शेहरे दे बड़े लोकां जो भड़काया, कने पौलुस कने बरनबास पर हमला करवाई करी उना जो सीमा दे बार कडी दिता। 51 तालू पौलुस कने बरनबासे उना सामणे अपने पैरां दी धुड़ झाड़ी, उना जो ऐ दसणे ताई की परमेश्वरे उना जो ठुकराई दितया है कने उना जो सजा देणी। फिरी सै इकुनियुम शेहरे जो चलीं गे। 52 कने चले अन्ताकिया शेहरे च आनंद ला कने पबित्र आत्मा ने भरूईं गे।

14 इकुनियुम शहर च ऐसा होया की पौलुस कने बरनबास यहूदी जंज घर च सोगी-सोगीं गे, कने ऐसियां प्रभावशाली गल्लां कितियां की, यहूदियाँ कने होर जातियां दोना चे मतयां यीशु पर भरोसा किता। 2 पर भरोसा नी करणे बाले यहूदियां होरनी जातियां दे मन मसीह भाईयां दे खिलाफ च भड़काए, कने उना दे मना च इना दे खिलाफ जहर भरी दिता। 3 कने पौलुस कने बरनबास मते रोजां दीकर ओथु रे, कने प्रभु यीशु दे भरोसे पर हिम्मत ला गल्लां करदे रे: कने प्रभु यीशुऐ उना जो अदभुत चिन्न चमत्कार करणे दी शक्ति दिती, ऐसा करी के यीशुऐ ऐ साबित किता की जिस अनुग्रह दे बारे च सै प्रचार करा दे न सै सच्चा है। 4 पर शेहरे दे लोकां च फुट पेई गियो थी, इसला कितणे ही तां यहूदियाँ पासे, कने कितणे ही प्रेरितां दे पासे होईं गे। 5 तालू होर जातियां कने यहूदी लोकां अपने सरदारां सोगी मिली करी उना पर हमला कने पथर मारणे फेसला किता। 6 जालू पौलुस कने बरनबास जो इसा गल्ला दे बारे च पता लग्गी गया, कने सै लुकाउनिया प्रदेशे दे लुब्बा कने दिरबे शेहरां च, कने अखे बखे दे इलाके च नठीं गे। 7 पौलुस कने बरनबासे ओथु पुज्जी करी लोकां जो शुभसमाचार सुणाया। 8 लुब्बा शहर च इक माणु बैठया था, उदे पैर कमजोर थे। सै जन्मे ला ही लगडा था, कने कदी नी चलया था। 9 सै पौलुसे जो गल्लां करदे सुणादा था कने पौलुसे दिखया की उनी भरोसा करी लिया है कने सै खरा होई सकदा है। 10 कने जौरे ला बोलया, “अपणे पैरां भार सीधा खड़ा हो।” तालू सै उछली करी चलणा फिरणा लग्गी पिया। 11 लोकां पौलुस दा ऐ कम्म दिखीकरी लुकाउनिया बोलिया च जौरे ने बोलया, “देवता माणुऐ दे स्मे च साड़े बाल आया है।” 12 कने उना बरनबास जो

यूनानी देवता ज्यूस दा ना दिता कने पौलुस जो हिर्मेस दा ना दिता, क्योंकि पौलुस मुख्य संदेश देंगे बाला था। 13 कने ज्यूसे दे उस मंदरे दा पुजारी जड़ा उना दे शेहरे सामणे था, दांद कने फुलां दे हार फाटके पर लेई आया क्योंकि सै लोकां सोगी बलि चढाणा चांदा था। 14 पर बरनबास कने पौलुस प्रेरितां जालू सुणाया, तां सै बड़े परेशान होऐ कने अपने कपड़े फाड़ी दिते, कने भिडा च चली गे, कने पुकारी करी बोलणा लग्गे, 15 “हे लोको, तुसां क्या करदे न? असां भी तुहाड़े सांई दुखे सुख भोगणे बाले माणु न, कने तुहांजो शुभसमाचार सुणादे न, ताकि तुसां इना बेकार दियां चीजां ला लग होईकरी जिंदे परमेश्वरे पासे आई जा, जिनी स्वर्ग कने धरती कने समुंद्रे कने जड़ा कुछ उना च है बणाया है। 16 उनी होए युगां च सारियां जातियां जो अपने-अपने रस्ते च चलणा दिता। 17 सै हमेशा अपने होणे दा सबूत उना खरियां चीजां ला दिन्दा है जड़ा सै करदा है, कने अम्बरे ला बरखा कने फलां बाली रित देईकरी तुहाड़े तांई खांणा कने तुहाड़े मना जो खुशिया ला भरदा रिया।” 18 ऐ बोली करी भी उना लोकां जो बड़ी मुशकिला ला रोकया की उना तांई बलिदान मत करा। 19 पर कितणे ही यहूदियाँ अन्ताकिया कने इकुनियुम शेहरां ला आई करी लोकां जो अपने पासे करी लिया, कने पौलुसे जो पथरा ने मारया कने उसयो मरया समझीकरी घसीटी करी शेहरे बाहर लेई गे। 20 पर जालू चेले उदे चारो पासे आई खडोते, तां सै उठी करी शेहरे जो बापस मुड़ी गया कने दुऐ रोजे बरनबासे सोगी दिरबे शेहरे जो चली गया। 21 पौलुस कने बरनबास दिरबे शेहरे दे लोकां जो शुभसमाचार सुणाई करी कने मते चेले बणाई करी। तालू सै लुम्ना शेहरे जो बापस चली गे। कने फिरी ओथु ला इकुनियुम शेहरे जो गे, कने फिरी सै पिसिदिया प्रदेश दे अन्ताकिया शेहरे जो गे। 22 कने हर शेहरे च चेलयां दे मना जो मजबूत करदे रे कने ऐ शिक्षा दिन्दे थे, की भरोसे च बणी रिया, कने ऐ बोलदे थे, “सांझो मते दुख झेली करी परमेश्वरे दे राज्य च दाखल होणा पोणा।” 23 कने उना हर इक कलीसिया च उना तांई अगुवे बणाऐ, कने प्राथना कने बरत करिरी उना जो प्रभु जो सोंपया जिंदे पर उना भरोसा कितया था। 24 कने पिसिदिया प्रदेश ला होंदे होए सै पंफुलिया जिल्ले च जाई पुज्जे; 25 कने उना पंफुलिया जिल्ले दे पिरागा शेहरे च परमेश्वरे दे बचने दा प्रचार किता कने अतलिया शेहरे जो आई गे। 26 कने अतलिया शेहरे ला जहाजे पर अन्ताकिया शहर जो मुड़ी आये, जिथू ला उना जो परमेश्वर दे अनुग्रह च सौपीकरी उस कम्मे तांई भेजया था जिसयो उना

जो पूरा किता। 27 अन्ताकिया शेहरे च पुज्जी करी उना कलीसिया गठेरी कने दसया, की परमेश्वरे साडे सोगी होईकरी कदे बड्डे-बड्डे कम्म किते कने कियां परमेश्वरे होर जातियां जो यीशु मसीह पर भरोसा करणे दे काबिल बणाया। 28 ओथु पौलुस कने बरनबास चेलयां सोगी मते रोज रे।

15 कुछ यहूदी मसीह पर भरोसा करणे बाले यहूदिया प्रदेशे ला अन्ताकिया शेहरे जो आये कने भरोसा करणे बालयां जो सिखाणा लग्गे: “अगर मूसा दिया व्यवस्था दे रिबाजे ला तुहाडा खतना नी होऐ तां तुहाडा उद्धार नी होई सकदा।” 2 जालू पौलुस कने बरनबास दा उना सोगी झगडा कने बडी बेहस होई तां कलीसिया दे अगुवां पौलुस कने बरनबास जो कने उना सोगी कुछ होर चेलयां जो यरूशलेम शेहरे जो जाणे तांई चुणया, ताकि सै इसा गल्ला दे बारे च प्रेरितां कने कलीसिया दे अगुवां सोगी चर्चा करन। 3 कलीसिया उना जो यात्रा तांई पैसे कने रोटीयां दा इंतजाम कराई करी भेजया, कने सै फीनीके कने सामरिया प्रदेशां ला होंदे होऐ कने ओथु दे भरोसा करणे बालयां जो दसया की होर जातियां दे लोकां कियां अपने पापां जो मन्नी लिया कने गलत कम्मा जो छडी करी यीशु मसीह पर भरोसा किता है। ऐ शुभसमाचार सुणीकरी सारे भरोसा करणे बाले भाई बडे खुश होए। 4 जालू सै यरूशलेम शेहरे च पुज्जे, तां कलीसिया कने प्रेरित कने अगुवे उना सोगी खुशिया ला मिल्ले, कने पौलुस कने बरनबासे दसया की परमेश्वरे उना सोगी होईकरी कदे-कदे कम्म किते थे। 5 पर फरीसियां दे दले दे लोकां चे जिना भरोसा कितया था, उना चे कितणयां ही उठी करी बोलया, “होर जातियां जो खतना कराणे कने मूसा दी व्यवस्था जो मनणे दा हुकम देणा चाईदा।” 6 तालू प्रेरित कने अगुवे इसा गल्ला दे बारे च बिचार करणे तांई गिठे होऐ। 7 तालू पतरसे बडी लम्बी बेहस होई जाणे बाद खडोई करी उना जो बोलया, “हे मसीह भाईयो, तुसां जाणदे न, कि मते रोज होऐ न, की परमेश्वरे तुसां चे मिंजो चूणी लिया है, ताकि मेरे जरिये होर जातियां शुभसमाचार दा बचन सुणीकरी भरोसा करन।” 8 कने मने जो जाणने बाले परमेश्वरे उना जो भी साडे सांई पबित्र आत्मा दिता, इयां करिके उनी दसया की उनी होर जातियां जो अपने लोक होणे तांई चुणी लिया है। 9 कने भरोसे दे जरिये उना दे मन शुद्ध करिरी सांझो च कने उना च कोई भी फरक नी रखया। 10 तां हुण तुसां कजो परमेश्वरे जो परखदे न, की साडी यहूदी व्यवस्था कने रिती रिबाजां जो मणने तांई इना होर जातियां दे भरोसा करणे बालयां पर भारी बोज पान,

जिसयो ना साडे बाप दादे चुकी सकदे थे कने ना असां चुकी सकदे न। 11 इयां करणा ठीक नी है, साडा भरोसा तां ऐ है कि जियां उना जो प्रभु यीशुऐ दे अनुग्रह ला उद्धार मिलणा, तियां ही सांझो भी मिलणा, ना की मूसा दिया व्यवस्था जो मन्नी करी। 12 तालू सारी सभा चुपचाप होईकरी बरनबास कने पौलुस दी सुणना लग्गी, जियां ही उना अदभुत चिन्न चमत्कारां दे बारे दसया जडे परमेश्वरे उना दे जरिये होर जातियां च किते। 13 जालू उना बोलणा बंद किता, तां याकूब बोलणा लग्गा, “हे मसीह भाईयो, मेरी सुंणा।” 14 शमौन पतरसे समझाया, कि परमेश्वरे पेहली बरी होर जातियां चे कुछ लोकां जो अपने लोक होणे ताई चुणी करी उना जो आशीष दिती। 15 कने होर जातियां दा परमेश्वरे दे लोक बणना ऐ उसा गल्ला ला सहमत होंदा है, जिदे बारे च परमेश्वरे दे संदेश देणेबालयां पबित्र शास्त्र च बडे पेहले लिखया था। 16 “तालू मै बापस ओणा कने दाऊद दे राज्य जो दुबारा बणाणा जडा उदे दुश्मणा वरबाद करी दितया है, कने उसयो दुबारा बणाई देणा। 17 इस ताई होर सारे लोक कने सारियां होर जातियां दे लोक जिना जो मै अपने लोक होणे ताई चुणया है, उना प्रभु जो तोपणा, 18 ऐ सेई प्रभु बोलदा है जडा बडे पेहले ला इना गल्लां दा समाचार दिन्दा आया है। (aiōn g165) 19 इस ताई मेरा बिचार ऐ है, कि सांझो होर जातियां ताई परमेश्वरे बाल मुडना कठिन नी बणाणा चाईदा; 20 पर असां उना जो इक चिट्ठी लिखी भेजन, की सै उस खाणे जो ना खान जिसयो लोकां मूर्तियां जो चढाया हो, कने ना व्यभिचार करदे कने ना ही गल्लां घोट्टी करी मारयो जानवरां दा मॉस खांदे कने ना ही खून खांदे। 21 क्योंकि पूराणे बकते ला शेहरे-शेहरे च मूसा दिया इस व्यवस्था दे प्रचार करणे बाले होंदे आये न, कने सै हर सब्ते दे रोजे यहूदी जंज घरां च पढी जांदी है।” 22 तालू यरूशलेम शेहरे दिया सारिया कलीसिया कने प्रेरितां कने अगुवां जो ऐ खरा लग्गा, कि अपने चे कुछ माणुआं जो चुणी करी पौलुस कने बरनबासे सोगी अन्ताकिया शेहरे जो भेजन, उना इस ताई यहूदा जो, जिसयो बरअब्बा भी बोलदे न, कने सीलास जो चुणया, कने ऐ दोनों कलीसिया च सारयां ला इज्जतदार अगुवे थे। 23 कने सै इसा चिठिया जो अपने सोगी लेई गे जिसा च लिखया था की, “ऐ चिट्ठी प्रेरितां कने अगुवां दिया तरफा ला है जडे तुहाडे भाई न, असां अन्ताकिया शेहरे दे कने सीरिया कने किलिकिया प्रदेशां दे होर जातियां दे लोकां जो जडे यीशु मसीह पर भरोसा करदे न, उना जो नमस्ते भेजदे न। 24 असां सुणाया है कि, साडे ऐथू यरूशलेम ला कुछ अगुवे ओथु

गे कने उना दियां गल्लां ला तुहांजो बुरा लग्गा कने तुसां दुखी होऐ, पर असां उना जो हुकम नी दितया था। 25 इस ताई असां इक मन होईकरी यहदा कने सीलास जो चुणने दा फेसला लिया, ताकि उना जो अपने प्यारे भाई बरनबास कने पौलुसे सोगी तुहाडे बाल भेजन। 26 ऐ तां ऐसे माणु न, जिना अपने प्राण साडे यीशु मसीह दी सेवा ताई खतरे च पायो न। 27 कने असां यहदा कने सीलास जो भेजया है, जिना तुहाडे सामणे अपने मुऐ ला ऐ गल्लां दस्सी देणियां न। 28 पबित्र आत्मा जो कने सांझो भी ऐ ठीक लग्गा कि इना जरूरी गल्लां जो छडी करी, तुहांजो पर होर बोझ ना पान; 29 कि तुसां मूर्तियां अगो चढायो खाणे जो मत खांदे, कने व्यभिचार कने गला घोट्टी करी मारयो जानवरां दा मॉस कने उना दा खून मत खांदे। अगर तुसां इना ला दूर रेंगे तां तुहाडा भला होणा। शुभकामना।” 30 फिरी कलीसिया उना जो ओथु ला भेजी दिता कने अन्ताकिया शेहरे च पुज्जे, कने सभा जो गठेरी करी उना जो चिट्ठी देई दिती। 31 कने सै उस उपदेशे जो पढी करी बडे खुश होए। 32 कने यहदा कने सीलासे जडे अपु भी परमेश्वरे दे संदेश देणेबाले थे, मतियां गल्लां ला भरोसा करणे बाले भाईयां जो शिक्षा देईकरी प्रोत्साहित कने मजबूत किता। 33 (यहदा कने सीलास थोडे हफते ओथु रे, कने मसीह भाईयां उना जो शांति दी आशीष देईकरी यरूशलेम शेहरे दिया कलीसिया च बापस भेजी दिता।) 34 पर सीलासे अन्ताकिया शहरे च रेणे दा फेसला किता, इस ताई यहदा किल्ला ही यरूशलेम शेहरे जो बापस चली गया। 35 कने पौलुस कने बरनबास अन्ताकिया शेहरे च रेई पे, कने होर मते लोकां सोगी प्रभु यीशु दे बचना दी शिक्षा कने शुभसमाचार सुणादें रे। 36 थोडे बकत बाद पौलुसे बरनबासे जो बोलया, “जिना-जिना शेहरां च असां प्रभु दे बचन सुणायो थे, ओआ, ओथु बापस जाई करी अपने विश्वासी भाईयां जो दिखदे न कि सै कदे न।” 37 तालू बरनबासे यूहन्ना जो जिसयो मरकुस बोलदे न, सोगी लेई जाणे दा बिचार किता। 38 पर पौलुसे बोलया यूहन्ने हार मन्नी लियो है कने सांझो छडी करी चली गया है जालू असां पंफूलिया इलाके च थे, इस ताई उसयो सोगी लेई जाणा खरा नी समझया। 39 ऐसी बेहस होई कि पौलुस कने बरनबास इकी दुज्जे ला लग होई गे, कने बरनबास, मरकुस जो लेईकरी जहाजे पर साइप्रस टापु जो चली गया। 40 पर पौलुसे सीलास जो चूणी लिया, कने मसीह भाईयां उना जो परमेश्वरे दे अनुग्रह च सौपी दिता कने फिरी सै दोनो ओथु ला अन्ताकिया शेहरे ला चली गया। 41 कने

फिरी सै पुरे सीरिया कने किलिकिया प्रदेशां च गे कने कलिसियां दे भरोसा करणे बालयां जो प्रोत्साहित करदे गे।

16 फिरी पौलुस दिरबे कने लुस्त्रा शेहरे च भी गे, कने ओथु तीमुथियुस नाए दा इक चेला था। उदी माता यहूदी विश्वासी थी, पर उदा पिता यूनान देशे दा था। 2 सै लुस्त्रा इकुनियुम शहरां दे भरोसा करणे बाले भाईयां चे इज्जतदार था। 3 पौलुसे दी इच्छा थी कि तीमुथियुस उदे सोगी चले, कने उनी तीमुथियुस दा खतना इस ताई कराया ताकि उस जगा दे यहूदी लोक उदी सुणन, क्योंकि सै सारे जाणदे थे, कि उदा पिता यूनानी था। 4 पौलुस कने उदे सोगी शेहरे-शेहरे जाई करी सै उना नियमां जो जडियां यरूशलेम शेहरे दे प्रेरितां कने अगुवां बणाईयां थियां, उना जो विश्वासियां बाल पुजांदे थे ताकि सै उना नियम दा पालन करन। 5 इयां कलीसिया भरोसे च मजबूत होंदी गई कने हर रोज गिणतिया च बददी गई। 6 कने सै फ्रूगिया कने गलातिया प्रदेशां चे होईकरी गे, क्योंकि पवित्र आत्मा उना जो आसिया प्रदेशे च बचन सुणाणे ताई मना किता। 7 कने उना मूसिया प्रदेशे दे बखे पुज्जी करी, बितूनिया प्रदेश जाणा चांदे थे; पर यीशुए दिया आत्मा उना जो जाणा नी दिता। 8 तां सै मूसिया प्रदेशे ला होईकरी बंदरगाह बाले शहर त्रोआस जो आए। 9 ओथु पौलुसे राती इक दर्शन दिखया कि इक मकिदुनी प्रदेशे दा मर्द खडोतया, कने उसला बिनती करी के बोलदा है, “समुन्द्रे पार उतरी करी मकिदुनिया प्रदेश च आ, कने साडी सहायता कर।” 10 जालू पौलुसे ऐ दर्शन दिखया, तालू असां झट मकिदुनिया प्रदेशे जो जाणे दी योजना बणाई, ऐ समझीकरी कि परमेश्वरे सांझो शुभसमाचार सुणाणे ताई सदया है। 11 इस ताई असां त्रोआस शेहरे ला जहाजे जरिये सुमानाके टापु च आए कने दुज्जे रोजे नियापुलिस शेहरे दिया बंदरगाह च आये। 12 ओथु ला असां फिलिप्पी शेहरे च पुज्जे, जडा मकिदुनिया प्रदेशे दा मुख्य शहर, कने रोमियां दी बस्ती है, कने असां उस शेहरे च थोडे रोजां दीकर रे। 13 सब्ते दे रोजे असां शेहरे दे फाटके बाहर खड्डा बखे ऐ सोची करी गे कि ओथु यहूदियों दी प्राथना करणे दी जगा होणी, कने बेईकरी उना जनानिया ने गल्लां करणा लग्गे, जडियां ओथु गठुइयां थियां। 14 कने ओथु इक लुदिया नाए दी जनानी उना दे बचन सुणा दी थी जडी थुआतीरा शेहरे ला बैजणी कपडे बेचदी थी, सै परमेश्वरे दी भक्त थी, कने परमेश्वरे उसा दा मन खोलया, ताकि सै पौलुसे दियां गल्लां पर ध्यान लगाए। 15 कने जालू उना अपने पुरे टब्बरे समेत बपतिस्मा

लिया, तां उना बिनती किती, “अगर तुसां मिजो परमेश्वरे पर भरोसा करणे बाली समझदे न, तां मेरे घरे रेणा चला,” “कने सै सांझो मनाई करी अपने घरे लेई गई।” 16 इक रोज जालू असां प्राथना करणे बालिया जगा जो चलयो थे, तां सांझो इक दासी मिली, जिसे च इक ऐसी बुरी आत्मा थी, जिदिया सहायता ला सै भविष्य दिखी लेंदी थी, कने सै अपने स्वामियां तांई मतां कुछ कमाई लौंदी थी। 17 सै पौलुसे कने साडे पिच्छे आई करी चिलाणा लगी, “ऐ माणु परम प्रधान परमेश्वरे दा दास है, सै तुसां जो दसा दे न कि कियां बची सकदे न।” 18 सै मते रोजां दीकर इयां ही करदी रेई, कने पौलुस दुखी होई गया, कने मुडी करी बुरी आत्मा जो बोलया, “मै तिजो यीशु मसीह दे नाए ने हुकम दिन्दा है, कि इसा चे निकली जा, कने सै तालू ही निकली गई।” 19 जालू उसा दे मालिके दिखया कि, साडिया कमाईया दी आस तां चली गई, तां सै पौलुस कने सीलासे जो पकड़ी करी चौके च प्रधाना बाल खिची लेई गे। 20 कने उना जो फौजदारिया दे हाकिमा बाल लेईजाई करी बोलया, “ऐ लोक जडे यहूदी न, साडे शेहरे च बडा हंगामा करा दे न, 21 कने ऐसे तरीके दसा दे न, जिना जो अपनाणा कने मनणा रोम देश च रेणे बालयां तांई ठीक नी है।” 22 तालू लोकां दी भीड़ पौलुस कने सीलासे दे बरोध च गिठी होईकरी चढी आई, कने हाकिमा उना दे कपडे फाडी करी उतारी दिते, कने उना जो डंडे मारणे दा हुकम दिता। 23 कने मते डंडे मारी करी उना जो जेला च पाई दिता, कने जेल अधिकारिये जो हुकम दिता कि साबधानी ला उना दी रखबाली करा। 24 कने ऐसा हुकम मिलणे ला उनी उना जो अंदरे बालिया कोठडिया च रखया कने उना दे पैरां जो लकड़िया दियां बेड़ियां ला जकड़ी दिता। 25 लगबग अधिया राती पौलुस कने सीलास प्राथना करदे होए परमेश्वरे दे भजन गा दे थे, कने कैदी उना दी सुणा दे थे। 26 कने इतणे च अचानक इक बडा बडा हिलण होया; ऐथू दीकर कि जेला दियां नियां भी हिली गईयां, झट सारे दरबाजे खुली गे, कने सारयां दे बंधन खुली गे। 27 कने दरोगा उठी होया, कने जेला दे दरबाजे खुले दिखीकरी समझया कि सारे कैदी नठी गियो न, कने सै तलबारा कडी करी अपने आपे जो मारणा लग्गा। 28 पर पौलुसे जोरे ने पुकारी करी बोलया, “अपणे आपे जो कुछ मत करदा, क्योंकि असां सारे ऐथू ही न।” 29 तालू सै दिख्या मंगाई करी अंदरे गया कने कमदा होया पौलुस कने सीलासे अग्रे पेई गया, 30 कने उना जो बार आंणी करी बोलया, “हे सजनो, उद्धार पाणे तांई मै

क्या करे?” 31 उना बोलया, “प्रभु यीशु पर भरोसा कर, तां तेरा कने तैरे घराने दा उद्धार होणा।” 32 कने उना उसयो कने उदे सारे घरे दे लोकां जो प्रभु दे बचन सुणाए। 33 कने राती उसी बेले उना जो लेईजाई करी उना दे जखम धोते, कने उनी कने उदे लोकां उसी बेले बपतिस्मा लिया। 34 कने उनी उना जो अपणे घरे लेईजाई करी, उना अग्रे खांणा रखया, कने सारे घराने समेत परमेश्वरे पर भरोसा करिरी खुशी मनाई। 35 जालू अगलिया ब्यागा हकीमा सिपाईयां जो ऐ बोली भेजया कि उना माणुऐ जो छडी दिया। 36 दरोगे ऐ गल्ल पौलसे जो सुणाई, “कि हाकिमा तुहांजो छडी देंगे दा हुकम भेजी दितया है, इस ताई हुण निकली करी शांतिया ने चली जा।” 37 पर पौलसे उना जो बोलया, “उना सांझो जडे रोम देश च रेणेबाले माणु न, बिना दोष साबित कितयो सांझो लोकां दे सामणे मारया कने जेला च पाया, कने हुण क्या सै चुपचाप बाहर निकाली देणा चांदे न? ऐसा नी होणा, पर सै अपु आई करी सांझो बार लेई जान।” 38 सिपाईयां ऐ गल्लां हाकिमा ने बोली दीतियां, कने सै ऐ सुणीकरी की सै रोम देशे दे नागरिक न, सै डरी गे, 39 कने आई करी उना ला माफी मंगी कने बार लेईजाई करी बिनती किती कि शेहरे ला चली जा। 40 सै जेला ला निकली करी लुदिया दे ऐथू गे, कने चेलयां ला मिली करी उना जो शांति दिती, कने चली गे।

17 फिरी पौलस कने सीलास अम्फिपुलिस शहर कने अपुल्लोनिया शहरे ला होईकरी थिस्सलुनीके शहरे च आए, जिथू यहूदी जंज घर था। 2 कने पौलस रोजे सांई उना बाल गया, कने तिन सब्तां दे रोजां पर पबित्र शास्त्रां ला उना सोगी चर्चा किती। 3 कने उना गल्लां दा मतलब खोली-खोली करी समझांदा था कि मसीह जो दुख होणा, कने मरयां च जिन्दा होणा जरूरी था; “ऐई यीशु जिदे बारे च मै प्रचार करता है, सेई मसिहा है।” 4 उना चे कुछ यहूदियां, कने परमेश्वर दा डर मनणे बाले यूनानियां कने मतियां खास जनानिया भरोसा उना दे बचना पर भरोसा करी लिया, कने पौलसे कने सीलासे सोगी जुडी गे। 5 पर यहूदियां जलना ने भरई करी बजारू लोकां चे केई बुरे माणुऐ जो अपणे सोगी लेई लिया, कने भीड़ लगाई करी शेहरे च दंगे करणा लग्गे, कने उना यासोने दे घरे पर हमला किता, सै पौलस कने सीलासे जो लोकां दे सामणे लौणा चांदे थे। 6 कने सै उना जो नी मिल्ले, कने सै चिलांदे होए यासोन कने उदे कुछ मसीह भाईयां जो शेहरे दे हाकिमा सामणे खिची लेई आये, “ऐ लोक जिना सारियां जगा च परेशानी पाईयो है, ऐथू

भी आयो न।” 7 कने यासोने उना दा अपणे घरे च स्वागत किता, कने ऐ सारे महाराजा कैसरे दे हुकमा दा बिरोध करदे न कने बोलदे न कि इक होर राजा है जिदा ना यीशु है। 8 जालू लोकां कने शेहरे दे हाकिमा ऐ गल्लां सुणियां तां सै परेशान होई गे। 9 कने उना यासोन कने बाकी लोकां जो जमानता पर छडी दिता। 10 चेलयां झट रातो रात पौलुस कने सीलास जो बिरीया शेहरे च भेजी दिता, कने सै ओथु पुज्जी करी यह्दी जंज घर च गे। 11 ऐ लोक तां थिस्सलुनीके शेहरे दे यह्दियां लोकां ला खुले दिले दे थे कने उना बडिया लालसा ला बचन जो अपनाया कने रोज पबित्र शास्त्रां च इना गल्लां जो तोपदे रेंदे कि ऐ गल्लां ऐसियां हेन कि नी न। 12 इस ताई उना चे मतयां, कने यूनान देशां दियां इज्जतदार जनानिया चे कने मर्दा चे मतयां भरोसा किता। 13 पर जालू थिस्सलुनीके शेहरे दे यह्दियां जो पता चला कि पौलुस बिरीया शेहरे च भी परमेश्वरे दा बचन सुणा दे है, तां सै ओथु आई करी भी लोकां जो भडकाणा कने हंगामा करणा लग्गे। 14 तालू चेलयां झट पौलुसे जो ओथु ला भेजी दिता कि तू समुंद्रे कंडे चली जा; पर सीलास कने तीमुथियुस बिरीया शेहरे च ही रेई गे। 15 सै लोक जडे पौलुसे जो लेई चलयो थे, सै उस सोगी एथेंस शेहरे दीकर गे, पर पौलुस दे इसी हुकमे सोगी सै बिरीया शेहरे जो मुडी गे कि सीलास कने तीमुथियुस जो झट ही उदे बाल भेजी दिया। 16 जालू पौलुस एथेंस शेहरे च उना दा इंतजार करा दा था, तां शेहरे जो मूर्तियां ला भुस्या दिखीकरी उदा मन बडा दुखी होया। 17 इस ताई सै हर सब्त दे दिन यह्दी जंज घरे च यह्दियां कने परमेश्वर दा डर मनणे बाले होर जाति दे लोकां सोगी बाद-बिबाद करदा कने चौंका पर जडे भी लोक मिलदे थे, उना ला हर रोज चर्चा करदा था। 18 तालू सै गुरू जडे इपिकूरी कने स्तोईकी करी के जाणे जांदे थे, इना चे कुछ उसला बेहस करणा लग्गे, कने केईयां बोलया, ऐ बकवास करणे बाला क्या बोलणा चांदा है? पर दुजयां बोलया, ऐ कुसी होरसी देशे दे देवतयां दा प्रचारक लग्गा दा है, क्योंकि सै यीशु दा कने मरयां चे जिन्दा होणे दा शुभसमाचार सुणादां था। 19 तालू सै उसयो अपणे सोगी अरियुपगुस नाये दे यह्दी महासभा जो लेई गे कने पुछ्या, “क्या असां जाणी सकदे न, कि ऐ जडी नोई शिक्षा तू सिखा दा है, सै क्या है? 20 क्योंकि तू सांझो अनोखियां गल्लां सुणादा है, इस ताई असां जाणना चांदे न की इना सारियां गल्लां दा क्या मतलब है?” 21 इस ताई की सारे एथेंस शेहरे दे बासी कने परदेसी जडे ओथु रेंदे थे, नोईयां-नोईयां गल्लां बोलणे कने सुणने

दे सिवा होर कुसी कम्मे च बकत नी बितांदे थे। 22 तालू पौलुसे अरियुपगुस नाये दी सभा दे बिच खडोई करी बोलया, हे एथेंस शेहरे दे लोको, मै दिखा दा है कि तुसां हर गल्ला च देवतयां जो बडा मंदे न। 23 क्योंकि मै गुमदे होए तुहाडियां अराधना करणे बालियां चीजां जो दिखा दा था, तां इक ऐसी वेदी भी मिली, जिसा पर लिखया था, “अनजाणे ईश्वरे ताई।” इस ताई तां जिसयो तुसां बिना जाणयो अराधना करदे न, मै तुसां जो उदा समाचार सुणादा है। 24 जिनी परमेश्वरे धरतिया कने उदियां सारियां चीजा जो बणाया है, सै स्वर्ग कने धरतिया दा मालिक होईकरी हथे ला बणायो मंदरा च नी रेंदा है। 25 ना ही कुसी चिजा दिया जुर्रता दिया बजा ला उसयो माणुए दिया सहायता दी जरूरत नी है, क्योंकि सै तां अपु ही सारयां जो जिन्दगी कने सारयां प्राणियां जो सांस कने सब कुछ दिन्दा है जडा उना जो जरूरत है। 26 उनी शुरू च इक ही माणुए ला सारे माणुआं दियां सारियां जातियां सारिया धरतिया पर रेणे ताई बणाईयां न; कने उनी माणुए जो जिणे ताई उना दी उमर कने उना दिया जगा जो तय कितया, 27 परमेश्वरे इस ताई किता ताकि लोक उसयो तोपन, कने होई सकदा है। सै उना जो तोपदे-तोपदे मिली जाए, असल च सै सांझो ला कुसी ला भी दूर नी है। 28 क्योंकि सै सेई है जडा साडे जिणे कने चलणे-फिरणे दी बजा बणदा है कने सै बणादां है जडे असां असल च हेन; कने ठीक तियां ही जदिया तुहाडे कवियां बोलया भी है, “असां तां उदे ही वंश भी न।” 29 इस ताई परमेश्वरे दी ओलाद होईकरी सांझो ऐ समझणा ठीक नी कि परमेश्वर, सोने या चांदी या पथरे सांई है, जडे माणुए दिया सोचा कने कारिगिरिया ला बणायो न। 30 इस ताई परमेश्वरे लोका दिया अज्ञानता दे युगां उपर ध्यान नी दिता, पर हुण हर जगा सारे माणुआं जो, अपने पापां जो मन्नी करी कने गलत कम्मा जो छडी देणे दा हुकम दिन्दा है। 31 क्योंकि उनी इक दिन तय कितया है, जिदे च उनी उस माणुए जरिये धार्मिकता ला संसारे दा न्याय करणा है, जिसयो उनी नियुक्त कितया है, कने उसयो मरयां चे जिन्दा करी के, इसा गल्ला दा सबूत सारयां लोकां जो देई दितया है। 32 कितणे ही लोक उस बकत मजाक उडाणा लग्गे, जालू उनी मरयां चे जिन्दे होणे दी गल्ल बोली, पर कितणे ही बोलणा लग्गे, “ऐ गल्लां असां तिजो ला फिरी कदी सुणे।” 33 ऐ सुणी करी पौलुस उना दे बीचे ला चली गया। 34 पर कुछ लोक उस सोगी मिली गे, कने प्रभु पर भरोसा किता; जिना च दियुनुसियुस जडा

अरियुपगुस दा सदस्य था, कने दमरिस नाए दी इक जनानी थी, कने उना सोगी होर भी कुछ लोक थे।

18 इदे बाद पौलुस एथेंस शेहरे जो छडी करी कुरिन्थुस शेहरे जो आया। 2 कने ओथु उसयो अक्विला नाए दा इक यहदी मिल्ता, जिदा जन्म पुन्तुस प्रदेश च होया था; कने अपणी घरे बाली प्रिस्किल्ला सोगी इतालिया प्रदेश ला थोडे बकत पेहले ही आया था, क्योंकि महाराजा क्लौदियुसे सारे यहदियां जो रोम देशे ला निकलीं जाणे दा हुकम दितया था, उसी हुकमे दिया वजा ला सै कुरिन्थुस शेहरे जो आये। 3 पौलुस उना ला मिलणा गया। पौलुस कने अक्विला दा इक ही कारोबार था; इस तांई तां सै उना सोगी रेईकरी कम्म करणा लग्गा, सै दोनों तम्बू बणाणे बाले थे। 4 कने पौलुस हर सब्ते दे रोजे यहदी जंज घर च चर्चा करिरी यहदियां कने यूनानियां जो भी यीशु मसीह पर भरोसा करणे तांई समझांदा था। 5 जालू सीलास कने तीमुथियुस मकिदुनिया प्रदेशे ला आये, तां पौलुसे तम्बूआं बणाणे दा कम्म छडी दिता कने अपणा सारा बकत बचन सुंणाणे च कने यहदियां जो गबाई देणे च लाई दिता कि यीशु ही मसीहा है। 6 पर जालू यहदी पौलुस दी बेइज्जती कने बिरोध करणा लग्गे, तां उनी अपने कपडयां दी धूड़ झाड़ी करी ऐ दसया की परमेश्वरे उना ला खुश नी है कने बोलया, “परमेश्वरे दे संदेश जो नी मनणे दिया बजा ला तुसां अपु ही उसा सजा तांई जिम्मेबार न, जडा तुसां जो परमेश्वर दी तरफा ला मिलणी है। मैं निर्दोष है। हुणे ला मैं होर जातियां बाल जाणा कने उना जो परमेश्वरे दे संदेश दा प्रचार करणा।” 7 कने पौलुस होर जाति दे लोकां जो बचन दी शिक्षा देंगे तांई यहदियां दे जंज घरे ला चली करी तितुस युस्तुस नाए दे इक होर जाति दे माणुए दे घरे होर जातियां दे लोकां जो बचन दी शिक्षा देणा आया, कने सै माणु परमेश्वरे दी अराधना करदा था, कने उदा घर यहदी जंज घरे ला नेडे ही था। 8 तालू यहदियों दे जंज घरे दे सरदार क्रिस्पुसे अपने सारे परिवारे समेत प्रभुए पर भरोसा किता; कने मतयां कुरिन्थस शेहरे च रेणे बालयां लोकां पौलुसे जो सुणीकरी भरोसा किता कने बपतिस्मा लिया। 9 कने प्रभुए राती जो दर्शण देईकरी पौलुसे ने बोलया, “डर मत, बोली जा चुप मत रे; 10 क्योंकि मैं तेरे सोगी है, कने कोई तिजो पर हमला करी कि तेरा नुक्सान नी करी सकदा है, क्योंकि इस शेहरे च मते ऐसे लोक न जडे मेरे लोक न।” 11 तांई तां पौलुस ओथु डेढ सालां दीकर परमेश्वरे दा बचन सिखांदा रिया। 12 जालू गल्लियो अखाया प्रदेशे दा हाकिम था तां यहदी लोकां

गिठे होईकरी पौलुसे दे खिलाफ खडे होई गे, कने उसयो कचेरी च लेई गे कने बोलणा लग्गे, **13** “कि परमेश्वरे दी भक्ति ऐसिया रितिया ला करा, जडा व्यवस्था ला बिलकुल उलटा है।” **14** जालू पौलुस बोलणा ही लग्गा, तालू ही गल्लिया यहदियां ला बोलया, “हे यहदियों, अगर ऐ कोई अन्याय या बुराईया दी गल्ल होंदी तां ठीक था कि मैं तुहाडी सुणदा। **15** पर अगर ऐ बाद-बिबाद अखरां कने ना दा है, कने तुहाडे यहदी दी व्यवस्था दे बारे च है, तां तुसां ही जाणा; क्योंकि मैं इना गल्लां दा न्यायी नी बणना चांदा।” **16** कने गल्लियो हुकम दिता कि सै उना जो कडी दे कने उनी उना जो कचेरिया ला कडी दिता। **17** तालू सारे लोकां यहदियों दे जंज घरे दे सरदार सोस्थिनेस जो पकडी करी कचेरिया सामणे ही मारणा शुरू करी दिता। पर गल्लिया इसा गल्ला दी कोई भी चिंता नी किती। **18** पौलुस मते रोजां दीकर कुरिन्थुस शेहरे च रिया, फिरी मसीह भाईयां ला विदा लेईकरी क्रिस्त्रिया शेहरे दिया बंदरगाह च जहाज तोपणे तांई चली गया। कने उसी शेहरे च पौलुसे अपना मुंडन कराई लिया, क्योंकि उनी इक सुखण सुखियो थी। बादे च सै पाणिये दे जहाजे ला सीरिया प्रदेश जो चली गया। उदे सोगी प्रिस्किल्ला कने अक्विला भी थे। **19** कने सै इफिसुस शेहरे च आये कने पौलुसे प्रिस्किल्ला कने अक्विला जो ओथु ही छडी दिता। कने अपु इफिसुस शेहरे दे यहदी जंज घर च जाई करी यहदियां ने बाद-बिबाद करणा लग्गा। **20** उना उसला बिनती किती की, “साडे सोगी थोडे रोज होर रेई ले।” पर सै नी मनया; **21** पर पौलुस उना ला ऐ बोली करी विदा होया की, “अगर परमेश्वरे चाया तां मैं तुहाडे बाल फिरी ओंगा।” तालू सै इफिसुस शेहरे ला जहाजे पर चढी करी चली गया; **22** कने सै कैसरिया शेहरे च उतरी करी यरूशलेम शेहरे जो गया कने ओथु सै कलीसिया दे लोकां ला मिली करी अन्ताकिया शेहरे च आया। **23** फिरी थोडे हफते ओथु रेईकरी अन्ताकिया शेहरे ला चली गया, कने गलातिया कने फ्रूगिया इलाकयां ला जांदे बेले ओथु दे सारे चेलयां जो मजबूत करदा गया। **24** अपुल्लोस नाए दा इक यहदी जिसदा जन्म सिकंदरिया शेहरे च होया था, सै बडा अकला बाला माणु था कने पबित्र शास्त्रां जो ढंगे ने जाणदा था, सै इफिसुस च आया। **25** उनी प्रभु दे रस्ते दी शिक्षा लियो थी, कने मन लाईकरी यीशुऐ दे बारे च सुणदा कने सिखांदा था, पर सै सिर्फ यूहन्ना दे बपतिस्मे दी गल्ल जाणदा था। **26** सै यहदी जंज घरां च बिना डरयो बोलणा लग्गा, जालू प्रिस्किल्ला कने अक्विला

उदियां गल्लां सुणीकरी, तां उना उसयो अपणे घरयो सदया कने परमेश्वरे दा रस्ता उसयो होर भी ढंगे ला दसया। 27 कने जालू अपुल्लोस अखाया प्रदेशे जो जाणा चांदा था, तां मसीह भाईयां उसयो प्रोत्साहित करिरी चेलयां जो लिखया कि सै उसला अच्छे ला मिलन, कने उनी ओथु पुज्जी करी उना लोकां दी बड़ी सहायता किती जिना अनुग्रह दिया बजा ला भरोसा कितया था। 28 क्योंकि सै सरेआम साबित करदा था की यहूदियां दी शिक्षा गलत है कने पबित्र शास्त्रे ला इदे सबूत भी दिन्दा था कि यीशु ही सै मसीहा है।

19 कने जालू अपुल्लोस कुरिन्थुस शहरे च था, तां पौलुस सड़का दे जरिये अंदरूनी इलाके ला होईकरी इफिसुस शहरे जो आया कने उदी मुलाकात कुछ चेलयां ला होई। 2 उनी बोलया, क्या तुहांजो भरोसा करदे बेले पबित्र आत्मा मिल्ली? उना उसयो बोलया, “असां तां पबित्र आत्मा दे बारे च सुणया भी नी है।” 3 तालू पौलुसे उना जो पुछया, “तां फिरी तुहाडा बपतिस्मा कियां होया?” उना बोलया, “असां यूहन्ना दा बपतिस्मा लिया।” 4 पौलुसे बोलया, “यूहन्ना उना लोकां जो बपतिस्मा दिता जिना पाप करणा छडी दितयो थे कने परमेश्वरे पासे मुडीं गे, पर उनी इस्राएल दे लोकां जो बोलया कि उसी इकी पर विश्वास करा जड़ा मेरे बाद ओणे बाला है, सै ही यीशु है।” 5 ऐ सुणीकरी उना प्रभु यीशु दे नाएे दा बपतिस्मा लिया। 6 कने जालू पौलुसे उना पर हथ रखया, तां उना पर पबित्र आत्मा उतरी, कने सै होर-होर बोलियां च बोलणा कने भविष्यवाणी करणा लग्गे। 7 सै सारे लगभग बारा मर्द थे। 8 कने तालू पौलुस यहूदी जंज घरे च जाई करी बिना डरयो तिन्न मिनयां दीकर बोलदा रिया, कने परमेश्वरे दे राज्य दे बारे च बेहस करदा कने समझांदा रिया। 9 पर उना बिचे ला कुछ लोक बडे जिदी थे उना भरोसा करणे ला मना करी दिता, कने लोकां सामणे यीशु मसीह दे इस रस्ते जो बुरा भला बोलणा लग्गे, इस तांई पौलुस अपणे चेलयां जो सोगी लेईकरी ओथु ला चली गया, कने हर रोज तरनुस दे स्कूले च जाई करी भरोसा करणे बालयां जो परमेश्वरे दे बारे शिक्षा दिन्दा कने समझांदा था। 10 दो सालां दीकर ऐई होदा रिया, कने आसिया प्रदेश दे रेहणे बाले सारयां यहूदियां कने सारे यूनानियां प्रभु दा बचन सुणी लिया। 11 कने परमेश्वर पौलुसे दे जरिये अनोखे चमत्कार दसदा था। 12 ऐथू दीकर कि रूमालां कने तौलियां जो उदे शरीर ला छुआई करी बिमारां पर रखदे थे, तां उना दियां बिमारियां खरियां होई जांदियां थियां; कने बुरियां आत्मा उना ला

निकली जांदियां थियां। 13 पर कुछ यहूदी मर्द जड़े जादू टोणा करिरी बुरियां आत्मा जो कडदे थे, सै यीशु दा ना बुरियां आत्मा जो कडणे ताई करदे थे, कने सै ऐ बोलदे थे की, “मै तुहांजो उस यीशु मसीह दे नाए ला जिदा प्रचार पौलुस करदा है बाहर निकलने दा हुकम दिन्दा है।” 14 कने स्क्किवा नाए दे इक यहूदी बड़े याजके दे सत्त पुत्र थे, जड़े इयां ही करदे थे। 15 पर बुरियां आत्मा जबाब दिता, “यीशुऐ जो मै जाणदी है कने पौलुसे जो भी जाणदी है, पर तू कुण है?” 16 कने उनी माणुऐ जिदे च बुरी आत्मा थी; उना पर झपटी करी, उना जो काबू करी लिया, कने उना दी ऐसी हालत किती, कि सै नंगे कने जख्मी होईकरी उसी घरे ला नठी गे। 17 कने जालू ऐ गल्ल इफिसुस शेहरे दे रेहणे बाले सारे यहूदी कने यूनानी जांणी गे, कने से सारे डरी गे; कने प्रभु यीशुऐ दे नाए दी महिमा किती। 18 कने जिना भरोसा कितया था, उना चे मतयां लोकां आई करी सबना सामणे अपने गलत कम्मा जो मन्नी लिया। 19 कने जादू टोणा करणे बालयां चे मतयां अपणियां-अपणियां पोथियां गिठियां करिरी सारे सामणे फुकी दितियां; कने जालू उना दी कीमत जोड़ी, तां सै पंजा झार चांदिये दे सिक्यां बराबर निकली। 20 इयां मतयां लोकां प्रभु यीशु दे बचना दे बारे च सुणया, कने बचन शक्तिशाली तरिके ला उना दियां जिंदगियां जो बदलदा गया। 21 जालू ऐ गल्लां होई गियां तां पौलुसे मकिदुनिया प्रदेश कने अखाया प्रदेश दे भरोसा करणे बालयां ला मिलणे बाद यरूशलेम शेहरे जो जाणे दा फेसला किता, कने उनी बोलया, “यरूशलेम शेहरे जो जाणे बाद मिजो रोम शेहरे जो जाणा भी जरूरी है।” 22 इस ताई उनी अपने साथियां चे तीमुथियुस कने इरास्तुस जो मकिदुनिया प्रदेश अपु ला पेहले भेजी दिता, कने अपु कुछ बकत आसिया प्रदेश दे इफिसुस शेहरे च रेई पिया। 23 उस बेले यीशु मसीह दे रस्ते दे बारे च बड़ा हंगामा होया। 24 क्योंकि दिमेत्रियुस नाए दा इक चांदी दा कारीगर था, जड़ा अरतिमिस यूनानी देवी दे मंदरे दे चांदी दे ढांचे बणवांदे था, कने कारीगरां जो उना बणाणे ताई बड़े पैसे दिन्दा था। 25 दिमेत्रियुसे अपने कारीगरां जो सदया कने इयोदियां चीजां दे कारीगरां जो गिठे करिरी बोलया, “हे भाईयो, तुसां जाणदे न कि इसी कम्मे ला सांझो कितणा पैसा मिलदा है। 26 कने तुसां दिखदे कने सुणदे न कि सिर्फ इफिसुस शेहरे च ही नी, बल्कि सारे आसिया प्रदेश दे सारे गां च, इनी पौलुसे ऐ बोली करी मते लोकां जो समझाया कने भटकाया भी है, कि जड़ी हथां दी कारीगिरी है, सै ईश्वर नी है। 27

कने सिर्फ़ इसा इकी गल्ला दा ही डर नी है, कि साड़े इस कम्मे दी इज्जत मान चली जाणा; बल्कि ऐ की हुण लोकां महान देवी अरतिमिसा दे मंदरे जो भी महत्व नी देणा कने खुद देवी अरतिमिस जिसा जो पूरे आसिया प्रदेशे च कने सारे संसारे दे लोक पूजदे न उसा दी इज्जत मान नी होणा।” 28 सारे कारीगर ऐ सुणीकरी गुस्से च आई गे कने चीलाई-चीलाई करी बोलणा लग्गे, “इफिसियों दी अरतिमिस, महान है।” 29 शेहरे दे केई होर लोकां चिल्लाणे दियां अबाजां सुणियां कने सै भी जाई करी भिडा सोगी मिली गे कने सारे शेहरे च हंगामा होई गया कने लोकां गयुस कने अरिस्तर्खुस कने मकिदुनिया प्रदेशे दे रेणे बालयां जो जड़े पौलुसे सोगी यात्री थे, पकड़ी लिया, कने गिठे होईकरी रंगशाला च दोड़ी गे। 30 पौलुस भी रंगशाला दे अंदर जाई करी लोकां ला गल्ल बात करणा चांदा था, पर चेलयां उसयो जाणा नी दिता। 31 आसिया दे हकीमा चे भी उदे दोस्तां उसयो बोली भेजया कने बिनती किती, की रंगशाला दे अंदर जाई करी अपणी जान खतरे च मत पांदा। 32 रंगशाला दे अंदर, सारे लोक चिल्ला दे थे, कोई कुछ बोला दा था कने कोई कुछ होर। सारा कुछ गड़ बड़ था, कने मते लोक तां ऐ जाणदे भी नी थे कि असां कजो गिठे होयो न। 33 तालू यहूदी लोकां सिकन्दरे जो भिडा चे धक्का देईकरी अग्गे करी दिता, कने सिकन्दरे लोकां जो चुप रेणे तांई हथे ला इशारा किता कने लोकां जो समझाणे दी कोशिश किती कि क्या होआ दा है। 34 पर जालू उना जो पता लग्गा कि सै यहूदी है, कने जड़े मसीही लोकां सांई मूर्तिपूजा नी करदे थे, तां सारे दे सारे इकी अबाजा च कोई दो घंटे दीकर चिलांदे रे, “इफिसियों दी अरतिमिस, महान है।” 35 तालू शेहरे दे मंत्रिऐ लोकां जो शांत करिरी बोलया, “हे इफिसियों दे वासियों, सारे जाणदे न कि इफिसुस शेहरे दे लोक महान देवी अरतिमिस दे मंदरे दी कने उदिया मूर्तिया दी रखबाली करदे न जड़ी अम्बरे ला पियो थी। 36 जालू कोई इना गल्लां ला इनकार नी करी सकदा है, तां ठीक है कि तुसां चुप रिया; कने बिना सोचया बिचारयो कुछ मत करा। 37 क्योंकि तुसां इना माणुऐ जो लेईकरी आयो न, जड़े ना ता मंदरे जो लूटणे बाले न, कने ना ही साड़िया देविया दी बुराई करणे बाले न। 38 इसी वजा ला अगर देमेत्रियुस कने उदे साथी कारीगरां जो कुसी ला कोई दिक्कत है तां कचेरी खुली है, उना दे मुकदमे दा इन्साफ करणे तांई अधिकारी भी हेन; ओथु लोक इकी दुज्जे पर इलजाम लगाई सकदे न। 39 पर अगर तुसां कुसी होर गल्ला दे बारे च कुछ पूछणा चांदे न, तां

शेहरे दिया सभा च फेसला होणा। 40 क्योंकि मिजों डर है की राज्यपाले इस सारे हंगामे दे बारे च सुणना कने बोलणा कि असां रोमी सरकार दे खिलाफ विद्रोह करणे दी कोशिश करा दे थे। इस ताई कि इदी कोई बजा नी है, कि असां इसा भिडा दे गिठे होणे दा जबाब नी देई सकणा।” 41 कने ऐ बोली करी उनी सभा जो बीदा किता।

20 जालू हंगामा स्की गया तां पौलुसे चेलयां जो सदीकरी उत्साहित किता, कने उना जो अलविदा बोली करी मकिदुनिया प्रदेश जो चली गया। 2 सै उस सारे प्रदेशे चे होईकरी कने चेलयां जो बड़ा उत्साहित करिरी सै यूनान प्रदेश च आया। 3 तिन्न महीने रेईकरी जालू सै ओथु ला जाजे पर सीरिया प्रदेश जो जाणा लगया था, पर उनी सुणया कि यहूदियां उसयो रस्ते च मारणे दी सलाह बणाईयो है, इस ताई उनी फेसला किता की मकिदुनिया प्रदेशे ला बापस ओदे होए सीरिया प्रदेशे जो जाए। 4 इसा यात्रा च बिरिया शेहरे दे वासी पुर्स दा पुत्र सोपत्रुस कने थिस्सलुनीकिया शेहरे ला अरिस्तर्खुस कने सिकुन्दुस कने दिरबे शेहरे दा गयुस, कने तीमुथियुस कने आसिया प्रदेशे दा तुखिकुस कने नुफिमुस उदे सोगी चली पै। 5 कने सोगी यात्री सांझो ला अगो चली गे कने त्रोआस शेहरे च पुज्जी करी सांझो नियालना लग्गे। 6 कने अखमीरी रोटियां दे त्योहारे दे बाद फिलिप्पी शेहरे ला जाजे पर चडी करी उना बाल पंजा रोजां बाद त्रोआस शेहरे च पुज्जे, कने सत रोज ओथु ही रे। 7 हफ्ते दे पेहले रोजे असां जालू प्रभु भोज खाणे ताई गिठे होए, तां पौलुसे जिनी दुऐ रोजे चली जाणा था, उना ला गल्लां कितियां, कने अधिया राती दीकर उना जो उपदेश दिन्दा रिया। 8 जिस उपरे बाले कमरे पर असां गिठे होयो थे, ओथु मते दिये बल्यो थे। 9 कने युतुखुस नाए दा इक जवान खिड़किया च बेईकरी निंदा ने झुला दा था, कने जालू पौलुस बड़िया देरा दीकर गल्लां करदा रिया, तां सै निंदा दे झुटारे ने तिजिया मंजली ला पेई गया, कने जालू कुछ लोकां आई करी उसयो चुक्या तां तालू दिकर सै मरी गया था। 10 पर पौलुस थले उतरया कने उदे बाल जाई करी उसयो गले ने लाईकरी बोलया, “घबरा मत; क्योंकि ऐ हल्ले भी जिंदा है।” 11 कने उनी दुबारा उपर जाई करी प्रभु भोज किता, कने अगली भयागा होणे दिकर गल्लां करदा रिया; कने फिरी सै चली गया। 12 फिरी सै उस जवाने जो ओथु ला जिन्दा लेई गे, कने बड़े खुश होए। 13 पौलुसे अस्सुस शेहरे ताई जमिनी यात्रा करणे दा फेसला किता, बाकी असां लोक

समुन्द्री जाजे ला अगो चलीं गे, कने असां ओथु ला उसयो अपणे सोगी जहाजे च लेई जाणे दी योजना बणा दे थे। 14 जालू पौलुस अस्सुस शेहरे च सांझो मिल्ला तां असां उसयो जाजे पर चढाई करी मितुलेने शेहरे जो आये। 15 दुऐ रोजे ओथु ला यात्रा करदे होये असां खियुस टापू च पुज्जे कने उसला अगले रोजे उदे बखे ला होईकरी सामुस टापू च पुज्जे कने उसला अगले रोजे मीलेतुस शेहरे जो आए। 16 क्योंकि पौलुसे इफिसुस शेहरे च नी जाणे दा फेसला किता क्योंकि सै आसिया प्रदेशे च होर जादा बकत नी बिताणा चांदा था, ताकि कुथी ऐसा ना होए कि, उसयो आसिया शेहरे च देर लगो; क्योंकि सै जल्दिया च था, कि अगर होई सके, तां सै पिन्तेकुस्त दे त्योहारे बाले रोजे यरूशलेम शेहरे च बकते पर पुज्जे। 17 कने जालू असां मीलेतुस शेहरे च उतरे, तालू पौलुसे इफिसुस शेहरे दिया कलीसिया दे अगुवां जो संदेशा गलाई भेजया की, सै आई करी उसयो मिलन। 18 जालू सै उदे बाल आये, तां उनी उना जो बोलया, “तुसां जाणदे न, कि मैं कियां तुहाड़े सोगी रिया, पेहले ही रोजे ला जालू मैं आसिया प्रदेशे च पुज्जा, तां मैं सारा बकत तुहाड़े सोगी ही बिताया। 19 मतलब की बड़िया दीनता ला, कने रोई-रोई करी, कने उना परीक्षां च जडियां यहदी लोकां दिया साजिशा दिया बजा ला मिंजो पर आईयां, मैं तमी प्रभु दी सेवा करदा रिया। 20 कने जडियां-जडियां गल्लां तुहाड़े फायदे दियां थियां, उना जो दसणे तांई कने लोका दे सामणे कने घरे-घरे जाई करी सिखाणे ला भी कदी नी डरया। 21 कने यहदी लोकां कने होर जातियां सामणे गबाई दिन्दा रिया कि परमेश्वरे सामणे अपणे पापां जो मनी लिया कने गलत कम्मा जो छडी दिया, कने साडे प्रभु यीशु पर भरोसा करा। 22 कने हुण, मैं पबित्र आत्मा दे जरिये मजबूर होईकरी यरूशलेम शेहरे जो चलया है, कने मिंजो नी पता कि ओथु मिंजो पर क्या-क्या बितणी है, 23 सिर्फ ऐई कि पबित्र आत्मा हर शेहरे च चेताबनी देईकरी मिंजो ला बोलदा है कि बंधन कने क्लेश तिजो तांई तैयार न। 24 पर मिंजो अपणी जिन्दगी ला कोई प्यार नी है, मैं तां बस अपणिया उसा दोडा जो, कने उस सेवा जो पूरा करणा चांदा, जड़ी मिंजो परमेश्वरे दे अनुग्रह दे शुभसमाचार पर गबाई देणे तांई प्रभु यीशुए ला मिलियो है। 25 कने मैं तुसां सारयां बिच परमेश्वरे दे राज्य दा प्रचार किता, कने हुण मैं जाणदा है तुसां चे कोई भी मिंजो दुबारा नी दिखणा। 26 इस तांई अजे दे दिन तुसां ला गबाई देईकरी बोलदा है, कि तुसां च अगर कोई भी यीशु पर भरोसा कितयो बिना मरी जादां है, तां से मेरी गलती नी है। 27

क्योंकि मैं तुसां जो सै सब कुछ दसया है जड़ा परमेश्वर चांदा है कि तुसां जाणन। 28 इसी ताई अपनी कने अपने झुंडे दी देखभाल करा; जिना च पबित्र आत्मा तुहांजो अगुवा बनाया है ताकि तुसां परमेश्वरे दिया कलीसिया दी रखवाली करन, क्योंकि परमेश्वरे उना जो अपने पुत्रे दा खून देईकरी खरीदया है। 29 मैं जाणदा है, कि मेरे जाणे बाद तुसां बिच झूठे गुरूआं ओणा है कने उना भरोसा करणे बालयां दा बडा नुकसान करणा। सै उना फाड़ने बाले भेड़ियां सांई होणे जड़े भेड़ां जो मारी दिन्दे न। 30 ऐथू दिकर की तुहाड़े अपने भरोसा करणे बालयां दे दले चे ऐसे लोक ओणे न, जिना चेलयां जो अपने पिच्छे खीचणे ताई उल्टियां सिदियां गल्लां करणियां न। 31 इस ताई ध्यान रखा, कने याद रखा कि मैं तिन्ना सालां दीकर रात दिन रोई-रोई करी, हर इकी जो चेताबनी देणा नी छडया। 32 कने हुण मैं तुहांजो परमेश्वरे जो, कने उदे अनुग्रह दे बचना जो सौपी दिन्दा है; जड़ा तुसां दे भरोसे जो मजबूत करी सकदा है, कने परमेश्वरे तुसां जो सै बिरासत देणी जिसा दा बायदा उनी उना सारयां लोकां ला कितया है जड़े उदे जरिये पबित्र कितयो न। 33 मैं कुदे भी सोने, चांदी या कपड़े दा लालच नी किता। 34 तुसां तां अपु ही जाणदे न कि इना हथां ही मेरी कने मेरे साथियां दी जम्हतां पुरियां कितियां न। 35 मैं तुहांजो सब कुछ करिरी दसया है की, कड़ी मेहनत करिरी सांझो कमजोरां दी सहायता करणी चाईदी कने प्रभु यीशु दे बचना जो याद रखणा जरूरी है, प्रभुऐ अपु ही बोलया है: लेणे ला देणा धन्य है।” 36 ऐ बोली करी उनी घुटणे टेके कने उना सबना सोगी प्रार्थना किती। 37 तालू सै सारे बड़े रोए कने पौलुसे दे गले लगी करी उसयो चुमणा लग्गे। 38 सै खासकर इसा गल्ला ताई दुखी थे, जड़ी उनी बोली थी, तुसां मिंजो फिरी दुबारा नी दिखणा। कने उना उसयो जाजे दीकर पूजाया।

21 असां जालू उना ला विदा लेईकरी समुंद्री यात्रा शुरू किती, तां असां सीधे रस्ते ला कोस टापु च आए, कने दुऐ रोजे स्टुस टापु च, कने ओथु ला पतरा शेहरे च पुज्जी गे; 2 कने पतरा शेहरे ला इक जाज सांझो फीनीके प्रदेश जो जांदा होया मिल्ला, कने असां उदे पर चढ़ी करी यात्रा शुरू करी दिती। 3 असां खबे पासे साइप्रस टापु दिखया कने असां ओथु ला निकली करी सीरिया प्रदेशे दिया सीमा पासे अगगे चली गे कने सूर शेहरे च जाई पुज्जे क्योंकि ओथु जाजे ला समान उतारणा था। 4 कने ओथु असां कुछ चेलयां जो तोपया कने असां ओथु उना सोगी सत रोजां दीकर रे। उना पबित्र आत्मा दे जरिये हर बार पौलुसे ला यरूशलेम

शेहरे जो नी जाणे दी विनती करदे रे। 5 सत रोज बाद जालू ओथु ला साडे जाणे दा बकत आया, कने सै सारे जनानिया कने बचयां समेत सांझो शेहरे ला बारे दीकर पुजाया कने असां समुंद्रे बखे घुटणे टेकी करी प्राथना किती। 6 तालू इकी दुज्जे ला विदा होईकरी, असां तां जाजे पर चढी गे, कने सै अपने-अपणे घरे जो बापस चली गे। 7 जालू असां सूर शेहरे ला शुरू कितियो यात्रा पुरी करिरी असां पतुलिमयिस शेहरे च पुज्जे, कने मसीही भाईयां जो नमस्ते करिके उना सोगी इक रोज रे। 8 दुऐ रोजे असां ओथु ला चली करी कैसरिया शेहरे च आये, कने फिलिप्पुस शुभसमाचार प्रचार करणे बाले दे घरे जाई करी रे, सै उना सतां मर्दा चे इक था जिना जो यरूशलेम शेहरे च प्रेरितां विधवां दी देखभाल करणे तांई चुणयां था। 9 उदियां चार कुआरियां कुडियां थियां; जडियां भविष्यवाणी करदियां थियां। 10 जालू सांझो कैसरिया शेहरे च रेंदे होए मते रोज होई गे, तां ओथु अगबुसे नाए दा इक परमेश्वर दा संदेश देंगे वाला यहूदिया प्रदेशे ला आया। 11 उनी साडे बाल आई करी पौलुसे दा कमरबंद लिया, कने उसयो अपने हथा पैरां च बन्नी करी बोलया, “कि पबित्र आत्मा ऐ बोलदी है, कि जिस माणुऐ दा ऐ कमरबन्द है, उसयो यरूशलेम शेहरे च यहूदियां इयां ही बनणा है कने होर जातियां दे हथे देई देणा है।” 12 असां जालू ऐ गल्लां सुणियां, तालू असां कने ओथु दे लोकां पौलुसे ला विनती किती कि, यरूशलेम शेहरे जो मत जांदा। 13 पर पौलुसे जबाब दिता, तुसां क्या करा दे न, रोई-रोई करी मेरा मन तोडा दे न? मै तां प्रभु यीशुऐ दे नाए तांई यरूशलेम शेहरे च सिर्फ बनणे तांई ही नी बल्कि मरणे तांई भी तैयार है। 14 जालू सै नी मनया तां असां ऐ बोली करी चुप होई गे, “प्रभुऐ दी इच्छा पुरी हो।” 15 थोडे रोजां बाद असां तैयारी किती कने यरूशलेम शेहरे जो चली पे। 16 कैसरिया शेहरे दे भी कुछ चले साडे सोगी चली पे, कने सै सांझो मनासोन नाए दे बंदे दे घरे लेई गे, जडा यरूशलेम शेहरे च रेंदा था कने साइप्रस टापू दा था, सै सबना ला पेहले दे चेलयां चे इक था। 17 असां जालू यरूशलेम शेहरे च पुज्जे, तां भरोसा करणे बाले भाईयां साडा बडिया खुशिया ला स्वागत किता। 18 दुऐ रोजे पौलुस सांझो सोगी याकूबे दे घरे गया, जिथू सारे अगुवे गिठे होयो थे। 19 तालू पौलुसे उना जो नमस्कार किता, कने जडे-जडे कम्म परमेश्वरे पौलुसे दिया सेवकाईया दे जरिये होरनी जातियां च कितयो थे, सै सारे कम्म इक-इक करिरी उना जो दस्से। 20 अगुवां ऐ सुणीकरी परमेश्वरे दी महिमा किती, फिरी उना बोलया, हे भाई पौलुस, तू

जाणदा है न, कि यहूदियां चे केई हजारों लोकां भरोसा किता है; कने सै सारे मूसा दिया व्यवस्था दा पालन बडिया बफादारिया ला करदे न। 21 कने कुछ लोकां उना यहूदियां जो दसया जिना दा तेरे बारे च ऐ विश्वास है, कि तू होर जातियां च रेणेबाले यहूदियां जो मूसा दी व्यवस्था जो छडी देणे ताई सिखांदा है, कने बोलदा है, कि ना बचयां दा खतना करा कने ना ही इना यहूदी रिती-रिबाजां पर चला। 22 तां फिरी क्या करणा चाईदा? उना जो पक्का ऐ पता लग्गी जाणा है कि तू ऐथू आया है। 23 इस ताई जडा असां तिजो बोलदे न, सै कर। साडे ऐथू चार माणु न, उना जो सै मन्नत पूरी करणी है जडी उना परमेश्वरे दे सामणे मनियो है। 24 उना जो लेईकरी उना सोगी अपने आपे जो शुद्ध करणे दिया बिधिया जो पूरा कर; कने उना ताई खर्चा दे, ताकि सै सिर मुंडवाई सकन। तालू सारयां जो पता लगणा, कि जडियां गल्लां उना तेरे बारे च सुणियां न, सै गल्लां सच नी न, कने तू अपु भी मूसा दिया व्यवस्था जो मन्नी करी उदे अनुसार चलदा है। 25 पर उना होर जातियां दे बारे च जिना भरोसा कितया है, असां ऐ फेसला करिरी चिट्ठी लिखी भेजी है, की सै उस खाणे जो ना खान जिसयो लोकां मूर्तियां जो चढाया हो, कने व्यभिचार मत करदे कने गल्लां घोट्टी करी मारयो जानवरां दा मौस कने खून मत खादे। 26 दूरे रोजे पौलुसे उना माणुआं सोगी जाई करी अपु जो शुद्ध किता, तां सै मंदरे जो गे, कने ऐ घोषणा किती, कि शुद्धी दे रोज कालू मुकणे न, मतलब की उना चे हर इकी ताई भेंट चढाणे दे दिन कालू पुरे होंगे। 27 जालू सै सत रोज पुरे होणे बाले थे, तां आसिया प्रदेशे दे कुछ यहूदियां पौलुसे जो मंदरे च दिखीकरी सारयां जो भडकाया, फिरी पौलुसे जो पकड़ी लिया कने चिल्लाणा लग्गे, 28 “हे इस्राएलियां, सहायता करा; ऐ सै ही माणु है, जडा हर जगा साडे यहूदी लोकां दे, कने मूसा दिया व्यवस्था दे कने इसा जगा दे खिलाफ च सारे लोकां जो सिखांदा है, ऐथू दीकर की होर जाति दे लोकां जो भी इस मंदरे च आंणी करी इस पबित्र जगा जो अपबित्र करी दिता है।” 29 उना ऐसा बोलया क्योंकि इसला पेहले इफिसुस शेहरे दे वासी नुफिमस जो पौलुस सोगी शेहरे च दिखया था, कने समझदे थे कि पौलुस उसयो मंदरे च लेई आया है। 30 तालू शेहरे च हल्ला पेई गया, कने लोक दोड़ी करी गिठे होऐ, कने पौलुसे जो पकड़ी करी मंदरे बार घसीटी लेई आये, कने झट दरबाजे बंद करी दिते। 31 जालू सै पौलुसे जो मारी देणे दी कोशिश करा दे थे, तां रोमी सिपाईयां दे सरदारे जो खबर पुज्जी कि यरूशलेम शेहरे च मते सारे लोक

हंगामा करा दे न। 32 तालू सै झट सिपाईयां कने सुबेदारां जो लेईकरी उना बाल आया; कने लोकां दिया भीड़ा सरदारे जो कने सिपाईयां जो दिखीकरी पौलुसे जो मारणा बंद करी दिता। 33 तालू पलटना दे सरदारे पौलुसे बाल आई करी उसयो पकड़ी लिया; कने दो सुंगला ला बनणे दा हुकम देईकरी पूछणा लग्गा, “ऐ कुण है, कने इनी क्या कितया है?” 34 पर भिड़ा चे कोई कुछ बोलणा लग्गा कने कोई कुछ, कने जालू रोले दिया बजा ला सच्चाई पता नी लग्गी, तां उसयो किले च लेई जाणे दा हुकम दिता। 35 जालू सै पोडियां पर पुज्जा, तां इयां होया कि भिड़ा दिया बजा ला सिपाईयां जो उसयो चुकी करी लेई जाणा पिया। 36 क्योंकि लोकां दी भीड़ ऐ बोली करी पिच्छे पियो थी, इसयो मारी दिया। 37 जालू सै पौलुसे जो किले च अंदर लेई जाणा लगयो थे, तां उनी पलटना दे सरदारे जो बोलया, क्या मिंजो इजाजत है कि मैं तिजो कुछ बोले? उनी बोलया, “क्या तू यूनानी भाषा जाणदा है? 38 क्या तू सै मिस्र देशे दा माणु नी है, जिनी कुछ बकत पेहले सरकारा दे खिलाफ बिरोध कितया था कने चार जार आतंकियों जो सुनसान जगा च लेई गया था?” 39 पौलुसे बोलया, “नी, मैं तां इक यहदी है, कने किलिकिया प्रदेशे दे खास तरसुस शेहरे दा रेणे बाला है। कने मैं तिजो ला बिनती करदा है, कि मिंजो लोकां ने गल्लां करणा दे।” 40 जालू उनी हुकम दिता, तां पौलुसे पथरे दिया पोडियां पर खड़ोई करी लोकां जो चुप रेणे तांई हथे ला इशारा किता। तालू सै चुप होई गे, तां सै इब्रानी भाषा बोलणा लग्गा।

22 “हे भाईयों कने बजुर्गो सुणा, जडे इल्जाम मिंजो पर लगयो न, उदे बचाव च मैं कुछ तुहाडे सामणे बोलणा है।” 2 सै ऐ सुणीकरी कि सै सांझो ला इब्रानी भाषा च बोला दा है, सै होर भी चुप होई गे। तालू उनी बोलया: 3 मैं यहदी है, मेरा जन्म किलिकिया प्रदेशे दे तरसुस शेहरे च होया है; पर इस शेहरे च गमलीएल दे पैरां बाल बेईकरी शिक्षा लियो है, कने पूर्वजां दी व्यवस्था भी मिंजो ठीक रीतिया ला सिखाई; कने हुण जदिया उत्साह परमेस्वरे तांई तुहाडा है, तदिया ही मेरा भी था। 4 मैं प्रभु यीशु मसीह दे रस्ते जो खत्म करणे तांई इदे चेलयां जो बड़ा सताया। मैं मर्द कने जनानिया दोनो जो बन्नी करी, जेला च पाई करी, उना जो मरवाई भी दिता। 5 खुद महायाजक कने अगुवां दी सारी सभा भी गबाह न कि, मैं उना ला यहदी भाईयां तांई चिठियां लेईकरी दमिशक शेहरे जो चलया था, ताकि जडे ओथु न उना जो सजा देणे तांई बन्नी करी यरूशलेम शेहरे जो लेई ओऐ। 6 जालू मैं

चलदे-चलदे दमिशक शेहरे बखे पुज्जा, तां इयां होया कि लगबग दोपहर दे बकते अचानक अम्बरे ला मेरे चारो पासे इक लौ चमकी। 7 कने मैं जमिना पर पेई गया: कने ऐ अबाज सुणोई, हे शाऊल, हे शाऊल, तू मिंजो कजो तंग करदा है? 8 मैं जबाब दिता, हे प्रभु जी, तू कुण है? उनी मिंजो बोलया, मैं नासरत शेहरे दा रेणे बाला यीशु है, जिसयो तू तंग करदा है। 9 कने मेरे साथियां लौ चमकदी तां दिखी, कने जड़ा मिंजो सोगी बोला था उना उदी अबाज सुणी, पर सै समझी नी सके की अबाजा मिंजो ला क्या बोलया। 10 तालू मैं बोलया, प्रभु जी मैं क्या करे? प्रभुऐ मिंजो ने बोलया, उठी करी दमिशक शेहरे जो जा कने जड़ा कुछ तू करणा है सै तिजो ओथु दसी देणा है। 11 जालू उसा लौई दिया चमका दिया बजा ला मिंजो कुछ भी मिल्ला दा नी था, तां मैं अपने साथियां दा हथ पकड़ी करी दमिशके शेहरे जो आया। 12 तालू हनन्याह नाऐ दा व्यवस्था दे अनुसार इक धर्मी माणु, जड़ा ओथु रेणेबाले सारे यहूदियां च इज्जतदार था, सै मेरे बाल आया, 13 कने मेरे बखे खडोई गया कने मिंजो ला बोलया, हे भाई शाऊल, दुबारा दिखणा लग्गी पो। तालू ही मेरियां हखी खुली गियां कने मिंजो दुबारा मिलणा लग्गी पिया। 14 तालू उनी बोलया, साडे बाप दादयां दे परमेश्वरे तिजो इस तांई चुणया है ताकि तू उदिया इच्छा जो जांणे, कने उस धर्मी जन जो दिखे, कने उदी अबाज सुणे। 15 क्योंकि तू उदिया तरफा ला सारे माणुआं सामणे इना गल्लां दा गबाह होणा, जडियां तू दिखियां कने सुणियां न। 16 हुण कजो देर करा दा है? उठ, कने बपतिस्मा ले, कने प्रभु दा ना लेईकरी अपने पापां जो धोई ले। 17 मैं जालू फिरी यरूशलेम शेहरे च आई करी मंदरे च प्राथना करा दा था, तां मैं बेसुध होई गया। 18 कने मैं प्रभु जो दिखया कने उसयो ऐ बोलदे सुणया, “झट पट करिरी यरूशलेम शेहरे ला निकली जा; क्योंकि जडे लोक ऐथू न उना मेरे बारे च तेरी गबाई नी मनणी है।” 19 मैं बोलया, प्रभु जी मिंजो समझ नी आया की यरूशलेम शेहरे च यहूदियां मिजों पर भरोसा कनी करणा क्योंकि सै तां अपु ही जाणदे न की मैं तिजो पर भरोसा करणे बालयां जो जेला च पांदा कने मारदे-मारदे यहूदी जंज घरां ला लेई जांदा था। 20 कने जालू तेरे गबाह स्तिफनुसे जो मारा दे थे, तालू मैं भी ओथु खडोतया था, कने उसा गल्ला ला राजी था, कने उसयो मारणे बालयां दे कपडयां दी रखवाली करा दा था। 21 कने प्रभुऐ मिंजो बोलया, तू चली जा: क्योंकि मैं तिजो होरनी जातियां बाल दूर-दूर भेजणा है। 22 ऐथू दीकर तां लोक पौलुसे दिया गल्ला जो ध्याने ला

सुणदे रे पर, फिरी सै जोरे ला बोलणा लग्गे, “ऐसे माणुऐ जो मारी दिया, इदा जिन्दा रेणा ठीक नी।” उना ऐसा इस ताई बोलया क्योंकि सै नी मंदे थे की परमेश्वर यहदियां जो छडी करी कुसी होरसी जातिया जो बचाई सकदा है। 23 जालू सै चिलांदे कने अपने कपड़े फेंकदे कने अपना गुस्सा दसणे ताई होआ च धुड उडांदे थे; 24 तां पलटना दे सूबेदारे बोलया, “इसयो किले च लेई जा; कने कोडे मारी करी परखा, ताकि मैं भी जांणे कि लोक कुसा बजा ला इदे खिलाफ ऐसा बोला दे न।” 25 जालू सै उसयो कोडे मारणे ताई बन्ना दे थे तां पौलुसे उस सूबेदारे ने बोलया जडा उदे बखे खडोतया था, “क्या ऐ ठीक कि तुसां इक रोमी माणुऐ जो, बिना दोष साबित होयो कोडे मारन?” 26 सूबेदारे ऐ सुणीकरी सरदारे बाल जाई करी बोलया, “तू ऐ क्या करा दा है? ऐ तां रोमी माणु है।” 27 तालू सरदारे उदे बाल आई करी बोलया, मिंजो दस, क्या तू रोमी है? “उनी बोलया, हाँ।” 28 ऐ सुणीकरी सरदारे बोलया, मैं रोमी होणे दा पद मते पैसे देईकरी लिया है। पौलुसे बोलया, “मैं तां जमदा ही रोमी है।” 29 तालू जडे लोक उसयो परखा दे थे, सै झट उदे बखे ला हटी गे; कने सरदार भी ऐ जाणी करी कि ऐ रोमी है, कने मैं उसयो बनया है, सै डरी गे। 30 सूबेदार ऐ जाणना चांदा था कि यहदी लोक उदे पर कजो दोष ला दे न, इस ताई उनी बट्टे याजकां कने सारिया महासभा जो गिठे होणे दा हुकम दिता। उना जो रिहा किता, पौलुसे जो थले आंणी करी उना दे सामणे खडा किता।

23 पौलुसे महासभा पासे ध्यान लाईकरी दिखया, कने बोलया, “हे भाईयो, मैं अजे दीकर परमेश्वरे ताई बिलकुल सच्ची अंतरात्मा ला जिन्दगी कटी है।” 2 पौलुसे जडा बोलया सै सुणीकरी हनन्याह महायाजके, उना जो जडे उदे बखे खडोतयो थे, पौलुस दे मुऐ पर थप्पड़ मारणे दा हुकम दिता। 3 तालू पौलुसे उना जो बोलया, “है पाखंडी, परमेश्वरे तिजो मारणा। तू मूसा दी व्यवस्था दे अनुसार मेरा न्याय करणे जो बैठया है, कने फिरी भी मिंजो मारणे दा हुकम देईकरी व्यवस्था दे खिलाफ जा दा है?” 4 जडे बखे खडोतयो थे, उना बोलया, “क्या तू परमेश्वरे दे महायाजक दी बेईजती करदा है?” 5 पौलुसे बोलया, “हे भाईयो, मैं नी जाणदा था, कि ऐ महायाजक है; क्योंकि पबित्र शास्त्र च लिखया है, अपने लोकां दे प्रधाने जो बुरा मत बोल।” 6 तालू पौलुसे ऐ जाणी करी, कि कुछ सदूकी लोक न कने कुछ फरीसी लोक न, महासभा च पुकारी करी बोलया, “है भाईयो, मैं फरीसी

कने फरीसियां दे बंशे दा है, कने मेरा मुकदमा इस ताई होआ दा है क्योंकि मिंजो आस है की परमेश्वरे मरयो लोकां जो दुबारा जिन्दा करणा।” 7 जालू उनी ऐ गल्ल बोली तां फरीसियां कने सदूकियां च होणा लग्गी, कने सभा च फुट पेई गेई। 8 क्योंकि सदूकी लोक ऐ भरोसा करदे न की लोकां मरणे बाद जिन्दा नी होंणा, ना कोई स्वर्गदूत न कने ना आत्मा है; पर फरीसी लोक इना सबना पर भरोसा करदे न। 9 तालू बडा रोला पिया कने कुछ व्यवस्था जो सिखाणे बाले जडे फरीसी थे, उठी करी ऐ बोली करी बेहस करणा लग्गे, “सांझो इस माणुऐ च कोई बुराई नी मिली है; कने होई सकदा है की इक आत्मा या स्वर्गदूते उसला गल्ल किती हो।” 10 जालू लडाई बड़ी बदी गेई, तां पलटना दे सरदारे इसी डरे ला कि सै पौलुसे दे टोटे-टोटे नी करी दें, इस ताई उनी पलटना जो हुकम दिता की सभा दे लोकां बीचे ला पौलुसे जो बचाई करी किले च लेई जा। 11 उसा ही राती प्रभु यीशुऐ पौलुस दे बखे आई करी बोलया, “हे पौलुस, हिम्मत रख; क्योंकि जियां तू यरूशलेम शेहरे च मेरी गबाई दितियो है, तियां ही तिजो रोम शेहरे च भी मेरी गबाई देंगी पोंणी है।” 12 जालू भ्याग होई तां कुछ यहूदी माणुआं गिठे होईकरी सलाह किती, कने कसम खादी कि जालू दीकर असां पौलुसे जो मारी ना देन, अगर असां खादा या पीता तां सांझो पर लानत है। 13 जिना ऐ कसम खादियो थी, सै चालियां जणयां ला जादा थे। 14 उना बड़े याजकां कने यहूदी अगुवां बाल आई करी बोलया, “असां ऐ कसम खादियो है कि जालू दीकर असां पौलुसे जो मारी नी दें, तालू दीकर असां अगर कुछ भी चखन तां सांझो पर लानत है। 15 इस ताई हुण तुसां कने महासभा मिलिकरी पलटना दे सरदारे जो समझा कि पौलुसे जो तुहाडे बाल लेई ओऐ, भाना मारा कि तुसां उदे बारे च होर भी ठीक तरीके ला जांच करणा चांदे न, कने असां उदे पूजणे ला पेहले ही उसयो रस्ते च मारणे ताई तैयार रेगे।” 16 पर पौलुसे दे भांजे सुणाया कि यहूदी लोक उसयो मारणे दी योजना बणा दे न, तां उनी किले च जाई करी पौलुसे जो खबर दिती। 17 पौलुसे सुबेदारां चे इकी जो सदीकरी बोलया, “इसी जवाने जो पलटना दे सरदारे बाल लेई जा, ऐ उसला कुछ बोलणा चांदा है।” 18 इस ताई सुबेदार पौलुसे दे भांजे जो पलटना दे सरदारे बाल लेईजाई करी बोलया, “केदी पौलुसे मिंजो सदीकरी बिनती किती, कि ऐ जवान पलटना दे सरदारे ला कुछ बोलणा चांदा है, इसयो उस बाल लेई जा।” 19 पलटना दे सरदारे उसयो हथ पकड़ी करी, कने उसयो लग लेईजाई करी

पुछया, “तू मिंजो ला क्या बोलणा चांदा है?” 20 उनी बोलया, “यहदियां गिठे होईकरी योजना बणाईयो, कि तिजो ला बिनती करन कि कल पौलुसे जो महासभा च लोए, कने ऐसा लग्गे कि तू होर ठीक ढंगे ला उदी जांच करणा चांदा है। 21 पर कृपा करिरी तू उना दिया बिनतिया पर ध्यान मत दिन्दा, क्योंकि उना चे चालियां ला जादा माणु पौलुसे जो मारणे दिया ताका पर न, उना ऐ कसम खादियो है कि जालू दीकर असां पौलुसे जो नी मारगे, तालू दीकर ना खाणा है ना पिणा है, कने सै हुण तैयार न कने तेरे बचने दा इतंजार करा दे न।” 22 तालू पलटना दे सरदारे जवाने जो ऐ हुकम देईकरी भेजया, “कुसी ला मत बोलदा कि तू मिंजो ला ऐ गल्लां बोलियां न।” 23 तालू पलटना दे सरदारे दो सूबेदारां जो सदीकरी बोलया, “अज राती नौ बजे दीकर दो सो सपाई, सत्तर सवार, कने दो सो भाले बाले, कैसरिया शेहरे जो जाणे तांई तैयार रखा।” 24 कने पौलुसे दिया सवारिया तांई घोड़े जो तैयार रखा ताकि उसयो फेलिक्स राज्यपाले बाल ठीक-ठाक पुजाई सकन। 25 पलटना दे सरदारे राज्यपाले जो इक चिट्ठी भी लिखी: 26 “महाप्रतापी फेलिक्स राज्यपाले जो क्लौदियुस लुसियास दिया तरफा ला नमस्कार; 27 इस माणुऐ जो यहदी पकड़ी करी मारणा चांदे थे, पर जालू मिंजो पता लग्गा कि ऐ रोमी है, तां पलटन भेजी करी छुड़ाई लांदा। 28 कने मै जाणना चांदा था, कि सै इस पर कुसा बजा ला दोष लांदे न, इस तांई उसयो उना दी महासभा च लेई गिया। 29 तालू मै जाणी लिया, कि सै अपणिया यहदी व्यवस्था दे विवादां दे बारे च उदे पर दोष लगा दे न, पर ऐ कोई ऐसा दोष नी है, जिदे तांई उसयो मौत दी सजा या जेल होए। 30 कने जालू मिंजो दसया कि सै इस माणुऐ जो मारणे दिया ताका पर न, तां मै झट उसयो तेरे बाल भेजी दिता; कने उना यहदियां जो जिना उस पर दोष लाया है हुकम दिता, कि तेरे सामणे उदे पर दोष लान।” 31 सिपाइयां जो जडा हुकम दितया था तियां ही सै पौलुसे जो लेईकरी रातो रात अन्तिपत्रिस शेहरे च लेई आए। 32 दुऐ रोजे उना घुडसवारां जो पौलुसे सोगी कैसरिया शेहर जाणे तांई छडी दिता कने सपाई अपु पैदल यरुशलेम शेहरे दे किले जो मुडी आए। 33 उना कैसरिया शेहरे च पुज्जी करी राज्यपाले जो चिट्ठी दिती; कने पौलुसे जो भी उदे सामणे खडा किता। 34 राज्यपाले चिट्ठी पढी करी पुछया, “ऐ कुसी देशे दा है? कने जालू ऐ सब जाणी लिया कि सै किलिकिया प्रदेशे दा है।” 35 तां उसयो बोलया, “जालू सै

लोक ओगे जिना तिजो पर दोष लाया है, तालू मैं तेरा मुकद्दमा सुणना है।” कने उनी पौलुसे जो राजा हेरोदेसे दे किले च पेहरे च रखणे दा हुकम दिता।

24 पंजा रोजा बाद हनन्याह महायाजक केई यहूदी अगुवां कने तिरतुल्लुस नाए दे बकिले जो सोगी लेईकरी कैसरिया शेहरे च आया; उना राज्यपाल दे सामणे पौलुसे पर दोष लाए। 2 जालू पौलुसे जो ओथु सदया, तां तिरतुल्लुसे उस पर दोष लाईकरी बोलया, “हे महाप्रतापी फेलिक्स, तेरिया बजा ला असां बडिया शांतिया ला रे दे न, कने तेरे इंतजाम ला इसा जातियां तांई कितणियां बुराइयां सुधरा दियां न। 3 इसयो असां हर जगा कने हर तरीके ला धन्याबाद सोगी मंदे न। 4 पर मैं तेरा जादा बकत नी लेंणा चांदा है, मैं तिजो ला बिनती करदा है, कि कृपा करिरी थोड़ी देर साडी सुणी ले। 5 ऐ माणु संसारे दे सारे यहूदियां बिच मतभेद कने मुसीबत पैदा करा दा है, कने ऐ इक ऐसे कुपंथे दे अगुवां चे भी है, जिस पंथे जो लोक नासरत दे यीशुऐ दे पिच्छे चलणे बाला पंथ बोलदे न। 6 उनी मंदरे जो अशुद्ध करणा चाया, कने तालू असां उसयो बंदी बणाई लिया। असां उसयो अपणिया व्यवस्था दे अनुसार सजा देणा चांदे थे; 7 पर पलटना दे सरदारे लुसियासे आई करी जबरदस्ती उसयो साडे हथा ला छुड़ाई लिया, 8 कने इदे पर दोष लांणे बालयां जो तेरे बाल ओणे दा हुकम दिता। इना सारियां गल्लां जो जिना दे बारे च असां उदे पर दोष ला दे न, तू अपु ही उसयो जाँची करी सच्चाईया जो जाणी लेंणा है।” 9 यहूदियां भी उदा साथ देईकरी बोलया, ऐ गल्लां बिलकुल ठीक न। 10 जालू राज्यपाले पौलुसे जो बोलणे तांई इशारा किता तां उनी जबाब दिता: “मैं ऐ जाणी करी कि तुसां इस देशे दा बडे सालां ला न्याय करा दा है, इस तांई मैं खुशिया ला अपणा जबाब दिन्दा है।” 11 तू अपु ही पता लगाई सकदा है, कि जालू ला मैं यरूशलेम शेहरे च अराधना करणा मन्दरे च आया है, मिंजो बारा रोजां ला उपर नी होऐ न। 12 उना मिंजो ना मंदरे च, ना यहूदी जंज घरां च, कने ना शेहरे च कुसी ने बेहस करदे या ना भिडा जो गिठा करदे दिखया; 13 कने ना ही सै उना गल्लां जो, जिना दे बारे च सै हुण मिंजो पर दोष ला दे न, तेरे सामणे सच्च साबित करी सकदे न। 14 पर मैं तेरे सामणे ऐ मनी लेंदा है, कि मैं मसीह दे पंथे दा चेला होईकरी अपणे पूर्वजां दे परमेश्वरे दी सेवा करदा है, जिसी पंथे जो ऐ माणु यहूदी झूठा पंथ बोलदे न: कने जडियां गल्लां मूसा दिया व्यवस्था च कने परमेश्वरे दा संदेश देणेबालयां दियां कताबां च लिखियाँ न, उना पर भरोसा करदा है। 15 कने परमेश्वरे पर आस रखदा

है, जड़ी सै अपु भी रखदे न, कि परमेश्वरे धर्मी कने अधर्मी दोनो जो मरयां चे जिन्दा करी देणा। 16 इस ताई मैं अपु भी परमेश्वरे कने लोकां सामणे अपणी अंतरात्मा जो निर्दोष रखणे दी पूरी कोशिश करदा है। 17 मतयां सालां बाद मैं अपने गरीब लोकां जो दान कने परमेश्वरे जो बलिदान चड़ाणे ताई यरूशलेम शेहरे च आया था। 18 उसी बकत उना मिंजो मंदरे च शूद्र होणे दे रिबाजां जो पूरा करदे दिखया। ओथु ना तां कोई भिड़ थी कने ना ही कोई हल्ला था। 19 पर ओथु आसिया प्रदेशे दे कुछ यहूदी लोक थे, जिना हंगामा किता। अगर मैं कुछ गलत कितया था, तां उना जो मिंजो पर दोष लांणे ताई ऐथू तेरे सामणे होणा चाईदा था। 20 या इना माणुआं जो अपु ही बोलणा चाईदा, कि जालू मैं महासभा दे सामणे खड़ोतया था, तां उना जो मिंजो पर कुण दिया दोष मिल्ला? 21 सिर्फ इक दोष है जड़ा सै मेरे खिलाफ लाई सकदे न, सै ऐ है जालू मैं अंगणे च जोरे ला बोलया था, “पर ऐ मुकदमा मेरे पर इस ताई चलया है क्योंकि मैं भरोसा करदा है की परमेश्वरे उना लोकां जो जड़े मरी गियो न दुबारा जिन्दा करणा।” 22 राज्यपाल फेलिक्स जड़ा इसी पंथे दियां गल्लां जो अच्छे ला जाणदा था, उनी सुणवाई जो ऐ बोली करी स्थगित करी दिता, “कि जालू पलटना दा सरदार लूसियास ओगा, तां तुहाडिया गल्लां दा न्याय करगा।” 23 कने सूबेदार जो हुकम दिता, कि पौलुसे जो थोड़ी छुट देईकरी उसयो पेहरे च रखा, पर उदे दोस्तां चे कुसयो भी इदी सेबा करणे ला मत रोकदे। 24 थोड़े रोजां बाद राज्यपाल फेलिक्स अपणी घरे बाली दूसिल्ला जो, जड़ी यहूदी थी, सोगी लेईकरी पौलुसे ला मिलणा आया कने पौलुसे जो सदया, कने उस भरोसे दे बारे च उसला सुणया जड़ा यीशु मसीह पर है। 25 जालू पौलुसे धार्मिकता कने अपणी इच्छां पर काबू रखणा कने परमेश्वरे जरिये होंणे बाले न्याय दे बारे च दसणा शुरू किता, तां फेलिक्स डरीकरी जबाब दिता, “इस बकत तां तू जा; जालू मेरे बाल बकत होंगा तां मैं तिजो दुवारा सदी लेंगा।” 26 हालांकि फेलिक्स उना गल्लां दे बारे च डरदा था जडियां पौलुसे बोलियां थियां, फिरी भी सै पौलुसे जो सददा था, कने उस सोगी गल्लां करदा था क्योंकि सै सोचदा था की सै जेला ला छुटणे ताई उसयो कुछ पैसे दिगा। 27 पर जालू दो साल बीती गे, तां पुरकियुस फेस्तुस, फेलिक्स दिया जगा पर राज्यपाल बणी गया, कने फेलिक्स यहूदियां जो खुश करणे दिया इच्छा ला पौलुसे जो केदी ही छडी गया।

25 उना रोजां बाद राज्यपाल फेस्तुस दे स्पे च यहूदिया प्रदेश च आया। फिरी सै कैसरिया शेहरे ला यरूशलेम शेहरे जो गया। 2 तालू बड़े याजकां, कने यहूदियां दे अगुवां, उदे सामणे पौलुसे पर दोष लाऐ; 3 कने उसला बिनती किती की उना दा समर्थन करे कि सै पौलुस जो यरूशलेम शेहरे च सदे, क्योंकि उना उसयो रस्ते च ही मारी देणे थी योजना बनाईयो थी। 4 फेस्तुसे जबाब दिता, “पौलुस कैसरिया शेहरे च केदी है, कने मैं अपु जल्दी ओथु जाणा है।” 5 फिरी बोलया, “तुसां ने जड़े बड़े माणु न, सै मेरे सोगी चलन, कने अगर उनी माणुए कुछ गलत कम्म कितया है, तां उस पर दोष लगान।” 6 यरूशलेम शेहरे च कोई अठ दस रोज रेईकरी सै कैसरिया शेहरे जो गया: कने दुऐ रोजे न्याय-आसने पर बेईकरी पौलुसे जो लोणे दा हुकम दिता। 7 जालू सै आया, तां यहूदी अगुवे जड़े यरूशलेम शेहरे ला आयो थे, उना अखे बखे खडोई करी उदे पर बड़े भरी दोष लाऐ, पर उना बाल इना दोषां जो सच्च साबित करणे तांई कोई सबूत नी था। 8 पर पौलुसे जबाब दिता, “मैं ना तां यहूदियां दिया व्यवस्था दे कने ना मंदरे दे, कने ना महाराजा कैसरे दे खिलाफ कोई अपराध कितया है।” 9 तालू फेस्तुसे यहूदी अगुवां जो खुश करणे दिया इच्छा ला पौलुसे जो पुच्छया, “क्या तू चांदा है की तेरे इना दोषां दी सुणवाई मेरे सामणे यरूशलेम शेहरे च हो?” 10 पौलुसे बोलया, “मैं महाराजा कैसरे दे न्याय-आसने सामणे खडोतया है: ठीक ऐई है की मेरे मुकद्दमे दी सुणवाई ऐथू ही होणा चाईदी। मैं यहूदी लोकां दे खिलाफ कोई भी अपराध नी कितया है, कने इसा गल्ला जो तू भी अच्छे ला जाणदा है। 11 अगर अपराधी है कने मौत दी सजा देणे जोगा कोई कम्म कितया है, तां मैं मरणे ला नी मूकरदा है; पर जिना गल्लां दा ऐ मिंजो पर दोष ला दे न, अगर उना चे कोई गल्ल सच्च नी है, तां कुसी जो भी ऐ हक नी है की मिंजो इना दे हथे देई दे। मेरी बिनती है की मेरा न्याय महाराजा दे हथे ला होणा चाईदा।” 12 तालू फेस्तुसे अपणिया सभा सोगी बिचार करिरी जबाब दिता, “तू महाराजा कैसरे दे हथे ला न्याय होंणे दी मांग किती है, तां तिजो महाराजा कैसरे बाल ही भेजणा है।” 13 थोड़े रोज होणे बाद राजा अग्रिप्पे कने उदी छोटी बेहण बिरनीके कैसरिया शेहरे च आई करी राज्यपाल फेस्तुसे ला मिल्ले। 14 उना जो ओथु मते रोज रेहणे बाद फेस्तुसे उना ने पौलुसे दे बारे च दसया, “इक माणु है, जिसयो फेलिक्स केदी छडी गया है। 15 जालू मैं यरूशलेम शेहरे च था, तां बड़े याजकां कने यहूदी अगुवां उस पर दोष लाऐ कने चांदे थे, कि

उसयो मौत दी सजा हुकम मिल्ले। 16 पर मैं उना जो जबाब दिता, कि रोमियां दा ऐ रिबाज नी है, कि कुसी माणुऐ जो सजा देंगे ताई सौपी दें, जालू दीकर आरोपी जो अपने दोष लागे बालयां सामणे खडे होईकरी दोषां दे जबाब देंगे दा मोका ना मिल्ले। 17 इस ताई जालू यहदी अगुवे मेरे सोगी ऐथू कैसरिया शेहरे च आये, तां मैं कोई देर नी किती, कने दुऐ ही रोजे न्याय-आसने पर बेईकरी, पौलुसे जो अदालता च लोंगे दा हुकम दिता। 18 जालू उस पर दोष लांगे बाले खडुते, तां उना ऐसिया बुरियां गल्लां दा दोष नी लाया, जदिया मैं समजदा था। 19 पर उना बिच अपने धर्मे जो लेईकरी कने यीशु नाऐ दे माणुऐ दे बारे च कुछ झगडा था, जडा मरी गया था, पर पौलुस दाबा करदा था की यीशु जिन्दा है। 20 क्योंकि मिंजो नी पता था की इना गल्लां दी जांच पडताल कियां करे, इस ताई मैं पौलुसे जो पुच्छया, क्या तू यरूशलेम च शेहरे च मुकदमे दी सुणवाई ताई राजी है। 21 पर जालू पौलुसे बिनती किती की महाराजा कैसर ही मेरा न्याय करे, तां मैं हुकम दिता, कि जालू दीकर मैं उसयो महाराजा कैसरे बाल नी भेजें, उदी रखबाली किती जाए।” 22 तालू अग्रिप्पे फेस्तुसे जो बोलया, “मैं भी उस माणुऐ दी सुणना चांदा है।” उनी बोलया, “तू कल सुणी लियां।” 23 दुऐ रोजे, जालू अग्रिप्पे कने बिरनीके बड़ी धूम धाम ला आई करी पलटना दे सरदारां कने शेहरे दे खास-खास लोकां सोगी दरबारे च पुज्जे। तालू फेस्तुसे हुकम दिता, कि सै पौलुसे जो लेई ओआ। 24 फेस्तुसे बोलया, “हे राजा अग्रिप्पे, हे सारे लोक जडे ऐथू साडे सोगी न, तुसां इसी माणुऐ जो दिखा दे न, जिदे बारे च सारे यहूदियां यरूशलेम शेहरे च कने ऐथू भी चिलाई-चिलाई करी मिंजो ला बिनती किती, कि इदा जिन्दा रेणा ठीक नी है। 25 पर मैं जांणी लिया कि उनी ऐदिया कुछ नी कितया है कि इसयो मौत दी सजा मिल्ले; कने जालू की उनी अपु ही बिनती किती की महाराजा धिराज मेरा न्याय करे, तां मैं उसयो भेजणे दा फेसला किता। 26 पर मिंजो उदे बारे च कोई भी पक्की गल्ल नी लगी कि महाराजा जो लिखें, इस ताई तां मैं उसयो तुहाडे सामणे कने खास करिरी राजा अग्रिप्पे तेरे सामणे लांदा है, ताकि जांचणे बाद मिंजो कुछ लिखणे जो मिल्ले। 27 क्योंकि केदिये जो भेजणा कने जडे दोष उदे पर लायो न, उना जो नी दसणा, मिंजो ठीक नी लग्गा दा है।”

26 राजा अग्रिप्पे पौलुसे जो बोलया, “तिजो अपने बारे च बोलणे दी इजाजत है।” तालू पौलुसे हथ चुकी करी लोकां जो शांत किता, तालू सै अपने बचाव च

बोलणा लग्गा, 2 हे राजा अग्रिप्पे, जितणियां गल्लां दा यहदी अगुवे मिंजो पर दोष लांदे न, अज तेरे सामणे उना दा जबाब देंगे ताईं मैं अपने आपयो जो धन्य समझदा है, 3 क्योंकि तू यहदियां दे सारे रिबाजां कने समस्यां जो अच्छे ला जाणदा है। इस ताईं मैं बिनती करदा है, अच्छे ला मेरी सुणी ले। 4 जदिया मेरा चाल-चलण बचपन ला लेईकरी अजे दीकर अपने लोकां च कने यरूशलेम शेहरे च था, ऐ सब यहदी जाणदे न। 5 सै मिंजो तालू ला जाणदे न जालू मैं बच्चा था, सै चांदे न तां इसा सच्चाईया दी गबाई भी देई सकदे न की, मैं फरीसियां दा इक सदस्य रिया है, जडा साडे धर्मे दा सारयां ला कट्टर पंथ है। 6 अज मैं परमेश्वरे जरिये साडे पूर्वजां जो दितयो बायदे दिया आसा दिया बजा ला ऐथू दोषिऐ दे स्पे च खडोतया है। 7 उसी बायदे जो पूरा होणे दी आसा च, साडे बारा गोत्र अपने सारे मने ला दिन रात परमेश्वरे दी सेवा करदे आये न। हे राजा, ऐ उसा आशा दिया बजा ला है की परमेश्वरे सेई करणा जडा उनी बायदा कितया था की ऐ यहदी मिंजो पर दोष ला दे न। 8 तालू पौलुसे सुणने बालयां चे सारे यहदियां जो बोलया, तुसां लोक भरोसा करदे न की परमेश्वर मरयां जो दुबारा जिन्दा करी सकदा है, तां तुसां इसा गल्ला पर भरोसा करणे जो कजो मना करदे न की उनी यीशु मसीह हो मरयां चे जिन्दा किता? 9 “मेरा भी पक्का भरोसा था कि नासरत बासी यीशुऐ दे खिलाफ मिंजो मता कुछ करणा चाईदा।” 10 कने मैं यरूशलेम शेहरे च इयां ही कितया; कने बड़े याजकां ला हक पाई करी बड़े पबित्र लोकां जो जेला च पाया, कने जालू उना जो मारी दिन्दे थे, तां मैं भी उना दे खिलाफ अपणी सेहमती दिन्दा था। 11 कने मैं हर यहदी जंज घर च उना जो सजा दिलादां कने उना जो यीशुऐ दी निंदा करणे ताईं मजबूर करदा था, ऐथू दीकर गुस्से ला ऐसा पागल होई गया था कि दुज्जे शेहरां च जाई करी उना जो तंग करदा था। 12 “इसी ही मकसदे सोगी जालू मैं बड़े याजकां ला अधिकार कने हुकम दी चिट्ठी लेईकरी दमिशके शेहरे जो चलया था; 13 तां हे राजा, रस्ते च लगभग दोपेरा दे बेले मैं अम्बरे ला सूरजे दिया चमका ला भी जादा चमकदी इक लौ अपने कने अपने सोगी चलणे बालयां दे चारो पासे चमकदी दिखी। 14 कने जालू असां सारे धरती पर डेई पे, तां मैं इब्रानी भाषा च, मिंजो ला बोलदे इक अबाज सुणी, ‘हे शाऊल, हे शाऊल, तू मिंजो कजो तंग करदा है? हरबरी जालू तू मिंजो दुखी करणे दी कोशिश करदा है, तालू तू अपु जो ही दुखी करदा है।’ 15 मैं बोलया, प्रभु जी, तू कुण है? प्रभुऐ बोलया, मैं यीशु है जिसयो तू

तंग करदा है। 16 पर तू उठ, अपने पैरां पर खड़ा हो; क्योंकि मैं तिजो दर्शन इस ताईं दिता है ताकि तिजो उना गल्लां दा भी सेवक कने गबाह बणां, जड़ियां तू दिखियां न, कने उना दा भी जिना ताईं मैं तिजो दर्शन देणा है। 17 कने मैं तिजो तेरे लोकां ला कने होर जातियां ला बचादा रेंगा, जिना बाल मैं तिजो इस ताईं भेजणा है। 18 कि तू उना दियां हखी खोले, ताकि सै नेहरे ला लौई पासे, कने शैताने दे अधिकारे ला परमेश्वरे पासे ओन; तां परमेश्वरे उना दे पाप माफ करणे, कने उना लोकां सोगी बिरासत मिल्ले, जड़े मिंजो पर भरोसा करणे ला पबित्र होयो न। 19 इस ताईं हे राजा अग्रिप्पा, मैं उस स्वर्गीय दर्शनि दी गल्ला दा पालन किता, 20 मैं पेहले दमिशके शेहरे दे, फिरी यरूशलेम शेहरे दे रेणे बालयां जो, फिरी सारे यहूदिया प्रदेश च कने होर जातियां जो प्रचार किता, कि पाप करणा छडी दिया कने परमेश्वरे पासे फिरी करी ऐसे कम्म करा ताकि तुहाड़िया जिन्दगिया ला पता लग्गे की तुसां अपने पापां ला पश्चाताप करी लिया है। 21 इसा गल्ला दिया बजा ला यहूदी मिंजो मंदरे च पकड़ी करी मारी देणे दी कोशिश करा दे थे। 22 पर परमेश्वरे दिया सहायता ला मैं अजे दीकर ठीक है कने छोटे बड़े सारयां दे सामणे गबाई दिन्दा है। कने मैं इना गल्लां दे सिवा कुछ नी बोलणा है, सै परमेश्वरे दे संदेश देणेबालयां कने मूसा भी बोलया है कि होंगे बालियां न, 23 कि मसीह जो दुख झेलणा पोंणा है, कने सै मरयां चे जिन्दा होणेबाला पैला जन होणा, इस तरीके ला उनी यहूदियां च कने होर जातियां च ज्योति दा प्रचार किता।” 24 जालू पौलुस इसा रीतिया ला जबाब दे दा था, तां फेस्तुसे जोरे ला बोलया, “हे पौलुस, तू पागल है। मतिया बिद्या तिजो पागल करी दितया है।” 25 पर उनी बोलया, “हे महाप्रतापी फेस्तुस, मैं पागल नी है, पर सच्चाईया कने अकली दियां गल्लां बोला दा है। 26 राजा भी ऐ गल्लां जाणदा है जिदे सामणे मैं बिना डरयो बोला दा है, कने मिंजो भरोसा है इना गल्लां चे कोई भी गल्ल उसला छुपियो नी है, क्योंकि जड़ा यीशुऐ सोगी होया सै गुप्त च नी होया है। 27 हे राजा अग्रिप्पे, क्या तू परमेश्वरे दा संदेश देणेबालयां दा भरोसा करदा है? हां, मैं जाणदा है, कि तू भरोसा करदा है।” 28 हुण अग्रिप्पे पौलुसे जो बोलया, “कि तू क्या थोड़े दे समझाणे ला मिंजो मसीही बणाणां चांदा है?” 29 पौलुसे बोलया, “मेरी परमेश्वरे ला ऐ प्राथना है कि क्या थोड़े च, कने क्या मते च, सिर्फ तू ही नी, पर जितणे भी लोक मेरी सुणदे न, मेरे इना बंधणा जो छडी करी मेरे सांई मसीह पर भरोसा करणे बाले होई जान।” 30

तालू राजा अग्रिप्पा कने राज्यपाल फेस्तुस कने उदी छोटी बेहण बिरनीके कने उदे सोगी बैठयो सारे उठी होए कने चली गे; 31 जालू सै बाहर जा दे थे, सै इक दुज्जे ला बोलणा लग्गे, “इनी माणुए ऐसा कोई अपराध नी कितया है जिदिया बजा ला उसयो मौत दी सजा या जेल हो।” 32 राजा अग्रिप्पे राज्यपाल फेस्तुसे जो बोलया, “अगर ऐ माणु महाराजा कैसेरे ला अपने न्याय दी मांग नी करदा, तां छुटी सकदा था।”

27 जालू फेस्तुस राज्यपाले ऐ गल्ल पक्की किती कि असां जाजे पर इतालिया प्रदेशे जो जाणा है, तां उना पौलसे कने कुछ होर केदियां जो भी युलियुस नाए दे महाराजा औगुस्तुसे दिया पलटना दे इक सरदारे दे हथे सौपी दिता। 2 अद्रमुतियुम शेहरे दे इक जाजे पर जडा आसिया प्रदेशे दे कंढे दिया जगा जो जाणे तांई तैयार था, असां उस पर चढी करी समुंद्री यात्रा शुरू किती, कने अरिस्तर्खुस नाए दा इक माणु जडा मकिदुनी प्रदेशे दे थिस्सलुनीके शेहरे दा बासी था, सै साडे सोगी था। 3 दुऐ रोजे असां सैदा शेहरे च पुज्जी गे कने युलियुसे पौलसे पर कृपा करिरी उसयो दोस्तां बाल जाणा दिता ताकि उना ला जरूरी चीजां लेई ओए। 4 ओथु ला असां दुबारा यात्रा शुरू किती कने होआ दा सख उल्टा होणे दिया बजा ला असां साइप्रस टापू दिया आडा च होईकरी चले; 5 कने असां समुंद्री यात्रा करदे होए किलिकिया प्रदेश कने पंफूलिया शेहरे दे तट दे बखे ला होईकरी लूसिया प्रदेशे दे मुरा शेहरे च पुज्जे। 6 ओथु सुबेदारे जो सिकंदरिया शेहरे दा इक जाज इतालिया प्रदेशे जो जांदा होया मिल्ला, कने उनी सांझो उस जाजे पर चढाई दिता। 7 असां बडे रोजा दीकर बले-बले यात्रा किती। साडा कनिदुस शेहरे दीकर पुजणा मुशकिल होई गया था क्योंकि होआ उल्टी दिशा च चलिया थी, इस तांई असां क्रेते टापू दिया आडा चे, सलमोने दे इक छोटे दे टापू दे बखे ला होईकरी अगगे बदे। 8 कने मुशकिला ला उदे किनारे-किनारे चली करी शुभलंगरबारी नाए दिया इकी जगा च पुज्जे, जिथू ला लसया शहर नेडे था। 9 जालू मते रोज बिती गे थे, कने समुंद्री यात्रा हुण बडी खतरनाख होई गियो थी क्योंकि सर्दियां दे मौसमे च होंगे बाला पश्चाताप दी बलि दा त्योहारे होई गया था, कने ऐ सेई मौसम था ऐसा मौसम शुरू होई गया था जालू समुन्द्र च मौसम बडा तूफानी होई जांदा है, इस तांई पौलसे उना जो चेताबनी देईकरी बोलया, 10 “हे सज्जनो, मिंजो ऐसा लगा दा है कि साडी ऐ यात्रा बडी नुकसानदायक है। ना सिर्फ जाजे कने समाने दा पर साडे प्राणा दा भी नुकसान

होणेबाला है।” 11 पर सूबेदारां जाजे दे कपताने कने जाजे दे मालिके दियां गल्लां जो पौलुसे दियां गल्लां ला बदीकरी मनया। 12 कने ऐ शुभलंगरबारी बन्दरगाह सर्दियां कटणे ताई खरी नी थी; इस ताई मतयां दा बिचार होया कि ओथु ला अग्गे चली करी कुसी तरिके ला होई सके तां फिनिक्स बन्दरगाह च पुज्जी करी सर्दियां कटन। ऐ तां क्रेते टापू दी इक बन्दरगाह है जिसा दा दरबाजा दक्षिण-पश्चिम कने उत्तर-पश्चिम दिशा च है। 13 जालू थोड़ी-थोड़ी दक्षिण होआ चलणा लग्गी, तां उना सोचया की उना दी योजना पूरी करणे ताई ठीक बकत है, इस ताई उना लंगर चुकया कने क्रेते टापू दे किनारे ला होंदे होऐ अग्गे बदणा लग्गे। 14 पर अचानक क्रेते टापू दिया जमिना ला इक बड़ा तूफान उठया, जिसयो उतरपूर्वी तूफान बोलदे न। 15 जालू तूफान जाजे ला टकराया, तां जाज तूफाने अग्गे नी टिकी सकया, इस ताई असां उसयो होआ दे साबे जाणा दिता, कने इयां ही होआ सोगी चलदे गे। 16 तालू असां कौदा नाऐ दे इक टापूऐ दिया आड़ा च अग्गे बदे कने बड़िया मुशकिला ला जाजे दी जीवनरक्षक किस्तिया जो बचाया। 17 फिरी जाजे च कम्म करणे बालयां जीवनरक्षक किस्तिया जो चुकी करी ठीक किता, कने उना मजबूती ताई पतवार जो चारो पासे ला रस्सियां ला बन्नी दिता, कने सुरतिस दिया खाड़िया दिया रेटा च फसी जाणे दे डरे ला, उना लंगरे जो थोड़ा थले उतारी करी जाजे जो होआ दे बहाबे सोगी-सोगी रुडने ताई छडी दिता। 18 कने जालू दुज्जे रोजे सांझो तूफाने दिया बजा ला धक्के लगे लगणा, तां सै जाजे ला माल फेंकणा लग्गे; 19 कने तरिऐ रोजे उना अपणे हथा ला जाजे दा साजो समान भी फेंकी दिता। 20 कने जालू मतयां रोजां दीकर ना सूरज ना तारे मिल्ले, कने तूफान लगातार चलया था, तां आखरी च साडे बचणे दी सारी आस खत्म होंदी गई। 21 जालू उना मते रोजां दीकर कुछ नी खादा, तां पौलुसे उना दे बिच खडोई करी बोलया, “हे लोको, तुहांजो मेरी सलाह मनणी चाईदी थी, क्रेते टापू ला अग्गे नी जांदे, तां ना ऐ मुसीबत ओंदी कने ना ऐ घाटा होंदा। 22 पर मैं हुण तुसां जो समझांदा है कि हिम्मत रखा, क्योंकि तुसां चे कुसी दे भी प्राण नी जाणे, पर सिर्फ जाजे दा नाश होणा। 23 क्योंकि परमेश्वर जिदा मैं है, कने जिदी सेवा मैं करदा है, उदे स्वर्गदूते पिछली राती मेरे बाल आई करी बोलया, 24 हे पौलुस, डर मत। तिजो महाराजा कैसरे दे सामणे खड़ा होणा जरूरी है। कने परमेश्वरे सबना जो बचाई लेणा है जडे तेरे सोगी यात्रा करा दे न। 25 इस ताई, हे भाईयो, हिम्मत रखा; क्योंकि मैं परमेश्वरे

पर भरोसा करदा है, कि जियां मिजो ला बोलया है, तियां ही होणा है। 26 पर साड़ा जाज कुसी टापूए पर टकराई टूटी जाणा।” 27 जालू चौदमी रात होई, कने असां अद्रिया समुद्रे च भटका दे थे, तां अधिया राती जाजे च कम्म करणे बालयां अणदाजा लाया कि असां कुसी देशे दे बखे पुजणे बाले न। 28 उना समुद्रे दी गेहराई नापी तां सेती मीटर निकली कने थोड़ा अग्रे जाई करी फिरी नापया तां सताईस मीटर निकलया। 29 तालू पथरीली जगा ला टकराणे दे डरे ला उना जाजे दे पिच्छे चार लंगर पाए, कने ब्याग होणे दी कामना करदे रे। 30 पर जाजे पर कम्म करणे बाले जाजे ला नठणा चांदे थे, कने उना जाजे दे सामणे लंगर पाणे दे बहाने जान बचाणे बाली किस्ती समुद्रे च उतारी दिती; 31 तां पौलुसे सिपाईयां कने सुबेदारां जो बोलया, “अगर ऐ जाजे पर नी रे, तां तुसां भी नी बची सकदे।” 32 तालू सिपाईयां रसियाँ बडी करी सै किस्ती फेंकी दिती। 33 जालू ब्याग होणे बाली थी, तां पौलुसे ऐ बोली करी, सबना जो रोटी खाणे तांई बिनती किती, “अज चौदा रोज होए कि तुसां चिंता करिरी भूखे रे, कने कुछ नी खादा। 34 इस तांई तुहांजो ला बिनती करदा है कि कुछ खाई लिया, जिसला तुसां बची सकन, क्योंकि तुसां चे कूसदा भी कोई बाल बांका नी होणा।” 35 कने ऐ बोली करी उनी रोटी लेईकरी सबना दे सामणे परमेव्वरे दा धन्याबाद किता कने तोड़ी करी खाणा लगा। 36 तालू उना सारयां जो हिम्मत मिल्ली कने रोटी खाणा लग्गे। 37 असां सारे मिली करी जाजे पर दो सो छिहतर जणे थे। 38 जालू सै रोटी खाई करी रजी गे, तां कणका जो समुद्रे च फेंकी करी जाजे जो हलका करणा लग्गे। 39 जालू दिन निकलया, तां उना उसी देशे जो नी पछेणया, पर इक खाड़ी दिखी जिसा दा चौरस किनारा था, कने बिचार किता कि होई सके तां जाजे जो ओथु लेईकरी चलन। 40 तालू उना लंगरा जो खोली करी समुद्रे च छडी दिता कने उसी बेले पाल दे रस्से खोली दिते, कने होआ दे सामणे अगला पाल चढाई करी किनारे पासे चले। 41 पर जाज रते दे डरे ला टकराई गया कने जाजे दा अगला हिस्सा रते च फसी गया, पर जाजे दा पिछला हिस्सा लेहरां दे जोरे ला टूटणा लगी पिया। 42 तालू सपाइयां दा ऐ बिचार होया कि केदियां जो मारी दें, ऐसा ना होए कि कोई तेरी करी नठी जा। 43 पर सुबेदारां पौलुसे जो बचाणे तांई उना जो इस बिचार ला रोकया, कने ऐ बोलया, कि जडे तेरी सकदे न, सै पेहले छाल देईकरी किनारे जो

निकली जा। 44 कने बाकी कोई पटरां पर, कने कोई जाजे दियां होर चीजा दे सहारे निकली जा, कने इसा रीतिया ने सारे जमिना पर बची निकले।

28 जालू असां सारे सलामत बची करी किनारे पर पूजी गे, तालू सान्झो पता लग्गा कि इस टापूऐ दा ना माल्टा था। 2 कने ओथु रेणेबाले लोक बडे दयालु थे, क्योंकि उना बरखा कने ठंड दिया बजा ला अग्न वाली करी साझा स्वागत किता। 3 जालू पौलुसे लकड़ियां बटोली करी अग्गी पर रखियां, अग्गी दे सेके ला इक सप्प निकलया कने उदे हथे ने लिपटी गया। 4 जालू ओथु दे रेणे बालयां उस कीड़े जो उदे हथे च लटकया दिखया, तां अपु चे बोलया, “सच्ची ऐ माणु हत्यारा है, कि समुद्रे च तां बची गया, पर साड़ी न्याये दी देवी नी चांदी की ऐ जिन्दा रे।” 5 तालू उनी कीड़े जो अग्गी पर झटकी दिता, कने उसयो कोई नुक्सान नी होया। 6 पर सै लोक नियाला दे कि उनी सूजी जाणा है, या इकदम थले पेई कि मरी जाणा है, पर जालू सै मतिया देरा दीकर दिखदे रे कने दिखया कि उसयो कुछ नी होया है, तां उना लोकां दे बिचार ही बदलुई गे कने बोलणा लग्गे, “ऐ तां कोई देवता है।” 7 उसा जगा दे अखे बखे उस टापूऐ दे प्रधान पुबलियुसे दी जमीन थी: उनी सांझो अपणे घरे लेईजाई करी तिन रोज साड़ी खातिरदारी किती। 8 पुबलियुसे दे पिता जो बुखार कने पेचिश बिमारी थी। पौलुसे उदे बखे जाई करी प्राथना किती, कने उदे पर हथ रखीकरी उसयो ठीक किता। 9 जालू इयां होया, तां उस टापूऐ दे बाकी बिमार लोक भी पौलुसे बाल आये, कने ठीक होई गे। 10 उना साड़ी बड़ी इज्जत किती, कने तिन मिहने बाद जालू असां जाणा लग्गे, तां जडा कुछ साडे तांई जरूरी था, उना जाजे पर रखी दिता। 11 असां तीन मिहने बाद सिकंदरिया जाजे पर यात्रा शुरू किती। ऐ जाज सर्दियां दिया बजा ला इस टापूऐ पर स्कया था, कने जाजे दे अगले हिस्से पर इक जोड़ी देवतयां दा इक निशाण दियुसकुरी बणया था। 12 सुरकुसा शेहरे च लंगर पाई करी असां तिन्न दिन दीकर स्की रे। 13 असां ओथु ला अग्गे चली करी रेगियुम शेहरे च पुज्जे; इक दिन बाद दक्षिण होआ चली, तां असां दुज्जे रोजे पुतियुली शेहरे च पुज्जे। 14 ओथु सांझो कुछ मसीह भाई मिल्ले, उना दे बोलणे ला असां ओथु सन्त रोज रे; ओथु ला असां जमिनी रस्ते ला रोम शेहरे पासे चले। 15 रोम शेहरे दे कुछ मसीही भाईयां सुणया की असां ओथु ओआ दे न, सै सांझो ला मिलणा कने सांझो रोम शेहर लेई जाणे तांई अप्पियुस शेहरे दे बजार कने तीन-सराए शेहरे दीकर आए, उना जो दिखीकरी पौलुसे परमेस्वरे दा

धन्याबाद किता कने बड़ा खुश होया। 16 जालू असां रोम शेहरे च पुज्जे, तां पौलुसे जो इक सपाईए सोगी जड़ा उदी रखबाली करदा था, किले रेणे दा हुकम मिल्ली गया। 17 तिन्ना रोजां बाद उनी यहदी अगुवां दी इक सभा सदी, कने जालू सै गिठे होए तां उना जो बोलया, “हे यहदी भाईयो, मैं अपने लोकां दे या अपने पूर्वजां दे रीती रिबाजां दे खिलाफ च कुछ नी किता, फिरी भी मिजो केदी बणाई करी यस्सलेम शेहरे ला रोमी सरकार दे हथे देई दिता। 18 उना मिजो जाँची करी छडी देणा चाया, क्योंकि मिजो च मौत दी सजा देणे जोगा कोई दोष नी था। 19 पर जालू यहदी अगुवे इदे खिलाफ च बोलणा लग्गे, तां मिजो बिनती करणा पेई की महाराजा कैसर मेरा न्याय करे; इस ताई नी कि मिजो अपने लोकां पर कोई दोष लांणा था। 20 इस ताई मैं तुहांजो सदया है, ताकि तुसां ला मिल्ले कने गलबात करे; क्योंकि इस्राएले दिया आसा ताई जड़ी की मसीह है, मैं इना जंजीरा ला जकड़या होया है।” 21 उना उसयो बोलया, “ना सांझो कोई तरे बारे च यहदिया प्रदेशे दे लोकां ला कोई चिट्ठी मिली, कने ना साडे भाईयां चे कुनी भी आई करी तरे बारे च दसया, कने ना बुरा बोलया। 22 पर तेरा बचार क्या है? सेई असां सुणना चांदे न, क्योंकि असां जाणदे न, हर जगा इस मते दे बारे च लोक बिरोध करदे न।” 23 तालू यहदी लोकां जडे पौलुसे सोगी थे, उना उदे ताई इक दिन तय किता, कने मते भरी लोक उना बाल गिठे होए। कने पौलुस ब्यागा ला लेईकरी संझा दीकर मूसा दी व्यवस्था ला कने परमेश्वरे दा संदेश देणेबालयां दियां कताबां ला परमेश्वरे दे राज्य दी गबाई, कने यीशुए दे बारे च समझाई-समझाई करी दसदा रिया। 24 तालू थोड़े लोकां पौलुसे दियां गल्लां पर भरोसा किता, कने केईयां भरोसा नी किता। 25 जालू सै अपु चे सेमत नी होए, तां पौलुसे दिया इसा इकी गल्ला पर चली गे, “पबित्र आत्मा यशायाह परमेश्वरे दा संदेश देणेबाले दे जरिये तुहाडे पूर्वजां ला ठीक बोलया है, 26 जाई करी इना लोकां ने बोल: कि सुणदे तां रेणा, पर समझणा नी है, दिखदे तां रेणा है, पर जाणना नी है; 27 क्योंकि इना लोकां दा मन मोटा। कने उना दे कन भारी होई गियो न, कने उना अपणियां हखी बंद कितियां न, इयां ना हो कि सै हखी ला दिखन, कने कना ला सुणन, कने मने ला समझन कने बदली जान, कने मैं उना जो ठीक करे। 28 इस ताई तुसां जाणा, कि परमेश्वरे दे इस उद्वारे दी कथा होर जातियां बाल भेजइयो है, कने उना मनणी।” 29 जालू उनी ऐ बोलया तां यहदी अपु चे बेहस करणा लग्गे कने ओथु

ला चली गे। 30 कने सै पुरे दो साल अपणे खर्चे पर किराए दे घरे च रिया, उना सबना दा स्वागत करदा था जडे उसला मिलणा ओदे थे, 31 कने बिना रोक टोक कने बिना डरयो होईकरी परमेश्वरे दे राज्य दा प्रचार करदा कने प्रभु यीशु मसीह दियां गल्लां सिखांदा रिया।

रोमियो

1 ऐ चिट्ठी पौलुस दिया तरफा ला है, जडा प्रभु यीशु मसीह दा सेवक है, कने परमेश्वरे उसयो प्रेरित होणे ताई चुणया है, कने परमेश्वरे दा शुभसमाचार दा प्रचार करणे ताई नियुक्त कितया है। **2** पबित्र शास्त्र च परमेश्वरे अपने संदेश देणेबालयां दे जरिये बडे पेहले ही शुभसमाचार दा वायदा कितया था, **3** ऐ शुभसमाचार उदे अपने पुत्र, साडे प्रभु यीशु मसीह दे बारे च है, उदा जन्म इक इन्सान दे रूपे च राजा दाऊदे दे बन्शे च होया था, **4** कने पबित्र आत्मा दिया शक्तिया ला जालू सै मरयां चे जिन्दा होया तालू उनी साबित किता की सै परमेश्वरे दा पुत्र है। कने सै यीशु मसीह साडा प्रभु है। **5** मसीह दे जरिये मिंजो अनुग्रह कने प्रेरिताई परमेश्वरे ला मिली ताकि उदे नाए दिया बजा ने सारियां जातियां दे लोक मसीह पर भरोसा करन कने उदे हुकमा जो मनन, **6** तुसां विश्वासी जडे रोम शहर च रेदे न इना ही लोकां च शामिल न जिना जो परमेश्वरे यीशु मसीह दे होणे ताई चुणया है। **7** ऐ चिट्ठी रोम शहर च रेणेबाले उना सारयां दे ना है जिना ने परमेश्वर प्यार करदा है, कने अपने पबित्र लोक होणे ताई सदया है, साडे पिता परमेश्वरे कने प्रभु यीशु मसीह दिया तरफा ला तुसां जो अनुग्रह कने शांति मिलदी रे। **8** पेहले मै तुसां सारयां ताई यीशु मसीह दे जरिये अपने परमेश्वरे दा धन्यवाद करदा है, क्योंकि मती सारियां जगां दे लोक तुसां दे यीशु मसीह पर भरोसे दे बारे च गल्लां करा दे न। **9** परमेश्वर जिसदी सेवा मै अपने पुरे मने ने उदे पुत्रे दे बारे च शुभसमाचार दा प्रचार करदा है, सेई मेरा गबाह है, की मै अपनी प्रार्थना च तुसां लोकां जो लगातार याद करदा है, **10** कने हर रोज बिनती करदा है, की परमेश्वरे दी इच्छा ने कुसी ना कुसी तरीके ने आखरी च तुसां ने मिलणे दा मौका मिल्ले। **11** क्योंकि मै तुसां ने मिलने दी बड़ी इच्छा है, ताकि मै तुसां जो कोई आत्मिक बरदान दें जिसने तुसां भरोसे च होर भी मजबूत होई जान, **12** मेरे बोलने दा मतलब ऐ की मै तुसां जो उत्साहित करी सकें क्योंकि तुसां जाणदे न की मै कियां भरोसा किता कने तुसां मिंजो उत्साहित करी सकन क्योंकि मै जाणदा है की तुसां कियां भरोसा किता। **13** कने हे मसीह भाईयो, मै चांदा है की तुसां जाणी लिया की मै तुसां बाल बार-बार ओणा चांदा, की जियां मै होर जातियां च मसीह ताई चले बणाए, तियां ही तुसां च भी चले बणन, पर हले दीकर इदे च स्काबट ओंदी रेई। **14** मेरी जिम्मेबारी सारयां लोकां जो शुभसमाचार सुणणे दी है, चाए सै यूनानी भाषा जाणने बाले होन या नी जाणने

बाले होन कने चाहे समझदार होन या नासमझ होन। इस ताई मेरी रोम शेहरे च तुसां
 ने मिलणे दी बड़ी इच्छा है। 15 इस ताई मैं तुसां जो भी जड़े रोम शेहरे च रेंदे न,
 शुभसमाचार सुणाणे जो भरपूर तैयार है। 16 क्योंकि मैं मसीह दे शुभसमाचार च
 घमंड करदा है, क्योंकि शुभसमाचार दी शक्ति ने ही परमेश्वरे शुरू ला यहूदियां जो
 बचाया कने हुण सारे संसारे दे लोकां जो बचांदा है। 17 क्योंकि शुभसमाचार च
 परमेश्वर दी धार्मिकता दे बारे च दसया है, ऐ धार्मिकता शुरू ला लेईकरी आखरी
 दीकर भरोसे दे जरिये होंदी है, जियां पबित्र शास्त्र च लिखया है, “जड़ा माणु
 भरोसे दे जरिये परमेश्वरे सोगी सही बणी रेंदा है, उनी ही जिन्दा रेणा।” 18
 परमेश्वरे दा गुस्सा तां, जड़े बुराई कने अधार्मिक कम्म करदे न उना लोकां पर
 स्वर्गे ला प्रकट होंदा है, जड़े बुरे कम्म करणे दे जरिये लोकां जो परमेश्वरे दिया
 सच्चाईयां जो जाणने ला रोकदे न। 19 इस ताई की सै परमेश्वरे दे ज्ञान दे बारे च
 असांनी ने समझी सकदे न, क्योंकि परमेश्वरे ऐ ज्ञान उना पर प्रगट कितया है। 20
 क्योंकि परमेश्वरे दी हमेशा दी शक्ति कने चरित्र जो दिखी नी सकदे, पर संसार दी
 शुरूआत ला ही परमेश्वरे इना जो अपणी सृष्टिया ने दसया है, इस ताई उना बाल
 कोई भाना नी है की सै परमेश्वर जो नी जाणदे। (aīdios g126) 21 इसा बजा ने की
 परमेश्वरे जो जाणने पर भी उना परमेश्वरे दे रूपे च इज्जत नी दिती, कने सोचणा
 लग्गे की ऐ बेकार गल्लां न, ऐथू दीकर की उना जो जियां सोचणा चाईदा तियां नी
 सोचया पर बेकार गल्लां सोचदे रे। 22 सै अपने आपे जो बुद्धिमान जताई करी
 मुख बणी गे, 23 कने हमेशा जिन्दा रेणेबाले परमेश्वरे दिया महिमा जो हमेशा
 जिन्दा नी रेणेबाले, कने पंछियां, कने चारां पैरां बाले, कने रेंगणेबाले जानवरां दियां
 मुर्तियां सांई बदली दिता कने इना दी पूजा करणा लग्गे। 24 इसा बजा ला परमेश्वरे
 उना जो उना दे मने दिया इच्छा अनुसार यौन अशुद्धता तांई छडी दिता, ताकि सै
 अपु चे बुरे कम्म करी के अपने शरीरां दी अनादर करन। 25 क्योंकि सै परमेश्वरे
 दे बारे दिया सच्चाईया पर भरोसा करणे जो मना करदे न, कने सै उसयो मंदे जड़ा
 जुठ है। कने उना संसारे दी पूजा कने सेवा किती, कने ना की उस सृष्टिकर्ता दी
 सेवा किती। उस सृष्टिकर्ता दी जिनी सारे संसारे दियां चिजां जो बणाया है, उदी
 महिमा सदा होंदी रे। आमीन। (aīōn g165) 26 इस ताई तां परमेश्वरे उना जो उना
 दे बुरे बिचारां दे बशे च छडी दिता; ऐथू दीकर उना दियां जनानिया मदीं सोगी
 जायज रिशतयां जो दुजियां जनानियां सोगी नाजायज रिशतयां च बदली दिता। 27

तियां ही मर्द भी जनानिया सोगी जायज रिशता छडी करी अपु चे व्यभिचार करिरी बरबाद होणे लग्गे, कने मर्दा-मर्दा सोगी व्यभिचार करिके अपने ही शरीर च अपणिया इसा गलतिया दी ठीक सजा मिल्ली। 28 क्योंकि जालू उना परमेश्वरे जो अपनाणा मुखता समझया, तां परमेश्वरे भी उना जो सारे नकम्मे कम्म करणे ताई उना दे नकम्मे मने दे बशे च छडी दिता। 29 इस ताई सै हर तरा दे गलत कम्मा च, बुराई च, कने लालच, कने बैरभाव ने भई गे; कने जलन, कने हत्या, कने लडाई झगडे, कने धोखा, कने जलन ने भई गे, कने चुगलखोर, 30 गप्पां मारणे बाले, कने होरनी दी बेस्ती करणे बाले, लडाके, घमंडी, झूठे, डिंगमार, बुरियाँ गल्लां करणे बाले, कने माता पिता दी गल्ल नी मनणे बाले, 31 बेअकले, धोखेबाज, दया भाव नी है कने निर्दयी होई गियो न। 32 सै तां परमेश्वरे दे नियम जो जाणदे न की ऐसा कम्म करणे बाले मौत दी सजा जोगे न, तमि ना सिर्फ अपु ऐसे कम्म करदे न कने करणे बालयां ने खुश भी होंदे न।

2 इस ताई तू सोचदा है की, तू ऐसे लोकां दी निंदा करी सकदा है, जडे दुज्जयां पर दोष लांदे न; क्योंकि जिसा गल्ला पर तू दुज्जे पर दोष लांदा है, उसा ही गल्ला च तू अपने आपे जो दोषी बणांदा है, क्योंकि तू जडा दोष लांदा है सेई कम्म तू अपु करदा है। 2 कने असां जाणदे न की परमेश्वर ऐसे बुरे कम्म करणे बालयां जो न्याय अनुसार सजा दिन्दा है। 3 कने तू जडा ऐसे-ऐसे कम्म करणे बालयां पर दोष लांदा है, कने अपु सेई कम्म करदा है; तू क्या ऐ समझदा है की तू परमेश्वरे दिया सजा ला बची जाणा है? 4 तू क्या परमेश्वर दी भलाई, कने सेहनशीलता, कने धीरज रूपी धने जो बेकार समझदा है? क्या ऐ नी समझदा की परमेश्वरे दी भलाई तिजो अपने पापां जो मनणा कने गलत कम्मा जो छडणा सिखांदी है? 5 पर क्योंकि तू जिदी कने अपने पापां दा पश्चाताप करणे ला मना करी दिता, जिस रोज परमेश्वरे अपना गुस्सा दसणा, उस रोज सच्चा न्याय होणा, जालू परमेश्वरे न्याय करणा तालू परमेश्वरे होर भी जादा दर्दनाक सजा देणी। 6 परमेश्वरे हर इकी जो उदे कम्मा दे अनुसार इनाम देणा है। 7 जडे खरे कम्मा जो मेहनत करदे होऐ महिमा, कने आदर, कने अमरता दीया तोपा च न, उना जो परमेश्वरे हमेशा दी जिन्दगी देणी है; (aiōnios g166) 8 पर जडे मतलबी न कने सच्च जो नी मंदे न, पर बुरे कम्मा जो करदे न, उना पर परमेश्वरे दा गुस्सा कने प्रकोप पोणा है। 9 दुख कने मुशकिलां हर इक उस माणुऐ पर ओणियां न जडे बुरा करदे न, परमेश्वरे पेहले

यहूदियां दा न्याय करणा है कने बादे च उना दा न्याय करणा जडे यहूदी नी न; 10
 पर महिमा कने इज्जत कने शांती हर इकी जो मिलणी है, जड़ा भला करदा है,
 परमेश्वरे सारयां ला पेहले यहूदी लोकां जो देणा फिरी उना लोकां जो देणा जडे
 यहूदी नी न। 11 क्योंकि परमेश्वर सबना सोगी इकोदिया व्यवहार करदा है। 12
 इस ताई की होर जाति दे लोकां बिना मूसा दी व्यवस्था मिलयो ही पाप किता, उना
 जो बिना व्यवस्था दे ही परमेश्वरे सजा देणी, कने जिना यहूदी लोकां मूसा दी
 व्यवस्था मिलणे बाद पाप किता, उना जो परमेश्वरे मूसा दी व्यवस्था दे अनुसार
 सजा देणी; 13 क्योंकि परमेश्वरे दी नजरा च धर्मी लोक से नी न, जडे मूसा दी
 व्यवस्था जो सुणनेवाले न, पर परमेश्वरे दी नजरा च धर्मी लोक से न जडे व्यवस्था
 दा पालन करदे न। 14 फिरी जालू होर जातियां दे लोक जिना बाल मूसा दी
 व्यवस्था नी है, पर स्वभावे ने ही इना कम्मा जो करदे न जडे मूसा दी व्यवस्था च
 लिखयो न, तां उना बाल मूसा दी व्यवस्था नी होणे पर भी से साबित करदे न की
 उना दे मने च ही व्यवस्था है। 15 सै दसदे न की परमेश्वरे दी व्यवस्था उना दे मना
 च लिखियो है, क्योंकि उना दी अंतरात्मा भी ऐई गबाई दिन्दी है की ऐ सच्च है,
 क्योंकि उना दे बिचार ही उना जो दसदे न की सै सही करा दे न की गलत करा दे
 न। 16 ऐ सच्च उस रोज सामणे आई जाणा, जालू परमेश्वरे यीशु मसीह दे जरिये
 जिसदा मै शुभसमाचार सुणादा है सारे माणुआं दी गुप्त गल्लां दा न्याय करणा है।
 17 अगर तू अपने आप जो यहूदी बोलदा है, कने व्यवस्था पर भरोसा रखदा है,
 कने घमंड करदा है की तू परमेश्वर दा खास जन है, 18 कने तिजो परमेश्वर दी
 इच्छा पता है, तू खरियाँ-खरियाँ गल्लां दा साथ दिन्दा है, क्योंकि तिजो इना दे
 बारे च मूसा दी व्यवस्था च सिखाया है; 19 कने तिजो इसा गल्ला दा पक्का पता
 है की, तू अन्ने लोकां जो परमेश्वर दा रस्ता दसदा है, कने तू उना लोकां ताई लौई
 सांई है जडे नेहरे च रेदे न, 20 कने बेअकलां जो सिखाणे बाला, कने बचयां दा
 गुरू है। तिजो पक्का पता है क्योंकि मूसा दी व्यवस्था तेरे बाल है, कने तू पूरी तरा
 सब कुछ जाणदा है कने तू जड़ा बोलदा है सै सच्च है। 21 इस ताई तू जड़ा
 बाकियां जो शिक्षा दिन्दा है, सै शिक्षा अपने आपे जो कनी दिन्दा? तू जड़ा चोरी नी
 करणे दी शिक्षा दिन्दा है, कने अपु ही चोरी करदा है। 22 तू जड़ा ऐ सिखांदा है,
 “व्यभिचार मत करा,” अपु ही तां व्यभिचार करदा है! तू जड़ा मूर्तियां ने नफरत
 करदा है, अपु ही तां मंदरा जो लुटदा है! 23 तू इसा गल्ला पर घमंड करदा है की

तेरे बाल परमेश्वरे दी व्यवस्था है, क्या तू अपु ही व्यवस्था जो नी मन्नी करी, परमेश्वरे दा अनादर नी करदा? 24 “क्योंकि तुसां यहदियां दिया बजा ने, होर जाति दे लोक परमेश्वरे दे बारे च बुरियां गल्लां करदे न,” तुहाड़े इना कम्मा दिया बजा ने पबित्र शास्त्र दियां गल्लां सच्च होइयां न। 25 मै तिजो समझादां है, की तेरा खतना होणे दा फायदा तालू ही है अगर तू व्यवस्था जो पूरा करे, पर अगर व्यवस्था च जियां लिखया तू तियां नी करे, तां तुसां खतना होयो यहदी लोक भी होर जातियां सांई न जिना दा खतना नी होया। 26 तां इदा मतलब है की अगर कोई माणु जिदा खतना नी होया कने सै व्यवस्था दे नियमा जो मनदा है, तां परमेश्वर ऐसे माणुऐ जो भी उस माणुऐ सांई दिखदा है जिदा खतना होया है। 27 कने जड़ा माणु शरीरिक स्वे च बिना खतना रिया सै अगर व्यवस्था जो मनदा है, तां क्या उनी तिजो पर जिस बाल मूसा दी व्यवस्था है कने खतना होणे पर भी व्यवस्था जो नी मनदा है, दोष नी लाणा? 28 क्योंकि सच्चा यहदी सै नी जड़ा यहदी पैदा होया कने जिदा खतना होया। 29 क्योंकि इक सच्चा यहदी सै है जिदा मन परमेश्वरे सोगी सही है कने सच्चा खतना सिर्फ मूसा दे नियम-कानून मनणे नी है, पर मने दा बदलना है जड़ा की परमेश्वरे दी आत्मा ने होंदा है। ऐसे लोकां दी महिमा लोकां दे जरिये नी पर परमेश्वरे दिया तरफा ला होंदी है।

3 तां कोई बोली सकदा है की अगर खतना होई जाणे पर भी परमेश्वर यहदियां जो अपनांदा नी तां यहदी दा यहदी होणे दा क्या फायदा, कने खतने दा क्या फायदा? 2 हौं, इदा बड़ा फायदा है। क्योंकि सारयां ला जरूरी गल्ल ऐ है की, परमेश्वरे दा बचन यहदियों जो दितया है। 3 अगर कुछ यहदी परमेश्वर सोगी बफादार नी भी निकले तां भी क्या है? क्या इदा मतलब ऐ है की परमेश्वरे भी अपने वायदे ला मुकरी जाणा जड़ा उनी यहदी लोकां ने किता? 4 नी बिलकुल भी नी! परमेश्वर हमेशा सच्च बोलदा है, कने हर इक माणु झूठा होऐ, जियां पबित्र शास्त्र च परमेश्वरे दे बारे च लिखया है, “जिसने तू अपणियां गल्लां च धर्मी होऐ कने न्याय करदे बेले तेरी जय होऐ।” 5 पर अगर साड़े बुरे कम्म परमेश्वरे दी धार्मिकता दसदे न, तां असां क्या बोलणा? क्या ऐ गलत है की परमेश्वर गुस्सा होई जाए कने सांझो सजा दे? (ऐ तां मै माणुऐ दिया रीतिया पर बोलदा है।) 6 नी बिलकुल भी नी! अगर परमेश्वर साड़ा यहदियां दा न्याय करणे च सही नी है, तां सै सारे संसारे दे लोकां दा न्याय कियां करगा? 7 कुछ लोक बोली सकदे न, “पर अगर मेरा झूठ

परमेश्वरे दिया सच्चाईया जो उजागर करदा है कने उसयो होर जादा महिमा मिलदी है तां सै कियां मेरा न्याय करी सकदा है कने मिंजो इक पापी दे स्पे च दोषी बणाई सकदा है?” 8 असां बोली सकदे न की “चला असां बुरे कम्म करन, ताकि इदे च कोई भलाई निकले?” जियां की सांझो पर ऐई दोष लगांदे भी न, कने थोड़े बोलदे न की इना दा ऐई बोलणा है। पर जड़े मेरे बारे च इयुदियां गल्लां करदे न सै सजा दे काबिल न। 9 तां फिरी क्या होया? क्या असां यहदी लोक होर जातियां दे लोकां ला खरे न? नी बिलकुल भी नी! क्योंकि असां यहदियां कने होर जातियां दोनो पर ऐ दोष लाई बैठयो न की सै सारे लोक पाप दिया शक्तिया दे बशे च न। 10 जियां पबित्र शास्त्र च लिखया है: “परमेश्वर दे सामणे कोई भी धर्मी नी है, इक भी नी।” 11 ऐथू कोई भी माणु नी है जड़ा समझी सके की क्या सही है; कोई भी परमेश्वरे जो नी जाणना चांदा। 12 सारे परमेश्वरे ला दूर चली गे, कने सारे दे सारे परमेश्वरे तांई निकमे बणी गे; भलाई करणे बाला कोई भी नी, इक भी नी। 13 उना दा गला खुलियो कबरा सांई है जिसा ला बड़ी बदबू ओदी है: क्योंकि सै अपणी जिबा ने बुरा बोलदे न, कने जड़ा बोलदे न सै सांपे दे जेहरे सांई खतरनाख होंदा है। 14 कने उना दे भाषण श्राप कने कड़वाट ने भस्यो न। 15 सै हत्या करणे तांई फुर्तीले न। 16 जिथू कुथी सै जांदे न सै बुराई कने दुख जो लेई ओंदे न। 17 सै नी जाणदे न की कियां शांति ने जि न। 18 उना च परमेश्वर दा डर है ही नी। 19 असां जाणदे न, की व्यवस्था जड़ा कुछ भी बोलदी है सै उना ने ही बोलदी है, जड़े व्यवस्था दे अधीन न, इस तांई की लोकां जो भाना बणाने ला रोकया जाये, कने सारे संसारे दे लोक परमेश्वर दे सामणे हिसाब देणेबाले होई जान। 20 क्योंकि व्यवस्था च दितयो हुकमा जो मनणे ने कोई भी माणु परमेश्वरे सामणे धर्मी नी बणदा, क्योंकि मूसा दी व्यवस्था सांझो दसदी है की असां पापी न। 21 पर हुण बिना मूसा दी व्यवस्था दे हुकमा जो मनयो परमेश्वर दी धार्मिकता प्रकट होई है, ऐ मूसा की व्यवस्था कने परमेश्वरे दे संदेश देणेबालयां दियां कताबां च लिखया है की असां कियां परमेश्वरे दे जरिये धर्मी बणे, 22 मतलब की परमेश्वरे दे सामणे धर्मी तालू बणदे न जालू असां यीशु मसीह पर भरोसा करदे न। क्योंकि हुण यहदी कने होर जाति च कोई फरक नी है। 23 इस तांई की सारयां पाप कितया है कने परमेश्वरे दी उस महिमा ला दूर न जड़ी परमेश्वर दिंदा है, 24 पर परमेश्वरे दे अनुग्रह ने उनी सांझो यीशु मसीह दे जरिये पाप दी सजा ला अजाद किता जड़ा यीशु मसीह च है, परमेश्वर

सांझो बिना कुछ कितयो धर्मी घोषित करी दिन्दा है। 25 परमेश्वरे यीशु मसीह जो सूली पर चढ़ना दिता ताकि उदा खून लोकां दे पापां जो माफ करणे दा जरिया बणी सके, जडे उस पर भरोसा करदे न। परमेश्वरे ऐसा ऐ दसणे तांई किता की सै धर्मी है। पूराणे बकते च परमेश्वरे सबर रखीकरी लोकां दे पापां जो अणदिखा किता, पर हुण सै लोकां दे पापां ने निपटदा है, ताकि सै अपणी धार्मिकता दस्सी सके। इयां परमेश्वर साबित करदा है की सै धर्मी है कने यीशु पर भरोसा करणे बालयां जो भी धर्मी बणादा है। 27 तां हुण ऐसा कुछ है जिस पर असां घमंड करन? नी, ऐसा कुछ नी जिदे बारे च असां घमंड करी सकन। कुण दे नियमा दिया बजा ने? क्या साडे व्यवस्था दे कम्मा जो पूरा करणे ने? नी, पर यीशु मसीह पर भरोसा करणे दी दिया बजा ने। 28 इस तांई असां जाणदे न की परमेश्वरे सांझो यीशु मसीह पर भरोसा करणे ने धर्मी घोषित करी दितया है, ना कि मूसा दी व्यवस्था जो मनणे ने। 29 परमेश्वर सिर्फ यहदियां दा ही परमेश्वर नी है, पर होर जातियां दा भी परमेश्वर है। 30 क्योंकि इक ही परमेश्वर है, जिनी खतने बालयां जो भरोसे ने कने जिना दा खतना नी होया उना जो भरोसे दे जरिये धर्मी घोषित किता है। 31 तां क्या असां व्यवस्था जो भरोसे दे जरिये बेकार बणादे न? नी बिलकुल भी नी! पर असां तां व्यवस्था जो उसा दा सही महत्व देदे न।

4 तां असां यहदी होणे दे नाते अपने पूर्वज अब्राहमे दे बारे च क्या बोलन? की उसयो कुसा बजा ला धर्मी गिणया? 2 क्योंकि अगर अब्राहम भले कम्मा ने धर्मी बणादा, तां सै घमंड करी सकदा था, पर हुण सै परमेश्वरे सामणे अपने भले कम्मा पर घमंड नी करी सकदा। 3 पबित्र शास्त्र क्या बोलदा है? ऐ की “अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणाया।” 4 कम्म करणे बाले दी मजदूरी देणा दान नी है, पर ऐ हक समझया जांदा है। 5 कुण परमेश्वर दा अनुग्रह पाणे तांई कम्म नी करदा है, पर जडा पापी लोकां जो धर्मी ठहराणे बाले परमेश्वरे पर भरोसा करदा है, उदा भरोसा उदे तांई धार्मिकता गिणया जांदा है। 6 जियां पबित्र शास्त्र च दाऊद उना आशीषां दे बारे च लिखदा है, जडियां उना लोकां जो मिलदियां न जिना जो परमेश्वरे धर्मी बणाई दिता, चाहे उना धर्मी बणने तांई कोई कम्म नी किता, दाऊद भी इना जो धन्य बोलदा है; 7 “धन्य सै न, जिना दे अधर्म परमेश्वरे माफ किते, कने जिना दे पाप भुलाई दिते। 8 धन्य न सै माणु परमेश्वर जीना दे पापां दा लेखा जोखा नी रखदा।” 9 तां क्या ऐ धन्य

बचन खतने बालयां ताई ही है, या जिना दा खतना नी होया है उना ताई भी है? असां ऐ बोला दे न की पबित्र शास्त्र क्या बोलदा है, अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बनाया। 10 तां सै धर्मी कालू बणया? क्या खतना होणे ला पेहले या खतना होणे बाद? अब्राहम खतना होणे ला बाद नी, पर खतना होणे ला पेहले धर्मी बणया। 11 परमेश्वरे उसयो पेहले ही अपनाई लिया था कने उसयो धर्मी घोषित करी दितया था, जबकि उदा हले भी खतना नी होया था, खतने दा निशाण उस अपनाणे दी मोहर है। इस ताई सै उना लोकां दा पूर्वज है जिना बाल भरोसा है पर उना दा खतना नी होया है। इना जो इना दे भरोसे दिया बजा ने धर्मी गिणया जांदा है। 12 कने अब्राहम उना खतना कितयो लोकां दा पूर्वज होया, जड़े ना सिर्फ खतने पर आस रखदे न, पर उना बाल सियुदा ही भरोसा है, जड़ा साडे पूर्वज अब्राहमे खतना करणे ला पेहले कितया था। 13 परमेश्वरे अब्राहम कने उदे बंशजा ने बायदा किता की सै पुरे संसार दे वारिस होणे न, परमेश्वरे ऐ बायदा इस ताई नी किता की अब्राहमे मूसा दे हुकमा जो मनया, पर अब्राहमे जो भरोसे दिया बजा ने परमेश्वरे धर्मी बणया। 14 क्योंकि अगर परमेश्वरे दा अब्राहम कने उदे बंशजा जो संसार देणे दा वायदा सिर्फ उना ही लोकां ताई है जड़े मूसा दी व्यवस्था दे हुकमा जो मंदे न, तां भरोसा बेकार है कने परमेश्वरे दे बायदे दा भी कोई मतलब नी रिया। 15 परमेश्वर तां उना लोकां जो सजा दिन्दा जड़े व्यवस्था जो पूरी तरा नी मंदे, पर जिथू व्यवस्था है ही नी, ओथु व्यवस्था दा उलंघन भी नी होदा। 16 इस ताई लोकां जो परमेश्वरे दा बायदा उना दे भरोसे दे जरिये मिल्ला। ऐ इस ताई होया की परमेश्वरे दा बायदा अनुग्रह दे जरिये मिल्ले, तालू अब्राहम दे सारे बंशा बाल ऐ बायदा हो, ऐ सिर्फ उना ताई ही नी है जड़े मूसा दी व्यवस्था पर चलदे न, पर हर इक उस माणु ताई जड़ा अब्राहमे सांई भरोसे सोगी जिन्दगी जिंदा है, जड़ा असां सारयां दा पूर्वज है। 17 जियां पबित्र शास्त्रां च लिखया है, “मैं तिजो मतियां जातियां दा पूर्वज बनाया है” परमेश्वरे दे सामणे अब्राहम साडा पिता है। उना उस परमेश्वरे पर भरोसा किता, जड़ा मरयां जो फिरी जिन्दा करदा है कने जड़ियां चीजां मौजूद भी नी न, उना दा ना इयां लेंदा है, की जियां की सै चीजां मौजूद न। 18 परमेश्वरे अब्राहम जो बोलया की सै तिजो मते सारे बंशज दिगा, पर अब्राहमे सोचया की मैं बड़ा बुढ़ा होई गया है, क्योंकि उस बकत सै लगबग सौ सालां दा होई गया था कने सारा भी बच्चे पैदा नी करी

सकदी थी। तां ऐ पक्का ही था की अब्राहम कदी भी मतियां जातियां दा पिता नी बणी सकदा था, पर फिर भी अब्राहम अपने भरोसे च कमजोर नी होया कने सै लगातार भरोसा रखदा रिया कने उम्मीदा जो टूटना नी दिता। 20 कने ना ही अविश्वासी होईकरी परमेश्वरे दे बायदे पर शक किता, पर भरोसे च मजबूत होईकरी परमेश्वरे दी महिमा किती, 21 कने पक्का यकीन किता की जिसा गल्ला दा परमेश्वरे बायदा कितया है, सै इस बायदे जो पूरा करणे दे भी काबिल है। 22 उदे भरोसे दिया बजा ने ही परमेश्वरे अब्राहमे जो धर्मी बणाया, 23 कने इस बचन कने भरोसे दिया बजा ने ही परमेश्वरे अब्राहमे जो धर्मी बणाया, “ना सिर्फ उदे ताई लिखया गया,” 24 बल्कि साडे ताई भी जिना जो परमेश्वरे धर्मी घोषित करणा, मतलब की अगर असां परमेश्वरे पर भरोसा करगे, जिनी साडे प्रभु यीशु मसीह जो मरयां चे जिन्दा किता, तां असां भी भरोसे दिया बजा ने धर्मी मन्ने जाणे। 25 यीशु मसीह साडे पापां ताई मरी गया, कने परमेश्वरे उसयो दुबारा जिंदा किता ताकि परमेश्वर सांझो धर्मी बणाए।

5 इस ताई असां भरोसे ने धर्मी बणे, क्योंकि जड़ा प्रभु यीशु मसीहे साडे ताई कितया है, उदे जरिये असां परमेश्वरे सोगी शांति ने रेन, 2 क्योंकि साडे भरोसे दिया बजा ला यीशु मसीह सांझो इस अनुग्रह च लेईकरी आया जिथू असां हुण न, कने असां पूरी हिम्मत कने खुशिया ने परमेश्वरे दी महिमा च हिस्सेदार होणा। 3 सिर्फ ऐ ही नी, बल्कि सांझो दुखां च भी खुश रेणा चाईदा, क्योंकि असां जाणदे न की दुख सेहणे ने असां होर जादा सहनशील बणदे न, 4 परमेश्वरे सांझो अपनाई लिया क्योंकि असां दुखां च सेहणा सीखी लिया है, कने परमेश्वर सांझो अपनांदा है इस ताई सांझो आस है; 5 कने आस ने सांझो शर्मिंदगी नी होंदी, क्योंकि पबित्र आत्मा जड़ी परमेश्वरे सांझो दितियो है उदे जरिये परमेश्वरे साडे मना जो प्यार ने भरी दितया है। 6 क्योंकि जालू असां कमजोर थे, तालू मसीह परमेश्वरे दे चुणयो बकत पर बुरे लोकां ताई मरया। 7 ऐ कुसी ताई कठिन है की कोई धर्मी माणुए ताई अपनी जान देई दे, होई भी सकदा है की भले माणुए ताई अपनी जान देणे दी इच्छा रखे। 8 पर परमेश्वर सांझो पर अपने प्यार दी भलाई इस तरीके ने प्रगट करदा है, की जालू असां पापी ही थे तालू मसीह साडे ताई मरया। 9 जालू असां हुण धर्मी बणे क्योंकि यीशु मसीह साडे ताई मरया कने साडे पापां ताई अपना खून बहाया, तां सांझो यकीन है की मसीहे सांझो परमेश्वरे दे गुस्से ला बचाणा? 10

क्योंकि जालू असां परमेश्वरे दे दुश्मन ही थे तमी उदे पुत्र यीशु दे मरणे ने साड़ा
 मेल परमेश्वरे सोगी होया, इस ताई सांझो पक्का पता है की हुण साड़ा मेल शान्ति
 ने परमेश्वरे सोगी है, मसीहे सांझो बचाणा क्योंकि मसीह जिन्दा है। 11 कने सिर्फ
 ऐ ही नी, पर हुण तां साडे प्रभु यीशु मसीह दे जरिये परमेश्वरे ने साड़ा मेल होई
 गिया है, इस ताई असां परमेश्वर च खुश न। 12 इस ताई जालू इक माणुऐ दिया
 बजा ने पाप संसार च आया, आदम पेहला माणु है जिसयो परमेश्वरे बणाया कने
 आदमे पाप किता कने मरी गिया, कने जिसदी बजा ने सै सारे लोक जडे इस संसार
 च पैदा होए, सै सारे मरे, क्योंकि सब पापी बणी गे। 13 मूसा दी व्यवस्था दिते
 जाणे ला पेहले ही लोकां पाप किता, पर इसयो पाप नी गिण्या क्योंकि तालू कोई
 व्यवस्था नी थी कने कोई नियम भी नी टुटया था। 14 तमी आदम ला लेईकरी
 मूसा दीकर सारयां लोकां पाप किता कने सारे मरी गे, जिना आदम सांई कुसी तरा
 दे हुकम नी मनणे ने पाप नी कितया था। आदम दे पापे इना सारयां लोकां पर प्रभाव
 पाया, ठीक तियां ही जियां मसीहे किता जड़ा उदे बाद आया। 15 पर आदम दा
 पाप उस बरदान सांई नी है जड़ा परमेश्वर सांझो अपने अनुग्रह ला दिन्दा है,
 क्योंकि इक माणुऐ दा पाप मते लोकां तांई मौत लेईकरी आया। पर परमेश्वरे दा
 अनुग्रह बड़ा महान है, जड़ा उनी सांझो दितया है, उदी कीमत मतयां लोकां तांई
 उसला बडी जादा है। यीशु मसीहे इक माणुऐ दे रूपे च अपने अनुग्रह ला जड़ा
 किता, उनी इसयो संभव किता। 16 जड़ा तोफा परमेश्वर सांझो दिन्दा है सै आदम
 दे पाप सांई नी है, क्योंकि इक पाप सजा लेईकरी आया, पर चाहे असां मते
 सारे पाप किते न, परमेश्वरे सांझो सै तोफा दिता जिसने असां धर्मी बणदे न। 17
 क्योंकि जालू इक माणुऐ दे पापां दिया बजा ने मौत सारे लोकां पर आई गई, तां
 जिना लोकां जो अनुग्रह कने धार्मिकता दा बरदान मता सारा मिलदा है उना जो इक
 माणुऐ दे, मतलब की यीशु मसीह दे जरिये हमेशा दी जिन्दगी मिलणी कने उना
 राज्य भी करणा। 18 इस ताई जियां इक पाप सारे माणुआं तांई सजा लेईकरी
 आया, तियां ही इक धार्मिकता दा कम्म भी सारयां लोकां तांई धर्मी बणने दी बजा
 बणी जड़ा जिन्दगी दिन्दा है। 19 क्योंकि जियां इक माणुऐ दे हुकम नी मनणे ने
 मते लोक पापी बणे, तियां ही इक माणुऐ दे हुकम मनणे ने मते लोकां धर्मी बणना
 है। 20 मूसा दी व्यवस्था दिती गई ताकि सारे लोक जाणी सकन की सै कितणे पापी
 न, पर जालू लोकां पाप पर पाप किते, तां परमेश्वरे अपनी दया कने अनुग्रह होर

भी जादा दसया, 21 जियां सारयां पाप किता कने सारे मरी गे, तियां ही साडे प्रभु यीशु मसीह दे जरिये परमेश्वरे दे अनुग्रह ने उना जो धर्मी बणाणा कने उना जो हमेशा दी जिन्दगी देणी। (aiōnios g166)

6 तू सोचदा है, की अगर परमेश्वरे अपने अनुग्रह ने साडे पापां जो माफ करी दितया है, पर असां ऐसा ना सोचन, चला असां पाप करदे रैन ताकि अनुग्रह होर जादा हो। 2 नी बिलकुल भी नी! अगर असां पाप ताई इक बरी मरी गे तां सांझो लगातार पाप नी करणा है। 3 असां जाणदे न की जालू असां यीशु मसीह सोगी इक होंगे ताई बपतिस्मा लिया, तां असां यीशु मसीह सोगी मरी गे। 4 जालू असां बपतिस्मा लिया तां ऐ ऐसा था जियां असां मसीह सोगी मरी गे कने उस सोगी दफनाई दिते, ताकि जियां मसीहा पिता परमेश्वर दिया महिमा दे जरिये मरयां चे जिन्दा किता, तियां ही असां भी नोई जिन्दगिया जो नोए तरीके ने जिन। 5 क्योंकि अगर असां बपतिस्मे जरिये यीशु दी मौता च उदे सोगी इक होई गे, तां पक्का है की असां उदे जिन्दे होणे पर उदे सोगी इक होई जाणा। 6 क्योंकि असां जाणदे न की साडा पराणा पापी सभाव यीशु मसीह सोगी सूली पर चढाया गया, ताकि शरिर दा पापी सभाव खत्म होई जाऐ, कने असां अगे जो पाप दे गुलाम नी रेन। 7 क्योंकि जालू असां मसीह सोगी मरी गे तां असां पाप दी शक्ति ला मुक्त होई गे। 8 इस ताई अगर असां मसीह सोगी मरी भी गे, तां साडा भरोसा ऐ भी है की उदे सोगी जीणा भी है, 9 क्योंकि असां जाणदे न की, मसीह मरी करी जिन्दा होया कने फिरी कदी नी मरणा है। मौत दा उस पर कोई हक नी है। 10 क्योंकि यीशु मसीहा जडा मरी गया तां पाप ताई इक ही बरी मरी गया; पर जडी जिन्दगी सै जी दा है, सै परमेश्वर दे आदर ताई जिंदा है। 11 इयां ही तुसां भी अपने आपे जो पापे दी शक्ति ताई मरया होया समझा, पर परमेश्वरे ताई यीशु मसीह जो इज्जत देणे ताई जिया। 12 इस ताई पापी इच्छां जो अपणिया जिन्दगिया पर राज करणा मत दिया, ताकि तुसां अपणियां पापी इच्छा दे अनुसार कम्म ना करन। 13 कने ना अपने शरीर दे अंगा जो बुरे कम्मा ताई इस्तेमाल करा, पर अपने आपे जो मरयां चे जिन्दा समझीकरी अपने आपे जो परमेश्वरे जो दिया, कने अपने शरीर दे अंगा जो धार्मिकता दे कम्मा जो पूरा करणे ताई अपणी जिन्दगी परमेश्वरे जो दिया। 14 तां तुसां पर पाप दी शक्तिया राज्य नी करणा, क्योंकि तुसां मूसा दी व्यवस्था दे अधीन नी पर परमेश्वर दे अनुग्रह दे अधीन न। 15 तां क्या होया? अगर हुण असां

व्यवस्था दे अधीन नी न पर परमेश्वरे दे अनुग्रह दे अधीन न, तां सांझो पाप नी करणा चाईदा। 16 तुसां ऐ जाणदे न की जालू तुसां अपने आपे जो कुसी दा गुलाम बणाई दिन्दे न, तां फिरी सै माणु तुहाडा मालिक है कने तुसां जो सै करणा चाईदा जडा सै बोलदा है: तुसां पाप दे गुलाम बणी सकदे न, जडा तुसां जो मौता पासे लेई जांदा है, या तुसां परमेश्वरे दे गुलाम बणी सकदे न, जडा तुसां जो धार्मिक जिंदगी जिणे च अगुवाई करदा है। 17 तुसां जडे पाप दे गुलाम थे, पर हुण तुसां उस शिक्षा जो मंदे न जडी तुसां जो मिल्ली है, इदे तांई मै परमेश्वर दा धन्यावाद करदा है, 18 परमेश्वरे तुसां जो पाप दी शक्ति ला अजाद करी दिता कने तुसां परमेश्वर दे गुलाम बणी गे, की सै करणे तांई जडा सही है। 19 मै गुलामी दा ऐ उदाहरण तुसां जो इस तांई दिता ताकि तुसां असानी ने समझी सकन की मै क्या सिखा दा है। जियां तुसां अपने शरीर दे अंगा जो बुरे कम्म कने अपवित्रता दी गुलामी तांई देई दिता, तियां ही हुण अपने शरीर दे अंगा जो भले कम्म कने पबित्रता दे गुलाम होणे तांई देई दिया। 20 जालू तुसां पाप दे गुलाम थे, तां तुसां दी भले कम्मा जो करणे दी कोई इच्छा नी थी। 21 तुसां बुरे कम्म किते, कने तुसां हुण इना कम्मा ला शर्मिंदा होंदे न। तां तुसां जो क्या मिल्ला? ऐसे कम्म सिर्फ मौत लेईकरी ओंदे न। 22 पर हुण पाप ला अजाद होईकरी कने परमेश्वरे दे गुलाम बणी करी तुसां दे ऐसे कम्म जिन्दगी च पबित्रता लेईकरी ओंदे न, कने उना दा अंत हमेशा दी जिन्दगी है। (aiōnios g166) 23 क्योंकि पाप दा नतीजा मौत है, पर सै बरदान जडा परमेश्वर सांझो दिन्दा है, सै हमेशा दी जिन्दगी है जडी साडे प्रभु यीशु मसीह च है। (aiōnios g166)

7 हे मसीह भाईयो, तुसां जाणदे न (मैं व्यवस्था जो जाणने बालयां जो बोलदा हे) की जालू दीकर माणु जिन्दा रेंदा है, तालू दीकर ही उस व्यवस्था दा अधिकार उस पर है? 2 उदाहरण तांई, व्यवस्था दे अनुसार इक माणुऐ दी घरे बाली उदी ही घरे बाली बणी की रे जालू दीकर उसा दा घरेबाला जिन्दा है, पर जालू उसा दा घरेबाला मरी गया, तां सै कुसी होरसी ने बियाह करणे तांई अजाद है, पर अगर सै अपने घरे बाले दे होंदे होए कुसी होरसी माणुऐ सोगी चली जाए, तां उसयो व्यभिचारणी बोलदे न। 4 तां हे मेरे मसीह भाईयो, जालू तुसां मसीह सोगी मरी गे, तां तुसां व्यवस्था दे अधिकार तांई भी मरी गे। हुण तुसां मसीह दे न जडा मरयां चे जिन्दा होई गया ताकि तुसां परमेश्वरे तांई फलदायक जिन्दगी जी सकन। 5

क्योंकि जालू असां पापी सभाव दे बशे होंदे न, तां पापी इच्छां साडे अंदर कम्म करदियां न कने व्यवस्था इना पापी इच्छां जो जगाई दिंदिया न कने मौत दा फल पैदा करणे तांई साडे शरीर च कम्म करदियां न। 6 पर असां व्यवस्था तांई मरी गे जिना सांझो गुलाम बणया था, पर हुण व्यवस्था ला अजाद होई गे न, हुण असां लिखियो व्यवस्था जो परमेश्वरे दी सेबा मन्नी करी नी करदे न, पर आत्मा दियां गल्लां जो मनी करी नोए तरीके ने सेबा करी सकदे न। 7 तां असां क्या बोलणा? क्या व्यवस्था पाप है? नी बिलकुल भी नी! पर व्यवस्था ने मिंजो पता चला की पाप क्या है। मिंजो समझ आया की लालच करणा पाप है क्योंकि ऐ व्यवस्था च लिखया है, की लालच मत कर। 8 पर पापे इना हुकमा दा इस्तेमाल करिके मिंजो च हर तरह दा लालच पैदा किता, क्योंकि बिना व्यवस्था दे पाप मुर्दा है। 9 मैं तां व्यवस्था बिना जाणयो जिन्दा था, पर जालू मैं व्यवस्था जो जाणी लिया, तां पाप करणे दी इच्छां मेरे अंदर बदी गियां, कने मैं परमेश्वरे ला लग होई गिया। 10 कने सेई हुकम जिना जो परमेश्वरे मिंजो जिन्दगी देणे तांई दितया था, इना ही मिंजो परमेश्वर ला लग करी दिता। 11 क्योंकि पापे इना हुकमा दा इस्तेमाल करिके मिंजो धोखा देई दिता, कने उनी ही मिंजो परमेश्वरे ला लग करी दिता। 12 इस तांई व्यवस्था पाप नी पर पबित्र है, कने हुकम पबित्र, धर्मी कने सही है। 13 क्या व्यवस्था जड़ी खरी थी, मिंजो परमेश्वरे ला लग होणे दी बजा बणी? सै जड़ी खरी थी, मिंजो परमेश्वरे ला दूर करणे दी बजा बणी? नी बिलकुल भी नी! पर ऐ पाप था जिनी ऐ किता, पापे व्यवस्था जो इस्तेमाल किता जड़ी सही थी, ताकि सै मिंजो परमेश्वरे ला लग करे, इस तरिके ने पापे दस्सी दिता की सै सच्ची च क्या है, कने हुकम दस्सी दिता की पाप बुरा है। 14 क्योंकि असां जाणदे न की व्यवस्था तां आत्मिक है, पर मैं शारीरिक माणु कने पाप दा गुलाम है। 15 कने जड़ा मैं करदा है उसयो नी जाणदा, क्योंकि जड़ा मैं चांदा है सै नी करदा, बल्कि सै ही करदा है, जिसला मैं नफरत करदा है। 16 कने अगर, जड़ा मैं नी चांदा है सेई बुरे कम्म मैं करदा है, तां मैं मनी लेंदा है की व्यवस्था खरी है। 17 तां ऐसी हालत च जड़ा बुरे कम्म करणे बाला है सै मैं नी, पर पाप है जड़ा मिंजो च बसया है। 18 क्योंकि मैं जाणदा है, की मेरे पापी सभाव च कुछ भी खरा नी है, भले कम्म करणे दी इच्छा तां मिंजो च है, पर भले कम्म मिंजो ला होंदे नी। 19 क्योंकि जिस खरे कम्मे दी इच्छा मैं करदा है, सै तां नी करदा, पर जिसा बुराईया दी इच्छा नी करदा, सेई

करदा है। 20 पर अगर मैं सेई करदा है जिसदी इच्छा नी करदा है, तां इसयो करणे बाला मैं नी है, पर सै पाप है जड़ा मिंजो च बसया है। 21 ऐथू मिंजो इस सच दा अहसास होंदा है की जालू भी मिंजो खरा करणे दी इच्छा होंदी है, तां मैं सेई करदा है जड़ा बुरा है। 22 क्योंकि मैं अपने पुरे मने ला तां परमेश्वरे दिया व्यवस्था ला बड़ा खुश रेंदा है। 23 पर मिंजो अपने शरीर दे अंगा च कोई होर ही व्यवस्था मिल्ला दी है, जड़ी मेरिया मने दिया व्यवस्था ला लडदी है कने ऐ शक्ति मिंजो पाप दा गुलाम बणादी है जड़ी हले भी मेरे शरीर दे अंगा च कम्म करदी है। 24 मैं कदिया अभागा माणु है! मिंजो इस शरीर ला कुण छुडागां, जड़ा मिंजो परमेश्वरे ला लग करदा है? 25 मैं मने ला तां परमेश्वरे दिया व्यवस्था जो मनदा, पर शरीर ला पाप दिया व्यवस्था जो मनदा है। मैं परमेश्वरे दा धन्यवाद करदा है जिनी मिंजो प्रभु यीशु मसीह दे जरिये बचाई लिया।

8 इसा बजा ला हुण जड़े यीशु मसीह च न, उना जो सजा दा हुकम नी है। 2 क्योंकि पबित्र आत्मा तुसां जो सै जिन्दगी दिन्दा है, जड़ी यीशु मसीह ला ओदी है कने सै तुसां जो पाप कने मौत ला अजाद करदी है। 3 क्योंकि जड़ा कम्म मूसा दी व्यवस्था साड़ा पापी सभाब होणे दिया बजा ने नी करी सकी, सै परमेश्वरे किता, मतलब की अपने ही पुत्रे जो साड़े पापी शरीर सांई बणाई करी साड़े पापां तांई बलिदान होणे तांई भेजी दिता, परमेश्वरे मसीह दे शरीर च पाप जो सजा दिती। 4 इस तांई की व्यवस्था जड़ी धर्मी होणे तांई जिना गल्लां दी मांग करदी है, पर असां पापी सभाब दे अनुसार नी पर पबित्र आत्मा दे अनुसार चली करी इना गल्लां जो पूरा करदे न। 5 क्योंकि जड़े लोक पापी सभाब दे बशे च रेंदे न, सै पापी गल्लां दे बारे च सोचदे न, पर जड़े पबित्र आत्मा दे बशे च रेंदे न सै उना गल्लां दे बारे च बिचार करदे न जड़ियां आत्मा जो खुश करदियां न। 6 अगर तुसां अपने मन जो पापी सबाभे दे बशे च रखदे न तां उदा नतीजा मौत है, पर अगर तुसां अपने मने जो पबित्र आत्मा दे बशे च रखगे तां उदा इनाम जिन्दगी कने शांति है। 7 क्योंकि पापी सभाब दे बशे च रेणा तां परमेश्वरे ने बैर रखणा है, क्योंकि पापी सभाब ना तां परमेश्वरे दिया व्यवस्था दे अधीन है, कने ना ही उदिया व्यवस्था दा पालन करी सकदा है। 8 कने जड़े पापी सभाब दे बशे च न, सै परमेश्वरे जो खुश नी करी सकदे। 9 पर जालू परमेश्वरे दी आत्मा तुसां च बसदी है, तां तुसां पापी सभाब दे बशे च नी न, पर आत्मा दे बशे च न। अगर कुसी च मसीह दी आत्मा नी है तां सै

मसीह दा नी है। 10 अगर मसीह तुसां च है, तां पाप दिया बजा ने शरीर मरया होणे पर भी धार्मिकता दिया बजा ने तुहाड़ी आत्मा जिन्दा है। 11 कने अगर परमेश्वरे दी आत्मा जिना यीशुऐ जो मरी करी जिन्दा किता जड़ी तुसां च बसियो है; तां जिनी यीशु मसीह जो मरयां चे जिन्दा किता उनी तुहाड़े मरणे बाले शरीर जो अपणिया आत्मा दे जरिये जिन्दा करणा। 12 तां हे मसीह भाईयो, सांझो हुकम मनणा चाईदा, पर सै नी जडा साड़ा पापी सभाव चांदा है की असां करन। 13 क्योंकि अगर तुसां पापी सभाव दे अनुसार जिन्दगी जीगे, तां तुसां परमेश्वरे ला लग होई जाणा, अगर तुसां पबित्र आत्मा दिया शक्तिया ला सै सब करणा बंद नी करगे जडा तुहाडा पापी सभाव करणा चांदा है, तां तुसां जिन्दा रेणा। 14 इस तांई की जितणे लोक परमेश्वरे दिया आत्मा दे चलाणे ने चलदे न, से ही परमेश्वरे दे बच्चे न। 15 क्योंकि तुसां जो गुलामी दी आत्मा नी मिलियो है, की तुसां फिरी परमेश्वरे ला डरन, पर तुहांजो परमेश्वरे दी आत्मा मिल्ली है जालू उनी तुसां जो अपणे बच्चे होणे तांई गोद लिया, जिसने असां हे बापू, हे पिता बोली करी पुकारदे न। 16 पबित्र आत्मा अपु ही साडिया आत्मा सोगी गबाई दिन्दा है, की असां परमेश्वरे दी ओलाद न। 17 कने अगर ओलाद न, तां वारिस भी न, बल्कि परमेश्वरे दे वारिस कने मसीह सोगी वारिस न, अगर असां यीशु सांई दुखां जो सेहन करदे न। तां असां भी उदी महिमा च हिस्सा लेणा। 18 मिजो पक्का यकीन है, की जिना दुख तकलिफां जो असां इस बकत सेहन करा दे न, ऐ दुख तकलीफ उस महिमा दे सामणे बड़े घट न जड़ी सांझो परमेश्वर बादे च देणे बाला है, 19 क्योंकि सारी सृष्टि बडिया आसा सोगी उस बकत दा इंतजार करा दी है, जालू परमेश्वरे प्रगट करणा है की उदे बच्चे कुण न। 20 क्योंकि परमेश्वरे जडा कुछ भी संसार च बणाया, सै बेकार होई गया, इस तांई नी होया की सै चांदे थे, पर ऐ इस तांई होया की परमेश्वरे ऐसा किता। पर फिर भी इक आस है। 21 की संसार उस दिने दा इंतजार करा दा है, जालू संसारे मौत कने बिनाश दी गुलामी ला अजाद होई जाणा कने परमेश्वरे दे बचयां दी महिमामय आजादी च हिसेदार होंगा। 22 क्योंकि असां जाणदे न, जालू ला आदमे पाप किता, तालू ला लेइकरी हुणे दीकर जितणियां भी चीजां जो परमेश्वरे बणाया, सै पीडा ने इयां चिखदियां न जियां इक जनानी बच्चे जो जमणे बकत चिखदी है। 23 कने सिर्फ संसार ही नी जडा पीडा सेहन करा दा है, पर असां भी पबित्र आत्मा जरिये होणे बाली महिमा दा स्वाद चखणा

है, हालांकि असां अंदर-अंदर ही पीड़ा सेहन करदे न; पर असां हुण भी उस बकते दा इंतजार करदे न जालू परमेश्वर सांझो अपने बच्चे होणे ताई उपर लेई जाणा है कने साडे शरीर जो उना सारियां बुरियां चीजां ला छुटकारा देई देणा कने सांझो नोए शरीरां जो देईकरी साडे शरीरां जो अजाद करणा है। 24 परमेश्वरे जालू सांझो बचाया तालू सांझो ऐ आस दिती, की हल्ले दीकर सांझो सै सब कुछ नी मिल्ला जिसदा परमेश्वरे वायदा कितया, इस ताई सांझो अजे भी आस है की सै सब कुछ मिलणा है। इस ताई हुण असां सबर रखीकरी इंतजार करदे न जालू दीकर सै मिल्ली ना जाए। क्योंकि कोई भी उसा चिजा जो पाणे दी इच्छा नी करदा जड़ी पेहले ला ही उदे बाल है। 26 इयां ही पबित्र आत्मा भी साड़ी तालू सहायता करदा है जालू असां अपने परमेश्वरे पर भरोसे च कमजोर होदे न, क्योंकि असां नी जाणदे की प्रार्थना कियां करणा चाईदी, पर पबित्र आत्मा अपु ही रोई-रोई करी साडे ताई बिनती करदी है, सै असां दस्सी नी सकदे न। 27 कने मना जो जाणने बाला परमेश्वर जाणदा है, की पबित्र आत्मा क्या बोला दी है? क्योंकि सै पबित्र लोकां ताई परमेश्वरे दिया इच्छा अनुसार बिनती करदा है। 28 कने असां जाणदे न, की जडे लोक परमेश्वरे ला प्यार रखदे न, उना लोकां ताई सारियां गल्लां मिलिकरी भलाई जो ही पैदा करदियां न, मतलब की उना ताई जडे उदिया इच्छा अनुसार चुणयो न। 29 क्योंकि जिना जो उनी पेहले ला ही चुणया है, उना ताई पेहले ला ही निर्णय भी लिया है, की सै उदे पुत्रे साई बणी जान ताकि सै मते भाईयां चे जेठा पुत्र बणन। 30 फिरी जिना ताई परमेश्वरे पेहले ला ही तय कितया है, उना जो ही चुणया भी, कने जिना जो चुणया है, उना जो धर्मी भी बणाया है, कने जिना जो धर्मी बणाया, परमेश्वरे अपनी महिमा उना सोगी बंडणी है। 31 तां असां इना गल्लां दे बारे च सोची करी इसी नतीजे पर ओदे न, अगर परमेश्वर साडे पासे है, तां कोई भी दुशमण सांझो हराई नी सकदा। 32 जिनी परमेश्वरे अपने इकलोते पुत्रे जो साडे ताई बलिदान करी दिता, कने साडे ताई उसयो दुशमणा दे हथे देई दिता, तां उनी सांझो सै सब कुछ भी देणा जिसदा उनी सांझो ने वायदा कितया है। 33 कोई भी परमेश्वरे दे सामणे सांझो पर दोष नी लगाई सकदा, क्योंकि सेई है जडा अपने सोगी सांझो धर्मी बणादा है। 34 कोई भी साड़ी बुराई नी करी सकदा, क्योंकि ऐ यीशु मसीह है, जडा साडे ताई मरी गया कने मरी करी जिन्दा होई गया था, कने जडा साडे ताई परमेश्वरे ला बिनती करदा है। 35 कोई भी सांझो

मसीह दे प्यार ला लग नी करी सकदा, ना ही दुख, ना ही मुसिबतां, ना ही सताया जाणा, ना ही अकाल, ना ही गरीबी, ना ही खतरा, कने ना ही तलवार इना चे इक भी नी। 36 जियां पबित्र शास्त्र च लिखया है, “परमेश्वरे ताई हर दिन लोक सांझो जानी ला मारणे दी धमकी दिन्दे। सांझो बलि देणे बालियां भेडां सांई समझया गया।” 37 पर इना सारे बुरे हालातां च उदे जरिये साड़ी पूरी जित है, जिनी सांझो ने प्यार किता है। 38 क्योंकि मैं पक्का जाणदा है की, कुछ भी सांझो प्यार करणे बाले मसीह ला दूर नी करी सकदा, इसला कोई फरक नी पोंदा की असां जिन्दे न या मुर्दा, स्वर्गदूत, अधिकारी, कने अम्बरे दियां शक्तियां इस काबिल नी की उदे प्यार ला लग करी सकन कने जड़ा कुछ हुण होआ दा है कने जड़ा कुछ अगणे होणा, कने सारे संसारे च जड़ा सब कुछ है इस काबिल नी है की सांझो परमेश्वरे दे प्यारे ला जड़ा साडे प्रभु यीशु मसीह च है लग करी सके।

9 हुण कुछ भी नी है जड़ा सांझो परमेश्वरे दे प्यार ला लग करी सकदा है, तां फिरी कजो इस्राएली लोक, मेरे यहूदी भाई परमेश्वरे ला लग न? मेरा मन मेरे अपने लोकां तांई बड़ा दुखी होंदा है, क्योंकि मैं ऐशू दीकर चांदा की अपने लोकां दा उद्धार करणे तांई मैं मसीह ला लग होई जां कने आरोपी बणी जां, मैं ऐ करणे तांई तैयार भी है। मैं मसीह जो गबाह मन्नी करी सच्च बोला दा है। पबित्र आत्मा कने मेरी अंतरात्मा भी ऐ जाणदे न की मैं झूठ नी बोला दा है। 4 सै मेरे सांई इस्राएली लोक न, इना जो परमेश्वरे अपने गोद लियो बच्चे होणे तांई चुणया, महिमा, बाचा, मूसा दी व्यवस्था, परमेश्वरे दी भक्ति कने बायदा उना दी है। 5 अब्राहम, इसहाक कने याकूब उना दे पूर्वज न, जड़े शरीरिक तौर पर प्रभु यीशु मसीह दे भी पूर्वज न कने पिता परमेश्वर जड़ा सबना पर राज करदा है, उदी महिमा युगां-युगां दीकर होंदी रे। आमीन। (aiōn g165) 6 पर ऐ नी की, परमेश्वरे अपने वायदे पुरे नी करी सकया, इस तांई होया की जड़े इस्राएले दे बंशज न सै असल च सारे इस्राएली नी न; 7 कने अब्राहम दे बंशे च पैदा होणे ने ही सारे उदी सच्ची ओलाद नी बणदे, क्योंकि परमेश्वरे अब्राहम ने बोलया “जड़े इसहाक दे बंश च पैदा होंदे न, सेई तेरे बंश मन्ने जाणे न।” 8 मतलब की जड़े शरीरि ने पैदा होंदे न, सै परमेश्वरे दी ओलाद नी है, पर सिर्फ बायदा कितयो ओलाद ही अब्राहम दे बंश मन्ने जान। 9 क्योंकि बायदे दा बचन ऐ है, “मैं अगले साल इस बकत दुबारा ओणा कने तालू सारा जो इक पुत्र होणा।” 10 कने सिर्फ ऐई नी, पर रिबका दे जुड़वा जागतां दा

इक ही पिता था, साडा पूर्वज इसहाक। 11 कने ऐथू दीकर उना दे पैदा होणे ला पहले परमेश्वरे रिबका ने बोलया, की उदे बडे जागते छोटे जागदे दी सेवा करणी। परमेश्वरे ऐसा इस ताई बोलया की परमेश्वर अपणी इच्छा ने ही चुणदा है, ऐ इस ताई नी होया की इना बचयां चे कुनी कुछ कितया था, पर परमेश्वर ही है जडा ऐ चुनाव करदा है। 13 जियां पबित्र शास्त्र च लिखया है, “मै याकूबे ने प्यार किता, पर एसाब ने प्यार नी किता।” 14 तां असां इदे बारे च क्या बोलन? क्या परमेश्वरे उना लोकां जो चुणने च अन्याय करदा है जिना जो सै चुणना चांदा है? नी बिलकुल भी नी! 15 क्योंकि परमेश्वरे मूसा ला बोलया, “मै जिस पर दया करणा चांगा उस पर दया करणी, कने जिस कुसी पर कृपा करणा चांगा उस पर कृपा करणी।” 16 इस ताई परमेश्वर उसी जो ही चुणदा है जिस पर दया दसणा चांदा है, परमेश्वरे दा चुणना इसा गल्ला पर निर्भर नी करदा है की लोक क्या चांदे न या क्या करणे दी कोशिश करदे न। 17 क्योंकि पबित्र शास्त्र च परमेश्वरे मिस्र दे राजा फिरौन जो बोलया, “मै तिजो इसी ताई राजा बणाया है, की तिजो पर अपणी शक्ति दस्से, कने मेरे नाऐ दा प्रचार सारे संसार दे लोकां च हो।” 18 कने सै जिसयो चांदा हे, उस पर दया करदा हे, कने जिसयो चांदा हे, उसयो जिद्दी बणाई दिन्दा है। 19 फिरी कुछ लोकां मिंजो ने बोलणा, “अगर ऐसा है तां परमेश्वर कियां बोली सकदा है की असां गलत न? क्योंकि कोई भी उसयो नी रोकी सकदा जडा सै करणा चांदा है।” 20 हे भाई, तू कुण है, जडा परमेश्वरे ने बेहस करदा है? क्या बणाई होई चीज बणाणे बाले पुच्छी सकदी है, “की तू मिंजो ऐसा कजो बणाया?” 21 कुम्हारे जो क्या मीटिया पर हक नी, की सै इकी ही मीटिया ला, इक बांडा आदर ताई, कने दूजा अनादर ताई बणाऐ, 22 तां इदे च कुण देई हेरानी दी गल्ल है की परमेश्वरे अपना गुस्सा दसणे ताई कने अपणी शक्ति प्रगट करणे दिया इच्छा ला गुस्से दे भांडयां दी, जडे विनाश ताई तैयार कितयो थे, बडे सबर ने सेहन किती। 23 जिना लोकां पर परमेश्वर दया करगा, जिना जो उनी अपणी महिमा च हिस्सेदारी ताई पेहले ही चुणया है, उना पर अपणिया बड़ी जादा महिमा दे धने जो प्रगट करणे दी इच्छा किती? 24 मतलब की असां पर जिना जो उनी ना सिर्फ यहदियां चे बल्कि होर जातियां चे भी चुणया। 25 जियां होर जातियां दे बारे च, परमेश्वर उदा संदेश देणेबाले होशे दिया कताबां च भी बोलदा है, “जड़ी मेरी प्रजा नी थी, उना जो अपणी प्रजा बोलणा, कने जडे मेरे प्यारे लोक नी थी, उना जो मै

प्यारे बोलणा; 26 कने इयां होणा की जिसा जगा च परमेश्वरे उना जो ऐ बोलया था, की तुसां मेरे लोक नी न, उसा ही जगा च जिन्दा परमेश्वरे उना जो अपणी संतान बोलणा।” 27 कने परमेश्वरे दा संदेश देणेबाले यशायाह इस्राएल दे लोकां बारे च पुकारी करी बोलदा है, “चाऐ इस्राएले दे लोक गिणतिया च समुद्रे दे कंडे दिया रेता सांई मते भरी न, तमी उना चे थोडे ही बचणा।” 28 क्योंकि प्रभुऐ जल्दी ही संसारे लोकां दा न्याय सच्चाईया ने करणा। 29 जियां परमेश्वरे दा संदेश देणेबाले यशायाह पेहले भी बोलया था, “अगर सबते शक्तिशाली प्रभु इस काबिल नी बणादां की साडे कुछ बंश होन, तां असां सदोम कने अमोरा शेहरां दे लोकां सांई खत्म होई जांदे।” 30 तां असां इदे बारे च क्या बोलन? ऐ की होर जातियां अपने आप जो परमेश्वरे सोगी ठीक करणे दी कोशिश नी करदे थे, पर परमेश्वरे उना जो अपने सोगी धर्मी बणाया क्योंकि उना उस पर भरोसा किता; 31 पर इस्राएली लोक, जडे मूसा दी व्यवस्था जो मन्नी करी परमेश्वरे दे जरिये धर्मी होणा चांदे थे, पर सै धर्मी बणने च सफल नी होए। 32 ऐ कियां होई सकदा है? इस तांई की इस्राएली लोक भरोसे ने नी, पर भले कम्मा धर्मी होणा चांदे थे: उना मसीह जो नी अपनाया जिदी उस पथरे सोगी तुलना करी सकदे न जिसला लोकां जो ठोकर लगदी है। 33 जियां पबित्र शास्त्र च लिखया है, “दिखा मैं यरूशलेम शेहर च लोकां जो ठोकर लगणे तांई इक पथर रखा दा है जिसला लोकां डेई पोंणा है, कने जडा इस पर भरोसा करगा, उनी शरमिंदा नी होंगा।”

10 हे मसीह भाईयो, मेरे मने दी इच्छा कने इस्राएली लोकां तांई परमेश्वरे ने ऐ मेरी प्राथना है, की परमेश्वर उना जो बचाई ले। 2 क्योंकि मैं उना दी गबाई दिन्दा है, की सै परमेश्वरे तांई उत्साहित रेंदे न, पर परमेश्वर दी सेवा करणे दी उना दी समझ सही नी है। 3 क्योंकि इस्राएली लोक परमेश्वरे दिया उसा धार्मिकता ला अनजाण होईकरी कने अपने ही तरीके ने धर्मी बणने दी कोशिश करदे न, उना अपने आपे जो परमेश्वरे दिया धार्मिकता दे अधीन नी किता। 4 क्योंकि व्यवस्था दा मकसद हुण पूरा होई गया है की मसीह आई गया है। इस तांई हर कोई जडा मसीह पर भरोसा करदा है, उसयो परमेश्वर धर्मी बणादा है। 5 क्योंकि मूसा व्यवस्था ला मिलियो धार्मिकता दे बारे च परमेश्वरे दे बचन च ऐ लिखया है, “की जडा माणु इना गल्लां जो मनदा है, उसयो इसी ने ही जिन्दगी मिलणी।” 6 पर जडी धार्मिकता सांझो मसीह पर भरोसा करणे ने मिलदी है, इदे बारे च पबित्र शास्त्र

ऐ बोलदा है, “तू अपने मने च ऐ मत बोलदा की कुण स्वर्गे पर चढगा कने मसीह जो थले धरती पर उतारगा?” 7 या कुण अधोलोक च उतरगा कने कुण मसीह जो मरयां चे जिन्दा करिरी उपर लेई ओगा? (Abyssos g12) 8 क्या है इदा मतलब? “ऐ की परमेश्वरे दा बचन तेरे बाल है, तेरे मुऐ कने तेरे मने च,” ऐ सेई भरोसे दा संदेश है, जडा असां प्रचार करदे न। 9 इस ताई अगर तू अपने मुऐ ला यीशु मसीह जो प्रभु मन्नी लेदां है कने अपने मने ने भरोसा करे, की परमेश्वरे उसयो मरयां चे जिन्दा कितया है, तां पक्का परमेश्वरे तिजो बचाणा। 10 जालू असां अपने मने ला भरोसा करदे न तां असां परमेश्वरे असां परमेश्वर दी नजरा धर्मी बणदे न, कने जडा भरोसा असां अपने मने च कितया उसयो मुऐ ला बोलदे न, तां असां बचाये जाणे न। 11 क्योंकि परमेश्वरे दा संदेश देणेबाले यशायाह पबित्र शास्त्र च मसीह दे बारे च ऐ लिखदा है, “जडा कोई उस पर भरोसा करगा उनी शर्मिदा नी होणा।” 12 यहदियां कने होर जातियां च कोई फरक नी, क्योंकि परमेश्वर सारयां दा प्रभु है, कने जडे भी उसला सहायता मंगदे न, सै उना जो बचादां है। 13 क्योंकि पबित्र शास्त्र च ऐ लिखया है “जडा कोई भी उसला सहायता मंगदा है प्रभु उना जो बचादां है।” 14 पर इसला पेहले की लोक प्रभु ला सहायता मंगन, उना जो प्रभु पर भरोसा करणा है, इसला पेहले की सै प्रभु पर भरोसा करन, उना जो उदे बारे च सुणना है कने लोक प्रभु दे बारे च सुणन, तां कुसी जो उना जो यीशु मसीह पर भरोसा करणे दे बारे च दसणा है। 15 कने इसला पेहले कोई जाई करी उना जो बोले, की उस माणुऐ जो प्रचार करणे ताई भेजणा चाईदा, इस ताई पबित्र शास्त्र च लिखया है, “क्या ही छेल उना दे पैर न जडे शुभसमाचार लेईकरी ओदे न।” 16 पर सारयां उस शुभसमाचार पर भरोसा नी किता। परमेश्वरे दा संदेश देणेबाले यशायाह बोलदा है, “हे प्रभु, थोडे लोकां साडे संदेश पर भरोसा किता है?” 17 इस ताई भरोसा तालू ओदा है जालू असां संदेश सुणदे न, कने यीशु मसीह दे बचन सुणने ला ओदा है। 18 पर मैं बोलदा है, की इस्राएली लोकां पक्का ही यीशु मसीह दे संदेश दे बारे च सुणया है, क्योंकि ऐ पबित्र शास्त्र च लिखया है, “उना दे बचन सारिया धरती पर न, कने उना दे बचन धरतिया दे कुणे-कुणे दीकर पुज्जी गियो न।” 19 मैं फिरी बोलदा है, की ऐ सच्च है की इस्राएल दे लोक मसीह दे संदेश दे बारे च समझदे थे, पेहले तां प्रभुऐ मूसा दे जरिये ऐ बोलया, “तुसां यहदी लोकां मेरा होर जातियां ताई प्यार दिखीकरी जलना है, मैं तुसां जो मुख होर जातियां ला गुस्सा चडाणा।” 20

फिरी परमेश्वरे दा संदेश देणेबाला यशायाह बड़िया हिम्मत ला ऐ बचन सुणाया की, “जड़े मिंजो नी तोपदे थे, उना मिंजो पाई लिया; कने जड़े मिंजो पूछदे भी नी थे, उना पर मैं प्रगट होई गया।” 21 पर परमेश्वरे संदेश देणेबाले यशायाह दे जरिये इस्राएली लोकां दे बारे च बोलया है, “मैं सारा दिन अपने हथ इक हुकम नी मनणे बाली कने बेहस करणे बाली प्रजा पासे फेलादां रिया की सै मेरे पासे मुड़न।”

11 इस ताई मैं पुछदा है, क्या परमेश्वरे अपणिया प्रजा जो छडी दिता? नी बिलकुल नी! मैं भी तां इस्राएली है; अब्राहम दे बंश कने बिन्यामीन दे गोत्र दा है। 2 परमेश्वरे अपणिया उस प्रजा जो नी छडया, जिसा जो उनी पेहले ला ही चुणया था: तुसां जाणदे न की पबित्र शास्त्र परमेश्वरे दा संदेश देणेबाले एलियाह दे बारे च क्या बोलदा है: की सै इस्राएली लोकां दे खिलाफ परमेश्वरे ने बिनती करदा है। 3 उनी बोलया “प्रभु जी, उना तेरे संदेश देणेबालयां जो मारी दिता, कने उना तेरिया वेदिया जो डाई दितया है, मैं ही सिर्फ किला बचया जड़ा तिजो पर भरोसा करदा है, सै मिंजो भी मारणे ताई तोपा दे न।” 4 पर परमेश्वरे एलियाह ने बोलया, “मैं अपने ताई सत हजार माणुए जो रखया है, जड़े बाल देवता दी मूर्तिया अग्रे नी झुके।” 5 इयां ही हुण भी, परमेश्वर दे अनुग्रह ने ऐथू थोड़े दे यहूदी न जिना जो परमेश्वरे अपने सच्चे लोक होणे ताई चुणया है। 6 परमेश्वरे उना जो अनुग्रह दे जरिये चुणया है, ऐ भले कम्म करणे ने नी होया है। अगर ऐ भले कम्मा ने है, तां अनुग्रह फिरी अनुग्रह नी रिया। 7 इदा नतीजा ऐ होया: की इस्राएली लोकां परमेश्वर दिया नजरा च धर्मी बणने दी कोशिश किती, पर कामयाब नी होऐ, पर जिना लोकां जो परमेश्वरे चुणया, सै परमेश्वरे दिया नजरा च धर्मी बणे। दुजयां जो जिड़ी बणाई दिता कने उना परमेश्वरे दी सुणने ला मना करी दिता। 8 जियां पबित्र शास्त्र च यशायाह लिखया है, “परमेश्वरे उना जो हले दीकर सुस्त दिमाग दितया है, उना दियां हखी तां हेन पर उना जो सच्चाई नी मिलदी कने कन्ना ला सुणदे तां हेन, पर समझदे नी न।” 9 कने राजा दाऊद बोलदा है, “मैं विनती करदा है की उना लोकां दियां सारियां आशीषां उना जो खत्म होणे दी बजा बणी जा, ऐथू दीकर की सै उजड़ी जान कने उना जो सजा मिल्ले। 10 कने उना दियां हखी अन्निया होई जान, ताकि सै दिखी नी सकन, कने हर बकत अपणी मुसीबतां च दबुई रेन।” 11 तां मैं पुछदा है, की उना क्या इस ताई: “क्या इस्राएली लोक ठोकर लगणे दिया बजा ने हमेशा ताई खत्म होई गियो न? नी बिलकुल नी! पर उना दे अविश्वास दिया

बजा ने होर जातियां जो उद्धार मिल्ला, ताकि इस्राएली लोकां जो होर जातियां ला जलन हो।” 12 अगर इस्राएली लोकां दा अविश्वास होर जातियां दी भलाई दी बजा बणदा है, तां इस्राएली लोकां दा परमेश्वरे बाल बापस ओणे पर बड़ा अच्छा होणा। 13 मैं होर जातियां ने ऐ गल्लां बोलदा है। हुण जालू मैं होर जातियां ताई प्रेरित है, मिंजो अपणी सेबकाई पर घमंड है। 14 ताकि मैं कियां भी करिरी यहूदी लोकां जो जलन करवाई करी उना चे केईयां जो बचाई सके। 15 क्योंकि जालू की उना दा परमेश्वरे जो छडी जाणे दिया बजा ने संसारे दे लोकां दा परमेश्वरे सोगी मेल होया था, तां उना दा मसीह जो अपनाणा, इक मरयो होऐ माणुऐ सांई होणा जडा दुबारा जिन्दा होई गया है। 16 मैं इस्राएली लोकां दे बारे च तुसां जो इक उदाहरण दिन्दा है। ऐ साड़ा इस्राएली लोकां दा रिबाज है, असां जालू रोटी बणाने तांई आटा गुन्दे न, तां असां परमेश्वरे जो भेंट चढाणे तांई मुठी भर आटा लेंदे न, अगर सै इक मुठी परमेश्वरे दी है, तां इदा मतलब है की पूरा आटा भी परमेश्वरे दा है। तियां अगर सूखे दी जड परमेश्वरे दी है, तां इदा मतलब है की सूखे दियां सारियां डालियाँ भी परमेश्वरे दियां न। 17 इस्राएली लोक इक अच्छे जैतून सूखे दियां डालियाँ सांई न कने उना दे पूर्वज अब्राहम, इसहाक कने याकूब उस सूखे दियां जडा सांई न। होर जातियां जंगली जैतून सूखे दियां डालियाँ सांई न, जडियां कलम करी के उना बडियां डालियाँ दिया जगा च उस अच्छे जैतून सूखे च लाइयां न, हुण सै डालियाँ उस सूखे दिया जडा दियां हिस्सेदार न। 18 तां तू अपने आप जो उना बडियां डालियाँ ला जादा मत समझदे। अगर तू जादा समझदा है, तां याद रख की तू जडा जो नी सम्भालदा, पर जड तिजो सम्भालदी है। 19 तां तू अपने मने च ऐ मत सोचदा की परमेश्वरे इस्राएली लोकां जो उना डालियाँ सांई ठुकराई दिता जडियां इक सूखे ला तोड़ी दितियां जांदियां, ताकि सै होर जातियां जो अपनाई सके, जडियां उना डालियाँ सांई न जिना जो कलम कितया है। 20 ऐ सच्च है, सै तां अविश्वास दिया बजा ने तोडियां, पर तू अपने भरोसे दिया बजा ने टिकी रेंदा है, इस तांई घमंड मत कर, पर परमेश्वरे दा डर मन, 21 क्योंकि जालू परमेश्वरे असली डालियाँ पर दया नी किती, तां तिजो पर भी दया नी करणी। 22 इस तांई तू परमेश्वरे दिया कृपा कने सकताई पर बिचार कर! पर जडे डेई पियो न उना पर सकताई कने तिजो पर दया, अगर तू उदिया दया च बणी रे, नी तां तू भी कटी करी लग करी देणा। 23 अगर इस्राएली लोक भी भरोसा करणा शुरू करगे तां उना जो

फिरी ला कलम लगाई देणे न, क्योंकि परमेश्वर उना जो फिरी कलम करी सकदा है। 24 कुसी जंगली डालिया दा अच्छे सखे दा हिस्सा बणना स्भाभिक नी है। कने तुसां जडे यहदी नी न इक जंगली जैतून सखे ला बडियां डालियाँ सांई न कने इक अच्छे जैतून सखे ने जुडी गियो न। पर सै यहदी इक डालिया सांई न जडी अच्छे सखे च बडूई थी, उना जो पक्का ही दुबारा ला अपणे सखे ने जोडया जाई सकदा है। 25 हे मेरे मसीह भाईयो, मैं नी चांदा की तुसां इसा गल्ला ला अनजाण रिया, इयां ना हो की तुसां अपणे पर घमंड करणा लगी पो न, ऐ सच्च है की इस्राएल दे केई लोक भरोसा करणे तांई तैयार नी न, पर जालू परमेश्वरे पर भरोसा करणे बाली होर जातियां दे लोकां दी संख्या पुरी होई जांगी, तां इस्राएल दे लोकां भरोसा करणा कने परमेश्वरे बाल बापस आई जाणा। 26 इयां होणे बाद सारे इस्राएली लोकां दा उद्धार होणा, जियां पबित्र शास्त्र च लिखया है, “छुडाणे बाले यरूशलेम शेहर ला ओणा है, कने अभक्ति जो याकूबे दे बंश ला दूर करणा। 27 कने उना सोगी मेरा ऐई बायदा होणा, जालू की मैं उना दे पापां जो माफ करी देणा।” 28 यहदी लोक परमेश्वरे दे दुशमण न, क्योंकि सै शुभसमाचार पर भरोसा नी करणा चांदे न, कने ऐ तुहाडे तांई फायदा बणी गिया है। पर परमेश्वर उना ने प्यार करदा है क्योंकि परमेश्वरे उना जो अपणे तांई चुणी लिया। इसा गल्ला दा परमेश्वरे उना पूर्वजां ने वायदा कितया था। 29 क्योंकि परमेश्वर अपणे बरदाना ने, कने बुलाहट ला कदी भी अपणा मन नी बदलदे। 30 क्योंकि जियां होर जातियां दे लोकां पेहले परमेश्वरे दा हुकम नी मनया पर इस्राएली लोकां दे हुकम नी मनणे दिया बजा ला हुण तुसां पर दया होई है। 31 तियां ही उना भी हुण हुकम नी मनया की तुसां पर जडी दया होदी है इसला उना पर भी दया हो। 32 क्योंकि परमेश्वरे सारायां जो हुकम नी मनणे दी आजादी दिन्दा है, ताकि परमेश्वर सारायां लोकां पर अपणी दया दस्सी सके। (eleēsē g1653) 33 वाह, परमेश्वरे दे अनुग्रह दा धन कने अकल, कने ज्ञान कितणा ही गंभीर है! कोई भी उदे सोच बिचार जो नी जाणी सकदा, कने ना ही उदे रस्तयां जो जाणी सकदा है! 34 “प्रभु दे बिचारां जो कोई भी नी जाणी सकदा, ना ही कोई उदा सलाहकार बणी सकदा है,” 35 कने कुनी भी परमेश्वरे जो कुछ नी दितया की परमेश्वरे जो सै उसयो बापस करणा पोए। 36 क्योंकि सब कुछ परमेश्वरे ला ओंदा है। उनी सब कुछ बणाया है, सब कुछ उदा है। उदी महिमा युगां-युगां दीकर होदी रे। आमीन। (aiōn g165)

12 इस ताई हे मसीह भाईयो, मैं तुसां ला परमेश्वरे दी दया याद करवाई करी बिनती करदा है, की तू अपणी जिन्दगिया जो जिन्दी, पबित्र, कने परमेश्वरे जो खुश करणे बाला बलिदान करिरी चढा; परमेश्वरे दी सेवा करणे दा ऐई सही तरिका है। **2** कने इस संसारे दे लोकां साई मत बणा; पर तुहाड़े सोचणे दे तरीके जो परमेश्वरे जो बदलना दे ताकि तुहाड़ा चाल चलण भी बदली जाए, इयां करिके तुसां जो पता लगी जाणा की परमेश्वर क्या चांदा है, कने उदिया नजरा च क्या भला, सिद्ध कने सही है। (aiōn g165) **3** क्योंकि मैं उस अनुग्रह दिया बजा ला जड़ा परमेश्वरे ला मिंजो मिलया है, तुसां चे हर इकी जो बोलदा है, की जियां समझणा चाईदा, उसला बदीकरी कोई भी अपने आपे जो ना समझे; पर जियां परमेश्वरे हर इकी दे उदे भरोसे दे अनुसार बंडया है, तियां ही अच्छी समझा ने अपने आपे जो समझा। **4** क्योंकि जियां साड़े इक शरीर च मते भरी अंग न, कने सारे अंगा दा कम्म इकोदिया नी है; **5** तियां ही, असां जालू मसीह पर भरोसा करदे न, असां सारे मसीह दे शरीर दे अंग न, कने असां सारे इक दुज्जे ने जुड़यो न। **6** कने जालू की उस अनुग्रह दे अनुसार जड़ा परमेश्वरे सांझो दितया है, सांझो लग-लग बरदान मिलयो न। तां जिसयो भविष्यद्वाणी दा बरदान मिलया हो, उसयो सै बोलणा चाईदा जिसदा उसयो भरोसा है की सै परमेश्वरे उसयो बोलया है। **7** अगर दुज्जयां दी सहायता करणे दा बरदान मिलया हो, तां इस कम्मे च लगी रे, अगर कोई सिखाणे बाला हो, तां सिखाणे च लगी रे; **8** अगर कुसी जो लोकां जो उत्साहित करणे दा बरदान मिलया हो, सै उत्साहित करणे च लगी रे, अगर कुसी जो दुज्जयां दी ज़रूरतां जो पूरा करणे दा बरदान हो, तां उस दान जो जादा ला जादा दे कर, अगर कुसी जो अगुवाई करणे दा बरदान मिलया हो, तां सै पूरी लगन ने करे, जड़ा दया करे, सै खुशिया ने दया करे। **9** दुज्जयां ने प्यार करणे दा दिखाबा ना करे, बुराईया ने नफरत करा, जड़ा परमेश्वरे दिया नजरा च अच्छा है, उसयो करणे च लगी रिया। **10** परिवारे साई इक दुज्जे ने प्यार करा; अपु चे इकी दुज्जे दी इज्जत बदीकरी करा। **11** सकत मेहनत करा कने आलसी मत बणा; उत्साह च बणी रिया, पुरे मने ने प्रभु दी सेवा करदे रिया। **12** तुहाड़े बाल जड़ी आस है, उदे च खुश रिया; कला कलेश च सबर रखा, हर बकत प्राथना च लगी रिया। **13** पबित्र लोकां जो जड़ा कुछ ज़रूरी हो, उना दी सहायता करा; मेहमाना दा आदर सत्कार करदे रिया। **14** अपयों जो परेशान करणे बालयां जो आशीष दिया;

आशीष दिया पर श्राप नी। 15 खुशी मनाणे बालयां सोगी खुशी मना, कने रोंणे बालयां सोगी रोआ। 16 इक दुज्जे दा उतणा ही ध्यान रखा जितणा की अपणा रखदे न; घमंड मत करा, पर गरीबां ने मिली जुली करी रिया; अपने आपे जो अकलमंद मत समझा। 17 बुराईया दे बदले कुसी ने बुराई मत करा; जड़ियां गल्लां सारे लोकां ताई खरियां न, उना दी चिंता करा। 18 जिथू दीकर होई सके, तुसां सबना लोकां सोगी मेल जोल रखा। 19 हे प्यारो अपणा बदला मत लेदे; पर परमेश्वरे जो अपने ताई बदला लेणा दिया, क्योंकि पबित्र शास्त्र च प्रभु बोलदा है, “बदला लेणा मेरा कम्म है, प्रभु बोलदा है मैं ही बदला देणा।” 20 पर पबित्र शास्त्र च ऐ भी लिख्या है, “अगर तेरा दुशमण भूखा है तां उसयो खाणां दे, अगर प्यासा है तां उसयो पाणी पिया; क्योंकि इयां करणे ने तू उसयो शर्मिदा करी देणा।” 21 बुराईया जो अपने पर जितणा मत दिया पर भलाईया ने बुराईया जो जीती लिया।

13 हर इक माणु शासन दे अधिकारियां दे अधीन रे; क्योंकि सारे अधिकार परमेश्वर दिया तरफा ला होंदे न; कने जडे अधिकार न, सै परमेश्वरे ही दितयो न। 2 इस ताई जडा कोई ऐसे लोकां दा बिरोध करदा है जिना बाल शासन करणे दा अधिकार है, सै परमेश्वरे दे नियमा दा बिरोध करदा है, कने बिरोध करणे बालयां जो सजा मिलणी। 3 क्योंकि अगर कोई अच्छे कम्म करदा है तां, उना जो अधिकारियां ला डरने दी जरूरत नी है; अगर सै बुरे कम्म करदा है तां उसयो डरने दी जरूरत है, अगर तुसां अधिकारियां ला डरणा नी चांदे न तां भले कम्म करा जिसला सै तुहाडी तारीफ करन। 4 क्योंकि अधिकारी लोक तेरिया सहायता ताई परमेश्वरे दे सेवक न। पर अगर तू बुराई करे, तां तू डर; क्योंकि अधिकारियां बाल तुसां जो सजा देणे दा हक है कने सै परमेश्वरे दे सेवक न, जिना जो इस ताई भेजया है की सै उना लोकां जो सजा देन जडे गलत कम्म करदे न। 5 तुसां जो ऐसा सिर्फ सजा ला बचणे ताई ही नी करणा चाईदा, पर इस ताई भी की तुहाडी अंतरात्मा साफ रे। 6 इस ताई करी भी दिया, क्योंकि शासन करणे बाले परमेश्वरे दे सेवक न, कने हमेशा अपनी जिम्मेबारियां जो निभाणे च अपनी जिन्दगी लाई दिन्दे न। 7 इस ताई जिसयो जडा मिलणा चाईदा, तुसां जो सै उसयो देणा चाईदा; जिसयो कर चाईदा, उसयो कर दिया, जिसयो चुंगी चाईदी, उसयो चुंगी दिया; जिसला डरणा चाईदा उसला डरा; जिसदी इज्जत करणा चाईदी उदी इज्जत करा। 8 तुसां सारयां जो सिर्फ इक ही गल्ला दा कर्जदार होणा चाईदा कने सै ऐ है, की तुसां सारे

इक दुज्जे ने प्यार रखा; क्योंकि जड़ा दुजयां ने प्यार रखदा है, उनी ही व्यवस्था पुरी किती है। 9 क्योंकि मूसा दी व्यवस्था च मते हुकम न, “व्यभिचार नी करणा, हत्या नी करणी, चोरी नी करणी, लालच नी करणा,” इना जो छडी के होर कोई भी हुकम हो तां सारयां दा निचोड़ इस हुकम च है, “की जितणा अपने आपे ने प्यार करदे न, दुज्जयां ने भी उतणा ही प्यार करा।” 10 प्यार पड़ोसियां दी कुछ बुराई नी करदा, जड़ा प्यार करदा है, सै व्यवस्था जो पूरा करदा है। 11 तुसां चे हर इक जणे जो इक दुज्जे ने प्यार करदे रेणा चाईदा क्योंकि सै बकत नेड़े है, जालू परमेश्वरे सांझो इसा बुरिया दुनिया ला बचाणा है। जालू असां पैली बरी यीशु मसीह पर भरोसा किता, उस बकते ला तां ऐ होर भी नेड़े है। इसयो समझीकरी तुसां जो अपनी निंदा ला जागणा कने साबधान रेणा चाईदा। 12 “इसा बुरी दुनिया च रेणे दा साड़ा बकत लगभग खत्म होई गया है इक रात सांई, जड़ी लगभग खत्म होई गई है, कने सै बकत भी नेड़े है जालू मसीहे बापस ओणा है।” सांझो उना चीजां जो भी करणा बंद करी देणा चाईदा जडियां बुराईयां ने जुडियां न, कने सांझो लौई च इस्तेमाल होणे बाले हथियारां दा इस्तेमाल करणा चाईदा। 13 असां जो लौई च रेणेबाले लोकां सांई अपना चाल चलन ठीक करणा चाईदा, ना की खेलणे कूदणे च, ना खाणां पीणे च, ना व्यभिचार च, ना लुचापन च, कने ना ही लड़ाई झगड़े कने जलन च। 14 पर प्रभु यीशु मसीह तुहाड़ा कवच बणी जा, ताकि तुहाड़ी रक्षा करी सके, कने पापी सभाव दियां इच्छां जो पूरा करणे दी कोशिश मत करा।

14 जड़ा मसीह भाई भरोसे च कमजोर है उदियां मानयता दे बारे च कुसी भी शके दे विना ही अपनाई लिया, उदे सोगी बेस मत करा की क्या करणा चाईदा या क्या नी करणा चाईदा। 2 क्योंकि इकी जो भरोसा है, की सब कुछ खाणां ठीक है, पर जड़ा भरोसे च कमजोर है, सै सिर्फ साग पत्ते ही खांदा है। 3 जड़े मास खांदे न, सै मास नी खाणे बालयां जो नीच ना समझन कने मास नी खाणे बाला, मास खाणे बालयां पर दोष ना लाऐ; क्योंकि परमेश्वरे दोनों जो अपनांदा है। 4 इस तांई तिजो कुसी दे भी सेवके दा न्याय नी करणा चाईदा, उदा सफल होणा या नी होणा दोनों उदे मालिके ने ही सम्बन्ध रखदा है, उनी पक्का ही सफल होई जाणा क्योंकि प्रभु उसयो सफल करी सकदा है। 5 इयां ही कोई तां इक दिने जो दुज्जे दिने ला ब दिया मंदा है, कने कोई सारे दिना जो इकोदे मंदा है, हर इक जो यकीन होणा चाईदा की जड़ा सै सोचदा है सै सही है या नी। 6 जड़ा कोई कुसी दिने जो

मनदा है, सै इस ताई करदा है क्योंकि सै प्रभु दी इज्जत करणा चांदा है, जड़े मास खांदे न, सै भी प्रभु ताई खांदे न, क्योंकि सै परमेश्वरे दा धन्यवाद करदा है, कने जड़ा मास नी खांदा है, सै प्रभु ताई नी खांदा है कने परमेश्वरे दा धन्यावाद करदा है। 7 असां सारे प्रभु दे न। इस ताई साड़ी जिन्दगी च कने साड़िया मौत च सांझो सिर्फ प्रभु जो खुश करणा चाईदा ना की अपु जो। 8 क्योंकि अगर असां जिंदे न, तां प्रभु ताई जिंदे न, अगर असां मरदे न, तां प्रभु ताई मरदे न; तां असां जिन या मरन, असां प्रभु दे ही न। 9 क्योंकि मसीह इसी ताई मरया कने फिरी जिन्दा होई गया क्योंकि सै सेई है, सै जिन्दे कने मरयो दोनों दा प्रभु है। 10 तू कजो अपने मसीह भाईए पर दोष लगांदा है? या तू कजो अपने मसीह भाई जो बुरा समझदा है? साड़ा सारायां दा परमेश्वरे न्याय करणा। 11 क्योंकि पबित्र शास्त्र च लिखया है, “प्रभु बोलदा है, मैं अपनी जिन्दगी दी कसम खांदा है की हर इकी माणुए मेरे सामने गोडे टेकणे न, कने हर इक माणुए परमेश्वरे जो अपनाणा।” 12 असां चे हर इकी जणे जो अपने-अपने करमा दा लेखा परमेश्वरे जो देणा पोंणा। 13 तां असां अग्रे ला इकी दुज्जे पर दोष नी लान, पर तुसां ऐई ठांणी लिया की कोई भी अपने भाई या बेहणा दे पाप करणे दी बजा ना बणे। 14 मैं जाणदा है, कने प्रभु यीशु ला मिंजो ऐ पक्का होया है, की सारे खाणे बालियां चीजां ठीक न, पर जड़ा उसयो अशुद्ध समझदा है, उदे ताई अशुद्ध है। 15 अगर तेरा भाई या बेहण तेरे खांणे दिया बजा ला उदास होंदा है तां तेरे अंदर प्रभु दा प्यार नी है, तां अपने खाणे दिया बजा ला उदा विनाश मत कर, जिंदे ताई मसीह मरी गया था। 16 इस ताई भले ही जड़ा तुसां करा दे न सै खरा है, पर अगर कोई उसयो बुरा मनदा है, तां उस कम्मे जो मत करा। 17 क्योंकि परमेश्वरे दा राज्य सिर्फ खांणे पिणे दे बारे च नी है, पर पबित्र आत्मा च धार्मिकता, शांति कने खुशी च है। 18 जड़ा कोई इस तरीके ने मसीह दी सेवा करदा है, परमेश्वर उसला खुश होंदा है कने लोक भी उदे बारे च खरा बोलदे न। 19 इस ताई सांझो हमेशा सेई करणे दी कोशिश करणी चाईदी जड़ा लोकां बिच शांति दी बजा बणे कने इक दुज्जे जो भरोसे च मजबूत करे। 20 तुहाड़े खांणे पिणे दिया चिजां ला परमेश्वरे दा कम्म ना बिगड़े, सब कुछ ठीक तां है, पर कुछ ऐसी चीज खाणा गलत है अगर सै दुज्जे माणुए जो पाप करणे दी बजा बणे। 21 खरा तां ऐ है, की तू ना मांस खाये, कने ना दाखरस पिऐ, कने ना कुछ ऐसा करे, जिसने तेरा भाई या बेहण पाप करे। 22 तुसां भरोसा करी सकदे न, की तुसां जड़ा करा दे

न, उस सोगी कुछ भी गलत नी है, पर इसयो अपने कने परमेश्वरे दे बिच रखा। धन्य है सै, जड़ा उसा गल्ला च, जिसयो सै ठीक समझदा है, अपने आप जो दोषी नी बणादा। 23 पर साडे मने च कुछ भी खाणे दे बारे च शक है कने आखरी च अगर असां फिरी उसयो खाई लेंदे न, तां असां गलत न, क्योंकि सांझो जड़ा साडे मने च भरोसा है उदे अनुसार नी किता है, कने अगर तुसां कुछ सै करदे न जड़ा तुसां जो लगदा है की ठीक नी है, तां तुसां पाप करदे न।

15 असां जड़े भरोसे च पक्के न, असां जाणदे न, की इना गल्लां ला कुछ खास फरक नी पोंदा है, पर असां सिर्फ अपने आप जो खुश करणे तांई ऐसा नी करी सकदे। सांझो उना लोकां दे शक कने कमियां दे बारे च बिचार करणा चाईदा जड़े इना गल्लां जो गलत मंदे न। 2 असां चे हर इक जो ऐसा करणा चाईदा जड़ा साथी मसीह भाई या बेहणा जो खुशी दे कने दुज्जयां जो भरोसे च मजबूत करणे च सहायता करा। 3 क्योंकि मसीहे अपने आपे जो खुश नी किता, पर जियां पबित्र शास्त्रां च लिखया है, “तेरी निंदा करणे बालयां मेरी निंदा भी किती।” 4 जितणियां गल्लां पेहेले ला पबित्र शास्त्रां च लिखियां न, सै साडिया ही शिक्षा तांई लिखियां न ताकि असां सबर कने पबित्र शास्त्र ला मिलणे बाले होसले दे जरिये आस रखी सकन ताकि परमेश्वरे जड़ा बायदा कितया था, सै करणा। 5 मैं प्रार्थना करदा है की परमेश्वर तुसां जो सबर कने उत्साहित करे, की तुसां यीशु मसीह सांई बणी करी अपु चे इक जुट होईकरी रेन। 6 ताकि तुसां सारे सोगी मिली करी साडे प्रभु यीशु मसीह दे पिता परमेश्वरे दी महिमा करन। 7 इस तांई इक दुज्जे जो अपनाई लिया जियां मसीहे तुसां जो अपनाई लिया है; ताकि लोक परमेश्वरे दी तारीफ करन। 8 मैं बोलदा है, की जड़े बायदे पूर्वजां जो दितयो थे, उना वायदयां जो सच्च करणे तांई कने ऐ दसणे तांई की परमेश्वर भरोसे दे लायक है, मसीहा यहूदी लोकां दा सेवक बणया। 9 कने होर जातियां भी परमेश्वरे दी दया दिया बजा ने परमेश्वरे दी स्तुति करन, जियां पबित्र शास्त्र च लिखया है, “इस तांई मैं कने होर जातियां दे लोकां च तेरी स्तुति करांगा, कने तेरे भजन गांगा।” 10 पबित्र शास्त्र च ऐ भी लिखया है, “होर जातियां दे सारे लोक, परमेश्वरे दी प्रजा सोगी खुशी मना।” 11 कने फिरी ऐसा भी लिखया है, “हे होर जातियां दे सारे लोको, प्रभु दी स्तुति करा; कने हे राज्य-राज्य दे सारे लोको; उदी स्तुति करा।” 12 कने फिरी परमेश्वरे दा संदेश देणेबाला यशायाह भी बोलदा है, “यिशै दी इक जड़ पैदा होणी है, कने होर

जातियां पर शासन करणा, उस पर होर जातियां दे लोकां आस रखणी की उनी सांझो बचाणा।” 13 मैं प्राथना करदा है की परमेश्वर जड़ा साड़ा दाता है, तुसां जो पूरे तरीके ला खुशी कने शांति दा आनंद लेणे ताई सहायता करी सके, ताकि पबित्र आत्मा दिया शक्तिया ने तुहाड़ी आस बददी जा। 14 हे मेरे मसीह भाईयो; मैं अपु भी तुसां दे बारे च पक्का जाणदा है, कने तुसां भी अच्छे ने जाणदे न की परमेश्वर क्या चांदा है, की तुसां जो क्या करणा चाईदा कने इक दुज्जे जो सिखाई सकदे न। 15 तमी मैं कुथी-कुथी तुसां जो याद दिलाणे ताई तुसां जो बड़ी हिम्मत करिके लिखया है, ऐ उस अनुग्रह दिया बजा ने होया है, जड़ा परमेश्वरे ला मिंजो मिलया है। 16 ताकि मैं होर जातियां ताई मसीह यीशु मसीह दा सेवक होईकरी मैं इक याजक साई परमेश्वरे ला मिलियो शुभसमाचार सुणाणे दी सेवा करदा है; ताकि होर जातियां जो परमेश्वरे दे सामणे भेंट दे स्मे च दितया जाए जिसने सै खुश है, कने जिना जो पबित्र आत्मा पबित्र बनाया है। 17 मैं यीशु मसीह दिया बजा ने हर इक उसा गल्ला दे बारे च जड़ी परमेश्वरे दी सेवा ने जुड़ियो है उसा पर घमंड करी सकदा है। 18 क्योंकि जड़ा मसीहे मेरे ताई कितया है, इसा ही बजा ने मैं ऐ हिमता ने बोली सकदा है की मैं होर जाति दे लोकां जो परमेश्वरे दे हुकमा दा पालन करबाणे दे काबिल है। जालू सै मेरियां गल्लां जो सुणदे न कने मेरे कम्मा जो दिखदे न तां सै यीशु मसीह पर भरोसा करदे न। 19 पबित्र आत्मा दे जरिये मिंजो दितियो शक्ति ने मैं अनोखे कम्म कने चमत्कार करदा है, इस ताई जिथू भी मैं यरूशलेम ला इतिरिकम दीकर गया है, ओथु मैं सारे लोकां जो, यीशु मसीह दे बारे च शुभसमाचार सुणादा है। 20 पर मेरे मने दी इच्छा ऐ है, की शुभसमाचार दा प्रचार उना जगां च हो, जिथू यीशु मसीह दे बारे च हले दीकर सुणया ना हो; मैं ओथु शुभसमाचार दा कम्म नी करी सकदा जिथू कुनी होरनी पेहले ही शुरू करी दितया हो। 21 मैं उसा गल्ला जो पूरा करणा चांदा है जड़ा पबित्र शास्त्र च लिखया है, “जिना जो शुभसमाचार दे बारे च दसया ही नी है, उना दिखणा है कने जिना कदी उदे बारे च सुणाया नी है, उना भी समझणा।” 22 ऐ सेई बजा है की तुसां ने मिलणे ताई मेरे ओणे च मुशकिल ओदी रेई। 23 पर हुण इना प्रदेशां च, मैं अपना कम्म पूरा करी लिया है, कने बड़े सालां ला मिंजो तुहाड़े बाल ओणे दी इच्छा है। 24 इस ताई जालू मैं इसपानिया देश जो जांगा तां तुहाड़े बाल होंदा जांगा क्योंकि मिंजो आस है, की उस यात्रा च तिजो ने मिल्ले, कने तुहाड़े सोगी संगती करिके

खुश होई जां, मैं चांदा है की तुसां मिंजो मेरी इसपानिया देश दी यात्रा तांई सहायता करन। 25 पर हुण तां मैं परमेश्वरे दे पबित्र लोकां ने मिलणे तांई यरूशलेम शहर जो चलया है। 26 क्योंकि मकिदुनिया कने अखाया प्रदेशे दे लोकां ऐसा करणा इक खरी गल्ल समझी, की जडे यरूशलेम शहर दे परमेश्वरे दे लोक न कने गरीब न उना तांई कुछ चंदा भेज न। 27 उना ऐ खुशिया ने कितया है, सै यरूशलेम शेहरे दे लोकां दे कर्जदार न, क्योंकि होर जातियां जो यरूशलेम शहर च रेणेबाले विश्वासियां ला खुशखबरी दी आत्मिक आशीषां मिलियां न, इस तांई उना जो लगदा है की इदे बदले च उना दी कुछ चंदा देईकरी सहायता करी सकदे न। 28 इस तांई मैं सबते पेहले यरूशलेम शहर चलया है ताकि उना जो ऐ गठेरेया चंदा देई सकें। उदे बाद, फिरी मैं रोम देश च आई करी तुसां ने मिलणे बाद इसपानिया देश जो जांणा। 29 कने मैं जाणदा है, की जालू मैं तुहाडे बाल ओणा, तां मसीह दी खास आशीष जो तुहाडे सोगी बंडगा। 30 कने हे मसीह भाईयो; प्रभु यीशु मसीह च साडे भरोसे कने पबित्र आत्मा सांझो जडा प्यार दितया है उदिया बजा ने, मैं तुसां ने बिनती करदा है की तुसां मेरे तांई परमेश्वरे ला बड़ी इमानदारिया ने प्राथना करा। 31 की मैं यहूदिया प्रदेशे दे अविश्वासियां ला बची रे, कने इस तांई भी प्राथना करा की ओथु दे विश्वासी भी मेरे इस तोफे जो ग्रहण करी लेन जडा मैं अपने सोगी यरूशलेम शहर जो लेई चलया है। 32 कने मैं परमेश्वरे दिया इच्छा ने तुहाडे बाल खुशिया ने आई करी तुहाडे सोगी अराम करे। 33 मैं प्राथना करदा है की परमेश्वर, जडा शांति दिन्दा है, तुसां सारयां सोगी हो। आमीन।

16 मैं तुसां ने फीबे तांई बिनती करदा है, जड़ी साड़ी साथी विश्वासी बेहण है कने क्रिश्चिया शहर दिया कलीसिया दी सेविका है, मैं चांदा है की तुसां इसा दी इज्जत करा। 2 जडा प्रभु दा है, उदा स्वागत करा; कने जिसा गल्ला च उसा जो तुहाड़ी सहायता चाईदी होंगी, तां उसा दी सहायता करा; क्योंकि उना मतयां दी सहायता कितियो है कने मेरी भी। 3 बेहण प्रिस्का कने उसा दे घरे बाले अक्विला जो मेरी तरफा ला नमस्कार जडे यीशु च मेरे सोगी प्रभु दी सेवा करदे न। 4 उना मेरी जान बचाणे तांई अपनी जान खतरे च पाई थी, कने सिर्फ मैं ही नी पर होर जातियां दियां सारियां कलीसियां भी उना दा धन्यवाद करदियां न। 5 कने उसा कलीसिया जो भी नमस्कार जड़ी उना दे घरे च गिठी होंदी है। मेरे प्यारे इपेनितुस जो नमस्कार जडा आसिया प्रदेश ला मसीह पर भरोसा करणे बाला पेहला

माणु है। 6 मरियम जो नमस्कार, जिना तुहाड़े ताई बड़ी मेहनत कितियो है। 7 भाई अन्दरुनिकुस कने बेहन युनियास जो नमस्कार, जड़े मेरे यहदी विश्वासी भाई न, कने जड़े मेरे सोगी जेला च थे, कने प्रेरित उना जो अच्छे ने जाणदे न, कने मिंजो ला पेहले मसीह पर भरोसा करदे थे। 8 अम्पलियातुस जो नमस्कार, जड़ा प्रभु च मेरा प्यारा भाई है। 9 उरबानुस जो नमस्कार, जड़े मसीह च साड़े सोगी प्रभु दी सेवा करदा है, कने मेरे प्यारे भाई इस्तरुस जो भी नमस्कार। 10 अपिल्लेस जो नमस्कार, जड़ा परखे जाण बाद भी मसीह पर भरोसा करदा रिया। अरिस्तुबुलुस दे परिवारे जो नमस्कार। 11 मेरा रिशतेदार यहदी भाई हेरोदियोन जो मेरा नमस्कार। नरकिस्सुस दे परिवारे दे लोकां जो मेरा नमस्कार, जड़े प्रभु यीशु मसीह जो मंदे न, 12 बेहण त्रुफेना कने बेहण त्रुफोसा जो मेरा नमस्कार, जड़ियां प्रभु दी सेवा ताई मेहनत करदियां न। प्यारी बेहण पिरसिस जो मेरा नमस्कार जिना प्रभु च बड़ी मेहनत किती। 13 स्फुस जो जिसयो प्रभुए अपणी सेवा ताई चुणया है, कने उदी माता जो भी जड़ी मेरे ताई भी माता साई है, दोनो जो मेरा नमस्कार। 14 असुंक्रितुस कने फिलगोन कने हिर्मेस कने पत्रुबास कने हिमास कने उदे सोगी दे विश्वासी भाईयां जो मेरा नमस्कार। 15 फिलुलुगुस कने यूलिया कने नेर्युस कने उदी बेहन, कने उलुम्पास कने उदे सोगी दे सारे परमेस्वरे दे लोकां जो मेरा नमस्कार। 16 अपु चे इक दुज्जे जो गले लाईकरी नमस्कार करा: तुसां जो मसीह दी सारी कलीसियां दिया तरफा ला नमस्कार। 17 हुण हे मसीह भाईयो, मैं तुसां ने बिनती करदा है, की जड़े लोक कलीसिया च इक दुज्जे ने लडाई झगडा करदे न कने जिना दिया बजा ने दुज्जयां लोकां दा भरोसा खत्म होई जांदा है, ऐ लोक उसा सच्ची शिक्षा दे खिलाफ चलदे न जड़ी तुसां जो मिलियो है, ऐसे लोकां ला साबधान कने दूर रिया। 18 क्योंकि ऐसे लोक साड़े प्रभु यीशु मसीह दी नी पर अपणे आप दी सेवा करदे न; सै छेल-छेल गल्लां करी के लोकां दी चापलूसी करदे न, इयां करी के सै सीधे-साधे लोकां जो धोखा दिन्दे न। 19 हर कोई जाणदा है की तुसां कितणे अच्छे ला प्रभु दे हुकम मंदे न; इस ताई मिंजो तुहाड़े बारे च खुशी होंदी है; पर मैं ऐ चांदा है, की क्या खरा है ऐ जाणने ताई बुद्धिमान न, पर बुराईयां ताई भोले बणी रिया। 20 शांति दे परमेस्वरे शैताने जो तुहाड़े अधीन करी देणा। मैं प्राथना करदा है की साड़े प्रभु यीशु मसीह दा अनुग्रह हमेशा तुसां सबना पर होंदा रे। 21 तीमुथियुस मेरे सोगी कम्म करणे बाले दा, कने लुकियुस

कने यासोन कने सोसिपत्रुस मेरे यहदी भाई दा, तुसां जो शुभकामनाए दे दा है। 22 मैं तिरतियुस जड़ा पौलुस ताई ऐ चिट्ठी लिखा दा है, अपणी शुभकामनाए तुसां जो भेजा दा है। मैं भी प्रभु दा इक सेवक है। 23 गयुस भी तुसां जो अपणी शुभकामनाए भेजा दा है। मैं भी इदे घरे रेंदा है जिथू कलीसिया गिठी होंदी है। इरास्तुस जड़ा इस शेहरे दा भण्डारी है, कने साडे भाई क्वारतुस भी तुहांजो अपणी शुभकामनाए भेजदा है। 24 मैं प्राथना करदा है की साडे प्रभु यीशु मसीह दा अनुग्रह तुसां पर रे। 25 हुण सारी महिमा परमेश्वरे जो मिल्ले जड़ी तुसां जो मजबूत बणाणे च काबिल है कने जिस शुभसमाचार दा मैं प्रचार करदा है, इस संदेश च यीशु मसीह अपणी उस योजना जो होर जातियां ताई प्रगट कितया है, जड़ी शुरू ला गुप्त थी। (aiōnios g166) 26 पर हुण प्रगट होईकरी हमेशा दे परमेश्वरे दे हुकमे ने परमेश्वरे दे संदेश देणेबालयां दियां कताबां दे जरिये सारियां होर जातियां जो दसया है, की सै भरोसे ने हुकम मनणे बाले होई जान। (aiōnios g166) 27 उसी इकमात्र बुद्धिमान परमेश्वरे दी यीशु मसीह दे जरिये युगां-युगां दीकर महिमा होंदी रे। आमीन। (aiōn g165)

1 कुरिन्थियों

1 मैं, पौलुस जड़ा प्रभु यीशु दा प्रेरित होणे ताई परमेश्वरे दिया इच्छा ला चुणया है कने मैं ऐथू साडे मसीह भाई सोस्थिनेस सोगी है। **2** मैं ऐ चिट्ठी परमेश्वरे दिया कलीसिया जो लिखा दा है, जड़ी कुरिन्थुस शहर च है, मतलब की उना लोकां जो जिना जो परमेश्वरे यीशु मसीह सोगी इक करिरी अपने लोक होणे ताई लग कितया है कने उनी तुहांजो अपने पबित्र लोक होणे ताई सदया है; उनी तुहांजो तियां ही पबित्र कितया है, जियां सै हर जगा दे लोकां जो पबित्र करदा है जड़े यीशु मसीह पर भरोसा करदे न, जड़ा साडा सारयां दा प्रभु है। **3** मैं प्राथना करदा है की साडे पिता परमेश्वरे कने प्रभु यीशु मसीह तुहांजो अनुग्रह कने शांति दे। **4** मैं तुहाड़े बारे च अपने परमेश्वरे दा हमेशा धन्यवाद करदा है, क्योंकि उनी अपने अनुग्रह ला तुसां जो यीशु मसीह च इक करी दिता कने मतियां सारियां आशीषां दितियां। **5** मसीह सोगी इक करणे दा मतलब ऐ है, की परमेश्वरे तुसां जो सै बड़ा जादा दिता जिदी तुहांजो जरूरत थी, खासकर, उदा संदेश सुणाणे कने उदे बचन दे ज्ञान दियां केई आत्मिक आशीषां दितियां। **6** इना आत्मिक आशीषां ला जड़ियां परमेश्वरे तुहांजो दितियां न, तुहांजो साबित किता की मसीह दे बारे च संदेश सच्चा है। **7** कने इसा बजा ला पबित्र आत्मा तुहांजो सै सारे हुनर दिते जिना दी तुहांजो जरूरत थी, क्योंकि तुसां प्रभु यीशु मसीह दे मुडी ओणे दा इंतजार करा दे थे। **8** कने परमेश्वरे तुसां जो आखरी दीकर भरोसे च मजबूत करणा, की तुसां साडे प्रभु यीशु मसीह जो धरती पर मुडी ओणे दीकर निर्दोष बणी रेन। **9** परमेश्वरे ऐसा करणा, क्योंकि जड़ा सै बोलदा है उसयो पूरा करणे ताई सै भरोसे दे काबिल है, कने उनी तुहांजो अपने पुत्र यीशु मसीह सोगी रिशता बनावे ताई सदया है। **10** हे प्यारे भाईयो, मैं साडे प्रभु यीशु मसीह दे अधिकारे ला तुहांजो ला बिनती करदा है, की तुसां सब इक दुज्जे सोगी सेहमती रखा, कने तुसां च फूट ना होऐ, पर इक ही मन कने इक ही सोच च होईकरी मिली करी रिया। **11** क्योंकि हे मेरे मसीह भाईयो, खलोए दे परिवारे दे लोकां मिंजो तुहाड़े बारे च दसया है, की तुसां च झगड़े होआ दे न। **12** मेरे बोलणे दा मतलब ऐ है, की तुसां चे कोई अपने आपे जो बोलदा है की मैं “पौलुस दा चेला है,” कोई बोलदा, “अपुल्लोस दा चेला है,” कोई बोलदा, “कैफा दा,” कोई बोलदा, “मसीह दा चेला है।” **13** ऐ गल्ल खरी नी है, क्योंकि मसीह लग-लग टोलियां च नी बंडूया है। शायद तुसां गलतियां ला ऐ

सोचदे न की मैं, पौलुस तुहांजो अजाद करणे ताई सूली पर चढ़या था। कने शायद तुसां गलतिया ला ऐ भी सोचा दे न की तुहांजो इस ताई बपतिस्मा दितया है ताकि तुसां मेरे चेले बणन। 14 मैं परमेश्वरे दा धन्यवाद करदा है, की क्रिस्तुस कने गयुस इना दोनों भाईयां जो छडी करी, मैं तुसां चे कुसी जो भी बपतिस्मा नी दितया है। 15 इस ताई कोई ऐसा नी बोली सकदा की तुसां मेरे चेले बणने ताई बपतिस्मा लिया है। 16 कने मिंजो हुणी याद आया, की मैं स्तिफनास दे परिवारे जो भी बपतिस्मा दितया; इना जो छडी करी, मैं नी जाणदा कि मैं कुसी होरसी जो भी बपतिस्मा दितया है। 17 क्योंकि मसीहे मिंजो बपतिस्मा देंगे ताई नी, पर शुभसमाचार सुणाणे जो भेजया है, जालू मैं शुभसमाचार सुणादां है, तालू बोलणे च मैं अपने हुनर दा इस्तेमाल नी करदा है, अगर लोक सिर्फ मेरे हुनर दिया बजा ला मिंजो मंदे न, तां सै सूली पर मसीह दी मौत दी शक्ति जो नी जाणदे न। 18 क्योंकि जडे लोक परमेश्वरे ला लग होई जांगे, उना जो सजा मिलणी, सै सूली पर मसीह दी शिक्षा दी कोई कीमत नी समझदे, पर साडे ताई जडे बचायो न, असां जाणदे न की ऐ परमेश्वरे दिया शक्तिया दा सबूत है। 19 क्योंकि पबित्र शास्त्र च परमेश्वर बोलदा है, “मैं दसणा है की जिना लोकां दे बिचारां जो संसारे दे लोक बुद्धिमानी बोलदे न, असल च सै बिचार मुखता दे न। मैं साबित करणा है की असल च सै बिलकुल भी समझदार नी न।” 20 तां फिरी, असां बुद्धिमान लोकां दे बारे च क्या बोली सकदे न? कने असां व्यवस्था जो सिखाणे बालयां दे बारे च बोली सकदे न? कने असां उना लोकां दे बारे च क्या बोली सकदे जडे बोलणे च बडे चलाक न? परमेश्वरे उना सारयां जो मुख बणाई दितया है, कने उना दी बुद्धिमानी जो बेकार कने बकवास दसया है। (aiōn g165) 21 मैं ऐसा इस ताई बोलदा है क्योंकि परमेश्वरे समझदारिया ला ऐ फेसला लिया की इस संसारे दे लोक अपणी काबलियता ला उसयो नी जाणी सकदे न, इस ताई परमेश्वर उना जो बचादां जडे शुभसमाचार पर भरोसा करदे न जिदा असां प्रचार करदे न, चाहे कोई भरोसा नी करणे बाला बोले की ऐ मुखता दियां गल्लां न। 22 यहदियां ताई ऐ इस ताई मुखता है, क्योंकि सै इसयो सच्च साबित करणे ताई स्वर्ग ला कोई निशाण मंगदे न, कने होर जातियां ताई भी जडे इन्सानी ज्ञान दिया तोपा च रेंदे न। 23 पर असां तां ऐ प्रचार करदे न की मसीह साडे पापां ला सांझो छुड़ाणे ताई सूली पर मरया, जडा यहदियां ताई ठोकर दी बजा है, कने होर जातियां दिया ताई मुखता है; 24 पर

जिना जो परमेश्वरे अपने लोक होणे ताई सदया है, क्या यहदी, क्या होर जातियां दोना ताई ऐई मसीह परमेश्वरे दी शक्ति, कने परमेश्वरे दा ज्ञान है। 25 ऐ परमेश्वरे दी मुख योजना बुद्धिमान माणुआं दी योजना ला जादा बुद्धिमान है, कने परमेश्वरे दी कमजोरी भी माणुआं दी सबना ला बडी ताकत ला भी बदीकरी ताकतबर है। 26 हे मसीह भाईयो, अपने उना हालतां जो याद रखा जालू परमेश्वरे तुसां जो मसीह दे पिच्छे चलणे ताई सदया, अगर असां इन्सानी सोचा ला सोचन, तां तुसां चे मते बुद्धिमान नी थे, कने तुसां चे कोई भी राजा महाराजे दे खानदान ला नी थे। 27 पर बुद्धिमान लोकां जो शरमिन्दा करणे ताई, परमेश्वरे उना लोकां जो चुण्या जडे संसारे दिया नजरा च मुख न कने ताकतबर लोकां जो शरमिन्दा करणे ताई, परमेश्वरे उना लोकां जो चुण्या जडे संसार दिया नजरा च कमजोर न। 28 कने परमेश्वरे उना जो चुण्या जडे संसारे दे लोकां दिया नजरा च निच न, कने जिना दी संसार च कोई कीमत नी है उना जो चुणी लिया ताकि जडे अपने आप जो कीमती समझदे न उना जो बेकार करी दे। 29 परमेश्वरे ऐसा इस ताई कितया ताकि कोई भी माणु परमेश्वरे सामणे घमंड ना करे। 30 पर परमेश्वरे तुहांजो यीशु मसीह सोगी इक किता, कने मसीह दे जरिये सांझो बुद्धि दिन्दा है। परमेश्वर सांझो धर्मी बणादां है, कने मसीह दे जरिये सांझो पबित्र, कने पापां ला छुडादां है। 31 ताकि जियां पबित्र शास्त्र च लिखया है, तियां ही हो, “जडा घमंड करे सै उस पर घमंड करे जडा परमेश्वरे कितया है।”

2 हे मसीह भाईयो, जालू मैं तुहांजो परमेश्वरे दे बारे च संदेश सुणाया, तां मैं बड़े-बड़े ज्ञान दे अखरां दा इस्तेमाल नी किता कने ना ही समझदार लगणे दा दिखाबा किता। 2 क्योंकि मैं तुहाड़े बिच ऐ फेसला करी के आया था, की मैं यीशु मसीह कने उदी सूली पर मौत दे बारे दे इलाबा होर केसी दे भी बारे च गल्ल नी करणी है। 3 कने जालू मैं तुहाड़े बाल था, तां मैं अपने आप जो मसीह दा कम्म करणे दे काबिल नी समझदा था, इसा बजा ला मैं बडा कमजोर कने डरदा होया तुहाड़े सोगी रिया। 4 कने मेरी शिक्षा कने मेरे प्रचार च संसारिक ज्ञान कने लोकां जो खुश करणे बालियां गल्लां नी थियां; पर पबित्र आत्मा बडिया शक्तिया ला प्रगट किता की जडी शिक्षा मैं तुहांजो दिती सै सच्ची है, 5 इस ताई की तुहाडा भरोसा माणुऐ दे ज्ञान पर नी पर परमेश्वरे दिया शक्तियों पर निर्भर हो। 6 फिरी भी मैं उना लोकां जो, जडे भरोसे च मजबूत न, ज्ञान भरी शिक्षा दिन्दा है; पर ना ही संसारिक

ज्ञान कने ना ही इस संसारे दे हाकिमा दा ज्ञान, जिना दा नाश होणेबाला है। (aiōn g165) 7 पर असां परमेश्वरे दे उस ज्ञान दी गल्ल करदे न जडा गुप्त था। हल्ले दीकर इसयो कोई नी जाणदा था, परमेश्वरे धरती बणाणे ला पेहले ही फेसला लिया था, की उदे ज्ञान ला सांझो महिमा मिल्ले। (aiōn g165) 8 परमेश्वरे दिया इसा योजना जो संसारे दे हाकिमा चे कुनी भी नी समझया, क्योंकि अगर जाणदे, तां महिमामय प्रभु जो सूली पर नी चढांदे। (aiōn g165) 9 पर जिईयां पबित्र शास्त्र च लिखया है, “ना कदी कुनी दिखया है, ना कदी कुनी सुणया, कने ना कदी कुनी उना भली चीजां दे बारे च सोचया, जड़ियां परमेश्वरे उना लोकां तांई तैयार कितियां न जडे उदे ने प्यार करदे न।” 10 परमेश्वरे ऐ गल्लां पबित्र आत्मा जरिये असां प्रेरितां जो दसियां; क्योंकि ऐसा कुछ नी है जडा परमेश्वरे दी आत्मा नी जाणदा हो। ऐथू दीकर की सै परमेश्वरे दुगे बिचारां जो भी अच्छे ने जाणदा है। 11 तुसां सेई न जडे जाणदे न की तुहाडे अपने मने च क्या है, तियां ही परमेश्वरे दिया आत्मा दे सिबाये कोई भी परमेश्वरे दे बिचारां जो नी जाणी सकदा। 12 पर साडी सोच कने बिचार संसारे दे माणुआं सांई नी न, पर परमेश्वरे सांझो अपनी आत्मा दितियो है, ताकि असां उना गल्लां जो जाणन, जड़ियां परमेश्वरे अपने अनुग्रह ला दितियां न। 13 कने इस तांई असां इना गल्लां जो दुज्जे लोकां जो दसदे न तां असां ऐसे अखरां दा इस्तेमाल नी करदे, जडे माणुआं दे ज्ञाने ला मिलदे न, पर असां उना अखरां दा इस्तेमाल करदे न जडे परमेश्वरे दिया जरिये मिलदे न, जडा आत्मिक ज्ञाने दे जरिये आत्मिक गल्लां जो समझांदा है। 14 पर सै माणु जिसयो परमेश्वरे दी आत्मा नी मिलियो है, सै परमेश्वरे दिया आत्मा दियां गल्लां जो नी मंदा, क्योंकि सै उदिया नजरा च मुखता दियां गल्लां न कने सै इना गल्लां दी कीमत नी समझदा। 15 जिना जो पबित्र आत्मा मिलया, सै उना चीजां जो समझी सकदे न, जडा पबित्र आत्मा सिखांदी है। पर जिना लोकां बाल पबित्र आत्मा नी है सै उना लोकां दे बिचारां जो नी समझी सकदे जिना बाल पबित्र आत्मा है। 16 ऐ सच्च है क्योंकि पबित्र शास्त्र च लिखया है की, “कोई भी ऐ नी जाणी सकदा की परमेश्वरे दे मने च क्या है कने कोई भी उसयो सिखाई नी सकदा।” पर असां भरोसा करणे बाले समझदे न की मसीह दे मने च क्या है।

3 हे मसीह भाईयो, मै जालू तुहाडे सोगी था, तालू मै तुसां जो गेहरी गल्लां नी सिखाईयां, जियां की मै आत्मिक लोकां जो सिखांदा है, मै तुसां लोकां ला इयां

गल्लां कितियां जियां की तुसां इसा दुनिया दे लोकां सांई न, या इयां जियां की तुसां मसीह जिन्दगी च बच्चे न। 2 मै तूहांजो परमेश्वरे दे बचने ला सिर्फ बुनियादी शिक्षा दिती, कने गेहरी शिक्षा नी दिती, क्योंकि उस बकत तुसां इसा शिक्षा जो पाणे तांई तैयार नी थे, 3 क्योंकि तुसां हल्ले दीकर भी संसारे दे लोकां सांई जिन्दगी जिया दे न। इस तांई की जालू तुसां च इक दुज्जे सोगी जलन कने झगडा होंदा है, तां ऐ साबित करदा है की तुसां संसार दे लोकां सांई न। कने तुसां उना लोकां सांई जिन्दगी जिन्दे न जडे लोक प्रभु दे लोक नी न। 4 इस तांई की जालू इक बोलदा है की, “मै पौलुस दा है,” कने दुज्जा बोले कि, “मै अपुल्लोस दा है,” तां क्या तुसां संसार दे लोकां सांई नी करदे न? 5 तां फिरी सोचा की अपुल्लोस कुण है? कने मै पौलुस कुण है? असां तां सिर्फ परमेश्वरे दे सेवक न, जिना दे जरिये तुसां मसीह पर भरोसा किता, असां चे हर इक जणे सेई कम्म किता जडा परमेश्वरे सांझो करणे तांई दिता। 6 अगर मै तुसां दी तुलना खेतरे सोगी करें, तां मै उस माणुऐ सांई है जिनी पेहले तुसां च शुभसमाचार दा बी राया, कने अपुल्लोस उस माणुऐ सांई है जिनी उस बूटे जो खाद पांणी दिता ताकि सै बदी सके, पर परमेश्वर ही है जडा तुसां जो आत्मिक रूप ला बदादां है, जियां परमेश्वर उस बूटे जो बदादां है। 7 इस तांई ना तां बूटे जो लगाणे बाला कुछ है, कने ना ही सै कुछ है जिनी खाद पाणी दिता, पर परमेश्वर ही सब कुछ है जिनी उस बूटे जो बदाया। 8 मै तूहांजो शुभसमाचार सुणाया कने परमेश्वरे दे बचना जो सिखाणा शुरू किता कने अपुल्लोस तूहांजो सिखांदा रिया पर साड़ा दोनों दा इक ही मकसद है, कने हर इक माणुऐ जो उदिया मेहनता दे साबे ला परमेश्वरे इनाम देणा। 9 क्योंकि असां परमेश्वरे दे सहकर्मि न; कने तुसां सारे मसीह लोक परमेश्वरे दिया खेतिया सांई न, कने मै तुहाड़ी तुलना इक घरे सांई करी सकदा है, जिसयो परमेश्वर बणांदा है। 10 परमेश्वरे जडा बरदान मिंजो दिता, उदे जरिये मै इक खरे राज मिस्त्रीऐ सांई उस घरे दिया नियां पाईयां कने होर दुज्जे लोकां इसा नियां पर घर बणाया। पर हर इक माणु ध्यान रखे की सै क्रियां घर बणांदा है। 11 क्योंकि नि जडी पहले ला ही रखियो है, सै यीशु मसीह है, कने होर कोई भी दुज्जी नि नी रखी सकदा। 12 कने अगर मसीह सेवक खरियां गल्लां सिखाऐ जडियां परमेश्वरे उना जो दीतियां, सै उना घर बणाणे बालयां सांई न जडे उसा नियां पर होर चीजां न जियां सोना या चांदी या कीमती पथरां ला घर बणांदा है। पर अगर सै झुठियां गल्लां सिखाऐ तां सै उना घर बणाणे

बालयां सांई है जडे घटिया चीजां ने जियां लकड़ी, भू कने घाए ने घर बणादे, 13 पर न्याय बाले रोजे अग्गी हर कुसी दे कम्म प्रगट करणे न की कुदे कम्म खरे थे कने कुदे कम्म बुरे थे; कने अग्गी दसणा है की उस माणुए दे कम्मा दी कोई कीमत है की नी। 14 अगर कुसी घर बणाणे बाले दा कम्म जडा उनी उसा नियां पर घर बणादे बकत कितया हो, कने अगर सै नी फकुंगा तां मसीहे उसयो इनाम देणा है। 15 पर अगर कुसी घर बणाणे बाले दा कम्म फकुई जांगा तां मसीहे उसयो इनाम नी देणा। पर उसयो हमेशा दी जिन्दगी मिली जाणी जड़ी परमेश्वरे उस तांई रखियो है। 16 तुसां जो पक्का पता है, की तुसां परमेश्वरे दा मन्दिर न, कने परमेश्वरे दी दितियो आत्मा तुहाडे बिच वास करदी है। 17 तुसां परमेश्वरे दे मंदरे सांई न, अगर कोई माणु तुहांजो मिली जुली करी रेणा नी दिन्दा है। तां परमेश्वरे उसयो सकत सजा देंणी, क्योंकि परमेश्वरे दा मंदर पबित्र है, कने सै मन्दिर तुसां न। 18 कोई अपने आपे जो धोखे च ना रखे। अगर तुसां चे कोई अपने आप जो इस संसारे दे लोकां सामणे ज्ञानी समझे, तां सै उना दिया नजरां च मुख बणी जाए, ताकि तुसां परमेश्वरे दिया नजरा च ज्ञानी बणी सकन। (aiōn g165) 19 क्योंकि इस संसारे दे लोक जिना गल्लां जो ज्ञान समझदे न, सै सारियां गल्लां परमेश्वरे दिया नजरां च मुखता है, जियां पबित्र शास्त्र च लिखया है की, “परमेश्वर ज्ञानी लोकां दी चलाकियां च उना जो फसाई दिन्दा है।” 20 कने पबित्र शास्त्र ऐ भी लिखया है की, “प्रभु ज्ञानी लोकां दे बिचारां जो जाणदा है की सारे बेकार न।” 21 इस तांई तुसां घमंड मत करा की तुसां कुसी खास माणुए दे चेले न, मै पौलुस, अपुल्लोस, पतरस, सारे तुसां दे न, ऐथू दीकर की सारा कुछ तुसां दा है मतलब की संसारे दियां चीजां, अगर तुसां जिन्दे न या मरी गियो, अज या भविष्य सब कुछ तुहाडा है। 23 कने तुसां मसीह दे अधिकारे दे अधीन न, कने मसीह परमेश्वरे दे अधिकारे अधीन न।

4 तुसां सांझो मसीह दे सेवक समझा जिना जो परमेश्वरे शुभसमाचार दे भेदां दी सच्चाई जो समझाणे दा कम्म दितया है। 2 परमेश्वरे जिसयो ऐ कम्म करणे जो दितया, जरूरी है की सै भरोसे लाइक हो, ताकि दितयो कम्मे जो पूरा करी सके। 3 पर मै इसा गल्ला दी फिकर नी करदा की, तुसां या होर कोई मेरे बारे च ऐ बोले की ऐ भरोसे दे लायक है की नी है, सच्च तां ऐ है की मै अपने बारे च भी नी बोलदा की मै भरोसे दे लायक है की नी। 4 क्योंकि मेरी अंतरात्मा मिंजो कुसी भी

गल्ला च दोषी नी बणांदी, पर इसला मैं निर्दोष नी बणदा, क्योंकि परमेश्वर मिंजो परखणेबाला है कने सेई मिंजो बेकसूर साबित करदा है। 5 इस ताई साडे प्रभु यीशु मसीह दे बापस ओणे दीकर कोई कुसी दा न्याय ना करे, क्योंकि परमेश्वरे साफ तरीके ला उना सारे बिचारां जो दसणा जड़े लोकां दे मना च न, जिना दे बारे च कोई नी जाणदा है, उनी उना दे मने दे सारे इरादयां जो प्रगट करणा है, तालू परमेश्वरे दिया तरफा ला हर इकी दी तारीफ होंणी। 6 हे मसीह भाईयो, मैं अपुल्लोस कने अपने बारे च तुहांजो इस ताई दसया ताकि तुसां सांझो इक उदाहरण सांई लेई सकन, “पबित्र शास्त्र च जडा लिखया है, उसला अगो मत बदा।” ऐ खरा नी है की तुसां कुसी इकी जो इज्जत देईकरी बढा बणा, कने दुज्जे दी बेजती करिरी निचा दस्सा। 7 कुण बोलदा है की तू दुज्जे ला खरा है? कने जडा कुछ तेरे बाल है सै परमेश्वरे तिजो दितया। कने जालू परमेश्वरे ही सब कुछ तिजो दितया, तां तिजो कोई हक नी है की तू कुसी गल्ला च घमंड करे। 8 तुहांजो लगदा है की तुहाडे बाल आत्मिक रूप च सारियां चीजां न। कने तुहांजो लगदा है की पेहले ही सारे बरदान तुहांजो मिली गियो न, जड़े पबित्र आत्मा अपने लोकां जो दिन्दी है, कने तुहांजो लगदा की तुसां साडे बिना राजयां सांई शासन करणा लग्गी पियो न, मैं खुश होई जांदा अगर तुसां सच्ची राजयां सांई राज करणा लग्गी पियो होंदे ताकि असां भी तुहाडे सोगी शासन करी सकन। 9 मिंजो ऐसा लग्गा दा की परमेश्वरे असां प्रेरितां जो जित दिया यात्रा च सारयां ला आखरी जगा च उना केदियां सांई रखया है जिना जो मौत दी सजा मिलियो हो। असां सारी दुनिया, स्वर्गदूतां कने माणुआं सामणे तमाशा बणी गियो न। 10 लोक सांझो मुख समझदे न क्योंकि असां मसीह दा प्रचार करदे न, पर तुसां गलत सोचदे न की तुसां बुद्धिमान मसीह न! मते लोक मंदे न की साडे बाल कोई हक नी है। पर तुसां घमंड ला बोलदे न की तुहाडे बाल परमेश्वरे दी शक्ति है। लोक साडी इज्जत नी करदे पर लोक तुहाडी इज्जत करदे न। 11 असां उस रोजे दीकर भूखे प्यासे कने फटयो कपडे पायो न, कने लोकां सांझो मारया कूटया, कने साडे तांई रेणे जो घर नी था। 12 कने अपने ही हथां ला कम्म करिके मेहनत करदे न, लोक बुरा बोलदे न, असां आशीष दिन्दे न, सै सतादें न असां सेहन करदे न। 13 जालू लोक बदनाम करदे न, तां असां उना जो बडे प्यारभाव ला जबाब दिन्दे न। अजे भी लोक साडी इज्जत नी करदे कने सै बोलदे न की साडी कोई कीमत नही है। 14 मैं तुहांजो शरमिंदा करणे तांई ऐ गल्लां

नी लिखदा है, पर मेरा मकसद तुहांजो सुधारणा है क्योंकि तुसां मेरे बचयां सांई न जिना जो मैं बड़ा प्यार करदा है कने चेताबनी दिन्दा है। 15 भले ही तुहाड़े बाल सिखाणे तांई हजारो गुरू होन, सिर्फ मैं ही तुहाड़े पिता सांई है, क्योंकि मैं पेहला माणु है, जड़ा तुहाड़े तांई शुभसमाचार लेईकरी आया, जिसदी बजा ला तुहांजो मसीह यीशु पर भरोसा होया। 16 इस तांई मैं तुहांजो बिनती करदा है, की जियां मैं मसीह च जिन्दगी जिया दा, तियां ही तुसां भी जिन्दगी जिया। 17 इस तांई मैं तीमुथियुस जो तुसां बाल भेजया है, जड़ा प्रभु यीशु च मेरा प्यारा कने भरोसे बाला पुत्र है, उनी तुहांजो दसणा की मैं क्या करदा है कने यीशु मसीह दा चेला बणी करी जिया दा, ठीक ऐई गल्लां मैं हर जगा कने सारी कलीसियां जो सिखांदा। 18 तुहाड़े बिच कुछ लोक सोचदे न की तुहांजो मिलणा नी ओणा, इस तांई सै घमंडी होई गियो न। 19 पर प्रभुऐ दी इच्छा होई तां मैं तुहाड़े बाल जल्दी ओणा है, कने उना घमंडियां दियां सिर्फ शिक्षा जो ही नी, पर उना दिया शक्तिया जो भी जाणी लेणा है। 20 क्योंकि परमेश्वरे दा राज्य सिर्फ बड़ियां भरी गल्लां करणा ही नी, पर ऐ परमेश्वरे दिया शक्तिया ला जीणा है। 21 जालू मैं तुहाड़े बाल ओगा तां तुसां क्या चांदे न की मैं करा? अगर तुसां अपणियां बुरियां गल्लां ला नी सुधरयो होंगे, तां मैं तुहांजो अपने तरीके ला सुधारगा, पर अगर सुधरी गियो होंगे तां मैं तुसां पर दया दसणी, कने दसणा की मैं तुहांजो ने कितणा प्यार करदा है।

5 मैं लोकां जो तुहाड़े बारे च बोलदे सुणया है, की तुसां चे कुछ लोक व्यभिचार करदे न, कने ऐसा व्यभिचार तां होर जाति दे लोकां च भी नी होंदा। सै ऐ है की इकी माणुऐ अपणी सौतेली माऊ सोगी नाजायज रिश्ता रखया है। 2 कने तुसां जो तां इसा गल्ला दा दुख होणा चाईदा था, पर इदे बजाये तुसां इसा गल्ला च घमंड करदे न। तुहांजो इयुदे माणुआं जो कलीसिया ला कडी देणा चाईदा। 3 भले ही मैं ओथु तुहाड़े सोगी नी है, पर ऐसा लगदा है कि मने ला मैं ओथु ही है, कने मैं इयुदे कम्म करणे बालयां दे खिलाफ फेसला करी दितया है। 4 कने तुहांजो ऐसा करणा चाईदा की तुसां सारे भरोसा करणे बाले होणे दे नाते गिठे होन, ऐ जाणदे होऐ की तुहाड़े बाल असल च साड़े प्रभु यीशु मसीह दा हक है। 5 उस पाप करणे बाले माणुऐ जो अपणी कलीसिया ला कडी दिया, कने बापस उस जो शैतान दे बशे च देई दिया। क्या पता सै पाप करणा छडी दे। क्योंकि अगर सै पाप करणा छडी दिगा, तां जिस दिन प्रभुऐ न्याय करणा पक्का उस दिन उनी बची जाणा। 6 तुहाड़ा

घमंड करणा बिलकुल भी ठीक नी है, क्या तुसां नी जाणदे की थोडा दिया खमीर पुरे गुनयो आटे जो खमीर करी दिन्दा है? अगर कुसी माणुऐ जो पाप करणे दी इजाजत मिलदी है, तां झट सारयां पाप करणा लगी पोंणा। 7 जियां यहूदी लोक अपने घरां ला फसह दा त्योहार मनाणे ला पेहले सारा खमीर कडी दिन्दे न, तियां ही तुसां भी इस पापी माणुऐ जो कलीसिया ला कडी दिया, तां तुसां इक ताजी रोटिया सांई होणा, जडी बिना खमिरे ला बणियो है, कने असल च तुसां सेई न। क्योंकि साडे फसह दा त्योहार असल च मसीह दे बलिदाने दे जरिये पूरा होया है। 8 इस तांई ओआ की असां अपने फसह दा त्योहार मनान। जियां यहूदी खमीर बाहर कडया, तियां अपने पापी सभाब जो छडी दिया, कने जियां यहूदी खमिरे बाली रोटि खांदे थे, सांझो भी परमेश्वरे दे लोकां सांई जीणा चाईदा, जिना च कोई बुराई नी होंदी, मतलब की अपने मने ला चलाकिया दियां गल्लां जो कडी करी कने सच्चाईया कने यीशु मसीह सोगी चला। 9 मैं अपणिया पिछलिया चिठिया च तुहांजो लिखया था, की व्यभिचारियां सोगी संगती मत करदे। 10 ऐ नी की तुसां बिलकुल ही इस संसारे दे व्यभिचारियां, या लोभियां, या दूज्जयां जो धोखा देणेबाले, या मूर्तिपूजा करणे बालयां दी संगती नी करणी, क्योंकि इयां तां तुहांजो इस संसारे ला निकलना पेई जाणा। 11 पर मेरे बोलणे दा मतलब ऐ है, ऐसे माणुऐ सोगी कोई रिश्ता मत रखा जडा अपने आपे जो मसीही बोलदा है, पर व्यभिचार, या लालची, या मूर्तिपूजक, या गाली देंगे बाला, या शराबी, या दूज्जयां जो धोखा देणेबाला हो, तां उस माणुऐ सोगी संगती मत करदे। 12 क्योंकि कलीसिया ला बाहर बालयां दा फेसला करणा मेरा कम्म नी है, पर तुहांजो उना जो जस्स सुधारणा चाईदा जडे तुहाडे कलीसिया दे लोक न। 13 पर कलीसिया ला बाहर बालयां दा फेसला परमेस्वर करदा है: पर जियां पबित्र शास्त्र च लिखया है, की कुसी भी बुरे कम्म करणे बाले माणुऐ सोगी रिश्ता मत रखा।

6 अगर तुहाडा कुसी दुज्जे मसीह भाई या बेहणा सोगी झगडा होंदा है, तां तुसां जो कचेरी च नी जाणा चाईदा। तुहांजो अपनी कलीसिया चे कुसी जो बोलणा चाईदा की, सै तुहाडे झगडे दा फेसला करे की कुण सही है कने कुण गलत है। 2 तुसां जाणदे न की, ओणे बाले दिना च परमेश्वरे दे लोकां इस संसारे दे लोकां दा न्याय करणा। इस तांई जालू तुसां बिच छोटे मोटे झगडे होन तां तुसां जस्स फेसला करी सकन की कुण गलत है कने कुण सही है। 3 तुसां जाणदे न की, ओणे बाले

दिना च असां शैताने दे दूतां दा न्याय करणा, तां असां जस्स इसा जिन्दगिया च होणे बालियां छोटियां-छोटियां गल्लां दा फेसला करी सकदे न। 4 अगर एसियां गल्लां सामणे ओदियां न, तां उना दा फेसला करणे ताई ऐसे लोकां बाल नी जाणा चाईदा, जिना दी कलीसिया दे लोक इज्जत नी करदे होन। 5 मैं ऐ गल्लां तुहांजो शर्मिंदा करणे ताई बोला दा है; क्या सच्ची तुसां चे कोई भी समझदार नी है, जडा अपने मसीह भाईयां कने बेहणा दा न्याय करी सके? 6 बल्कि इक मसीह भाई दुज्जे मसीह भाई दे खिलाफ मुकदमे जो लेईकरी भरोसा नी करणे बाले बाल जाए। 7 पर सच्ची गल्ल तां ऐ की तुसां बिच मुकदमे चलणे दा मतलब है की तुसां इक मसीही जिन्दगी जिणे च हारी गियो न। इस ताई अगर कोई होर मसीह भाई या बेहण तुहाडे सोगी गलत करे, कने धोखे ने तुहाडा कुछ लेई ले, तां तुसां इदे बदले च कुछ मत करा। 8 पर तुसां तां अपु ही गलत करा दे न कने धोखा दे न कने सै भी अपने ही मसीह भाई बेहणा जो। 9 तुसां पक्का जाणदे न की, बुरे कम्म करणे बाले लोक परमेश्वरे दे राज्य दे हकदार नी होणे न। कोई तुसां जो ऐ गल्ल बोली करी धोखा ना दे, की तुसां बुरे कम्म करी के भी परमेश्वरे दे लोक बणी रेई सकदे न। इस धोखे च मत रेंदे की, वेश्यागामी, मूर्तिपूजा करणे बाले, परस्त्रीगामी, लुच्चे, पुष्पगामी, 10 चोर, लालची, शराबी, गाली देणेबाले, दुज्जयां जो धोखा देणेबाले परमेश्वरे दे राज्य दे हकदार नी होणे न। 11 कने तुसां चे कुछ लोक पेहले ऐसे ही थे, पर प्रभु यीशु मसीह दे नाए ला कने साडे परमेश्वरे दिया पबित्र आत्मा तुहाडे पाप धोई दितयो न, ताकि तुसां पबित्र कने परमेश्वरे दिया नजरा च धर्मी बणन। 12 तुसां बोली सकदे न की, मैं सारियां चीजां करी सकदा है क्योंकि मैं इक मसीह पर भरोसा करणे बाला है; पर सारियां चीजां मेरे फायदे दियां नी न। पर मैं कुसी भी गल्ला दे बसे नी होणा। 13 तुसां बोली सकदे न की, खांणा पेटे ताई, कने पेट खांणे ताई है, ऐ तां सच्च है पर परमेश्वरे ऐ दोनों खत्म करी देणा। साडे शरीर व्यभिचार ताई नी न, बल्कि प्रभु ताई है, कने इसला प्रभु दी सेवा करणी चाईदी। 14 पर साडा शरीर इस ताई भी खास है क्योंकि जियां परमेश्वरे अपणिया शक्तिया ला प्रभु जो मरयां चे जिन्दा किता, तियां ही उनी सांझो भी मरयां चे जिन्दा करणा। 15 तुसां जाणदे न की, तुहाडे शरीर मसीह दे अंग न। तां क्या इक माणुऐ अपने शरीर जो लेईकरी, बेश्या सोगी जोडना चाईदा? नी बिल्कुल भी नी। 16 तुसां जाणदे न की पबित्र शास्त्र च लिखया है, “उना दोनों इक बणी जाणा।” इस ताई तुहांजो पता

होणा चाईदा की जड़ा कोई बेश्या ला जुड़ी जांदा है सै बेश्या सोगी इक बणी जांदा है। 17 कने जड़ा प्रभु सोगी जुड़ी जांदा है, उदी आत्मा कने प्रभु दी आत्मा इक होई जांदियां न। 18 व्यभिचार ला बची रिया; माणुऐ दे कितयो होर पाप उदे शरीर जो उतणा प्रभावित नी करदे जितणा ऐ करदा है, पर व्यभिचार करणे बाला अपने ही शरीर दे खिलाफ पाप करदा है। 19 तुसां जाणदे न की, तुहाड़ा शरीर सै मंदर है जिदे च पबित्र आत्मा बसदी है; जड़ी परमेश्वरे तुहांजो दितियो है, कने हुण तुसां अपने नी न, पर परमेश्वरे दे न। 20 क्योंकि जालू परमेश्वरे प्रभु यीशु मसीह जो भेजया, तालू उनी तुहाड़े ताई बड़ी बड़ी कीमत चुकाई है, इस ताई अपने शरीर ला परमेश्वरे दी महिमा करा।

7 हुण जड़े सबाल तुसां मिंजो ला चिठिया च पूछयो थे हुण मैं उना दा जबाब दिन्दा है। तुसां पूछया था कि, “क्या असां लोकां ताई ऐ खरा है की असां बियाह ना करन?” 2 क्योंकि ऐ आम गल्ल है की लोक नाजायज रिश्ते बणाई लेंदे न, इस ताई मैं सलाह दिन्दा है की हर इक मर्द बियाह करे, कने अपनी घरे बालिया सोगी बफादार रहे। 3 इक माणु पति होणे दे नाते अपनीया जिम्मेबारियां पुरियां करे; कने तियां ही इक जनानी भी घरे बाली होणे दे नाते जिम्मेबारियां पूरी करे, कने दोनों इक दुज्जे दियां जस्रतां जो पूरा करन। 4 घरे बालिया जो अपने शरीर पर हक नी है, पर उसा दे घरे बाले जो है; तियां ही घरे बाले जो भी अपने शरीर पर हक नी है, पर उदी घरे बालिया जो है। 5 तुसां इकी दुज्जे ला लग मत रिया; पर सिर्फ कुछ बकत दीकर अपु चे सलाह करिके लग रिया, ताकि प्राथना करणे ताई कुछ बकत मिल्ली सके, कने फिरी दुबारा सोगी रिया, इयां ना हो की अपने पर काबू नी रखणे दिया बजा ला शैतान तुसां जो नाजायज रिश्ता रखणे ताई परखे। 6 पर मैं जड़ा कुछ बोला दा है सै मेरी सलाह है ना की मेरा हुकम। 7 मैं ऐ चांदा है, की जियां की मैं बियाह नी कितया, तियां ही तुसां सारे भी बियाह मत करा, पर परमेश्वरे कुछ लोकां जो खास बरदान दितया है। परमेश्वरे कुछ लोकां जो बियाह करणे दा बरदान दितया, कने कुसी जो बगेर बियाये रेणे दा बरदान दितया है। 8 पर कुआरयां कने बिधवां जो मेरी सलाह ऐ है की, उना ताई ऐई खरा है की सै बगेर बियाह कितयो रिया, जियां मैं है। 9 पर अगर सै सबर नी रखी सकन, तां उना जो बियाह करी लेणा चाईदा, क्योंकि शरीर दिया इच्छा ला लड़ने ला खरा है की बियाह करी लिया। 10 जिना दा बियाह होई गया है, उना जो मैं नी, बल्कि प्रभु

यीशु मसीह हुकम दिन्दा है, की घरे बाली अपने घरे बाले जो तलाख ना दे। **11**
 कने अगर तलाख होई भी जा, तां सै दुज्जा बियाह ना करे; या अपने घरे बाले
 सोगी दुबारा मिली करी रे। कने ना घरेबाला अपणिया घरे बालिया जो तलाख दे।
12 पर हुण ऐ प्रभु दा हुकम नी है, पर मै उना भरोसा करणे बाले लोकां जो बोलणा
 चांदा है, जिना दा बियाह भरोसा नी करणे बाले लोकां ने होई गिया है; अगर कुसी
 मसीह भाईऐ दी घरे बाली मसीह पर भरोसा नी करदी है, कने उदे सोगी रेणा
 चांहदी, तां सै उसा जो तलाख ना दे। **13** कने जिसा मसीह जनानिया दा घरेबाला
 भरोसा नी करदा हो, कने उसा सोगी रेहणे च खुश हो, तां सै अपने घरे बाले जो
 तलाख ना दे। **14** क्योंकि इक मसीह पर भरोसा करणे बालिया दे घरे बालिया
 दिया बजा ला परमेश्वरे उसा दे घरे बाले जो अपनाई लेणा है, अगर ऐ सच्च नी
 होदा की तुहाडा भरोसा नी करणे बाला घरेबाला या घरे बाली परमेश्वरे दे न, तां
 तुहाडे बाल बच्चे परमेश्वरे दे नी होंदे, पर हुण तां तुहाडे बाल बच्चे भी परमेश्वरे दे
 न। **15** अगर कोई भरोसा नी करणे बाला भाई या बेहण तलाख देणा चांदा है,
 तां सै ऐसा करी सकदा है। ऐसे हालातां च इक भरोसा करणे बाले घरे बाले या
 घरे बालिये जो इस रिशते जो निभाणे दी जरूरत नी है, क्योंकि भरोसा नी करणे
 बाला ऐ तलाख दे दा है; परमेश्वरे सांझो शांति ला जिन्दगी जिणे तांई सदया है।
16 हे घरेबालियो तुहांजो याद रखणा चाईदा की तुहाडिया बजा ला तुहाडे घरे
 बाले दियां जिन्दगिया भी बची जान कने हे घरे बालयो तुहांजो भी याद रखणा
 चाईदा की तुहाडिया बजा ला तुहाडे घरे बालियां दी जिन्दगी बची सके। **17** मेरा
 इतणा सब कुछ बोलणे दा मतलब ऐ की जियां प्रभुऐ हर इकी जो जिना हलातां च
 रखया है, सै उना ही हालातां च अपणी जिन्दगी जिये, जिस तांई परमेश्वरे उना जो
 अपने लोक होणे तांई सदया है। कने ऐई गल्ल मै सारियां कलीसियां दे लोकां जो
 सिखांदा है। **18** इक उदाहरण तांई, अगर कोई यहदी माणु प्रभु यीशु मसीही भरोसा
 करदा है, तां उसयो उदी यहदी होणे दी पछेण नी छडणी चाइदी, कने तियां ही
 अगर कोई होर जाति दा माणु यीशु मसीह पर भरोसा करे तां उसयो यहदी बणने
 तांई खतना करबाणे दी जरूरत नी है। **19** इक माणु दा खतना होया हो या नी होया
 हो इसला कोई फर्क नी पोंदा। पर परमेश्वरे दे हुकमा जो मनणा ही सारयां ला
 जरूरी है। **20** परमेश्वरे जिस माणुऐ जो जिना हलातां च अपने लोक होणे तांई
 सदया है, सै माणु उना ही हलातां च ही अपणी जिन्दगिया जो जिये। **21** अगर तू

नोकर होंदे होऐ परमेश्वरे पर भरोसा किता है, तां तू इस बारे च चिंता मत कर; अगर तेरा मालिक बोले की तू अजाद है, तालू तू जाई सकदा है। 22 क्योंकि जिसयो नोकरे दिया हालता च प्रभु दे लोक होणे ताई सदया हो, सै अजाद माणुऐ साई है, क्योंकि प्रभु यीशु मसीहे उसयो उदे पापां ला आजादी देई दितियो है। कने इयां ही जिसयो आजादी दिया हालता च सदया हो, सै मसीह दे सेवक बणी रे। 23 क्योंकि परमेश्वरे तुसां ताई बड़ी बड़ी कीमत चुकाईयो है, जालू उनी यीशु मसीह जो सूली पर बलिदान किता; इस ताई माणुआं दे गुलाम नी पर परमेश्वरे दे गुलाम बणा। 24 हे मसीह भाईयो, परमेश्वरे जिस माणुऐ जो जिना हलातां च अपणे लोक होणे ताई सदया है, सै उना ही हलातां च अपणी जिन्दगी जिये। 25 कुआरियां दे बारे च मिंजो प्रभुऐ दा कोई हुकम नी मिलया, पर प्रभुऐ अपणी दया ला मिंजो भरोसे दे काबिल ज्ञान दितया, उदी बजा ला मै तुहांजो अपणी सलाह दिन्दा है। 26 क्योंकि इना रोजां च भरोसा करणे बाले लोकां सोगी हर जगा बडियां पेशानिया बालियां गल्लां होआ दियां न, इस ताई मिंजो लग्गा दा है की ऐ खरा है की कुआरे लोक कुआरे ही रेन। 27 अगर तेरी घरे बाली है, तां उसा जो तलाख देणे दी कोशिश मत कर; कने अगर तेरी घरे बाली नी है, तां तू बियाह करणे दी कोशिश मत कर। 28 अगर तू बियाह भी करे, तां कोई पाप नी है; कने अगर कुआरिया दा बियाह होई जा, तमी कोई पाप नी है; पर बियायो लोकां जो इस संसारे च रेंदे होयो दुखां दा सामणा करणा पोणा, कने मै चांदा है की तुसां इना दुखां ला बची रिया। 29 हे मसीह भाईयो, मै तुहांजो ऐ बोलदा है, की इस संसार च साडे बाल जादा बकत नी है, इस ताई तुहाडे बाल घरे बाली है या नी, इस बारे च जादा फिकर मत करा; पर प्रभु दी सेवा करणे दे बारे च सोचदे रिया। 30 कने जडे लोक दुखी न, सै अपणा दुख ना दसन; जडे खुश न, उना दी खुशी लुकी रे, कने जडे खरीदारी करणे बाले न, सै ऐसे होई जान की उना बाल कुछ ना हो। 31 कने जडा कुछ इस संसारे च साडे बाल है, सांझो इना चिंजा जो जादा कीमत नी देणी चाइदी, क्योंकि इस संसारे च जडा कुछ साडे बाल है, सै जल्दी ही खत्म होणेबाला है। 32 इस ताई मै चांदा है, की तुसां संसारिक जिन्दगी दी इच्छां ला अजाद रिया। कुआरा माणु परमेश्वरे दे बारे च सोचदा रेंदा है की सै कियां प्रभु जो खुश करे। 33 पर बियाया माणु संसारे दियां गल्लां दे बारे च सोचदा रेंदा है, की अपणिया घरे बालिया जो कियां खुश रखे। 34 इस ताई सै दो गल्लां दे बारे च सोचदा रेंदा, इक तां

अपणी घरे बालिया जो खुश करणा कने दुज्जा प्रभु जो खुश करणा। बियाइयो कने नी बियाइयो च भी फरक है; कुआरी प्रभु दी सेवा दे बारे च सोचदी रेंदी, ताकि सै कियां शरीर कने आत्मा ला परमेश्वरे जो खुश करी सकें; पर बियाइयो जनानी संसारे दियां चीजां दे बारे च सोचदी रेंदी, की सै अपने घरे बाले जो कियां खुश करी सकें। 35 मैं ऐ गल्लां तुहाडिया भलाईया ताई बोला दा है, ना कि तुसां जो बियाह करणे ला रोकणे ताई। पर इस ताई की तुसां ढंगे ला जिन्दगी जी सकन; ताकि तुसां इक मन होईकरी परमेश्वरे दी सेवा च लगी रेन। 36 कने अगर कुसी पिता जो ऐ लग्गे की सै अपणिया कुआरिया कुडिया दा बियाह बड़ा बादे च करणे ला उसा सोगी अन्याय करा दा है, क्योंकि उसा दी उमर जादा होआ दी है, तां उस पिता जो सैई करणा चाईदा जड़ा उसयो खरा लग्गे। तां सै पिता अपणिया कुडिया दा बियाह करी सकदा है, इदे च कोई पाप नी है। 37 अगर सै अपने मने च पक्का करी ले की, उदिया कुडिया ताई कुआरा रेणा ही खरा है, कने ऐसा करणे ताई उस पर कुसी दा दबाब न होऐ, तालू जड़ा फेसला उनी लिया है, तां उस पिता बाल ऐसा करणे दा पूरा हक है। कने अगर उनी अपणिया कुडिया जो कुआरा रखणे दा फेसला करी लिया है, तां सै परमेश्वरे दिया नजरा च खरा करदा है। 38 इस ताई जड़ा अपणिया कुवारिया कुडिया दा बियाह करी दिन्दा है, तां सै खरा करदा है, कने जड़ा उसा दा बियाह नी करदा है, सै होर भी जादा खरा करदा है। 39 जालू दिकर कुसी जनानिया दा घरेबाला जिन्दा है, तालू दीकर उसा उस सोगी बियाह दा रिशता निभाणा पोंणा, पर जालू उसा दा घरेबाला मरी जाए, तां सै अजाद है, कने जिसला बियाह करणा चांहदी उसला करी सकदी है, पर उस सोगी ही जड़ा मसीह पर भरोसा करदा है। 40 पर मेरे बिचार ला, अगर सै दुबारा बियाह ना करे, तां उना होर भी जादा खुश रेणा, कने मैं समझदा है, की जालू मैं इयुदियां गल्लां बोलदा है, तां परमेश्वरे दी आत्मा मिंजो जरिये बोलदी है।

8 तुसां दी चिठिया च तुसां मिंजो ला मूर्तियां दे सामणे बलि कितियां चीजां दे बारे च पूछया था। हां, असां इना गल्लां दे बारे च कुछ ना कुछ जाणदे न। पर जालू ऐई ज्ञान लोकां जो घमंड करणे बाला बणाई दिन्दा है, तां प्यार च अग्गे बढ़णे च असां इक दुज्जे दी सहायता करी सकदे न। 2 अगर कोई माणु ऐ समझे की, सै बड़ा बुद्धिमान है, तां सै असल च हल्ले दीकर सियुदा जाणी नी सकया है, जदिया जाणना उस ताई जरूरी है। 3 पर अगर कोई परमेश्वरे ला प्यार रखदा है, तां उसयो

परमेश्वर जाणदा है। 4 हुण खांणे दे बारे च तुहांजो जबाब देणा चांदा है। मूर्तियां दे सामणे बलि दीतिया चिजां दे बारे च असां जाणदे न, की इस संसारे च कुथी भी मूर्तियां च परमेश्वर नी है, कने सिर्फ इक ही सच्चा परमेश्वर है। 5 पर स्वर्गे कने धरतिया पर मतियां चीजां जो, जिना जो लोक ईश्वर कने प्रभु बोलदे न। पर साड़ा तां इक ही परमेश्वर है: कने सै साड़ा पिता है; कने उनी ही सारियां चीजां बणाईयां न, कने असां उदे जरिये ही जिन्दे न, तियां ही साड़ा इक ही प्रभु है, कने सै यीशु मसीह है। उदे जरिये सारियां चिजां बणाईयां गियां थियां, कने उदे जरिये असां जिन्दे न। 7 पर साड़े भरोसा करणे बाले लोकां जो हल्ले दीकर ऐ नी पता की मूर्तियां बाल कोई शक्ति नी है। क्योंकि सै पेहले मूर्तियां दी पूजा करदे थे, कने हुण जालू सै मूर्तियां जो चढाया खाणा खांदे न, तां सै गलत सोचदे न की सै हल्ले भी मूर्तियां दिया पूजा च करदे न। कने सै ऐ सोची करी दुखी होंदे न की अगर सै मूर्तियां पर चढाया खाणा खांदे न, तां सै पाप करदे न। 8 पर खांणा खांणे ला असां परमेश्वरे दे नेडे नी होंदे। कने खांणे जो खांणे तांई मना करणे ला असां परमेश्वरे जो घट खुश नी करदे न, कने खांणा खाणा सांझो परमेश्वरे दिया नजरा च कुछ खास नी बणांदा। 9 पर ध्यान रखा की, ऐसा ना हो की, तुहाड़ी ऐ अजादी कुथी घट भरोसे बाले लोकां तांई उदे पाप करणे दी बजा ना बणी जाए। 10 तुसां जाणदे न की असल परमेश्वर नी न, इस तांई तुसां मूर्तियां दे मंदरे च खांणा खाई सकदे न। पर जडा कोई भरोसे च कमजोर है, सै तुसां जो ओथु खांणा खांदे दिखदा कने मूर्तियां पर बलि कितियां चीजां जो खांणे तांई हिम्मत करे, पर ऐ सोचे की ऐसा करणा पाप है। 11 इस तांई तू जिना गल्लां जो जाणदा है, उसा बजा ला जडा मसीह भाई भरोसे च कमजोर है उनी माणुऐ मसीह पर भरोसा करणा छडी देणा, जिस तांई यीशु मसीहे अपणी जान दिती। 12 कने अगर साड़े इस कम्मे जो करणे दिया बजा ला साड़े साथी मसीही भाई अपने आप जो पापी महसूस करदे न, तां असां उना दे खिलाफ कने यीशु मसीह दे खिलाफ पाप करदे न। 13 इस तांई अगर मूर्तियां दे सामणे बलि चढाया खाणा खांणे दिया बजा ला कुसी भरोसा करणे बाले भाई या बेहणा दा भरोसा कमजोर होई जांदा है, तां मै कदी भी ऐसा खाणा नी खाणा जिसदी बजा ला उस माणु दा भरोसा कमजोर होई जाए। (aiōn g165)

9 जडा कुछ मिंजो खरा लगदा है, सै खाणे तांई मै अजाद है। मै प्रेरित है। मै प्रभु यीशु मसीह जो दिखया है। प्रभुऐ जडी सेबा मिंजो करणे तांई दितियो है तुसां

उस सेबा दा नतीजा न। 2 भले ही लोक ऐ नी मंदे की मैं प्रभु यीशु दा प्रेरित है, पर तुहांजो ऐ गल्ल मनणा चाइदी। क्योंकि मैं ही तुसां बाल सारयां ला पेहले शुभसमाचार लेईकरी आया था, तुसां दा भरोसा जड़ा यीशु मसीह पर है, सै इसा गल्ला दा सबूत है की मैं सच्ची तुसां ताई परमेश्वरे दा चुणया चेला है। 3 जड़े लोक मेरे प्रेरित होणे पर सबाल करदे न उना ताई मेरा ऐई जबाब है। 4 मेरा कने बरनबास दा पूरा हक है की, असां तुसां लोकां ला पैसे कने खाणे ताई सहायता लेई सकदे न। 5 जियां पतरस कने होर चेले कने प्रभु दे भाई जालू सेबा करणे ताई अपणी घरे बालियां सोगी जांदे न, तियां ही मेरे बाल भी हक है की मैं ऐसा करें। 6 मिंजो कने बरनबास जो भी होर प्रेरितां सांई आर्थिक सहायता लेणे दा हक है, कने अपणियां जुस्तरतां जो पूरा करणे ताई कम्म करणे दी जस्तरत नी है। 7 कोई भी माणु अपने खर्चे पर सिपाई दा कम्म नी करदा। इक माणु जड़ा अंगूरा दा बाग लांदा है सै भी उदा फल खाणे दी उम्मीद रखदा। भेडां दी रखबाली करणे बाला भी उना दा दूध पिणे दी उम्मीद रखदा। 8 मैं ऐ सारियां गल्लां माणुआं दिया सोचा दे मुताबिक नी बोलदा है। 9 मूसा दी व्यवस्था भी ऐई बोलदी है। क्योंकि मूसा दिया व्यवस्था च लिखया है, “गांण गांदे बकते दांदे दा मु मत बनदे।” क्या तुहांजो लगदा है की परमेश्वरे जो दांदा दी ही चिंता है? नी बिलकुल भी नही! 10 परमेश्वरे ऐ खासकर सांझो ताई ही बोलया है। कने ऐ सांझे ताई ही लिखया है, क्योंकि हल बांणे बाला आस रखीकरी ही खतरां जो बांदा है, कने गांणे बाला फसल मिलणे दी आस रखीकरी ही फसल गांदा है। 11 असां तुहाड़े बिच आत्मिक बी राया है, इस ताई ऐ उम्मीद करणा बड़ी बड़ी गल्ल नी है, की तुसां सांझे खर्चे ताई पैसे देन। 12 अगर तुसां दुज्जे लोकां दी सहायता किती है जिना तुसां बाल आई करी प्रचार किता, तां बरनबास कने मेरा जादा हक बणदा है की तुसां सांझियां जुस्तरतां जो पूरा करा। क्योंकि असां सारयां ला पेहले तुहांजो शुभसमाचार सुणाया, पर असां इसा गल्ला ताई तुसां पर भोजन नी पाया। इदे बजाऐ असां सब कुछ सेहन करणे ताई तैयार थे, ताकि सांझे मसीह दे बारे च शुभसमाचार पर भरोसा करणे ला कुसी जो भी परेशानी ना होऐ। 13 तुसां जाणदे न की, जड़े लोक मंदरा च सेबा करदे न, उना जो उना दा खांणा मंदरा ला ही मिलदा है, कने जड़े वेदी पर बलि चढांदे न, उना जो उस बलि दे चढाबे चे ही हिस्सा मिलदा है। 14 इस ताई प्रभुऐ हुकम दितया है की शुभसमाचार सुणाणे बालयां दी रोजी रोटी उना लोकां ला मिलणी चाईदी जड़े

शुभसमाचार सुणदे न। 15 पर इना हकां चे मैं कदी कुसी दा भी इस्तेमाल नी किता। कने ऐ गल्लां मैं इस ताई नी लिखियां की, हुण तुसां मेरे ताई ऐसा करा। नी बिलकुल भी नी! मेरे ताई मरणा ठीक है, इदे बजाऐ की मैं तुसां ला सहायता मंगे, अगर मैं तुसां ला मुजदूरी लेई तां फिरी मैं इसा गल्ला पर घमंड नी करी सकदा, की मैं बिना कुछ लियो तुसां ताई कम्म किता। 16 इस ताई अगर मैं शुभसमाचार सुणा, तां इदे च घमंड करणे बाली कोई गल्ल नी है; क्योंकि प्रभु यीशुऐ मिंजो ऐ कम्म करणे दा हुकम दितया है, अगर ऐ कम्म मैं नी करे तां मिंजो बड़ा दुख होणा। 17 क्योंकि अगर मैं अपणिया इच्छा ला ऐ कम्म करदा है, तां मिंजो मजदूरी मिलणी। कने अगर ऐ कम्म बिना इच्छा ला करदा है, तां ऐ सिर्फ परमेश्वरे दी दितियो जिम्मेबारियां जो पूरा करदा है, तां मैं कोई भी मजदूरी दी उम्मीद नी करी सकदा। 18 तां क्या है मेरी मजदूरी? मेरी मजदूरी ऐई है की मैं बिना मजदूरी लियो मुफ्त च शुभसमाचार दा प्रचार करे। होर कुछ नी मिंजो इदे च ही खुशी है की मैं मुफ्त च ही शुभसमाचार दा प्रचार करे, हालांकि मिंजो बाल पूरा हक है की मैं अपणी मजदूरी इना ला मंगी सके। 19 इदा मतलब ऐ है की मैं लोकां दियां गल्लां जो मनणे ताई मजबूर नी है, सिर्फ इस ताई की सै मेरी सहायता करदे न, फिरी भी मैं सारयां दा सेबक बणया, ताकि मैं उना जो मसीह च लेई ओऐ। 20 जालू मैं यहदी लोकां सोगी था, तां मैं उना सांई जिन्दगी जिन्दा था ताकि मैं उना जो मसीह च लेई ओऐ; जालू मैं यहदी व्यवस्था जो मनणे बालयां सोगी रेंदा था, तां मैं अपु भी उस व्यवस्था दे अधीन रेंदा था, हल्ले की मिंजो उस व्यवस्था जो मनणे दी जरूरत नी है, पर मैं सै इस ताई मनदा है ताकि मैं व्यवस्था दे अधीन रेणे बालयां जो मसीह च लेई ओऐ। 21 ठीक तियां ही होर जातियां सोगी था, तां उना सांई जिन्दगी जी, ताकि उना जो भी मसीह च लेई ओऐ, पर मैं जाणदा की मैं परमेश्वरे दी व्यवस्था दे बगैर नी जिन्दा था, क्योंकि मैं, मसीह दी व्यवस्था दे अधीन ही है। 22 जालू मैं उना लोकां सोगी होंदा है, जिना दा भरोसा कमजोर है, तां मैं उना सांई व्यवहार करदा है, ताकि मैं उना जो मसीह दे पिच्छे चलणे च सहायता करी सकें, मैं हर इक माणुऐ ताई कुछ न कुछ बणया है ताकि कुसी न कुसी तरीके ला कुछ लोकां दा उद्धार होई सके। 23 कने मैं सारा कुछ मसीह दे बारे च शुभसमाचार जो सुणाणे ताई करदा है, ताकि मिंजो शुभसमाचार दी आशीषां च हिस्सा मिली जाए। 24 तुसां जाणदे न की, दौड़ा च तां सारे दौड़दे न पर इनाम इकी जो ही मिलदा है। तुसां इयां

दौड़ा की इनाम तुहांजो मिल्ले। इयां ही सांझो सै सब कुछ करणा चाईदा जिदे ला असां परमेश्वरे जो खुश करी सकन। ताकि सांझो सै इनाम मिली सके जड़ा परमेश्वरे ओणे बाले बकत च सांझो देणा। 25 कने जड़े लोक दौड़ा च हिस्सा लेणा चांदे न, सै पेहले इदी तैयारी करदे न, अपणी इच्छां पर काबू रखदे न, सै ऐसा इस ताई करदे न ताकि जिती सकन कने इज्जत मिल्ले। उना दी इज्जत करणे ताई पत्तयां दी बणियो माला दिन्दे न, जड़ी जल्दी सुकी जांदी है। पर असां जड़े यीशु मसीह पर भरोसा करदे न, साड़ी इज्जत होणी है जड़ी, कने सांझो ऐसी आशीष मिलणी है, जड़ी युगां-युगां ताई बणी रेणी है। इस ताई सांझो होर भी जादा सबर रखणा चाईदा। 26 इस ताई मैं अपणी मसीह जिन्दगी जो इक पक्के मकसद सोगी जी दा है, जियां इक कुशती लड़ने बाला पलबाण लड़दा है कने सै होआ च मुक्के नी मारदा है। 27 मैं अपने शरीर जो काबू च रखदा है, ताकि मैं शरीर दियां इच्छां पर काबू करी सकें; इयां ना हो की मैं होरां जो शुभसमाचार दा प्रचार करें, मिंजो अपु जो ही इनाम नी मिल्ले।

10 हे मसीह भाईयो, मैं चांदा है, की तुसां इसा गल्लां जो याद रखा की बड़े पेहले साड़े बाप दादयां सोगी जंगला च क्या होया था। परमेश्वरे इक बदल भेजी करी अगुवाई किती, जड़ा उना दे अगे-अगे चलदा था। कने उना जो लाल समुंद्र ला निकाली करी सुक्की धरतिया पर लेई आया। 2 जियां असां प्रभु यीशु दे चेले बणने ताई बपतिस्मा लेंदे न, तियां ही सै भी सारे बदला दिया छांआ च थे कने मूसा दे चेले बणने ताई लाल सागरे चे गे। 3 कने सारयां सेई रोटी खादी, जड़ी परमेश्वरे उना जो स्वर्गे ला दिती। 4 कने उना सबना सेई पाणी पीता जड़ा परमेश्वरे उना जो दिता था, उना इक चट्टान ला निकलने बाले पाणिऐ जो पीता, कने उस चट्टाना दी तुलना मसीह सोगी करी सकदे न जिना उना सोगी रेईकरी उना जो जिन्दगी दिती। 5 पर परमेश्वर उना चे मतयां ला खुश नी था, इस ताई तां सै सुनसान जगा च मरी गे। 6 ऐ सारियां गल्लां साड़े बाप दादयां ने इस ताई होईयां ताकि सांझो चिताबनी मिल्ले की अगर असां भी इना सांई बुराई करणे दी इच्छा करगे, तां जड़ा उना सोगी होया सै साड़े सोगी भी होई सकदा है। 7 कने तुसां मूर्तियां दी पूजा मत करा, जियां उना चे मते लोकां किता था, ऐ ठीक तियां है जियां पबित्र शास्त्र च लिखया है, “लोक धामा च खांणा पीणा बैठे, कने रंगरलियां मनाणे ताई उठे।” 8 कने शर्मिदा होणेबाला कम्म कोई मत करा; जड़ा साड़े बाप दादयां चे केईयां किता;

कने इक ही रोजे तरेई हजार लोक मरी गे। 9 कने प्रभु जो मत परखा; जियां उना चे मते लोकां किता, कने जहरीले सपां सै डस्से कने सै मरी गे। 10 बुडबुडा मत जियां उना चे मते लोकां किता, कने परमेश्वरे इक स्वर्गदूते जो भेजी करी सै मारी दिते। 11 पर ऐ सारियां गल्लां, जडियां साडे बाप दादयां सोगी हुईयां, सै इस ताई हुईयां ताकि ऐ सारे लोकां ताई उदाहरण बणे, कने ऐ गल्लां सांझो चेताबनी देंगे ताई लिखियां न, जडे इस संसारे च इना आखरी दिना च रे दे न। (aiōn g165) 12 इस ताई अगर ऐथू कोई ऐसा माणु है जडा बोलदा है की, परमेश्वरे पर उदा भरोसा मजबूत है, तां सै ध्यान रखे की, कुथी ऐसा ना हो की सै अचानक भरोसे ला भटकी जा कने पाप करी ले। 13 पाप करणे दियां इच्छां साडे बाल जस्स ओदियां न, पर परमेश्वर भरोसे दे लायक है; क्योंकि सै तुसां जो कदी एसियां परखा च नी पोणा दिन्दा, जिसदा तुसां सामणा नी करी सकदे, पर इदे बजाए उनी तुसां जो शक्ति देणी, जिसदी तुसां जो जरूरत है, ताकि तुसां पापां ला बची सकन। 14 इस ताई, हे मेरे प्यारे भाईयो, मूर्तियां दियां पूजा करणे ला बची रिया। 15 मैं तुहांजो समझदार समझीकरी गल्लां बोला दा है, इस ताई इना गल्लां पर ध्याने ला सोच बिचार करा जडियां मैं हुण बोलणा लगया की सै सही न या गलत न। 16 जालू असां प्रभु भोज च इस्तेमाल होंगे बाले कटोरे ला अंगूरा दा रस्स पिंदे न, कने जिस ताई असां परमेश्वरे दा धन्यवाद करदे न, तालू असां सच्ची मसीह दे खूने जो साझा करदे न। कने जालू असां रोटी तोडदे न कने खांदे न, तां असां सच्चे मसीह दे शरीर जो साझा करदे न। 17 इस ताई की, इक ही रोटी है जडी की मसीह है, भले ही असां केई न, असां इक शरीर बणी जांदे न; क्योंकि असां सारे उसा इकी रोटिया चे खांदे न। 18 इस्राएल देशे दे लोकां दे बारे च सोचा, जालू सै परमेश्वरे जो चढाणे बाले खाणे जो खांदे न, तां परमेश्वरे दी पूजा च हिस्सा लेंदे न, इयां ही जडे लोक मूर्तियां जो चढाणे बाले खाणे जो खांदे न, सै भी उना मूर्तियां दिया पूजा च हिस्सा लेंदे न। 19 मेरे बोलणे दा मतलब ऐ नी की मूर्ति या मुर्तियां सामणे चढाईयां बलियां दी कोई कीमत है। 20 पर मैं ऐ बोला दा है की, जडे लोक उना मूर्तियां ताई चीजां दियां बलियां चढांदे न, सै परमेश्वरे ताई नी पर बुरियां आत्मा ताई चढांदे न, मैं ऐ नी चांदा की तुसां बुरियां आत्मा दे हिस्सेदार बणा। 21 ऐ होई नी सकदा की तुसां प्रभु दे कटोरे चे पीया कने बुरियां आत्मा दे कटोरे चे भी पीया; इयां ही ऐ भी नी होई सकदा की तुसां प्रभु दी मेज च हिस्सेदार होआ कने बुरियां आत्मा दे मेज च

भी। 22 अगर असां ऐसा करदे न तां असां प्रभु दे गुस्से जो भड़कांदे न। याद रखा असां परमेश्वरे ला जादा शक्तिमान नी न। 23 तुसां बोलदे न की, साडे बाल सारियां चीजां करणे दी अजादी है, हां पर सारियां चीजां साडे फायदे तांई नी न। असां सब कुछ करणे तांई अजाद, पर सारियां चीजां परमेश्वरे पर भरोसे जो नी बदादियां। 24 तुसां चे हर कुसी जो अपने बारे च ही नी सोचणा चाईदा, पर दुज्जे दिया भलाईया तांई भी सोचणा चाईदा। 25 पर जालू तुसां बजारां च मास खरीददे न, तां उसयो खरीदी करी खाई लिया, ऐ मत पुच्छा की ऐ मूर्तियां सामणे बलि कितया था की नी, तां तुसां दिया अंतरात्मा परेशान नी होणा। 26 तुसां इसयो खाई सकदे न, क्योंकि पबित्र शास्त्र च लिखया है की, “धरती कने जड़ा कुछ उसा च है; सै सब कुछ प्रभु दा है।” 27 कने अगर कोई भरोसा नी करणे बालयां चे तुहांजो खांणे तांई सदे, कने तुसां जाणा चान, तां जड़ा कुछ तुहाडे सामणे खाणे तांई रखगे तां उना ला ऐ मत पुछदे की ऐ खाणा बलि कितया है की नी, ताकि अगर सै बलि कितया होंगा, तां उस खांणे दिया बजा ला तुसां दिया अंतरात्मा तुहांजो दोषी नी बणाणा। 28 पर अगर कोई तुसां जो बोले, “ऐ तां मूर्तियां जो चढाया खांणा था,” तां तुसां उस खांणे जो मत खांदे, अपणी अंतरात्मा दिया बजा ला नी, पर उदिया अंतरात्मा दिया बजा ला जिनी तुहांजो ऐ गल्ल दस्सी थी। क्योंकि मेरी अपणी खाणे दी अजादी जो कुसी होरसी माणुऐ दिया अंतरात्मा जरिये न्याय नी कितया जाणा चाईदा। 30 अगर मैं धन्यवाद करिरी मूर्तियां सामणे बलि कितियां चीजां खाई लेंदा है, तां उस तांई मिंजो पर कजो दोष लगांदे न, जिस खांणे तांई मैं परमेश्वरे दा धन्यवाद किता? 31 कने इदा जबाब ऐ है, चाऐ तुसां खा, या पिया, चाहे जड़ा कुछ करा, पर सारा कुछ परमेश्वरे दिया महिमा तांई करा। 32 मैं जड़ा कुछ भी करदा है, उदे च मैं सारयां जो खुश करणे दी कोशिश करदा है; मैं अपणी भलाई नी सोचदा पर सारयां दी भलाई सोचदा है ताकि सारे बची सकन। इस तांई तुसां भी इस तरीके ला जिया की तुसां यहदी लोकां तांई, या होर जाति दे लोकां तांई, या परमेश्वरे दिया कलीसिया दे लोका तांई कोई परेशानी खडी ना होऐ, जिसा बजा ला सै मसीह पर भरोसा करणा छडी देन।

11 जियां मैं मसीह सांई जिन्दगी जिंदा है, तियां ही तुसां भी मेरे सांई जिन्दगी जिया। 2 हे मसीह भाईयो, मैं तुहाडी तारीफ करदा है, क्योंकि तुसां मिंजो सारियां गल्लां च याद करदे न, कने जडियां शिक्षा मैं तुसां जो दीतियां न, उना दा ध्याने ला

पालन करा दे न। 3 पर इक गल्ल है जड़ी मैं चांदा है की तुसां ऐ जाणी लिया की, हर इक मर्दे दा मुंड मसीह है, कने इक घरे बालिये दा मुंड उदा घरेबाला है, कने मसीह दा मुंड परमेश्वर है। 4 इस ताई अगर कोई मर्द कलीसिया च प्राथना करदे बकत या परमेश्वरे दा संदेश सुणादे बकत अपना सिर ढकदा है, तां सै मसीह दा अनादर करदा है जड़ा उदा सिर है। 5 पर जड़ी जनानी कलीसिया च बिना सिर ढक्यो प्राथना या परमेश्वरे दा बचन सुणा दी है, इदा मतलब ऐ है की सै अपने घरे बाले दा अनादर करदी है जड़ा उसा दा सिर है। सै उसा जनानिया सांई है जिसा जो शर्मिदा करणे ताई उसा दा मुंडन करी दिन्दे न। 6 अगर सै जनानी मुंड नी ढकणा चांहदी, तां सै अपने बाल कटाई दे; पर अगर जनानिया ताई बाल कटवाणा सरमा दी गल्ल है, तां सै प्राथना या भविष्यवाणी करदे बकत सिर ढकी ले। 7 मरदे ताई अपना सिर ढकणा खरा नी है, क्योंकि मर्द परमेश्वरे दी महिमा है, जिसयो परमेश्वरे अपने रूपे च बणाया है; पर जनानियां मर्दा दिया महिमा जो जाहिर करदियां न। 8 क्योंकि पेहला मर्द जनानिया ला नी आया था, पर पैली जनानी मरदे ला आईयो थी। 9 परमेश्वरे पेहले मरदे जो जनानिया दिया सहायता ताई नी बणाया, पर जनानिया जो मरदे ताई बणाया। 10 इसा बजा ला कने स्वर्गदूतां दिया बजा ला भी, इक जनानिया जो अपने सिरे जो ढकणा चाईदा, अपने अधिकारे दे चिन्न दे रूपे च। 11 तमी अगर असां भरोसा करणे बाले लोकां दी गल्ल करदे न, तां ना जनानियां मरदा ला अजाद न, कने ना ही मरद जनानिया ला अजाद न। 12 हालांकि परमेश्वरे पैली जनानी मरदे ला बणाई, पर हुण जनानियां ही मर्दा जो जमदियां न; कने सै दोनों परमेश्वरे दिया तरफा ला न जिनी सारयां जो बणाया है। 13 मैं चांदा है की तुसां अपु ही फेसला करा, की क्या इक जनानिया जो उघडे सिरे सभा च परमेश्वरे दी प्राथना करणा सही है? 14 कुदरती तुसां ऐ जाणदे नी, की अगर कोई मर्द लम्बे बाल रखे, तां उदे ताई ऐ सरमा दी गल्ल है। 15 अगर जनानी लम्बे बाल रखे तां उदे ताई शोभा है, कने उना जो अराधना च सिर ढकणा चाईदा। 16 पर अगर कुसी जो लग्गा दा है मैं गलत बोला दा है, तां तुसां ऐ जाणी लिया की साड़ी कलीसिया कने परमेश्वरे दियां कलीसियां दे ऐई रिबाज न। 17 जिना गल्लां दे बारे च हुण मैं तुहांजो बोलणा लगया, उना दी मैं तारीफ नी करी सकदा है, क्योंकि कलीसिया च तुहाडे गिठे होणे ला तुहाड़ी भलाई नी पर बुराई ही होई है। 18 क्योंकि सारयां ला पैली गल्ल तां ऐ है, मैं ऐ

सुणया है, की जालू तुसां कलीसिया च अराधना ताई गिठे होंदे न, तां तुसां बिच अपु चे बणदी नी, कने मिंजो भरोसा है की उना दियां गल्लां च कुछ सच्चाई है। 19 तुसां जो क्या लगदा, की तुसां बिच जालू बटबारा होणा, तालू ही पता लगणा है की कुण परमेश्वरे दे चुणयो लोक न? नी ऐसा बिलकुल नी है। 20 जालू तुसां इक जगा च गिठे होंदे न, तां तुहांजो इसा गल्ला दी चिंता नी है, कि प्रभु यीशु मसीह दी मौत जो याद करणे ताई प्रभु भोज कियां खाणा चाईदा। 21 क्योंकि मिंजो पता लगया की तुसां चे केई लोक दुज्जयां सोगी बंडणे ला पेहले अपणा खाणा खाई लेंदे न, जिसा बजा ला कुछ लोक भूखे ही चली जांदे न, कने केई शराबी होई जांदे न। 22 तुसां अपने घरां च खाई पी सकदे न! तुसां परमेश्वरे दिया कलीसिया दा निरादर कने गरीबां दी बेईजती करदे न। क्या मैं इस कम्मे ताई तुहाड़ी तारीफ करां? मैं ऐसा करणे ताई तुहाड़ी तारीफ नी करणी। 23 जड़ी शिक्षा मैं तुहांजो दितियो थी, सेई शिक्षा है जड़ी मिंजो प्रभु ला मिलियो है, की प्रभु यीशु मसीह जिस राती पकड़बाया गया, तां उनी रोटी लेई, 24 कने परमेश्वरे दा धन्याबाद करिरी तोड़ी, कने बोलया, “ऐ मेरा शरीर है, जड़ा तुहाड़े उद्धार ताई बलिदान कितया जाणा, कने मिंजो याद करणे ताई इयां ही करदे रिया।” 25 कने जालू सै रोटी खाई बैठे तां यीशुएं अंगूरा दे रस्से ला भस्या कटोरा लिया, कने बोलया, “ऐ कटोरा मेरे खूने च नोई बाचा है, जालू कदी तुसां इसयो पीगे, तां मेरी याद ताई इयां ही करदे रिया।” 26 क्योंकि जालू भी तुसां इसा रोटिया चे खांगे, कने इस कटोरे चे अंगूरा दा रस पिगे, तां जालू दीकर प्रभु मुड़ी नी ओऐ तां उदिया मौता दा प्रचार करदे रिया। 27 इस ताई जड़ा कोई इस तरीके ला जड़ा मसीह दा निरादर करदा है प्रभु दी रोटी खा, या उस कटोरे चे पिऐ, तां सै प्रभु दे शरीर कने खूने दे खिलाफ पाप करदा है। 28 इस ताई हर इक माणु इसा रोटिया जो खाने कने इस कटोरे चे अंगूरा दा रस पिणे ला पेहले अपने आपे जो जांजी परखी ले की उदे अपने बिचार सही न। 29 क्योंकि जड़ा कोई रोटी जो खांगे कने कटोरे च पिंदे बेले प्रभु दे शरीर दी इज्जत ना करे, तां सै इस तरीके ला खाई पी करी अपने उपर सजा लेई ओंदा है। 30 ऐई बजा है की तुसां चे केई बीमार न, कने तुसां लोकां बाल कमजोर शरीर भी है कने केई लोक मरी भी गियो न, क्योंकि ऐ परमेश्वरे दी सजा है। 31 इस ताई अगर असां पेहले अपने आपे जो परखी लेंदे न, तां परमेश्वरे सांझो सजा नी देणी। 32 पर अगर परमेश्वर इस तरीके ला सांझो सजा दिन्दा है, तां सै सिर्फ सांझो सुधारदा है,

ताकि सांझो न्याय बाले दिने संसारे दे लोकां सोगी सजा ना मिल्ले। 33 इस ताई, हे मेरे मसीह भाईयो, जालू तुसां प्रभु भोज खाणे ताई गिठे होंदे न, तां इक दुज्जे ताई स्का करा ताकि सोगी रोटी खाई सकन। 34 अगर कोई भूखा हो, तां अपने घरे खाई ले ताकि जालू तुसां गिठे होंदे न तां सही ढंगे ला व्यवहार करी सकन, ताकि परमेश्वर तुहांजो सजा ना दे, कने बाकि गल्लां दे बारे च जड़ियां तुसां लिखियां थियां, सै मैं ओथु आई करी समझाई दिंगा।

12 हे मसीह भाईयो, तुसां मिंजो ला पबित्र आत्मा दे बरदाना दे बारे च पूछया था, मैं चांदा की तुसां इना बरदाना दे बारे च अच्छे ला जाणी लिया। 2 तुसां जाणदे न, की परमेश्वरे पर भरोसा करणे ला पेहले कियां जिन्दगी जिन्दे थे। तुसां भटकाई दितयो थे की तुसां बेजान मूर्तियां दी पूजा करन। 3 इस ताई मैं चांदा है तुसां इसा गल्ला जो जाणी लिया की परमेश्वरे दी दितियो पबित्र आत्मा दे जरिये कोई भी माणु ऐसा नी बोलदा की यीशु श्रापित है, कने पबित्र आत्मा दे जरिये ही सै बोली सकदा है की “यीशु ही प्रभु है।” 4 कने हुण केई किस्मा दे बरदान न, पर इना जो सारे बरदाना जो देणेबाला सिर्फ इक ही है, कने सै पबित्र आत्मा है। 5 कने लग-लग तरीके ला असां प्रभु दी सेवा करी सकदे, पर असां सारे इक ही प्रभु दी सेवा करदे न। 6 कने परमेश्वर भी केई तरीके ला साड़िया जिन्दगिया च कम्म करदा है, पर ऐ सेई परमेश्वर है जडा असां सारयां दे जरिये कम्म करदा है। 7 परमेश्वरे सांझो सारयां जो इक दुज्जे विश्वासी भाई बेहणा दी सहायता ताई ऐसा बरदान दितया है, जडा पबित्र आत्मा दी हाजरी जो प्रकट करदा है। 8 क्योंकि पबित्र आत्मा कुसी इकी माणुए जो अकली दियां गल्लां बोलणे दा बरदान दिन्दी, कने होर कुसी माणुए जो ज्ञान दियां गल्लां बोलणे दा बरदान दिन्दी है। 9 कने कुसी माणुए जो मसीह पर बडा जादा भरोसा करणे दा बरदान दिन्दा, कने कुसी जो ऐई पबित्र आत्मा दुज्जे माणुआं जो ठीक करणे दा बरदान दिन्दी है। 10 पबित्र आत्मा कुसी जो चमत्कार करणे दी शक्ति दिन्दी; कने कुसी जो परमेश्वरे दा संदेश देणे दा बरदान दिन्दी, कने कुसी जो ऐ परखणे दी समझ दिन्दी की पबित्र आत्मा दिया तरफा ला कने बुरियां आत्मा दिया तरफा ला मिलणे बाले बरदाना च क्या फर्क है। कने कुसी जो लग-लग भाषा बोलणे दा बरदान दिन्दी, जडी उना कदी नी सिखियो हो; कुसी जो इना भाषा दा मतलब दसणे दा बरदान दिन्दी। 11 पर ऐ सारे बरदान इक ही पबित्र आत्मा दे कम्म न, सै सारे मसीह पर भरोसा करणे बालयां जो बरदान

दिन्दा है जदिया पबित्र आत्मा चांदा है। 12 क्योंकि जियां माणुऐ दा शरीर तां इक है पर उदे अंग मते न, कने मते सारे अंग मिली करी इक शरीर बणादे न, इयां ही मसीह भी कने उस पर भरोसा करणे बाले भी इक न। 13 क्योंकि असां सारयां जडे यहदी न, या होर जाति न, या गुलाम न, या अजाद न, इक ही पबित्र आत्मा जरिये इक शरीर होणे तांई बपतिस्मा लिया, कने सांझो सारयां जो इक ही आत्मा मिलीईयो, जियां असां सारयां इक ही कटोरे चे पिंदे न। 14 साडे शरीर च इक ही अंग नी है, पर मते सारे अंग न। 15 सोचा, अगर पैर बोले की, “मै हथ नी है, इस तांई मै शरीर दा अंग नी है,” तां क्या उदे ऐसा बोलणे दिया बजा ला सै शरीर दा अंग नी है? 16 कने अगर कन बोले, “मै हख नी है, इस तांई मै शरीर दा अंग नी है,” तां क्या सै कन्ना दा ऐसा बोलणे दिया बजा ला सै शरीर दा अंग नी है? 17 अगर सारा शरीर हख ही होंदी तां सुणना कुथु ला था? अगर सारा शरीर कन ही होंदा तां सिंघणा कुथु ला था? 18 पर परमेश्वरे अपणी इच्छा अनुसार शरीर दे सारे अंगा जो इक-इक करिरी ठीक जगा च रखया है। 19 अगर सारे इक ही अंग होंदे, तां कोई शरीर नी होणा। 20 इस तांई, भले ही शरीर दे मते अंग होंदे न, पर शरीर इक ही है। 21 हखी हथां ला नी बोली सकदियां की, मिंजो तेरी जरूरत नी है, कने ना सिर पैरां जो बोली सकदा है की, “मिंजो तेरी जरूरत नी है।” 22 पर शरीर दे सै अंग जिना जो असां कमजोर समझदे न, सै बडे जरूरी न। 23 कने शरीर दे जिना अंगा जो असां आदर दे काबिल नी समझदे न उना जो असां बडे ध्याने ला ढकी करी रखदे न। इस तांई उना अंगा दी रक्षा करदे न जिना जो दुज्जयां जो नी दस्सी सकदे, जालू की जादा आदर दे काबिल अंगा जो खास देखभाल दी जरूरत नी होंदी। इस तांई परमेश्वरे शरीर जो इस तरीके ला बणाया है की उना अंगा जो जादा आदर कने देखभाल होऐ जडे घट इज्जत दे काबिल न। 25 परमेश्वरे ऐ इस तांई किता की शरीर दे सारे अंग इक दुज्जे ला मिल्ली करी रेन, कने शरीर दे सारे अंग इक दुज्जे दी देखभाल करन। 26 अगर साडे शरीर दा इक अंग बीमार है, तां उस सोगी शरीर दे सारे अंग दुखी होंदे न, कने इयां ही साडे शरीर दे इक अंगे दी अच्छे ला देखभाल होंदी है, तां पूरा शरीर खुश है। 27 इयां ही तुसां भी सारे मिली करी मसीह दे शरीर न, कने तुसां सारे उदे शरीर दे अंग न। 28 कने मसीह दे इस शरीर च जड़ी कलीसिया है, परमेश्वरे लग-लग लोकां जो लग-लग कम्म दितया है। पेहले सै लोक जडे उदे प्रेरित न, दुज्जे परमेश्वरे दे संदेश

देणेबाले, तीजे सै लोक न जड़े सिखांदे न। उदे बाद सै लोक न जिना जो उनी चमत्कार करणे दा हक दितया है, कने सै लोक न जिना जो लोकां जो ठीक करणे दा हक दिता, फिरी सै न जिना जो दुज्जयां दी सहायता करणे दी ताकत मिलियो, फिरी सै न जड़े अगुवे न, फिरी सै न जिना जो पबित्र आत्मा जरिये लग-लग भाषा बोलणे दा बरदान मिलया, जडियां उना कदी सिखियां नी थियां। 29 हर कोई प्रेरित नी होंदा। हर कोई परमेश्वरे दा संदेश देणेबाला नी होंदा। कने हर कुसी बाल चमत्कार करणे दा हक नी होंदा। 30 हर कुसी जो लोकां जो ठीक करणे दा बरदान नी मिलया होंदा। कने हर कुसी जो लग-लग भाषा बोलणे दा बरदान नी मिलया होंदा, जडियां उनी कदी भी नी सिखियां होन। 31 हर कुसी जो लग-लग भाषा दा मतलब दसणे दा बरदान नी मिलया, जडियां उनी कदी नी सिखियां। इस तांई पबित्र आत्मा ला बडे ला बडा बरदान पाणे दी इच्छा रखा! पर मै हुण तुसां जो दसणा की इदे ला भी खरा क्या है।

13 अगर मै माणुआं, कने स्वर्गदूतां दी भाषा बोलें, कने मै लोकां सोगी प्यार ना करें, तां मेरा बोलणा ठण-ठण करदी पितल कने छण-छण करदी झांझ सांई है। 2 कने अगर मै परमेश्वरे दा संदेश देई सकें, कने सारे भेदां कने हर तरा दे ज्ञाने जो समझी सकें, कने ऐथू दीकर की मेरा परमेश्वरे पर पूरा भरोसा हो की, मै पहाड़े जो हटाई दें, पर दुज्जे सोगी प्यार नी करें, तां मेरी कोई कीमत नी। 3 कने अगर मै अपणी सारी जमीन जायदाद गरीबां जो बंडी दें, या उना जो अपणा शरीर फुकणे तांई देई दें, कने दुज्जे सोगी प्यार नी करें, तां इदे ला मिंजो कोई फायदा नी। 4 जड़े लोक दुज्जयां सोगी प्यार करदे न, सै सबर रखणेबाले कने दयालु होंदे न, सै लोक जलन नी करदे; कने ना सै अपणी बड़ाई करदे न कने न अपणे बारे च घमंड करदे। 5 सै लोक कुसी सोगी भी बुरा व्यवहार नी करदे, सै अपणी ही खुशी दे बारे च ही नी सोचदे, सै झट गुस्सा नी करदे, कने सै उना बुरियां गल्लां जो याद नी रखदे, जडियां उना दे खिलाफ कितियां होन। 6 जालू लोक बुरे कम्म करदे न तां सै खुश नी होंदे, पर सै तालू खुश होंदे जालू लोक सही कम्म करदे न। 7 सै कदी हार नी मंदे, प्यार सांझो हर तरा दे हालातां च परमेश्वरे पर भरोसा करणा कने आस रखणे दे काबिल बणादां है, ऐ दुख कने पेशानियां च सबर रखणा सिखांदा है। 8 सै बकत ओणा जालू लोकां परमेश्वरे दे संदेश दा प्रचार होर-होर भाषा च नी करणा, कने परमेश्वरे दे बारे च खास ज्ञाने दी जरूरत नी होणी, पर प्यार हमेशा तांई बणी

रेणा। 9 क्योंकि साड़ा खास ज्ञान कने परमेश्वरे दे संदेश दे बारे च प्रचार करणे दी शक्ति, दोनों अधूरियां न। पर जालू उनी ओणा है जड़ा पूरा कने सिद्ध है, तालू जड़ा अधूरा है उदी जस्तरत नी रेणी। 11 ऐ इक माणुऐ दे बड़े होणे सांई। जालू मैं इक बच्चा था, तां मैं बच्चे सांई बोलदा कने सोचदा समझदा था, पर जालू मैं बड़ा होई गया, तां मैं बचपने दे तरीके छडी दिते। 12 इसा जिन्दगी च असां सब कुछ पूरी तरा नी समझदे न। ऐ तियां है जियां कोई माणु अपणी शकल धुन्दले सीसे च दिखदा है। पर जालू असां स्वर्गे च जांदे न, तालू असां सब कुछ साफ-साफ समझणा। ऐ कुसी सोगी आमणे सामणे गल्ल करणे सांई होणा। हुण असां सब कुछ जाणदे न जड़ा परमेश्वर सांझो सिखाणा चांदा है। तालू असां सब कुछ जाणी जाणा, जियां परमेश्वर सांझो जाणदा है। 13 इस तांई हुण असां तिन गल्लां जो करदे न: परमेश्वरे पर भरोसा रखा, परमेश्वरे दे बायदे पर आस रखा। पर इना गल्लां च सारयां ला बडी गल्ल इक दुज्जे ला कने परमेश्वरे ला प्यार करणा।

14 इक दुज्जे ला प्यार करणे दी कोशिश करा, कने पबित्र आत्मा दे बरदान पाणे दी बडी इच्छा रखा, खासकर परमेश्वरे दा संदेश देणे दा बरदान पाणे दी इच्छा रखा। 2 क्योंकि जड़ा होर-होर भाषां च गल्लां करदा है, उसा भाषा जो कोई नी समझी सकदा, सै माणुऐ ला नी, पर परमेश्वरे ला गल्लां करदा है। इस तांई कोई भी नी समझदा की सै क्या बोला दा है, क्योंकि सै पबित्र आत्मा दिया शक्तिया ला गुप्त गल्लां बोलदा है। 3 पर जड़ा भविष्यवाणी करदा है, सै भरोसा करणे बाले लोकां जो उना दे भरोसे च मजबूत करदा, कने उना दे मना जो होंसला कने तसल्ली देणे तांई सहायता करदा है। 4 होर-होर भाषां च गल्लां करणे बाला माणु अपने आप दा भरोसा मजबूत करदा है, पर जड़ा भविष्यवाणी करदा है, सै कलीसिया दे सारे भरोसा करणे बाले लोकां दे भरोसे जो मजबूत करदा है। 5 मैं चांदा है, की तुसां सारे होर भाषा च गल्लां करा, पर इसला बडिया गल्ल ऐ की तुसां भविष्यवाणी करा। क्योंकि सै जड़ा भविष्यवाणी करदा है, उस होर भाषा च बोलणे बाले ला, जड़ा मतलब दसयो बिना होर भाषा च बोलदा है, बेहतर है क्योंकि मतलब पता लगणे ला ही कलीसिया दे लोकां दी तरक्की होई सकदी है। 6 इस तांई हे मसीह भाईयो, अगर मैं तुहाडे बाल आई करी होर भाषा च गल्लां करें, कने इदा मतलब नी समझाई सकें तां इदे ला तुहांजो क्या फायदा होणा? इदे बदले अगर मैं तुहांजो सै दस्से जिदा परमेश्वरे मिंजो प्रकाशन दितया, या

सच्चाईया दा ज्ञान, भविष्यवाणियां, या उपदेश दियां गल्लां दस्सें, इदे ला तुहांजो जादा फायदा होणा। 7 इयां ही अगर कोई बिण या बंसरी बजांदा है, कने अगर इना दिया अबाजा च कोई फर्क नी है, तां बाकियां कियां पछेणना की ऐ बिण या बंसरी है? 8 कने अगर लडाई दे बकत तुरही दी अबाज साफ नी सुणुऐ, तां सिपाई लडाईऐ तांई तैयार नी होई सकदा। 9 इयां ही, जालू तुसां ऐसे शब्द बोलदे न जिना जो लोक समझी नी सकदे न, तां ऐ होआ च गल्लां करणे सांई है कने जडा तुसां बोला दे न उदी कोई कीमत नी होणी। 10 इस संसारे च मतियां लग-लग भाषां न कने हर भाषा दा अपणा मतलब है। 11 पर अगर असां उस भाषा दा मतलब नी समझदे न, जडे दुज्जे बोलदे न, तां ऐ ऐसा होणा मन्ना की सै साडे तांई परदेसी न, कने असां उना तांई परदेसी न। 12 इस तांई जालू तुसां आत्मिक वरदान पाणे दी इच्छा रखदे न, तां पबित्र आत्मा तुहांजो बरदान दिन्दा है, तां उना बरदाना दा इस्तेमाल करणे तांई कोशिश करदे रिया ताकि इना बरदाना ला कलीसिया दे लोकां दा भरोसा होर जादा मजबूत हो। 13 इस तांई जडे होर भाषा च परमेश्वरे ला गल्लां करदे न, सै प्राथना करन की जडा सै बोला दे न उदा मतलब दुज्जयां जो समझाई सकन। 14 क्योंकि जालू मैं होर भाषा च प्राथना करें, तां मेरी आत्मा प्राथना करदी है, पर मेरा मन इसयो नी समझदा है। 15 कने इसा बजा ला जालू मैं प्राथना करें तां मैं पबित्र आत्मा दी अगुवाई च प्राथना करें, पर मैं ऐ भी चांदा है की दुज्जे लोक समझी सकन की मैं क्या बोला दा है। कने जालू मैं भजन गां तां सै भी पबित्र आत्मा दी अगुवाई च हो, पर ऐ भी जरूरी है की जडा मैं भजन गा दा है सै भी दुज्जे लोक समझन। 16 मना की कोई आम बन्दा तुहाडिया अराधना च है कने तुसां अपणी आत्मा ला परमेश्वरे दी अराधना करा दे न। अगर सै तुहाडियां गल्लां जो नी समझदा, तां तुहाडा परमेश्वरे जो धन्यवाद देंगे बाद, उसयो कियां पता लगणा की आमीन कालू बोलणा जिस बारे च तुसां बोलया। 17 तू तां सही ढंगे ला परमेश्वरे दा धन्यावाद करदा होंगा, पर इदे ला दुज्जे लोकां दा भरोसा मजबूत नी होंदा। 18 मैं अपने परमेश्वरे दा धन्यवाद करदा है, की मैं तुसां ला जादा होर भाषा च गल्लां करदा है। 19 पर जालू मैं कलीसिया दे लोकां च होंदा है, तां मेरे तांई ऐई खरा है की उना जो सिखाणे तांई समझणे दे पंज अखर बोलें जडे सै समझी सकन। ना कि इदे बजाए होर भाषा च दस हजार गल्लां बोलें, जिना जो कोई नी समझे। 20 हे मसीह भाईयो, तुसां इना गल्लां जो समझणे तांई बचयां सांई मत बणा; पर

बुराईया ताई बचयां साईं मासूम बणा, पर इना गल्लां जो समझणे ताई सियांणे बणा। 21 पबित्र शास्त्र च लिखया है, की प्रभु बोलदा है की, “मैं बिदेशी कने अजनबी लोकां दे जरिये अपणे लोकां ला गल्लां करणियां, जिना अजीब या लग भाषा बोलणियां, तमी उना मेरियां गल्लां नी सुणनियां।” 22 इस ताई होर भाषां भरोसा करणे बालयां ताई नी, पर भरोसा नी करणे बालयां ताई इक निशाण है, कने परमेश्वरे दे संदेश दसणा भरोसा नी करणे बालयां ताई नी, पर भरोसा करणे बालयां ताई इक निशाण है। 23 इस ताई अगर कलीसिया दे लोक इक जगा गिठे होन, कने सारे होर भाषा च परमेश्वरे ला गल्लां करन, कने कोई जड़े ऐ भाषा नी समझदे होन या कोई भरोसा नी करणे बाले अंदर आई जान तां उना पक्का सोचणा की तुसां पागल होई गियो न। 24 पर अगर सारे परमेश्वरे दे संदेश दसणा लग्गे, कने अगर कोई भरोसा नी करणे बाला या इस बरदान दे बारे च अनजाण माणु अंदर आई जा, तां उसयो ऐहसास होई जाणा की सै पापी है, कने उनी अपणी जिंदगी तुसां दे बोलणे दिया बजा ला बदली देणी। 25 परमेश्वरे दे शुभसमाचार दिया बजा ला उसयो उदी बुराई कने उदे मने दे बुरे बिचारां दा ऐहसास होणा, कने उसयो ऐहसास होणा की सै पापी है कने उनी पापां दा पश्चाताप करणा, कने गोडे भार बेईकरी परमेश्वरे दी अराधना करणी। कने मन्नी लेणा की, सच्ची परमेश्वर तुहाड़े बिच है। 26 इस ताई हे मसीह भाईयो, सुणा तुहांजो क्या करणा चाईदा? जालू तुसां अराधना ताई गिठे होंदे न, तां तुसां चे इकी माणुऐ प्रभु दे भजन गाऐ, कने इक ही परमेश्वरे दे दितयो प्रकाशन दस्से, कने इक ही होर भाषा च परमेश्वरे ला गल्लां करे, कने होर दुज्जे इदा मतलब दसन। ऐ सारा कुछ तुहांजो भरोसा करणे बाले लोकां जो मजबूत करणे ताई करणा चाईदा। 27 अगर होर भाषा च परमेश्वरे सोगी गल्लां करणियां चांदे न, तां सिर्फ दो या तिन्न जणे बारी-बारी बोलन, कने इक माणु इना भाषा दा मतलब दसणे बाला होणा जरूरी है। 28 पर अगर होर भाषा दा मतलब दसणे बाला कलीसिया च कोई नी है, तां सै माणु कलीसिया च चुप रे, कने अपणे मने च परमेश्वरे ला गल्लां करे। 29 परमेश्वरे दा संदेश देणेबालयां चे दो या तिन ही परमेश्वरे दा संदेश देन, कने बाकी लोक ऐ दीखन की जडा सै बोला दे न सै पबित्र शास्त्रे अनुसार ठीक है की नी है। 30 पर अगर कुसी दुज्जे माणुऐ जो जडा कलीसिया च बैठया हो, उसयो परमेश्वरे दिया तरफा ला कोई संदेश मिल्ले, तां जडा पेहले बोलणा लगया हो सै चुप होई जाए कने उसयो बोलणा दे। 31 क्योंकि

तुसां सारे परमेश्वरे दा संदेश देई सकदे न, पर इक-इक करिरी, ताकि हर कोई सिखे कने सारयां जो हिम्मत मिल्ले। 32 कने परमेश्वरे दा संदेश देणेबाला अपने आप पर काबू रखे; सै अपणिया इच्छा ला बोली सके कने अपणिया इच्छा ला बोलणा बंद भी करी सके। 33 क्योंकि परमेश्वर गडबडी दा नी पर शांति दा परमेश्वर है। इसी नियमे जो परमेश्वरे दियां सारियां कलीसियां मंदियां न। 34 जनानिया कलीसिया च चुप रैन, क्योंकि उना जो गल्लां करणे दा हुकम नी है, पर अधीन रेणे दा हुकम है। जियां मूसा दिया व्यवस्था च भी लिखया है। 35 अगर सै कुछ सिखणा चांदिया न तां सै कलीसिया च जादा सबाल जबाब ना करन, पर घरे जाई करी अपने घरे बाले ला पूछन, क्योंकि जनानिया दा कलीसिया च गल्लां करणा सही नी है। 36 ऐसा क्या है की तुसां चे कुछ लोक पेहले दसियो व्यवस्था जो नी मनणा चांदे? क्या तुहांजो लगदा है की तुसां पेहले न जिना जो परमेश्वरे दा बचन दितया है? या सिर्फ ऐ तुहांजो ही दितया था? 37 अगर कोई माणु अपने आप जो परमेश्वरे दा संदेश देणेबाला या ऐसा माणु समझे जिसयो पबित्र आत्मा बरदान दितया हो, तां ऐ समझी लिया की, जडियां गल्लां मै तुहांजो लिखियां न, सै प्रभु दा हुकम है। 38 अगर कोई माणु मेरियां लिखियां गल्लां जो ना मन्ने, तां तुसां भी उदियां बोलियां गल्लां मत मन्ना। 39 हे मसीह भाईयो, परमेश्वरे दा संदेश देणे दी इच्छा रखा कने होर भाषा च परमेश्वरे ला गल्लां करणे तांई कुसी जो भी मना मत करा। 40 पर जडा कुछ भी तुसां अराधना करदे बकत करदे न, उना सारियां गल्लां जो पुरे सभ्य तरीके ला करा।

15 हे मसीह भाईयो, मै तुहांजो सै ही शुभसमाचार याद करांदा है, जडा मै पेहले सुणाई बैठया है, जिस पर तुसां पेहले भरोसा भी किता था कने जिदे च तुसां टिकयों भी न। 2 अगर तुसां उस शुभसमाचार पर जिदा मै प्रचार किता, तुहाडा भरोसा उस पर बणी रेंगा तां परमेश्वरे तुहाडा उद्धार करणा; अगर तुहाडा भरोसा कमजोर होई जांगा तां उदी कोई कीमत नी कने सै बेकार है। 3 इसा बजा ला मै तुहांजो सारयां ला जरूरी संदेश दसया, जडा मिंजो प्रभु यीशु मसीह ला मिलया। कने सै संदेश ऐ है पबित्र शास्त्रे दे बचने अनुसार यीशु मसीह साडे पापां तांई मरी गया। 4 कने धरती च दबया; कने पबित्र शास्त्र दे अनुसार त्रिऐ रोजे मरयां चे जिन्दा भी होई गया। 5 कने फिरी सै पतरस जो मिल्ला कने उदे बाद सै बारां चेलयां जो मिल्ला। 6 फिरी उदे बाद सै पंज सौ ला जादा चेलयां जो मिल्ला, जिना चे मते लोक हले

दीकर जिंदे न पर केई मरी गियो न। 7 फिरी उदे बाद याकूबे जो मिल्ला कने सारे चुणयो प्रेरितां जो भी मिल्ला। 8 कने सारयां ला बादे च उनी अपने आप जो मिंजो पर प्रगट किता, जड़ा उस बच्चे सांई है जिदा जन्म सही बकत पर नी होया हो। 9 क्योंकि मैं प्रेरितां च सारयां ला घट खास है, बल्कि प्रेरित बणने जोगा भी नी है, क्योंकि मैं परमेश्वरे दिया कलीसिया दे लोकां जो सताया था। 10 पर अगर अज मैं प्रेरित है तां सै परमेश्वरे दा अनुग्रह है: कने उनी जड़ा अनुग्रह मिंजो पर कितया है, सै बेकार नी होया। पर मैं उना दुज्जे प्रेरितां ला जादा बदीकरी मेहनत किती; तमी ऐ मेरिया तरफा ला नी होया, पर परमेश्वरे दे अनुग्रह मेरी बड़ी सहायता किती की मैं उदा कम्म करी सकें। 11 इस तांई अगर चाऐ मैं है, या दुज्जे प्रेरित न, असां सारे मसीह दे बारे च प्रचार करदे न, कने इसी पर तुसां भरोसा किता। 12 हुण मैं तुहांजो ऐ बोलणा चांदा; क्योंकि असां सारयां तुहाड़े बिच ऐई प्रचार किता की जालू मसीहा मरया तां परमेश्वरे उसयो जिन्दा किता, तां तुसां चे कोई भी ऐ ना बोले की परमेश्वरे भरोसा करणे बाले दे मरणे बाद उना जो जिन्दा नी करणा। 13 अगर मरणे बाद जिन्दा होणा नी होंदा, तां फिरी मसीह भी मरयां चे जिन्दा नी होया। 14 कने अगर मसीह मरयां चे जिन्दा नी होया, तां जिस संदेश दा असां प्रचार करदे न कने मसीह पर तुहाड़ा भरोसा करणा दोनों बेकार न। 15 इसला भी बदीकरी ऐ की असां परमेश्वरे दे झूठे गबाह साबित होआ दे न क्योंकि असां उदे बारे च ऐ गबाई दीतियो है की उनी मसीह जो मरयां चे जिन्दा कितया है, पर अगर मरयो असल च जिन्दे नी होंदे न तां परमेश्वरे मसीह जो भी जिन्दा नी कितया है। 16 अगर मरयो लोक मौत ला बाद जिन्दा नी होंदे न, तां मसीह भी मौत ला बाद जिन्दा नी होया है। 17 कने अगर मसीह जिन्दा नी होया, तां मसीह पर तुहाड़ा भरोसा करणा बेकार है; कने तुसां हले दीकर भी अपने पापां च जिया दे न। 18 अगर मसीह मरयां चे जिन्दा नी होया है, तां जड़े मसीह च भरोसा करणे बाले लोक मरी गियो न, सै बचायो नी न, बल्कि नाश होई गियो न, मतलब की ऐ की हमेशा तांई परमेश्वरे ला लग होई गियो न। 19 अगर असां सिर्फ ऐथू दी जिन्दगिया तांई मसीह पर आस रखदे न, तां इस संसारे दे माणुऐ ला साड़ी हालत जादा बुरी है। 20 पर सच्चाई ऐ की परमेश्वरे मसीह जो सारयां ला पेहले मरयां चे जिन्दा कितया है, सै इसा गल्ला दा सबूत है उनी सै जिन्दे करणे जड़े मरी गियो न। 21 इस तांई जियां इक माणु आदम दे जरिये मौत इस संसारे च आई कने हुण मरयां दा जिन्दा होणा भी

इक माणुऐ जरिये है मतलब की यीशु मसीह जरिये शुरू होया है। 22 जियां आदम दिया बजा ला सारयां दी मौत होंदी है, क्योंकि असां उदे बंश न, तियां ही दुज्जे माणु मतलब की मसीह सोगी जितणे भी लोक जुडयो न, उना सारयां मरयां चे जिन्दे होई जाणा है। 23 पर हर इक जणा अपणिया-अपणिया बारिया पर जिन्दा होणा; इदा सबूत ऐ है की मसीह सारयां ला पेहले जिन्दा किता, फिरी जालू मसीहे मुडी करी ओणा है, तां जडे लोक उदे सोगी मजबूत रिश्ता रखदे न उना जो मरयां चे जिन्दा करणा है। 24 कने फिरी जालू मसीहे परमेश्वरे दा बिरोध करणे बालियां सारियां बुरियां शक्तियां दा नाश करी देणा उदे बाद संसारे दा अंत होई जाणा। तालू मसीहे अपने पिता परमेश्वरे जो अपना राज्य सौंपी देणा ताकि सै उस पुरे तरीके ला राज्य करे। 25 पर जालू दीकर परमेश्वर उदे सारे दुशमणा जो पूरे तरीके ला राई नी दे, तालू दीकर मसीहा जो उस राज्य पर राज करणा चाईदा। 26 सारयां ला आखरी दुशमण खत्म करी देणा है, सै मौत है। 27 पबित्र शास्त्र च भजनकार लिखदा है की, “परमेश्वरे सब कुछ मसीह दे अधिकारे थले करी देणा है,” पर इदे च परमेश्वर अपु शामिल नी है क्योंकि सै ही है जिनी मसीह जो अधिकार दितया था। 28 कने जालू सारा कुछ मसीह दे मतलब की पुत्रे दे अधीन होई जाणा, तां पुत्रे भी अपु जो परमेश्वरे दे अधीन करी देणा। ताकि परमेश्वर जिनी अपने पुत्रे जो सारियां चीजां पर हक दितया है, ताकि परमेश्वर ही सारयां तांई सारा कुछ होणा। 29 अगर मरयो लोक जिन्दे नी होंदे तां उना दा क्या होणा, जडे मरयो लोकां तांई बपतिस्मा लेंदे न? अगर परमेश्वर मरयो लोकां जो जिन्दा नी करदा तां लोक हुण भी ऐसा कजो करदे न? 30 अगर मरयो लोकां दा जिन्दा होणा नी होंदा है, तां ऐ साडे तांई मुर्खता दी गल्ल है की असां अपने आपे जो बार-बार कजो खतरे च पांदे रेंदे? 31 हे मसीह भाईयो, जियां ऐ गल्ल पक्की है की तुसां दे यीशु मसीह ला जुडने दिया बजा ला मैं घमंड करदा है, तां ऐ गल्ल भी पक्की है की मिंजो हर रोज मरणे दा खतरा है। 32 ऐथू इफिसुस शेहरे च जिना लोकां मेरा जंगली जानवरां सांई बिरोध किता, कने जडे दुख उना मिंजो दिते उना जो सेहन करणे दा क्या फायदा होया? कुछ भी नी! अगर ऐ सच्च होंदा की मरयो लोक दुबारा जिन्दा नी होंदे न, तां खरा होंदा की मैं उना लोकां दी गल्ल मन्नी लेंदा जडे ऐ बोलदे न की, “ओआ असां खांदे-पिंदे क्योंकि अगर असां कल मरी गे तां सब कुछ खत्म होई जाणा।” 33 जडे इयुदियां गल्लां करदे न उना ला मुर्ख मत बणदे, “बुरी संगती खरे चरित्र

जो बिगाड़ी दिन्दी है।” 34 तुसां होसा च ओआ कने पाप करणा छडी दिया; मै तुहांजो ऐ गल्ल शरमिंदा करणे ताई बोला दा है, क्योंकि तुसां बिच केई ऐसे न जिना दा परमेश्वरे सोगी रिशता ठीक नी है। 35 उदाहरण ताई अगर तुसां चे कोई पुच्छे की, “कियां परमेश्वर मरयां जो जिन्दा करदा या उना दा शरीर कदिया होणा,” 36 जड़ा भी इस तरीके दे सबाल पुछदा है तां सै मुख है। तुसां जाणदे न की इक बी जालू उसयो जमिना च रांदे न, तां सै जालू दीकर सडी नी जांदा है, अंकुरित नी होंदा है। 37 अगर तुसां धान या कोई होर बी रांदे न, तां तुसां पेहले ला ही उगया बूटा नी लांदे न, बल्कि सिर्फ इक बी रांदे न। 38 पर परमेश्वर अपणिया इच्छा अनुसार उसयो बूटे दा रूप दिन्दा है; कने हर किस्मा दे बी अपणे स्पे च बददे न। 39 संसार च सारे प्राणियां दा शरीर इकोदिया नी हुंदा, माणुआं दा शरीर डंगरां सांई नी हुंदा; चिड्डां पखेरूआं दा शरीर मछियां सांई नी हुंदा। 40 कने जियां संसार दे प्राणिया दे शरीर केई तरा दे होंदे न, तियां ही अम्बरे च भी है, जियां की सूरज, चाँद कने तारे। आसमाने दियां चीजां दी सुन्दरता इको देई होंदी, कने धरती दियां चीजां चे इक होर तरा दी सुन्दरता होंदी है। 41 सूरजे दी सुन्दरता लग है, चन्द्रमे दी सुन्दरता लग है, कने तारयां दी सुन्दरता लग है, क्योंकि इक तारे ला दुज्जे तारे दी सुन्दरता च फरक है। 42 इस ताई जालू मरयां लोकां दुबारा जिन्दे होणा, तालू उना सोगी भी ऐसा होणा। जिस शरीर जो सै दफनांदे न, सै ऐसा शरीर है जड़ा सडी जांदा है, पर जालू ऐ दुबारा जिन्दा होंदा है, तां ऐ ऐसा शरीर होणा है जड़ा सडी नी सकदा है। 43 जालू असां मरी जांदे न, तालू साडा शरीर बदसूरत कने कमजोर होंदा है, पर जालू उना मरयां चे जिन्दा होणा, तां उना छेल कने ताकतबर होणा। 44 जियां साडे बाल मास कने खूने दा शरीर है, इयां ही ऐसे शरीर भी न जिना जो परमेश्वरे दी आत्मा जरिये जिन्दगी मिलदी है; साडे ऐ मास कने खूने दे शरीर उना शरीर च बदलुई जाणा जिसयो परमेश्वर दी आत्मा जरिये जिन्दगी मिलदी है। 45 पबित्र शास्त्र च भी लिखया है, “पेहला माणु, मतलब की आदम, जिन्दा माणु बणया” कने आखरी आदम, मतलब की यीशु मसीह हमेशा दी जिन्दगी देणेबाला बणया। 46 सारयां ला पेहला माँस कने खूने दा शरीर आया, फिरी सै शरीर आया जिसयो परमेश्वरे दिया आत्मा जिन्दगी दिती। 47 पेहला माणु आदम था धरतिया ला मतलब की मीटिया दा बणया था। दुज्जा माणु मसीह है जड़ा स्वर्गे ला आया है। 48 संसारे दे पेहले माणु आदम सांई न जड़ा मीटिया दा

बणया था, पर जडे स्वर्गे दे लोक न, सै स्वर्गे ला आयो माणु मतलब की मसीह साईं न। 49 असां सारयां बाल आदम दा रूप है जिसयो मीटिया ला बणाया था, इयां ही इक रोज सांझो मसीह दा रूप भी मिलणा, जडा स्वर्गे ला आया था। 50 हे मसीह भाईयो, मै तुसां जो बोलदा है, इसा धरती पर साडे शरीर मॉस कने खूने ला बणयो न; असां स्वर्ग च परमेश्वरे दे राज्य च अपने इस शरीर सोगी नी रेई सकदे जडा मरी सकदा है, क्योंकि ओथु कोई भी मौत नी है। 51 इस भेद दिया गल्लां जो सुणा, साडे चे कुछ भरोसा करणे बालयां केई लोकां नी मरणा। ऐ सारियां गल्लां पलक झपकदे ही होई जाणियां न। जालू आखरी तुरही बजाई जाणी, तां जडे लोक मरी गियो न, सै हमेशा दी जिन्दगी तांई दुबारा जिन्दे करणे न कने असां जडे जिन्दे न, साडे शरीर बदलूई जाणे। 53 क्योंकि साडा शरीर जडा तोल्ली ही मरणे बाला कने सडने बाला है, जरूरी है की ऐ इक ऐसे शरीर च बदलूई जा जडा कदी नी मरदा कने सडदा हो। 54 कने जालू ऐसा होणा तालू ऐ गल्ल पूरी होई जाणी जडी परमेश्वरे पबित्र शास्त्र च लिखियो की, “मौत जो हराई देणा कने उना कदी नी रेणा।” कने इयां पबित्र शास्त्र च लिखया पूरा होई जाणा। 55 “हे मौत तेरी जित कुथु है? हे मौत तेरा डंक कुथु रिया?” इस तरीके ला पबित्र शास्त्र च जडा लिखया था सै पूरा होया। (Hadēs 986) 56 क्योंकि पाप ऐसा डंक है जिदा नतीजा मौत है, कने व्यवस्था दिया बजा ला पाप दी शक्ति साडिया जिन्दगिया च ओदी है। 57 पर परमेश्वरे दा धन्यवाद हो, जडा सांझो साडे प्रभु यीशु मसीह दे मरणे जरिये पाप कने मौत पर जितांदा है। 58 इस तांई हे मेरे मसीह भाईयो, अपने भरोसे च मजबूत रिया कने कोई तुसां जो न भडकाए, कने प्रभु दे कम्मा च हमेशा बददे जा, क्योंकि तुसां ऐ जाणदे न की तुसां प्रभु तांई मेहनत करदे न कने सै बेकार नी है।

16 यरूशलेम शेहरे दे परमेश्वरे दे पबित्र लोकां दी सहायता तांई जडा चंदा तुसां गठेरया, इदे बारे च तुसां मिंजो ला सुआल पूछया था, कने हुण मै इदे बारे च बोलणा चांदा है, इदे बारे च जडियां गल्लां मै गलातिया प्रदेशे दिया कलीसिया दे लोकां जो करणे तांई बोलया था तुसां भी इयां ही करा। 2 हर तुआरे बाले रोजे तुसां चे हर इक माणु अपणिया कमाईया चे कुछ पैसे कडी करी लग रखी ले, ताकि जालू मै ओगा तां उस बकत तुसां जो दान गिठा करणे च परेशानी ना हो। 3 कने जालू मै ओथु रेंगा तां मै उना लोकां जो भेजगा जडे तुहाडिया नजरा च भरोसेमंद न की सै यरूशलेम शेहर जो दान लेईकरी जान। मै उना सोगी इक चिड़ी भी भेजी

दिगा ताकि ओथु दे भरोसा करणे बाले लोकां ने उना दी पछेण कराई सके। 4 अगर तुसां जो लग्गा दा है की मिंजो जाणा चाईदा, तां सै मेरे सोगी जाई सकदे न। 5 कने मैं मकिदुनिया प्रदेश च जाणे बाद आई करी तुहांजो ने मिलणा है। क्योंकि मैं मकिदुनिया प्रदेश जो जाणे दी योजना बणा दा है। 6 पर होई सकदा की कुछ लम्बे बकते दीकर मैं तुहाड़े सोगी रें, या होई सकदा की सर्दियां तुहाड़े बाल कट्टें, कने उदे बाद मेरिया अगलिया यात्रा ताई तुसां मिंजो भेजी सकदे न। 7 मैं नी चांदा की मकिदुनिया प्रदेश च जांदे बेले सिर्फ कुछ बकते ताई तुसां सोगी रें। अगर प्रभु दी इच्छा होई तां मैं आस रखदा है की कुछ लम्बे बकते दीकर ओथु तुसां सोगी रें। 8 पर मैं पेन्तिकुस्त त्योहारे दे रोजे दीकर इफिसुस शेहरे च ई रेंणा। 9 क्योंकि हल्ले भी ऐथू मते लोक न जड़े परमेश्वरे दा बचन सुणना चांदे न, मेरा ऐथू रेंणा बड़ा जरूरी है। हालांकि ऐथू मते लोक ऐसे न जड़े मेरा बिरोध करदे न। 10 अगर तीमुथियुस तुहाड़े बाल कुरिन्थुस शेहरे च ओंगा, तां उदी खातिरदारी इज्जता ला करनयो, क्योंकि सै मेरे साई प्रभु दा कम्म करदा है। 11 इस ताई कोई उदी बेईजती ना करे, पर यात्रा ताई जुस्सतां दियां चीजां देईकरी बिदा करा, ताकि सै मेरे बाल आई जा; क्योंकि मैं उदी कने दुज्जे भरोसा करणे बाले भाईयां जो भी नियाला दा जड़े उना सोगी आयो न। 12 कने मैं मसीह भाई अपुल्लोस ला बड़ी बिनती किती है की सै भी होर भरोसा करणे बालयां सोगी तुहांजो ला मिलणा ओऐ, पर सै इस बकत नी ओणा चांदा, पर जालू उसयो खरा मोका मिलगा, तालू उनी आई जांणा। 13 साबधान रिया, लगातार भरोसा करदे रिया, साहसी माणु बणा, कने परमेश्वरे सोगी अपणे रिश्ते जो मजबूत रखा। 14 तुसां जड़ा कुछ भी करदे न सै प्यारे ला करा। 15 हे मसीह भाईयो, तुसां स्तिफनास जो कने उदे परिबारे जो जाणंदे न की, उना अखाया प्रदेशे च उना ही सारयां ला पेहले मसीह पर भरोसा कितया था, कने सै परमेश्वरे दे लोकां दी सहायता ताई तैयार रेदे न। 16 इस ताई मैं तुहांजो ने बिनती करदा है की ऐसे अगुवां दियां गल्लां मन्ना, बल्कि ऐसे सारे लोकां दी सुणा जड़े प्रभु दी सेवा जो बड़ी मेहनता कने बड़ी भक्ति ला करदे न। 17 कने मैं स्तिफनास फूरतूनातुस कने अखईकुस मसीह भाईयां दे मेरे बाल ओणे ला खुश है, क्योंकि उना मेरी सै सहायता किती, जिसा जो करणे ताई तुसां ऐथू नी थे। 18 कने उना मेरे मने जो हिम्मत दिती ठीक तियां ही जियां उना तुहाड़े ताई भी करणा जालू उना तुहाड़े बाल ओणा। इस ताई तुहांजो भी ऐदे लोकां दी इज्जत

करणी चाईदी। 19 आसिया प्रदेश दिया कलीसिया दे लोकां दिया तरफा ला तुहांजो नमस्कार; अक्विला कने उदी घरे बाली प्रिस्का दा कने उना दे घरे च गिठी होणे बाली कलीसिया दे मसीह भाई बेहणा दिया तरफा ला भी तुसां जो प्रभु च नमस्कार। 20 ऐथू ला जितणे भी मसीह भाई बेहणा न, उना सारयां दिया तरफा ला तुहांजो नमस्कार। गले लग्गी करी इक दुज्जे जो नमस्कार करा। 21 कने हुण मै पौलुस, इसा चिठिया दे आखरी च अपने हथां ला इस नमस्कार जो लिखा दा है। अगर कोई प्रभु ला प्यार नी करे, तां सै श्रापित हो। 22 हे साडे प्रभु, आई जा! 23 मै प्राथना करदा है साडा प्रभु यीशु मसीह तुहांजो पर अपना अनुग्रह करदा रे। 24 मै तुसां सारयां ला प्यार करदा है, जिना दा यीशु मसीह सोगी गेहरा रिश्ता है। आमीन।

2 कुरिन्थियों

1 मैं, पौलुस, परमेश्वरे दिया इच्छा ला यीशु मसीह दा प्रेरित है, कने साड़ा मसीह भाई तीमुथियुस मेरे सोगी है। मैं ऐ चिट्ठी कुरिन्थुस शेहर च परमेश्वरे दिया कलीसिया जो, कने अखाया प्रदेशे दे सारे परमेश्वरे दे लोकां जो लिखा दा है। **2** मैं प्राथना करदा की साड़ा पिता परमेश्वर कने प्रभु यीशु मसीह तुहांजो पर अनुग्रह करे कने तुहांजो शांति दे। **3** साड़े प्रभु यीशु मसीह दे पिता कने परमेश्वरे दा धन्यवाद हो, जड़ा सांझो पर दया कने सांझो हमेशा तसल्ली दिन्दा है। **4** सै सांझो साड़े सारे दुखां च तसल्ली दिन्दा है; ताकि असां दुज्जयां दे दुखां च उना जो इयां ही तसल्ली देई सकन जियां परमेश्वर सांझो दुखां च तसल्ली दिन्दा है। **5** जितणा जादा असां यीशु मसीह ताई दुख सेहन करदे न, परमेश्वर मसीह दे जरिये उतणी ही जादा तसल्ली सांझो दिन्दा है। **6** असां दुख सेहन करदे न, ताकि परमेश्वर तुहांजो तसल्ली दे कने तुहाड़ा उद्धार करे। क्योंकि परमेश्वरे सांझो तसल्ली दिन्दा है इस ताई उनी तुहांजो भी तसल्ली देणी क्योंकि तुसां बड़े सबर सोगी साड़े सांई दुख सेहन किते। **7** कने साड़ी आस तुहाड़े बारे च पक्की है, क्योंकि असां जाणदे न, की जियां तुसां साड़े दुखां च साथी थे, तियां ही तुसां साड़िया तसल्लिया च साथी होणा, जड़ी परमेश्वरे सांझो देणी। **8** हे मसीह भाईयो, मैं चांदा की तुसां साड़िया उना मुसीबतां दे बारे च जाणा, जड़ियां आसिया प्रदेश च सांझो होईयां। असां ऐसे बोझे ला दबुई गियो थे, जड़ा साड़े सेहणे ला बाहर था, असां तां जिणे दी पूरी उम्मीद ही छडी दितियो थी। **9** असां तां अपने मने च ऐ सोची लिया था, की असां मरणे बाले न। ऐ इस ताई होया की असां अपने आपे पर नी पर परमेश्वरे पर भरोसा रखन, जड़ा मरयां जो जिन्दा करदा है। **10** परमेश्वरे ही सांझो इतणिया बडिया मुसीबता ला बचाया, कने बचाणा भी; कने सांझो ऐ आस है की उनी अगे भी बचांदे रेणा है। **11** जियां तुसां साड़े ताई प्राथना करिरी साड़ी सहायता करदे न, तियां ही मते लोकां दियां प्राथना ला सांझो परमेश्वरे दियां आशीषां मीलियां न, उदिया बजा ला साड़िया तरफा ला परमेश्वरे दा धन्यवाद करनयो। **12** क्योंकि असां अपनी अंतरात्मा दिया सच्चाईया पर घमंड करदे न। संसार च कने खासकर तुसां लोकां बिच साड़ी जिन्दगी पबित्र कने सच्ची थी, जड़ा परमेश्वरे दिया तरफा ला सांझो मिलया था। असां माणुआं दे ज्ञान पर भरोसा नी रखया है, पर परमेश्वरे दे अनुग्रह पर भरोसा रखया है। **13** असां हमेशा तुहांजो अपनी चिठियां च उना ही

गल्लां जो लिखदे न जड़ियां तुसां पढी कने मन्नी सकन। भले ही तुसां हुण इना गल्लां जो अच्छे ला नी समझदे, पर मिंजो आस है की प्रभु यीशु मसीह दे दुबारा मुड़ी ओणे दीकर तुसां इना गल्लां जो अच्छे ला समझणा कने मनणा ताकि उस रोज तुसां साडे पर तियां ही घमंड करन, जियां असां तुहाड़े पर घमंड करदे न। 15 मिंजो इसा गल्ला दा भरोसा था की तुसां सांझो समझणा, इस ताई हुण मैं चांदा है की मैं सारयां ला पेहले तुहाड़े बाल ओऐ ताकि तुहाड़े बाल दो बरी ओणे ला तुहांजो दो गुणी आशीष मिल्ले। 16 मैं सोचा दा था की तुहाड़े बाले ला होईकरी मकिदुनिया प्रदेश जो जां, कने मकिदुनिया प्रदेश ला बापस मुडदे फिरी तुहाड़े बाल ओऐ, कने तुसां मिंजो यहूदिया प्रदेशे दीकर सफर करणे ताई समान देईकरी मेरी सहायता करनयो। 17 मेरी योजना ऐई थी। तां, क्या मैं बिना कुसी बजा दे ही अपना बिचार बदली दिता? क्या मैं संसारिक माणुआं सांई योजना बणादां है? क्या मैं इक बकत च, हां कने बादे च ना बोलदा है? 18 परमेश्वरे पर भरोसा करी सकदे न, तियां ही तुसां भी सांझो पर भरोसा करी सकदे न, हालांकि असां तुहाड़े बाल ओणे दा बायदा करा दे न। 19 क्योंकि परमेश्वरे दा पुत्र यीशु मसीह जिदा प्रचार मैं, सिलवानुस कने तीमुथियुस दे जरिये तुहाड़े बिच होया, सै प्रभु यीशु मसीह सच्चा है, क्योंकि उदे च कदी हां कने कदी ना बाली कोई गल्ल नी है, उदे च सिर्फ हां ही है। 20 क्योंकि पिता परमेश्वरे दे जितणे भी बायदे न, सै सारे बायदे मसीह च पुरे होंदे न कने इस ताई असां “आमीन” बोलदे, की साडे जरिये पिता परमेश्वरे दी महिमा हो। 21 परमेश्वर ही है, जडा तुहाड़े सोगी सांझो मसीह च मजबूत करता है। परमेश्वरे सांझो पर अपनी मोहर लाईकरी ब्याने दे रूपे च अपनी आत्मा साडे मना च रखीकरी सांझो अपने ताई चुणया। 23 परमेश्वर मेरिया इसा सच्चाईया दा गवाह है की मैं हले दीकर कुरिन्थुस शहर च इस ताई नी आया की, मैं तुहांजो दुख देणा नी चांदा था। 24 इदा मतलब ऐ नी की, असां तुहाड़े भरोसे पर अपना हक जतान, क्योंकि तुसां अपने ही भरोसे च टिकयो न। असां तां तुहाड़िया खुशिया ताई तुहाड़े सोगी न।

2 मैं अपने मने च ऐई ठाणी लिया था की मैं इक बरी दुबारा ओथु आई करी तुहांजो दुख ना दे। 2 क्योंकि अगर मैं ओथु आई करी तुहांजो दुखी करे, तां तुसां दे सिवा मिंजो खुशी देणे बाला होर कोई नी है, सिर्फ तुसां ही न जिना जो मैं दुखी किता है। 3 कने मैं ऐई गल्ल तुहांजो इस ताई लिखी, की कुथी इयां ना हो, की मेरे

ओणे पर जिना ला मिजो खुशी मिलणा चाईदी, सेई मेरे दुखी होणे दी बजा न बणी जान। क्योंकि मिजो तुसां पर इसा गल्ला दा भरोसा है की, जड़ी मेरी खुशी है, सेई तुसां सारयां दी भी खुशी है। 4 बड़े दुखी मने ला, कने रोई-रोई करी ऐ चिट्ठी मैं तुहांजो लिखी है, इस ताई नी की, तुसां दुखी होई जा, पर इस ताई की तुसां उस बड़े प्यार जो जाणी लिया, जड़ा मिजो तुसां सोगी है। 5 अगर कोई दुखे दी बजा है, तां से ऐ की जिनी माणुऐ ऐ सारियां परेशानियां खडियां कीतियां, उनी मिजो दुखी करणे ला जादा तुसां सारयां जो दुखी किता है। मैं इदे बारे च इसला जादा होर कुछ नी बोलणा चांदा। 6 ऐसे माणुऐ ताई ऐ सजा काफी है, जड़ी तुसां चे मते विस्वासी लोकां उसयो दिती। 7 इस ताई इदे बजाए तां ऐ खरा है की उदिया गलतिया जो माफ करी दिया कने उसयो तसल्ली दिया। अगर तुसां उसयो माफ नी किता तां शायद सै इतणा दुखी होई जाए कने परमेश्वरे पर भरोसा करणा बिलकुल ही छडी दे। 8 इसा बजा ला मैं तुसां ला बिनती करदा है, की उसयो यकीन दिला की तुसां हले भी सच्ची उसला प्यार करदे न। 9 क्योंकि मैं ऐ इस ताई भी लिखया था की, तुसां जो परखी लें की, तुसां मेरे सारे हुकमा जो मंदे न की नी। 10 जिसयो तुसां माफ करदे न उसयो मैं भी माफ करदा है, क्योंकि जालू मिजो माफ करणे दी जरूरत होंदी है, तां मैं तुहाडे फायदे ताई मसीह दे हके सोगी ऐसा करदा है। 11 ताकि शैतान साडे हालातां दा फायदा ना लेई सके, क्योंकि असां उदे बुरे इरादे जो जाणदे न। 12 कने जालू मैं मसीह दा शुभसमाचार सुणाणे ताई ब्रोआस शेहर च आया, तां परमेश्वरे मिजो शुभसमाचार दा प्रचार करणे दे बड़े मौके दिते। 13 तां मेरा अपणा मसीह भाई तीतुस तुहाडी खबर लेईकरी मेरे बाल नी आया, जिदे ला मेरे मने जो चेन नी मिला। इस ताई मैं तीतुस जो तोपणे ताई ब्रोआस शेहरे दे मसीह लोकां ला बिदा लेईकरी मकिदुनिया प्रदेश जो चली गया। 14 पर परमेश्वरे दा धन्यवाद हो, जड़ा मसीह सोगी साडे रिशते दिया बजा ला हमेशा साडे सोगी चलदा है, कने सांझो जितांदा है। इदा मतलब है की असां जिथू भी जांदे न, असां शुभसमाचार दी खुशबू फेलांदे न, ताकि सारे लोक परमेश्वरे जो जाणन कने सुणन। 15 क्योंकि असां परमेश्वरे ताई मसीह दे जरिये बखायो धुपे सांई न। कने साडे जरिये प्रचार कितया संदेश सारे लोकां च फेलियो खुशबू सांई है, जड़ी उद्धार पाणे बाले, कने नाश होणे बाले लोकां बिच बिखरदी है। 16 पर ऐ खुशबू नाश होणे बालयां लोकां ताई तां मौता दी मुस्क है, जड़ी उना जो मौत दिया तरफा लेई जांदी

है; पर उद्धार पांणे बाले लोकां ताई ऐ जिन्दगी दी ऐसी खुशबू है, जड़ी उना जो हमेशा दिया जिन्दगिया पासे लेई जांदी है। असल च कोई भी अपने आप ला इसा खुशबूआ जो फेलाणे दे काबिल नी है। 17 क्योंकि असां उना सांई नी न, जडे पैसयां ताई परमेश्वरे दे बचना दा प्रचार करदे न; पर असां सच्चाईया ला परमेश्वरे दे बचना दा प्रचार करदे न, ऐ जाणी करी की परमेश्वर सांझो दिखा दा है।

3 मै अपने बारे च इना गल्लां जो लिखी करी अपनी बड़ाई नी करा दा है। या कुछ होर माणए सांई सांझो भी तुहाडे बाल सिफारिश दियां चिठियां लियोणे कने या तुहाडे ला लेणे दी जरूरत नी है। 2 तुसां अपु ही इक चिठिया सांई न जड़ी साडे तांई सिफारिश करदी है, जड़ी साडे दिले च लिखियो है, तुहाड़ी बदलुइयो जिन्दगी तुहाडे बिच साडे कम्मा दिया बजा ला है, जडा इक चिठिया सांई है जिसा जो हर कोई पढ़ी सकदा है। 3 ऐ तां मिलदी गल्ल है, की तुहाड़ी बदलुइयो जिन्दगी इक चिठ्ठी है जड़ी मसीह लिखियो है, कने ऐ चिठ्ठी साडे कम्मा दा नतीजा था। सै स्याईया ला या पथरे दियां पटियां पर नी, पर जिन्दे परमेश्वरे दिया आत्मा जरिये साडे दिले दियां पटियां पर लिखियो है। 4 असां ऐसा इस तांई बोलदे न क्योंकि असां मसीह दे जरिये परमेश्वरे पर भरोसा रखदे न। 5 असां ऐ नी बोलदे न की साडे बाल अपु ला कुछ करणे दी काबलियत है। पर परमेश्वरे ही ऐ जडा सांझो इस काबिल बणादां है। 6 जिनी सांझो नोई बाचा दे सेवक होणे दे काबिल किता, कने मूसा दी व्यवस्था दे सेबक नी पर पबित्र आत्मा दे सेबक न, क्योंकि मूसा दी लिखियो व्यवस्था जो नी मनणे दी सजा मौत है, पर पबित्र आत्मा हमेशा दी जिन्दगी दिन्दी है। 7 मूसा दी व्यवस्था जालू इस्राएल दे लोकां जो दिती जड़ी पथरां दियां पटियां पर लिखियो थी, उस बकत परमेश्वरे दी महिमा प्रगट होई। इस्राएल दे लोक लम्बे बकते दीकर मूसा दे मूए पास्से नी दिखी सके क्योंकि सै चमका दा था, हालांकि सै जादी देर दीकर नी चमकदा रिया। अगर मौता पास्से लेई जाणे बाली मूसा दी व्यवस्था पर आधारित सेवा इतणी तेजोमय थी, तां नोई बाचा पर आधारित सेवा होर भी जादा तेजोमय होणी। 9 क्योंकि जालू दोषी बणाणे बाली मूसा दी व्यवस्था तेजोमय थी, तां नोई बाचा जड़ी सांझो परमेश्वरे सामणे धर्मी बणांदी है तां सै होर भी जादा तेजोमय कनी होणी? 10 कने मूसा दी व्यवस्था जड़ी बड़ी तेजोमय थी, पर हुण उस नोई बाचा दे तेज सामणे मूसा दी व्यवस्था दा कोई तेज नी रिया क्योंकि ऐ नोई बाचा दे मुकाबले जादा तेजोमय नी है। 11

व्यवस्था उस तेज सोगी दितियो थी जड़ी घटदी जांदी थी, पर नोई बाचा दा तेज होर भी जादा बडी करी है क्योंकि ऐ हमेशा दीकर बणी रेंणी है। 12 इस ताई ऐसी आस रखीकरी असां हिम्मत सोगी बोलदे न। 13 कने असां मूसा सांई नी न, जिनी अपने मुऐ पर परदा पाया था ताकि इस्राएली लोक उसा घटदी चमका जो गायब होंदे ना दिखी लेंन। 14 पर इस्राएल दे लोकां दे मन कठोर होई गियो थे, क्योंकि अजे दीकर पुराणे नियम जो पढ़ने ला उना दे मने च सै ही पड़दा पिया रेंदा है; पर सै परदा मसीह च भरोसा करणे ला उठी जांदा है। 15 कने अजे दीकर भी जालू कदी मूसा दी व्यवस्था पढ़ी जांदी है, तां उना दे मने च परदा पेई रेंदा है इस ताई सै इसयो पुरे तरीके ला नी समझदे। 16 पर जालू सै प्रभु यीशु मसीह पर भरोसा करगे, तालू सै परदा उठी जाणा। 17 प्रभु तां आत्मा है: जिथू कुथी प्रभु दी आत्मा है, ओथु मूसा दी व्यवस्था ला अजादी है। 18 क्योंकि असां सारे इक सीसे सांई परमेश्वरे दे तेज जो ऐसे चेरयां ला दसदे न जिना पर परदा नी पिया है, तां परमेश्वर सान्झो लगातार बदा दे तेज च जादा ला जादा अपने सांई बणा दा है। ऐ तेज प्रभु ला ही मिलदा है, जड़ा पबित्र आत्मा है।

4 इस ताई जालू सांझो पर परमेश्वरे दी ऐसी दया होई की, सांझो परमेश्वरे दे शुभसमाचार दा प्रचार करणे दी सेवा मिल्ली, तां असां हिम्मत नी छडदे न। 2 पर असां सरमा बाले गुप्त कम्मा जो भी करणा छडी दिता, कने ना असां चलाकी करदे न, कने ना ही परमेश्वरे दे बचना च मिलावट करदे न, बल्कि असां परमेश्वरे दे सामणे सिर्फ सच्च सिखांदे न। कने हर इक माणु इसा गल्ला दी गबाई देई सकदा है की ऐ सच्च है। 3 अगर लोक उस शुभसमाचार जो नी समझी सकदे न जिदा असां प्रचार करदे न, तां ऐ सै लोक न जडे खत्म होणे बाले न। 4 कने उना भरोसा नी करणे बाले लोकां ताई, जिना दिया अकला जो इस संसारे दे ईश्वर शैताने अन्ना करी दितया है, इस ताई सै मसीह कने उदी महिमा दे बारे च शुभसमाचार जो नी समझी पांदे की मसीह परमेश्वरे दा रूप है। (aiōn g165) 5 क्योंकि असां अपने आपे दा नी, पर यीशु मसीह दा प्रचार करदे न की, यीशु मसीह ही प्रभु है। कने उनी ही सांझो तुहाडे सेवक होणे ताई भेजया है। 6 इस ताई परमेश्वरे बोलया की, “नेहरे च लौ चमके,” कने परमेश्वरे लौई सांई साडे मना च समझ दिती, ताकि असां परमेश्वरे दिया महिमा जो पछेणी सकन, जड़ी यीशु मसीह दे मूऐ च मिलदी है। 7 असां उसा मीटिया दे भांडयां सांई न जिना च ऐ खजाना रखया है। इसला

ऐ गल्ल साफ होई जांदी है की, ऐ असीम शक्ति साडिया तरफा ला नी है, पर परमेश्वरे दिया तरफा ला है। 8 असां चारो पासे ला परेशानियां ला धिरयो रेंदे न पर कदी हार नी मंदे; घबरांदे तां हेन, पर हिम्मत नी छडदे। 9 असां सताये तां जांदे न, पर परमेश्वर सांझो छडदा नी है; डाऐ तां जांदे न पर, पर परमेश्वर सांझो खत्म नी होणा दिन्दा। 10 असां हमेशा उना दुखां जो अपने शरीर च महसूस करदे न, जडे दुख यीशुऐ मरदे बकत महसूस किते थे; ताकि जड़ा कम्म असां करदे न उदे जरिये लोक यीशु दी जिन्दगी जो दिखी सकन। 11 क्योंकि असां जिंदे जी यीशु दिया बजा ला मौत दे खतरे च रे, ताकि यीशुऐ दी जिन्दगी भी साडे मरणे बाले शरीर पर प्रगट होऐ। 12 इस ताई असां मौत दे खतरे च रेंदे न, पर इदिया बजा ला तुहांजो हमेशा दी जिन्दगी मिली। 13 पर असां प्रचार करदे रे क्योंकि सांझो च सेई भरोसा था, जदिया भजन लिखणे बाले च था, जालू उनी पबित्र शास्त्र च ऐसा लिखया की, “मैं भरोसा किता, इस ताई मैं बोलया।” असां भी भरोसा करदे न, इस ताई बोलदे न। 14 क्योंकि असां जाणदे न, जिनी प्रभु यीशु मसीह जो मरयां चे जिन्दा किता, उनी ही सांझो भी यीशु मसीह सांई जिन्दा करणा, कने परमेश्वरे सामणे खडे होणे तांई सांझो तुहाडे सोगी लेई ओणा है। 15 क्योंकि जडे दुख असां सेहन किते, सै तुहाडे फायदे तांई न, ताकि परमेश्वरे दा अनुग्रह जादा ला जादा मतयां लोकां जो मिल्ले, कने मते सारे लोक परमेश्वरे दिया महिमा तांई धन्यवाद करन। 16 इस ताई असां हिम्मत नी छडदे; भले ही साडे शरीर दी ताकत घटदी जा दी है, पर साडी अंदरूनी आत्मा रोज-रोज नोई होंदी जा दी है। 17 क्योंकि साडा ऐ हुणे दा घट कने थोडे बकते दा दुख साडे तांई ऐसी हमेशा दी महिमा जो पैदा करदा है, जिंदे बारे च असां सोची भी नी सकदे। (aiōnios g166) 18 कने असां दिखियां चीजां जो नी पर अणदिखियां चीजां जो दिखदे रेंदे न, क्योंकि दिखियां चीजां थोडे ही दिना दियां न, पर अणदिखियां चीजा सदा बणी रेंदियां न। (aiōnios g166)

5 क्योंकि असां जाणदे न, की धरतिया पर साडे शरीर इक तम्बूऐ सांई न जिंदे च असां रेंदे न। कने जालू असां मरी जाणा, तां परमेश्वरे दिया तरफा ला सांझो स्वर्गे च इक ऐसा शरीर मिलणा है, जड़ा माणुआं दे हथां ला नी बणया पर स्वर्गीय कने हमेशा तांई होणा है। (aiōnios g166) 2 इस शरीर च तां असां रोंदे न, कने बडी इच्छा रखदे न, की सांझो इक ऐसा शरीर मिल्ले जड़ा साडे स्वर्गे दे घरे सांई हो। 3 जालू सांझो सै स्वर्गे दा शरीर मिलणा, तां असां नंगे नी रेंणा। 4 कने असां इस घरे

च रेंदे होऐ भोझे हेठ दबुई करी रेंदे रेंदे न; क्योंकि असां इना संसारिक शरीरां जो
 नी छडणा चांदे न, पर असां चांदे न की परमेश्वरे सांझो स्वर्गे दा शरीर दे ताकि ऐ
 मरी जाणे बाले शरीर, नी मरणे बाले शरीर च बदलुई जान। 5 कने परमेश्वरे सांझो
 अपु नोऐ शरीर देंगे ताई तैयार कितया है कने उनी ही सान्झो बयाने दे स्पे च पबित्र
 आत्मा भी दितियो है, जडा ऐ यकीन दुआंदा है की परमेश्वरे उसयो जस्स पूरा
 करणा। 6 इस ताई असां हमेशा सबर रखदे न कने ऐ जाणदे न; की जालू दीकर
 असां शरीर च रेंदे न, तालू दीकर असां प्रभु ला दूर न जडा स्वर्गे च रेंदा है। 7
 क्योंकि असां प्रभु यीशु मसीह दे रूप जो दिखीकरी नी, पर उस भरोसे करणे दिया
 बजा ला जिन्दे न। 8 इस ताई असां सबर रखदे न, कने शरीर दे घरे जो छडी करी
 परमेश्वरे सोगी रेंणा जादा खरा समझदे न। 9 इस बजा ला साडे मने दी इक ही
 इच्छा है की, चाहे असां उदे सोगी स्वर्गे च होन, या असां इसा धरती पर होन,
 असां प्रभु जो खरे लगदे रेंन। 10 क्योंकि जस्सी हे, की मसीह साडा सारयां दा
 न्याय करे, कने हर इक माणुऐ जो उदे अपने भले बुरे कम्मा दा इनाम मिल्ले जडे
 उनी शरीर दे जरिये कितयो न। 11 सांझो पता है की परमेश्वरे दा डर क्या है, इस
 ताई असां सच्च पर भरोसा करणे ताई लोकां जो समझांदे न कने परमेश्वर सांझो पुरे
 तरीके ला जाणदा है कने मिजो उम्मीद है की तुहाडिया अंतरात्मा भी सांझो ढंगे ला
 पछेणी लिया है। 12 असां फिर भी अपनी प्रशंशा तुहाडे सामणे नी करदे बल्कि
 असां तुहांजो अपने बारे च घमंड करणे दा मोका दिन्दे न, ताकि तुसां उना जो
 जबाब देई सकन, जडे मने पर नी, बल्कि दिखावटी गल्लां पर घमंड करदे न। 13
 अगर कोई बोलदा है की असां पागल न, तां सै परमेश्वरे ताई न; अगर कोई बोले
 की साडे दिमाग खरे न, तां सै तुहाडे भले ताई न। 14 क्योंकि मसीह दा प्यार
 सांझो मजबूर करी दिन्दा है, इस ताई की असां ऐ भरोसा करदे न, की जालू इक
 माणु सारयां ताई मरी गया, तां सारे मरी गियो न। 15 कने मसीह इस ताई सारयां
 ताई मरया, ताकि जडे जिंदे न, सै अग्रे जो सिर्फ अपु जो खुश करणे ताई ना जीन
 पर उना जो उदे ताई जीणा चाईदा। मसीह उना ताई मरया कने परमेश्वरे उसयो
 जिन्दा करी दिता। 16 इस ताई हुणे ला असां कुसयो भी संसारिक नजरा ला नी
 दिखणा, अगर असां पेहले मसीह जो भी संसारिक नजरा ला दिखया था, पर हुण
 नी दिखणा क्योंकि हुण उसयो जाणी गियो न। 17 इस ताई, अगर कोई मसीह पर
 भरोसा करदा है, तां उसयो इक नौआ सभाव मिलया है, पुराणा सभाव खत्म होई

गिया है; कने हुण नोआ सभाब होई गिया है। 18 कने सारियां गल्लां परमेश्वरे दिया तरफा ला न जिनी मसीह दे जरिये सांझो अपने बाल बापस लौंदया है, कने लोकां जो परमेश्वरे सोगी मेल मिलाप करणे दी सेबा सांझो देई दिती है। 19 परमेश्वर सारे लोकां तांई इक रस्ता बणा दा था की जड़ा कुछ मसीहे कितया है, उदे जरिये परमेश्वरे सोगी मेल मिलाप करी सकन। परमेश्वरे लोकां दे पापां दा दोष उना पर नी लाया कने उनी शान्ति दे बारे च संदेश बंडणे दा कम्म सांझो देई दितया है। 20 इस तांई असां मसीह दे राजदूत न। परमेश्वर उदे संदेश जो अपनाने तांई साडे जरिये लोकां ला बिनती करदा है। असां मसीह दिया तरफा ला बिनती करदे न की परमेश्वरे बाल आई जा। 21 मसीह जड़ा पाप ला अनजाण था, उसी जो ही परमेश्वरे साडे तांई पाप बणाया, ताकि असां परमेश्वरे दिया नजरा च धर्मी बणी जान क्योकि मसीहे साडे पापां दी सजा अपने उपर लेई ली।

6 परमेश्वरे सोगी कम्म करणे बाले होणे दिया बजा ला असां तुसां ने बिनती करदे न, की परमेश्वरे दा अनुग्रह जड़ा तुसां पर होया है, उसयो तुसां बेकार मत जाणा दिया। 2 क्योकि पबित्र शास्त्र च परमेश्वर बोलदा है, “सही बकत पर मै तेरी सुणी, कने उद्धार दे रोजे मै तेरी सहायता किती।” सुणा; हुण ही सही बकत है; सुणा, ऐ ही है उद्धार दा दिन। 3 परमेश्वरे सोगी कम्म करदे होऐ साड़ा व्यवहार कुसी तांई कोई भी स्काबट नी बणदा है, ताकि ऐसा ना हो की कोई साडिया सेबा पर दोष लाऐ। 4 असां हर इक तरीके ला दसदे न की असां परमेश्वर दे सच्चे सेवक न। क्योकि असां बड़ा सबर रखीकरी कलेशां जो, दरिद्रता कने मुसीबतां जो सेहन करिरी, 5 असां कोड़े खादे, जेला च गे, कने दंगे फसादां च चोटों लगियां, असां बड़ी मेहनत किती, बगेर सोऐ कने बगेर खादे-पिते रे, 6 पर असां अपु जो बड़ा पबित्र रखया, अकली ला कम्म किते, सबर रखया कने दुज्जयां पर दया किती, पबित्र आत्मा दे हुकम मने, 7 सच्चा प्यार किता, असां सच्चाई दा संदेश सुणाया, परमेश्वरे दिया शक्तिया साडे च कम्म किता। असां सज्जे हथे च धार्मिकता दे हथियारे जो हमला करणे तांई कने खबे हथे जो बचाब तांई इस्तेमाल करदे न, 8 चाहे लोकां साड़ी इज्जत किती या बेइज्जती किती, तारीफ या बुराई किती, पर असां इमानदार न, पर सै बोलदे न की असां झूठे न। 9 भले ही लोक सांझो अनजाण समझदे न, पर फिरी भी असां प्रसिद्ध न; भले ही लोक सांझो मरयां सांई समझदे न, पर फिरी भी असां जिंदे न; सांझो सजा तां मिलदी है पर जानी ला नी मारी सके। 10 सांझो बडे

दुख थे, पर असां हमेशा खुश रेंदे थे। असां अपु तां गरीब थे, पर बाकियां जो आत्मिक रूपे च अमीर बणाई दिन्दे न। इयां न जियां साडे बाल कुछ नी फिरी भी साडे बाल सब कुछ है। 11 हे कुरिन्थुस शहर दे मसीह लोको, असां खुली करी तुसां जो सच्चियां गल्लां बोलदे न, असां पुरे दिले ला तुहांजो प्यार करदे न। 12 तुहाडे तांई साड़ा प्यार कदी घट नी होया, पर तुसां दा प्यार साडे तांई घटी गिया है। 13 पर अपने बाल बच्चे समझीकरी मैं तुहांजो बोलदा है, की तुसां भी साडे प्यार दे बदले च साडे सोगी पुरे दिले ला प्यार करा। 14 भरोसा नी करणे बाले लोकां सोगी कोई रिशता मत रखा, क्योंकि धार्मिक कम्मा दा कने बुरे कम्मा दी कोई बराबरी नी। लौई दा कने नेहरे दा कोई रिशता नी। 15 कने मसीह दा शैताने सोगी कोई रिशता नी है। कने भरोसा करणे बाले लोकां दा भरोसा नी करणे बाले लोकां सोगी कोई रिशता नी। 16 कने मूर्तियाँ दी परमेश्वरे दे मंदरे च कोई जगा नी। क्योंकि असां तां जिंदे परमेश्वरे दे मंदर न; जियां परमेश्वरे पबित्र शास्त्र च बोलया है, “मैं इना लोकां सोगी रेंणा कने उना बिच ही चलणा फिरणा; कने मैं उना दा परमेश्वर होणा, कने सै मेरे लोक होंगे।” 17 इस तांई प्रभुए सांझो ला पबित्र शास्त्र दे जरिये बोलया है की, “उना लोकां ला लग होई जा जडे परमेश्वरे पिच्छे नी चलदे। कने गंदिया चीजां सोगी कोई रिशता मत रखा, तां मैं तुहांजो अपनाणा।” 18 “कने मैं तुहाडा पिता होणा कने तुसां मेरे बेटे कने बेटियाँ होणे: ऐ सारयां ला शक्तिशाली प्रभु परमेश्वर दा बचन है।”

7 हे प्यारो भाईयो, क्योंकि परमेश्वरे सांझो अपने बच्चे दे रूपे च अपनाणे दा बायदा कितया है, इस तांई ओआ असां अपने शरीर दे सारे बुरे कम्म कने आत्मा दे गंदे बिचारां जो करणा बंद करी देन कने परमेश्वरे दा डर मन्नी करी कने उदी इज्जत करा। कने सांझो पुरे तरीके ला पबित्र जिन्दगी जिणे तांई मेहनत करणी चाईदी। 2 तुसां सांझो ला अपने पुरे दिले ला प्यार करा, असां ना कुसी ने अन्याय किता, ना कुसी दा कुछ बिगाडया, ना कुसी सोगी बेईमानी किती। 3 मैं ऐ तुसां पर दोष लाणे तांई नी बोला दा है, क्योंकि मैं पेहले ही बोली बैठया है की, असां तुसां सोगी पुरे दिले ला प्यार करदे न कने असां लग नी होणा है चाहे असां जिन्दे रेन या मरी जान। 4 मैं तुसां ला बडे भरोसे सोगी बोला दा है, मिंजो तुसां पर बडा घमंड है: मिंजो बडी तसल्ली मिली; कने मैं अपने सारे दुखां च भी बडा जादा खुश रेंदा है। 5 क्योंकि जालू असां त्रोअस शहर जो छडी करी मकिदुनिया प्रदेश च आये,

ओथु सांझो कोई अराम नी मिल्ला, बल्कि हर पासे ला परेशानियां झेलदे थे; कने हर पासे लड़ाई-झगड़े थे कने साडे मना च डर था। 6 पर उदास लोकां जो तसल्ली देणेबाले परमेश्वरे तीतुस जो साडे बाल भेजी करी सांझो तसल्ली दिती। 7 ऐ सच्च है की तीतुस सोगी मिली करी असां खुश होऐ। पर इसला भी जादा असां इसा गल्ला पर खुश होऐ की तुसां लोकां उसयो बड़ी हिम्मत दिती। कने उनी मिंजो दसया की तुसां मिंजो ला मिलणे दी कितणी इच्छा रखदे न, मेरे ताई दुखी न कने मेरे ताई कितणी लगन रखदे न, इना गल्लां ला मिंजो होर भी खुशी होई। 8 मिंजो कोई पछताबा नी है की मैं तुहांजो ऐ सकत चिट्ठी लिखी, चाहे तुसां इसा दिया बजा ला दुखी होऐ। पर पेहले मिंजो पछताबा होया जालू मैं दिखया की इसा चिठिया जो पढी करी तुहांजो थोड़े बकते ताई दुख तां होया पर ऐ थोडिया देरा ताई था, 9 पर हुण मैं खुश है इस ताई नी की तुहांजो बड़ा जादा दुख देईकरी बल्कि इस ताई की तुसां उस दुखे दिया बजा ला पाप करणा बंद करी दिता कने परमेश्वरे बाल मुडी आए, क्योंकि ऐ उस तरीके दा दुख है जड़ा परमेश्वर चांदा है की उदे लोकां जो हो, ताकि तुहांजो साडिया बजा ला कुसा भी गल्ला च तकलीफ ना हो। 10 क्योंकि सै दुख जड़ा परमेश्वर चांदा है की असां अनुभव करन, सै लोकां दे पश्चाताप करणे दी बजा बणदा है, जिदे ला उना दा उद्धार होंदा है, कने फिरी उसला पछताणा नी पोंदा: पर संसारे दे दुख लोकां जो हमेशा दिया मौता पासे लेई जांदे न। 11 ध्यान दिया की परमेश्वरे दिया तरफा ला आयो दुखां ला तुहाड़े च क्या-क्या बदलाव आया है, इदे ला तुहाड़ी हिम्मत बदी गई, अपने आप जो बेकसूर साबित करणे दी इच्छा, अन्याय ताई तुहाडा गुस्सा, परेशानियां ताई ऐसी साबधानी, मिंजो ला मिलणे दी इतणी जादा इच्छा, परमेश्वरे दी सेवा ताई तुहाड़ी फिकर, कने गलत माणुऐ जो सजा देणे ताई तैयार रेणा, इना कम्मा दे जरिये तुसां साबित करी दितया है की सब कुछ ठीक-ठाक करणे च तुसां कोई भी कमी नी छडी है। 12 हालांकि ऐ सकत चिट्ठी मैं तुहांजो इस ताई नी लिखी थी की मिंजो उना दी चिंता थी, जड़े अन्याय करदे न कने ना ही उना ताई जड़े अन्याय सेंदे न, पर इस ताई लिखी की तुसां अपु ही परमेश्वरे सामणे दिखी लेन की तुसां साडे ताई कितणे सच्चे न। 13 इस ताई सांझो इना गल्लां ला हिम्मत मिल्ली; कने साडी हिम्मत कने खुशी तीतुस जो दिखीकरी होर भी बदी गई; क्योंकि सै तुहाडिया बजा ला बड़ा खुश होई गया था। 14 क्योंकि अगर तीतुसे सामणे मैं तुहाड़े बारे च

घमंड किता है, तां मै शर्मिदा नी होया, पर जियां असां तुसां सोगी सारियां गल्लां सच्च-सच्च बोली दितियां थियां, तियां ही साड़ा घमंड दसणा तितुसे सामणे भी सच्च साबित होया। 15 कने जालू सै याद करदा है की तुसां सारयां उदी गल्ल मन्नी कने डरदे कने कमदे उसयो अपनाया तां उदा प्यार तुहाड़े ताई होर भी बदी गया है। 16 मिजो इसा गल्ला दी भी खुशी होंदी है की, हुण मै हर गल्ला च तुसां पर भरोसा करी सकदा है।

8 हे मसीह भाईयो हुण, मै तुहांजो उस अनुग्रह दे बारे च दसणा चांदा है, जिसयो परमेश्वरे मकिदुनिया प्रदेश दिया कलीसिया जो दितया है। 2 जालू बडियां भरियां पेशानियां ला उना दी परिक्षा होई, तां सै बडे खुश होऐ कने हालांकि सै बडे गरीब थे, फिरी भी उना होर भरोसा करणे बालयां दिया सहायता ताई उदारता ने पैसे दिते। 3 कने उना दे बारे च मेरी ऐ गबाई है की, उना ना सिर्फ जितणा होई सकदा था, बल्कि उना उसला भी जादा बदीकरी दिता, कने उना ऐ कम्म अपणी इच्छा ला किता। 4 उना लोकां साडे ला बड़ी बिनती करिरी इजाजत मंगी की यस्शलेम शेहरे दे परमेश्वरे दे पबित्र लोकां दी सहायता करणे दा सांझो मौका दिया। 5 असां इदी उम्मीद बिलकुल भी नी कितियो थी। उना अपने आपे जो पेहले प्रभु जो कने फिरी सांझो देई दिता, ठीक बिलकुल तियां ही जियां परमेश्वर चांदा था की सै करन। 6 इस ताई असां तीतुस ला बिनती किती की, जियां उनी पेहले दान गिठा करणे दा कम्म शुरू कितया था, तियां ही तुहाड़े बिच इस दान दे कम्मा जो पूरा करी ले। 7 पर जियां तुसां सारियां गल्लां च मतलब की भरोसे च, परमेश्वरे दे बचने दा प्रचार करणे च, ज्ञान कने तुसां दुज्जयां दी सहायता करणे ताई कोशिश करणे च, कने उस प्यार च जड़ा सांझो ला करदे न, इना गल्लां च बददे जांदे न, तियां ही हुण इना भरोसा करणे बाले गरीब लोकों जो दान देणे दिया सहायता ताई भी बददे जा। 8 मै तुहांजो कोई हुकम नी देणा लगाया, मै सिर्फ दुज्जे लोकां दी हिम्मत दी तुलना तुहाड़े प्यार ला करा दा है, ताकि तुहाड़े प्यारे दिया सच्चाईया जो परखी सकें। 9 तुसां साडे प्रभु यीशु मसीह दे अनुग्रह जो ढंगे ला जाणदे न की, सै अमीर होईकरी भी तुहाड़े ताई गरीब बणी गया ताकि उदे गरीब होणे ला तुसां अमीर होई जान। 10 पिछले साल तुसां दान देणे कने ऐसी इच्छा रखणे च भी सारयां ला अगो थे। इस बारे च तुहाड़े ताई क्या खरा है, उदे बारे च मेरी ऐ सलाह है की; हुण जड़ा तुसां शुरू कितया है, उसयो पूरा करा। शायद तुसां भी इस कम्मे

जो खत्म करणे ताई उतणे ही उत्साही न जितणे तुसां इसयो शुरू करणे च थे। 12 क्योंकि अगर तुहाडे मने च दुज्जयां जो दान देणे दी इच्छा है तां जडा उदे बाल है, उदे मुताबिक ही उदा दान ग्रहण होणा, ना की उदे मुताबिक जडा उदे बाल नी है। 13 मैं नी चांदा है की दुज्जयां दी जिन्दगी असान बणाणे ताई तुहाडी जिन्दगी मुशकिल होई जा। पर सारयां बाल इक बराबर होणा चाईदा। 14 पर इस बकत तुहाडी बढोतरी उना दी जरूरत पूरी करणे ताई भतेरी है, पर कदी ऐसा भी होई सकदा है की तुहांजो जरूरत पेई जा, तालू से तुहाडी सहायता करन, तालू दोनों इक बराबर होई जाणा। 15 जियां पबित्र शास्त्र च लिखया है, “जिनी बडा जादा गठेरया, उसयो जादा नी मिलया कने जिनी घट गठेरया, उसयो कुसी चिजा दा घाटा नी होया।” 16 कने परमेश्वरे दा धन्याबाद हो की, जडी फिकर मिंजो तुहाडे बारे च है, ठीक सियुदी ही फिकर परमेश्वरे तुहाडे बारे च तीतुस दे मने च पाई दिती है। 17 जालू असां तीतुसे जो तुहाडे बाल जाणे ताई बोलया, तां उनी खुशिया ला साडी बिनती मन्नी लेई कने बडा उत्साही होईकरी अपणिया मरजिया ला तुहाडे बाल आया है। 18 कने असां तीतुस सोगी इक होर मसीह भाईऐ जो भेजया है, कने सारियां कलीसियां दे भरोसा करणे बाले लोक उदी तारीफ करदे न क्योंकि सै शुभसमाचार दा प्रचार बडे अच्छे ला करदा है; 19 कने सिर्फ इतणा ही नी, पर उसयो कलीसिया दे लोकां ही चुणया है, ताकि इस दान देणेबाले कम्मे ताई साडे सोगी चले। असां ऐ दान दी सेवा इस ताई करदे न, ताकि प्रभु दी महिमा हो, कने ऐ दसणे ताई की असां यरूशलेम शेहरे दे भरोसा करणे बालयां दी सहायता करणा चांदे न। 20 तीतुस सोगी उस मसीह भाईये जो भेजणे जरिये असां इसा गल्ला दा ध्यान रखदे न, की इस दान देणे दिया सहायता दे बारे च जिदी सेवा असां करदे न, कोई सांझो पर दोष ना लाई सके। 21 क्योंकि असां सिर्फ उना गल्लां पर ही ढंगे ला ध्यान नी दिन्दे न, जडियां परमेश्वरे दिया नजरा खरियां न, पर उना पर भी दिन्दे न जडियां माणुआं दिया नजरा च खरियां न। 22 कने असां इना सोगी अपने इक होर मसीह भाईऐ जो भेजया है, असां उसयो बडी बरी बडियां गल्लां च परखया है कने सै सच्चा निकलया है। पर हुण तुसां पर उसयो बडा भरोसा है, इसा बजा ला सै होर भी जादा उत्साही है। 23 अगर कोई तीतुस दे बारे च पुच्छे, तां सै मेरा साथी, कने तुहाडे ताई मेरा सहकर्मी है, कने अगर साडे मसीह भाईयां दे बारे च कोई पुच्छे, तां सै कलीसिया दे भेजयो होऐ न कने उना दी जिन्दगी मसीह दी महिमा ताई है।

24 इस ताँई अपणा प्यार कने साडा सै घमंड जडा असां तुहाडे बारे च करदे न, कलीसिया दे सामणे उना जो साबित करिरी दसा।

9 हुण यरूशलेम शेहरे दे भरोसा करणे बाले लोकां जो दान देणेबाली सेबा दे कम्मे दे बारे च मिंजो तुसां जो लिखणा जरूरी नी है। 2 क्योंकि मैं तुहाड़े मने दिया इच्छा जो जाणदा है। कि तुसां उना दी सहायता करणे ताँई तैयार न, इस ताँई मैं तुहाड़े बारे च मकिदुनिया शेहरे दे भरोसा करणे बाले लोकां सामणे घमंड दसदा है की, तुसां अखाया प्रदेशे दे लोक पिछले इक साले ला तैयार थे, कने तुहाड़े उत्साह दिया बजा ला होर भी लोक उत्साहित होईं गे। 3 मैं तीतुस कने दो होर मसीह भाईयां जो तुहाड़े बाल इस ताँई भेजा दा है, ताकि असां जडा घमंड तुहाड़े बारे च दसया, सै इसा गल्ला च बेकार ना होईं जाए; पर जियां मैं बोलया तियां ही तुसां यरूशलेम शेहरे दे भरोसा करणे बाले लोकां ताँई दान देंगे ताँई तैयार रिया। 4 इयां ना हो की, अगर कोई मकिदुनी शेहरे दा मसीह भाई मेरे सोगी ओए, कने तुहाड़ा दान तैयार ना होए, तां साडा जडा तुसां पर भरोसा है, उदिया बजा ला असां बेईजत होणा, पर तुसां इदे ला भी जादा बेईजत होणा। 5 इस ताँई मैं मसीह भाईयां ने बिनती करणा जरूरी समझया की सै पेहले ही तुहाड़े बाल चली जान, कने जडा दान देंगे दा बायदा तुसां कितया था, उसयो तैयार रखन, जडा तुसां प्यारभाव ला देणा है ना की कुसी मजबूरिया च। 6 पर इसा गल्ला जो याद रखा, की जडा थोडा रांदा है सै बडदा भी थोडा है; कने जडा जादा रांदा है, सै जादा ही बडदा है। 7 इस ताँई जिनी अपणे मने च जितणे भी देंगे दा फेसला कितया है, सै उतणा ही दे, बिना इच्छा या मजबूरिया ला ना दे। क्योंकि परमेश्वर खुशिया ला देणेबालयां ला प्यार करदा है। 8 परमेश्वर तुहांजो तुहाड़िया जरूतां ला भी जादा हर तरा दा अनुग्रह देई सकदा है। जिदे ला हर गल्ला च कने हर बेले, सब कुछ, जडा तुहांजो जरूरी हो, सै तुहाड़े बाल रे, ताकि तुहाड़े बाल हर भले कम्मा ताँई जरूरत ला जादा हो। 9 जियां की पबित्र शास्त्र च लिखया है, “परमेश्वर जरूरतमंदा जो उदारता ला दिन्दा है, कने जडे कम्म सै करदा है, सै सही न कने हमेशा होंदे रेणे।” (aiōn g165) 10 परमेश्वर हमेशा किसाना जो रांणे ताँई बी दिन्दा है, कने खांणे ताँई रोटी दिन्दा है। इयां ही परमेश्वरे ऐ इंतजाम करणा की तुहाड़े बाल हमेशा इतणी धन दौलत हो ताकि तुसां होर जादा उदारता ला गरीब लोकां दी सहायता करी सकन। 11 परमेश्वरे तुहांजो हर तरीके ला आशीर्वाद देणा ताकि तुसां हमेशा उदारता ला दान

देई सकन। कने जालू असां तुहाड़े दाने जो जरूरतमंद लोकां जो देणा, तां उना परमेश्वरे जो धन्याबाद देणा। 12 क्योंकि इसा सेबा जो पूरा करणे ला, ना सिर्फ परमेश्वरे दे लोकां दियां जरूरतां पुरियां होंदिया न बल्कि लोकां दिया तरफा ला परमेश्वरे दा बड़ा जादा धन्याबाद होंदा है। 13 क्योंकि दुज्जयां दी सहायता करणे तांई दान देणे दी ऐ सेबा दसदी है की तुसां अपना बायदा पूरा किता है, क्योंकि तुसां मन्या है की मसीह दा शुभसमाचार ही सच्च है कने खुद अपने बचना दा पालन किता है। कने गरीब भरोसा करणे बाले कने सोगी ही बाकी भरोसा करणे बालयां दी सहायता करणे च उदारता दसदे न। 14 कने उना तुहाड़े तांई परमेश्वरे ला प्राथना करणी। सै तुहाड़े ने प्यार करदे न, क्योंकि सै जाणदे न की परमेश्वरे तुहांजो बड़ा जादा अनुग्रह दितया है। 15 ओआ असां परमेश्वरे दे उस दाने तांई धन्यबाद करन, जिसयो शब्दां च बयान नी करी सकदे।

10 मै सेई पौलुस है, जडा तुहाड़े सामणे डरफोक लगदा है, पर तुहांजो ला दूर जाणे पर हिम्मत बाला होई जांदा है। तुहांजो ला मसीह दिया उदारता कने कोमलता दिया बजा ला बिनती करा दा है की, 2 कुछ लोक बोलदे न असां इस संसारे दे लोकां सांई कम्म करदे न। इस तांई जालू मै ओणा है तां मिंजो उम्मीद है की मिंजो उना सोगी सकत होंणा पोंणा। मै हथ जोड़ी करी बिनती करदा है की जालू मै तुहाड़े बाल ओगा तां मिंजो तुहाड़े सोगी ऐसा बर्ताब ना करणा पोए। 3 क्योंकि असां इस संसार च रेंदे जस्स न, पर असां अपने दुशमणा सोगी संसारे दे लोकां सांई नी लडदे। 4 क्योंकि जिना हथियारां ला असां लडदे न सै संसारे दे लोकां दे हथियारा सांई नी न, पर किल्यां जो ढांणे तांई परमेश्वरे दे शक्तिशाली हथियार न। 5 इना दे जरिये असां उस हर इक बिरोध जो कने उस हर इक घमंड करणे बालिया गल्ला जो, जडी परमेश्वरे दे ज्ञान दे खिलाफ खडी होंदी है, उना उच्चिया गल्लां जो असां डाई दिन्दे न, कने साड़े हर इक बिचार जो काबू करिरी उना जो मसीह दा हुकम मनणे बाला बणाई दिन्दे न। 6 कने जालू तुसां मसीह दा हुकम मनणे बाले बणी जांदे न, तां असां सारे हुकम नी मनणे बालयां जो सजा देंगे तांई तैयार रेंदे न। 7 तुसां सिर्फ बाहरी दिखावे जो ही दिखदे न, अगर कुसी जो अपने उपर ऐ भरोसा हो, की मै मसीह दा है, तां सै ऐ भी जांणी ले, की जियां सै मसीह दा है, तियां ही असां भी मसीह दे न। 8 क्योंकि अगर मै उस हके दे बारे च होर भी घमंड दस्सें, जडा तुहाड़े भरोसे जो खत्म करणे तांई नी, पर तुहांजो भरोसे

च बदणे ताई दितया, तां इदे च मिजो कोई शर्म नी होणी। 9 मै नी चांदा की तुहांजो ऐ लग्गे की मै ऐ चिठ्ठी तुहांजो डराणे ताई लिखा दा है। 10 क्योंकि तुहांजो चे कुछ लोक बोलदे न, “पौलुसे दियां चिठियां गंभीर कने प्रभावशाली न; पर जालू दिखदे न, तां बोलदे न सै कमजोर माणु है कने उदियां गल्लां बेकार न।” 11 इस ताई ऐसा बोलणे बालयां जो ऐ समझणा चाईदा की, जियां असां दूर रेईकरी चिठिया दे जरिये तुसां सोगी गल्लां करदे न, तियां ही तुहाडे सोगी रेणे पर साडे कम्म भी होणे। 12 क्योंकि सांझो ऐ हिम्मत नी है की असां अपने आपे जो उना सोगी गिणन, या उना जो अपने ला मिलान, जडे अपनी तारीफ करदे न, कने अपने आप जो अपु चे ही नापदे न, कने अपनी तुलना अपने आपे ने ही करदे न। तां सै अपने आपे जो मुख बणांदे न! 13 असां उस कम्मे ला बाहर जडा परमेखरे सांझो दितया है कदी घमंड नी करदे, पर उसा ही मर्यादा दीकर असां घमंड करणा जडी मर्यादा परमेखरे साडे ताई बणाईयो है, कने उदे च ही तुसां भी आई गियो न कने उस मर्यादा दे अनुसार ही घमंड भी करणा। 14 क्योंकि असां अपने आपे जो मर्यादा ला बाहर नी बदाणा चांदे, जियां की तुहांजो दीकर पुज्जणे दिया हालता च होदा, बल्कि तुहांजो मसीह दा शुभसमाचार सुणाणे ताई कुरिन्थुस शेहर दीकर यात्रा करणे बाले असां पेहले माणु थे। 15 कने असां मर्यादा ला बाहर होरनी दिया मेहनता पर घमंड नी करदे न; पर सांझो उम्मीद है, की जियां-जियां तुहाडा भरोसा बददा जाणा तियां-तियां असां अपनीया मर्यादा अनुसार तुहाडिया बजा ला तुहाडे अखे-बखे दे कने मते लोकां बाल पूजी सकदे न। 16 की असां तुहाडे इलाके ला बाहर दूर-दूर जगा च भी शुभसमाचार सुणान, कने ऐ नी की होरनी दे दायरे अंदर बणयो कम्मे पर घमंड करन। 17 पर जियां पबित्र शास्त्र च लिखया है की, “अगर कोई घमंड करणा चांदा है, तां सै प्रभु पर घमंड करे।” 18 क्योंकि जडा अपनी बडाई करदा है, सै नी, पर जिदी बडाई प्रभु करदा है, सै ही प्रभु दिया नजरा च खरा है।

11 अगर तुसां उना दी सुणी लेंदे न जालू सै अपने बारे च खरियां गल्लां करदे न। इस ताई मिजो उम्मीद है की तुसां मिजो भी बरदाश करी लेणा है जालू मै थोडा बेवकूफां सांई गल्लां करगा। 2 क्योंकि मै तुहाडे ला तियां ही प्यार करदा कने तुहाडी चिंता करदा है जियां परमेखर करदा है, इस ताई की मै तुहांजो सिर्फ यीशु मसीह जो देणे दा बायदा कितया है, जियां इक पिता अपनीया कुआरिया कुडिया

जो उसा दे लाड़े जो देई दिन्दा है, जालू उना दा बियाह होंदा है। 3 पर मैं डरदा है की जियां शैताने सपे दे स्मे च अपणिया चलाकिया ला पैली जनानी हव्वा जो बेहकाई दिता, तियां ही शैतान तुहाड़े मना जो उस सीधेपन कने पबित्रता ला मसीह दी सेवा ला दूर ना करी दे। 4 जालू कोई तुहाड़े बाल आई करी कुसी होर यीशु दे बारे च दसदा है, तां तुसां उस नोए माणुऐ जो अपनाने तांई बड़े उताबले रेंदे न। ऐ यीशु सै नी है जिदे बारे च असां तुहांजो प्रचार कितया था। कने तुसां खुशिया ला उस पर ध्यान दिन्दे कने सुणदे न जालू तुहांजो इक ऐसी आत्मा कने संदेश मिलदा है, सै यीशु दे शुभसमाचार कने आत्मा सांई नी होंदा जड़ा असां तुहाड़े बाल लेईकरी आयो थे। 5 मैं अपने आपे जो उतणा ही खरा समझदा है जितणा की सै प्रेरित जड़े अपने आपे जो सारयां ला महान प्रेरित समझदे। 6 मैं बोलणे च इतणा माहिर नी है, पर मैं मसीह कने शुभसमाचार दे बारे च अच्छे ला जाणदा है; मैं अपना ज्ञान उना सारियां गल्लां जरिये साबित कितया है जडियां मैं सिखाईयां न। 7 मैं तुहाड़े बिच परमेश्वरे दा शुभसमाचार मुफ्त च प्रचार किता कने अपने आपे जो नम्र किता ताकि तुहाड़ी इज्जत हो। मैं क्या ऐसा करिरी पाप किता? 8 तुहाड़ी सेवा करणे तांई मैं होर कलीसियां ला सहायता लेई। तुहांजो ऐ नी बोलणा चाईदा की ऐसा करणा गलत है। 9 कने जालू मैं तुहाड़े सोगी था, कने मिंजो पैसयां दी कमी होई, तां मैं कुसी पर भी भोजन नी बणया, क्योंकि मसीह भाईयां मकिदुनिया प्रदेश ला आई करी मेरिया कमिया जो पुरा किता: कने मैं कुसी भी गल्ला च अपने आपे जो तुसां पर भोजन नी बणना दिता, कने ना अग्रे जो बणना देणा है। 10 मसीह दी सचाई मिंजो च है, इस तांई मिंजो घमंड है की मैं अखाया प्रदेशे च कुसी ला भी पैसे नी ले। 11 मैं तुहाड़े पैसे कनी ले? क्या मैं ऐ इस तांई किता की, मैं तुहांजो ला प्यार नी करदा? ऐ तां परमेश्वर जाणदा है की मैं तुहांजो ने प्यार करदा है। 12 पर जड़ा मैं करदा है, सेई करदे रेणा है, ताकि मैं उना लोकां जो रोकी सकें, जड़े इसा गल्ला पर घमंड करणे तांई इक मोका तोपदे न की परमेश्वरे तांई उना दा कम्म साड़े कम्मे सांई है। 13 क्योंकि ऐसे लोक झूठे प्रेरित, कने धोखे ने कम्म करणे बाले, कने मसीह दे प्रेरित होंगे दा झूठा दाबा करदे न। 14 कने ऐ कोई हेरानिया बाली गल्ल नी है, क्योंकि शैतान अपु भी परमेश्वरे दी महिमा दे स्वर्गदूत दा रूप धारण करिरी धोखा दिन्दा है। 15 इस तांई अगर शैताने दे सेवक भी परमेश्वरे दे सेवकां दा रूप धारण करन, तां इदे च कोई बड़ी बड़ी गल्ल नी है, पर उना दा अंत

उना दे कम्मा दे अनुसार होणा। 16 मै फिरी बोलदा है, कोई मिंजो मुख ना समझे; नी तां मुख ही समझीकरी मिंजो अपनाई लिया, ताकि थोड़ा दिया मै भी घमंड करी सके। 17 बेधड़क होईकरी मै जड़ा कुछ बोलदा है, ऐ मै तियां नी बोलदा जदिया प्रभु यीशु मसीह चांदा है, पर मन्ना मुखता दिया बजा ला बोलदा है। 18 जालू की बड़े लोक इस संसारे दे लोकां सांई घमंड करदे न, तां मै भी घमंड करणा। 19 तुसां तां समझदार होईकरी भी खुशिया ला मूर्खा दी सेहन करी लेंदे न। 20 क्योंकि जालू तुहांजो कोई नोकर बणाई लेंदा है, या तुहाड़ा सब कुछ लेई लेंदा है, या तुहांजो धोखा दिन्दा है, या अपने आपे जो तुहांजो ला उपर रखदा है, या तुहाड़े मुए पर थप्पड़ मारदा है, तां तुसां सेहन करी लेंदे न। 21 मिंजो ऐ सब करणे च शर्मिंदगी होंदी; पर जिसा कुसी गल्ला पर कोई घमंड करदा है, मै मुखता ला बोलदा है तां मै भी घमंड करदा है। 22 क्या सै ही इब्रानी न? मै भी इब्रानी है, क्या सै इस्राएली न? मै भी इस्राएली है, क्या सै अब्राहम दे बंशे दे न? अब्राहम दा बंशज मै भी है। 23 क्या सेई मसीह दे सेवक न? मै पागला सांई बोलदा है, मै उना ला बदीकरी है! मै उना ला जादा मेहनत कीतियो है, उना ला जादा बार जेला गया है, बड़ी बरी कोड़े खादे न, बड़ी बरी मेरिया जानी जो खतरा होया। 24 यहूदी अगुवां मिंजो पंज बरी उनताली-उनताली कोड़े मारे। 25 तिन बरी मै बेंता ने मार खादी; इक बरी पथरा ने मार खादी; तिन बरी मेरा जाज सुमुद्रे च टूटी करी डूबी गया, इक रात दिन मै सुमुद्रे च कटी। 26 बार-बार मिंजो सफर करणा पिया; कदी खड़ा च, कदी खुबंर डाकुआं दे, कदी अपने देशे दे लोकां दे, कने कदी होर जातियां दे लोकां दे, कदी शेहेरां च, कदी बणा च, कदी समुद्रे दे खतरयां दा कने कदी झूठे मसीह भाईयां दे खतरयां दा सामणा करणा पिया। 27 मै केई रातां जागी करी, भूखा प्यास रेईकरी, सर्दियां च थोड़े कपड़यां च रेईकरी बड़ी मेहनत किती कने बड़ियां मुसीबतां झेलियां। 28 कने इना सारियां गल्लां दे इलाबा मिंजो हर रोज सारियां कलीसियां दी भलाई दी चिंता दा भोज बणी रेंदा है। 29 जालू कोई कमजोर होंदा था तां मै भी अपने आपे जो कमजोर महसूस करदा था। जालू कोई पाप करदा है, तां मै बड़ा परेशान होंदा है। 30 अगर घमंड करणा जरूरी है, तां मै भी अपणिया कमजोरियां दिया गल्लां पर घमंड करणा। 31 परमेश्वर, जड़ा साड़े प्रभु यीशु मसीह दा पिता, जड़ा हमेशा धन्य है, सै जाणदा है, की मै जुठ नी बोलदा। (aiōn g165) 32 जालू मै दमिश्क शेहेरे च था, राजा अरितास दे राज्यपाले मिंजो पकड़ने

ताई शेहरे च पैरा बठाई दितया था। 33 पर दोस्तां मिंजो इक टोकरिया च इक लम्बा रस्सा बन्नी करी उदे च बैठाया कने उसयो दिबारां दे इक सुराखे ला बाहर जमिना पर उतारी दिता कने इयां करिरी मैं राज्यपाले दे हथे ला बची के निकली गया।

12 घमंड करणा मेरे ताई ठीक नी है, पर तमी करणा पोंदा है; तां मैं प्रभु दे दितयो दर्शण कने प्रकाशना दी चर्चा करणी। 2 मैं इक ऐसे माणुए जो जाणदा है, जडा मसीह पर भरोसा रखदा है, मसीह जो चौदा साल पेहले स्वर्गे जो चुकी लिया जिथ् परमेश्वर रेंदा, मैं नी जाणदा की सै अपने शरीर च था, या सिर्फ आत्मा च था, ऐ सिर्फ परमेश्वर ही जाणदा है। 3 मैं दुबारा बोलदा है, मैं जाणदा है की ऐ माणु स्वर्गे जो चुकी लिया (फिरी भी मिंजो नी पता की ऐ सच्ची होया की या इक सुपना था, ऐ तां परमेश्वर ही जाणदा) कने ऐसियां गल्लां सुणियां जिना दा शब्दां च बखान नी करी सकदे कने जिना दे बारे च दुज्जयां जो दसणे दी लोकां जो इजाजत नी है। 5 ऐसे माणुए पर तां घमंड करणा, पर अपने आपे पर अपणियां कमजोरियां जो छडी करी, अपने बारे च घमंड नी करणा। 6 क्योंकि अगर मैं घमंड करणा चांगा भी तां मैं मुख नी होणा, क्योंकि मैं सच्च बोलणा; पर मैं अपने आप जो घमंड करणे ला रोकदा है, इयां ना हो की, जियां कोई मिंजो दिखदा है, या मिंजो सुणदा है, मिंजो उसला बदीकरी समझे। 7 पर मिंजो उना अनोखी चीजां दे बारे च घमंड नी करणा चाईदा जडियां परमेश्वरे मिंजो दसियां न। इस ताई मेरे शरीर च कंडा चुभाया मतलब की मिंजो बड़ी बडी मुसीबत दितियो है। शैताने दिया तरफा ला इक दूत मिंजो मारणे कने मिंजो घमंडी होणे ला रोकणे ताई दितया है। 8 इदे बारे च मैं प्रभु ला तिन्न बरी बिनती किती की, मिंजो ला ऐ दूर होई जा। 9 कने उनी मिंजो ने बोलया, “मेरा अनुग्रह तेरे ताई काफी है; क्योंकि मेरी शक्ति कमजोरिया च सिद्ध होंदी है।” इस ताई मैं बडिया खुशिया ने अपणियां कमजोरियां पर घमंड करणा है, ताकि मसीह दी शक्ति मिंजो मिलदी रे। 10 इसा बजा ला मसीह ताई मैं कमजोरियां च, कने निंदा च, कने दरिद्रता च, कने लडाई झगडयां च, कने मुसीबतां च खुश है, क्योंकि जालू मैं कमजोर होंदा है, तालू मैं मसीह दी शक्ति ने शक्तिशाली होंदा है। 11 मैं मुख तां बणया, पर ऐ तुसां ही न जिना मिंजो ऐसा करणे ताई मजबूर किता: तुहांजो तां मेरी प्रशंशा करणी चाईदी थी, क्योंकि अगर मैं कुछ भी नी है, तमी उना महान प्रेरितां ला कुसी भी गल्ला च घट नी है। 12 मैं तुहाडे

बिच रेईकरी इक सच्चा प्रेरित होणे दे सबूत दिते, मैं सबर रखया, चिन्न चमत्कार, अनोखे कम्म, कने शक्ति दे कम्म दस्से। 13 तुसां कुसा दिया गल्ला च होर कलीसियां ला घट थे, सिर्फ इक ही गल्ल की जड़ी मैं बाकियां कलीसियां सोगी किती कने तुहाड़े सोगी नी किती की, मैं तुहाड़े ला अपणियां जुस्सतां ताईं पैसे नी मंगे, तुहाड़ा ऐ सोचणा गलत है की मैं ऐसा करिरी तुहाड़े बिरोध च गलत कितया है। 14 दिखा मैं तीजी बरी तुहाड़े बाल ओणे ताईं तैयार है, कने मैं इस बरी भी तुहाड़े ला कोई सहायता नी लेणी; क्योंकि मैं तुहाड़िया संपतिया जो नी, पर तुहांजो चांदा है। क्योंकि बचयां जो अपने माता-पिता ताईं धन नी गठेरणा चाईदा, पर माता-पिता जो बचयां ताईं धन दौलत गठेरणी चाईदी। 15 मैं तुहाड़े ताईं बड़िया खुशिया ला अपना सब कुछ देई देणा बल्कि अपने आप जो भी देई देणा; क्योंकि मैं तुहांजो ने बड़ा प्यार करदा है, पर ऐसा लगदा है की तुसां मिंजो ने घट प्यार करदे न। 16 कुछ भी हो, मैं तुहांजो पर भोज नी बणया, पर दुज्जयां जो लगदा है की मैं चलाक है कने मैं तुहांजो धोखा दिता है, पर ऐ झूठ है। 17 मैं तीतुस जो कने होर मसीह भाईयां जो कदी भी तुहांजो बाल भेजी करी पैसे दी सहायता नी मंगी। 18 मैं तीतुस जो कने उदे सोगी अपने मसीह भाईऐ जो भेजया था, तां क्या तितुसे धोखा देईकरी तुहांजो ला कुछ लिया? नी! क्योंकि साड़ा इक ही मकसद है कने साड़ा इक ही कम्म है। 19 मेरे प्यारे मसीह भाईयो, तुसां अपने मने च ऐ सोचा दे होणे न की असां ऐ सब अपने बचाव ताईं बोला दे न। पर असां ऐ सब परमेश्वरे दे सामणे यीशु मसीह च तुहाड़े भरोसे जो मजबूत करणे ताईं बोला दे न। 20 क्योंकि मिंजो डर है, कुथी इयां ना हो, की मैं तुहाड़े बाल ओऐ कने मैं जदेई उम्मीद कितियो है, तुसां सियुदे ना होन, कने जदेई उम्मीद तुसां मिंजो ला कितियो कने मैं भी सियुदा नी होऐ। मिंजो डर है, की ओथु झगड़ा, जलन, गुस्सा, मतलबीपन, चुगली, घमंड कने बखेड़े ना पियो होन। 21 कने ऐसा ना हो की जालू मैं दुबारा बापस ओऐ, तां मेरा परमेश्वर मिंजो बेइज्जत करे। कने फिरी मिंजो केईयां ताईं रोंणा पोऐ, जिना पेहले गंदे कम्मा ला, कने व्यभिचार, कने लुचपन ने, कने जडे पाप उना कितया होन, उना ला पश्चाताप नी कितया हो कने पाप करणा नी छडया हो।

13 पबित्र शास्त्र च लिखया है की, “हर इक गल्ल जो साबित करणे ताईं दो या तिन गबाह दी जस्सत होंदी है,” जालू मैं दुज्जी बरी तुहाड़े बाल आया था, तालू मैं

कुछ लोकां जो चेताबनी दिती थी, जड़े पाप करदे थे। हुण मैं इसा चिठिया दे जरिये सारयां जो दुबारा चेताबनी दिन्दा है, जियां मैं पेहले भी दितियो थी। हुण मैं तिजी बरी तुहाड़े बाल लगया ओणा कने हुण भी उना लोकां पाप करणा नी छडया, तां कोई भी उना जो सजा ला नी बचाई सकदा। 3 मैं ऐ बोलदा है क्योंकि तुसां इदा सबूत चांदे न, की मसीह मेरे जरिये बोलदा है, कने मसीह तुहांजो सुधारदा है, तां ऐ साबित होंदा है की सै कमजोर नी है; पर तुहाड़े बिच शक्तिशाली है। 4 सै कमजोरिया दिया बजा ने सूली पर तां चढाया गया, पर परमेश्वरे दिया शक्तिया ला जिन्दा है, असां भी तियां ही कमजोर न, जियां मसीह था; पर परमेश्वरे दिया शक्तिया ने जडी तुहाड़े ताई है, असां उदे सोगी जीणा। 5 अपने आपे जो परखा, की तुहाड़ा भरोसा सच्चा है की नी; क्या तुहांजो ऐ अनुभव नी होंदा है की यीशु मसीह तुसां च है। अगर नी होंदा है तां तुसां निक्कमे निकलयो न। 6 पर मेरी आस है, की तुसां जाणी लेंणा है की असां निकम्मे नी न। 7 कने असां अपने परमेश्वरे ला प्राथना करदे न, की तुहांजो ला कोई गलती ना हो। ऐ दसणे ताई नी की साडी सेबकाई सफल रेई है, पर असां चांदे न की तुसां खरे कम्म करन, चाहे असां अपु निक्कमे ही लगन। 8 क्योंकि असां सचाइया दे खिलाफ कुछ नी करी सकदे न, पर सचाइया ताई ही करी सकदे न। 9 असां अपने कमजोर होंगे कने तुहाड़े भरोसे च ताकतबर होंगे पर असां खुश होंदे न। कने ऐ प्राथना भी करदे न की, तुसां भरोसे च सिद्ध होंदे जा। 10 इसा बजा ला मैं तुहाड़े बाल ओणे ला पेहले तुहांजो ऐ गल्लां लिखा दा है, ताकि मिंजो तुहांजो सजा देंगे दे हके जो इस्तेमाल करणे दी जरूरत ना पोए, जड़ा मिंजो प्रभुऐ दितया है। पर मैं इना हका दा इस्तेमाल तुहाड़े भरोसे जो मजबूत करणे ताई करणा चांदा है ना की नाश करणे ताई। 11 हे मसीह भाईयों, खुश रिया, सिद्ध बणदे जा, सबर रखा, इक दुज्जे जो उत्साहित करा, इक ही मन रखा, मिल्ली जुली करी रिया कने शांति देणेबाले परमेश्वरे तुहाड़े सोगी रेंणा। 12 इक दुज्जे जो गल्ले लगी करी मसीह दे प्यार च नमस्कार करा। 13 सारे पबित्र लोक तुहांजो नमस्कार करदे न। 14 मैं प्राथना करदा है की प्रभु यीशु मसीह दा अनुग्रह कने परमेश्वरे दा प्यार कने पबित्र आत्मा दा साथ तुहाड़े सोगी रे।

गलातियों

1 मैं, पौलस, तुहांजो ऐ चिट्ठी लिखा दा है, कने मैं इक प्रेरित है, मिंजो प्रेरित होणे तांई कुनी खास समूह या कुनी माणुऐ नी चुणया, पर यीशु मसीह कने परमेश्वरे पिता दे जरिये चुणया है, जिनी यीशु मसीह जो मरयां चे जिन्दा किता। **2** कने मैं ऐ चिट्ठी गलातिया प्रदेशे दिया सारिया कलीसिया जो उना सारे मसीह भाईयां दिया तरफा ला लिखा दा है जडे मेरे सोगी न। **3** मैं प्राथना करदा है की साड़ा पिता परमेश्वर कने प्रभु यीशु मसीह तुहांजो अनुग्रह कने शांति दे। **4** साड़े पिता परमेश्वर दी इच्छा दे अनुसार यीशु मसीहे अपने आपे जो साड़े पापां दिया बजा ने बलिदान करी दिता ताकि असां इस संसार दे लोकां दे बुरे प्रभाव ला बचाई सके। (aiōn g165) **5** मैं प्राथना करदा है की परमेश्वर दी महिमा युगां-युगां दीकर होंदी रे। आमीन। (aiōn g165) **6** मिंजो इसा गल्ला दी हेरानी होंदी है, जिनी परमेश्वरे तुहांजो मसीह दे अनुग्रह दे जरिये अपने लोक होणे तांई सदया है, उसला तुसां इतणी जल्दी फिरी करी कुसी होर ही शिक्षा जो मनणा लगी पे। **7** पर सिर्फ इक ही सच्चा शुभसमाचार है, पर असल गल्ल ऐ है की कुछ लोक मसीह दे शुभसमाचार दी शिक्षा जो बिगाड़ना चांदे न कने उना लोकां ही तुहांजो भटकाई दिता है। **8** पर अगर असां चे कोई या स्वर्गदूतां चे कोई भी इस शुभसमाचार जो छडी करी जड़ा असां तुहांजो सुणाया है, कोई होर शिक्षा दा प्रचार करे तां, परमेश्वरे उसयो सजा देणी। **9** जियां असां पेहले ही बोलया है, तियां ही मैं हुण फिरी बोलदा है, की उस शुभसमाचार जो छडी करी जिसयो तुसां अपनाया है, कोई होर शिक्षा दा प्रचार करे तां, परमेश्वरे उसयो सजा देणी। **10** मैं पक्के तौर पर लोकां दी नी मंदा है पर परमेश्वरे दी मंदा है, मैं लोकां जो खुश करणे दी कोशिश नी करा दा है, पर परमेश्वरे जो खुश करणा चांदा है। अगर मैं हले दीकर माणुऐ जो खुश करदा रेंदा तां मैं मसीह दा सेवक नी होंदा। **11** हे मसीह भाईयो, मैं तुहांजो दसी दिन्दा हे की, जड़ा शुभसमाचार मैं सुणाया है, सै माणुऐ दा बणाया नी है। **12** क्योंकि मैं ऐ अपने पूर्वजां या धार्मिक गुरुआं ला नी सिखया है, बल्कि खुद यीशु मसीहे शुभसमाचारे जो मिंजो पर प्रगट कितया है। **13** तुसां जाणदे न की मैं यहूदी धार्मिक नियमा दे अनुसार जिन्दगी जिन्दा था, तां मेरे मते साथी जड़े मेरिया उमरा दे थे, सै भी यहूदी नियमा दा पालन करदे थे, पर मैं उना सारयां ला जादा बदीकरी कने पुरे दिले ला अपने पूर्वजां दे रीती रिबाजां जो मंदा था। कने उस बकत मैं यीशु मसीह पर भरोसा

करणे बालयां जो सतांदा था कने उना जो मारणे दी कोशिश करदा रेंदा था। 15 पर तालू परमेश्वरे ऐ फेसला किता की अपने पुत्रे जो मिंजो पर प्रकट करे, ताकि मैं होर जातियां बिच यीशु मसीह दा प्रचार करी सके। परमेश्वर ही है जिनी मिंजो मेरे पैदा होणे ला पेहले ही चुणी लिया कने अपने अनुग्रह ने मिंजो अपनी सेवा ताई सदया। जालू यीशुऐ अपने आप जो मिंजो पर प्रगट किता, तालू मैं सलाह लेणे ताई कुसी बाल नी गया, 17 कने ना ही जडे मिंजो ला पेहले प्रेरित थे, उना जो मिलणे ताई यरूशलेम गया, पर झट अरब नाए दे इलाके जो चली गया, कने फिरी ओथु ला दमिश्क शेहरे च दुबारा बापिस आई गया। 18 फिरी तिन्ना सालां बाद मैं पतरसे ने मिलणे ताई यरूशलेम शेहरे जो आया, कने उदे बाल पन्दरा रोज रिया। 19 कने मैं प्रभु यीशु दे भाई याकूब जो छडी करी कने कुसी भी होर प्रेरिते ने नी मिल्ला। 20 परमेश्वर मेरा गबाह है की तुहांजो जडियां गल्लां मैं लिखदा है, उस च कुछ भी झूठ नी है। 21 यरूशलेम शेहरे च मैं उना प्रेरितां ला मिलणे बाद सीरिया कने किलिकिया प्रदेशां च आया। 22 पर यहूदिया प्रदेशे च मसीह पर भरोसा करणे बाले लोकां मिंजो कदी नी दिखया था। 23 पर उना भरोसा करणे बालयां मेरे बारे च ऐई सुणाया था, की जडा पेहले सांझो मसीह पर भरोसा करणे ने सतांदा था, सै हुण इसी भरोसे दा प्रचार करदा है, इसला पेहले सै उना लोकां जो मारणे दी कोशिश करदा था जडे मसीह पर भरोसा करदे थे। 24 इस ताई सै परमेश्वरे दी महिमा करदे न क्योंकि उनी मिंजो इक सताणे बाले ला मसीह दा इक चेला बणाई दिता।

2 चौदा साल बाद मैं बरनबास सोगी यरूशलेम शेहर गया कने तीतुस जो भी सोगी लेई गया। 2 मैं ओथु गया क्योंकि परमेश्वरे मिंजो जाणे ताई बोलया कने जालू मैं ओथु था, तां मैं कुछ बड्डे अगुवां ने एकांत च मिलया कने उना जो उस शुभसमाचार दे बारे च दसया जिसदा मैं होर जातियां च प्रचार करा दा था। ताकि इयां ना हो, की मेरी इस बकते दी, या पिछली मेहनत बेकार होए। 3 मेरा साथी तीतुस कने सै इक यूनानी है; उदा खतना कदी नी होया। पर यरूशलेम शेहरे दी कलीसिया दे अगुवां उसयो अपनाई लिया कने उना उसयो खतना करणे ताई मजबूर भी नी किता। 4 तीतुस दा खतना नी होणे दा ऐ मामला कुछ झूठे भाईयां ताई इक मुदा बणी गया, जडे साडिया मंडलिया च चोरिया ला आई गियो न कने उसा अजादिया जो खत्म करणे दी कोशिश करा दे थे जडे साडे उधारकर्ता यीशु मसीहे दितियो है, ताकि सै

सांझो फिरी ला यहदी व्यवस्था दा गुलाम बणाई सकन। 5 पर असां थोड़े बकते ताई भी उना दियां गल्लां ने सेहमत नी होए, ताकि तुसां लगातार सच्चे शुभसमाचार दी सचाई पर भरोसा करदे रेन। 6 यरूशलेम शेहरे दिया कलीसिया दे उना बड़े अगुवां मेरी शिक्षा च कुछ भी नी जोड़या, मै इसा गल्ला दी कोई चिंता नी करदा की सै अगुवे कुण न क्योंकि परमेश्वर बाहरी रूप दिखीकरी न्याय नी करदा। 7 पर जालू अगुवां दिखया की, जियां परमेश्वरे यहदी लोकां ताई शुभसमाचार प्रचार करणे दा कम्म पतरसे जो दितया है तियां ही होर जातियां जो शुभसमाचार प्रचार करणे दा कम्म मिंजो दितया है। 8 क्योंकि जिनी परमेश्वरे पतरसे जो यहदी लोकां बिच प्रेरित होणे ताई चुणया, उनी ही मिंजो भी होर जातियां बिच प्रेरित होणे ताई चुणया है। 9 कने जड़े लोक कलीसिया दे खम्बे समझे जांदे थे, मतलब की पतरस, याकूब, कने यहन्ना, उना अनुग्रह दे उस बरदान जो पछेणी लिया जड़ा मिंजो मिलया है। उना मिंजो कने बरनबास जो अपणा साथी समझीकरी सांझो हिस्सेदार बणाया। सै इसा गल्ला ताई राजी होऐ की असां होर जातियां बाल जान कने सै यहदियां बाल जान। 10 उना सांझो ने ऐई विनती किती की यरूशलेम शेहरे दे गरीब विश्वासियां दी सहायता करनयो, कने ऐ सेई कम्म था जिसयो मै करणा चांदा था। 11 पर जालू इक दिन पतरस अन्ताकिया शेहर च आया, तां मिंजो लोकां सामणे उसयो फटकार लाणा पेई क्योंकि सै सही कम्म नी करा दा था। 12 पतरस पेहले होर जातियां सोगी खाणा खांदा था पर जालू याकूब दे भेजयो कुछ विश्वासी यरूशलेम शेहर च आये तां उना सोगी मिलणा-जुलणा कने खाणा खाणा बंद करी दिता क्योंकि सै उना यहदियां ला डरदा था, जड़े चांदे थे की सारियां होर जातियां दा खतना होणा चाईदा। 13 कने उदे सोगी अन्ताकिया शेहर दे कुछ यहदी विश्वासी भी ऐथू दीकर की बरनबास भी उना ला डरदा था कने उनी भी होर जातियां सोगी मिलणा-जुलणा बंद करी दिता। 14 पर जालू मै दिखया, की उना दा चाल चलण सियुदा नी है, जदिया शुभसमाचार सिखांदा है, तालू मै सारयां सामणे पतरसे जो फटकार लाईकरी बोलया, “तू इक यहदी होईकरी भी, होर जातियां दे रीती रबाजां जो मन्ना दा है,” कने यहदियां दे रीती रबाजां जो नी मन्ना दा है, अगर तू इक यहदी होईकरी ऐसा कितया है। तां तू फिरी होर जातियां जो असां यहदियां दे रीती रबाजां जो मनणे ताई कजो मजबूर करदा है? 15 असां जड़े जन्म ला ही यहदी न कने होर जाति नी न जिना जो यहदी पापी बोलदे न। 16

असां यहूदी विश्वासी जाणदे न की मूसा दी व्यवस्था जो मन्नी करी कोई भी माणु धर्मी नी बणदा है, इस ताई असां भी यीशु मसीह पर भरोसा किता, असां मूसा दी व्यवस्था दा पालन करी के नी पर यीशु मसीह च भरोसा करणे ने धर्मी होए; इस ताई की मूसा दी व्यवस्था दे कम्मा ने कोई भी माणु धर्मी नी होंदा। 17 कुछ यहूदी सोचदे न की असां पाप कितया है, क्योंकि असां व्यवस्था दा पालन करणे दिया बजाए, धर्मी होणे ताई मसीह पर भरोसा करदे न, इदा मतलब ऐ है की मसीह सांझो पापी बणादां है, नी बिलकुल भी नी। 18 पर असल च मैं पाप करणा अगर मैं इसा गल्ला जो दुबारा ला अपनाई लेंदा है की इक माणु व्यवस्था जो मनणे ने ही परमेश्वरे दिया नजरा च सही होंदा है। 19 मैं समझदा है की मिंजो मूसा दिया व्यवस्था जो मनणे ने मैं धर्मी नी बणी नी सकदा। इस ताई मैं ऐसा मनदा है की मैं व्यवस्था दे बारे च मरी गया ताकि मैं परमेश्वरे ताई जिन्दा रेई सके। 20 ऐ इयुदा है जियां जालू मसीह सूली पर मरी गया, तां मैं भी मसीह सोगी सूली पर मरी गया। हुण मैं जिन्दा नी है, पर मसीह मेरे अंदर जिन्दा है। हुण मैं परमेश्वरे दे पुत्रे पर भरोसा करिरी जी दा है, जडा मिंजो ने इतणा प्यार करदा है की उनी मेरे ताई अपणी जान देई दिती। 21 मैं इसा गल्ला ला मना नी करी सकदा की परमेश्वरे अपणी दया दिया बजा ने सांझो बचाया। क्योंकि अगर लोक मूसा दी व्यवस्था जो मन्नी करी धर्मी बणी सकदे, तां मसीह जो मरणे दी जरूरत नी थी।

3 हे गलातिया शेहरे दे लोकों, तुहाडे दिमाग खराब होई गियो न, तुहांजो कुनी भटकाई दितया है, क्योंकि मैं तुहांजो बडे अच्छे तरीके ने समझाया की यीशु मसीह सूली पर कजो मरया कने उनी कुस कम्मे जो पूरा किता। 2 मिंजो इक गल्ल दस्सा, तुहांजो पबित्र आत्मा कियां मिलया? क्या मूसा दी व्यवस्था जो मन्नी करी तुहांजो पबित्र आत्मा मिलया? नि बिलकुल भी नी! तुहांजो पबित्र आत्मा इस ताई मिलया क्योंकि तुसां शुभसमाचार सुणी कने उस पर भरोसा किता। 3 क्या तुहाडा दिमाग खराब होई गया की, तुसां पबित्र आत्मा दे जरिये नोई जिन्दगी शुरू करिरी क्या अपणिया ताकता ला इदा अंत करणा चांदे न? 4 विश्वासी बणने बाद तुसां बडे दुख झेले। मैं सच्ची आशा करदा है की ऐ सब कुछ बेकार नी था! 5 जडा तुहांजो उदारता ला पबित्र आत्मा दिन्दा है कने तुहांजो च चमत्कार दे कम्म करदा है, क्या ऐ इसा बजा ने है की तुसां मूसा दी व्यवस्था दा पालन किता या मसीह दे बारे च शुभसमाचार सुणया कने उस पर भरोसा किता? 6 “हुण

अब्राहम दे बारे च ही सोचा, उनी परमेश्वरे पर भरोसा किता, कने इसी ने ही परमेश्वरे अब्राहमे जो धर्मी बनाया।” 7 तां तुहांजो ऐ समझणा चाईदा की जड़े लोक अब्राहम सांई परमेश्वरे पर भरोसा करदे न, सै अब्राहम दे सच्चे बंशज न। 8 कने परमेश्वरे पबित्र शास्त्र च बड़े पेहले बोलया की, परमेश्वरे होर जातियां जो भरोसे करणे ने धर्मी बनाणा, परमेश्वरे पेहले ही ऐ शुभसमाचार अब्राहमे जो सुणाई दितिया था, की “तेरे जरिये सारे देशां दे लोकां जो आशीष मिलणी।” 9 परमेश्वरे अब्राहमे जो उदे भरोसे दिया बजा ला आशीष दिती, तियां ही जड़ा कोई भी मसीह पर भरोसा करदा है उसयो पक्का ही अब्राहमे सोगी परमेश्वरे आशीष देणी। 10 पर मूसा दी व्यवस्था च लिखया है, जड़ा कोई धर्मी होणे तांई व्यवस्था दे नियमा पर भरोसा रखदा है, परमेश्वरे दा श्राप उस पर होंदा है। इस तांई उना सारे लोकां पर श्राप आई गया जड़े व्यवस्था जो मन्नी करी परमेश्वरे सामणे धर्मी बणने दी कोशिश करदे न। क्योंकि कोई भी हर बकत उस व्यवस्था दा पूरी तरीके ने पालन नी करी सकदा। 11 पर ऐ गल्ल सच्च है, की मूसा दी व्यवस्था दा पालन करणे ने कोई भी परमेश्वरे दिया नजरा च धर्मी नी बणी सकदा, क्योंकि पबित्र शास्त्र च लिखया है, “पर अगर कोई भी परमेश्वरे पर भरोसा करदा है, तां परमेश्वरे उसयो धर्मी बनाणा कने हमेशा दी जिन्दगी देणी।” 12 मूसा दी व्यवस्था दा पालन करिरी जिणा कने परमेश्वरे पर भरोसा करिरी जीणा दोनो इकोदिया नी है, पर जियां की पबित्र शास्त्र च लिखया है की, जड़ा कोई इसा व्यवस्था दा पालन करदा है, उनी जिन्दा रेणा। 13 पर मसीहे सांझो उस श्राप ला छुड़ाया है जड़ा व्यवस्था नी मनणे दिया बजा ने होंदा है, जालू सूली पर मसीह दी मौत होई तां उनी साडे पापां दिया बजा ने अपने उपर श्राप जो लेई लिया। क्योंकि पबित्र शास्त्र च लिखया है की जड़ा कोई सूली पर मरदा है, सै श्रापित है। 14 मसीहे ऐसा इस तांई किता, की अब्राहम दी सारी आशीष यीशु मसीह दे जरिये होर जातियां दे लोकां दीकर पुज्जे, कने मसीह पर भरोसा करणे ने सांझो परमेश्वरे दी पबित्र आत्मा मिल्ले, उसा जो देणे दा बायदा परमेश्वरे कितया है। 15 हे मसीह भाईयो, मैं इक आम जिन्दगी ला उदाहरण दिन्दा है, जालू दो लोक इक समझौता करदे न, कने दोनों उस समझौते पर हस्ताक्षर करदे न, तां ऐसा कोई माणु नी जड़ा उसयो बदली सके। 16 परमेश्वरे अब्राहम ने बायदा किता की हर कुसी जो तेरे इक बंश दे जरिये आशीष मिलणी, पबित्र शास्त्र च ऐ नी लिखया, की “तेरे बंशजो को” जियां की मते लोकां तांई

बोलया, पर ऐ इक माणुऐ दे बारे च गल्ल करदा है, जालू ऐ बोलदा है की “तेरे बंश जो” कने ऐ माणु यीशु मसीह है। 17 मैं जड़ा तुहांजो समझाणा चांदा है सै ऐ है; की परमेश्वरे अब्राहम सोगी बायदे दे 430 साल बाद मूसा दी व्यवस्था दिती। पर असां ऐ नी बोली सकदे की क्योंकि हुण व्यवस्था है इस ताई परमेश्वरे दे बायदे दी कोई कीमत नी। परमेश्वर दा बायदा हुण भी अटल है कने परमेश्वरे इसयो पूरा करणा। 18 क्योंकि अगर परमेश्वरे लोकां जो मूसा दी व्यवस्था दा पालन करणे दिया बजा ने आशीष दितियो होंदी, तां उनी बायदे जो हटाई देणा था, पर परमेश्वरे अब्राहम जो सै आशीष इस ताई दिती क्योंकि उनी पेहले उसला बायदा कितया था। 19 तां फिरी व्यवस्था दा क्या कम्म है? मूसा दी व्यवस्था जो तालू दीकर बणी रेणा था, की जालू दीकर की अब्राहम दा बंशज नी आया, जिसदे बारे च परमेश्वरे बायदा कितया था, परमेश्वरे व्यवस्था स्वर्गदूतां दे जरिये मूसा जो दिती, जड़ा परमेश्वर कने लोकां दे बिच बिचोला था। 20 जालू दो लोकां बिच समझौता होंदा है, तालू समझौता करणे बाले दी जरूरत होंदी। पर परमेश्वर इक ही है, कने जालू उनी अब्राहमे ला बायदा किता तां उदे बिच कोई भी बिचोला नी था। 21 तां क्या इदा मतलब ऐ है की मूसा दी व्यवस्था परमेश्वरे दे बायदे दे खिलाफ है? नी कदी भी नी! क्योंकि अगर व्यवस्था सांझो हमेशा दी जिन्दगी देई सकदी, तां असां इदा पालन करिरी परमेश्वरे सामणे धर्मी होई सकदे थे। 22 पर पबित्र शास्त्र ऐ बोलदा है की इस संसारे दे लोक पाप दी शक्ति दे गुलाम न, ताकि परमेश्वरे जड़ा बायदा कितया है, सै उना लोकां जो देई सके जड़े यीशु मसीह पर भरोसा रखदे न। 23 पर मसीह दे ओणे ला पेहले कने उस पर भरोसा करणे ला पेहले असां यहूदी लोक मूसा दिया व्यवस्था दे अधीन थे, कने मूसा दे नियम कानून साड़ी रखबाली करदे थे, कने मूसा दे नियम कनुना सांझो तालू दीकर जेला च रखया जालू दीकर की परमेश्वरे सांझो पर मसीह जो प्रगट नी किता। 24 मसीह दे ओणे दीकर व्यवस्था साड़ा मार्गदर्शन करणे ताई कने साड़ी देखभाल करणे ताई दितियो थी, ताकि असां यीशु मसीह च भरोसा करणे ने परमेश्वरे सामणे धर्मी बणी सकन। 25 पर हुण जालू असां मसीह पर भरोसा करदे न, तां हुण सांझो मार्गदर्शन ताई मूसा दे नियम कनुना दी जरूरत नी है। 26 क्योंकि तुसां सारयां मसीह च बपतिस्मा लिया कने मसीह दी जिन्दगी दे अनुसार चलदे न। इस ताई तुसां सारे यीशु मसीह च भरोसा रखणे ला परमेश्वरे दे पुत्र बणी गियो न। 28 मसीह च इक यहूदी या होर जाति या इक गुलाम

या इक अजाद माणुऐ च कोई अंतर नी। कने ना कोई मर्द है, ना कोई जनानी है।

29 अगर तुसां सारे यीशु मसीह च इक न, तां हुण तुसां अब्राहम दे परिवारे दा हिस्सा न कने तुसां जो सै सब कुछ मिलणा जिदा परमेश्वरे अब्राहम ने बायदा किता।

4 मेरे बोलणे दा मतलब ऐ है, की पुत्र अपने पिता दिया धन दौलत दा मालिक होंदा है, पर जालू दीकर सै इक छोटा बच्चा ही है तालू दीकर उदे च कने इक गुलाम च कोई फर्क नी होंदा। उदा हले दीकर इस पर हक नी है पर उनी सारे केसी दा मालिक बनणा जडा उदे पिता दा है। 2 सै तालू दीकर घरे बालयां कने देखभाल करणे बालयां दे अधिकारां दे थले रेंदा है जालू दीकर सै उसा उमरा दीकर नी पुज्जी जांदा जालू उनी मालिक बणी जाणा। सै उमर उदा पिता तय करदा है। 3 तियां ही असां भी, परमेश्वरे जो जाणने ला पेहले जालू असां बचयां सांई थे, तालू असां इस संसारे दे कुछ रीती रिबाजां दा पालन गुलामा सांई करा दे थे। 4 पर जालू सै सही बकत आई गया जिसदी परमेश्वरे योजना बणाईयो थी, तां परमेश्वरे अपने पुत्रे जो इस संसार च भेजया, कने इकी जनानिया उसयो पैदा किता, सै इक यहूदी दे रूप च पैदा होया था कने मूसा दी व्यवस्था जो मनदा था। 5 ताकि सै सांझो अजाद करी सके, जडे मूसा दी व्यवस्था दे गुलाम थे। कने उनी सांझो गोद लेईकरी अपने बच्चे बणाई लिया। 6 असां उदे बच्चे न, क्योंकि परमेश्वरे अपने पुत्रे दी पबित्र आत्मा जो साडे दिले च भेजया है, जड़ी आत्मा परमेश्वरे जो “मेरा पिता” बोली करी पुकारदा है। 7 इस तांई हुण असां गुलाम नी न, पर असां परमेश्वरे दे बच्चे बणी गियो न; क्योंकि तू परमेश्वरे दा बच्चा है, तां तिजो सै सारा कुछ मिलणा है जडा परमेश्वरे अपने बचयां जो देणे दा वायदा कितया है। 8 जालू तुसां परमेश्वरे जो नी जाणदे थे, उस बकत तुसां उना दे गुलाम थे जडे असल च परमेश्वर है ही नी। 9 पर हुण जालू तुसां परमेश्वरे जो जाणी लिया है या मिंजो ऐ बोलणा चाईदा की परमेश्वरे सांझो अपने बच्चे दे रूप च अपनाया है, तां फिरी तुसां कजो कमजोर कने उना बेकार पूराणी शिक्षां दे गुलाम होणे तांई बापस जा दे न? क्या तुहांजो दुबारा उना दे ही गुलाम बणने दी इच्छा है? 10 मैं ऐ सुणया की, तुसां जडे होर जातियां दे भरोसा करणे बाले न, यहूदी लोकां दे खास दिना च, मिनयां, मौसमा कने सालां जो ऐ सोची करी मंदे न की इना ला परमेश्वर खुश होंदा है। 11 जडा कुछ तुसां करा दे न उदिया बजा ने चिंता करा दा है, की तुहाडे बिच सेबा

कितियो है सै बेकार ना होई जाए। 12 हे मसीह भाईयो, मैं तुहांजो ने बिनती करदा है, तुसां सियुदा ही व्यवहार करा जदिया व्यवहार मैं करदा है, क्योंकि मैं व्यवस्था ला तियां ही अजाद है जियां तुसां होर जाति दे लोक न; तुसां मेरी अच्छे ने देखभाल किती। 13 पर तुहांजो याद होणा, ऐ इक बिमारिया दिया बजा ला था कि मैं पैली बरी तुहाड़े बाल शुभसमाचार दा प्रचार करणा आया। 14 मेरी बिमारी तुहाड़े ताई इक परेशानी थी, पर फिर भी तुसां मिंजो ला नफरत नी किती कने ना ही मिंजो दूर जाणा दिता। तुसां मिंजो उसी तरीके ने अपनाया जियां तुसां परमेश्वरे दे इक स्वर्गदूत जो या यीशु मसीह जो अपनांदे न। 15 उस बकत तुसां बड़े खुश थे! तुहाड़ी सै खुशी हुण कुथु है, मिंजो पूरा यकीन है की, तुसां मेरे ताई सब कुछ बलिदान करी दिन्दे, “ऐथू दीकर की अपणी हखी भी कडी करी मिंजो देई दिन्दे।” 16 तां क्या तुसां सोगी सच्च बोलणे दिया बजा ला मैं तुहाड़ा दुशमण बणी गया? 17 झूठे गुरु तुहांजो अपने सोगी शामिल करणे दी पूरी कोशिश करा दे न, पर ऐ भले मकसद ताई नी है; उना दा मकसद तुहांजो मिंजो ला लग करणा है, ताकि तुसां उना दे चले बणी जान। 18 हमेशा ही खरे मकसद ताई उत्साही होणा खरा होंदा है कने सिर्फ उस बकत ही नी, जालू मैं तुहाड़े सोगी होंदा है। 19 हे मेरे बच्चयो, जियां इक जनानी बच्चा जमदे बकत पीड़ महसूस करदी है, तियां ही मैं इक बरी फिरी तुहाड़े ताई दुख झेला दा है। तुहांजो मसीह च मजबूत होई जाणे दीकर, मैं इसा पीड़ा च रेणा चांदा है। 20 मेरी बड़ी इच्छा है की हुण तुहाड़े सोगी रें ताकि मैं तुसां ने प्यारे ने गल्ल करी सके, क्योंकि मैं असल च नी जाणदा की मैं तुसां जो क्या बोलें। 21 जडे मूसा दी व्यवस्था दे गुलाम रेणा चांदे न, बिचार करा की मूसा दे लेख सांझो क्या दसदे न। 22 पबित्र शास्त्र च लिखया है, की अब्राहम दे दो पुत्र थे; उदा इक बच्चा हाजिरा ला पैदा होया, सै इक नोकराणी थी। कने दुज्जा बच्चा सारा ला पैदा होया था, सै उदी घरे बाली थी। 23 अब्राहम दा पुत्र, जड़ा उसयो नोकराणी हाजिरा ला पैदा होया था, सै सिर्फ माणुए दिया योजना ने पैदा होया था। पर अब्राहम दा दुज्जा पुत्र जड़ा सारा ला पैदा होया था, उदा जन्म परमेश्वरे दे बायदे जो पूरा करणे ताई होया था। 24 इना दोनों जनानियां दी तुलना दो बाचां ने करी सकदे न, सै बायदा जड़ा परमेश्वरे इस्राएल दे लोकां सोगी सीनै पहाड़े च किता था, सै हाजिरा सांई है। सै उना बचयां जो पैदा करदी है जडे गुलाम बणदे न। 25 हाजिरा सीनै पहाड़ जो द्रशांदी है जड़ा अरब देश च है। सै अज दे यरूशलेम

शेहर सांई है जिदे लोक अपने बच्चों समेत मूसा दिया व्यवस्था दे गुलाम न। 26 पर स्वर्गीय यरूशलेम अब्राहम दी घरे बाली सारा सांई है, कने उदे बच्चे मूसा दिया व्यवस्था दे गुलाम नी न। ऐ यरूशलेम साडी मां सांई है, जडी भरोसा करदी है। 27 क्योंकि पबित्र शास्त्र च लिखया है, “हे जनानियों तुसां जिना दे कदी बच्चे नी होऐ,” कने जिना कदी बच्चे जमणे दी पीड़ा जो कदी महसूस नी किता, चिल्ला कने खुश होआ! क्योंकि छडियो जनानिया दे बच्चे, उसा जनानिया दे बच्चों ला जादा न जडी अपने घरे बाले सोगी रेंदी है। 28 हे मसीह भाईयो, असां भी अब्राहम दे पुत्र इसहाक सांई न, जडे परमेश्वरे दे बायदे दे अनुसार पैदा होयो न कने परमेश्वरे दी ओलाद बणी गे। 29 पर हुण तुहांजो सै लोक सतादे न जडे लोक चांदे न की तुसां व्यवस्था जो मन्ना, तियां ही जियां शरीर दिया इच्छा ने पैदा होए इश्माएले आत्मा दी इच्छा ने पैदा होए इसहाक जो सताया था। 30 पर पबित्र शास्त्र च लिखया है, “गुलाम जनानी कने उदे पुत्रे जो दूर भेजी दे, क्योंकि गुलाम जनानिया दे पुत्रे जो पिता दी धन दौलत चे कुछ नी मिलणा चाईदा; ऐ पिता दी घरे बालिया दे पुत्रे जो मिलणा चाईदा।” 31 इस तांई हे मसीह भाईयो, असां गुलाम जनानिया दे बच्चे नी न, जिना जो मूसा दे नियम कनुना जो मनणा जरूरी है। पर असां उसा जनानिया दे बच्चे न, जडी पिता दी घरे बाली है।

5 मसीहे सांझो बचाई लिया है ताकि सांझो मूसा दिया व्यवस्था दा पालन करणे तांई गुलामा सांई जिणे दी जरूरत नी है। इस तांई अजाद बणी रिया कने व्यवस्था जो मनणे तांई अपने आप जो दुबारा ला गुलाम बणना मत दिया। 2 मैं पौलुस तुहांजो जडा बोलदा है, उसयो सुणा की परमेश्वरे दे सामणे धर्मी होणे तांई अगर खतना करांगे, तां मसीहे जडा कुछ कितया है, उसला तुहांजो कोई फायदा नी होणा। 3 मैं दुबारा चेताबनी करी बोलदा है, की हर इक माणु जडा ऐ सोची करी खतना करवांदा है, की परमेश्वरे दिया नजरा च धर्मी बणी सके, तां उसयो मूसा दिया व्यवस्था दे हर इक हुकमे जो मनणा चाईदा। 4 तुसां जडे मूसा दी व्यवस्था जो मन्नी करी धर्मी बणना चांदे न, तां तुसां अपने आप जो मसीह कने उदे अनुग्रह ला लग करा दे न, जिसला परमेश्वर तुहांजो बचाई सकदा है। 5 क्योंकि सांझो पबित्र आत्मा दिया तरफा ला पूरी उम्मीद है, की परमेश्वरे सांझो धर्मी दे रूपे च अपनाई लेणा क्योंकि असां परमेश्वरे पर भरोसा करदे न। 6 अगर तुसां यीशु मसीह दे चेले न, तां इसा गल्ला ला कोई फर्क नी पोंदा की तुहाडा खतना होया है

या नी, जड़ी गल्ल मायने रखदी सै ऐ है की असां मसीह पर भरोसा कने परमेश्वरे
 कने दुज्जे लोकां ताई प्यार रखदे न। 7 तुसां तां मसीह सोगी अपणे रिशते च
 अच्छे ने अगो बदा दे थे, हुण तुसां जो मसीह दी सच्ची शिक्षा पर भरोसा करणे ला
 कुसी जो भी रोकणा नी देणा चाईदा था। 8 ऐसी झूठी शिक्षा परमेश्वर नी दिन्दा,
 जिनी तुहांजो अपणे बच्चे होणे ताई चुणया है। 9 ऐसी झूठी शिक्षा इयां फेला दी है,
 जियां की इक कहाबत है, “की थोड़ा दिया खमीर पुरे गुनयो आटे जो खमीर करी
 दिन्दा है।” 10 मै परमेश्वरे पर भरोसा करदा है की उनी तुहांजो झूठी शिक्षा पर
 भरोसा करणे ला बचाई रखणा है। बल्कि तुसां मेरियां शिक्षां जो मनणा है। क्योंकि
 जडे तुहाड़े ताई परेशानी खड़ी करदे न सै कोई भी कनी हो परमेश्वरे उसयो सजा
 देणी। 11 पर हे मसीह भाईयो, मै ऐ प्रचार करदा है, की खतना जरूरी नी है, कने
 इसा बजा ने ही यहदी लोक मिंजो सतादे न, अगर मै ऐ प्रचार नी करे की उद्धार
 सिर्फ यीशु मसीह दी सूली ने ही है, तां कुनी भी नराज नी होणा। 12 खरा होंदा,
 की जडे तुसां जो झूठी शिक्षा दिन्दे न, सै अपणे आपे जो नामर्द बणाई लेंदे। 13 हे
 मसीह भाईयो, तुहांजो परमेश्वरे दे जरिये अजाद होणे ताई चुणया था, इस ताई
 सांझो मूसा दी व्यवस्था जो मनणे दी जरूरत नी है। पर अपणी आजादी जो शरीर
 दियां इच्छा जो पूरा करणे दा जरिया मत बणा, पर इक दुज्जे ने प्यार कने सेवा
 करा। 14 क्योंकि सारी व्यवस्था दा निचोड़ इकी ही हुकमे च पुरा होई जांदी है,
 “तू अपणे पड़ोसियां ने अपणे सांई प्यार रख।” 15 पर अगर तुसां इकी दुज्जे जो
 डंगरा सांई मारदे बडदे न, तां तुसां जो ध्यान देणा चाईदा की कुथी तुसां इक दुज्जे
 दा सत्यानाश नी करी देन। 16 पर मै तुहांजो बोलदा है, की तुहांजो पबित्र आत्मा
 दी अगुवाई ने जिणे दी जरूरत है, तालू तुसां सै बुरे कम्म नी करणे जिना कम्मा जो
 तुहाड़ा पापी सभाव कराणा चांदा है। 17 क्योंकि सै कम्म जडे साड़ा पापी सभाव
 सांझो ला करबाणा चांदा है, ऐ सेई चीजां न जड़ी पबित्र आत्मा नी चांहदी की
 असां नी करन, क्योंकि ऐ दोनों इक दुज्जे दे दुश्मन न; इस ताई हमेशा उना खरे
 कम्मा जो नी करी सकदे जडे असां करबाणा चांदे न। 18 कने अगर तुसां पबित्र
 आत्मा दी अगुवाई ला जिन्दगी जिन्दे न, तां तुसां मूसा दिया व्यवस्था दे गुलाम नी
 न। 19 तुसां दिखी सकदे न की पापी सभाव क्या-क्या करदा है, मतलब की
 व्यभिचार, गंदे कम्म, लुचापन। 20 मूर्तिपूजा, टूणा, बैर, लड़ाई, जलन, गुस्सा,
 बिरोध, फूट, अधर्म। 21 डाह, नशे च मतवाले होणा, ऐश मस्ती, कने ऐसे होर भी

बड़े कम्म करदे न, इना कम्मा दे बारे च मै चिताबनी दे दा है जियां मै पेहले भी तुहांजो दिती थी, की ऐसे कम्मा करणे बालयां जो परमेश्वरे दे राज्य दे वारिस नी होणे। 22 सै गुण जडे परमेश्वरे दी आत्मा दे जरिये पैदा होंदे न, सै न प्यार, खुशी, शांती, सबर, कने दया, भलाई, दुज्जयां ताई भरोसेमंद, 23 दीनता, कने संयम; ऐसे व्यवहार पर रोक लागे ताई कोई भी व्यवस्था नी है। 24 सै लोक जडे यीशु मसीह ने रिशता रखदे न, उना अपणी पाप भरी जिन्दगिया दियां बुरियां इच्छां जो सूली पर चढाई दितया है। 25 क्योंकि परमेश्वरे दिया पबित्र आत्मा सांझो इक नोई जिन्दगी दितियो है, इस ताई सांझो पबित्र आत्मा दी अगुवाई ने जिणा चाईदा। 26 सांझो घमंड नी करणा चाईदा, कने इक दुज्जे ला जलन नी करणी चाइदी।

6 हे मसीह भाईयो, अगर कुनी माणुए कोई पाप किता है, तां तुसां जडे पबित्र आत्मा दी अगुवाई ने चलदे न, उसयो प्यारे ने सही रस्ते पर बापस लोणे ताई उदी सहायता करा, ध्यान रखा की कुथी तुसां अपु ही उस पाप च ना पेई जान। 2 मुशकिलां दा सामणा करदे बकत इक दुज्जे दी सहायता करा। इयां करिरी तुसां मसीह दी व्यवस्था जो मंदे न। 3 अगर तुहांजो लगदा है कुसी दी सहायता करणे ताई तुसां बडे जरूरी न तां तुसां सिर्फ अपने आप जो मुर्ख बणा दे न। तुसां इतणे भी जरूरी नी न। 4 पर हर इक माणु अपने कम्मा जो परखे की क्या सै खरे न, अगर खरे न तां अपने कम्मा पर घमंड करी सकदा है। पर उसयो अपने कम्मा दी तुलना दुज्जे लोकां दे कम्मे सोगी नी करणी चाइदी। 5 सांझो चे हर इक जणा अपने कम्मा दा अपु जिम्मेबार है। 6 ऐ जरूरी है की जडे लोक परमेश्वरे दे बचन जो सिखांदे न, उना दे लोकां जो उना ला खांणे कने पैसे दी सहायता मिलणी चाइदी। 7 अपने आप जो धोखा मत दिया, कोई भी कदी भी परमेश्वरे जो धोखा नी देई सकदा है क्योंकि माणु जड़ा रांदा है सेई बडदा है। 8 क्योंकि अगर कोई माणु सै करदा है जड़ा उदा पापी सभाव चांदा है, उसयो हमेशा दी मौत मिलणी है पर जड़ा माणु पबित्र आत्मा दी इच्छा जो पूरा करदा है, उसयो पबित्र आत्मा हमेशा दी जिन्दगी देणी। (aiōnios g166) 9 असां खरे कम्म करणे च हिम्मत ना छडन, क्योंकि अगर असां कदी हार नी मनगे, तां परमेश्वरे अपने बकते पर सांझो इनाम देणा। 10 इस ताई जालू भी सांझो मोका मिल्ले सारे लोकां सोगी भलाई करणी चाइदी; खासकर विश्वासी भाई बेहणा सोगी। 11 ध्यान दिया की कियां बड़े-बड़े अखरां च मै तुहांजो अपने हथां ला ऐ लिखया है। 12 इस ताई की यहदी तुहांजो

अपनाई लेन, सै तुहांजो खतना करबाणे तांई बोलदे न, सै ऐसा इस तांई करदे न ताकि लोक उना जो ऐ प्रचार करणे दिया बजा ने तंग ना करन की परमेश्वर लोकां जो सिर्फ इस तांई बचांदा है क्योंकि सै भरोसा करदे न की मसीह सूली पर मरया। 13 क्योंकि ऐथू दीकर की यहूदी विश्वासी भी मूसा दी व्यवस्था जो नी मंदे, पर सै चांदे न की तुहाड़ा खतना होऐ ताकि सै दुज्जे यहूदियां सामणे घमंड ने ऐ बोली सकन की तुहाड़ा खतना उना दिया बजा ने होया है। 14 अगर मैं घमंड करदा तां मैं इसा गल्ला पर घमंड करदा की साड़ा प्रभु यीशु मसीह साडे तांई सूली पर मरया। जड़ा कुछ भी उनी कितया है, उदी बजा ने संसार दियां कुसी भी चिजा दा बश नी रिया, कने मिजो च हुण धरती दे कम्मा जो करणे दी कोई इच्छा नी है। 15 क्योंकि ना खतना, कने ना जिसदा खतना नी होया कुछ मायने रखदे न, जरूरी ऐ की क्या असां इक नोई सृष्टि च बदल्यो न। 16 परमेश्वर उना सारे लोकां पर दया करे कने अपणी शांति दे, जडे इस नियम जो मंदे न, कने उना जो आशीष देंगी क्योंकि सै परमेश्वर दे चुणयो लोक न। 17 अगे जो मिजो कोई दुख ना दे, क्योंकि मेरे शरीर च जडे दाग न सै दसदे न की मैं यीशु दा सच्चा सेवक है। 18 हे मसीह भाईयो, मैं प्राथना करदा है की साडे प्रभु यीशु मसीह दा अनुग्रह हमेशा तुसां सबना पर होंदा रे। आमीन।

इफिसियों

1 मैं पौलुस, परमेश्वरे दिया इच्छा ने यीशु मसीह दा प्रेरित है, ऐ चिट्ठी इफिसुस शहर च रेणेबाले परमेश्वरे दे पबित्र लोकां जो लिखा दा है। **2** मैं प्रार्थना करदा है की साड़ा पिता परमेश्वर कने प्रभु यीशु मसीह तुहांजो पर अनुग्रह कने शांति बणाई रखे। **3** साड़े परमेश्वर कने प्रभु यीशु मसीह दे पिता दी महिमा हो, जिनी सांझो मसीह दे जरिये स्वर्गे ला मिलणे बालियां हर तरा दियां आत्मिक आशीषां दीतियां न। ऐ साड़ी मसीह सोगी एकता दिया बजा ला होया है। **4** मसीह सोगी इक होई जाणे दिया बजा ने परमेश्वरे सांझो इस संसारे जो बणाणे ला पेहले ही चुणी लिया है, ताकि असां उदे सामणे पबित्र कने निर्दोष होई सकन। **5** क्योंकि परमेश्वरे सांझो ला प्यार किता इस ताई परमेश्वर बड़े पेहले फेसला लिया की यीशु मसीह दे जरिये सांझो परमेश्वरे दी ओलाद होणे ताई गोद ले। परमेश्वरे ऐ अपणिया इच्छा ला कने खुशिया ला किता। **6** परमेश्वरे ऐसा इस ताई किता की असां उदे अदभुत अनुग्रह ताई उदी स्तुति करन, जडा उनी सांझो मुफ्त च देई दिता क्योंकि असां उदे प्यारे पुत्रे ने जुडयो न। **7** यीशु मसीह दे खून बहाणे दिया बजा ने असां अजाद होयो न। मतलब की साड़े पाप माफ किते न, परमेश्वरे दा अनुग्रह बड़ा महान है जडा उनी सांझो पर दसया। **8** जिसयो परमेश्वरे अपने ज्ञान कने समझ ने सांझो पर दसया। **9** परमेश्वरे सेई किता, जडा उनी गुप्त रखया था, कने उस गुप्त योजना दे बारे च दसया जडी उनी पेहले ला ही मसीह दे जरिये पूरा करणे दा फेसला लिया था। **10** जालू इस योजना जो पूरा करणे दा सही बकत ओगा, तालू परमेश्वरे स्वर्ग कने धरती दी सारियां चीजां जो मसीह दे अधीन करणा, ताकि सब कुछ मसीह दे हक च हो। **11** परमेश्वरे असां यहूदियां जो भी मसीह सोगी जोड़ी करी अपने लोक होणे ताई चुणी लिया क्योंकि शुरू ला उदी ऐई योजना थी। परमेश्वर सब कुछ अपणिया इच्छा ने ही करदा है। **12** असां यहूदी पेहले लोक न, जिना मसीह पर आस रखी, कने सांझो इस ताई चुणया था की असां परमेश्वरे दी महिमा कने स्तुति करन। **13** तुसां सच्चा संदेश सुणया है, जडा इस बारे च दसदा है की परमेश्वरे कियां तुहाड़ा उद्धार किता जालू तुसां यीशु मसीह पर भरोसा किता था, तां परमेश्वरे तुहांजो पबित्र आत्मा दिती जडा उनी अपने लोकां जो देणे दा वायदा कितया था। ऐ दसणे ताई की तुसां परमेश्वरे दे न। **14** परमेश्वरे सांझो पबित्र आत्मा दिता, जडा इसा गल्ला जो पक्का करदा है की परमेश्वरे जड़ियां होर अच्छी चीजां दा वायदा कितया है,

सै भी सांझो देणियां, ऐ तालू होणा जालू परमेश्वरे अपने लोकां जो पूरी तरहा ने छुटकारा करणा, परमेश्वरे दी महिमा कने स्तुति हो। 15 इसा बजा ने, जालू ला मैं यीशु मसीह पर तुहाड़े भरोसे कने परमेश्वरे दे लोकां ताई तुहाड़े प्यार दे बारे च सुणया, 16 तालू ला मैं तुहाड़े ताई परमेश्वरे दा धन्याबाद करदा है कने अपणिया प्राथना च तुहांजो याद करदा है। 17 मैं प्राथना करदा है की परमेश्वर जड़ा साड़े प्रभु यीशु मसीह दा महिमामय पिता है, तुहांजो आत्मिक ज्ञान कने समझ दे जिसने तुसां परमेश्वरे जो अच्छे ने जाणी सकन। 18 कने मैं ऐ भी प्राथना करदा है की सै सच्च जो समझणे ताई तुहाड़ी सहायता करे ताकि तुसां उस आस दे बारे च जाणी सकन जड़ी तुहांजो दिती थी जालू परमेश्वरे तुहांजो चुणया था, कने तुसां उना महिमामय आशीषां जो समझी सकन जिसदा वायदा परमेश्वरे अपने लोकां ने कितया था। 19 मैं चांदा है की तुसां उदी महानता कने उदी शक्तिया दे बारे च जाणी सका, जड़ी परमेश्वरे बाल साड़े ताई है जड़े यीशु मसीह पर भरोसा रखदे न। ऐ सेई महान शक्ति है। 20 जिनी मसीह जो मरयां चे जिन्दा किता कने स्वर्गीय जगा च सजे कने आदर बालिया जगा च बठाया। 21 ओथु परमेश्वरे उसयो हर तरा दी प्रधानता, हक कने शक्ति, कने प्रभुता, कने उदी उपादी हर इक अधिकारिये दिया उपादिया ला उपर है, जड़ी ना सिर्फ इस लोक च पर ओणे बाले लोक च भी उपर ही रेणी। (aiōn g165) 22 कने परमेश्वरे इना सारियां चीजां जो यीशु मसीह दी शक्ति दे अधीन करी दिता कने ऐ सेई है जिसयो परमेश्वरे सारे भरोसा करणे बालयां पर अगुवा बणाई दिता। 23 असां भरोसा करणे बाले मसीह दे शरीर दे अंगा सांई न, कने मसीह साड़े बिच पूरी शक्ति दा इस्तेमाल करदा है, जियां सै अपणी शक्तिया दा इस्तेमाल पूरी दुनिया च करदा है।

2 जालू तुहाड़े बाल परमेश्वरे दिया तरफा ला नोई जिन्दगी नी थी, तालू तुसां बुरे कम्मा कने पापां दिया बजा ने मरयो लोकां सांई थे। 2 उस बकत तुसां संसारे दे लोकां सांई चलदे थे, जड़े परमेश्वरे जो नी जाणदे थे कने तुसां शैताने दे हुकमा जो मंदे थे, मतलब की उस प्रधान दा जड़ा अम्बरे च बुरियां आत्मा पर शासन करदा है, जड़ा हुण भी उना लोकां दे मने च कम्म करा दा जड़े परमेश्वरे दे हुकमा जो नी मंदे। (aiōn g165) 3 असां भी उना सांई ही जिन्दे थे कने अपने पापी सभाव दियां इच्छा जो पूरा करदे थे कने जड़ियां भी साड़े शरीर दियां इच्छां कने बुरे बिचार सांझो ला करबाणा चांदे थे, असां सेई करदे थे कने बाकी सारयां सांई असां भी बुरे

थे कने परमेश्वरे दी सजा दे अधीन थे। 4 पर परमेश्वर बड़ा दयालु है। अपने उस बड़े प्यार दिया बजा ने जिसने उनी सांझो ने प्यार किता; 5 जालू असां मसीह पर भरोसा नी किता था, तालू असां बुरे कम्मा कने पापां दिया बजा ने मरयो लोकां सांई थे। तालू परमेश्वरे सांझो जिन्दगी दिती जालू उनी मसीह जो मरयां चे जिन्दा किता; परमेश्वरे दे अनुग्रह ने ही तुहाड़ा उद्धार होया है। 6 क्योंकि यीशु मसीह सोगी जुड़े होणे दिया बजा ने, परमेश्वरे सांझो मरयां चे जिन्दा किता, कने सांझो स्वर्गीय जगां च मसीह सोगी बेठाया। 7 परमेश्वरे ऐसा इस तांई किता ताकि ओणे बाले दिना च संसारे दे लोकां जो दस्सी सके की उदा अनुग्रह किता महान है, उस कम्मे दिया बजा ने जड़ा यीशु मसीह साड़े तांई किता है। (aiōn g165) 8 क्योंकि जालू तुसां भरोसा किता तां परमेश्वरे अपने अनुग्रह ने तुहांजो बचाई लिया है, कने तुसां अपने आप जो नी बचाया पर ऐ परमेश्वरे दा दान है; 9 कने ना ही तुहाड़े किते भले कम्मा दिया बजा ने है कने इस तांई तुहाड़े बाल घमंड करणे दी कोई बजा नी है। 10 क्योंकि सांझो परमेश्वरे नोए लोकां दे रूप च बणाया है ताकि असां यीशु मसीह दे उना भले कम्मा जो करन जिना जो परमेश्वरे पेहले ला साड़े तांई तैयार किता है। 11 इसा बजा ने याद रखा, की तुसां होर जातियां दे रूप च पैदा होयो न, कने यहूदी लोक तुहांजो ऐ बोली करी मजाक उड़ाया की तुसां खतना नी करबांदे न कने असां करबांदे न। पर उना दा ऐ रिबाज सिर्फ उना दे शरीरां करदे न। 12 तुसां लोक उस बकत यीशु मसीह जो नी जाणदे न कने परमेश्वरे दे चुणयो होयो इस्राएली लोकां च शामिल नी थे कने तुसां उना चीजां दे हिस्सेदार नी थे, जिना दा वायदा परमेश्वरे यहूदियां ने किता था, कने तुहाड़े बाल कोई आस नी थी कने इस संसारे च बिना परमेश्वर दे रेदे थे। 13 पर हुण तुसां मसीह सोगी इक न कने यीशु मसीह च उदे खून बहाणे दे जरिये नेड़े आयो न। 14 क्योंकि यीशु मसीह दिया बजा ने साड़े बिच शांति होई। पेहले ऐसा जियां इकी दिबारा यहूदियां कने होर जातियां जो लग करी दितया था। सै इक दुज्जे ला नफरत करदे थे, पर हुण मसीहे उसा दिबारा जो डाई दितया है कने यहूदियां कने होर जातियां जो इक करी दितया है। 15 अपनी मौत दे जरिये उनी मूसा दी व्यवस्था दे सारे नियमा कने रिबाजां जो खत्म करी दिता है ताकि सै यहूदियां कने होर जातियां दे बिच शांति करी सके ताकि इक नोआ झुण्ड बणाई सके, 16 कने अपनी मौत दे जरिये मसीहे यहूदियां कने होर जातियां जो इक करी दिता कने उना जो परमेश्वरे मिलाई दिता,

इयां करिके इना दोनो जातियां दिया नफरता जो खत्म करी दिता। 17 कने मसीहे आई करी होर जातियां जो जडे परमेश्वरे ला दूर थे, कने यहूदियां जो जडे उदे नेडे थे, उना जो मेल जोल दा शुभसमाचार सुणाया। 18 यीशु मसीह दिया बजा ने ही असां सारे इक ही पबित्र आत्मा ने पिता परमेश्वरे बाल आई सकदे न। 19 इस ताई होर जातियो, तुसां हण परदेसी या मुसाफिर नी रे, पर हण तुसां परमेश्वर दे लोकां साईं स्वदेसी कने परमेश्वरे दे परिवारे दे लोक बणी गियो न। 20 कने प्रेरितां कने परमेश्वरे दे संदेश देणेबालयां दी नियां पर तुसां इक घरे साईं न जिसदा कुंणे दा पथर यीशु मसीह अपु ही है। 21 यीशु मसीह ही है जडा घरे जो इक सोगी जोड़ी करी रखदा है कने इसयो परमेश्वरे ताईं इक पबित्र मंदिर दे रूप च बणादां है, 22 हे होर जाति दे विश्वासियो क्योकि तुसां मसीह सोगी इक न, इस ताईं तुहांजो भी होर लोकां ने जोडया जा दा है। ताकि तुसां इक ऐसा घर बणी जान जिथू परमेश्वर दी आत्मा रेंदी है।

3 इसा बजा ने, मैं पौलुस तुहाड़े ताईं प्राथना करदा है। मैं जेला च कैद है क्योकि मैं होर जातियां च प्रभु यीशु मसीह दा शुभसमाचार दा प्रचार किता। 2 तुसां पक्का सुणया है की परमेश्वरे अपने अनुग्रह दे जरिये तुहांजो शुभसमाचार दा प्रचार करणे दी जिम्मेदारी मिंजो दितियो है। 3 जियां की मैं पेहले तुहांजो थोड़े अखरां च लिखया था, की परमेश्वरे मिंजो अपु ही उस गुप्त योजना जो दसया है। 4 जियां ही तुसां चिट्ठी पढगे, तालू ही तुहांजो पता लगणा की मैं उस गुप्त योजना जो कितणी अच्छे तरिके ने समझदा है। 5 इसा गुप्त योजना दे बारे च पुराने बकते दे लोकां जो नी दसया था, पर हण परमेश्वरे पबित्र आत्मा दे जरिये अपने प्रेरितां कने परमेश्वरे दे संदेश देणेबालयां जो खुलासा किता है। 6 परमेश्वरे दी गुप्त योजना ऐ है, की यीशु मसीह दे शुभसमाचार दे जरिये होर जातियां भी उसा ही विरासत च हिस्सेदार होणा जड़ी विरासत यहूदियां बाल होणी, कने सै इक ही शरीर दे हिस्से कने परमेश्वरे दे उना वायदयां दे हिस्सेदार होणे जडे उनी यहूदियां ने किते। 7 कने परमेश्वरे जडा मिंजो मुफ्त अनुग्रह दा तोफा दितया है, जिसने मिंजो सौभाग्य मिलया की मैं उदे शुभसमाचार सुणाने दी सेवा करे। 8 मैं परमेश्वरे दे सारे लोकां च सारयां ला घट काबिल है, पर परमेश्वरे दे अनुग्रह ने मिंजो ऐ सौभाग्य मिलया की मैं होर जातियां जो मसीह दी उस हमेशा दी आशीष दा शुभसमाचार सुंणाई सके जडा साडी सोच ला बाहर है, 9 कने हर कुसी जो ऐ गुप्त योजना समझाई सके, जिसयो परमेश्वरे

जड़ा सारियां चिजां जो बणाने बाला है, शुरू ला ही गुप्त रखया था। (aiōn g165)

10 परमेश्वरे दा मकसद था, की हुण कलीसिया दे जरिये परमेश्वर दी अनन्त बुद्धि दा ज्ञान उना प्रधाना कने अधिकारियां पर प्रगट हो जड़े अम्बरे दे अणदियियां जगां च राज करदे न। 11 परमेश्वरे संसार जो बणाणे ला पेहले इसदी योजना बणाईयो थी, जिसयो उनी यीशु मसीह दे जरिये पूरा किता। (aiōn g165) 12 मसीह सोगी जुड़ने दिया बजा ला कने उस साड़े भरोसे दिया बजा ला हुण असां परमेश्वरे दिया हजुरी च हिम्मत कने भरोसे ला आई सकदे न। 13 इस ताई मैं बिनती करदा है की जड़े दुख मिंजो तुहाड़े ताई होआ दे न, उना दिया बजा ला सांझो होसला नी छडणा चाईदा क्योंकि ऐ सब कुछ तुहाड़े फायदे ताई है। 14 इस ताई मैं पौलुस गोडे भार बेईकरी तुहाड़े ताई पिता परमेश्वरे ला प्राथना करदा है। 15 सै सेई है जड़ा मसीह पर भरोसा करणे बाले परिवारां दा पिता है, जड़ा स्वर्ग च है कने धरती पर है, 16 मैं प्राथना करदा है की सै अपणिया महिमामय आशीषां चे तुहांजो ऐ दान देई सके की उदिया आत्मा दिया शक्तिया ने तुसां अपणी आत्मा जो मजबूत करन, 17 भरोसे दे जरिये मसीह तुहाड़े अंदर बसे। मैं प्राथना करदा है की परमेश्वर कने तुहाड़ा इक दुज्जे ताई प्यार तुहांजो मजबूत बणाऐ कने तुहांजो पोंणे ला बचाये। 18 कने परमेश्वरे दे सारे लोकां सोगी, तुहांजो ऐ पता लगणा की मसीह सांझो ने कितणा प्यार करदा है, जिसदी कोई सीमा नी। 19 कने मैं प्राथना करदा है की तुहांजो मसीहे दे उस प्यारे दा पता लग्गे जड़ा माणुआं दिया समझा ला बाहर है, ताकि तुहाड़ा चरित्र परमेश्वरे दे चरित्र सांई बणी सके। 20 परमेश्वरे दी शक्ति सोगी जड़ा सांझो च कम्म करा दा है, साड़े मंगणे या सोचणे ला भी जादा परमेश्वर करी सकदा है। 21 उदी महिमा कलीसिया च कने मसीह यीशु च हमेशा कने केई पिढियाँ-पिढियां दीकर होंदी रे। आमीन। (aiōn g165)

4 इस ताई मैं जड़ा प्रभु यीशु दी सेवा करणे दिया बजा ला जेला च केदी है, तुहांजो ने बिनती करदा है, की जिसा बुलाहट सोगी परमेश्वरे तुहांजो अपने लोक बणने ताई सदया है, उसा दे काबिल अपणी जिन्दगी जीन, 2 मतलब की सारिया दया ने कने प्यारे ने, कने सबर रखीकरी इकी दुज्जे दे व्यवहार जो सेहन करा, 3 ऐसा करणे दी कोशिश करदे रिया ताकि तुसां लगातार इक दुज्जे ने मिली झूली करी रेन, क्योंकि तुसां परमेश्वरे दिया आत्मा जरिये इक कितयो न। 4 असां सारे विश्वासी इक ही शरीर दे अंगा सांई न, कने असां सारयां जो इक ही पबित्र आत्मा

मिलया है। जियां तुहांजो इक आस दिती थी, जालू तुहांजो परमेश्वरे दे लोक बणने ताई चुण्या था। 5 असां सबना दा इक ही प्रभु है, असां सिर्फ यीशु मसीह पर ही भरोसा करदे न, असां सारयां जो इक ही बपतिस्मा मिलया है, 6 कने इक ही परमेश्वर है जड़ा सब लोकां दा पिता है, सै असां सारयां पर राज करदा है, सै असां सारयां दे जरिये कम्म करदा है, कने सै असां सारयां च रेंदा है। 7 पर मसीहे सांझो चे हर इकी जो उदे माफ दे अनुसार या उदारता दे कम्म करणे ताई लग-लग कने खास काबलियतां दितियां न। 8 इस ताई पबित्र शास्त्र च लिखया है, “सै उचिया जगा च चढया, कने सै अपने सोगी केई कैदियां जो लेई गया, कने माणुऐ जो दान दिते।” 9 जालू पबित्र शास्त्र बोलदा है की, सै उचिया जगा च चढया, इदा मतलब सिर्फ ऐहै की, सै धरतिया दे सबते निचलिया जगां च उतरया भी था। 10 इस ताई मसीह जड़ा थले आया, कने सै सेई है जड़ा स्वर्ग च सबना ला उच्ची जगा पर जाई करी बेई गया। ताकि सै हर जगा होई सके। 11 ऐ मसीह था जिनी ऐ जिम्मेदारी कलीसिया जो दिती: उनी थोड्यां जो प्रेरित बणाया, कने केईयां जो परमेश्वरे दा संदेश देणेबाला बणाया, कने केईयां जो शुभसमाचार सुणाने बाला, कने केईयां जो रखबाला, कने शिक्षक बणाया। 12 इना दी जिम्मेबारी ऐहै, की सै परमेश्वरे दे लोकां जो उदा कम्म करणे ताई तैयार करन कने मसीह दा शरीर जड़ा विश्वासियां दी मंडली है, सै मजबूतिया ला बददी जाए। 13 ऐ तालू दीकर होंदा रेणा जालू दीकर की असां अपने भरोसे कने परमेश्वरे दे पुत्रे दे बारे च अपनी समझ च इक होई जादे न। तालू असां काबिल होई जाणा, जियां की मसीह है कने असां पूरी तरा ने उदे सांई होई जाणा। 14 ताकि असां हुण बचयां सांई नी रेन, हुण असां उना किस्तियां सांई नी होन जिना जो लेहरां अग्रे पिच्छे धकेलदियां कने जिस पासे होआ चलदी उस पासे चली पोंदिया न। इदा मतलब है की सांझो धोखेबाज लोकां दी उना झूठी शिक्षा च नी फसणा चाईदा, जडियां सच्च लगदियां न। 15 पर प्यारे ने सच्च बोली करी कने सांझो हर तरहा ने काबिल होणा चाईदा ताकि असां मसीह सांई होई जान, जड़ा अपना शरीर दा, मतलब की कलीसिया दा सर है। 16 असां सारे जडे मसीह पर भरोसा करदे न, उदे शरीर दे अंगा सांई न। जियां इक माणुऐ दा शरीर उदे सारे जोडा ने इक सोगी जुड़ी करी रेंदा है, कने जालू शरीर दा हर इक अंग ठीक तरीके ने कम्म करदा है तां शरीर बडूदां कने मजबूत होंदा है; तियां ही जालू सांझो चे हर इक उस कम्मे जो करदा है जड़ा मसीहे सांझो दितया है तां असां

मजबूत कने काबिल बणना कने इक दुज्जे ने होर जादा प्यार करणा। 17 इस ताई उस अधिकारे सोगी जड़ा मिंजो प्रभुऐ दितया है, मै तहांजो ऐ दसदा है, की भरोसा नी करणे बाले लोकां साई, तुसां बेकार बिचारां सोगी अपणी जिन्दगी मत जिया। 18 क्योंकि सै समझणे दे काबिल नी न, कने उना दी नासमझी दिया बजा ने जड़ी उना च है कने सुणने ला मना करणे दिया बजा ने सै उस जिन्दगी ला लग होई गियो न जड़ा परमेश्वर दिन्दा है; 19 क्योंकि उना जो हुण शर्म नी ओदी, इस ताई उना बुरे कम्म करणे ताई अपु जो बदली लिया है, सै लगातार हर तरा दे बुरे कम्म करदे रेदे न, कने सै कदी भी इना चीजां जो छडणा नी चांदे न। 20 पर तुसां इस तरा दा व्यवहार करणा नी सिखया जालू तुसां मसीह दे बारे च सिखया। 21 जड़ा कुछ तुसां यीशु मसीह दे बारे च सुणया है कने जड़ा कुछ तुहाडे गुरूआं तहांजो सिखाया है, सै पक्का ही उदा सच्चा संदेश है। 22 तुहाडे गुरूआं तहांजो उस तरिके जो छडणे दी शिक्षा दिती, जिसदे अनुसार तुसां व्यवहार करदे थे। तुहाडियां बुरियां इच्छा तहांजो धोखा दिता कने तुहाडी जिन्दगी खराब करी दिती। 23 हुण तहांजो परमेश्वरे जो तुहाडे सोचणे दे तरीके जो बदलना देणा चाईदा, 24 कने परमेश्वरे तहांजो इक नोआ माणु बणाया है। इस नोए माणुऐ जो परमेश्वरे साई बणने ताई बणाया है। मतलब की उसयो असल च धर्मी कने पबित्र होणे ताई बणाया है। 25 इसा बजा ने झूठ बोलणा छडी करी हर इक अपने साथी विश्वासी ने सच्च बोले, क्योंकि असां सारे इक ही शरीर दे अंग न। 26 अगर गुस्सा होई जान, तां ध्यान रखा की तुसां पाप ना करन: दिन मुकणे ला पेहले तुसां गुस्सा होणा बंद करी दिया। 27 कने तुसां शैताने जो धोखा देणे दा मौका मत दिया। 28 चोरी करणे बाला फिरी चोरी न करे; पर उसयो अपने हथां ने इमानदारिया ने कम्म करणा चाईदा, ताकि गरीब लोकां दी सहायता करणे ताई उस बाल कुछ हो। 29 कोई गंदी गल्ल तुहाडे मुऐ ला ना निकले, पर उना गल्लां जो बोला जड़ियां लोकां ताई जरूरी न, जड़ियां की उना जो भरोसे च मजबूत करणे च सहायता करन। तालू तुसां जड़ा कुछ भी बोलगे उनी तुहाडे सुणने बालयां दा भला करणा। 30 अपने कम्मा दे जरिये परमेश्वरे दिया पबित्र आत्मा जो दुखी मत करा जड़ा तुहाडे छुटकारे ताई बयाने दे स्पे च दितया है। 31 हर तरा दी कड़वाट कने कोप कने गुस्सा, रोष, कने बैरभाव, कने निंदा तहांजो ला दूर होई जा। 32 इक दुज्जे पर कृपा कने दया करा, कने

जियां परमेश्वरे मसीह च तुहाडे पाप माफ किते, तियां ही तुसां भी इक दुज्जे दे पाप माफ करा।

5 तुसां परमेश्वरे दे प्यारे बच्चे न, इस ताई तुसां उदे साईं बणने दी कोशिश करा।
2 तुहाडा सभाब दुज्जयां ताईं प्यार भरया हो जियां यीशु मसीहे तुहांजो ने प्यार किता कने तुहाडे पापां दी माफी ताईं अपने आपे जो बलिदान करी दिता। परमेश्वर इस बलिदान ला खुश था, क्योंकि ऐ बलिदान उदे ताईं खुशबु बाले इत्र साईं था।
3 जदिया की परमेश्वरे दे लोकां ताईं सही है, तियां तुसां भी व्यभिचार, कने कुसी भी तरा दे बुरे कम्म, या लालचे दियां गल्लां दी चर्चा मत करदे। **4** कने ना ही अशलील गल्लां करा, कने ना बेकार गल्लां, कने ना ही अशलील मजाक करा, क्योंकि ऐ गल्लां शोभा नी दिदिया कने सही नी न, पर सिर्फ तुहाडे मुए ला धन्याबाद ही निकले। **5** क्योंकि तुसां ऐ अच्छी तरा ने जाणदे न की कुसी व्यभिचारी दी, बुरे या लालची माणुऐ दी, जड़ा मूर्ति पूजणे बाले साईं है, जड़ा इस संसारे दी चीजां दी अराधना करदा है। इना मसीह कने परमेश्वरे दे राज्य दा हिस्सा नी बणना। **6** उना लोकां दियां गल्लां ने मुख मत बणा जड़े इना पापां जो करणे ताईं बहाने बणाणे दी कोशिश करदे न; क्योंकि इना ही कम्मा दिया बजा ने परमेश्वरे दा गुस्सा हुकम नी मनणे बालयां पर भडकदा है। **7** इस ताईं तुसां इना पाप भरे कम्मा जो करणे च उना सोगी मत जुडा। **8** तुसां अंधे च रेणेबाले लोकां साईं होंदे थे, पर हुण तुसां लौई च रेणेबाले लोक न, क्योंकि तुसां प्रभु दे लोक न। इस ताईं लौई च रेणेबाले लोकां साईं कम्म करा। **9** क्योंकि अगर कोई माणु लौई च है, तां उदा चाल चलन अच्छा कने धार्मिक होदा है कने उस पर भरोसा करी सकदे न, **10** कने ऐ सिखणे दी कोशिश करा की प्रभु जो क्या खुश करदा है। **11** कने तुसां इना पाप भरे कम्मा जो करणे च उना सोगी मत जुडा, बल्कि लोकां जो दस्सा की ऐ कम्म बुरे न। **12** क्योंकि अविश्वासी लोकां दे गुप्त कम्मा दी चर्चा भी सरमा दी गल्ल है। **13** पर जालू कुसी चिजा पर लौ चमकदी है तां हर कोई दिखी सकदा है, की सै चीज कदेई है क्योंकि जालू कुसी चिजा पर सै पोंदी है, तां चीज खुद लौ बणी जांदी है। **14** इसा बजा ने लोक बोलदे न, “हे सोणे बालयो जागी जा कने मरयां ला जिन्दे होई जा; मसीह तुहांजो पर लौ चमकाणी।” **15** इस ताईं ध्याने ने दिखदे रिया की तुसां कदेई जिन्दगी जी दे न। बेअकलयां साईं नी पर ज्ञानिया साईं जिन्दगी जिया। **16** कने भलाई करणे दे हर इक मौके दा अकला ने इस्तेमाल करा

क्योंकि दिन बुरे न। 17 इस बजा ने अज्ञानी मत बना, पर ध्याने ने समझा की प्रभु
 तुहांजो ला क्या करवाणा चांदा है। 18 कने शराब पी करी मतबाले मत बणी रिया,
 क्योंकि इसला लोक असभ्य कने दुज्जयां ने बुरा व्यवहार करदे न, पर पबित्र
 आत्मा जो अपने आप पर काबू करणा दिया, 19 अगर तुसां पबित्र आत्मा दे
 काबू च न, तां तुसां इयां ही करणा; जालू तुसां अपु चे गिठे होंगे तां भजन कने
 स्तुति करा कने उना होर गाणयां जो गा जडा पबित्र आत्मा तुहांजो दिन्दा है। 20
 कने जडा कुछ साडे प्रभु यीशु मसीहे किता उदी बजा ने हमेशा सारियां गल्लां
 ताई साडे पिता परमेश्वर दा धन्याबाद करदे रिया। 21 असां मसीह ताई श्रदा
 कने भक्ति रखणे दिया बजा ने इक दुज्जे दे अधीन रिया। 22 हे घरे बालियों,
 अपने-अपने घरे बालयां दे अधीन रिया, जियां तुसां प्रभु दे अधीन रेंदियां न। 23
 क्योंकि घरेबाला तां घरे बालिया दा सिर है, जियां की मसीह कलीसिया दा सिर
 है; मसीह कलीसिया दा उद्धारकर्ता है, जडी उदा अपना शरीर है। 24 जियां
 कलीसिया मसीह दे अधीन न, तियां ही घरे बालियां भी हर गल्लां च अपने-अपने
 पति दे अधीन रेंन। 25 हे पतियो, अपणिया-अपणिया घरे बालिया ने प्यार रखा,
 जियां मसीह कलीसिया ने प्यार करिके साडे ताई अपनी जिन्दगी देई दिती। 26
 ताकि उदा बचन कलीसिया दे लोकां पर प्रगट होईकरी उना जो पाप ला शूद्र करे,
 जियां कोई माणु कुसी जिचा जो धोई करी शूद्र करदा है; 27 सै अपने लोकां ताई
 मरी गया ताकि सै अपने लोकां जो सिद्ध बनाई सके, कने सै सांझो अपनी ऐसी
 महिमामय कलीसिया बनाई करी पेश करी सके, जिना च कोई दोष या पाप या होर
 कोई बुरी गल्ल नी होणी बल्कि सै पबित्र कने सिद्ध होणे। 28 इयां होणा चाईदा,
 की पति अपणिया-अपणिया घरे बालिया ने अपने शरीर सांई प्यार करे, जडा
 अपणिया घरे बालिया ने प्यार करदा है, सै अपने आप ने प्यार करदा है। 29
 क्योंकि कुनी भी अपने शरीर ने बैर नी किता बल्कि उदी देखभाल करदा है,
 जियां मसीह कलीसिया दी देखभाल करदा है, तियां ही इक माणु खुद दी देखभाल
 करदा है। 30 क्योंकि असां सारे मसीह दे शरीर दे अंगा सांई न। 31 जियां की
 पबित्र शास्त्र च लिखया है, “इसा बजा ने माणु अपने माता पिता जो छडी करी
 अपणिया घरे बालिया ने मिल्ली के रेंणा, कने उना दोनो इक तन होणा।” 32 ऐ
 इक कीमती कने गेहरी शिक्षा है, कने मै इदी तुलना मसीह कने उस पर भरोसा
 करणे बालयां सोगी करदा है। 33 पर तुसां पर भी लागू होदा है, की हर इक

अपणिया घरे बालिया ने अपने सांई प्यार करे, कने घरे बाली भी अपने घरे बाले दी इज्जत करे।

6 हे बच्चो, पबित्र शास्त्र च लिखया है; “अपणे माता पिता दी इज्जत करा, तालू तेरे सोगी सब भला होणा कने धरती पर तू जादा दिन जिणा।” ऐ पेहला हुकम है जिसयो परमेश्वरे इक वायदे सोगी दितया है। इस तांई हे बच्चो तुसां जडे प्रभु पर भरोसा करदे न, तुसां तांई ऐई ठीक है की तुसां अपने माता पिता दी गल्ल मन्ना।

4 हे माता पिताओं, अपने बचयां जो अपने व्यवहार ने गुस्सा ना चढा पर प्रभु दी शिक्षा, कने चेतावनी देईकरी, उना दी देखभाल करा। **5** हे नोकरो, जडे लोक संसारे दे अनुसार तुहाडे मालिक न, उना दा इमानदारी कने सच्चाई ने हुकमा जो मन्ना, जियां यीशु मसीह दा मंदे न। **6** ऐ सब सिर्फ दिखावे तांई कने लोकां जो खुश करणे तांई मत करा, तुसां मसीह दे सेवक न, इस तांई तुहांजो अपने पुरे मने ने सेई करणा चाईदा जडा परमेश्वर चांदा है की तुसां करा। **7** तुसां खुशिया ने अपने सेवा दे कम्मा जो करदे रिया, जियां मन्ना तुसां लोकां दी नी पर प्रभु दी सेवा करा दे न। **8** क्योंकि तुसां जाणदे न, की जडा कोई जदिया खरा कम्म करगा, चाऐ सै नोकर हो, चाहे सै अजाद हो, प्रभुऐ उसयो उदा इनाम देणा है। **9** इयां ही हे मालिको, तुसां उना जो धमकियां नी देणिया चाईदियां, पर तुहांजो अपने नोकरां सोगी सियुदा ही व्यवहार करणा चाईदा, जियां मै उना ने बोलया है की सै तुसां ने करन। क्योंकि तुसां जाणदे न की, उना दा कने तुहाडा दोनों दा मालिक स्वर्गे च है, कने सै कुसी दा पक्ष नी लेंदा। **10** आखरी च, आत्मिक रूप च प्रभु दी अपार शक्तिया ने मजबूत बणा। **11** असां माणुआं दे खिलाफ लड़ाई नी लडा दे न। असां प्रधाना कने अधिकारियां कने अंधेरे दे हाकिमा ने कने आत्मिक संसारे दिया शक्तिया दे खिलाफ लडा दे न। इस तांई सारे हथियार पेहनी लिया जडा परमेश्वर दिदा है कने जालू सै बुरा दिन ओणा है तालू तुसां शैताने दियां चालां ने अपने आप जो बचाई सकदे न। कने जालू ऐ लड़ाई खत्म होई जाणी तालू भी तुसां मजबूतिया ने खडे रेई सकणा। (aiōn g165) **14** इस तांई जियां की इक सिपाई लड़ाई तांई तैयार होणे तांई अपनी कमरा च बेल्ट बनदा है, तियां ही परमेश्वरे दी सच्चाईया जो बेल्टा सांई बन्नी लिया, कने जियां झिलम सिपाइये दी लड़ाईया च रक्षा करदी है, तियां ही जालू शैतान तुहांजो पर हमला करदा है तालू तुहाडा धार्मिक व्यवहारे तुहाडी रक्षा करणी है। **15** कने परमेश्वरे दी शांति दा शुभसमाचार सुणाणे तांई

तुहाडी इच्छा ठीक तियां ही होणी चाईदी, जियां की इक सिपाई लड़ाई ताई तैयार होणे ताई जूते पेहनदा है; 16 कने इक होर गल्ल है, जियां इक सिपाई दुशमणे दे तीरां ला बचणे ताई ढाल लेदां है, तियां ही मसीह पर पक्का भरोसा रखा ताकि मसीह तुहांजो शैतान दे नुक्सान करणे बाले जल्दे तिरां ला बचाई रखे। 17 जियां इक सिपाई अपने सिरे जो लड़ाई च बचाणे ताई टोप लगाई रखदा है, तियां ही परमेश्वरे तुहांजो शैताने ला बचाणा। जियां इक सिपाई अपने बचाब ताई इक तलबार पकड़दा है, तियां ही अपने बचाब ताई परमेश्वरे दे बचने दा इस्तेमाल करा। 18 कने हर बकते जियां पबित्र आत्मा अगुवाई करदा है तियां प्राथना करा कने बिनती करदे रिया, कने जागदे रिया कने हमेशा पबित्र लोकां ताई प्राथना करदे रिया, 19 कने तुसां मेरे ताई भी प्राथना करा की परमेश्वर मिंजो बोलणे ताई शब्द दे, ताकि मैं हिम्मत ने शुभसमाचार दे बारे च जड़ा सारे लोकां ताई है, उदियां गुप्त गल्लां उना जो समझाई सके, 20 इस ताई मैं जंजिरा च जकड़यो होऐ राजदूत साई सेबा करा दा है। प्राथना करा की जियां मिंजो बोलणा चाईदा तियां ही हिम्मत ने शुभसमाचार दा प्रचार करी सके। 21 कने तुखिकुस जड़ा प्यारा भाई कने प्रभु च भरोसे झोगा सेवक हे, उनी तुहांजो सारियां गल्लां दस्सी देणियां ताकि तुसां जांणी सकन की मेरी हालत क्या है कने क्या करा दा है। 22 उसयो मैं तुहाडे बाल इस ताई भेजया हे, की तुसां साड़िया हालता जो जाणन, कने सै तुहांजो उत्साहित करी सके। 23 मैं प्राथना करदा है की पिता परमेश्वर कने प्रभु यीशु मसीह तुसां भरोसा करणे बालयां जो शांति दे, ताकि इसा बजा ने तुसां इक दुज्जे ने प्यार करन कने लगातार प्रभु यीशु मसीह पर भरोसा करन। 24 परमेश्वर तुसां सारयां पर अनुग्रह करे जडे उस प्यार ने प्रभु यीशु मसीह जो प्यार करदे न जड़ा प्यार कदी खत्म नी होँदा।

फिलिप्पियों

1 मैं पौलुस तीमथियुस सोगी ऐ चिट्ठी लिखा दा है कने असां यीशु मसीह दे सेबक न। मैं ऐ चिट्ठी फिलिप्पी शेहरे च रेणे बाली कलीसिया दे अगुवां जो कने सेवकां समेत परमेश्वर दे पबित्र लोकां ताई लिखा दा है। **2** मैं ऐ प्राथना करदा है कि, साडे पिता परमेश्वर कने प्रभु यीशु मसीह दी तरफा ला तुहांजो अनुग्रह कने शांति मिलदी रे। **3** पहेले दिने ला तुसां यीशु मसीह दे शुभसमाचार पर भरोसा किता, कने शुभसमाचार जो फेलाणे च साडे हिस्सेदार रे। इसा बजा ला मैं जालू भी तुहाड़े बारे च सोचदा है, तां परमेश्वरे दा धन्यवाद करदा है, कने मैं खुशिया सोगी तुहाड़े सारयां ताई उदी सहायता ताई प्राथना करदा है। **6** मिंजो इसा गल्ला दा भरोसा है की परमेश्वरे तुसां च खरा कम्म शुरू कितया है, उनी यीशु मसीह दे दुबारा मुडी ओणे दीकर उसयो पूरा भी करणा। **7** ठीक है कि मैं तुसां सारयां ताई ऐसा ही बिचार करे, क्योंकि मेरे मने च तुहाड़े ताई खास जगा है, क्योंकि जालू मैं केद च है, ऐ शुभसमाचार दी सच्चाईया ला जबाब देणे ताई तुसां मेरे सोगी परमेश्वर दे अनुग्रह च साथी न। **8** इदे च परमेश्वर मेरा गबाह है कि मैं यीशु मसीह सांई प्यार करिरी तुसां सारयां जो मिलणे दी इच्छा करदा है। **9** मैं ऐ प्राथना करदा है, की तुसां पूरी समझ कने ज्ञान ला इक दुज्जे सोगी लगातार प्यार च बददे जा, **10** इस ताई की तुसां जडियां खरियाँ गल्लां न उना जो अपनाई करी योग्य बणी जा, ताकि मसीह दे मुडी ओणे दीकर सच्चे कने निर्दोष बणी रेई सकन। **11** कने मसीह यीशु दे जरिये पैदा होणे बाले धार्मिकता दे कम्मा ला अपने जो भरी लिया, जिसला परमेश्वरे दी महिमा कने स्तुति होंदी रे। **12** है मसीह भाईयो, मैं चांदा है, की तुसां सारे भी ऐ जाणी लिया जडा मिंजो पर बितया है, उसने मतयां लोकां शुभसमाचारे पर भरोसा किता है। **13** ऐथू दीकर की महाराजा कैसरे दे राज्य दी सारी सेना कने बाकी सारे लोकां जो भी ऐ पता चली गया कि मैं मसीह दे शुभसमाचार ताई जेला च है। **14** कने हुण मेरे केद च होणे दिया बजा ला, प्रभु यीशु च जडे भाई न, उना चे केई पुरे भरोसे सोगी परमेश्वरे दा बचन बिना कुसी डरे दे कने हिम्मत ला सुणा दे न। **15** कुछ लोक तां जलन कने लड़ाईया दिया बजा ला मसीह दा प्रचार करदे न कने कुछ भली सोच ला प्रचार करणे च मेरी सहायता करदे न। **16** जडे भली सोचा सोगी प्रचार करदे न, सै ऐ इस ताई करदे न क्योंकि सै मिंजो सोगी प्यार करदे न कने सै जाणदे न कि मैं शुभसमाचारे दे जबाब देणे ताई जेला च रखया है।

17 पर जड़े लोक जलन रखदे न, सै अपणी मतलबी इच्छा दिया बजा ला मसीह दा प्रचार करदे न पर इमानदारिया ला नी करदे, ऐ समझीकरी की सै जेला च मेरी पेशानियां जो बधाई सकन। 18 तौ क्या होया? बस इतणा ही, की हर तरीके ला चाऐ झुठिया बजा ला चाऐ सच्चाईया ला, मसीह दा शुभसमाचार सुणाया जांदा है, कने मैं इसला खुश है, कने हमेशा खुश रेंणा। 19 क्योंकि मैं जाणदा है की तुहाडिया प्राथना ला, कने पबित्र आत्मा ला जड़ी यीशु मसीह भेजियो है, उदी सहायता ने कैदा ला अजाद होई जाणा। 20 मेरी दिले दी इच्छा कने आस है, की कदी भी मैं कुसी भी हालात च शरमिंदा ना होऐ, पर मिंजो मसीह दे बारे च बोलणे दी हिम्मत होंदी है, जियां मैं पेहले किता था, चाऐ मैं जिंदा रे या मरी जां, मैं अपणी पूरी जिन्दगी ने मसीह दा आदर करदे रें। 21 क्योंकि अगर मैं जिंदा रें, तां सिर्फ मसीह तांई है, कने अगर मरी जां तां ऐ मेरे तांई होर जादा ठीक होणा क्योंकि तालू मैं मसीह सोगी रेणा। 22 पर अगर शरीर च जिन्दा रें तां मैं मसीह तांई कम्म करी सकदा है, पर मैं नी जाणदा की कुसयो चुणे। 23 मन तां करदा की मरी जां, कने मसीह बाल जाई करी रें, क्योंकि ऐ बड़ा ही अच्छा है। 24 पर मेरा जिन्दा रेणा होर भी जरूरी है, क्योंकि तुहांजो मेरी सहायता दी जरूरत है। 25 कने इस तांई की मिंजो इदा भरोसा है। की मिंजो पता है की मैं जिंदा रेंणा है, कने तुसां सबना सोगी रेणा, मैं तुहांजो भरोसे च मजबूत होणे च कने खुश रेणे च तुहाडी सहायता करगा। 26 कने जालू मैं दुबारा आंगा, तां मेरिया बजा ने तुहाडे बाल यीशु मसीह पर घमंड करणे दी होर भी बजा होणी। 27 ध्यान रखा की तुहाडा सभाव मसीह दे शुभसमाचार दे अनुसार हो। चाऐ मैं आई करी तुहांजो ने मिल्ले या नी, मैं तुहाडे बारे च ऐई सुणे की तुसां इक ही भाव च, कने इक मन होईकरी शुभसमाचार दे भरोसे तांई सोगी मेहनत करदे न। 28 कने कुसी भी गल्ला तांई अपने विरोधियां ला डरदे नी। तुहाडी हिम्मत उना तांई खात्मे दा साफ चिन्ह है, पर तुहाडे तांई उद्वारे दा, कने ऐ परमेश्वरे दिया तरफा ला है। 29 क्योंकि परमेश्वर तुहांजो ऐ मोका दितया है, की ना सिर्फ तुसां मसीह पर भरोसा करा, पर उस तांई दुख झेलणे तांई बरदान भी मिलया है। 30 कने तुहांजो तियां ही मेहनत करणी है, जियां तुसां मिंजो फिलिप्पि शेहरे च करदे दिखया है, कने जिना दुखां दे बारे च तुसां सुणदे न जड़े मिंजो जेला च हुण भी न।

2 अगर तुसां मसीह च होणे दिया बजा ला उत्साहित न, या उदे प्यार ला अराम मिलया हो, पबित्र आत्मा सोगी संगती हो क्योंकि मसीह तुहाड़े ताई कम्णामय कने दयालु है। **2** तां मेरी ऐ खुशी पूरी करा की इक मन रिया, कने इक ही प्यार, इक ही चित, कने इक ही इच्छा रखा। **3** मतलब कने घमंड सोगी कुछ मत करा, पर दीनता ला इक दुज्जे जो अपणे ला खरा समझा। **4** हर कोई अपने ही फायदे दी नी, पर दुज्यां दे फायदे दी भी चिंता करा। **5** जदेया यीशु मसीह दा सबाभ था तदिया ही तुहाड़ा भी हो; **6** यीशु मसीह पूरी तरहा ला परमेश्वर था, पर उनी इस प्रभुता पर अपना हक नी रखणा चाया। **7** पर उनी अपना सारा ईश्वरीय हक छडीं दिता कने इक दास सांई बणी गया, कने इक आम माणु बणी गया। **8** कने माणु बणी करी अपने आपे जो दीन किता कने सै परमेश्वरे दा इतणा आज्ञाकारी रिया कि सै मरणे तांई भी तैयार होई गया, हां, उनी सूली दी मौत जो भी इक अपराधी सांई सेहन करी लिया। **9** इसा बजा ला परमेश्वरे उसयो सारयां ला उच्चे आदर दिया जगा च बैठाया कने उसयो सै ना दिता जडा सारयां ना ला बदिया है, **10** कि जडे स्वर्गे च कने धरतिया पर न कने जडे धरतिया दे थले न; सै सारे यीशुऐ दे ना जो आदर देणे तांई गोडे टेकन, **11** कने परमेश्वर पिता दी महिमा तांई हर कोई मनी ले की यीशु मसीह ही प्रभु है। **12** इस तांई हे मेरे प्यारो, जालू मैं तुहाड़े सोगी था तालू तुसां हमेशा परमेश्वरे दे हुकमा जो मनया है। हुण जालू मैं तुहांजो ला दूर होई गया है, तां तुहांजो होर भी गल्ल मनणा चाईदी। डरदे कने कमदे होए तुसां सारयां जो उना चीजां जो करणा चाईदा जडियां उना लोकां तांई सही न जिना जो परमेश्वरे बचाया है। **13** क्योंकि परमेश्वर ही है, जडा तुहांजो च कम्म करा दा है, कने तुहांजो करणे दी इच्छा कने शक्ति दे दा है, जडा उसयो खुश करदा है। **14** सारे कम्म बिना बुड-बुडाए कने बिना बेहसा ला करा, **15** ताकि तुसां इस बुरे कने पापी संसारे च परमेश्वरे दी सिद्ध ओलादी सांई पबित्र कने निर्दोष जिन्दगी जिया, इस संसारे दे लोकां बिच तुसां अम्बरे दे तारयां सांई चमका, जियां तुसां उना जो बचन सुणादे न जडा अनन्त जिन्दगी दिन्दा है। **16** कने जालू यीशु मसीह दुबारा मुडी करी ओणा तां मिंजो घमंड होणा की मेरी कोशिश कने मेरी मेहनत बेकार नी गई। **17** कने जालू मैं तुहांजो शुभसमाचार सुणाया, तुसां प्रभु यीशु पर भरोसा किता कने तुसां सेवा तांई अपनी जिन्दगी देई दिती है। इस तांई, भले ही मिंजो शुभसमाचार सुणाणे दिया बजा ला मारी दिया, तमी मैं तुहाड़े सोगी खुश रेणा। **18** मेरी विनती है

की तुसां भी इयां ही खुश रिया कने मेरिया खुशिया च शामिल होई जा। 19 मिंजो प्रभु यीशु मसीह च आस है की मैं तीमुथियुस जो तुहाड़े बाल तोल्ली भेजगा, ताकि तुहाडा हाल सुणीकरी मिंजो उत्साहित होई जां। 20 क्योंकि मेरे बाल ऐसे सबाभे दा कोई नी है, जडा सच्चे मने ला तुहाडी चिंता करे। 21 क्योंकि सारे अपने-अपने फायदे दे बारे च सोचते रेंदे न, ना की यीशु मसीह दे बारे च। 22 पर तुसां जाणदे न की तिमोथियोसे कियां दसया की सै बफादार है, उनी शुभसमाचार दे प्रचार च मेरा इस तरिके ला साथ दिता, जियां इक पुत्र अपने पिता दा साथ दिन्दा है। 23 इस ताई मिंजो आस है की जियां ही मिंजो पता लगगा की मेरी क्या हालत होणी, तियां ही मैं उसयो तोल्ली भेजी दिगा। 24 कने मिंजो प्रभु च भरोसा है की मैं अपु भी तोल्ली ओणा है। 25 पर मैं इपफ्रुदितुस जो तुहाड़े बाल भेजणा जरूरी समझया। जडा मेरा भाई है, कने साथी कने सोगी लडणे बाला, तुहाडा संदेश मेरे बाल पुजाणे बाला, कने जरूरी गल्लां च मेरी सेवा टहल करणे बाला है। 26 उदा मन तुसां सारयां च लगया था, इस ताई सै बेचेन रेंदा था, क्योंकि तुसां उदिया बमारिया दा हाल सुणया था। 27 कने पक्का ही सै बिमार तां होई गया था, ऐथू दीकर की मरणे वाला भी था, पर परमेश्वरे उस पर दया करिके उसयो ठीक किता। परमेश्वरे सिर्फ उस पर ही नि, पर मिंजो पर भी दया किती ताकि मैं पेहले ला भी जादा दुख सेहन ना करे। 28 इस ताई मैं उसयो भेजणे ताई होर भी जादा उत्सुक है कि तुसां उसयो दुबारा दिखीकरी खुश होई जान कने तुहाड़े बारे च मेरी चिंता भी घटी जा। 29 इस ताई तुसां प्रभु च उस सोगी बडिया खुशिया ला मिलनयो, कने तुहांजो उदा कने ऐसे लोकां दा आदर करणा है। 30 क्योंकि सै मसीह दे कम्मा ताई अपने प्राण खतरे च पाई करी मौत दे इतणे नेडे आई गया था, ताकि सै मेरी सहायता करी सके, क्योंकि तुसां मेरी सहायता दूर होणे दिया बजा ला नी करी सकदे न।

3 इस ताई हे मेरे मसीह भाईयो, प्रभु यीशु च खुश रिया। सेई गल्लां तुहांजो बार-बार लिखणे च मिंजो कोई तकलीफ नी होंदी, पर मैं तुहांजो झूठे गुरूआं ला बचाणा चांदा है। 2 बुरे लोकां ला साबधान रिया जडे कुतयां साईं न कने उना लोकां ला भी साबधान रिया जडे बोलदे न की उद्धार ताई तुहांजो खतना करणा जरूरी है। 3 क्योंकि सै बोलदे न की असां ही परमेश्वरे दे सच्चे लोक न, जडे परमेश्वरे दी भक्ति उदी आत्मा ला करदे न, कने अपनी जिन्दगी च यीशु मसीह

सोगी इक होईकरी खुश होंदे न, कने अपणियां खुद दियां कोशिशों पर भरोसा नी करदे न। 4 पर मिंजो बाल अपणियां खुद दी कोशिशों पर भरोसा रखणे दी खरी बजा है, अगर कोई इयां सोचदा है, की उदे बाल अपने आपे पर भरोसा रखणे दी खरी बजा है, तां मेरे बाल उसला भी बदीकरी बजा है। 5 जालू मैं अठां रोजां दा होया तां परमेश्वरे दे हुकमा ला मेरा खतना होया, मैं जमींदा ही इस्राएली है, कने बिन्यामीन दे गोत्र दा है, मेरे माता पिता इब्रानी थे; मैं भी पक्का इब्रानी है; फरीसी होणे दिया बजा ने मैं सकती ला मूसा दी व्यवस्था जो मनया। 6 अगर मैं अपनी जलन दे बारे च बोलें, तां मैं कलीसिया जो तंग करणे बाला था; कने यहूदी व्यवस्था दा पालन करणे च, मैं इक धार्मिक माणु था कने सारी व्यवस्था दा पालन करदा था। 7 पर जडियां गल्लां मेरे फायदे दियां थियां, मैं उना जो मसीहे दिया बजा ला नुक्सान समझया। 8 क्योंकि प्रभु यीशु मसीह जो जाणना बाकी सारियां चीजां जो जाणने ला बदीकरी है, कने मैं बाकी सारियां चीजां जो बेकार समझदा है। ज़िदिया बजा ला मैं सब कुछ छडी दिता कने मैं उना जो कूडा समझदा है, ताकि मसीह जो होर भी गहराई ला जाणे। 9 ताकि मैं उसी सोगी एकता च रेई सके, मेरी धार्मिकता मूसा दी व्यवस्था दे हुकमा पर आधारित नी है, पर ऐ सै धार्मिकता है, जडा सिर्फ परमेश्वर उना जो दिन्दा है, जडे मसीह पर भरोसा करदे न, 10 मैं ऐ चांदा है की मसीह जो होर जाणी लें कने उदे मरयां चे जी उठणे दी शक्ति जो जाणी सके कने उदे दुखे च शामिल होईकरी उदी मौत च उदे सांई बणी जां, 11 ताकि मैं भी मरयां चे फिरी जिन्दा होणे दा अनुभव करी सके। 12 मैं ऐ दाबा नी करदा की, मिंजो ऐ सब पेहले ही मिल्ली गया है, पर मैं कोशिश करी के अग्रे बदा दा है, की मिंजो सै मिल्ली जाए, जिस तांई प्रभु यीशु मसीह मिंजो चुणया है। 13 मेरे मसीह भाईयो, मैं ऐ दाबा नी करदा की मिंजो मेरा लक्ष्य मिल्ली गया है; पर ऐ इक ही कम्म करदा है, की जडियां गल्लां होई गियां न, उना जो भुली करी अग्रे क्या होणा उस मकसदे तांई बडी मेहनत करा दा है, 14 कने निशाने पासे दोडदा जान्दा है, ताकि मैं स्वर्गे जाणे दा इनाम पाई सके, जिदे तांई परमेश्वरे मिंजो प्रभु यीशु दे जरिये स्वर्गे जो सदया है। 15 इस तांई असां चे जितणे भी आत्मिक स्पे च समझदार न, सै सारे इक मन रखन, कने अगर कुसी गल्ला च तुहाडा होर ही बिचार हो, तां परमेश्वरे उसयो भी तुहांजो पर प्रगट करी देणा। 16 इस तांई जिथू दीकर परमेश्वरे सांझो पर सच्चाई जो प्रगट कितया है, उसी दे

अनुसार ही सांझो चलणा भी चाईदा। 17 हे मसीह भाईयो, तुसां मेरे सांई व्यवहार करा कने उना लोकां पर ध्यान दिया जडे मेरे सांई व्यवहार करदे न, कने जदिया व्यवहार तुसां सांझो करदे दिखया जालू असां तुहाडे सोगी थे। 18 क्योंकि मते न जिना दे बारे च मैं पेहले भी अच्छे ने दसया है, कने हुण भी रोई-रोई करी दस्सा दा है, की ऐथू केई लोक न जडे ऐसी जिन्दगी जिन्दे न, जिसने पता चलदा है की सै मसीह दी सूली पर मौत दे खिलाफ न। 19 नाश होणा ही उना दा अंत है, सै शरीर दियां इच्छा जो पूरा करणे तांई जिन्दे न, कने अपने शर्मनाक कम्मा पर घमंड करदे न कने हमेशा संसारे दियां चीजां दे बारे च सोचदे रेंदे न। 20 पर असां स्वर्ग दे निबासी न, कने असां अपने उद्धारकर्ता प्रभु यीशु मसीह दी स्वर्ग ला बापस ओणे दा इंतजार करा दे न। 21 यीशु मसीह अपणिया उसा शक्तिया ने, हर इक चीजा जो अपने बसे च कितया है, कने साडे कमजोर, संसारिक शरीर दा रूप बदली कर, अपनी महिमा दे शरीर सांई बणाई देणा है।

4 इस तांई हे मेरे प्यारे मसीह भाईयो, मिंजो तुसां लोकां ने मिलणे दी बड़ी इच्छा है। तुसां, जडे मेरी खुशी कने मुकुट न, प्रभु च लगातार टिकी रिया। 2 मैं यहूदिया कने सुन्तुखे दोनों बेहणा ला विनती करदा है, की प्रभु च इकी दुज्जे ला मिली जुली करी रिया। 3 हे सच्चे साथी सुन्तुखे, मैं तिजो ला भी विनती करदा है, कि तू उना जनानिया दी सहायता कर की सै मेल मिलाप करी लेन, क्योंकि उना मेरे सोगी शुभसमाचार प्रचार करणे च, क्लेमैस कने मेरे उना होर साथियां सोगी बड़ी मेहनत किती, जिना दे ना जिन्दगी दी कताबां च लिखयो न। 4 प्रभु च हमेशा खुश रिया; मैं फिरी बोलदा है, खुश रिया। 5 सारे लोक तुहाडे कोमल सभाव जो जाणी सकन। प्रभु यीशु दा ओणा नेडे है। 6 कुसी भी गल्ला दी चिंता मत करा; पर हर इक हालात च तुहाडे निवेदन, प्राथना कने विनतिया दे जरिये धन्यावाद सोगी परमेश्वरे सामणे रखे जान। 7 तालू परमेश्वरे दी शांति, जड़ी माणुआं दी समझा ला परे है, तुहाडे दिले कने तुहाडे बिचारां जो मसीह यीशु च संभाली करी रखगी। 8 इस तांई हे मसीह भाईयो, अंत च, जडियां-जडियां गल्लां सच्च न, कने जडियां-जडियां गल्लां आदरणीय न, कने जडियां-जडियां गल्लां धर्मी न, कने जडियां-जडियां गल्लां पबित्र न, कने जडियां-जडियां सुंदर न, कने जडियां-जडियां गल्लां प्रशंसा दे काबिल न, जडियां-जडियां गल्लां उत्तम कने आदर दियां गल्लां न, उना पर ही तुहाडा मन लगी रे। 9 जडियां गल्लां तुसां मिंजो ला सिखियां, कने ग्रहण

कितियां, कने सुणियां, कने मिंजो च दिखियां उना दा ही पालन करा, तां शांति दे परमेश्वरे तुसां लोकां सोगी रेणा। 10 मैं प्रभु च बड़ा खुश है, की हुण तुहांजो इतणे दिना बाद मिंजो पैसे भेजणे दे बारे च फिरी बिचार आया है; पक्का तुहांजो शुरू च भी इदा बिचार था, पर तुहांजो मौका नी मिल्ला। 11 ऐ नी की मिंजो कुसी जरूरत दिया चिजा दी कमी है क्योंकि मैं हर तरा दे हालतां च खुश रेणा सिखया है। 12 मैं बड़े थोड़े च भी जीणा जाणदा है, कने जरूरत ला जादा च भी रेणा जाणदा है; हर इक गल्ला च कने सारे हालतां च मैं रजणा कने जालू मेरे बाल खाणे ताई बड़ा कुछ होंदा है, कने जालू मेरे खाणे ताई बड़ा घट होंदा है, तां मैं दोनों हालतां च रेणा सीखी लिया है। 13 मसीह दे जरिये, जड़ा मिंजो शक्ति दिन्दा है, उदे च मैं सब कुछ करी सकदा है। 14 तमी तुसां खरा किता कि मेरे इना मुश्किलां दे दिना च पैसे भेजी करी मेरी सहायता किती कने मेरे उना दुखां च मेरे साथी होऐ। 15 हे फिलिप्पी शहर दे लोकों, तुसां तां अपु ही जाणदे न जालू मैं तुहांजो यीशु मसीह दा शुभसमाचार सुणाया था कने जालू मैं तुहाड़ी जगा ला मकिदुनिया प्रदेश जो गया, तालू तुहांजो छडी होर कुनी भी कलीसिया च लेणे-देंणे दे बारे च मेरी सहायता नी किती। 16 इयां ही जालू मैं थिस्सलुनीके शहर च था, तालू भी तुसां मेरी सहायता जो पूरा करणे ताई इक बरी नही पर दो बरी मिंजो पेसे भेजे थे। 17 मैं ऐ इस ताई नी बोलदा की मैं पैसा चांदा है की इसयो उना अच्छी चिजां दी सूची च शामिल करा, जिना जो तुसां पेहले ही करी बैठयो न, कने जिस ताई परमेश्वरे तुहांजो इनाम देणा। 18 मेरे बाल सब कुछ है, कने बड़ा जादा भी है; जड़ियां चीजां तुसां इपफ्रुदितुस दे हथे ला भेजियां थियां उना जो पाई करी मैं रजी गया है, ऐ इक तोफे साई है, जिदे च मिठी खुशबु ओआ दी है, जिसयो सै ग्रहण करदा है कने ऐ परमेश्वर जो खुश करदा है। 19 मेरा परमेश्वर भी उस धने दे अनुसार जड़ा महिमा सोगी यीशु मसीह च है, तुहाड़ी हर इक घाटे जो पूरा करगा। 20 साड़े पिता परमेश्वरे दी महिमा युगां-युगां दीकर होंदी रे। आमीन। (aiōn g165) 21 यीशु मसीह च सारे पबित्र लोकां जो मेरा नमस्कार बोला। जड़े मसीह भाई मेरे सोगी न, तुहांजो नमस्कार बोलदे न। 22 सारे पबित्र लोक, खासकर जड़े महाराजा कैसरे दे घराने दे न, तुहांजो नमस्ते करदे न। 23 मैं प्राथना करदा है की साड़े प्रभु यीशु मसीह दा अनुग्रह हमेशा तुसां सारयां सोगी रे।

कुलुस्सियों

1 मैं, पौलस ऐ चिट्ठी लिखा दा है, जडा परमेश्वरे दी इच्छा ने चुणया होया यीशु मसीह दा प्रेरित है कने मसीह भाई तीमुथियुस दिया तरफा ला, **2** मसीह च उना पबित्र कने भरोसे दे काबिल मसीह भाईयां दे ना जडे कुलुस्से शेहर च रैदे न। साडे पिता परमेश्वरे दिया तरफा ला तुसां सारयां जो अनुग्रह कने शांति मिलदी रे। **3** जालू असां तुहाडे ताई प्राथना करदे न, असां अपने प्रभु यीशु मसीह दे पिता मतलब की परमेश्वरे दा धन्यवाद करदे न। **4** क्योंकि असां सुणाया है, की यीशु मसीह पर तुहाडा भरोसा है, कने सारयां पबित्र लोकां ला प्यार करदे न; **5** क्योंकि तुसां उम्मीदा दिया बजा ला ऐसा करदे न, जडी परमेश्वरे स्वर्ग च तुहाडे ताई रखया है। जिदे बारे च तुसां पेहले ही सुणी बैठयो न जालू लोक पैली बरी तुहाडे बाल आये कने तुहांजो यीशु मसीह दे बारे च शुभसमाचार सुणाया, जडा की परमेश्वरे दा सच्चा संदेश है। **6** ऐ शुभसमाचार सारे संसार च फैला दा है कने मते भरी लोक यीशु मसीह पर भरोसा करा दे न। ऐ हर जगा जिन्दगी बदला दा है, ठीक तियां ही जियां तुसां पेली बरी सुणाया था, कने सच्चाई जो समझया था की परमेश्वर उना लोकां दे पापां जो माफ करदा है, जडे यीशु मसीह च भरोसा करदे न। **7** उदी ही शिक्षा तुसां साडे प्रिय साथी इपफ्रास ला सीखी है, जडा साडे ताई मसीह दा भरोसे दे लायक सेवक है। **8** उनी सान्झो दुज्जे लोकां ताई तुहाडे प्यार दे बारे च दसया है, जडा पबित्र आत्मा तुहांजो दितया है। **9** इस ताई जिस दिने ला ऐ सुणाया है, असां भी तुहाडे ताई हमेशा प्राथना किती, की परमेश्वरे दी आत्मा तुहांजो अकल कने समझ दे, की उदी इच्छा जो पुरे तरिके ला समझी सकन। **10** असां ऐ प्राथना करदे न ताकि तुसां ऐसी ही जिन्दगी जी न जदिया परमेश्वरे दे लोकां दा होणा चाईदी, कने तुसां परमेश्वरे जो खुश करी सकन कने तुसां लगातार भले कम्मा जो करदे रिया जिसने तुसां परमेश्वर जो जाणने च बददे जा। **11** कने असां ऐ भी प्राथना करदे न की परमेश्वर अनोखी शक्तिया ला बडा जादा मजबूत बणाए, ताकि तुसां सबर कने खुशिया ला मुशकिलां जो सेहन करी सकन। **12** कने पिता परमेश्वर दा धन्यवाद करदे रिया, जिनी सांझो अपनी विरासत च हिस्सेदार होणे दे काबिल बणाया, जिसयो उनी अपने पबित्र लोकां ताई स्वर्ग च तैयार कितया है। **13** क्योंकि ओई सांझो शैताने दिया शक्तिया ला छुड़ाई करी अपने प्यारे पुत्रे दे राज्य च लेईकरी आया है। **14** परमेश्वरे अपने पुत्रे दा बलिदान करिरी सांझो

शैताने दिया शक्तिया ला अजाद किता कने साडे पापां जो माफ किता। 15 कोई भी परमेश्वरे जो नी दिखी सकदा है, जालू उदा इकलोता पुत्र माणु बणी गया तां, उनी लोकां दे सामणे परमेश्वर जो प्रगट किता कने सारा कुछ बणाणे ला पेहले सै मौजूद था कने परमेश्वरे जड़ा कुछ बणाया उस पर उदा सारयां ला बडा हक है। 16 क्योंकि सै मसीह था जिनी सारा कुछ बणाणे तांई परमेश्वरे सोगी कम्म किता, स्वर्ग दी हो, या धरती दी हो, दिखियो हो या अणदिखयो हो, क्या सिंहासन, क्या प्रभुताएँ, क्या प्रधानताएँ, क्या हक, सारियां चीजां उनी ही बणाईयां कने उदे तांई ही बणियां न। 17 कुछ भी बणने ला पेहले, मसीह पेहले ला ही था, कने सारियां चीजां उदी बणाईयो व्यवस्था ला ही कम्म करदियां न। 18 मसीह कलीसिया दी अगुवाई करदा है, जियां सर माणुए दे शरीर जो काबू च रखदा है; सैई आदि है कने मरी के जी उठणे बालयां लोकां च पेहला है, कने सारियां गल्लां च सैई प्रधान बणे। 19 क्योंकि पिता परमेश्वर दी खुशी इसी च ही है, की परमेश्वर दा पूरा सभाव यीशु मसीह च हो। 20 परमेश्वरे अपणा पुत्रे जो भेजणे दा फेसला लिया, जिनी अपणा खून बहाया कने सूली पर उदी मौत होई। परमेश्वरे ऐ अपणे कने सारियां चीजां बिच मेल मिलाप करणे तांई किता, इयां करणे ला उनी अपणे कने स्वर्ग च शामिल कने धरती च शामिल सबना च शांति बणाई। 21 इसला पहले तुसां परमेश्वरे ला बडे दूर थे। तुसां परमेश्वरे दे दुश्मण थे क्योंकि तुहाडे बिचार कने तुहाडे कम्म बुरे थे। 22 पर हुण पिता परमेश्वरे अपणे पुत्रे जो माणु बणाई करी मरणे ला तुहाडा भी मेल करी लिया है, ताकि तुहांजो अपणे सामणे पबित्र, निष्कलंक कने निर्दोष बणाई करी पेश करी सके। 23 तुहाडा भरोसा मजबूत रेणा चाईदा, जियां की घर इक पक्की नी पर बणाया जांदा है, हुण साडे बाल आस है क्योंकि असां शुभसमाचार पर भरोसा करदे न, जिसदा प्रचार सारी धरतिया पर कितया है, कने जिस शुभसमाचार दा सेवक मैं, पौलुस बणया। 24 हुण मैं तुसां लोकां तांई दुख झेलदा है, इदी बजा ला खुश है। कने मैं लगातार अपणे शरीर च दुख सेहन करा दा है, जियां यीशु मसीहे सेहन किते थे, कने ऐ दुख मैं मसीह दी कलीसियां तांई अपणे शरीर च सेहन करा दा है, जड़ा उदा शरीर है। 25 इसा कलीसिया तांई तुहाडे तांई परमेश्वरे दी दितियो सेवा तांई सेबक चुणया है, ताकि मैं परमेश्वर दे शुभसमाचार जो पुरे तरीके ने प्रचार करी सके। 26 मतलब की उस भेद जो जड़ा पिछली पीढ़ियां दे लोकां ला गुप्त रिया, पर हुण परमेश्वरे दे उना पबित्र लोकां पर प्रकट

होया है। (aiōn g165) 27 जिना पर परमेश्वरे प्रकट करणा चाया क्योंकि परमेश्वर चांदा की इस भेद जो जाणन की मसीह दी महिमा दी क्या कीमत है, जड़ा सारयां तांई है, ऐ भेद यीशु मसीह खुद है, जड़ा तुसां च है, ऐई साडी इकलोती आस है जिसने महिमा होणी। 28 असां मसीह दे बारे च सारयां जो दसदे न, सारयां जो चेताबनी दिन्दे कने सारयां जो पुरिया समझा ला सिखादे जड़ा परमेश्वरे सांझो दितया है, ताकि ऐ पक्का करी सकन की हर कोई मसीह च सिद्ध होई सके जालू सै परमेश्वरे दे सामणे खडे होंगे। 29 ऐई बजा है की मैं इतणी मेहनत करदा है। मैं ऐसा करणे तांई परेशानियां दा सामणे करदा है जड़ा की मसीह दिया शक्तिया ला ही होंदा है, जड़ा मेरे अंदर कम्म करदा है।

2 मैं चांदा है की तुसां जाणी लिया की तुहाडे कने उना दे जडे लौदीकिया शेहरे च न, कने उना सबना तांई जिना ला मैं नी मिलया है, मैं कड़ी मेहनत इस तांई करदा है, 2 मैं ऐसा इस तांई करदा है क्योंकि मैं उना जो तेरे भरोसे च मजबूत करणा चांदा है, सै इक सोगी प्यार च शामिल होई जान, कने मैं चांदा है की उना जो पूरा भरोसा हो क्योंकि उना जो परमेश्वर दे भेद दी योजना दे बारे च पूरी समझ है, जड़ा अपु मसीह है। 3 ऐ सै है जड़ा परमेश्वरे दी अकल कने ज्ञान जो जाणदा है, जड़ा की उस खजाने सांई है, जिसयो लुकाया गया था। 4 ऐ मैं इस तांई बोला दा है, की कोई भी माणु तुहांजो उना दी झूठी शिक्षा पर भरोसा करणे तांई राजी करी के धोखा ना दे। 5 क्योंकि मैं तुहाडे सोगी नी है, फिरी भी मैं लगातार तुहाडे बारे च सोचदा है, मिंजो खुशी है की तुसां इक न कने तुसां अपने भरोसे च जड़ा मसीह पर है, जिन्दगी जिन्दे रिया। 6 इस तांई, जियां तुसां प्रभु यीशु मसीह जो प्रभु मन्नी करी अपनाई लिया, तियां ही उदे पिच्छे चलदे रिया। 7 तुसां मसीह दे भरोसे च मजबूत बणी रिया, जियां इक स्ख जड पकड़दा कने इक घर इक नीयां पर मजबूत रेंदा है, इयां ही तुसां भी अपने भरोसे च बददे जा, कने जादा ला जादा धन्यवाद करदे रिया। 8 साबधान रिया की कोई तुहांजो संसारिक ज्ञान कने बेकार गल्लां ने मुख नी बणाई ले, ऐ गल्लां सुणने जो तां ज्ञान बालियां लगदियां न, पर ऐ गल्लां सिर्फ संसार दे लोकां दिया तरफा ला न, ना की मसीह दिया तरफा ला। 9 इयां ना हो की ऐ लोक तुहांजो धोखा देन, क्योंकि जालू मसीह माणु बणया, तालू भी सै पूरी तरहा परमेश्वर था। 10 यीशु मसीह ही सारी शक्तियां कने अधिकारां दा प्रधान है, इस तांई अगर तुसां मसीह सोगी जुडयो न तां तुसां उदे च सिद्ध बणा। 11 जालू

तुसां मसीह पर भरोसा किता, तालू तुहाडा खतना कुसी माणुऐ ला नी होया है, जियां यहूदी लोक करदे न, पर मसीह दे जरिये तुहाडा सै खतना होया है, जडा तुहाडे पाप करणे बाले सभाब जो दूर करदा है। 12 कने तुसां बपतिस्मा लिया, ऐ इसा गल्ला जो दसदा है की तुहाडा पापी सभाब मसीह सोगी कबरा च दबी दिता है कने जालू तुसां नोऐ सभाबे ने पाणिऐ ला बाहर आये। ऐ इस ताई होया क्योंकि तुसां भरोसा किता की परमेश्वरे अपणी शक्तिया ने मसीह जो मरयां चे जिन्दा किता। 13 जालू परमेश्वरे तुहांजो भी मसीह सोगी जिन्दा किता, जडे अपने अपराधां कने अपने पापी सभाबे ला अजाद नी थे, कने साडे सारे अपराधां जो माफ किता। 14 ऐ इयां था जियां परमेश्वरे साडे पापां दे दस्ताबेज जो खत्म करी दिता, जिना च साडे खिलाफ दोष लिखयो थे। जालू मसीह जो सूली पर चढ़ाया तालू उनी उस दस्ताबेज जो पुरे तरीके ने खत्म करी दिता। 15 परमेश्वरे मसीह दे सूली पर मरणे ने संसार दी सारी शक्तियां कने अधिकारां जो हराई करी उना जो सबना सामणे बेइज्जत किता, कने उना जो हराई करी खुशी मनाई। 16 इस ताई तुहांजो कोई धोखा ना दे, कने कोई तुहाडे खाणे पीणे जो लेईकरी, या त्योहारे, या नोआ चंद्रमा, या सब्ब दे दिना दे बारे च तुहाडा कोई न्याय ना करे। 17 क्योंकि ऐ सारे नियम कने कानून इक छोआं दे साईं है, पर हकीकत मसीह च ही है। 18 कलीसिया इक शरीर है यीशु मसीह उस शरीर दा सर है, उसी ने ही शरीर दे सारे हिस्सयां दी देख रेख होंदी है कने जालू इना जो इक सोगी जोड़दे न, तां सै बददे न जियां परमेश्वर चांदा है की सै बदे। कोई माणु दीनता कने स्वर्गदूतां दी भक्ति करिके तुहांजो दौड़ दे इनामे च दूर ना करे। ऐसे माणु दिखियां गल्लां दा दाबा करदे न, जिसने सै घमंड ने भर्यो रेंदे न, कने जडे मसीह जो छडी दिन्दे न। 20 जालू तुहाडा पापी सभाब मसीह सोगी मरी गया, तां तुहांजो होर भी जादा इस संसारे दियां शिक्षां जो नी मनणा पोणा। इस ताई कजो अजे भी इस संसारे दे नियमा जो मंदे न जियां अजे भी संसार तुहांजो काबू करा दा है। 21 सै ऐसे नियम बणादें न की तुसां ऐ मत छुंदे, ऐसा मत खांदे, ऐ मत खांदे। 22 क्योंकि ऐ सारे नियम कुसी कम्मे दे नी, क्योंकि ऐ माणुआं दे हुक्मा कने शिक्षा दे अनुसार न। 23 इना शिक्षां च अपणी इच्छा दे अनुसार बणाई भक्ति दे रिबाज, कने जूठी दीनता, कने अपने शरीर सोगी कठोर बर्ताब करणा ही इक ज्ञानी होणे दा डोंग करदा है, पर हकीकत च ऐ नियम लोकों जो उना दिया बुरियां जो रोकणे च मदद नी करदे।

3 जियां परमेश्वरे यीशु मसीह जो मरयां चे जिन्दा किता तियां ही तुहांजो जिन्दा किता है, इस ताई उना चीजां दिया तोपा च लगी रिया जडियां स्वर्गे च रखियां न जिथू मसीह परमेश्वरे दे बखे सबते आदर बालिया जगा पर बैठया है। **2** धरतिया दियां चीजां नी स्वर्गे दियां चीजा पर ध्यान ला, **3** क्योंकि तुसां अपने पाप बाले सभाबे ताई मरी गियो न, कने तुहाडी नोई जिन्दगी मसीह सोगी परमेश्वरे च लुकियो है। **4** जालू मसीह जडा तुहांजो नोई जिन्दगी दिन्दा है, बापस इसा धरती पर ओगा, तालू तुसां भी उदे सोगी कने उदी महिमा च भागिदार होई जाणा। **5** इस ताई तुसां बुरे कम्मा जो छडी दिया जडे तुहाडे पापी सभाब ला जुडया न। जियां, व्यभिचार, अशुद्धता, दुष्कामना, बुरी लालसा, कने लालच जो जडा मूर्तिपूजा दे बराबर है। **6** क्योंकि लोक इना बुरे कम्मा जो करदे न कने परमेश्वर उना जो सकत सजा देणी। **7** कने तुसां भी, जालू इना बुराइयां च जिन्दगी कटदे थे, तां तुसां भी ऐ कम्म करदे न। **8** पर हुण तुसां भी इना सबना जो मतलब की गुस्सा, रोष, बैरभाव, निंदा, कने गालियाँ बकणा, तुसां ऐ कम्म करणा छडी दिया। **9** इक दुज्जे सोगी झूठ मत बोला क्योंकि तुसां पुराणे पापी सभाब कने हुण सारे बुरे कम्मा जो छडी दितया है। **10** हुण तुसां इक नोए माणु बणी गियो न, ऐ नोआ सभाब जडा अपने सृष्टिकर्ता साई जादा ला जादा बणदा जांदा है ताकि तुसां उसयो होर भी अच्छे ला समझी सकन। **11** इसा बजा ला नोईया जिन्दगिया च ना तां कोई होर जाति दा रिया, ना यहूदी, ना खतना, ना बिना खतने बाला, ना जंगली, ना विदेशी, ना गुलाम कने ना अजाद बस मसीह ही है जडा सब कुछ है कने तुसां सारयां दे अंदर रेंदा है। **12** इस ताई परमेश्वर तुहांजो प्यार करदा है कने उनी तुहांजो अपने पबित्र लोक होणे ताई चुणया है, इस ताई तुसां लोकां जो, कम्णा, भलाई, दीनता, कने नम्रता, कने सेहनशीलता बाला बणना चाईदा। **13** अगर कुसी जो कुसी पर दोष लाणे दी कोई बजा हो, तां इक दुज्जे दी सेहन करी लिया, कने इक दुज्जे दे अपराध माफ करा: जियां प्रभुऐ साडे अपराध माफ किते, तियां ही तुसां भी माफ करा। **14** कने इना सारयां ला जरूरी गल्ल ऐ है की इक दुज्जे ला प्यार करा, इयां करणे ला तुसां पुरे तरीके ला इक जुट होई जाणा। **15** मसीह तुहाडे मना च शांति दे, तुसां सब इक ही शरीर दे हिस्से न, इस ताई तुसां इक दुज्जे सोगी जडी शान्ति मसीह दिंदा है उसा शांतिया ला रेणे ताई सदयो न, कने तुसां धन्यवादी बणी रिया। **16** मसीह दे बचना दे बारे च हर बकत सोचा, ताकि ऐ सब केसी जो काबू करे

जड़ा तुसां सोचदे कने करदे न; सिद्ध ज्ञान ला इक दुज्जे जो सिखा, कने चेताबनी दिया, कने अपने-अपने मने च धन्यवाद सोगी परमेश्वरे ताई भजन, स्तुतिगान कने आत्मिक गीत गा। 17 जड़ा भी तुसां बचना ला बोलदे न या जड़ा भी कम्म करा सब प्रभु यीशु दे नाए ला करा, कने उसला प्रभु परमेश्वरे दा धन्यवाद करा। 18 हे पत्त्रियों, अपने-अपने घरे बालयां दे अधीन रिया क्योंकि मसीह दे पिच्छे चलणे बालयां ताई ऐ ही ठीक है। 19 हे घरे बालयो, अपनी-अपनी लाडियां ने प्यार रखा, कने उना सोगी प्यारे ला बर्ताब करा। 20 हे बच्चो, सबना गल्लां च अपने-अपने माता-पिता दे हुकमा जो मन्ना करा, क्योंकि प्रभु इसला खुश होंदा है। 21 हे माता पिताओं, अपने बचयां जो बार-बार डांटी करी तंग मत करा, इयां ना हो की उना दा दिल टूटी जा। 22 हे सेबकों, जड़े इस संसारे च तुहाड़े मालिक न, सारियां गल्लां च उना दे हुकमा दा पालन करा, माणुआं जो खुश करणे बालयां सांई दिखावे ताई नी, पर मने दिया सच्चाई कने परमेश्वरे दे डरे ने करा। 23 जड़ा कुछ तुसां करदे न, पुरे मने ने करा, ऐ सोची करी की माणुआं ताई नी पर प्रभु ताई करा दे न। 24 क्योंकि तुसां जाणदे की तुसां जो इदे बदले च प्रभु ला सै आशीष मिलणी है जड़ी परमेश्वरे तुहाड़े ताई रखियो है। तुसां जिस मालिक दी सेवा करा दे न, सै मसीह है। 25 क्योंकि जड़ा कोई बुरा करदा रेंदा है, उसयो परमेश्वरे ला सजा मिलणी क्योंकि परमेश्वर कुसी दा पक्षपात नी करदा।

4 हे मालिकों, स्वर्ग च तुहाड़ा भी मालिक है, ऐ समझीकरी, अपने-अपने दासां सोगी न्याय कने इकोदिया व्यवहार करा। 2 लगातार प्राथना करदे रिया, कने जालू तुसां प्राथना करन तां सतर्क रिया कने हमेशा परमेश्वरे दा धन्यवाद करदे रिया। 3 कने इदे सोगी-सोगी साडे ताई भी प्राथना करदे रिया, की परमेश्वर साडे ताई बचन दा प्रचार सुणाने दा मोका दे, की असां मसीह दे उस भेद जो पुरे तरीके ला सुणाई सकन, इसा ही बजा ला मैं जेला च है। 4 कने प्राथना करा दा की मैं साफ तरीके ला कने खुलेआम मसीह दे बारे च दस्सैं। 5 हर मोके दा अच्छे ला इस्तेमाल करा ऐ दसणे ताई की तुसां विश्वासी न, कने जड़े लोक यीशु मसीह पर भरोसा नी करदे उना सोगी समझदारिया ला बर्ताव करा। 6 उना ला हमेशा प्यारभाव ला गलबात करा, कने एसियां गल्लां करा जिसला सै तुहाडियां गल्लां च रुची लेन, अगर तुसां ऐसा करदे न, तां तुहांजो पता लगणा की उना जो कियां जबाब देणा है, जड़े तुहाड़े भरोसे दे बारे सबाल च उठादें न। 7 प्यारे मसीह भाई कने भरोसे दे लाइक सेवक,

तुखिकुस जड़ा प्रभु यीशु मसीह च मेरा साथी है, मेरियां सारियां गल्लां उनी तुहांजो दस्सी देंगियां न। 8 उसयो मैं इस ताईं तुहाड़े बाल भेजया है, ताकि तुहांजो पता लगी सके की साड़े क्या हलात न, कने सै तुहांजो भरोसे च मजबूत करी सके। 9 उदे सोगी उनेसिमुस जो भी भेजया है; जड़ा भरोसे दे लाइक कने प्यारा मसीह भाई कने सै तुहाड़े ही शेहरे दा है, उना तुहांजो ऐथू दियां सारियां गल्लां दे बारे च दसी देणा। 10 अरिस्तरुस जड़ा मेरे सोगी कैदी है, कने बरनबास दा भांजा मरकुस तुहांजो नमस्कार बोलदा है। जिदे बारे च तुहांजो पेहले ही चिट्ठी मिली बेठियो है की अगर से तुहाड़े बाल ओऐ, तां उसला ढंगे ला व्यवहार करनयो। 11 कने यीशु जिसयो युस्तुस बोलदे न, तुहांजो नमस्कार करदा है। यहदी लोकां च बस ऐई तिन परमेश्वरे दे राज्य ताईं मेरे साथी कने मिंजो उत्साहित करणे बाले न। 12 इपफ्रास जड़ा तुहाड़े ही शेहरे ला है, कने मसीह यीशु दा दास है, तुहांजो नमस्कार करदा है। कने हमेशा तुहाड़े ताईं प्राथना करदा है, ताकि परमेश्वर तुहांजो भरोसे च मजबूत कने सिद्ध करे की तुसां परमेश्वरे दी इच्छा दा पालन करा। 13 मैं उदा गबाह है, कि सै तुहाड़े ताईं कने लौदीकिया शेहरे कने हियरापुलिस शेहरे दे लोकां ताईं लगातार प्राथना करदा है। 14 प्यारे वैद्य लूका कने देमास दा तुहांजो नमस्कार बोलदे न। 15 लौदीकिया शहर दे मसीह भाईयां कने बेहणा जो कने नुमफास कने उदी घरे दी कलीसिया जो नमस्कार बोलनयो। 16 जालू ऐ चिट्ठी तुहाड़े ऐथू पढी जांगी, तां ऐसा करनयो की लौदीकिया शेहरे दिया कलीसिया च भी इसयो पढनयो, कने जड़ी चिट्ठी लौदीकिया ला ओणी उसयो तुसां भी पढनयो। 17 फिरी अरखिप्पुसे ला बोलनयो की “जड़ी सेबा प्रभु च तिजो दितियो है, उसा सेबा जो अच्छे तरीके ने पूरी करनयो।” 18 मैं, पौलुस तुहांजो नमस्ते करणे ताईं चिट्ठी दा ऐ हिस्सा तुहांजो अपने हथे ने लिखा दा है, याद रखणा की मैं जेला च है, कने मेरे ताईं प्राथना करनयो, तुसां पर परमेश्वरे दा अनुग्रह होदा रे। आमीन।

1 थिस्सलुनीकियों

1 ऐ चिट्ठी मैं पौलस, सिलवानुस कने तीमुथियुस दिया तरफा ला थिस्सलुनीकिया शेहर दिया कलीसिया दे ना लिखा दा है, जड़े पिता परमेश्वर कने प्रभु यीशु मसीह च न। मैं प्राथना करदा है की पिता परमेश्वर तुहांजो पर अपणा अनुग्रह कने तुहांजो शांति दे। **2** असां अपणियां प्राथना च तुहांजो याद करदे कने हमेशा तुसां सबना दे बारे च परमेश्वरे दा धन्यवाद करदे न, **3** कने जालू असां अपने पिता परमेश्वरे ने प्राथना करदे न, तालू असां तुहाड़े उना कम्मा जो याद करदे न, जड़े तुसां भरोसे दिया बजा ला करदे न, कने जड़िया सकत मेहनता ने तुसां मसीह भाईयां दी सहायता करदे न क्योंकि तुसां उना ने प्यार करदे न कने दुख तकलिफा जो सेहन करदे न क्योंकि तुहांजो आस है, की प्रभु यीशु मसीह जल्दी बापस ओणे बाला है। **4** हे मेरे मसीह भाईयो, तुहांजो ने परमेश्वर बड़ा प्यार करदा है, असां जाणदे न, की परमेश्वरे तुहांजो अपने लोक होणे ताई चुणया है। **5** क्योंकि प्रभु यीशु मसीह दा शुभसमाचार तुहाड़े बाल सिर्फ अखरां च ही नी पर पबित्र आत्मा दिया शक्तिया, कने पूरी मजबुतिया ने तुहाड़े बाल पूज्या है, तुहांजो पता है की तुहाड़े उद्धार ताई तुसां बिच साड़ा चाल चलन कदिया था। **6** तुसां बड़े भरी दुखां च थे पर तुसां पबित्र आत्मा दी दीतियो खुशिया सोगी शुभसमाचार जो अपनाई करी साड़े उदाहरण कने प्रभु दे उदाहरण दा अनुसरण किता। **7** ऐथू दीकर की तुसां मकिदुनिया प्रदेश कने अखाया प्रदेशे दे सारे विस्वासियां ताई आदर्श बणी गे। **8** क्योंकि तुहाड़े ऐथू ला ना सिर्फ मकिदुनिया प्रदेश कने अखाया प्रदेशे च प्रभु दा बचन सुणाया, पर तुहाड़े भरोसे दी चर्चा हर पासे फेली गई जड़ा परमेश्वरे पर है, हर जगा जिथू असां गे, ओथु सांझो लोक मिल्ले जिना सांझो तुहाड़े भरोसे दे बारे च दसया, जड़ा परमेश्वरे पर है, इस ताई सांझो तुहाड़े बारे च कुछ बोलणे दी जरूरत नी है। **9** क्योंकि सै लोक अपु ही दुज्जयां जो दसदे न की तुसां साड़ा स्वागत किता जालू असां तुहाड़े बाल आए; कने तुसां कजो मूर्तियां ला दूर होईकरी परमेश्वरे बाल आये ताकि तुसां जिन्दे कने सच्चे परमेश्वरे दी सेवा करन। **10** कने तुसां स्वर्गे ला परमेश्वरे दे पुत्रे दे ओणे दी आस रखा दे न, जिसयो परमेश्वरे मरयां चे जिन्दा किता, मतलब की यीशुऐ जो, जड़ा सांझो परमेश्वरे दे ओणे बाले गुस्से ला बचादां है।

2 हे मसीह भाईयो, तुहांजो अपु ही पता है, साडा तुहाडे बाल ओणा फायदेमंद होया। **2** तुसां अपु ही जाणदे न की तुहाडे बाल ओणे ला पेला असां फिलिप्पी शेहरे च कितणे दुख झेले। फिर भी परमेश्वरे सांझो इतणी हिम्मत दिती, की तुहाडे शेहरे दे लोकां ला साडा इतणा बिरोध होणे बाद भी असां परमेश्वरे दा शुभसमाचार तुहांजो सुणाया। **3** क्योंकि साडा उपदेश ना तां धोखा था, कने ना ही गलत इरादे ने, कने ना ही छलावा है। **4** परमेश्वरे सांझो काबिल समझीकरी शुभसमाचार दितया है, इस ताई असां माणुआं जो नी, पर असां मना जो परखणे बाले परमेश्वरे जो खुश करणे ताई उपदेश दिन्दे न। **5** तुहांजो पता है, की असां कदी भी चापलूसी दियां गल्लां नी करदे थे, क्योंकि असां ना ही कदी पैसे दे लालचे दे इरादे ने कुछ किता, परमेश्वर इसा गल्ला दा गबाह है की असां ऐसे नी थे। **6** असां ना माणुए ला, ना ही तुहाडे ला कने ना ही कुसी होरसी ला आदर नी चांदे थे। पर मसीह दे प्रेरित होणे दिया बजा ला तुसां ला सहायता मंगणा साडा हक था। **7** पर जियां माता-पिता अपने बचयां जो पालदे न, तियां ही असां भी तुहाडे बिच रेई के इयुदी दीनता दसियो है। **8** असां तुहांजो सोगी इतणा प्यार करदे न की सिर्फ परमेश्वरे दा शुभसमाचार सुणने ताई ही नी पर तुहाडे ताई अपनी जान देंगे ताई भी तैयार थे। इस ताई की असां तुहाडे सोगी बड़ा प्यार करदे थे। **9** हे मसीह भाईयो, तुसां साडी मेहनत कने प्यारे जो याद रखदे न, की असां इस ताई रात दिन कम्म धंधे करदे होये परमेश्वरे दे शुभसमाचारे दा प्रचार तुहाडे च किता, ताकि असां अपनी जस्रतां ताई तुसां कुसी पर भी कोई बोझ ना बणन। **10** तुसां अपु भी कने परमेश्वर भी गबाह है, तुसां विश्वासियां सोगी साडा सभाव कितणा सच्चा, धर्मी कने निर्दोष था। **11** तुहांजो पता है, की जियां पिता परमेश्वर अपने बचयां सोगी बर्ताब करदा है, तियां ही असां भी तुसां सबना जो उपदेश, कने प्रोत्साहित करदे, कने समझांदे थे। **12** की तुसां अपनी जिन्दगी इस तरीके ला जिया जड़ी परमेश्वरे जो खुश करे, जडा तुहांजो अपने राज्य कने माहिमा च हिस्सेदार होणे ताई सददा है। **13** इस ताई असां भी हमेशा परमेश्वरे दा धन्यावाद करदे न; की जालू तुसां परमेश्वरे दा संदेश सुणया जडा असां प्रचार किता, तां तुसां उसयो माणुए दा नी पर परमेश्वरे दा सच्चा संदेश समझी के अपनाया, सै ही संदेश तुसां च कम्म करदा है, जडे यीशु मसीह पर भरोसा रखदे न। **14** हे मसीह भाईयो, इस ताई तुसां भी परमेश्वरे पर भरोसा करणे बाले लोकां सांई न, जडे यहूदी प्रदेश च रेदे न कने मसीह च न, क्योंकि

तुहांजो भी अपने लोकां ला तदिया ही दुख मिल्ला जदिया यहूदी मसीह लोकां जो यहूदियां ला मिल्ला था। 15 उना यहूदियां जिना प्रभु यीशुऐ जो, कने परमेश्वरे दे संदेश देणेबालयां जो मारी दिता कने सांझो तंग किता, कने परमेश्वर उना ला खुश नी है, कने सै सारे माणुआं दा बिरोध करदे न। 16 सै सांझो होर जातियां जो ऐ दसणे ला रोकणे दी कोशिश करा दे थे की परमेश्वर उना जो कियां बचाई सकदा है कने सै अपने पाप पर पाप जोड़दे जांदे न; कने हुण अंत च परमेश्वर उना जो पक्का सजा देणेबाला है। 17 हे मेरे प्यारे मसीह भाईयो, जालू असां थोड़ी देरा तांई मने ला नी पर, असां शारीरक रूप ला तुहाड़े सोगी नी थे, तां असां बड़ी इच्छा ला तिजो दिखणे तांई होर भी जादा कोशिश किती। 18 इस तांई असां (मतलब की मैं पौलुसे) इक बरी नी, पर केई बरी तुहाड़े बाल औणे दी सोची, पर शैतान सांझो तुहाड़े बाल औणे तांई रोकदा था। 19 साड़ी आस, खुशी या बड़ाई दा मुकट कुण है? ऐ तुसां ही होणे जालू साडे प्रभु यीशु मसीहे फिरी मुडी करी ओणा है। 20 साड़ी बड़ाई कने खुशी तुसां ही न।

3 आखरी च जालू असां तुहांजो मिलयो बिना नी रेई सके, तां मैं पौलुस कने सिलासे एथेंस शहरे च किल्ले रेणे दा फेसला किता। 2 कने असां तीमुथियुस जो जड़ा मसीह दे शुभसमाचारे च साड़ा भाई है, कने परमेश्वरे दा सेवक है, उसयो इस तांई तुहाड़े बाल भेजया की सै तुहांजो प्रोत्साहित करे कने तुहाड़े मसीह पर भरोसे जो मजबूत करे। 3 ताकि कोई इना दुखां दिया बजा ला भरोसे च कमजोर ना होई जाऐ; क्योंकि तुसां अपु ही जाणदे न, की सांझो मसीह च दुख झेलणे पोणे न। 4 जालू असां तुहाड़े ओथु रेंदे थे, उस बकत तुहांजो बोलदे थे कि, सांझो लोकां ला दुख झेलणे पोणे न, कने इयां ही होया, कने तुसां जाणदे भी हेन। 5 इसा बजा ला जालू मिंजो ला तुहांजो मिलयो बिना नी रिया गया, तां मैं तुसां लोकां दे भरोसे दा हाल जाणने तांई तीमुथियुस जो भेजया, क्योंकि असां डरदे थे, कुथी इयां ना हो की परिक्षा करणे बाले शैताने तुहाड़ी परिक्षा लेई हो, कने साड़ी मेहनत बेकार होई गेई हो। 6 पर हुण तीमुथियुसे तुहाड़े बखे ला आई करी तुहाड़े भरोसे कने प्यार दा शुभसमाचार सुणाया। कने ऐ भी सुणाया, की तुसां हमेशा प्यारे ला मिंजो याद करदे न, कने सांझो दिखणे दी इच्छा रखदे न, जियां असां तुहांजो दिखणे दी इच्छा रखदे थे। 7 इस तांई हे मसीह भाईयो, असां अपनी सारी दुख तकलिफां च जालू तीमुथियुस ला सुणया की तुसां भरोसे च मजबूत न, तां सांझो बड़ी शांति मिल्ली।

8 क्योंकि हुण तुसां प्रभु च टिकी रेंगे, तां इसला सांझो नोई जिंदगी मिलदी है। 9 कने जदेई खुशी तुहाड़िया बजा ला सांझो अपने परमेश्वरे सामणे है, इसा खुशिया तांई तुहाड़े बारे च असां कियां परमेश्वरे अगो धन्यावाद करन? 10 असां लगातार ऐई प्राथना करदे रेंदे न, की तुहांजो सोगी दुबारा मिली सकन, कने जड़ा जरूरी है तुहांजो सिखाई सकन, ताकि तुसां पुरे तरीके ला प्रभु यीशु मसीह पर भरोसा करी सकन। 11 साड़ी ऐ प्राथना है, की साड़ा पिता परमेश्वर कने प्रभु यीशु मसीह, तुहाड़े ऐथू औणे तांई साड़ी सहायता करे की असां आई सकन। 12 असां ऐ भी प्राथना करदे न की प्रभु यीशु मसीह ऐसा करे कि, जियां असां तुहांजो ने प्यार करदे न, तियां ही तुसां भी इक दुज्जे ने प्यार करा, कने सारयां लोकां सोगी तुहाड़ा प्यार होर भी बदे कने बददा ही जा, 13 कने असां प्राथना करदे न ताकि सै तुहाड़े मना जो ऐसा मजबूत करे, की जालू साड़ा प्रभु यीशु अपने सारे पबित्र लोकां सोगी बापस ओऐ, तां सै साड़े पिता परमेश्वरे सामणे पबित्रता च निर्दोष साबित होन।

4 आखरी च हे मेरे मसीह भाईयो, असां प्रभु यीशु मसीह दे नाऐ ला तुहांजो ला बिनती करदे न, की तुसां इस तरिके ला जिंदगी जिया, जड़ी परमेश्वरे जो खुश करे, जियां असां तुहांजो सिखाया, कने तुसां तियां जिंदगी जिदे भी हेन कने असां तुहांजो ऐसा करणे तांई होर भी उत्साहित करदे न। 2 तुसां जाणदे न कि प्रभु यीशु मसीह सांझो जड़ा अधिकार दितया है, उदे जरिये असां तुहांजो निर्देश दितयो न। 3 परमेश्वरे दी इच्छा ऐ है, की तुसां पबित्र बणन कने व्यभिचार मत करा, 4 तुसां चे हर इक माणु अपने शरीर पर काबू रखणा सीखी करी अपने शरीर जो पबित्र बणाई रखे कने उदी इज्जत करे। 5 कने तुसां जो ऐ कम्म होर जातियां सांई वासना दी इच्छा ला नी करणे चाइदे, जडियां परमेश्वरे जो नी जाणदियां न। 6 ऐसे कम्म करणे ला सै अपने मसीह भाई दे खिलाफ पाप करदा है, कने ना ही कोई उस सोगी चलाकी करा, क्योंकि प्रभुये इना सारयां जो सजा देणी है, जड़े इयुदियां चीजां करदे न; जदिया असां तुहांजो पेहले भी बोलया कने समझाया था। 7 क्योंकि परमेश्वरे सांझो अपबित्र जिन्दगी जिणे तांई नी पर पबित्र जिन्दगी जिणे तांई सदया है। 8 इस तांई जड़ा इना हुकमा जो नी मनदा है, सै साड़े हुकमा जो नी, पर परमेश्वरे दे हुकमा जो नी मनदा है, जिनी अपणी पबित्र आत्मा तुहांजो दितियो है। 9 पर मसीह भाईयां दे प्यारे दे बारे च ऐ जरूरी नी है, कि मैं तुहांजो कुछ लिखें, क्योंकि इक दुज्जे सोगी प्यारे ला रेणा तुसां अपु ही परमेश्वरे ला सिखया है; 10

कने सारे मकिदुनिया प्रदेशे दे मसीह भाईयां सोगी प्यार रखया है, पर हे मसीह भाईयो, असां तुहांजो ला ऐ बिनती करदे न की तुसां होर भी अगो बदे जा, 11 कने जदिया असां तुहांजो समझाया है, तियां ही शान्ति ने जिन्दगी जिया कने ना ही दुज्यां दे कम्मा च दखल दिया कने अपने हथां ला कमाणे दी कोशिश करा। 12 ताकि जडे लोक यीशु मसीह पर भरोसा नी करदे, सै दिखी सकन की तुहाड़ा व्यवहार कदिया है, कने लोक तुहाड़ी इज्जत करन, कने तुहांजो कुसी भी जुर्रतां ताई दुज्यां पर निर्भर ना होणा पोए। 13 हे मसीह भाईयो, असां चांदे न, की तुसां ऐ जाणी लिया की जडे मसीह च मरी गियो न, इना सोगी क्या होणा; इयां नी हो की तुसां दुज्यां साईं शोक करा जिना जो आस नी है की मरणे बाद भी जिन्दगी है। 14 असां भरोसा करदे न की यीशु मरया, कने जिन्दा होया, तां तियां ही परमेश्वरे उना जो भी जडे यीशु च सोई गियो न, यीशु मसीह सोगी बापस लेई ओणा है। 15 असां प्रभु यीशु मसीह दे बचना दे अनुसार तुहांजो ऐ बोलदे न, की असां जडे जिंदे न, कने प्रभु यीशु मसीहे दे बापस ओणे दीकर बची रेंगे, तां जडे लोक पेहले यीशु मसीह च मरी गियो न, उना पेहले यीशु मसीह ने मिलणा। 16 क्योंकि प्रभु यीशु मसीहे अपु ही स्वर्ग ला उतरणा; उस बकत प्रभु यीशुऐ जेरे ने हुकम देणा, कने प्रधान स्वर्गदूतां जेरे ला बोलणा, कने परमेश्वरे दी तुरही बजाणी; कने उस बकत जडे पेहले यीशु मसीहे पर भरोसा करदे होए मरी गियो न, उना मरयां चे जी पोणा है। 17 तालू इदे बाद असां जडे जिन्दे कने बचयो रेंगे, उना सोगी बदला च चुकी लेई जाणे, ताकि बदलां च प्रभु यीशु मिलन, कने उस बकते ला असां हमेशा प्रभु सोगी रेणा। 18 इना गल्लां ला इक दुज्जे जो दिलासा दिया करा।

5 हे मेरे मसीह भाईयो, तुहांजो ऐ दसणे दी जरूरत नी है, की प्रभु यीशु मसीहे कालू ओणा है। 2 क्योंकि तुसां अपु जाणदे न की जियां राती जो चोर अचानक आई जांदा है, तियां ही प्रभु यीशु मसीहे दा आगमन भी अचानक होणा। 3 जालू लोक बोलगे, ठीक ठाक है, कने कोई डर नी, तालू उना जो इकदम दुख तकलिफां दा सामणा करणा पोणा है, जियां गर्भवती जो इकदम पीड़ पौंदी; तालू सै कुथी भी नठी नी सकदी, तियां ही सै उसा बडिया मुसीबता ला कुसी भी तरीके ला नी बची सकणा। 4 पर हे मसीह भाईयो, तुसां जडे नेहरे च नी न कने सै दिन तुहाड़े पर चोरां साईं आई पोए जिस दिन यीशु मसीहे बापस ओणा। 5 क्योंकि तुसां सारे जडे ज्योति ने रिशता रखदे न, कने दिने दी ओलाद न, असां ना तां राती ने, कने ना ही

नेहरे ने रिशता रखदे न। 6 इस ताई सांझो अविश्वासियां सांई सोंदे नी रेन, पर जागदे कने सावधान रिया। 7 क्योंकि जड़े सोंदे न, सै राती ही सोंदे न, कने जड़े मतवाले होंदे न, सै राती ही मतवाले होंदे न। 8 पर असां तां दिने दी ओलाद न, इस ताई सांझो अपने पर काबू रखणा चाईदा। साड़ी भरोसा कने प्यार साड़ी रक्षा करे जियां कबच इकी सिपाइये दी रक्षा करदा है, कने साड़े बाल उद्धारे दी आस है, कि असां हमेशा दिया सजा ला बची गियो न, जियां टोप सिपाइये जो बचादां है। 9 क्योंकि परमेश्वरे सांझो सजा देणे ताई नी चुणया है, पर इस ताई रखया की असां अपने प्रभु यीशु मसीहे ला उद्धार पाई सकन। 10 प्रभु यीशु मसीह साड़े ताई इस बजा ने मरया, की असां चाऐ जिन्दे रेन, या मरी जान, जालू प्रभु यीशु मसीहे बापस ओणा तालू असां हमेशा उदे सोगी रेई सकन। 11 इसा बजा ने इक दुज्जे जो प्रोत्साहित करा, कने इक दुज्जे जो भरोसे च मजबूत होणे ताई सहायता करा, कने ऐसा तुसां करदे भी हेन। 12 हे मसीह भाईयो, असां तुसां ने विनती करदे न, की जड़े तुहांजो चे बड़ी मेहनत करदे न, कने प्रभु च तुहाड़े अगुवे न, कने तुहांजो शिक्षा दिन्दे न, उना दे हुकम मन्ना। 13 क्योंकि जड़ा सै तुहाड़े ताई करदे न, उस ताई उना दी अच्छे ने इज्जत कने प्यार करा कने अपु चे मिली झुली की रिया। 14 हे मसीह भाईयो, असां तुहांजो ने विनती करदे न, उना जो चेतावनी दिया, जड़े बड़े आलसी न, डरफोकां जो होंसला दिया, जड़े कमजोर न उना दी सहायता करा, सबना जो सेहनशीलता दस्सा। 15 ऐ ध्यान रखा! कोई कुसी ने बुराईया दे बदले बुराई ना करे; तुसां हमेशा इक दुज्जे कने सारयां ताई भले कम्म करणे च लगी रिया। 16 हमेशा खुश रिया। 17 लगातार प्रार्थना करदे रिया। 18 अपने हर हालातां च परमेश्वरे दा धन्यावाद करा; क्योंकि यीशु मसीह च तुहाड़ी ताई परमेश्वरे दी ऐई इच्छा है। 19 पबित्र आत्मा दे कम्मा जो लोकां दी जिन्दगी च होणे ला मत रोका। 20 ऐ मत सोचा की जड़ियां भविष्यवाणियां परमेश्वरे अपने लोकां जो दितियां सै कुसी कम्मे दियां नी न। 21 पर हर इक गल्ला दी परख करा ऐ जाणने ताई की सै परमेश्वरे दा संदेश है की नी, जड़ियां गल्लां खरियां न उना गल्लां जो ही अपना। 22 सारियां बुराईयां ला बची के रिया। 23 परमेश्वर जड़ा शांति दिन्दा है, तुहांजो हर तरा ने पबित्र करे; कने तुहाड़ी आत्मा, प्राण कने शरीर साड़े प्रभु यीशु मसीह दे बापस ओणे दीकर पूरे निर्दोष कने ठीक रेन। 24 तुहांजो सदणे बाला भरोसे दे काबिल है, क्योंकि सै तुहांजो पबित्र होणे ताई सददा है, कने

उनी पबित्र बणने दे काबिल भी बणाणा है। 25 हे मसीह भाईयो, साडे ताई प्राथना करा। 26 सारे मसीह भाईयां जो प्यारे ने नमस्ते करा। 27 मैं तुहांजो प्रभु दा हुकम दिन्दा है, की ऐ चिट्ठी सारे मसीह भाईयां जो पढी करी सुणा। 28 मैं प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होंदा रे।

2 थिस्सलुनीकियों

1 ऐ चिट्ठी मैं पौलस सिलवानुस कने तीमुथियुस दिया तरफा ला थिस्सलुनीकिया शेहे दिया कलीसिया दे ना लिखा दा है, जड़े पिता परमेश्वर कने प्रभु यीशु मसीह च न, **2** असां प्राथना करदे न की परमेश्वर तुसां पर अनुग्रह करे कने तुसां जो शांति दे। **3** हे मसीह भाईयो, तुहाड़े बारे च सांझो लगातार परमेश्वरे दा धन्यवाद करणा चाईदा। कने ऐ साड़े ताई ठीक भी है, की तुहाड़ा भरोसा यीशु मसीह पर बददा जा दा है, कने तुहाड़ा प्यार भी इक दुज्जे ताई बददा जा दा है। **4** इस ताई परमेश्वरे दिया कलीसिया च तुहाड़े बारे च घमंड करदे न, की चाहे तुसां पर जितणे दुख तकलीफ आए, पर तुसां लगातार सबर ने उना दा सामणा किता कने प्रभु यीशु मसीह पर भरोसा करदे रे। **5** तुहाड़ा दुखां जो सेहणा तुसां जो इस काबिल बणादा है की तुसां परमेश्वरे दे राज्य जा जाई सकन, ऐ ही सच्चा सबूत है, की परमेश्वर सच्चा न्याय करदा है। **6** क्योंकि परमेश्वर हमेशा सही न्याय करदा है, परमेश्वरे उना जो जस्स दुख देणे, जड़े तुहांजो दुख दिन्दे न। **7** कने उनी तुसां जो सुख देणा जड़े हुण दुखे च न, कने सांझो भी सुख चैन देणा, ऐ उस बकत होणा जालू प्रभु यीशु मसीहे अपने शक्तिशाली स्वर्गदूतां सोगी स्वर्गे ला धधगती होई अग्गी चे प्रगट होणा। **8** कने जड़े परमेश्वरे जो नी पछेणदे, कने जिना साड़े यीशु मसीह दे शुभसमाचारे जो नी मनया, परमेश्वरे इना जो सजा देणी। **9** परमेश्वरे उना जो अपणी मोजुदगी ला बाहर कडी देणा कने परमेश्वरे उना जो अपणिया शक्तिया कने महानता जो जाणने दी अनुमति नी देणी, कने उना जो हमेशा दी सजा देणी। (aiōnios g166) **10** ऐ उस रोजे होणा, जालू यीशु मसीहे अपने पबित्र लोकां च महिमा कने इज्जत पांणे ताई बापस ओणा, जड़े लोक उस पर भरोसा रखदे न, तुसां भी उना लोकां सोगी होणा है जिना प्रभु यीशु दी महिमा करणी है, क्योंकि तुसां साड़ी गबाइया पर भरोसा किता। **11** इस ताई असां लगातार तुहाड़े ताई रोज प्राथना भी करदे न, की परमेश्वर तुहांजो उसा जिन्दगी जो जिणे दे काबिल बणाए जिस ताई तुहांजो सदया है, कने सै तुहाड़ी हर इक भली इच्छा जो पूरा करे, कने हर उस कम्मे जो सफल करे जड़ा तुहाड़े भरोसे दा नतीजा है। **12** असां ऐ प्राथना करदे न की लोक तुहाड़िया बजा ने प्रभु यीशु मसीह दी महिमा करन, कने तुसां जो भी इज्जत मिलणी क्योंकि तुसां उदे न। ऐ सब कुछ परमेश्वरे कने यीशु मसीह दे अनुग्रह ने होणा।

2 हे मसीह भाईयो, असां प्रभु यीशु मसीह दे बापस ओणे दे बारे च कुछ बोलणा चांदे न, जालू असां सबना उसला मिलणा है। **2** कोई भी भविष्यवाणी, या बचन, या उसा चिट्ठिया दिया बजा ने अपने मना जो दुखी कने बेचेन मत होणा दिन्दे, जिसा चिट्ठिया जो साड़ी लिखियो समझदे होन, कने उसा च दसया हो की प्रभु यीशु मसीह बापस आई गया है, कने तुसां घबरांदे मत। **3** उना लोकां दा कोई भरोसा मत करदे जडे इना चीजां दे बारे च बुरा बोलदे न, क्योंकि प्रभु यीशु मसीह दे बापस ओणे ला पेहले लोकां परमेश्वरे दा बिरोध करणा है, कने सै पापी माणु जिसयो परमेश्वरे नरक च नाश करणा, उनी जस्स प्रगट होणा। **4** उनी परमेश्वरे दा कने उना सारियां मूर्तियां दा कने बाकी सारियां चिजां दा जिना जो लोक पूजदे न कने प्रभु बोलदे न, बिरोध करणा है, कने उनी सारयां ला बडा होणे दा दाबा करणा, ऐथू दीकर की उनी पापी माणुए परमेश्वरे मंदरे च जाई करी बेई जाणा कने अपने आप जो परमेश्वर होणे दा दाबा करणा। **5** तुहांजो याद होणा है, जालू मैं तुहाडे सोगी था, तां तुहांजो मैं केई बार ऐ गल्ल बोलती थी। **6** हले दीकर सै बुरा माणु प्रगट नी होया है, क्योंकि कुछ ऐसा है जिनी उसयो रोकी रखया है, कने तुहांजो जस्स याद होणा सै क्या है जिनी उसयो रोकया है, फिरी जालू परमेश्वरे दा तय कितया बकत होणा तालू सै बुरा माणु प्रगट होणा। **7** क्योंकि बुरे माणुए दी शक्ति पेहले ला ही इस संसारे च कम्म करा दी है, पर कोई इक है जडा उदी शक्तिया जो रोकदा है। कने उनी इसयो लगातार रोकी रखणा जालू दीकर सै अपने रस्ते ला ना हटी जाए। **8** तालू सै बुरा माणु प्रगट होणा, पर इदे बाद प्रभु यीशु मसीहे ओणा है, कने यीशु मसीहे उसयो अपने हुकमे ने जडा यीशुए दे मुए ने निकलदा है कने अपने तेज ने भस्म करी देणा है। **9** बुरे माणुए शैताने दिया शक्तिया सोगी ओणा है, कने उनी हर तरा दे झूठे चमत्कार, कने अनोखे कम्म करणे न, कने इना चमत्कारां जो दिखीकरी लोकां सोचणा की ऐ सारे परमेश्वर करा दा है। **10** कने उनी बुरे माणुए हर तरा दे बुरे कम्म करणे न कने उना सारयां लोकां जो धोखा देणा जडे हमेशा दी मौत दे रस्ते पर चलदे न; क्योंकि उना उसा सच्चाईया पर भरोसा नी किता जिसा ने उना जो हमेशा दी जिंदगी मिलणी थी। **11** इसी बजा ला परमेश्वरे उना च भ्रम पैदा करी देणा ताकि सै बुरे माणुए दियां गल्लां पर भरोसा करन जडा उना जो सचाई ला भटकाई दिता। **12** परमेश्वरे उना सारयां जो सजा देणी, जिना प्रभु यीशु मसीह दे संदेश पर भरोसा नी किता कने बुराई दे रस्ते पर चले। **13** हे

मसीह भाईयो, तुहाड़े ताई परमेश्वरे सामणे सांझो हमेशा धन्यवाद देणा चाईदा, तुसां प्रभु दे प्यारे न, क्योंकि परमेश्वरे शुरू ला पबित्र आत्मा दे जरिये तुहांजो पाप ला लग करी के कने सच्चाई पर तुहाड़े भरोसे दिया बजा ने तुहांजो उद्धार ताई चुणी लिया है। 14 परमेश्वरे तुसां जो बचाणे ताई शुभसमाचारे दा इस्तेमाल किता जिसदा असां प्रचार करदे न, ताकि तुसां प्रभु यीशु मसीह दी महिमा च हिस्सेदार होई सकन। 15 इस ताई हे मसीह भाईयो, टिकी रिया; कने लगातार साड़ी शिक्षा पर भरोसा करा, जड़ी असां तुसां जो दिती जालू तुहाड़े सोगी थे कने जड़ी चिठिया च लिखी करी भेजी। 16 असां अपने प्रभु यीशु मसीह ला प्राथना करदे न, कने साडे पिता परमेश्वरे जडा सांझो ला प्यार करदा है, उना दे अनुग्रह ला सांझो हमेशा शांति, प्रोत्साहन कने सच्ची आस मिल्ली है। (aiōnios g166) 17 मैं प्राथना करदा है की परमेश्वर तुहाड़े मना जो हिम्मत दे कने तुसां जो भले कम्मा कने बचन च मजबूत बणाए।

3 आखरी च मेरे मसीह भाईयो, साडे ताई प्राथना करा की, प्रभु यीशु मसीह दा बचन जल्दी ही सारियां जगा च फैली जाए, कने जडा इसयो सुणे सै इसयो मन्ने जियां तुसां बचन जो मनया। 2 कने ऐ भी प्राथना करा की परमेश्वर सांझो टेढे कने बुरे लोकां ला बचाये, क्योंकि मते सारे लोक न जडे यीशु मसीह दे बचना पर भरोसा नी करदे। 3 पर प्रभु सच्चा कने भरोसे लायक है; उनी तुहांजो शक्ति देणी कने उस शैताने ला तुहांजो बचाणा। 4 सांझो प्रभु च तुहाड़े पर पूरा भरोसा है, कने असां जडा-जडा कुछ तुहांजो करणे जो बोलया है, तुसां सियुदा ही करा दे न कने करदे रेणा है। 5 असां प्राथना करदे न की परमेश्वर तुसां जो इस काबिल बणाई दे की तुसां समझी सकन की परमेश्वर अपने लोकां ने कितणा प्यार करदा है कने कियां बचांदा है। 6 हे मसीह भाईयो, असां तुहांजो हुकम दिन्दे न जडा सांझो प्रभु यीशु मसीह दे दितया है; कने अपने उना मसीह भाई बेहणा ने कोई रिशता मत रखा, जडे सुस्त कने उना शिक्षा जो नी मंदे जड़ियां असां तुहांजो दीतियां। 7 क्योंकि तुसां अपु ही ढंगे ने जाणदे न, की तुसां जो तियां ही जिंदगी जिणा चाईदी जियां असां जिया दे न; क्योंकि असां तुहाड़े सोगी रे दे थे, तां असां सुस्त नी पर कम्म करदे थे। 8 कने कुसी ला रोटी मुफ्त नी खादी, पर मेहनत कने तकलिफा ने रात दिन कमांदे थे, ताकि असां अपनी कुसी भी ज़रूरतां ताई तुसां पर निर्भर नी होणा पोए। 9 असां जादा मेहनत, इस ताई नी किती, की सांझो तुसां ला कुछ मंगणे दा

कोई हक नी है; पर इस ताईं किती की असां अपने आपे जो तुहाड़े ताईं आदर्श बणाई सकन, जिसने तुसां साडे साईं जिन्दगी जीन। 10 कने जालू असां तुहाड़े सोगी रेंदे थे, तां तालू भी तुहांजो ऐई हुकम दिन्दे थे, की अगर कोई कम्म नी करणा चांदा, उसयो खाणां भी ना मिल्ले। 11 असां सुणदे न, की कितणे ही लोक तुहाड़े बिच सुस्त कने कोई कम्म नी करदे न, कने होरनी दे कम्मा च दखल दिन्दे रेंदे न। 12 ऐसे लोकां जो असां उस हक ने हुकम दिन्दे न, जडा प्रभु यीशु मसीहे सांझो दितया है, की चुपचाप ने अपना कम्म करिके अपनी रोटी खा। 13 कने हे मसीह भाईयो, चाहे तुसां जो कितणे भी दुख तकलीफ होन तुहांजो भले कम्म करणे दी कोशिश नी छडणी चाईदी। 14 अगर कोई साड़िया इसा चिट्ठिया दे संदेश जो नी मन्ने, तां उस पर नजर रखा की सै कुण है, कने उदे सोगी संगती छडी दिया, जिसने उसयो शर्मिंदगी महसूस हो। 15 उसने इयां बर्ताब मत करा की जियां सै तुहाडा दुशमण है, पर उसयो समझा जियां तुसां अपने भाईऐ जो समझांदे न। 16 असां प्राथना करदे न की प्रभु यीशु मसीह जडा शांति दा दाता है, अपु ही तुहांजो हमेशा कने हर तरा ने शांति दे, प्रभु हमेशा तुसां सारयां सोगी रे। 17 मैं पौलस अपने हथे ने नमस्ते लिखदा है; हर चिट्ठिया दे आखरी च इयां ही लिखदा है, इस ताईं की सारयां जो पता चली जाए की ऐ चिट्ठी मेरिया तरफा ला है। 18 मैं प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होदा रे।

1 तीमुथियुस

1 मैं पौलुस जडा साडे उद्धारकर्ता परमेश्वर दे हके ला, प्रभु यीशु मसीह, जिस पर साडी आस है, जिना मिंजो प्रेरित होणे ताई चुणया, **2** तीमुथियुस मैं ऐ चिट्ठी तिजो लिखा दा है, तू मेरे अपने पुत्रे साई है क्योंकि तू भी प्रभु यीशु मसीह पर भरोसा करदा है। मैं ऐ प्राथना करदा है की पिता परमेश्वर, कने साडा प्रभु यीशु मसीह, तिजो हमेशा अनुग्रह, दया कने शांति दिन्दा रे। **3** तीमुथियुस जियां की तू जाणदा है, की इफिसुस शहरे च कुछ ऐसे लोक न जडे झूठी शिक्षा दिन्दे न, सै लगातार झूठी कहाणियां कने पूर्वजां दियां लम्बियां सूचियां दे बारे च सिखांदे न। जालू मैं इफिसुस शहरे ला मकिदुनिया प्रदेश दिया जगा जो जाणे जो तैयार था, तां मैं तिजो इफिसुस शहरे च ही स्कणे ताई बोलया ताकि तुसां उना लोकां जो बोली सकन की ऐसी शिक्षा मत दिया। जालू सै ऐसी शिक्षा दिन्दे न, तां लोक बेहस करदे न, जिसदा नतीजा ऐ निकलदा है, की सै गुरु सै नी करदे जडा परमेश्वरे उना जो करणे ताई बोलया है, जिसयो सै परमेश्वरे पर भरोसे करणे ने ही करी सकदे न। **5** तिजो हुकम देणे दी बजा ऐ है की तू हर इक जणे ताई भले मने ने, खरी अंतरात्मा ने, कने सच्चे भरोसे ने प्यार पैदा हो। **6** झूठे गुरुओ इना सारियां चीजां जो करणा बंद करी दितया है, जडे बेकार दियां गल्लां बोलदे न, **7** ऐ झूठे गुरु उना व्यवस्था जो सिखाणे बालयां साई बणना चांदे न, जडे मूसा दिया व्यवस्था जो अच्छे ला जाणदे न, पर सै असल च कुछ भी नी जाणदे न कि सै दुज्जयां जो क्या सिखाणे दी कोशिश करा दे न कने इतणे आत्मविश्वास सोगी उस पर अड़ी रेंदे न। **8** असां जाणदे न की मूसा दी व्यवस्था अच्छी है अगर कोई इसा जो ढंगे ने सिखाए तां। **9** सांझो पता है की मूसा दी व्यवस्था धर्मी लोकां ताई नी पर अधर्मियां, निरंकुशां, भक्तिहीनां, पापियां, अपबित्र कने अशुद्ध लोकां, माता-पिता जो मारणे बाले, हत्यारे, **10** व्यभिचारियां, पुष्पागामियां, माणुऐ जो बेचणे बाले, कने झूठ बोलणे बाले, कने झूठी कसम खाणे बाले, कने इना जो छडी करी खरे उपदेशां दे सारे विरोधियां ताई बणाईयो है। **11** ऐ शिक्षा धन्य परमेश्वरे दी महिमा दे शुभसमाचारे पर आधारित है, जिनी मिंजो दुजयां जो सुणाने ताई शुभसमाचार दितया है। **12** मैं अपने प्रभु यीशु मसीह दा धन्यावाद करदा है, जिना मिंजो शक्ति दिती, कने मिंजो भरोसे दे काबिल समझीकरी अपनी सेवा ताई चुणया। **13** मेरे विश्वासी बणने ला पेहले, मैं यीशु मसीह दी बुराई करदा था, विश्वासियां जो मारदा कुटदा था, कने उना ने बडा बुरा बर्ताब करदा था; तमी

मिंजो पर दया होई, क्योंकि मैं तालू दीकर यीशु मसीह पर भरोसा नी कितया था, इस ताई नी समझदा था की जड़ा मैं करा दा है सै गलत है। 14 कने साडे प्रभुये लगातार अपणा अनुग्रह मिंजो पर किता, कने उनी मिंजो भरोसा कने प्यार दिता क्योंकि मैं यीशु मसीह सोगी इक होई गया था। 15 ऐ गल्ल सच्च है कने मनणे कने भरोसे दे काबिल है, की प्रभु यीशु मसीह पापियां दा उद्धार करणे ताई इस संसारे च आया, कने उना चे सारयां ला बड़ा पापी मैं है। 16 पर यीशु मसीहे दया मिंजो पर इस ताई किती, क्योंकि सै दसणा चांदा था की मिंजो माफ करणे ला सै कितणा सेहनशील है, जिनी सबना ला जादा पाप कितयो थे, मेरी जिन्दगी दुज्जयां ताई उदाहरण है, जिना बादे च यीशु मसीह पर भरोसा करणा है, कने हमेशा दी जिन्दगी जो हासिल करणी है। (aiōnios g166) 17 हुण युगां-युगां दे राजा दी, कदी नी नाश होणे बाले कने कदी नी दिखयो कने इकलोते सच्चे परमेश्वरे दी इज्जत कने महिमा युगां-युगां दीकर होंदी रे। आमीन। (aiōn g165) 18 हे पुत्र तीमुथियुस, मैं तिजो ऐ हुकम दिन्दा है, की तू उना भविष्यवाणियां जो याद कर जडियां परमेश्वरे दे संदेश देणेबालयां तेरे ताई कितियां थियां, तू इना गल्लां जो झूठे गुरूआं दे खिलाफ हथियारे सांई इस्तेमाल कर। 19 तुसां जो लगातार यीशु मसीह पर भरोसे च बणी रेणा कने साफ अंतरात्मा रखणी चाईदी। पर केई लोकां अपणी अंतरात्मा जो खराब करी दितया है कने उना मसीह पर भरोसा करणे दी काबलियत जो खत्म करी दितया है, ठीक तियां ही जियां इक जाज कुसी चिजा ने भजी करी डुबी जांदा है। 20 उना चे ही हुमिनयुस कने सिकंदर न, मैं उना जो कलीसिया ला बाहर कडी दिता कने शैताने दिया शक्तिया दे हवाले करी दिता, की सै परमेश्वरे दी बुराई करणा ना सिखन।

2 सारयां ला जरूरी बिनती ऐ है की, प्राथना, निवेदन कने धन्यावाद सारे माणुऐ ताई करा। 2 कने राजयां कने सारे उच्चे पदां दे अधिकारियां ताई प्राथना करा, की असां सुख शान्ति कने सुरक्षा ने अपणी जिन्दगी जी सकन, ताकि असां परमेश्वरे दी भक्ति करी सकन कने साडा बर्ताब दुज्जयां ताई अच्छा होई सके। 3 लोकां ताई इयुदियां प्राथना करणा साडे उद्धारकर्ता परमेश्वरे जो खरा लगदा है, 4 क्योंकि परमेश्वर चांदा है, की सारयां लोकां दा उद्धार हो कने सै यीशु मसीह दी सच्ची शिक्षा दा ज्ञान पाई सकन। 5 क्योंकि सिर्फ इक ही परमेश्वर है, कने इक ही माणु है जड़ा परमेश्वर कने माणुऐ जो मिलादां है, सै माणु प्रभु यीशु मसीह है जड़ा माणुऐ

दे स्पे च पैदा होया, 6 यीशु मसीहे अपने आपे जो सारयां लोकां दे पापां कने हमेशा दी मौत छुटकारे ताई बलिदान करी दिता, ऐ करिरी परमेश्वरे सही बकते पर साबित किता की, सै चांदा है की सारे लोक बच्ची जान। 7 इसा बजा ने, परमेश्वरे मिंजो शुभसमाचार दा प्रचारक कने इक प्रेरित होणे ताई चुणया है। उनी मिंजो होर जातियां ताई भरोसे दा सच्चा संदेश देणे ताई चुणया, मै झूठ नी बोलदा, सच्च बोला दा है। 8 मै चांदा है की, जालू तुसां परमेश्वरे दी अराधना करणे ताई गिठे होंदे न, कने सै मर्द जड़े पबित्र जिन्दगी जिन्दे न, बिना गुस्से कने पूरी शरदा ने अपने हथ उपर चुकी करी प्रार्थना करा। 9 इयां ही मसीह जनानिया जो भी सही ढंगे दे कपड़े पांणा चाईदे, जड़े तुहाड़े शरीर जो ढंगे ने ढकी सकन, ना की ऐसे होन की सै मर्दा जो आकर्षित करन; कने तुहाड़े बालां दा अंदाज ऐसा ना हो की लोकां जो आकर्षित करे, 10 पर अपने आपे जो दुज्जयां ताई भले कम्म करी के छेल बणा, क्योंकि परमेश्वरे दी भक्ति करणे बालियां जनानिया ताई ऐई सही है। 11 जालू मर्द विश्वासी लोकां जो सिखा दे होन, तां सारी जनानियां जो चुपचाप कने बड़ी इज्जता ने सुणना कने सिखणा चाईदा। 12 मै बोलदा है, की जनानिया मर्दा जो शिक्षा ना देन कने ना ही उना पर हुकुम चलान जालू सै यहदी जंज घर च गिठे होंदे न, पर जनानिया चुपचाप रेन। 13 ऐ मै इस ताई बोलदा है क्योंकि परमेश्वरे पेहले मर्द बणाया जिसदा ना आदम था, उदे बाद जनानी बणाई जिसा दा ना हव्वा था। 14 कने इक होर बजा ऐ है, सै हव्वा ही थी जिसयो शैताने बहकाया था, आदम नी था। ऐसा करिके हव्वा परमेश्वरे दा नियम तोड़या। 15 पर परमेश्वरे जनानिया जो बच्चे पैदा करणे दिया बजा ने बचाई लेणा है, अगर उसा दा मन शुद्ध है कने मसीह च अपने भरोसे ला भटकदी नी है, होर लोकां ने प्यारभाव रखदी, कने इक निर्दोष जिन्दगी जिन्दियां न।

3 ऐ गल्ल सच्ची कने भरोसे दे काबिल है, की जड़ा कलीसिया दा अगुवा बणना चांदा है, तां सै इज्जतदार कम्मा दी इच्छा रखदा है। 2 इस ताई ऐ जरूरी है की अगुवा निर्दोष हो, इक ही घरे बाली हो, सेहनशील, अच्छा हो, इज्जतदार हो, परोंणया दा इज्जत करणे बाला, कने परमेश्वरे दा बचन सिखाणे च काबिल हो। 3 शराबी या मारकुटाई करणे बाला ना हो; पर दयालु हो, शान्तिप्रिय हो, कने ना पैसै दा लालची हो। 4 अपने घर परिवार जो ढंगे ने सम्भालदा हो, कने अपने बचयां जो आदर ने अपना केहणा मनणा सिखांदा हो। 5 अगर कोई अपने ही घर परिवारे

जो सम्भालना नी जाणदा हो, तां सै परमेश्वरे दी कलीसिया जो भी नी सम्भाली सकदा है। 6 कने ऐसा ना हो की जिनी नौआ-नौआ भरोसा कितया हो, सै घमंडी होई जाऐ कने उसयो शैताने सांई सजा मिल्ले। 7 कने संसारिक लोकां च भी उदी अच्छी इज्जत हो, इयां ना हो की लोक उदी बुराई करदे होन कने शैताने दे फंदे च फंसी जा। 8 इयां ही कलीसिया च सेवक भी इयोदे होन जिना दी लोक इज्जत करन, कने इमानदार होऐ, शराबी नी होऐ, सै ऐसा माणु नी होणा चाईदा जडा पैसे तांई कुछ भी करे; 9 कने उस बाल साफ अंतरात्मा हो, जिसने सै लगातार ऐ भरोसा करे की परमेश्वरे जड़ी शिक्षा दितियो है सै सच्ची है। 10 कने ऐ भी सेवक बणने ला पेहले परखणे चाइदे, अगर कोई भी इना अंदर दोष नी तोपी सके, तां सै सेवकां दे कम्म करन। 11 इयां ही सेबका दियां घरे बालियां भी इयुदियां होणा चाईदियां जिना दी लोक इज्जत करन, दोष नी लाणे बाली हो, अकली ने कम्म करणे बाली हो कने सारियां गल्लां च भरोसे दे काबील होणी चाइदी। 12 कलीसिया दे सेवक अपणी घरे बालिया ला बफादार हो कने अपने बाल-बचयां कने अपने परिवारे जो ढंगे ने सम्भालने बाला हो। 13 क्योंकि जड़े सेवके दा कम्म अच्छे ने करी सकदे न, उना जो लोकां ला अच्छी इज्जत मिलदी है, सै हिम्मत ने यीशु मसीह पर भरोसे दे बारे च बोली सकदे न। 14 मैं तेरे बाल तोल्ले ओणे दी आस रखीकरी भी ऐ गल्लां तिजो इस तांई लिखा दा है, 15 अगर मेरे ओणे च देर होईया तां तिजो इसा गल्ला दी जानकारी रे की, परमेश्वरे दे परिवारे दे लोकां दा बर्ताब कदिया होणा चाईदा। परमेश्वर दा प्यार जिन्दे परमेश्वर दी कलीसिया है, ऐ इयां ही सच्ची शिक्षा दा साथ दिन्दे न कने बणाई रखदे न, जियां इक मजबूत नि कने खम्बे घरे जो मजबूत करदे न। 16 इदे च कोई शक नी की जड़ी शिक्षा परमेश्वरे प्रगट किती सै सच्ची है, जिसयो मना नी करी सकदे मतलब की, यीशु मसीह माणु बणी करी आया कने, पबित्र आत्मा ला साबित होया की परमेश्वरे दा पुत्र है, कने स्वर्गदूतां जो मिल्ला, कने महिमा दे स्वर्ग च चुकी लिया, कने चेलयां उदा शुभसमाचार हर जगा प्रचार किता कने, मते सारे संसारे दे लोकां उस पर भरोसा किता।

4 पबित्र आत्मा साफ-साफ बोलदी है, की आखरी बकते च कुछ लोकां मसीह शिक्षा पर भरोसा करणा छडी करी उना बुरियां आत्मा दियां शिक्षा पर भरोसा करी के अपनाई लेणा जिना उना जो भटकाई देणा। 2 झूठे गुरु धोखेबाज न, उना जो नी

पता लगणा की सै जडा करा दे न सै सही है की नी, क्योंकि उना दी अंतरात्मा जड़ी सही कने गलत च फेसला करदी है, सै मरी गियो है, जियां कि इक गर्म लोहे ला उना जो फुकी दितया हो, 3 इयोदे लोक सिखांदे न की बियाह करणा कने खाणे दियां केई-केई चिंजा खाणा गलत है, पर परमेश्वरे हर तरा दा खाणा मसीह पर भरोसा करणे बालयां तांई बणाया है, जडे प्राथना दे बाद धन्यवाद करिके खाणे दी सच्ची शिक्षा जो जाणदे न। 4 क्योंकि परमेश्वरे दी बणाईयो हर इक चीज खरी है, अगर असां परमेश्वरे जो धन्यवाद करी के खान तां असां हर तरा खाणा खाई सकदे न, 5 क्योंकि परमेश्वरे दे बचन कने प्राथना ला हर तरा दा खाणा शुद्ध होई जांदा है। 6 अगर तू मसीह भाई बेहणा जो लगातार ऐ शिक्षा याद दिलांदा रे, की जड़ी शिक्षा मै तिजो दिती, कने तू मनी भी है कने तू भरोसे दे संदेश कने अच्छी शिक्षा ला मजबूत होया है, तां तू यीशु मसीह दा अच्छा सेबक है कने इसला तेरा पालण-पोषण हमेशा होदा रे। 7 बणी बणाईयां कहाणियां च बकत खराब मत करा, जिना ला परमेश्वरे जो इज्जत नी मिलदी, तुहांजो अपणे आपे जो लगातार सिखांदे रेणा चाईदा की अपणी जिन्दगी ने कियां परमेश्वरे जो इज्जत देई सकदे न। 8 क्योंकि व्यायाम करणे ने शरीर जो घट फायदा होदा है, पर परमेश्वरे दी भक्ति सारियां गल्लां तांई फायदेमंद है, क्योंकि ऐ माणुऐ जो इनाम देंगे दा बायदा करदा है जालू सै इसा धरती च जिन्दा रेदा है कने मरणे बाद भी ऐ इनाम मिलणा। 9 ऐ गल्ल सच्च कने भरोसा करणे दे काबिल है। 10 असां जादा मेहनत कने कोशिश इसी तांई करदे न की असां उसा जिन्दगी जो पाई सकन, जिदे तांई साडी आस जिन्दा परमेश्वरे पर है, जडा सारयां दा परमेश्वर है कने जडे उस पर भरोसा करदे न उना दा उद्धारकर्ता है। 11 भरोसा करणे बालयां जो इना गल्लां दा हुकम देईकरी सिखा की सै इना गल्लां जो मनन। 12 इस ढंगे ने जिन्दगी जिया की कोई भी तेरी बेईजती ना करे; पर तुसां दे बचन, तुहाडा बर्ताव, तुहाडा दुज्जयां तांई प्यार, तुहाडा मसीह पर भरोसा कने तुहाडी निर्दोष जिन्दगी उना भरोसा करणे बालयां तांई इक आदर्श बणना चाईदी, जडे तुसां जो अगुवा मंदे न। 13 जालू दीकर मै तुहाडे बाल नी ओंदा तालू दीकर पबित्र शास्त्र लोकां जो पढने, कने मतलब दसणे च कने सिखाणे च लगी रे। 14 उना गल्लां जो याद रख जालू अगुवां तिजो पर हथ रखे, कने परमेश्वरे उना जो इक संदेश दितया है की तिजो तेरी खास योग्यता दे बारे च दस्से, जड़ी परमेश्वरे तिजो दितियो है, इसा योग्यता जो भुलदा मत। 15 इना

गल्लां पर लगातार ध्यान ने अभ्यास कर, कने अपने आपे जो इना गल्लां ताई पुरे तरीके ने समप्रित करी दे, ताकि हर कोई दिखी सके की तुसां अपने भरोसे च बदा दे न। 16 ध्यान रखा की तुसां कियां जिया दे न कने क्या सिखा दे न, इना गल्लां पर टिकी रिया, क्योंकि अगर तू ऐसा करदा रेंगा, तां तू खुद जो कने जडे तिजो सुणदे न दोनों जो न्याय बाले दिने बचाई लेणा है।

5 कुसी भी सियाणे माणुए दी बेजती करणे दे इरादे ने मत झिडकां दिन्दे; उसयो इज्जता ने समझा जियां की सै तेरा अपना पिता है, कने अपने ला छोटयां जो इयां समझा जियां की सै तेरा अपने भाई है; 2 बजुर्ग जनानिया जो इयां समझा जियां की सै तेरी अपनी माता है, कने जवान बेहणा जो पूरी पबित्रता ने समझा जियां की सै तेरी अपनी बेहण है। 3 उना विधवां जनानियां दी इज्जत कने उना दी देखभाल करा जिना दी देखभाल करणे बाले कोई नी है। 4 अगर कुसी विधवा दे बच्चे, या नाती-पोते होन, तां सै पेहले अपने घर परिवारे दी जिम्मेदारी पूरी करे, जियां इक मसीह भरोसा करणे बालयां जो करणा चाईदा, कने अपने माता-पिता जो उना दा हक देणा सिखे, क्योंकि ऐ सब परमेश्वरे जो पसंद है। 5 जिसा विधवा दा कोई देखभाल करणे बाला नी है, सै परमेश्वरे पर ही आस रखदी है, कने दिन रात बिनती कने प्राथना करिरी परमेश्वरे ला सहायता मंगदी है। 6 पर जड़ी विधवा अपना सारा बकत एशो अराम च करदी है, सै शरीरिक स्वे च तां जिन्दा न, पर आत्मिक रूप च मरी गियां न। 7 भरोसा करणे बालयां जो इना गल्लां दा हुकम दे, ताकि उना पर कोई दोष नी लाई सके। 8 अगर कोई अपनायां रिश्तेदारां दी, कने खासकर अपने परिवारे दी देखभाल ना करे, तां उनी अपना भरोसा छडी दितया है, कने भरोसा नी करणे बालयां ला भी बुरा बणी गिया है। 9 उना ही विधवा दे नां दर्ज करा जडियां सठा सालां ला जादा उमरा दिया होन, कने सै अपने घरे बाले ला बफादार रियो हो, 10 कने अपने भले कम्मा दिया बजा ला उदा ना हो, जिना अपने बाल बचयां दा अच्छे ने पालन-पोषण कितया हो; कने प्रोण्यां दी ठीक ठाक सेवा कीतियो हो, कने भरोसा करणे बालयां दी सेवा इक दासिया सांई किती हो, दुखी लोकां दी सहायता कितियो हो, कने हर इक भले कम्मा च मन लाया हो। 11 पर जवान विधवां दे ना दर्ज मत करदे, क्योंकि जालू उना दी शारीरिक इच्छां इक विधवा दे स्वे च मसीह दी सेवा करणे दे वायदे ला जादा बदी जांदियां न, तां सै मसीह ला दूर होईकरी के दुज्जा बियाह करणा चांदिया न, 12 दुज्जा बियाह

करिके सै अपने आपे जो दोषी बणाई दिन्दी है, क्योंकि उना अपना पहला बायदा पूरा नी किता। 13 इदे सोगी सै घरे-घरे फिरी करी सुस्त होणा सिखदियां न, कने सिर्फ सुस्त होणा ही नी, पर दुज्जयां दे बारे च चुगली निंदा करदियां न कने दुज्जयां दे कम्मा च दखल भी दीदियां न, कने बुरियां गल्लां बोलदियां न, कने ऐसियां गल्लां करदियां जडियां इना जो नी करणा चाईदियां। 14 इस ताई मै ऐ सलाह दिन्दा है, की जवान विधवां जो बियाह करी लेणा चाईदा; कने बच्चे जमन कने घरबार संभालन, कने कुसी भी दुशमणे जो, इना जो बदनाम करणे दा मौका नी दे। 15 मै ऐ इस ताई बोलदा है क्योंकि केई बिधवां ऐसियां न जिना परमेश्वरे दे हुकमा जो मनणा छडी दीतिया है, कने तियां ही करदियां न जियां शैतान चांदा है की सै करन। 16 अगर कुसी मसीही परिवारे च कोई विधवा हो, तां सेई उसा दी सहायता करन ताकि उसा दा भोज कलीसिया पर ना ओए, ताकि कलीसिया ऐसी विधवां दी देखभाल करी सके जिना दी देखभाल करणे बाला कोई नी है। 17 जडे अगुवे अपना कम्म अच्छे ने करदे न, सै दो गुणा इज्जत कने मजदूरी दे काबिल समझे जान, खासकर सै जडे परमेश्वरे दे बचन जो मेहनता ने सिखांदे कने प्रचार करदे न। 18 ऐ पबित्र शास्त्र लिखया है, की गांण गांदे बेले दां दे मुं मत बनदे, होर ऐ भी लिखया है, “की इक मजदूरे जो उदी मेहनत दी मजदूरी लेणे दा हक है।” इस ताई कलीसिया जो अपने अगुवे जो मजदूरी देणी चाईदी। 19 अगर अगुवे पर कोई दोष लगांदा है तां तुसां तालू दीकर उस दोषे जो मत मन्ना जालू दीकर दो या तिन गबाह बोलन की असां इसयो खुद गलत कम्म करदे दिखया है। 20 तुसां जो उस भरोसा करणे बालयां जो जडा पाप करदा है, सारयां सामणे डांटी करी समझाई दिया, ताकि होर भरोसा करणे बाले लोक पाप करणे ला भी डरन। 21 परमेश्वर, कने मसीह यीशु, कने स्वर्गदूतां दी मोजदूगी च, मै तिजो चेतावनी दिन्दा है, की तू कुसी इकी दा पक्ष मत ले, साबना ने इकोदिया बर्ताब कर। 22 कुसी पर भी तालू दीकर हथ रखीकरी अगुवा नियुक्त मत करा जालू दीकर सै साबित नी करे की सै प्रभु यीशु सोगी बफादार है, अगर तू इयां करदा है तां तू भी उदे पापां दा हिस्सेदार है; अपने आपे जो पापां ला दूर रखा। 23 भविष्य च बस पाणी ही पिणे बाला मत बणदा, पर अपने पटे ताई कने बार-बार बीमार होणे दिया बजा ने थोडा कदी-कदी दाखरस दवाई साई पी लिया करा। 24 मै, जल्दबाजी च कुसी जो अगुवा नी बणाणे ताई इस ताई बोलया क्योंकि कुछ लोकां दे पाप तां जल्दी सामणे आई जांदे

न, कने न्याय होणे ला पेहले ही सै सारे भरोसा करणे बालयां सामणे दोषी न, पर कुछ लोकां दे पाप बडे बकते बाद सामणे ओदे न। 25 तियां ही कुछ भले कम्म करदे न, सै कम्म दुज्जे भरोसा करणे बालयां दे सामणे ओदे न, अगर ऐ कम्म भरोसा करणे बालयां सामणे नी ओदे न, फिरी भी उना इना कम्मा जो जाणी लेणा।

6 जितणे भी भरोसा करणे बाले गुलाम न, इना जो अपने-अपने मालिकां दी इज्जत करणी चाईदी, ताकि दुज्जे लोक परमेश्वर दी कने साडी शिक्षा दी बुराई ना करन। 2 जिना दे मालिक भरोसा करणे बाले न, उना जो मसीह भाई होणे दिया बजा ला पूरी इज्जत दिया, कने उना दी होर भी जादा सेवा करा, क्योंकि जडे सेवा ला फायदा लेंदे न, सै उना ला मसीह भाई सांई प्यार करदे न। इना गल्लां दा उपदेश करदे रिया कने लोकां जो भी करणे जो बोला। 3 अगर कोई झूठी शिक्षा दिन्दा है, कने साडे प्रभु यीशु मसीह दे संदेश कने परमेश्वरे दी भक्ति दी शिक्षा जो नी मनदा है, 4 तां सै घमंडी है, कने सै कुछ नी समझदे न, पर सै अखरां दे मतलब जो लेईकरी दुज्यां सोगी बेहस कने झगडा करणा चांदे न, जिसा बजा ने जलन, लडाई, दुज्यां दी निंदा, 5 कने दिमागे च बेकार शक भर्खी जांदा है, कने जडे सच्च ला भटकी गियो न उना माणुआं च लडाईयां होई जांदियां न, कने ऐ सै न, जडे परमेश्वरे दी भक्ति जो कमाईया दा जरिया समझदे न। 6 पर साडे तांई ऐई खरा है की, असां सै कम्म करन जडे परमेश्वरे जो खुश करदे न, कने उस च खुश रिया जडा परमेश्वरे सांझो दितया है। 7 क्योंकि असां इस संसारे च कुछ भी लेईकरी नी आयो न, इस तांई ना ही कुछ लेईकरी जाई सकदे न। 8 अगर साडे बाल खाने पीणे कने पाणे तांई है, तां इसी पर सांझो खुश रेणा चाईदा। 9 कने जडे बडे अमीर होणा चांदे न, सै लोक असानिया ला पाप दे जाले च फसी जांदे न, जियां इक जानवर फंदे च फसी जांदा है, सै ऐसियां चीजां करणा चांदे न जडियां बेकार कने नुकसानदायक न, इना इच्छा उना जो बर्बाद कने खत्म करी देणा। 10 क्योंकि पैसयां दा लालच सारियां बुराईयां दी जड है, केई लोक मसीह दिया शिक्षा पर भरोसा करणा छडी दिन्दे न, क्योंकि सै बडे जादा अमीर होणा चांदे न, कने सै बडे दुखां च पेई जांदे न, जियां इकी माणुऐ अपने आपे जो हथियारे ने बिनी लियो हो। 11 पर तू, तीमथियुस जडा परमेश्वरे दा सेवक है, तू इना सारियां गल्लां ला दूर रे; कने धर्म, भक्ति, भरोसा, प्यार, सबर, कने नम्रता दा पिच्छा कर। 12 जियां इक अच्छा सिपाई लडाईया दे बकत कदी भी हार नी मनदा; तियां ही तू भी

परमेश्वरे पर भरोसा करणे कने उदे हुकम मनणे च कदी हार मत मन, कने हमेशा दी जिन्दगी जो पकड़ी रख, जिदे ताईं तिजो सदया कने मतयां गबाह दे सामणे तू प्रभु यीशु मसीह जो मनया है। (aiōnios g166) 13 पिता परमेश्वर जो गबाह मनी करी, जड़ा सारयां जो जिन्दगी दिन्दा है, कने यीशु मसीह जो गबाह मनी करी जिनी पुन्तियुस पिलातुस दे सामणे अपने बारे च सच्च बोलया, इना जो गबाह मन्नी करी तिजो ऐ हुकम दिन्दा है। 14 कि तू उना सारे कम्मा जो करी सके जिना जो करणे ताईं परमेश्वरे हुकम दितया है। इस ताईं की साड़े प्रभु यीशु मसीह दे दुबारा मुडी ओणे दिकर कोई तिजो पर दोष ना लाई सके। 15 परमेश्वर, इकलोता राजा है जड़ा महिमा दे काबिल है, जड़ा राजयां दा राजा है कने प्रभुआं दा प्रभु है, उनी सही बकते पर प्रभु यीशु मसीह जो प्रगट करणा है, 16 कने इक सै ही है जिनी हमेशा जिदां रेणा है, कने सै ऐसी चमकदी लौई च रेदा है इस ताईं कोई भी इदे बाल नी जाई सकदा है, कने उसयो ना कदी कुनी माणुऐ दिखया कने ना ही कदी दिखी सकदा है। उदी महिमा कने शक्ति युगां-युगां तक रेणी है। आमीन। (aiōnios g166) 17 इस संसारे दे सारे अमीरां जो हुकम दे की सै घमंड ना करन कने अपणी धन धोलता पर भरोसा मत रखा जड़ी थोड़े दिना ताईं है, पर परमेश्वरे पर भरोसा रखा जड़ा सांझो सब कुछ दिन्दा है, जिसदा असां सुख लेई सकदे न। (aiōn g165) 18 कने उना जो बोला की भलाई करा, कने मते सारे भले कम्म करा, कने दयालु बणा कने सहायता करणे ताईं हमेशा अग्रे रिया, 19 ऐ सब करणे ला तुसां अपने ताईं स्वर्गे च धन गठेरदे न, कने ऐ चोरी नी होंदा कने परमेश्वरे उना जो सच्ची जिन्दगी देणी, जिसदा मतलब हमेशा दी जिन्दगी। 20 हे तीमुथियुस, तुसां सैई कर जड़ा परमेश्वरे करणे दा हुकम दितया है, कने बेकार गल्लां कने उना शिक्षा ला दूर रे, जड़ियां परमेश्वरे दी शिक्षा दे खिलाफ न, जिसयो सै गलती ने ज्ञान बोलदे न। 21 केई लोकां इसा गलत शिक्षा जो अपनाई लिया, कने इयां करणे ने सै मसीह दी शिक्षा ला भटकी जांदे न। मैं ऐ प्राथना करदा है की परमेश्वरे दा अनुग्रह तुसां पर होंदा रे।

2 तीमुथियुस

1 मैं पौलुस जडा साडे पिता परमेश्वरे दिया तरफा ला प्रभु यीशु मसीह दा प्रेरित होणे ताई चुणया है। ताकि मैं प्रचार करी सके, की यीशु मसीह पर भरोसा करणे पर हमेशा दी जिन्दगी देणे दा परमेश्वरे बायदा कितया है, **2** मैं ऐ चिट्ठी तीमुथियुस जो लिखा दा है, जडा मेरे अपने प्यारे पुत्रे साई है। मैं प्राथना करदा है की पिता परमेश्वर कने साडे प्रभु यीशु मसीह दिया तरफा ला तिजो अनुग्रह, दया कने शांति मिल्ले। **3** मैं परमेश्वरे दा धन्यवाद करदा है, जिसदी सेवा मैं शुद्ध अंतरात्मा ला किती जियां मेरे पूर्वज करदे थे, जालू भी मैं प्राथना करदा है, तां प्राथना च तिजो हमेशा याद करदा है, **4** मिंजो याद है की तू कितणा रोया था, जालू मिंजो तिजो छडी करी जाणा पिया था, कने तेरे आंसुआं जो याद करिरी दिन रात तिजो ने मिलणे दी इच्छा रखदा है, की मैं खुशिया ला भरूँ जां। **5** मैं यीशु मसीह च तेरे भरोसे जो भी याद करदा है, जडा सारयां ला पेहले तेरी नानी लोइस, कने तेरी माता यूनीक च था, कने मिंजो यकीन है की सेई भरोसा तेरे अंदर भी है। **6** इस ताई मैं तिजो याद दिलादां है कि तू उना बरदाना जो दोबारा ला जगा कर जडे परमेश्वरे तिजो उस बकत दितयो थे जालू मैं तेरे सिरे पर हथ रखे। **7** क्योंकि परमेश्वरे सांझो डरफोक नी बणाया है, पर परमेश्वरे दी आत्मा साडे मना जो मजबूत करदी है, कने दुज्जयां ने प्यार करणे च सहायता करदी है, कने सांझो सबर रखणा सिखांदी है। **8** इस ताई ना तां साडे प्रभु दे बारे च गबाई देणे च शर्म करा, कने ना मिंजो ला शर्म करा, जडा यीशु मसीह दी सेवा करणे ताई जेला च है, पर उस परमेश्वरे दी शक्तिया ला शुभसमाचारे ताई दुख झेलणे ताई मेरे सोगी जुडी जा। **9** परमेश्वरे ही साडा उद्धार कितया है, कने पबित्र जिन्दगी ताई सांझो सदया है, कने उनी सांझो इस ताई नी चुणया की असां खरे कम्म किते न; पर संसार दे बणाने ला पेहले परमेश्वरे यीशु मसीह जो इस संसार च भेजणे दे जरिये अपना अनुग्रह दसणे दी योजना बणाई। (aiōnios g166) **10** पर हुण साडा उद्धारकर्ता प्रभु यीशु मसीह आई गया है, कने उनी मौत दी शक्ति जो हराई दिता है, कने शुभसमाचारे दे जरिये सांझो हमेशा दी जिंदगी दा रस्ता दसया है। **11** कने परमेश्वरे मिंजो इस शुभसमाचार दा प्रचार करणे कने प्रेरित बणने ताई कने लोकां जो उपदेश देणे ताई चुणयां है। **12** इसा ही बजा ने मैं दुखां जो भी झेलदा है, कने शरमांदा नी है, क्योंकि मैं यीशु मसीह जो जाणदा है जिस पर मैं भरोसा किता; कने मिंजो पक्का

पता है, की यीशु मसीह उस दिने दीकर जालू दीकर सै बापस नी ओगा, उदी रक्षा करणे च सक्षम है, जडा उनी मिंजो दितया है। 13 जडी सच्ची शिक्षा तू मिंजो ला सुणियो है, इसा जो उस भरोसे कने प्यारे ला जडा यीशु मसीह च बसया है, उना जो अपणा आदर्श बणाई कर रख। 14 पबित्र आत्मा दिया सहायता ला जडा सांझो च रेंदा है, सच्चाई दी रखबाली करा जडी परमेश्वरे सांझो दिती थी। 15 तू जाणदा है की मते सारे आसिया प्रदेश दे भरोसा करणे बालयां मिंजो छडी दितया है, जिना च फूगिलुस कने हिरमुगिनेस न। 16 उनेसिफुरूस दे घरे पर प्रभु दया करे, क्योंकि सै मिंजो ने बड़ी बरी मिलणे जो आया कने मेरी सहायता किती, कने सै जेला च भी मिंजो ने मिलणे तांई शर्मिदा नी होया। 17 पर जालू सै रोम शेहरे च आया, तां उनी मिंजो हर जगा च तोपया कने मिंजो ने मिल्ला। 18 प्रभु करे, की न्याय दे दिने उस पर बड़ी दया करे। कने जडी सेबा उनी मेरी इफिसुस शेहरे च किती है, उसा जो तू अच्छे ने जाणदा है।

2 इस तांई हे मेरे पुत्र तीमुथियुस, ऐ जाणी करी तू अपने आपे जो मजबूत बणा की परमेश्वरे तिजो अनुग्रह दितया है जडा सिर्फ यीशु मसीह दिया तरफा ला मिलदा है। 2 तू मिंजो मतयां लोकां दे सामणे मसीह दे बारे च शिक्षा दिन्दे सुणया है, इस तांई मै चांदा की तू भी भरोसा करणे बालयां जो इस शिक्षा जो सिखा, जडे बाकियां जो भी सिखाणे दे काबिल न। 3 यीशु मसीह दे अच्छे सिपाई सांई मेरे सोगी सबर ने दुखां दा सामणा कर। 4 अगर कोई सिपाई जडा सेना च है, तां सै होर कोई कम्म धंधा नी करदा क्योंकि सै अपने बड़े अधिकारियां जो खुश करणा चांदा है। 5 इयां ही अगर कोई पेहलवान कुशती दे अखाडे च हिस्सा लेंदा है, कने नियमा दे अनुसार नी लडदा है, तां सै जीत दा इनाम नी जीती सकदा है। 6 जडा किसान मेहनत करदा है, फसल दा पेला हिस्सा उसयो ही मिलणा चाईदा। 7 इना उदाहरणा दे बारे च सोच की ऐ क्या सिखाणा चांदे न, कने प्रभु तिजो इना गल्लां जो समझणे च सहायता करे। 8 हमेशा यीशु मसीह दे बारे च सोचदा रे, जडा राजा दाऊदे दे वंशे ला था, कने परमेश्वरे उसयो मरयां चे जिन्दा किता; कने ऐ ही सै शुभसमाचार है, जिसदा मै प्रचार करदा है। 9 इसी शुभसमाचारे दिया बजा ने मै जेला च इक अपराधी सांई दुख झेला दा है, पर परमेश्वरे दे शुभसमाचार जो प्रचार करणे ला कोई नी रोकी सकदा है। 10 इस तांई मै परमेश्वरे दे चुणयो लोकां दे फायदे तांई सारे दुखां जो सेहन करदा है, ताकि सै यीशु मसीह पर भरोसा करन कने बची

सकन कने उना जो हमेशा दी महिमा मिल्ली सके। (aiōnios g166) 11 ऐ गल्ल सच्च है कने भरोसा करणे दे काबिल है, की अगर असां यीशु मसीह सोगी मरी गियो न, तां उदे सोगी जिंदा भी होणे। 12 अगर असां यीशु मसीह दिया बजा ने दुख झेलगे, तां असां उदी बजा ने राज भी करणा है; अगर असां बोलगे की असां यीशुऐ दे चेले नी न, तां उनी बोलणा की मै इना जो नी जाणदा। 13 अगर असां मसीह सोगी बफादार नी न, फिरी भी सै साडे सोगी बफादार है, क्योंकि सै खुद अपने सभाव दे खिलाफ नी जाई सकदा है। 14 बार-बार इना गल्लां दी शिक्षा भरोसा करणे बालयां जो दिया, जडियां मै तुहांजो सिखाईयां न, कने प्रभु जो गबाह बणाई करी उना जो चेताबनी दिया की अखरां दे मतलब पर बेहस मत करा, इयां करणे ने कोई फायदा नी होंदा; पर सुणनेवाले लोकां तांई नुकसान है। 15 तुहांजो जितना जादा होई सके मेहनत करणी चाईदी की परमेश्वर तुहांजो ऐसा कम्म करणे बाला साबित करी दे, जड़ा कदी भी शर्मिदा ना होन, कने जड़ा परमेश्वरे दे बचना जो ठीक तरीके ने सिखांदा हो। 16 पर संसारिक गल्लां कने बेकार गल्लां ला बची रिया, क्योंकि जडे लोक इयुदियां गल्लां च हिस्सा लेंदे न, सै होर भी जादा परमेश्वरे ला दूर होई जांदे न। 17 उना दी झूठी शिक्षा फैलीकरी लोकां दे भरोसे जो तोड़ी दिन्दी है, जियां खूला सड़या होया जखम माणुऐ जो खत्म करी दिन्दा है: हुमिनयुस कने फिलेतुस भी उना चे ही न, 18 उना सच्चाई पर भरोसा करणा छडी दितया है, सै ऐ बोलदे न की परमेश्वरे मरी गियो भरोसा करणे बालयां जो पेहले ही हमेशा दी जिन्दगी तांई जिन्दा करी दितया है, जिसदी बजा ने सै कुछ विश्वासियां जो यीशु मसीह पर भरोसा करणे ला भटकाई दिन्दे न। 19 पर परमेश्वरे दे लोक उसा पक्की नियां सांई न जड़ी कदी हिलदी नी, उसा पक्की नियां पर खोदी करी लिखया है की, “प्रभु अपने लोकां जो जाणदा है” कने “जड़ा कोई प्रभु दी भक्ति करदा है, सै बुराई ला बचीरैदा है।” 20 बड़े घरे च सिर्फ सोने या चांदी दे ही नी, पर लकड़ी कने मिट्टी दे भांडे भी होंदे न, कुछ भांडयां दा इस्तेमाल खास मौकयां तांई होंदा है, कने कुछ भांडयां दा इस्तेमाल आम कम्मा तांई होंदा है। 21 इस तांई अगर कोई अपने आपे जो गंदगी ला साफ करगा, तां सै उस आदर दे भांडे सांई होई जाणा जिसयो आदर तांई इस्तेमाल करदे न, उदी जिन्दगी पबित्र होणी कने मालिक उसयो इस्तेमाल करी सकदा है। 22 इस तांई उना पापी इच्छां ला बची रिया जडियां जवान लोकां जो अपने पाससे खिचदियां न; कने उना लोकां दी

संगती करा, जड़े धार्मिकता, भरोसा, प्यार कने शांत सभाव कने जड़े साफ मने ला परमेश्वरे दी भक्ति करदे न। 23 कने मुखता कने फालतू गल्लां ला दूर रिया, क्योंकि तू जाणदा है की इना ला झगड़े होंदे न। 24 कने प्रभु दे दासे जो लडाका नी होणा चाईदा, पर उसयो सबना ने प्यारभाव ने गल्ल बात करणे बाले, कने परमेश्वरे दी शिक्षा जो अच्छे ने सिखाणे बाला, कने सेहनशील होणा चाईदा। 25 कने जड़े लोक इना दा बिरोध करदे न, उना जो प्यारभाव ने सच्ची शिक्षा जो समझादां हो, क्या पता परमेश्वर उना दा मन बदली दे, जिसला उना जो यीशु मसीह दी सच्चाईया जो जाणने दा मौका मिले। 26 कने ताकि सै जागरूक होई जान कने शैताने दे बशे ला बाहर निकली सकन, जिनी उना जो धोखा दिता कने सेई करवाया जड़ा सै चांदा था।

3 तीमुथियुस, मैं चांदा की तू ऐ जाणे, की यीशु मसीह दे दुबारा मुडी करी ओणे दे आखरी रोजां च ऐसा बुरा बकत ओणा है। 2 क्योंकि लोक मतलबी, लालची, डींगमार, घमंडी, निंदा करणे बाले, माता-पिता दी गल्लां जो नी मनणे बाले, मतलबी, अपबित्र, 3 दुज्जयां ने प्यार नी करणे बाले, माफ नी करणे बाले, दोष लाणे बाले, अपणियां इच्छां पर काबू नी रखणेबाले, झगडालू, अच्छाई ला नफरत करणे बाले, 4 भरोसा तोड़ने बाले, ठीठ, घमण्डी, परमेश्वरे जो नी पर अपने ऐशो अराम जो प्यार करणे बाले होंणे न। 5 इयोदे लोक दिखणे च तां परमेश्वर दे भक्त लगदे न, पर ऐ उसा शक्ति जो नी मंदे, जड़ी उना जो परमेश्वर दा भक्त बणाई सकदी है, ऐसे माणुआं ला दूर ही रेनयो। 6 इना चे ही कुछ लोक ऐसे भी न, जड़े धोखे ला लोकां दे घरां च बड़ी जांदे न, कने उना मुख जनानिया जो वशे च करी लेंदे न, जिना दा मन पापां दे भोज ने दबूईया कने हर तरा दी वासना दे वशे च फसियां न। 7 कने सै हमेशा नोईयां शिक्षां जो सिखदियां रेंदियां न पर यीशु मसीह दी सच्ची शिक्षा जो कदी नी समझी सकदी। 8 कने ऐ झूठे गुरु न, जड़े यीशु मसीह दियां सच्चियां शिक्षा दा बिरोध करदे न, जियां यन्नेस कने यम्ब्रेसे मूसा दा बिरोध किता था, इना दी अकला जो कीड़े पेई गियो न कने, प्रभु यीशु मसीह पर भरोसा नी करदे न। 9 सै लम्बे बकते दीकर लोकां जो धोखा नी देई सकदे, क्योंकि जियां लोकां यन्नेस कने यम्ब्रेसे दिया मुखता जो पछेणी लिया था, तियां ही सारयां जाणी लेणा की ऐ भी मुख न। 10 पर हे तीमुथियुस, तू अच्छे ने जाणदा है की मैं क्या सिखादां, कने मैं कियां जिन्दगी जिन्दा है, कने मेरियां क्या योजना

थियां कने मेरा क्या भरोसा है। तू जाणदा है की मैं कितना सेहनशील कने दुज्जयां ने प्यार करदा है, कने दुख मुसीबतां जो सेहन कितया है, 11 कने तू उना भयानक दुखां दे बारे च जाणदा है, जडे अन्ताकिया कने इकुनियुम कने लुम्बा दे शेहरां दे लोकां मिंजो दिते कने मैं उना दुखां जो कियां झेलया, पर प्रभुऐ मिंजो इना ला छुड़ाई लिया। 12 जितणे भी लोक परमेश्वर जो खुश करणा चांदे न कने यीशु मसीह पर भरोसा करदे न, उना सारयां जो दुख कने परेशानियां झेलणियां पोंणियां। 13 पर बुरे लोकां कने धोखा देणेबाले लोकां होर भी जादे बुरे कम्म करणे, उना लोकां जो धोखा देणा कने उना अपु भी होर लोकां ला धोखा खाणा। 14 पर हे तीमुथियुस, उना गल्लां पर जडियां तू मिंजो ला सिखियां न, कने जिना पर तू भरोसा किता है, इना जो तू लगातार भरोसे ने मनदा रे। क्योंकि तू जाणदा है की तिजो ऐ सच्चाईयां कुनी सिखाईयां न। 15 तालू ला जालू तू इक छोटा बच्चा था, तू पबित्र शास्त्र जो सिखया है, जडा तिजो ऐ समझणे च सहायता करदा है कि जालू तू यीशु मसीह पर भरोसा करदा है तां परमेश्वर तिजो बचांदा है। 16 सारा पबित्र शास्त्र सै बचन है जिसयो परमेश्वरे अपने पबित्र लोकां दे मने च पाया कने उना इस बचने जो इस तांई लिखया है, ताकि असां इदा इस्तेमाल लोकां जो सच्ची शिक्षा सिखांणे, कने जडे लोक गलत करदे न उना जो समझाणे, कने लोकां जो दसणे तांई की कियां अच्छी जिन्दगी जि सकदे न, 17 ताकि परमेश्वरे दे लोक तैयार होइ जान कने हर इक भले कम्म करणे दे काबिल होइ जान।

4 जालू यीशु मसीहे राजे सांई राज करणा ओणा है, तालू उनी उना दोनों दा न्याय करणा है, जडे लोक जिन्दे न कने उना दा भी जडे मरी गियो न, इस तांई पिता परमेश्वरे कने प्रभु यीशु मसीहे जो गबाह मन्नी करी मैं तिजो आदेश दिन्दा है। 2 की हर तरा दे हालातां च तू परमेश्वर दे बचना दा प्रचार करणे तांई तैयार रे, चाहे हालत अच्छे होन या हालात बुरे होन, तिजो लोकां जो दसणा है की उना क्या गलत किता, कने उना दे पांपा तांई उना जो समझा, पर तिजो उना लोकां जो उत्साहित भी करणा है, जालू तू उना जो सबर ने सिखांदा है। 3 क्योंकि ऐसा बकत भी ओणा, की जालू लोकां सच्चिया शिक्षा जो नी मनणा है, पर उना अपणी ही इच्छा दे अनुसार चलणा, कने उना ऐसे होर मते गुरूआं जो तोपणा है, जडे सेई सिखांदे न जडा सै सुणना चांदे न। 4 ऐसे लोक परमेश्वरे दिया सच्चाई जो सुणना नी चांदे पर उना झूठ कने माणुआं दी बणी बणाईयां कहाणियां ही सुणनियां न। 5

पर तू सारियां गल्लां च शांत कने साबधान रे चाहे तिजो दुख तकलिफां जो झेलणा पोए, कने शुभसमाचारे दे प्रचार ताई मेहनत कर, कने परमेश्वरे दा सेवक होणे दे नाते न तू सै सारे कम्म करणे न जडे तिजो दितयो न। 6 मैं ऐ हुकम इस ताई दिन्दा है, क्योंकि परमेश्वरे ताई मेरी जिन्दगी कने मेरे कम्म करणे दी ताकत घटा दी है, क्योंकि मैं जाणदा है मैं जल्दी मरणे बाला है। 7 जियां इक सच्चा सिपाई लड़ाईया बकते हार नी मनदा तियां ही मैं भी कदी मसीह ताई मेहनत करणे ला हार नी मन्नी, मैं उना सारे कम्मा जो पूरा किता जडे यीशु मसीहे मिजो करणे जो दिते, मैं आखरी दीकर बफादार रिया। 8 प्रभु यीशु मसीहे मिजो धार्मिकता दा ताज देणा, जड़ा सच्चा न्याय करदा है, कने ऐ इनाम मिजो उस रोज मिलणा जालू उनी दुबारा मुडी ओणा है, कने ऐ इनाम सिर्फ मिजो ही नी पर उना सारे लोकां जो मिलणा है जडे चांदे न की यीशु मसीह दुबारा मुडी ओए। 9 तिमथियुस, तू मेरे बाल जल्दी ओणे दी कोशिश कर। 10 क्योंकि देमास उना चीजां ने प्यार करदा है जडियां इस संसारे दियां न, कने मिजो छडी करी थिस्सलुनीके शेहरे जो चली गया है, भाई क्रेसकेस गलातिया प्रदेशे जो कने भाई तीतुस दलमतिया शेहरे जो चली गया है। (aiōn g165) 11 सिर्फ लूका मेरे सोगी है, कने जालू तू ओगा तालू मरकुस जो सोगी लेई ओयां; क्योंकि सै मेरी सेबकाई ताई बडे कम्मे दा बन्दा है। 12 तुखिकुस जो मैं इफिसुस शेहरे च भेजया है। 13 जालू तू ओगा, तां मेरा गर्म कोट लेई ओयां जड़ा मैं त्रोआस शेहरे च करपुस दे घरे छडी आया है, कने सोगी मेरी चिठिया जो लेई ओयां, खासकर उसा चिठिया जो जडी भेडा दी खली ने बणियो है। 14 सिकंदर जड़ा तांबे दे भांडे बणादा था, उनी मिजो बडे दुख दिते, प्रभुए उसयो उदे बुरे कम्मा दे अनुसार फल देणा। 15 तू भी अपने आपे जो उसला बचाई रख, क्योंकि उनी यीशु मसीह दिया शिक्षा दिया बजा ने साडा बड़ा बिरोध कितया है। 16 पैली बरी जालू मैं अपने बचाव ताई रोम शेहरे दी कचेरी च गया, तां कोई भी मेरे सोगी नी था, कने सारे मिजो छडी गे, परमेश्वरे इना दे इस कम्मे जो इना दे खिलाफ ना गिणे, मैं प्राथना करदा है की परमेश्वर इना जो माफ करी दे। 17 पर प्रभुए मेरी सहायता किती कने मिजो शक्ति दिती, ताकि मैं होर जाति दे लोकां जो, जडे उस बकत कचेरी च थे, उना जो प्रभु यीशु दा प्रचार साफ-साफ सुणाई सके; कने उनी मिजो मौत ला बचाई लिया। 18 कने प्रभुए मिजो हर इक बुरे कम्मा ला बचाणा, कने मिजो स्वर्ग दे राज्य च लेई जाणा है: कने उदी महिमा युगां-युगां दीकर होंदी

रे। आमीन। (aiōn g165) 19 प्रिस्का कने अक्विला जो, कने उनेसिफुस्स दे परिवार जो मेरा नमस्कार। 20 इरास्तुस कुरिन्थुस शेहरे च रेई गया, कने मैं नुफिमस जो मीलेतुस शेहरे च छडी दिता क्योंकि सै बीमार था। 21 सर्दियां ला पेहले औणे दी कोशिश कर। यूबूलुस, कने पूदेस, कने लीनुस कने क्लौदिया, कने सारे मसीह भाईयां दिया तरफा ला जड़े ऐथू न तिजो नमस्कार। 22 मैं प्राथना करदा है की प्रभु तेरे सोगी कने उदा अनुग्रह भी तेरे सोगी रे।

तीतुस

1 मैं, पौलुस ऐ चिट्ठी तिजो लिखा दा है, मैं पिता परमेश्वरे दा सेवक कने यीशु मसीह दा प्रेरित है, मिंजो परमेश्वरे दे चुणयो लोकां दे भरोसे जो मजबूत करणे कने उना जो सच्ची शिक्षा जो जाणने च सहायता करणे तांई चुणया है। ताकि सै ऐसी जिन्दगी जीन जड़ी परमेश्वरे जो खुश करदी हो। **2** जिदी बजा ने सै परमेश्वरे सोगी हमेशा दी जिन्दगिया दी आस रखन, क्योंकि परमेश्वर जड़ा कदी झूठ नी बोलदा है। उनी ही संसार बणने ला पेहले ऐ बायदा कितया की परमेश्वरे दे लोकां जो हमेशा दी जिन्दगी मिलणी है। (aiōnios g166) **3** पर हुण बिलकुल सही बकते च, परमेश्वरे ऐ शुभसमाचार सांझो पर प्रगट किता, कने असां सबना जो इदा प्रचार करदे न, साडे उद्धारकर्ता परमेश्वरे मिंजो ऐ जिम्मेदारी दिती की मैं उदे तांई ऐ कम्म करी सके। **4** मैं चिट्ठी तीतुस जो लिखा दा है, तू मेरे अपने पुत्रे सांई है क्योंकि तू मसीह पर भरोसा करदा है जियां मैं करदा है: मैं प्राथना करदा है की पिता परमेश्वर कने साडे उद्धारकर्ता मसीह यीशु तिजो हमेशा अनुग्रह, दया कने शांति दिन्दा रे। **5** मैं इस तांई तिजो क्रेते टापू च छडी आया था, ताकि तू ओथु पर साडे बचयो कम्मा जो पूरा करी सके, कने क्रेते टापू दे हर इक शेहरे च अगुवां जो नियुक्त करे, जियां करणे तांई तिजो मैं हुकम दितया है। **6** इक अगुवे जो निर्दोष, कने अपणी घरे बालिया ला बफादार, सेहनशील, जिना दे बच्चे भरोसा करणे बाले होन, कने शरीर दी इच्छा पर नी चलणे बाले हो, कने माता-पिता दी इज्जत करणे बाले होन। **7** क्योंकि अगुवे जो परमेश्वरे दा भंडारी होणे दिया बजा ला निर्दोष होणा चाईदा। ना हठी, ना गुस्से बाला, ना शराबी, ना मारकुटाई बाला, कने पैसे दा लालची हो। **8** पर परोणयां दी इज्जत करणे बाला हो, भलाई ने प्यार करणे बाला हो, अपने उपर सयम रखणे बाला हो, धर्मी हो, पबित्र हो, समझदार हो; **9** कने उसयो यीशु मसीह दे बारे च भरोसे दे काबिल संदेश पर मजबूतिया ला भरोसा करणा चाईदा, जड़ा असां उसयो सिखाया है, ताकि सै दुज्जयां जो सही शिक्षा मनणे तांई उत्साहित करी सके कने उना दियां गलतियां जो सही करी सके। **10** मैं ऐसा इस तांई बोलदा है, क्योंकि मते लोक सही शिक्षा दा बिरोध करदे न, जड़े बकवास करदे, कने दुज्जयां जो धोखा दिन्दे न। खासकर यहूदी लोक जड़े विश्वासी बणी गियो न कने उद्धार तांई खतना करणे पर जोर दिन्दे न। **11** तिजो इना लोकां जो शिक्षा देणे ला रोकणा चाईदा क्योंकि जालू सै ऐसी शिक्षा दिन्दे न, तां मतयां परिवारां दा भरोसा खत्म

होई जांदा है, सै ऐ कम्म सिर्फ पैसा कमाणे तांई करदे न। 12 उना चे ही इकी माणुऐ जडा क्रेते टापू ला है, जिसयो सै अकलमंद माणु मंदे न, उनी ही बोलया है, “क्रेते टापू दे लोक हमेशा झूठ बोलदे न, सै डंगरा सांई बर्ताब करदे न, कने आलसी कने खान्दू लोक न।” 13 ऐ गल्लां क्रेते टापू दे लोकां तांई अज भी सच्च न, इस तांई उना जो सकती ने चेतावनी दिया कर की सै यीशु मसीह दी शिक्षा पर भरोसा करन। 14 कने सै यहदियाँ दी झूठी शिक्षा कने झूठी कहाणियां पर कने इना माणुआं दे हुकमा पर मन न लगान, जड़ियां सच्च दी शिक्षा ला भटकादियां न। 15 ऐसे लोक जिना दे मना च बुरे बिचार नी न, उना तांई सारियां चीजां शुद्ध न, पर सै लोक जडे बुरे न कने यीशु मसीह पर भरोसा नी करदे, कने ना ही कोई अच्छा कम्म करदे न क्योंकि उना दे दिल कने दिमाग दोनों ही पुरे गंदे होई गियो न। 16 ऐ झूठे शिक्षक बोलदे न की असां परमेश्वरे जो जाणदे न, पर इना दे कम्मा कने चाल चलन ने पता लगदा है, की ऐ यीशु मसीह जो नी जाणदे न, क्योंकि सै नफरता ने भस्यो होया न कने आज्ञा नी मणने बाले न, कने कुसी भी खरे कम्म करणे दे काबिल नी न।

2 पर तीतुस तिजो भरोसा करणे बालयां जो सेई सिखाणा है, जडा यीशु मसीह दी शिक्षा ने सहमत है। 2 बजुर्ग मर्द अपने उपर काबू रखणेबाले होन, दुज्जयां ने ऐसा बर्ताब करणे बाले होन की लोक इना दी इज्जत करन, इना दा भरोसा प्रभु पर मजबूत हो, कने दुज्जयां ने प्यार करणे बाला कने सबर रखणे बाला होन। 3 कने इयां ही बजुर्ग जनानिया दे चाल चलन कने जडा सै करदियां न उसला प्रभु जो इज्जत मान मिल्ले, दोष नी लाणे बालियां होन, कने शराबी नी होन, कने दुज्जयां जो खरियां गल्लां सिखाणे बालियां होन। 4 ताकि सै जवान जनानिया तांई इक अच्छी मिसाल बणन, कने उना जो अपने घरे बालयां कने अपने बचयां सोगी प्यार करणे दी सलाह देन, 5 कने अपने उपर काबू रखणे बाली हो, अपने घरे बाले ला बफादार हो, घर परिवार जो सम्भालने बाली होन, कने अपने-अपने घरे बालयां दे अधीन रेणे बालियां होन, ताकि परमेश्वरे दे बचने दी बुराई नी होई सके। 6 इयां ही जवान मर्दा जो भी समझाया कर, की सै अच्छे ने बर्ताब करन। 7 सारियां गल्लां च तू अपने आपे जो दुज्जयां तांई आदर्श बणा, ताकि सै भी इयां ही करन; कने जालू तू भरोसा करणे बालयां जो यीशु मसीह दे बारे च शिक्षा दे, तां तेरा सिखाणे दा मकसद अच्छा हो, ताकि लोक तिजो होर इज्जत देन, 8 कने तेरिया

शिक्षा च ऐसी सच्चाई होणी चाईदी, की कोई भी उसा जो बुरा नी बोली सके, ताकि साडे बिरोधी शर्मिदा होन क्योंकि कुछ भी बुरा नी होणा, जडा की सै साडे खिलाफ कुछ बोली सकन। 9 जडे दास गुलाम न उना जो सिखा की अपणे-अपणे मालिकां दी गल्ल मन्ना, कने उना जो ऐसा करणे तांई बोला जडा मालिकां जो खुश करे, कने मालिक उना दी शिकायत ना करन; 10 चोरी चलाकी ना करन, पर अपणे आप जो साबित करा की इमानदार न, की लोक उना दा अच्छा बर्ताब दिखीकरी कने सै जडा कुछ भी करदे न, उसला लोकां जो परमेश्वरे दे बारे च संदेश सुणने दी इच्छा होणी। 11 क्योंकि परमेश्वरे अपणा अनुग्रह किता, कने साडे तांई इक रस्ता कडया, ताकि सारे लोक उद्धार पाई सकन। 12 कने इस अनुग्रह ला परमेश्वरे सांझो सिखाया की, उस तरीके ला बर्ताब करणा बंद करा जडा परमेश्वरे जो खुश नी करदा, कने उना चीजां दा लालच करणा बंद करी दिया जिना दी इच्छा भरोसा नी करणे बाले लोक करदे न, कने असां हले दीकर इसा धरती पर ही न तां बुद्धिमानी ला कने धार्मिकता सोगी इस तरीके ला कम्म करा जडे परमेश्वरे जो खुश करदे न। (aiōn g165) 13 असां ऐसा बर्ताब करदे न, जालू असां उम्मीद कने उस महान दिने दी नियाल रखदे न, जिस दिन साडे महान परमेश्वरे कने उद्धारकर्ता यीशु मसीहे दुबारा मुडी करी इसा धरती पर ओणा है। 14 यीशु मसीह साडे फायदे तांई मरी गया, ताकि सांझो सारे पापां ला अजाद करे कने शुद्ध करी सके ताकि असां उदे बड़े खास लोक बणी जान। जडे भले कम्म करणे तांई पुरे तन मन ला समर्पित होन। 15 इस तांई तितुस, मै चांदा की तू ओथु दे भरोसा करणे बालयां जो इना गल्लां दे बारे च सिखा जडियां मै तिजो दसियां न। कने लोकां जो इना गल्लां जो करणे तांई प्रोत्साहित कर, जिथू जरूरी हो ओथु उना जो सही कर, तिजो ऐसा करणे दा पूरा हक है, पक्का कर की तू जडा सिखांदा है, उसयो कोई भी तुच्छ नी समझे।

3 मसीह पर भरोसा करणे बालयां लोकां जो याद दिलांदा रे, की हाकिमां कने अधिकारियां दे अधीन रिया, कने उना दी गल्ल मन्ना कने इज्जत करा, कने हर इक खरे कम्मे तांई तैयार रिया, 2 सै कुसी जो भी बदनाम ना करन, लड़ाई झगडे करणे बाले ना होन, पर दयालु सभावे दे होन, कने सारे लोकां सोगी बड़े प्यारे ने रेन। 3 क्योंकि असां यीशु मसीह पर भरोसा करणे ला पेहले मुख कने परमेश्वरे दे हुकम नी मनणे बाले थे, कने लोकां ला धोखा खाणे बाले थे, असां बुरियां इच्छां

कने संसारे दियां चीजां दे गुलाम थे, कने जलन करी के जिन्दगी कटदे थे, कने लोकां ला नफरत कने इक दुज्जे सोगी दुशमणी रखदे थे। 4 पर फिरी भी साड़े उद्धारकर्ता परमेश्वरे अपणी दया कने प्यार सांझो लोकां पर दस्सी। 5 तां उनी सांझो साड़े पापां दी सजा ला बचाया कने ऐ धर्मे दे कम्मा दिया बजा ने नी, जड़े असां अपु किते, पर उनी अपणी दया दे अनुसार, उनी साड़े पापां जो धोई करी दूर किता, कने पबित्र आत्मा ला सांझो नोआ सभाब कने नोई जिन्दगी दिती है। 6 साड़े उद्धारकर्ता प्रभु यीशु मसीहे जड़ा किता उदे जरिये परमेश्वरे सांझो पबित्र आत्मा दितया है, ताकि सै सांझो च सामर्थ बाले कम्म करी सके। 7 जिसने असां उस हमेशा दी जिन्दगी दी आस रखी सकन जड़ी परमेश्वरे सांझो अपणी ओलाद दे स्पे च देणे दा बायदा कितया है। कने उदे बारे च असां जाणी सकदे न क्योंकि परमेश्वरे अपने अनुग्रह दे जरिये सांझो अपने सोगी सही बनाया है। (aiōnios g166) 8 ऐ गल्ल सच्ची है, जड़ी मैं हुणी दस्सी है कने मैं चांदा है, की तू भरोसा करणे बालयां जो इना गल्लां दे बारे च मजबूती ने सिखा। इस ताई की जिना परमेश्वरे पर भरोसा रखया है, सै खरे-खरे कम्मा जो करणे च अपना बकत देणे च ध्यान लगान, ऐ गल्लां सारयां ताई खरियां न, कने फायदेमंद न। 9 पर मुख गल्लां दी बेहसा ला दूर रिया, पूर्वजां दी लम्बियां सूचियां पर अपना बकत बर्बाद मत करा, कने बैर बिरोध, कने उना झगड़यां ला बची के रिया जड़े मूसा दे नियमा दे बारे च न, क्योंकि इना गल्लां दा कोई फायदा नी है। 10 जड़े लोक कलीसिया च फुट पादे न, तिजो उना लोकां जो कम्म से कम्म दो बरी चेतावनी देणी चाईदी, की सै ऐसा करणा बंद करी देन। उदे बाद उना पर होर बकत बर्बाद मत करदे कने उना ला दूर रेणा चाईदा। 11 तुसां ऐ पक्का करी लिया की ऐसा माणु जड़ा जाणी बुझी करी बुरे रस्ते पर चलदा है, तां उदे खुद दे बुरे कम्म ही साबित करदे न की सै दोषी है। 12 जालू मैं तेरे बाल क्रेते टापू पर अरतिमास कने तुखिकुस जो भेजगा, तालू तू मेरे बाल निकुपुलिस शहर औणे दी कोशिश करयां, क्योंकि मैं ओथु ही सर्दियां कटणे दी सोचियो है। 13 जालू जेनास व्यवस्था जो सिखाणे बाला कने अपुल्लोस अपणी यात्रा ताई निकलगे, तां इना दी सहायता करणे ताई जड़ा कुछ तू करी सकदा है, सै तू करयां। कने ऐ ध्यान रखयां की उना जो कुसी भी चीजा दी कमी ना हो। 14 सिर्फ इतणा ही नी, पर तिजो भरोसा करणे बालयां जो सिखांदे भी रेणा चाईदा की भले कम्म करणे ताई लगातार मेहनत करदे रिया, ताकि उना लोकां

दियां जस्रतां पुरियां होई सकन जिना बाल कुछ नी है, ऐ भरोसा करणे बालयां दी सहायता करदा है की, सारे इक ही मकसद ने जिन्दगी जी सकन। 15 मेरे सोगी ऐथू दे सारे भरोसा करणे बाले तिजो नमस्कार करदे न। ओथु क्रेते टापू च साडे भरोसा करणे बाले साथियां जो जडे सांझो ने प्यार करदे न, उना जो भी मेरी तरफा ला नमस्ते बोलयां। मैं प्राथना करदा है की, प्रभु तुसां सारयां पर अनुग्रह करे।

फिलेमोन

1 मैं, पौलस इसा चिठिया जो लिखा दा है। मैं यीशु मसीह दिया सेबा ताई जेला च बन्द है। मैं कने साडा मसीह भाई, तीमुथियुस तुहांजो नमस्कार करदे न। कने मैं ऐ साडे प्यारे मित्र कने सोगी कम्म करणे बाले फिलेमोन जो लिखा दा है। **2** कने मैं साडी मसीह बेहण अफफिया कने मसीह भाई अरखिप्पुस, जडा योधा साई परमेश्वरे दी सेबा करदा है कने उसा कलीसिया दे ना जडी तुहाडे घरे गिठी होंदी है उसा जो भी लिखा दा है। **3** मैं प्राथना करदा है की साडे पिता परमेश्वर कने प्रभु मसीह यीशु दिया तरफा ला तुहांजो अनुग्रह कने शांति मिलदी रे। **4** क्योंकि मैं जालू भी तिजो ताई प्राथना करदा है, मैं हमेशा तेरे ताई परमेश्वरे दा धन्यवाद करदा है कने अपणी प्राथना च भी तिजो याद करदा है। **5** मैं प्रभु यीशु मसीह च तेरे भरोसे दी कने परमेश्वर दे सारे लोकां ताई तेरे प्यार दी चर्चा सुणदा है। **6** मैं प्राथना करदा है की तू अपने भरोसे च मजबूत होई जाऐ कने उना सारी अच्छी चिजां जो समझी सके जिना जो परमेश्वरे सांझो दितया है, इसी बजा ने लोकां मसीह दी महिमा करणी है। **7** क्योंकि हे मसीह भाईयो, तुहाडी इक दुज्जे ताई प्यारे दी भावना ने मैं बडा खुश है कने उत्साहित है, इस ताई की तेरे जरिये परमेश्वरे दे लोक उत्साहित न। **8** इसा बजा ला मैं तिजो मसीह च इक भरोसा करणे बाला होणे दे नाते खरे कम्म करणे ताई बडे हके सोगी हुकम देई सकदा है। मैं बजुर्ग पौलस, जडा हुण यीशु मसीह दी सेबा करणे दिया बजा ला इक केदी भी है, फिर भी तिजो बडे प्यार ला बिनती करदा है। **10** मैं उनेसिमस ताई बिनती करदा है, जडा मेरे ताई पुत्रे साई है। जालू सै जेला च था तालू सै मसीह च मेरा पुत्र बणी गया। **11** सै तां पेहले तेरे कुसी कम्मे दा नी था, पर हुण तेरे कने मेरे दोनो ताई बडे कम्मे दा है। **12** चाहे मैं उनेसिमस सोगी बडा प्यार करदा है, पर मैं उसयो तुहाडे बाल भेजा दा है। **13** मैं उसयो अपणी मदद ताई अपने बाल ही रखणा चांदा था, जबकि मैं शुभसमाचारे दा प्रचार करणे ताई जेला च था। सै ऐथू मेरी मदद करणे ताई है तेरी जगा लेई सकदा है, क्योंकि मिंजो पता है की तू मेरी मदद करणा चांदा है। **14** अगर तू सेहमत नी है तां मैं उसयो ऐथू नी रखगा, मैं चांदा है की तू अपणिया खुशिया ला मेरी मदद करे क्योंकि इस ताई नी की मैं तिजो ऐ करणे ताई मजबूर किता है। **15** शायद ऐई बजा है की परमेश्वरे उनेसिमस जो थोडे बक्ते ताई तिजो ला दूर जाणे दा हुकम दिता ताकि सै मसीह पर भरोसा करे, इसा बजा ला तू उसयो

अपणे बाल रखणा है। (aiōnios g166) 16 तू उसयो दास ना समझन पर सै दास ला भी बदीकरी है, सै हण विश्वासी साथी है कने प्यारा भी है कने तुहांजो उसयो होर भी जादा प्यार करणा है, कने मैं उसयो बड़ा प्यार करदा है, पर तिजो उसयो दासे दे स्पे च होर भी जादा प्यार करणा चाईदा क्योंकि सै मसीह च इक भाई है। 17 अगर तू मिंजो अपना साथी समझदा है, जालू उनेसिमस बापस तेरे बाल ओगा तां उदा खुशिया ला स्वागत करयां जियां मेरा स्वागत करदे न। 18 अगर उनी तेरा कुछ नुक्सान कितया या उस पर तेरा कोई कर्ज है तां उसयो मेरे नां लिखी दे। 19 मैं पौलुस अपने हथे ने लिखदा है की मैं उदा कर्ज भरी दिगा; हालांकि तुसां पेहले ला ही जाणदे न की, अगर मैं तुहाड़ी मदद नी कितियो होंदी तां तुहांजो खुद नोई जिन्दगी नी मिलियो होंदी इस तांई तुसां अपनी जिन्दगी तांई मेरे कर्जदार न। 20 मेरे प्यारे मित्र, ऐ खुशी मिंजो प्रभु च तेरिया तरफा ला मिल्ले, कने इक साथी विश्वासी दे स्पे च मिंजो उत्साहित करे। 21 जियां की मैं तुहांजो लिखया है, मिंजो यकीन है की तुसां तियां ही करणा जियां मैं करणे जो बोलया। मिंजो पता है की उसला भी बदीकरी करणा जितणा मैं तुहांजो बोलया। 22 इक होर गल्ल कने मेरे तांई अपने घरे च इक कमरा तैयार करा क्योंकि मैं उम्मीद करदा है की परमेश्वरे तुहाड़ी प्राथना दा जबाब देणा की मैं दुबारा तुहाड़े बाल ओए कने मिली सके। 23 इपफ्रास, जडा यीशु मसीह दा प्रचार करणे दिया बजा ला मेरे सोगी जेला च है कने मसीह च तुहांजो नमस्कार करदा है। 24 कने मरकुस, अरिस्तर्खुस, देमास, लूका जडे मेरे सोगी प्रभु दा कम्म करदे न, इना दी तरफा ला तुहांजो नमस्कार। 25 मैं प्राथना करदा है की साडा प्रभु यीशु मसीह तुहांजो पर अनुग्रह करे। आमीन।

इब्रानिया

1 परमेश्वरे पराणे जमाने च परमेश्वरे दे संदेश देणेबालयां दे जरिये बडी बरी बडे तरिक्यां ला साडे पूर्वजां सोगी गल्लां कितियां, **2** पर इना आखरी रोजां च परमेश्वरे साडे सोगी अपणे पुत्रे जरिये गल्लां कितियां। परमेश्वरे अपणे पुत्रे जरिये सारियां चीजां जो बणाया कने उसयो सारे संसारे दा बारिस बणाया। (aiōn g165)

3 पुत्र ही परमेश्वरे दी महिमा दी लौ, कने बिलकुल उदे सांई ही है, कने अपणे शक्तिशाली बचना ला सारे संसारे जो चलादां है। उनी लोकां जो उना दे पापां ला शुद्ध किता, कने इदे बाद स्वर्गे च महिमामय परमेश्वरे दे सजे पासे जाई बैठा। **4** इस तांई परमेश्वरे अपणे पुत्रे जो ऐसा ना दिता जडा स्वर्गदूतां ला जादा महान है, इसला सांझो पता चलदा है की पुत्र उना ला कितणा जादा महान है। **5** क्योंकि पबित्र शास्त्र च ऐ कुथु भी नी लिखया है की परमेश्वरे अपणे कुसी स्वर्गदूते ला ऐसा कदी नी बोलया जडा उनी अपणे पुत्रे ने बोलया, “तू मेरा पुत्र है; अज मैं घोषणा करदा है की तू मेरा पुत्र है।” कने उनी फिरी कदी भी कुसी स्वर्गदूते ने ऐ नी बोलया की, “मैं तेरा पिता होणा, कने तू मेरा पुत्र होणा।” **6** परमेश्वरे अपणे बडे महान पुत्रे जो संसारे च भेजणे ला पेहले बोलया की, “उदे सारे स्वर्गदूत उसयो अराधना करन।” **7** कने स्वर्गदूतां दे बारे च ऐ बोलदा है, “परमेश्वर अपणे स्वर्गदूतां जो होआ सांई बणादां है, कने अपणे सेवकां जो बलदी अग्गी सांई बणांदा है।” **8** पर पुत्रे दे बारे च बोलदा है, “हे परमेश्वर तेरा राज युगां-युंगा दीकर बणी रेणा तू लोकां पर न्याय ला राज करणा। (aiōn g165) **9** तू भले कम्मा ला प्यार कने पाप दे कम्मा ला दुश्मणी रखी; इसी तांई तुहाडे परमेश्वरे, तेरे साथियां बीचे ला तुहांजो चुणया, कने बडिया खुशिया ला उना ला लग करिरी नियुक्त कितया।” **10** पबित्र शास्त्र ऐ भी बोलदा है की, “शुरूआत च तू धरती जो बणाया, कने तू सै सब कुछ भी बणाया जडा अम्बरे च है। **11** इना तां सारयां खत्म होई जाणा; पर तू युगां-युगां दीकर बणी रेणा; कने उना सारयां कपडयां सांई पुराणे होई जाणा। **12** कने तू उना जो चादरा सांई बटोलणा, कने उना जो कपडयां सांई बदलणा: पर तू हमेशा इकोदिया रेणा कने तू हमेशा जिन्दा रेणा।” **13** कने परमेश्वरे कदी कुसी स्वर्गदूते जो ऐसा नी बोलया, “जालू दीकर मैं तेरे सारे दुश्मणा जो हराई ना दे, तालू दीकर तू मेरे सजे पासे बैठी रे कने इज्जत ले।” **14** तां स्वर्गदूतां दा क्या कम्म है? सै सिर्फ परमेश्वरे

दे सेवक न, कने परमेश्वर उना जो उना लोकां दी देखभाल करणे तांई भेजदा है, जिना दा उद्धार होणा है।

2 इस तांई, जरूरी है की असां जडियां गल्लां सिखियां न, उना जो मनणे पर जादा ध्यान देन, तां असां सच्चाईया ला नी भटकणा। **2** क्योंकि जड़ी व्यवस्था स्वर्गदूतां दे जरिये बोलियो थी, सै हमेशा सच्च साबित होई, कने जडे इसा व्यवस्था जो नी मंदे थे, उना जो परमेश्वरे ला सजा मिलदी थी। **3** तां सांझो भी सजा मिलणी, अगर असां इस महान उद्धार जो नी मनगे। कने इस उद्धार दे बारे च सारयां ला पेहले प्रभुए अपु बोलया था, कने जिना लोकां इस उद्धार दे संदेश दे बारे च सुणया उना सांझो साबित किता की ये सच्च है। **4** कने जालू भी परमेश्वरे दी इच्छा होई तालू उनी चिन्न कने लग-लग चमत्कारां जरिये कने पबित्र आत्मा दे जरिये लोकां जो बरदान देईकरी इस उद्धार दे संदेश जो साबित किता है। **5** परमेश्वरे उस ओणे बाले संसार जो जिदे बारे च असां बोला दे न, अपने स्वर्गदूतां दे अधीन नी कितया पर अपने पुत्र यीशु मसीह दे अधीन कितया है। **6** पर पबित्र शास्त्र च कुथी ऐ लिखया है की, माणु क्या न, की परमेश्वर तू उदी चिंता करदा है या देखभाल करदा है? सै माणुए ला जादा होर कुछ नी है। **7** तू उसयो स्वर्गदूतां ला घट शक्ति दितियो है; तू उसयो राजे सांई महिमा कने इज्जत दिती कने उसयो अपने हथां दे कम्मा पर हक दिता। **8** तू सारियां चीजां पर उसयो हक दिता ताकि सै सारयां पर राज करे, इस तांई ऐसा लगदा है की परमेश्वरे सारा कुछ माणुए दे बशे च करी दितया है। मतलब की ऐसा कुछ नी है, जडा उदे काबू च ना हो। पर असां दिखी सकदे न, की हले दीकर भी सारा कुछ माणुए दे बशे च नी है। **9** पर असां यीशुए जो दिखदे न! उसयो थोडे बकते तांई स्वर्गदूतां ला घट दर्जा दितया था, ताकि परमेश्वरे दे अनुग्रह ला सै सारे लोकां तांई मरी जाए। इस तांई उनी दुख झेले कने मरी गया कने परमेश्वरे उसयो महिमा कने इज्जत दिती। **10** परमेश्वरे सारा कुछ बणाया कने सारियां चीजां जो अपने तांई सम्भाली रख्या है। इसा बजा ला, की लोकां जो अपणी महिमा च हिस्सेदार बणाए, परमेश्वरे ऐ फेसला लिया की, ऐ सही होणा की प्रभु यीशु मसीह दुख झेली करी इक ऐसा माणु बणी जाए जडा चरित्र च सिद्ध है। क्योंकि यीशु ही है जडा उना दा उद्धार करी सकदा है। **11** क्योंकि सै जडा लोकां दे पापां जो माफ करदा है, कने सै जिना दे पाप माफ होंदे न, उना दोना दा पिता इक ही है, इसा बजा ला यीशु उना जो भाई कने बेहण बोलणे

ला नी शरमांदा। 12 कने इदे बारे च यीशु मसीह परमेश्वरे ला बोलदा है, “मैं अपने मसीही भाईयां जो दसणा की तू मेरे ताई कितने खरे कम्म किते, कने जालू सै तेरी अराधना करणे ताई गिठे होंगे तालू मैं तेरी महिमा उना सारे लोकां बिच करगा।” 13 सै दुबारा बोलदा है की, “मैं परमेश्वरे पर भरोसा रखणा।” कने सै दुबारा बोलदा है की, “मैं उना लोकां सोगी है जिना जो परमेश्वरे मिजो दितया है।” 14 क्योंकि परमेश्वरे दे बच्चे माणु न, मतलब की जड़े मास कने खूने दे बणयो न, कने पुत्र भी इक माणु बणी गया, क्योंकि इक माणु बणी करी ही सै मरी सकदा था, कने मरणे जरिये ही सै शैतान जो हराई सकदा था, जिदे बाल मौत दी शक्ति है, 15 कने इस तरीके ला प्रभु यीशुए उना सारयां जो अजाद करी दिता जड़े अपनी पूरी जिन्दगी मौत दे डरे च होईकरी गुलामा सांई जी दे थे। 16 क्योंकि प्रभु यीशु तां स्वर्गदूतां जो नी बल्कि अब्राहम दे वंशा दी सहायता करदा है। 17 इस बजा ला उस ताई जरूरी था की, यीशु हर तरीके ला बिलकुल साडे सांई बणी जाए, कने इस तरीके ला सै परमेश्वरे दा सच्चा कने दयालु महायाजक बणया। कने जड़ा बलिदान सै उना ताई करदा है ताकि उदे जरिये लोकां जो उना दे पापां ला माफी मिल्ली सके। 18 क्योंकि यीशु मसीहे मुशकिलां कने दुखां जो सेहन किता इस ताई सै उना लोकां दी सहायता करी सकदा है जड़े मुशकिलां कने दुखां जो सेहन करा दे न।

3 इस ताई हे मसीह भाईयो जड़े परमेश्वरे ला रिश्ता रखदे न, तुहांजो स्वर्ग दी जिन्दगिया च हिस्सेदार बणने ताई सदया है। यीशु मसीह पर ध्यान दिया जिसयो असां मंदे न, जड़ा साडे ताई परमेश्वरे दे शुभसमाचार दा दूत कने महायाजक है। 2 यीशु मसीहे सै सारा कुछ किता जड़ा परमेश्वरे उसयो करणे ताई बोलया, बिलकुल तियां ही जियां मूसा परमेश्वरे दे परिवारे दे सारे लोकां दी सेवा करणे च भरोसे दे लायक था। 3 घर बणाणे बाले जो घरे ला जादा इज्जत मिलदी है। इयां ही यीशु मूसा ला जादा आदर दे काबिल है। 4 क्योंकि हर इक घरे जो बणाने बाला कोई न कोई होंदा है, पर जिनी सब कुछ बणाया है सै परमेश्वर है। 5 मूसा परमेश्वरे दे परिवारे दे सारे लोकां दी सेवा करणे च भरोसे दे लायक रिया। जड़ा मूसे किता सै उना गल्लां पासे इशारा करा दा था, जड़ा परमेश्वर बादे च बोलणे बाला था। 6 पर मसीह इक पुत्रे सांई परमेश्वरे दे परिवारे दे लोकां च भरोसे दे लायक है, अगर असां अपनी हिम्मत कने उस आसा पर मजबुतिया ला आखरी दीकर टिकी रेंदे न, तां असां परमेश्वरे दे लोक न। 7 जियां पबित्र आत्मा पबित्र शास्त्र च बोलदी है,

“अज जालू तूसां परमेश्वरे जो बोलदे सुणदे न, 8 तां तूसां उदे हुकम मनणे ला मना मत करदे, जियां तूसां दे पूर्वजां सुनसान जगा च परिक्षा बेले परमेश्वरे दे खिलाफ किता।” 9 ओथु तुहाडे पूर्वजां चालियां सालां दीकर मेरे महान कम्मा जो दिखणे बाद भी, चुनौती देईकरी मिंजो परखया। 10 इसा बजा ला मै उस बकते दे लोकां सोगी गुस्सा रिया, कने बोलया, हमेशा ही उना दा मन मिंजो ला दूर होई जांदा है, कने जडा करणे दा हुकम मै दिता उसयो करणे ला मना करी दिता। 11 तालू मै गुस्से च आई करी कसम खादी की, उना उस जगा च दाखल नी होणा जिथू मै उना जो अराम देणा। 12 हे मसीह भाईयो, ध्यान रखा, की तूसां चे कुसी दा पापी कने बेबसआसी मन ना हो, जिसने तूसां जिन्दगी देणेबाले परमेश्वरे जो मनणे ला मना करी देन। 13 तूसां इक दुज्जे जो हर रोज प्रोत्साहित करदे रिया, ऐसा ना हो की पाप दे धोखे च आई करी तुहाडे मन ढीठ बणी जाए। इस तांई जालू दीकर असां “अज” बोली सकदे न, तालू दीकर इक दुज्जे जो हर रोज प्रोत्साहित करदे रिया। 14 जडा भरोसा साडा मसीहे जो अपनाणे दे बकत था, अगर असां अपने उस भरोसे च आखरी दिने दीकर हिम्मत सोगी टिकी रेंगे, तां असां मसीह सोगी हिस्सेदार बणी जाणा। 15 तियां ही जियां पबित्र शास्त्र च लिखया, “अगर अज तूसां परमेश्वरे दी अबाज सुणगे, तां तूसां मने च ढीठ मत बणदे, जियां तुहाडे पूर्वजां बणे च परमेश्वरे दा बिरोध किता था।” 16 भला सै कुण लोक न जिना परमेश्वरे दी अबाज सुणीकरी भी उसयो मनणे ला मना करी दिता? क्या सै ऐ लोक नी थे जिना जो मूसे मिस्र देशे ला बाहर कडया था? 17 कने परमेश्वर चालियां सालां दीकर कुना लोकां पर गुस्सा रिया? ऐ इस्राएली ही थे जिना सुनसान जगा च पाप किता कने बणे च मरी गे। 18 कने परमेश्वरे कुना लोकां सोगी कसम खादी थी, की तूसां उसा जगा च दाखल नी होणा जिथू मै उना जो अराम देणा? सै पक्का उना लोकां दे बारे च बोला दा था जिना उदा हुकम नी मनया था। 19 सांझो पता चली गया की, सै लोक भरोसा नी करणे दिया बजा ला उसा अराम दिया जगा च नी जाई सके।

4 परमेश्वरे बायदा कितया है की असां अरामे दिया जगा च जाणा, इस तांई अराम दिया जगा च जाणे दा बायदा अजे भी है, तां सांझो इसा गल्ला दा होर भी ध्यान रखणा चाईदा। तूसां चे कुसी जो भी उस अराम बाली जगा पर जाणे दा मौका नी छडणा चाईदा। 2 क्योंकि जियां असां मसीह दे बारे च शुभसमाचार सुणया, इयां ही इस्राएल दे लोकां अराम दी जगा दा शुभसमाचार सुणया, पर उना

भरोसा नी किता। इस ताई उना जो इस शुभसमाचार ला कोई फायदा नी होया। 3 असां परमेश्वरे दियां बोलियां गल्लां पर भरोसा कितया है, इस ताई असां अराम दिया जगा च दाखल होणा; जियां परमेश्वरे दुज्जयां ताई बोलया है, “मै गुस्से च कसम खादी थी की उना मेरे अरामे बालिया जगा च दाखल नी होई सकणा।” पर परमेश्वरे ऐ इस ताई नी बोलया था की हले दीकर अराम दी जगा तयार नी थी, ऐ संसारे जो बणने ला पेहले ही तैयार होई गियो थी। 4 क्योंकि सतमे रोजे दे बारे च पबित्र शास्त्र च इयां लिखया है, “परमेश्वरे सतमे रोजे अपने सारे कम्मा जो पूरे करिरी अराम किता।” 5 कने असां ऐ भी पढया की बादे च उनी बोलया, “उना मेरे अरामे दिया जगा च दाखल नी करी सकणा है।” 6 कने इस्राएले दे लोकां जिना सारयां ला पेहले ऐ शुभसमाचार सुणयां, सै अराम दिया जगा च दाखल नी होई सके, क्योंकि उना परमेश्वरे दे हुकम नी मन्ने, पर बाकियां ताई अराम दिया जगा दा रस्ता हले दीकर खुलया है। 7 इस ताई परमेश्वरे अपने अराम दिया जगा च दुबारा दाखल होणे ताई इक होर बकत तय किता, कने सै बकत अज है। साडे पूर्वजां दे विद्रोह करणे दे केईयां सालां बाद, परमेश्वरे राजा दाऊद ला इना बचना जरिये बोलया, जडे पेहले भी बोलयो थे की, “अगर अज तुसां परमेश्वरे दी अबाज सुणगे, तां तुसां अपने मने जो कठोर मत करदे।” 8 कने असां ऐ भी जाणदे न की परमेश्वरे जिस अराम दिया जगा दा बायदा कितया है, सै कनान नी है, जिथू जाणे ताई यहोशुऐ उना दी अगुवाई किती थी। अगर ऐ कनान देश होंदा तां परमेश्वर बादे च ऐ नी बोलदा की इदे ताई इक होर बकत था। 9 परमेश्वरे दे लोकां ताई हुण भी इक जगा तैयार है, जिथू सै पुरे तरीके ला अराम करी सकदे न। उना तियां ही अराम करणा है जियां परमेश्वरे सतमे रोजे अराम किता। 10 परमेश्वरे अपना कम्म पूरा करिरी अराम किता था। कने सारे लोकां ताई ऐ इकोदिया है जडे परमेश्वरे बाल अराम करणा जांदे न। उना अपना कम्म पूरा करणे बाद अराम करणा। 11 इस ताई सांझो भी उस अराम बालिया जगा च दाखल होणे ताई जादा मेहनत करणी चाईदी। ऐसा ना हो की कोई उना लोकां सांई परमेश्वरे दे हुकम नी मनणे दिया बजा ला उस अराम दिया जगा च दाखल नी होऐ। 12 क्योंकि परमेश्वरे दा बचन जिन्दा कने असरदार है, सै कुसी भी दोधारी तलवारा ला भी पेना है। जड़ा साड़ी आत्मा, प्राण, जोंड़ा जो कने गुरदयां जो बिनी दिन्दा है, कने सै मना दे बिचारां कने मने दी भावना जो जाणी लेंदा है। 13 परमेश्वरे दिया नजरा

ला इस संसारे दा कोई भी माणु लुकया नी है, सांझो सारे कम्मा दा लेखा उसयो देणा पोंणा है। उदे सामणे सारियां चीजां खुलियां कने प्रगट न। 14 परमेश्वरे दा पुत्र यीशु जडा साडा सारयां दा महायाजक है, स्वर्गे च परमेश्वरे बाल चली गया। इस ताई ओआ जिस भरोसे जो सारयां सामणे मनया था, उस भरोसे च असां मजबूतिया ला टिकी रेंन। 15 क्योंकि ऐ महायाजक जडा यीशु मसीह है, जडा साडियां हर इक कमजोरियां जो समझदा है। शैताने सै हर गल्ला च साडे साई परखया, तमी उनी पाप नी किता। 16 इस ताई ओआ, असां बिना डरयो परमेश्वरे सामणे ओन, तालू परमेश्वरे सान्झो पर दया कने अनुग्रह करणा, कने जालू सांझो जस्सरत होणी तालू उनी साडी सहायता करणी।

5 परमेश्वरे हर इक महायाजके जो इस्राएल दे लोकां चे चुणया। सै लोकां दी भलाई ताई परमेश्वरे दिया तरफा ला कम्म करणे ताई चुणया जांदा है; सै इस ताई भेंट कने बलि चढांदा है ताकि परमेश्वर लोकां दे पापां जो माफ करी दे। 2 इक माणु होणे दे नाते सै अपु भी केई सारियां चीजां च कमजोर है। इसा बजा ला सै मुख कने भटकणे बाले लोकां ला प्यारे ला निपटी सकदा है। 3 इक महायाजक होणे दे नाते उसयो अपने पापां जो कने लोकां दे पापां जो दूर करणे ताई बलियां चढाणियां चाईदियां। 4 कोई भी माणु अपु महायाजक होणे दी पदवी अपने उपर नी लेई सकदा। जियां परमेश्वरे हासने जो पेहले महायाजके दे स्वे च सदया कने चुणया था, तियां ही परमेश्वर दुज्जे महायाजकां जो सददा कने चुणदा है। 5 तियां ही मसीहे भी अपु जो महायाजक बणने ताई चुणी करी अपु अपना आदर नी किता। पर परमेश्वरे यीशु मसीहे जो ऐ बोली करी चुणया जडा उनी होर कुसी महायाजक जो कदी नी बोलया था, जडा की पबित्र शास्त्र च भजनकारे लिखया है, “तू मेरा पुत्र है, अज मैं ऐ घोषणा करदा है की मैं तेरा पिता है।” 6 इयां ही परमेश्वरे दुज्जिया जगा च दुबारा उसयो बोलया, “इयां ही जियां मलिकिसिदक इक याजक था, तियां ही तुमी हमेशा याजक बणी रेणा।” (aiōn g165) 7 जालू यीशु इस संसारे च जिन्दा था, तालू उनी ज़ोरे-ज़ोरे कने रोई-रोई के परमेश्वरे सामणे प्रार्थना कने बिनतियां कितियां जडा उसयो मौता ला बचाई सकदा था, कने इस बड़े आदर कने अपने आपे जो परमेश्वरे जो सौपणे दिया बजा ला परमेश्वरे उदियां प्रार्थना कने बिनतियां सुणियां। 8 यीशु मसीह परमेश्वरे दा पुत्र होणे पर भी, उनी दुख सेहन करिरी सै करणा सीखी लिया जडा परमेश्वर उसला चांदा था। 9

परमेश्वरे मलिकिसिदक सांई उसयो इक महायाजक दी इज्जत दिती, कने उसयो सिद्ध बनाया कने सै उना सारयां लोकां तांई उद्धार दी बजा बणी गया जडे उदे हुकमा जो मंदे थे। (aiōnios g166) 11 इदे बारे च बोलणे तांई बडियां सारियां गल्लां न, पर इना गल्लां जो समझणा बड़ा मुशकिल है, क्योंकि तुसां परमेश्वरे दा बचन सुणने च सुस्त होई गियो न। 12 तुसां इतणे लम्बे बकते ला भरोसा करदे न, तुहांजो तां हुण बाकियां जो सिखाणे बाला होणा चाईदा था। पर तुहांजो हले भी ऐसे माणुऐ दी जरूरत है जडा तुहांजो दुबारा नोऐ सिरे ला परमेश्वरे दिया शिक्षा जो सिखाऐ। तुहांजो अनाज नी पर बचयां सांई दुधे दी जरूरत है। 13 क्योंकि जडे लोक दूध पिंदे न, सै उना बचयां सांई न जडे असल च परमेश्वरे दिया नजरा च सही जिन्दगी जिणे दे बारे च नी जाणदे न। 14 पर अनाजे दी रोटी उना तांई है जडे भरोसे च पक्के न, जिनी अपने अनुभव ला भले बुरे च फर्क करणा सीखी लिया है।

6 इस तांई जडा सारयां ला पेहले असां मसीह दे बारे च सिखाया था, उना बुनियादी शिक्षां जो बार-बार दोहरांदे मत रिया, कने हुण अग्रे बदीकरी उच्च शिक्षां दे बारे च सोच बिचार करा। बुनियादी शिक्षां सांई मत बना, जियां की पाप करणा छडी देणे दे बारे च, परमेश्वरे पर भरोसा करणे दे बारे च, 2 कने बपतिस्मा देणे दे बारे च, कुसी पर हथ रखीकरी आशीष देणे दे बारे च, मरयां दा जिन्दा होणे देणे दे बारे च, कने हमेशा दी सजा देणे दे बारे च कने आखरी न्याय दिया शिक्षा दी नीई दुबारा ला पाणे दी जरूरत नी है। (aiōnios g166) 3 कने अगर परमेश्वरे मौका दिता तां, मैं तुहांजो उच्च शिक्षा दियां गल्लां सिखाणियां। 4 जिना अपना भरोसा गवाई दितया उना दा अपने पापां जो छडी करी दुबारा मुडी ओणा मुशकिल है। क्योंकि सै इक बरी परमेश्वरे दी लौइ च रेई बैठयो न, कने स्वर्गे दे वरदान लेई बैठयो न, कने उना जो होर लोकां सोगी पबित्र आत्मा मिली बैठया है, 5 उना अनुभव कितया था की परमेश्वरे दा बचन खरा है, कने ओणे बालिया शक्तिया जो अनुभव किता जालू परमेश्वरे राज करणा। (aiōn g165) 6 ऐसे लोकां जो परमेश्वरे बाल बापस लोणे दा कोई रस्ता नी है; क्योंकि सै खुद परमेश्वरे दे पुत्रे जो दुबारा ला सूली पर चढ़ांदे न कने उसयो शर्मिदा करदे न जिसा बजा ला होर लोक मसीह दा मजाक उड़ांदे न। 7 सै लोक जीना जो खरी शिक्षा मिलियो है, सै उसा जमिना सांई न जिसा पर बार-बार बरखा होंदी है। अगर जमीन खरी है तां ऐ किसाने जो फायदे

बाली फसल दिन्दी है, कने इस पर परमेश्वरे दी आशीष होंदी है। 8 कने होर लोक उसा जमिना सांई न जडी झिल्ल, जाड़-बसुंट उगांदी है, जड़ा की कुसी कम्मे दा नी। इसा पर परमेश्वरे दा श्राप होणे दा खतरा है कने इदे च पैदा होणे बालियां बेकार चीजां जो अग्गी च फुकी देणा। 9 पर हे प्यारे भाईयो, तुसां खरे कम्म करा दे न, क्योंकि परमेश्वरे तुहांजो पेहले ही बचाई लिया है। ऐ चेताबनियां तुहाड़े तांई नी न। 10 तुसां परमेश्वरे दे खातिर परमेश्वरे दे लोकां दी सेवा बड़े प्यारे ला करदे थे कने करा दे भी न, परमेश्वरे तुहाड़े इना कम्मा जो नी भूलणा। क्योंकि परमेश्वर अन्याय करणे बाला नी है। 11 तुसां सुस्त मत बणा। पर कड़ी मेहनत करणे बालयां सांई आखरी दीकर सबर कने भरोसे सोगी पक्की आस रखीकरी इना प्यार भरे कम्मा जो करदे रेणा चाईदा, ताकि सांझो परमेश्वरे दे वायदे मिली सकन। 13 कने परमेश्वरे अब्राहमे ला वायदा करदे बेले अपने नाए दी कसम खादी क्योंकि उसला बडा ऐसा कोई नी, जिदा ना लेईरी कसम खाई सकन, कने उनी बोलया, 14 “मैं सच्ची तिजो बड़ी आशीष देणी, कने मैं तिजो मते बंश देणे।” 15 अब्राहमे बड़े लम्बे बकते दीकर सबर रखया। तां जाई करी उसयो सै मिल्ला जिदा परमेश्वरे उसयो बायदा कितया था। 16 कसम खांदे बकत लोक हमेशा अपने ला बड़े कुसी माणुए दी कसम खांदे न। कसम खाणे ला ऐ यकीन होंदा है की जड़ा सै बोला दे न सै सच्च है, कने ऐ सारयां झगड़यां जो खत्म करी दिन्दी है। 17 जालू परमेश्वरे अपने लोकां जो ऐ गल्ल बिलकुल साफ दसणा चाई की सै अपने कितयो बादयां जो कदी नी भुलदा; तां उनी बायदे सोगी अपने ना दी कसम जोड़ी। इसला पता चलदा है उदे बायदे सच्ची पुरे होणे न। 18 तां ऐथू फिरी दो गल्लां न परमेश्वरे दा बायदा कने उदी कसम, जड़ी कदी नी बदली सकदी जिना दे बारे च परमेश्वर कदी झूठ नी बोली सकदा। इस तांई असां परमेश्वरे बाल बचणे तांई आयो न, कने जड़ी आस उनी सांझो दितियो है, उसा जो पकड़ी रखा कने जादा उत्साहित रिया। 19 जियां इक बड़े किले ला बनियो रस्सी किस्तिया जो टिकाई रखदी है, तियां ही है आस साडिया जिन्दगिया जो टिकाई कने मजबूत बणाई रखदी है। जिदे च साड़ी आस है सै यीशु मसीह है, जड़ा स्वर्ग च बडिया पबित्र जगा च परमेश्वरे बाल गया। 20 यीशु सांझो ला अग्गे कने साड़े तांई स्वर्गे च गया है। सै याजक मलिकिसिदक सांई हमेशा तांई महायाजक बणी गया है। (aiōn g165)

7 ऐ मलिकिसिदक शालेम शेहरे दा राजा था, कने परम प्रधान परमेश्वरे दा याजक था, सारयां ला पेहले उदे नाऐ दा मतलब है, “धार्मिकता दा राजा” कने उदा ना “शालेम शेहरे दा राजा” जिदा मतलब है की शांति दा राजा। जिदा ना पिता, ना मां, ना खानदान दा कोई पता था, कने ना उदे जमणे दी कने ना मरणे दी खबर थी, फिरी भी सै परमेश्वरे दे पुत्रे सांई हमेशा तांई याजक बणी रेंदा है; मलिकिसिदक अब्राहम ने तालू मिल्ला जालू सै राजयां जो हराई करी मुडी करी ओआ दा था, कने उसयो आशीष दिती कने अब्राहमे उसयो हर चिजा दा दसमा हिस्सा दिता जड़ा उनी अपने दुशमणा लिया था। 4 हुण इसा गल्ला पर ध्यान दिया की मलिकिसिदक कितणा महान था, जिसयो साडे पूर्वज अब्राहमे अपने दुशमणा ला लुटयो माले दा दसमां हिस्सा देई दिता था। 5 मूसा दी व्यवस्था दसदी है की लेवी दे बंशे च जड़े याजक बणदे न, उना जो हुकम मिलया है, की सै इस्राएले दे लोकां ला दसमा हिस्सा लेन। पर सै याजक कने होर लोक भाईयां सांई न क्योंकि सै सारे अब्राहम दे बंशे दे न। 6 पर फिरी भी मलिकिसिदक जड़ा लेवी दे बंशे दा नी था, उनी अब्राहम ला दसमा हिस्सा लिया, कने उनी अब्राहम जो आशीष दिती, हालांकि अब्राहम तां सै माणु था जिसयो परमेश्वरे बायदा दितया था। 7 कने असां पक्का जाणदे न की जड़ा आशीष दिन्दा है, सै आशीष लेणेबाले ला बड़ा होंदा है। 8 कने लेवी बंशे दे याजक जड़े दसमा हिस्सा ले दे थे, कने ऐसे लोक थे जिना इक ना इक रोज मरी जाणा। पर मलिकिसिदक जिनी अब्राहम ला दसमां हिस्सा लिया, सै हल्ले भी जिदा है, जियां की पबित्र शास्त्र च लिखया है। 9 तां असां बोली सकदे न, की लेवी जड़ा लोकां ला दसमा हिस्सा लेंदा था सै अब्राहम दा बंशज था। इस तांई अब्राहम जालू मलिकिसिदक ला मिलया कने उसयो दसमां हिस्सा दिता, तां असां ऐ बोली भी सकदे न की लेविऐ भी अब्राहमे जरिये मलिकिसिदक जो दसमां हिस्सा दिता। 10 क्योंकि जिस बेले मलिकिसिदक अब्राहम ला मिल्ला, उस बकत तां लेवी जम्या भी नी था, पर सै तां अपने पिता दे शरीर च था। 11 लोकां जो उना याजकां दे आधार पर व्यवस्था मिलियो थी, जड़े लेवी गोत्र दे हारून ला आयो थे। पर उना जो इसा व्यवस्था जरिये सिद्ध नी बणाई सके, इस तांई इक होर याजके दी ओणे दी जरूरत थी, इक ऐसा याजक जड़ा हारून सांई नी पर मलिकिसिदक सांई हो। 12 क्योंकि जालू इकोदे याजक नी रेंदे, तां व्यवस्था जो बदलणा भी जरूरी होई जांदा है। 13 क्योंकि असां ऐ गल्लां मसीह दे बारे च बोला दे न, जड़ा इक

लग गोत्रे ला था। कने उस गोत्रे च कदी भी कुनी भी याजके दे स्पे च वेदिया पर सेबा नी कितियो थी। 14 सारे जाणदे न की, साडा प्रभु यीशु यहदा दे बंशे ला था कने मूसे इस यहदा दे बंश दे लोकां दा याजक बणने दे बारे च कुछ नी बोलया, कने ना ही यहदा बंश दा कोई याजक बणया था। 15 हुण तुसां समझी सकदे न की मैं कुस बारे च बोला दा है। इस ताई ऐ गल्ल होर भी साफ है की मूसा दी व्यवस्था कने याजक दोनों जो साडे महायाजके ताई बदली दितया है, जडा मलिकिसिदके सांई याजक है। 16 यीशु कुसी खास माणु मतलब की लेवी दे बंशज दे नियमा कने विधियां दिया बजा ला याजक नी बणया, पर यीशु अपणी कदी खत्म नी होणे बाली जिन्दगिया दिया शक्तिया दिया बजा ला याजक बणया। 17 क्योंकि परमेश्वर उदे बारे च पबित्र शास्त्र ऐ गबाई दिन्दा है की, “तू मलिकिसिदके सांई युगां-युगां दीकर याजक बणी रेणा है।” (aiōn g165) 18 इस ताई मूसा दी व्यवस्था सै नी करी सकी जडा उसा जो करणा चाईदा था कने कुसी कम्मे दी नी थी इसा बजा ला बदली दिती। 19 इस ताई की मूसा दी व्यवस्था कुसी भी गल्ला जो सिद्ध नी बणाई सकी, कने उदिया जगा पर साडे बाल इक आस है, जडी यीशु मसीह च है, जिदे जरिये असां परमेश्वरे दे नेडे जाई सकदे न। 20 इदे बाद जालू परमेश्वरे यीशु मसीह जो याजक बणाया तां उनी इक कसम खादी। 21 क्योंकि लेवी दे बंश बगेर कसमा दे याजक बणाऐ, पर यीशु मसीह कसमा सोगी परमेश्वरे दिया तरफा ला याजक बणया। परमेश्वरे यीशु मसीह दे बारे च बोलया, “मैं परमेश्वर, मैं ऐ कसम खांदा है, मैं अपणा फेसला कदी नी बदलणा, की तू युगां-युगां दीकर मलिकिसिदका सांई इक याजक है।” (aiōn g165) 22 इस ताई यीशु मसीह ही सै है, जडा इक खरी बाचा दे पूरा होणे दी बजा बणदा है। 23 ऐथू यीशु मसीह दा याजक होणे दा इक होर फायदा है, सै तां बडे जादा याजक बणदे आए, क्योंकि उना चे हर इक याजके दी मौत होई गई कने इसा बजा ला सै अपणा कम्म जारी नी रखी सकी। 24 पर यीशु युगां-युगां दीकर जिन्दा है, इस ताई उनी हमेशा याजक बणी रेणा, पर होर कोई उदा याजक होणे दा पद नी लेई सकदा। (aiōn g165) 25 इसी ताई जडे यीशु जरिये परमेश्वरे बाल ओंदे न, सै उना दा पूरा-पूरा उद्धार करी सकदा है, क्योंकि सै उना ताई हमेशा विनती करणे ताई जिन्दा है। 26 क्योंकि ऐसा ही महायाजक साडियां जुस्तरतां जो पूरा करी सकदा है, जडा पबित्र, जिस पर कोई दोष ना हो, शुद्ध हो, पापियां ला लग रेंदा हो, कने जडा स्वर्गे ला भी उच्चा

हो। 27 कने सै महायाजक जडे हास्न दे बंशे दे थे, उना सांई यीशुए तांई जरूरी नी है, की सै पेहले अपणे पापां कने फिरी लोकां दे पापां तांई बलिदान चढाए; क्योंकि यीशुए तां इक बरी सारे लोकां तांई अपणे आपे जो बलि चढाई दितया। 28 क्योंकि मूसा दी व्यवस्था तां कमजोर लोकां जो महायाजक बणांदी है; पर जड़ी कसम मूसा दी व्यवस्था दे बाद आई सै परमेश्वरे दे पुत्रे जो बड़ा याजक बणांदी है। कने सै हमेशा तांई साडे तांई इक सिद्ध महायाजक बणी गया है। (aiōn g165)

8 हुण जड़ियां गल्लां असां करा दे न, उना चे सारयां ला बड़ी गल्ल ऐ है, की साडे तांई इक ऐसा महायाजक है, जडा स्वर्गे च उस महिमामय परमेश्वरे दे सिहांसने दे सजे पासे जाई बैठा है। 2 कने साडा महायाजक स्वर्गे च सच्चे मिलाप दे तम्बूए च बड़िया पबित्र जगा च सेवा करदा है जड़ी स्वर्गे च है, जिसयो परमेश्वरे बणाया ना की कुनी माणुए। 3 क्योंकि हर इक महायाजक जिसयो इस तांई चुणदे न की सै लोकां दी माफी तांई भेंट कने बलिदान चढाए। इस तांई साडे महायाजक यीशु तांई भी ऐ जरूरी था की उस बाल भी कुछ चढाने तांई हो। 4 कने अगर मसीह धरतिया पर होंदा तां कदी भी याजक नी होंदा, क्योंकि मूसा दी व्यवस्था दे अनुसार भेंट चढाने तांई पेहले ला ही याजक हेन। 5 जडे ऐ याजक करदे न, सै सिर्फ उदी इक नकल कने परछाई है जडा स्वर्गे च है। क्योंकि जालू मूसा मिलाप दा तम्बू बणाणा चलया था, तालू परमेश्वरे उसयो ऐ चेतावनी दिती की, “तू हर चीज तियां ही बणायां जदिया उदाहरण तिजो पहाडे पर दसया था।” 6 पर जडा याजकां दी सेवा दा कम्म साडे महायाजक यीशुए जो मिलया, सै याजकां ला बदीकरी है। क्योंकि सै जिस बाचा दा बिचोलिया है, सै पराणिया बाचा ला खरी है कने खरियां चीजां दे बायदे पर आधारित है। 7 क्योंकि अगर पेहलिया बाचा च कमियां नी होंदिया तां दूजिया बाचा दी जरूरत ही नी होंदी। 8 पर परमेश्वरे लोकां पर दोष लाईकरी बोलया, “सै दिन ओआ दे न की, मैं इस्राएल दे लोकां सोगी कने यहूदा दे लोकां सोगी नोई बाचा करणी है। 9 ऐ बाचा उस बाचा सांई नी होणी है, जड़ी मैं उना दे पूर्वजां सोगी कितियो थी, जालू मैं उना जो मिस्र देशे ला कडी लेई आया था, क्योंकि सै मेरी बाचा पर टिकी नी रे, कने मैं उना दी चिंता करणा बंद नी करी दिता, प्रभु ऐई बोलदा है। 10 फिरी प्रभु बोलदा है की, जड़ी नोई बाचा मैं ओणे बाले दिना च इस्राएल दे लोकां सोगी करणी, सै ऐ है की मैं उना जो मेरी व्यवस्था दे बारे च सोचणा देणा, कने उना उसा जो अपणे मना च रखणा, कने मैं

उना दा परमेश्वर बणना, कने उना मेरी अराधना करणी। 11 फिरी कुनी भी इस्राएल दे लोकां अपने देशे बालयां जो, कने अपने रिशतेदारां जो ऐ शिक्षा देणे दी जरूरत नी पोणी, की तुसां प्रभु जो मन्ना, क्योंकि छोटे ला लेईकरी बड़े लोकां दीकर सारयां मन्नी लेणा की मैं उना दा परमेश्वर है। 12 क्योंकि मैं उना दे पाप माफ करी देणे, कने मैं उना दे पापां जो दुबारा फिरी याद नी करणा।” 13 परमेश्वरे इसयो नोई बाचा बोलया, इस ताई उनी पेहले बालिया बाचा जो पूराणा करी दिता। जडा कुछ भी पूराणा है कने घिस्या-पिटया है, सै खत्म होई जाणा।

9 उसा पैली बाचा जो जड़ी बड़े पेहले, मूसा दे जरिये इस्राएल दे लोकां जो दीतियो थी। उदे च परमेश्वरे दी अराधना करणे दे सारे नियम कने कनून थे कने इसा धरती पर अराधना ताई लोकां दा बणाया मिलाप दा इक पबित्र तम्बू भी था। 2 ऐ तम्बू जानवरां दिया खल्ली ला बणया था, उस तम्बूऐ बिच उना इक पर्दा लटकाई दिता कने दो कमरे बणाई दिते, पेहले कमरे च इक धूपदान, कने मेज थी जिसा पर परमेश्वरे जो चढाईयां रोटियां रखदे थे, कने इस कमरे जो पबित्र जगा बोलदे थे। 3 कने तम्बूऐ दे दुज्जे कमरे जो जडा परदे पिच्छे था, उसयो परम पबित्र जगा बोलदे न। 4 उस दुज्जे कमरे च सोने दी धूपदानी थी, कने चारो पासे ला सोने दा मढया सन्दुक था जिसयो बाचा दा सन्दुक बोलदे न। कने उदे च सोने दे भांडयां च मन्ना भरीरी रखया था, कने हारून दा डंडा भी था जिदे पर खिलयो पत्ते लगयो थे, आखरी च इदे च दो पथरे दियां पटियां थियां, जिना पर परमेश्वरे सै दस हुकम लिखयो थे, जडे मूसा जो दितयो थे। 5 इदे इलाबा सन्दुके प्राला दो फंगा बाले कम्ब बणयो थे, जडे इसा गल्ला दा संकेत था की परमेश्वर उस जगा पर था। उना अपने फंगा ला उसा जगा जो ढक्या था, जिस पर महायाजक खून छिड़कदा था, ताकि लोकां दे पाप माफ होई सकन। पर हुण असां इना चीजां दे बारे च इक-इक करिरी दस्सी नी सकदे। 6 इस तरीके ला उना इना सारियां चीजां जो तम्बूऐ दे दो कमरयां च तैयार किता। याजक हर रोज उस पेहले कमरे च जाई करी अपनी धार्मिक बिधियां जो पूरा करदा था। 7 पर दुज्जे कमरे च मतलब की उस बड़ी पबित्र जगा च सिर्फ महायाजक साले च इक ही बरी जांदा था। कने सै अपने सोगी जानवरां दे खूने जो लेई जांदा था, जिसयो सै अपने ताई कने लोकां दे अनजाणे च कितयो पापां दी माफी ताई चढांदा था। 8 इना विधियां जरिये पबित्र आत्मा सांझो ऐ समझांदा है, की जालू दीकर इसा धरती पर मिलाप बाले तम्बू कने इना दियां

विधियां जो मंदे न, तालू दीकर स्वर्गे च परमेश्वरे दे परम पबित्र जगा च जाणे दा
 रस्ता हल्ले दीकर नी खुलया है। 9 ऐ सारियां चीजां सिर्फ इना गल्लां दा उदाहरण
 थियां, जडियां हण मसीह दे जरिये पुरियां होआ दियां न। क्योंकि सै चढाबे कने
 बलिदान जडे लोक परमेश्वरे जो चढावें थे, जडे उदी अराधना करदे थे। सै लोकां
 दे मना कने दिलां जो शुद्ध करणे दे काबिल नी थे। 10 क्योंकि ऐ लोकां दे खाणे
 पीणे दियां गल्लां दे बारे च, कने भाँती-भाँती दियां नोहणे दियां बिधिया दे बारे च
 दसदे न जिना ला लोक बाहरी तौर ला साफ होई जादे न। इना विधियां जो तालू
 दीकर मनणा था जालू दीकर की परमेश्वर नोई बाचा जो शुरू नी करी दिदा। 11
 पर हण मसीह महायाजक सांई आया है, जडा नोईया बाचा दियां सारियां खरियाँ-
 खरियाँ चीजां दिन्दा है। सै होर भी जादा महान कने सिद्ध तम्बूए च दाखल होया।
 ऐ तम्बू माणुआं नी बणाया था मतलब की इस संसारे दा नी था। 12 यीशु मसीह
 परम पबित्र जगा च इक बकरी या बछड़े दा खून लेईकरी नी गया, पर सै अपने
 ही खूने सोगी गया। उनी सै सिर्फ इक बरी ही किता, कने इसयो दुबारा करणे दी
 जरूरत नी होणी। उदे जरिये सांझो हमेशा दा उद्धार मिलया। (aiōnios g166) 13
 मूसा दी व्यवस्था अनुसार जडे लोक अशुद्ध होंदे न, सै परमेश्वरे दी अराधना करणे
 दे काबिल नी होंदे। पर अगर उना पर बकरयां कने दांदा दा खून कने बछड़यां दी
 राख छिड़की जाए तां सै शुद्ध होई जादे न। अगर इदे च माणुआं दे शरीर जो शुद्ध
 करणे दी शक्ति है, 14 तां जरा सोची की दिखा की मसीह दे खूने ला साडे दिलां
 जो उना कम्मा ला कितणा शुद्ध करणा जडे मौत दे पासे लेई जांदे न, ताकि असां
 जिन्दे परमेश्वरे दी अराधना करी सकन। क्योंकि अनन्त आत्मा दिया शक्तिया दे
 जरिये मसीहे साडे पापां तांई अपने आपे जो निर्दोष बलिदान दे स्पे च परमेश्वरे जो
 भेंट चढाई दिता। (aiōnios g166) 15 इसा बजा ला यीशु मसीहे लोकां सोगी इक
 नोई बाचा बन्नी, ताकि जिना लोकां जो परमेश्वरे सदया है, उना जो हमेशा दियां
 आशीषां मिली सकन जिदा परमेश्वरे बायदा कितया था। क्योंकि यीशु मसीह उना
 जो उना दे पापां दिया सजा ला अजाद करणे तांई मरी गया, जडे उना पैली बाचा
 दे अधीन रेईकरी कितयो थे। (aiōnios g166) 16 असां जाणदे न की अगर कोई
 माणु अपणी मौत ला बाद अपणी जमीन जयादाद जो बंडणे तांई बसियत लिखदा
 है, तां उस बटबारे जो करणे तांई उदा मरणा जरूरी है। 17 क्योंकि उसा बसियत दी
 कोई कीमत नी जालू दीकर जयादाद दा मालिक हल्ले जिन्दा है। उसा बसियत दी

कीमत तालू ही है जालू उस मालिके दी मौत होई जांदी है। 18 इस ताई ऐथू दीकर परमेश्वरे दे जरिये दितियो पैली बाचा जो भी पक्की होणे ला पेहले इक बलि दिती थी। 19 सारयां ला पेहले मूसा सारयां लोकां जो व्यवस्था दे हुकम दे बारे च दसया। इदे बाद उनी बछड़यां दा खून लेईकरी पाणिए च घोलया कने इदे बाद उनी इसयो लोकां कने व्यवस्था दिया कताबा च छिड़कणे ताई लाल ऊन, कने जूफा नाए दे बूटे दियां डालियाँ दा इस्तेमाल किता। 20 कने जालू मूसा ऐ बोला दा था, उनी लोकां ने बोलया, “ऐ खून उस बाचा जो शुरू करदा है, जिसा जो मनणे दा हुकम परमेश्वरे तुहांजो दितया है।” 21 कने इयां ही मूसे तम्बूए च कने अराधना दियां सारियां चीजां पर खून छिड़कया। 22 कने मूसा दी व्यवस्था बोलदी है की सारियां चीजां जो खून छिड़की करी शुद्ध करणा चाईदा, कने बिना खूने बहाए, परमेश्वर लोकां जो उना दे पापां ताई माफ नी करी सकदा। 23 इस ताई मिलाप बाले तम्बूए कने उदियां सारियां चीजां जो विधिया अनुसार बलि देईकरी शुद्ध करणा जरूरी था, ऐ स्वर्गे दियां चीजां दी नकल है। पर स्वर्गे दियां चीजां जो विधिया अनुसार शुद्ध करणे ताई, जानवरां दे खूने ला भी खरे बलिदाने दी जरूरत थी। 24 इसा बजा ला मसीह उस पबित्र जगा च नी गया जिसा जो माणुआं अपने हथां ला बणाया है, जड़ी सच्ची पबित्र जगा दी इक प्रतीक है। पर सै साडे फायदे ताई परमेश्वरे सामणे ओणे ताई सीधा स्वर्गे जो गया। 25 कने मसीह अपने आप जो बार-बार बलि चढ़ाणे ताई स्वर्गे च नी गया, जियां महायाजक हर साल जानवरां दे खूने सोगी परम पबित्र जगा च जांदा है, क्योंकि अगर इयां होंदा तां फिरी उसयो संसारे दे शुरू होणे ला ही बडे सारे दुख झेलणा पोंदे। पर मसीह इस संसार दे आखरी बकत च अपने आप जो बलिदान करणे ताई सिर्फ इक बरी आया ताकि पाप दा अंत होई सके। (aiōn g165) 27 क्योंकि ऐ पक्का है की असां सारे लोकां इक बरी मरणा, कने उदे बाद साडा न्याय होणा। 28 तियां ही मसीह भी सारे लोकां दे पापां जो माफ करणे ताई इक ही बरी बलिदान होया। पर उनी जालू दुबारा इसा धरती पर ओणा, तां उनी साडे पापां ताई बलिदान होणे ताई नी ओणा, पर उना लोकां जो बचाणे ताई ओणा जडे लोक उसयो नियाला दे न।

10 मूसा दी व्यवस्था तां सिर्फ अग्रे भविष्य च ओणे बालियां खरियां चीजां दी परछाई है, पर उना खरियां चीजां दा असली रूप नी है, जडियां मसीहे साडे ताई कितियां न। इस ताई व्यवस्था जो मनणे बाले लोक हर साल इकोदियां बलियां

चढ़ा दें न, पर ऐ बलिदान उना लोकां जो कदी सिद्ध नी करी सकदे जड़े परमेश्वरे दी अराधना करणे ताई उदे नेड़े ओदे न। 2 अगर परमेश्वरे दी अराधना करणे बाले इना बलिदाना दिया बजा ला सिद्ध होई जांदे, तां सै अपने आप जो दोषी नी मंदे। तां फिरी हुण बलिदान चढ़ाणे दे बारे च गल्ल नी होंदी। 3 पर जानवरां दियां बलियां दा खून उना दे पापां जो दूर नी करी सकदा, पर ऐ हर साल उना जो उना दे कितयो पापां जो याद करांदा है। 5 इसा बजा ला जालू मसीह इस संसारे च आया तां उनी परमेश्वरे ला बोलया था, “तू नी चांदा की लोक तिजो बलियां चढ़ान, पर तू मिजो इक आदमी बणाई दिता।” 6 कने ना सै बलियां जिना च जानवरे जो पूरा फूकी करी चढ़ा दें न कने ना ही पापां दिया माफिया ताई चढ़ाईयां बलियां ला तू खुश होंदा है। 7 तालू मसीहे परमेश्वरे ने बोलया, “हे परमेश्वर, मैं तेरी इच्छा पूरी करणे ताई आई गया है, पबित्र शास्त्र च मेरे बारे च ऐई लिखया है।” 8 मूसा दी व्यवस्था सिखांदी है बलियां कने भेंटा पाप दिया बजा ला चढ़ाणियां चाईदियां। पर मसीहे इना गल्लां दे बारे च कजो बोलया की परमेश्वरे इना ला खुश नी होंदा? 9 फिरी मसीह ऐ भी बोलदा है, “दिख, मैं सेई करणा आया है, जड़ा तू चांदा है।” तालू परमेश्वर बलियां वाली पैली व्यवस्था जो खत्म करी दिन्दा है, ताकि सै कोई व्यवस्था शुरू करी सके। इसी बजा ला असां उस बलिदान दे जरिये पबित्र होई गियो न जड़ा यीशु मसीहे अपने शरीर जो चढ़ाई करी दिता। 11 हर इक यहूदी याजक रोज ही वेदिया सामणे खड़ा होंदा है कने लोकां दे पापां जो दूर करणे दियां बिधियां जो पूरा करांदा है। कने हमेशा ही इकोदे बलिदाना चढ़ादां रेंदा है, जड़े कदी भी उस माणुऐ दे पापां जो दूर नी करी सकदे न, जड़े उनी कितयो न। 12 पर यीशु मसीहे साडे पापां दी माफी ताई अपने आप जो परमेश्वरे सामणे इक ही बरी कने हमेशा ताई बलिदान करी दिता कने। सै परमेश्वरे दे सजे पासे कने सिंहासने पर सारयां ला जादा इज्जता बालिया जगा च हमेशा ताई जाई बैठा। 13 क्योंकि मसीहे अपने आप जो सिर्फ इक बरी ही बलिदान दे रूपे च परमेश्वरे जो देई दिता कने इस बजा ला उदे लोकां जो पबित्र करी दितया है कने सै सच्ची हमेशा ताई धर्मीं बणी गियो न। कने ओथु सै अपने सारे दुश्मणा जो पुरे तरीके ला अपने अधीन करणे ताई परमेश्वरे दा इंतजार करा दा है। 15 कने पबित्र आत्मा भी सांझो ऐ दसदा है की, ऐ गल्ल सच्च है। कने प्रभु परमेश्वरे दे बायदे जो याद करा जिदे बारे च उनी पेहले ही बोलया था, 16 “प्रभु बोलदा है; की जड़ी बाचा मैं ओणे

बाले दिनां च उना सोगी करणी है, की मैं उना जो अपणी व्यवस्था दे बारे च सोचणा देणा कने उना उसा जो अपणे मना च रखणा।” 17 फिरी परमेश्वर ऐ बोलदा है, “मैं उना दे पाप माफ करी देणे, कने मैं उना दे पापां जो दुबारा फिरी याद नी करणा।” 18 कने परमेश्वर साडे पापां जो माफ करदा है, तां हुण कोई भी होर बलिदान देणे दी जरूरत नी है। 19 इस तांई हे मसीह भाईयो, जालू की यीशु मसीहे साडे तांई अपणी जिन्दगी बलिदान करी दिती, हुण असां हिम्मतता सोगी स्वर्गे दिया परम पबित्र जगा च बिना डरयो जाई सकदे न। 20 जालू मसीह मरया तां उनी साडे तांई इक नोआ रस्ता खोली दिता ताकि असां ऐसी जिन्दगी जी सकन जिदा कोई अंत ना हो। उनी ऐ रस्ता पर्दे ला निकली करी खोली दिता, मतलब की अपणे शरीर जो बलिदान करिरी रस्ता खोली दिता। 21 क्योंकि साड़ा ऐसा महान याजक है जड़ा परमेश्वरे दे सारे लोकां पर राज करदा है, 22 तां ओआ असां, मसीह दे खूने जो छिड़की करी अपणे मना जो शुद्ध करिरी कने साफ पाणिए ला अपणे शरीर जो धोई करी साफ करिरी कने सच्चे मने कने पक्के भरोसे सोगी परमेश्वर दे नेडे जान। 23 कने असां बिना कुसी शक दे अपणी उस आस पर टिकी रेन, जिसा जो असां अपनाया है क्योंकि असां परमेश्वर पर उदे बायदयां जो पूरा करणे तांई भरोसा करी सकदे न। 24 ओआ असां इक दुज्जे सोगी प्यारभाव कने भले कम्मा जो करणे तांई इक दुज्जे जो प्रोत्साहित करन। 25 कने असां परमेश्वरे दी अराधना करणे तांई गिठे होणा बंद ना करन, जियां केई लोक करा दे न, पर ओआ असां इक दुज्जे जो होर भी जादा प्रोत्साहित कने समझान क्योंकि असां जाणदे न की प्रभु जल्दी मुडी करी ओणे बाला है। 26 सांझो इना कम्मा जो करणा चाईदा क्योंकि यीशु मसीहे दे शुभसमाचार दी सच्चाई जो जाणने बाद अगर असां जाणी बुझी करी पाप करदे न, तां कोई होर बलिदान नी है जड़े साडे पापां जो माफ करी सके। 27 बल्कि डरीकरी परमेश्वरे दा इंतजार करणा है की उना दा न्याय करे कने अग्नी च भस्म करी दे क्योंकि सै उदे दुश्मण न। 28 जड़ा कोई मूसा दी व्यवस्था जो नी मंदा है, उस पर बगेर दया कितयो दो या तीन लोकां दी गबाई पर उसयो मारी दिन्दे न। 29 अगर मूसा दी व्यवस्था च ऐसी सजा थी, तां उस माणुए दी सजा बड़ी बड़ी होणी चाईदी जड़ा परमेश्वरे दे पुत्रे दी बेईजती करदा है कने परमेश्वरे दे पुत्रे जो अपणे पैरां थले गरेची दिन्दा है, कने मसीह दे खूने जो पबित्र नी मंदा जिदे जरिये परमेश्वरे उसयो पबित्र करणे तांई नोई बाचा शुरू किती

थी कने पबित्र आत्मा दी बेईजती किती जिदे जरिये उसयो अनुग्रह मिलया था। 30 क्योंकि असां जाणदे न की परमेश्वरे बोलया, “बदला लेणा मेरा कम्म है, मैं ही बदला लेणा।” कने उनी फिरी ऐ भी बोलया की, “प्रभुऐ अपने लोकां दा न्याय करणा।” 31 जिन्दे परमेश्वरे दे हथां ला सजा मिलणा इक बड़ी भयानक गल्ल है। 32 पर उना दिनां दे बारे च याद करा, जालू तुसां पैली बरी मसीह पर भरोसा किता था। तुसां बड़े भरी दुख तकलिफां जो झेलया, पर तुसां भरोसे च पक्के बणी रे। 33 कदी-कदी तां इयां भी होया की तुसां लोकां ला बेईजती कने अत्याचार झेली करी सारयां सामणे तमाशा बणी गे, कने केई बरी तुसां मसीह भाईयां दा साथ दिता जडे तुहाड़े सांई दुख मुसीबतां च थे। 34 तुसां कैदियां दे दुखां च भी दुखी होए, कने जालू होरनी लोकां तुहाड़ी धन-दौलत जो लूटया तां तुसां उना जो लुटणा दिता। क्योंकि तुसां जाणदे न की तुहाड़े बाल हल्ले भी सारियां चीजां न, जिना दा परमेश्वरे बायदा कितया है, कने सै हमेशा तांई न। 35 इस तांई अपने भरोसे जो मत छडा चाहे कुछ भी होई जा। कने उस इनाम जो याद रखा जडा परमेश्वरे तुहांजो देणा। 36 हुण तुहांजो सबर रखीकरी सेहन करणे दी जरूरत है, ताकि तुसां परमेश्वरे दी इच्छा जो पूरा करी सकन। तां तुहांजो सै सारा कुछ मिलणा जिदा उनी बायदा कितया है। 37 क्योंकि जियां पबित्र शास्त्र च मसीह दे बारे च लिखया है की, “हुण बडा ही घट बकत रेई गया है, जालू की ओणे बाले ओणा है, कने देर नी करणी थोड़े।” 38 कने मेरे धर्मी लोकां मिंजो पर भरोसा करणे ला ही जिंदे रेणा, कने अगर सै मिंजो पर भरोसा करणे ला पिच्छे हटी जांगे तां मैं उना ला खुश नी होंणा। 39 पर असां उना लोकां चे नी न जड़े परमेश्वरे ला पिच्छे हटी जांदे न, कने खत्म होई जांदे न। पर असां उना लोकां चे न जड़े भरोसा रखदे न कने बची जांदे न।

11 हुण जड़े लोक परमेश्वरे पर भरोसा रखदे न, उना जो पक्का ही परमेश्वरे सारा कुछ देणा जिदी सै आस रखदे न; उना जो यकीन है की जिना चीजां जो उना दिखया नी है सै असली च हेन। 2 साड़े पूर्वजां दा भी ऐसा भरोसा था कने इसी तांई परमेश्वर उना ला खुश था। 3 क्योंकि भरोसा करणे ला ही असां जाणी लेंदे न, की सारे संसार जो परमेश्वरे अपने बचना ला बणाया है। इस तांई असां जडा भी दिखदे न, सै उना चीजां ला नी बणयो न जिना जो दिखी नी सकदे न। (aiōn g165) 4 भरोसा करणे दिया बजा ला ही आदमे दे पुत्र हाबिले अपने बड़े भाई कैन ला

बलिया बलिदान परमेश्वरे ताई चढाया, कने उदे बलिदाने दे जरिये ही परमेश्वरे
 गबाई दिती की हाबिल धर्मी है, कने परमेश्वर उदे बलिदान ला खुश था। हाबिल
 अपणी मौत ला बाद भी सांझो सिखा दा है की भरोसा कदिया होणा चाईदा। 5
 भरोसे दिया बजा ला ही परमेश्वरे हनोक नाए दे माणुए जो स्वर्गे च जिन्दा चुकी
 लिया, कने सै इस ताई मरया नी कने कुसी जो भी उदी लाश नी मिल्ली, क्योंकि
 स्वर्गे च जाणे ला पेहले हनोके परमेश्वरे जो खुश किता, जियां पबित्र शास्त्र च
 लिखया है। 6 परमेश्वरे पर भरोसा करिरी ही असां उसयो खुश करी सकदे न,
 क्योंकि परमेश्वरे बाल ओणे बाले लोकां जो पक्का भरोसा होणा चाईदा की,
 परमेश्वर है, कने सै उना जो इनाम दिन्दा है जडे उसयो जाणदे दी कोशिश करदे न।
 7 भरोसा करणे दिया बजा ला ही नूह नाए दे माणुए जो बाढ दे बारे च चेतावनी
 मिल्ली जड़ी उनी कदी नी दिखियो थी। तां परमेश्वरे दा हुकम मन्नी करी अपणे
 परिवार जो बचाणे ताई जाज बणाया, कने जिना लोकां भरोसा नी किता सै सारे
 दोषी होए कने सारे पाणिंए च डूबी करी मरी गे। क्योंकि नूहे परमेश्वरे पर भरोसा
 किता इसा बजा ला सै परमेश्वरे दिया नजरा च धर्मी बणया। 8 भरोसे दिया बजा
 ला ही अब्राहम नाए दे माणुए जो परमेश्वरे इक ऐसी जगा च जाणे ताई सदया जिसा
 जगा जो परमेश्वर बादे च उसयो विरासत च देणेबाला था। कने सै ऐ नी जाणदा था
 की कुथयो चलया है, पर फिर भी परमेश्वरे दा हुकम मन्नी करी सै उस देशे जो
 चली गया। 9 परमेश्वरे जिस जगा दा बायदा कितया था, अब्राहम उस देशे च
 परदेसियां सांई तम्बूआं च रेंदा था, उदे सोगी उदा जागत इसहाक कने पोत्रू याकूब
 भी तम्बूआं च रेंदे थे, जिना जो परमेश्वरे ला ऐई बायदा मिलया था। 10 क्योंकि सै
 स्वर्ग च इक ऐसे शेहेरे च रेणे दी उम्मीद रखदे थे, जिनी हमेशा बणी रेणा है,
 जिसयो बणाने बाला कने रचणे बाला परमेश्वर है। 11 भरोसे दिया बजा ला ही
 अब्राहम दी घरे बालिया सारा बुड़ी होई के भी गर्भ धारण किता, क्योंकि उसा जो
 भरोसा था की परमेश्वरे जडा बायदा कितया है सै उनी पूरा करणा। 12 कने इसा
 बजा ला जालू अब्राहम बड़ा बुड़ा होई गया था की मरणे ही बाला था, फिरी भी
 अम्बरे दे तारयां सांई कने समुंद्रे कंडे दे रते सांई उदे अणगिनत वंश पैदा होए। 13 ऐ
 सारे लोक जिना परमेश्वरे पर भरोसे किता, सै उना चीजां जो मिलयो बिना ही मरी
 गे, जिदा बायदा परमेश्वरे कितया था। सै उना चीजां जो दुरे ला दिखीकरी खुश
 होए, कने उना ऐ गल्ल मन्नी लेई की असां इसा धरती पर परदेसी कने अजनबी

न। 14 सै लोक जड़े ऐसा बोलदे न की असां परदेसी कने अजनबी न, सै इक ऐसे देशे दी मिलणे दी उम्मीद रखदे न जड़ा उना दा अपणा होणा। 15 अगर सै उस देशे दे बारे च सोचदे, जिथू ला सै आयो थे, तां सै मुड़ी करी जाई सकदे थे। 16 पर उना जो इक खरे देश जाणे दी इच्छा थी मतलब की स्वर्ग, इस तांई परमेश्वर उना दा परमेश्वर बोलया जाणे ला खुश था, क्योंकि उनी उना तांई इक शहर तैयार कितया है। 17 भरोसे दिया बजा ला ही अब्राहम अपने पुत्रे दी बलि चढ़ाणे तांई तैयार होई गया था, जालू परमेश्वरे उदी परिक्षा लेई। परमेश्वरे अब्राहमे ला इस पुत्रे दे बारे च बायदा कितया था की, “इसहाक ला ही तेरा बंश बदणा है।” फिरी भी सै अपने इकलोते पुत्रे जो बलि चढ़ाणे तांई तैयार था। क्योंकि उसयो पूरा भरोसा था की अगर इसहाक मरी भी जांगा तां परमेश्वर उसयो जिन्दा करी सकदा है। इस तरीके ला अब्राहमे जो उदा अपणा पुत्र इसहाक जिन्दा मिली गया था। 20 भरोसे दिया बजा ला ही इसहाके अपने दो पुत्रां मतलब की याकूबे कने एसाब जो औणे बाली जिन्दगी तांई जड़ा बायदा कितया था उदे बारे च आशीष दिती। 21 भरोसे करणे ला ही याकूबे मरदे बकत यूसुफे दे पुत्रां जो इक-इक करिरी आशीष दिती, कने अपणिया सोठिया दे सारे ला झुकी करी परमेश्वरे दी अराधना किती। 22 भरोसा करणे ला ही यूसुफ नाए दे माणुए जालू सै मरणे बाला था, तां उनी बड़े भरोसे ला इसा गल्ला जो बोलया था की इस्राएल देशे दे लोकां मिस्र देशे जो छडी करी कनान देशे जो चली जाणा। कने उनी ऐ हुकम भी दितया की जालू सै कनान देशे जो जागे तां उदियां हड्डियां जो भी कनान देशे लेई जान। 23 जालू मिस्र देशे दे राजे ऐ हुकम दिता की इस्राएलियां दे सारे जमदे जागतां जो मारी दिया, तालू भरोसा करणे ला ही मूसा दे माता-पिता उसयो पैदा होणे बाद तिन्न महीने दीकर लुकाई रख्या, क्योंकि उना दिखया की ऐ खास बच्चा है, कने सै राजे दे हुकम नी मनणे ला नी डरे। 24 मिस्र देशे दे राजे दिया कुडिया मूसे जो पालया था। कने जालू मूसा बड़ा होया तां उनी भरोसा करणे ला ही राजे दिया कुडिया दा पुत्र होणे ला मना करी दिता। 25 ऐ इस तांई होया की मूसे पाप दे थोड़े बकते दे सुखां दा आनंद लेणे दे बजाए परमेश्वरे दे लोकां सोगी दुख झेलणा जादा खरा समझया। 26 कने उनी मसीह तांई बेईजत होणा, मिस्र देशे दे धन दौलत ला भी जादा बदीकरी समझया, क्योंकि सै अपना इनाम मिलणे दा इंतजार करा दा था, जड़ा परमेश्वरे उसयो देणा था। 27 भरोसा करणे दिया बजा ला ही सै मिस्र देशे दे राजे दे गुस्से ला नी डरया

कने उनी मिस्र देश जो छडी दिता, क्योंकि सै समझी गया था कने मन्ना ऐ ऐसा था की जियां उनी परमेश्वरे जो दिखी लिया था, जिसयो कोई दिखी नी सकदा। 28 भरोसा करणे ला ही मूसे इस्राएल देशे दे लोकां दी पेहली ओलादी जो हुकम दिता की दरबाजे पर बकरे दा खूने छिड़की करी फसह दा त्योहारे मना, ताकि पैली ओलादा जो खत्म करणे बाला दूत इस्राएलियां दिया पेलिया ओलाद जो छुई ना सके। 29 भरोसा करणे ला ही इस्राएल दे लोकां लाल समुन्द्र इयां ही पार करी लिया, जियां की सै सुकियां जमिना पर चलयो न, पर जालू मिस्र देशे दे लोकां इयां करणा चाया तां सै सारे डुबी करी मरी गे क्योंकि समुन्द्र पलटी गया। 30 भरोसा करणे ला ही इस्राएल देशे दे लोकां परमेश्वरे दा हुकम मन्नी करी यरीहो शेहरे दिया कन्दा दे चारो पासे सत्तां दिनां दीकर चक्कर लांदे रे, तां सै कन्द डेई गेई। 31 भरोसा करणे ला ही रहाब वैश्या परमेश्वरे दे हुकम नी मनणे बाले लोकां सोगी खत्म नी होई, क्योंकि उना इस्राएली गुप्तचरां दा स्वागत किता था जडे यरीहो शेहर दा भेद लेणा आयो थे। 32 हुण मिजो कुछ होर बोलणे दी जरूरत नी है, क्योंकि हुण मेरे बाल बकत नी रिया की, मैं, गिदोन, बराक, शिमशोन, यिफतह, दाऊद, शमूएल, कने परमेश्वरे दे संदेश देणेबालयां दे भरोसे दे बारे च तुहांजो दस्से। 33 इना भरोसा करणे ला ही राज्य जिते; सही कम्म किते; कने इना जो बायदा कितियां चीजां मिलियां; कने शेर इना जो खाई नी सके, 34 अगग उना जो फुकी नी सकी, तलबारा दी धार उना जो मारी नी सकी, जालू इक बरी कमजोर होए तां दुबारा सै मजबूत बणे, लड़ाईया च वीर निकले, कने उना अपने दुश्मणा दी सेना जो मारी दितया। 35 कुछ जनानियां अपने मरयां लोकां जो फिरी ला जिन्दा दिखया, कितणे तां मार खांदे-खांदे मरी गे, कने अपना भरोसा नी छडया ताकि उना जो जेला ला छुटकारा मिली जा; इस ताई की उना जो मरयां चे जिन्दे होई जाणे बाद इक खरी जिन्दगी मिल्ले। 36 केईयां दा मजाक उड़ाया, केईयां जो कोडे खाणा पे, केईयां जो सुंगला ला बन्नी करी जेला च पाई दिता। 37 केईयां जो पथर मारी करी मारी दिता, कने आरे ला चिरी करी दो फाड़ करी दिते, तलबारा ने मारी दिते। सै गरीब थे, उना जो दुख दिते कने उना सोगी बुरा बर्ताब किता। कने सै भेडां बकरियां दी खली जो ओडी करी रूआं-परां भटकदे रे। 38 कने बणा, पहाड़ा, गुफां च कने धरती दी दरारां च भटकदे फिरे। संसार इना भरोसा करणे बाले लोकां दे काबिल नी था। 39 कने भरोसे दे जरिये ही इना लोकां दी परमेश्वरे

उना दी तारीफ कितियो, तमी उना जो सै चीजां नी मिलियां जिना दा परमेश्वरे उना ला बायदा कितया था। 40 क्योंकि परमेश्वरे बाल सांझो कुछ खरा देणे योजना है ताकि उना जो सिद्ध बनाई सके, पर सिर्फ साडे सोगी मिली करी ही।

12 साडे अखे-बखे इयोदे लोक बड़े भरी न, जिना दिया जिन्दगिया ला सांझो पता लगदा है की भरोसे दा क्या मतलब होंदा है। तां ओआ, असां हर इक रोकणे बाले कने उलझाणे बाले पापां जो दूर करिरी, असां उस रस्ते पर चलन जिस पर सांझो जस्स चलणा चाईदा। 2 सांझो यीशु मसीह पाससे दिखदे रेणा चाईदा, जडा सांझो अगगे बदांदा है कने साडे भरोसे जो पूरा करदा है। जिनी उसा खुशिया ताई जडी उसयो बादे च ओणे बाले बकते च मिलणी थी, बेईजती दी कोई परबाह नी करिरी सूली दे दुखे जो सेहन किता कने मरी गया; कने हुण सै परमेश्वरे दे सिंहासने दे सज्जे पासे जाई बैठया है। 3 इस ताई यीशु दे उदाहरण दे बारे च सोचा, जिनी पापियां दे दितयो बड़े बड़े दर्द जो इस ताई सेहन करी लिया ताकि तुसां हारी करी हिम्मत ना छडी देन। 4 तुसां बुराईया दियां ताकता दे खिलाफ लड़दे होऐ, तुसां हल्ले दीकर ऐसी लड़ाई नी लड़ी होणी जिसा च तुहाडी मौत होई गई हो। 5 कने तुसां उस हिम्मत दियां गल्लां जो भूली गियो न जडियां परमेश्वरे तुहांजो अपने पुत्र समझीकरी बोलियां थियां: “हे मेरे पुत्र, जालू प्रभु तिजो ऐहसास कराऐ की तू गलत कितया है तां उस पर पूरा ध्यान दिया, कने जालू प्रभु तिजो झिडकां दे तां दिखयां हिम्मत छडदा।” 6 क्योंकि प्रभु जिसला प्यार करदा, उसयो सुधारदा भी है, कने जिसयो अपना पुत्र बनाई लेदा है, उसयो कोड़े भी मारदा है। 7 जडा दुख तुसां झेला दे न उसयो परमेश्वरे दी सजा समझीकरी सेहन करी लिया। परमेश्वर तुहांजो पुत्र समझीकरी तुहाडे सोगी बताव करदा है। सै कुण दिया पुत्र है जिसयो उदा पिता सुधारदा नी है? 8 अगर परमेश्वर तुहांजो नी सुधारे जियां सै अपने पुत्रे जो सुधारदा है, तां तुसां उदे असली बच्चे नी न। 9 फिरी जालू की साडे शरीरिक पिता भी सांझो सुधारणे ताई सजा दिन्दा है, असां फिरी भी उदी सुणदे कने इज्जत करदे न, इस ताई ऐ होर भी जादा जरूरी है की जालू साडा स्वर्गे दे पिता सांझो सुधारे तां तालू असां उदी सुणन ताकि सांझो हमेशा दी जिन्दगी मिल्ले। 10 साडे शरीरिक पिता तां अपनी-अपनी समझा दे साबे ला जडा उना जो ठीक लग्गे, थोड़े रोजां ताई सांझो सुधारदे थे, पर परमेश्वर साडिया भलाईया ताई सांझो सुधारदा है, ताकि असां भी उस सांई पबित्र होई जान। 11 जिस बकत सै

सांझो सुधारदा है, उस बकत सै सुधार सांझो खरा नी लगदा है, बल्कि बड़ा बुरा लगदा है, पर जालू बादे च असां इसला सिख लेंदे न, तालू सांझो शांति मिलदी है, क्योंकि असां सही तरीके ला जिणा शुरू करी दिन्दे न। 12 इना सारियां गल्लां दिया बजा ला मजबूत बणा कने प्रोत्साहित रिया। 13 रूआं-परां दिखणे दिया बजाऐ, तुसां यीशु मसीह बाल जाणे बाले रस्ते पर जा, ताकि जड़े साड़े बिच आत्मिक रूप च कमजोर न, सै भटकी ना जान पर उना दा भरोसा मजबूत होई जाऐ। 14 सारयां सोगी मिली-जुली करी रिया, कने पबित्र जिन्दगी जिणे दी कोशिश करदे रिया। इदे बिना कोई भी प्रभु जो नी दिखी सकदा है। 15 कने ध्यान रखा की, ऐसा ना हो की कोई भी परमेश्वरे दे अनुग्रह ला छूटी जाऐ, कने तुहाड़े बिच परेशानी खड़ी करी दे। ऐसा माणु तुहाड़े चे मतयां जो बर्बाद करी सकदा है। 16 ऐसा ना हो, की कोई भी जणा व्यभिचारी, या अब्राहमे दे पोत्रू एसाब सांई अधर्मी हो। क्योंकि सै जेठा पुत्र था, पर उनी अपने पेहला पुत्र होणे दे सारे हकां जो अपने छोटे भाई याकूब जो इक बकते दिया रोटिया तांई बेची दिता। 17 तुसां जाणदे न की बादे च जालू सै अपने पिता ला आशीष पांणा चांदा था, पर उसयो ऐ नी मिली, कने रोई-रोई करी भी उनी आशीष मंगी पर उसयो अपनी गलती सुधारणे दा दुबारा मौका नी मिलया। 18 तुसां सीनै पहाड़े सांई असली पहाड़े पर नी आयो न, जिसयो छुई कने दिखी सकदे न। ऐथू कोई भखदी अगग या काले बदल या तूफान नी है, कने लोक इक ऐसिया ही जगा च थे जालू परमेश्वरे उना जो अपनी व्यवस्था दिती। 19 कने ना ही तुरही दिया अबाजा कने बोलणे बाले दे बखे नी आयो न, जिसयो सुणने बालयां विनती किती की हुण साड़े ला जादा गल्लां मत करा। 20 उना ऐसा इस तांई बोलया क्योंकि सै उस हुकमे जो सेहन नी करी सके जड़ा परमेश्वरे बोलया, “अगर कोई जानवर भी उस पहाड़े जो छुंगा तां उसयो पत्थर मारा।” 21 कने सै दर्शन इतणा डरावणा था, की मूसे भी बोलया, “मैं बड़ा डरा दा कने कमा दा है।” 22 पर तुसां सियोन पहाड़े पर आई गियो न जड़ा जिन्दे परमेश्वरे दा स्वर्गीय यरूशलेम शहर है, जिथू लखां स्वर्गदूत त्योहारे कने खुशिया मनादे न। 23 तुसां परमेश्वरे दे पहिलौठां दिया सभा च आयो न, जिना दे ना स्वर्ग च लिखयो न। तुसां अपु परमेश्वरे बाल आयो न जड़ा सारियां चीजां दा न्याय करणे बाला है, सै स्वर्ग च उना धर्मी लोकां दियां आत्मा न जिना जो हुण सिद्ध बणाया है। 24 तुसां यीशु मसीह बाल आयो न जड़ा लोकां कने परमेश्वरे बिच नोई

बाचा दा बिचोलिया है। कने छिड़कयो खूने बाल आयो न, जड़ा हाबिले दे खूने सांई न्याय तांई बिनती करणे दे बजाए पापां दी माफी दी गल्ल करदा है। 25 ध्यान रखा कने उस परमेश्वरे दी मन्ना जड़ा तुहाड़े ने गल्ला करा दा है, क्योंकि इस्राएल दे लोक परमेश्वरे दिया सजा ला नी बची सके जालू उना मूसा दी गल्ल नी मन्नी, इस तांई साड़े तांई होर भी जादा बुरा होणा अगर असां परमेश्वरे दिया गल्लां जो सुणने ला मना करी दिगे जड़ा स्वर्गे ला चेतावनी दिन्दा है। 26 जालू परमेश्वरे सीनै पहाड़े पर खड़ोई करी बोलया तां उदिया अबाजा ला धरती हिली पेई थी, पर हुण उनी ऐ बायदा कितया है की, “मैं इक बरी फिरी सिर्फ धरती जो नी, पर अम्बरे जो भी हिलाई देणा है।” 27 कने ऐ गल्ल इक बरी फिरी इसा गल्लां जो दसदी है, की सारियां बणाईयां चीजां हिलाईयां कने हटाई जाणियां न, ताकि सै चीजां जड़ियां हिलाई नी जान्दियां न सै टिकी रेन। 28 इस तांई सांझो जड़ा राज्य मिलया सै हिलाया नी जाई सकदा, इसा गल्ला तांई सांझो परमेश्वरे दा धन्यवाद करणा चाईदा। कने इज्जत कने डरे सोगी, परमेश्वरे दी ऐसी अराधना करन, जिसला सै खुश होंदा। 29 क्योंकि जियां अग्न भस्म करदी है, तियां ही साड़ा परमेश्वर अपने दुश्मणा जो खत्म करदा है।

13 इक दुज्जे सोगी अपना भाई कने बेहण समझीकरी प्यार करा। 2 अजनबी लोकां दी भी इज्जत कने खातिरदारी करदे रिया, क्योंकि ऐसा करणे ला केईयां लोकां अनजाणे च स्वर्गदूतां दी इज्जत कने खातिरदारी कितियो है। 3 कैदियां दा इयां हाल चाल पुछदे रिया, जियां मन्ना तुसां भी उना सोगी जेला च न, कने जड़े दुख सेहन करा दे न, उना दा भी ऐ समझीकरी हाल चाल पुच्छदे रिया, जियां तुसां भी उना सोगी उना दे दुखे च शामिल न। 4 बियाये दा रिश्ता सारयां तांई आदरनीय हो, कने लाड़ा-लाडी इक दुज्जे सोगी बफादार रिया। क्योंकि परमेश्वरे व्यभिचारियां कने नाजायज रिश्ते रखणे बालयां दा न्याय करणा है। 5 अपणिया जिन्दगिया जो पैसयां दे लालचे ला दूर रखा, कने जड़ा तुहाड़े बाल हो तुसां उसी च ही खुश रिया; क्योंकि परमेश्वरे अपु ही बोलया है, “मैं तिजो कदी भी नी छडगा कने ना ही कदी त्यागणा है।” 6 इस तांई असां बिना डरयो बोलदे न, “प्रभु, मेरी सहायता करदा है, मैं नी डरणा; माणु मेरा क्या बगाड़ी सकदा है।” 7 जड़े तुहाड़े अगुवे न, कने जिना तुहांजो परमेश्वरे दा बचन सुणाया है, उना जो याद रखा; कने ध्याने ने उना दिया जिन्दगिया जो दिखा की, कियां उना अपनी जिन्दगी

जी कने मरणे दीकर भरोसे च बफादार रे, तियां ही तुसां भी परमेश्वरे पर भरोसा दस्सा जियां उना दसया था। 8 यीशु मसीह कल कने अज कने यूगां-यूगां दीकर इकोदिया है, क्योंकि यीशु मसीह कदी नी बदलदा। (aiōn g165) 9 इस ताई सांझो इना सारियां नोईयां कने लग-लग शिक्षां जो नी मनणा चाईदा, जडियां तुहांजो गलत रस्ते पर लेई जान्दियां न। तुहाड़े मना ताई ऐ ही खरा है की सै अनुग्रह दे जरिये पक्के बणन, ना की उना खाणे बालियां चीजा दे रिबाजां जो मनणे ला, क्योंकि इना गल्लां जो मनणे ला उना दा कोई फायदा नी है जडे इना गल्लां जो मंदे थे। 10 साडे बाल इक ऐसी वेदी है, जिसा चे मिलाप दे तम्बूए दे याजकां जो खाणे दा कोई हक नी है। 11 क्योंकि पैली बाचा अनुसार हर साल महायाजक जिना जानवरां दा खून पापां दी माफी ताई परम पबित्र जगा पर लेई जांदा था, उना दे शरीरां जो जिथू सै रेदे ओथु ला बार लेईजाई करी फूकदे न। 12 इसी बजा ला, यीशुए भी लोकां जो अपणे ही खूने ला पबित्र करणे ताई यरूशलेम शेहर ला बाहर दुख झेले कने मरी गया। 13 इस ताई ओआ, असां यहूदी रीतियां जो छडी करी, छावनी दे बार जान, कने यीशु मसीह पर भरोसा करदे होऐ जियां यीशुए बेईजती सेहन किती, तियां ही असां भी बेईजती सेहन करन। 14 क्योंकि इसा धरती पर साडे बाल हमेशा रेणे ताई कोई घर नी है, बल्कि असां तां उस स्वर्गे दे घरे दा इंतजार करा दे न जड़ा हमेशा ताई है। 15 इस ताई असां यीशुए जरिये लगातार अपणे ओठां ला परमेश्वरे दा गुणगान करन। ऐई उदे ताई साड़ा बलिदान है। 16 पर भलाई करणा कने जरूरतमंद लोकां दी सहायता करणा कदी मत भुलदे; क्योंकि परमेश्वर ऐसे बलिदाना ला खुश होंदा है। 17 अपणे अगुवां दा हुकम मन्ना, कने उना दे अधीन रिया, क्योंकि तुहाडियां आत्मा दी रखबाली करणा उना दा कम्म है, उना जो तुहाड़े बारे च परमेश्वरे जो लेखा देणा पौणां है। तुसां उना दी मन्ना ताकि सै इस कम्मे जो खुशिया ला करन, ना की दुखी होईकरी, क्योंकि दुखी होईकरी सेबा करणे दा कोई फायदा नी होणा। 18 साडे ताई प्राथना करदे रिया; क्योंकि सांझो इसा गल्ला दा पक्का पता है, की साडी अंतरात्मा शुद्ध है, कने असां हर बकत खरा ही करणा चांदे न जिदे जरिये परमेश्वरे जो इज्जत मिल्ले। 19 तुहाड़े ला मेरी ऐ खास बिनती है की प्रार्थना करा की मै तुहांजो ला मिलणा तोली आई सकें। 20 कने हुण परमेश्वर जड़ा तुहांजो शांति दिन्दा है, कने जिनी साडे प्रभु यीशु जो मरयां चे जिन्दा किता, सै तुहांजो सारियां चीजां दे जिना दी

जस्सुरत तुहांजो उदी इच्छा जो पूरा करणे ताई है। कने यीशु मसीह दिया शक्तिया जरिये सै तुहांजो हर इक खरिया गल्ला जो सिद्ध करे जडियां उसयो खुश करदियां न। यीशु मसीह सनातन बाचा दे जरिये भेडां दा महान पुहाल बणया, जिस पर उदे खूने ला हस्ताक्षर कितया है। उदी महिमा हमेशा होंदी रे। आमीन। (aiōn g165, aiōnios g166) 22 हे मसीह भाईयो, मैं तुहाडे ला विनती करदा है, इस चिठिया दियां गल्लां जो सबर रखीकरी सुणी लिया, ऐ मैं तुहांजो होंसला देणे ताई लिखियां न। मैं इसा चिठिया च बडियां जादा गल्लां नी लिखियां न। 23 तुसां ऐ जाणी लिया की तीमुथियुस साडा मसीह भाई जेला ला छुटी गया है, कने अगर सै तौली मेरे बाल आई गया तां मैं उदे सोगी तुहांजो ने मिलगा। 24 अपने सारे अगुवां जो कने परमेश्वरे दे सारयां लोकां जो नमस्कार बोला। इतालिया प्रदेशे दे भरोसा करणे बाले मसीह भाई कने बेहणा तुहांजो नमस्कार बोलदे न। 25 मैं प्रार्थना करदा है की, परमेश्वर दा अनुग्रह तुसां सारयां पर होंदा रे। आमीन।

याकूब

1 मैं, याकूब इसा चिठिया जो लिखा दा है, मैं परमेश्वर दा कने प्रभु यीशु मसीह दा सेवक है। मैं ऐ चिट्ठी इस्राएल दे लोकां जो लिखा दा है, जड़े बाहरां गोत्रों चे न कने दुनिया भर रूआं परां बिखरयो न, कने उना जो नमस्कार बोलदा है। **2** हे मेरे मसीह भाईयो, जालू तुहांजो पर लग-लग तरा दियां परेशानिया ओन, तां इसयो पूरी खुशिया दी गल्ल समझनयो, **3** क्योंकि तुसां जाणदे ही न, की तुहाड़े भरोसे जो परखे जाणे ला होर जादा सबर बददा है। **4** परमेश्वरे पर भरोसा करिरी सबर ला परेशानिया दा सामणा करदे रिया, ताकि तुसां आत्मिक स्पे ला पूरे समझदार कने सिद्ध होई जान कने तुहाड़े च कुसा भी गल्ला दी कमी ना रे। **5** पर अगर तुसां चे कुसयो भी अकला दी कमी है, तां परमेश्वरे ला मंगा, जड़ा बिना दोष दितयो सबना जो प्यारे ला दिन्दा है; कने परमेश्वरे तुहांजो भी देणा है। **6** जालू तुसां परमेश्वरे ला मंगगे, तां पूरा भरोसा करिके मंगनयो कने परमेश्वरे पर कोई भी शक मत करदे, क्योंकि शक करणे बाले समुन्द्रे दियां लैहरां सांई बदलदे रेंदे न, जड़ियां होआ ने चलदियां कने उटकदियां न। **7** ऐसा माणु ऐ आस बिलकुल छडी दे, की उसयो प्रभु ला कुछ मिलगा, क्योंकि इदा मन घड़ी-घड़ी बदलुन्दा रेंदा कने लोक इस पर भरोसा नी करी सकदे। **9** जड़े विश्वासी भाई गरीब न, उना जो खुश होणा चाईदा की परमेश्वरे उसयो कदेई इज्जत दिती। **10** जड़े विश्वासी भाई अमीर न, उसयो खुश होणा चाईदा, की परमेश्वरे उसयो दीन किता, क्योंकि उदी अमीरी नाश होणे बाले जंगली घाए सांई है दे फुलां सांई झड़ी करी खत्म होई जांदी है। **11** क्योंकि सूरज निकलदे ही ज़ोरे दी धुप पौंदी कने सारा घा सुकी जांदा है, कने उसा दे सारे फुल झड़ी जांदे न, कने उना दी शोभा मुकी जांदी है; तियां ही अमीर विश्वासिये भी मरी जाणा अगर सै अपने ही कम्मा च लग्गी रेंगा। **12** धन्य है सै माणु, जड़ा परख च टिकी रेंदा है, क्योंकि जालू सै परख च खरा निकली जांदा है, तां उसयो अनन्त जिंदगी दा सै मुकुट मिलणा जिसदा बायदा परमेश्वरे अपने प्यार करणे बालयां तांई कितया है। **13** जालू कुसी दी परख हो, तां सै ऐ ना समझे, की मेरी परख परमेश्वरे करा दा है, क्योंकि ना तां बुरियां गल्लां ने परमेश्वरे दी परख होई सकदी है, कने ना ही परमेश्वर कुसी दी परख अपु लेंदा है। **14** पर हर माणु अपणियां ही बुरिया इच्छा च फसी करी परख च पौंदा है, जियां इक डंगर खांणे दे लालचे आई करी फाईया च फसी जांदा है। **15** फिरी सै बुरी इच्छा गर्भवती होई

के पापे जो जन्म दिन्दी है, कने जालू पाप बदी जांदा है, तां सै हमेशा दी मौत दा रस्ता है। 16 मेरे प्यारे मसीह भाईयो, धोखा च मत रिया। 17 क्योंकि हर इक खरा वरदान कने हर इक खरा दान स्वर्गे ला ही है, कने ज्योतियाँ दे पिता ला ही मिलदा है, सै हमेशा इकोदिया रेंदा कने ना ही छाया पौंदी है। 18 उनी अपणी ही इच्छा ने सांझो सच्चे बचना ने नोई जिन्दगी दितियो है, ताकि असां उदी बणाईयो दुनिया दे सारयां ला जरूरी हिस्सा बणन। 19 हे प्यारे मसीह भाईयो, ऐ गल्ल तुसां जाणी लिया हर इक माणु सुणने तांई हमेशा तैयार कने बल्ले बोलणे बाला कने घट गुस्से बाला हो। 20 क्योंकि जालू माणु गुस्सा करदा है तां, सै धार्मिक जिन्दगी नी जी सकदा, जड़ा परमेश्वरे जो खुश करदा है। 21 इस तांई मने दी सारी मेला जो कने दुशमणिया जो मुकाई करी परमेश्वरे दे बचने जो प्यारे ने अपनाई लिया, जड़ा तुहाड़े दिले च रखया है, कने जड़ा तुहाड़े प्राणा दा उद्धार करी सकदा है। 22 पर परमेश्वरे दे बचना दी शिक्षा दा पालन करणे बाला बणा, ना की सिर्फ सुणणे बाले, जड़े अपने आपे जो धोखा दिन्दे न। 23 क्योंकि अगर कोई बचन दी शिक्षा जो सिर्फ सुणनेबाला है, पर मनदा नी है, तां सै उस माणुए सांई है, जड़ा अपना मुं शीशे च दिखदा है। 24 इस तांई की सै अपने आपे जो दिखीकरी चली जांदा है, कने झट भूली जांदा है, की मैं कदिया था। 25 पर जड़ा माणु परमेश्वरे दी पूरी व्यवस्था दा ध्याने ने अध्ययन करदा है, जड़ी लोकां जो पापां ला अजाद करदी है, सै इसयो सुणी के भुलदा नी है, पर इसदी शिक्षा दा पालन करदा है, उसयो अपने कम्मा पर परमेश्वरे ला आशीष मिलणी। 26 अगर कोई अपने आपे जो भक्त समझे, कने बुरियां गल्लां बोलणे च काबू नी रखे, तां सै अपने आपे जो धोखा दिन्दा है कने उदी भक्ति बेकार है। 27 सांझे पिता परमेश्वर दिया नजरा च शुद्ध कने सच्ची भक्ति ऐ है, की अनाथां कने विधवां दे दुखां च उना दा हाल चाल पुच्छन, कने अपने आपे जो संसारे दे बुरे कम्मा ला बचाई रखा।

2 हे मेरे प्यारे मसीह भाईयो, तुसां सांझे महिमामय प्रभु यीशु मसीह दे चले न, इस तांई तुसां च भेदभाव ना हो। 2 मन्नी लिया, अगर इक माणु सोने दे छल्ले कने छेल कपड़े पाई करी तुहाड़िया कलीसिया च ओए कने इक गरीब माणु मैले कपड़े पाई करी ओए। 3 कने तुसां उस छेल कपड़े बालयो बड़िया इज्जता ला बोलन, की तू ओथु खरिया दिया जगा च बैठ, कने तू उस गरीबे जो बोले, तू ऐथू खडोई रे, “या मेरे पैरां बाल बैठ।” 4 तां क्या तुसां इना दोनों च भेदभाव नी किता कने

तुसां बुरे बिचारे ला न्याय करणे बाले नी बणी गे? 5 हे मेरे प्यारे मसीह भाईयो सुंणा; इसा गल्ला पर ध्यान दिया, क्या परमेश्वरे इस संसारे दिया नजरा च गरीब लोकां जो भरोसे च अमीर होणे ताई नी चुणयां? परमेश्वरे उना जो स्वर्ग राज्य च वारिस बणने दा भी वायदा कितया है जड़े उसयो प्यार करदे न। 6 पर तुसां उस गरीबे दी बेसती किती। तुसां जाणदे न अमीर लोक तुसां पर जुल्म करदे न कने सै तुहांजो कचेरिया च घसीटी-घसीटी के लेई जांदे न। 7 सै सेई न जड़े यीशु मसीह दे आदर योग्य नाए दे खिलाफ बुरियां गल्लां करदे न, जिना सोगी तुसां रिश्ता रखदे न। 8 अगर तुसां पबित्र शास्त्रे दे इस बचने दे अनुसार की “तू अपने पड़ोसियां सोगी अपने सांई प्यार कर,” सच्ची उस राज्य दी व्यवस्था जो पूरा करदे न तां खरा करदे न। 9 पर अगर तुसां भेदभाव करदे न, तां पाप करदे न; कने व्यवस्था दे अनुसार तुसां दोषी न। 10 क्योंकि जड़ा कोई सारी व्यवस्था दा पालन करदा है, पर उदे इक हुकम जो तोड़दा है, तां सै भी उसी सांई दोषी है जिनी सारिया व्यवस्था दा पालन नी किता। 11 इस ताई परमेश्वरे ऐ बोलया, तू व्यभिचार मत करदा, उनी ही ऐ भी बोलया की, “तू हत्या मत करदा” इस ताई अगर तू व्यभिचार नी किता, पर हत्या कितियो है, तां तू व्यवस्था दे अनुसार दोषी है। 12 इस ताई तुहाडा बचन बोलणा कने उना जो मनणा, उना लोकां सांई होऐ, जिना दा न्याय उसा व्यवस्था दे अनुसार होणा है, जड़ी सांझो अजाद करदी है। 13 क्योंकि जड़ा कोई दुज्जयां पर दया नी करगा, तां परमेश्वरे भी उस पर दया नी करणी। पर जड़ा कोई दुज्जयां पर दया करगा, तां परमेश्वरे भी उस पर दया करणी, जालू उनी न्याय करणा। 14 हे मेरे प्यारे मसीह भाईयो, अगर कोई बोले की मिंजो यीशु मसीह पर भरोसा है, पर सै दुज्जयां ताई भले कम्म नी करदा हो, तां इसला क्या फायदा? क्या ऐसा भरोसा उदा उद्धार करी सकदा है? 15 अगर कुसी मसीह भाई या बेहणा बाल जरूरी कपड़े ना होन, कने उना जो खाणे जो घट मिलदा हो, 16 कने तुसां चे कोई उना जो बोले कि, “प्रभु तुहांजो आशीष दे कने तुहांजो गर्म रखे कने खाणे जो रोटी दे,” पर जड़ियां चीजां साडे शरीर ताई जरूरी न, अगर सै उना जो ना देन, तां इसला उदा कोई फायदा नी होणा। 17 तियां ही भरोसा भी, अगर भले कम्मा सोगी नी हो तां उदा भरोसा बेकार है। 18 “कोई बोलदा है की मैं यीशु मसीह पर भरोसा करदा है, कने दुज्जा माणु बोलदा है की मैं भले कम्म करदा है।” पर मैं बोलदा है, “क्या तुसां बिना भले कम्म करिरी मिंजो ऐ साबित करी सकदे न की तुसां यीशु मसीह

पर भरोसा करदे न? मैं अपने भले कम्मा करणे दे जरिये ऐ साबित करी सकदा है की मैं यीशु मसीह पर भरोसा करदा है।” 19 तिजो भरोसा है, की इक ही परमेश्वर है; ऐ अच्छी गल्ल है: बुरियां आत्मा भी भरोसा रखदियां न, कने डरदियां न। 20 पर मुख माणु क्या तू ऐ भी नी जाणदा, की भले कम्म बिना भरोसा बेकार है? 21 जालू साडे पूर्वज अब्राहमे अपने पुत्र इसहाक दी बलि वेदिया पर चढाई, तां उनी जडा भला कम्म किता, उसला ही सै परमेश्वरे दे सामणे धर्मी बणया था। 22 तू दिखी लिया की भरोसे उदे कम्मा सोगी मिली के प्रभाव पाया है, कने उदे कम्मा दे जरिये उदा भरोसा पूरा होया। 23 कने पबित्र शास्त्रे दा ऐ बचन सच्च होया, अब्राहमे परमेश्वरे पर भरोसा किता, कने उदे भरोसे दिया बजा ला उसयो धर्मी माणु मनया, कने उसयो परमेश्वरे दा मित्र बोलया गया। 24 तां तुसां दिखी लिया की माणु सिर्फ भरोसे ला ही नी पर भले कम्मा दिया बजा ला इक माणु धर्मी बणदा है। 25 तियां ही रहाब वैश्या भी, जालू उना संदेश देणेबाले दूतां जो अपने घरे रेणे दी जगा दिती कने दुज्जे रस्ते ला विदा किता, तां सै भी अपने इस भले कम्मे दिया बजा ला धर्मी मन्नी गई। 26 जियां साडा शरीर बिना सां दे मरया होया है, तियां ही भरोसा भी भले कम्मा दे बिना बेकार है।

3 हे मेरे मसीह भाईयो, तुहाडे चे कलीसिया दे मते गुरु मत बणदे, क्योंकि तुसां जाणदे न, की असां गुरुआं दा न्याय होर भी जादा सकतिया ला होणा है। 2 असां सारे बड़ी बरी गलतियां करी दिन्दे न; पर अगर कोई माणु जडा कुछ सै बोलदा है, उस च कोई गलती ना करे, तां सेई सिद्ध माणु है, कने अपने आपे जो पूरी तरहा बशे च रखी सकदा है। 3 अगर असां घोडयां जो अपने वशे च करणे ताई उना दे मुंऐ च लगाम लांदे न, तां असां उना दे सारे शरीर जो कुसी भी पासे घुमाई सकदे न। 4 दिखा, जाज भी कितणे बड़े होंदे न, कने तेज होआ ने चलाऐ जांदे न, तमी इक छोटी दिया पतवारा ने मौंझी अपणिया मरजिया ला मोड़ी दिंदा है। 5 तियां ही जीभ भी साडे शरीर दा इक छोटा दिया अंग है, कने बडियां-बडियां गल्लां करदी है: दिखा कियां, इक छोटी देई चिंगारी कितणे बड़े बणे च अग्न लगाई सकदी है। 6 ऐ छोटी जीभ भी इक चिंगारी सांई है; ऐ शरीर दा सबते बुरा हिस्सा है, जडा इक माणुऐ दी सारी जिन्दगी जो नरके दी अग्नी च नाश करी दिन्दी है। (Geenna g1067) 7 हर तरा दे बणे दे जानवर, पंछी, कने रेंगणेबाले जानवर कने पांणिए च रेहणे बाले तां माणुऐ दे वशे च होई सकदे न, कने होई भी गियो न। 8 पर जीभा जो

कोई भी माणु वशे च नी करी सकदा; सै इक ऐसी बला है, जड़ी कदी भी स्कदी ही नी है; कने जहरिले सांपे सांई खतरनाख है। 9 इसा जीभा ला ही असां प्रभु यीशु कने पिता परमेश्वर दी स्तुति करदे न, कने इसा जीभा ला ही माणुआं जो श्राप दिन्दे न, जिना जो परमेश्वरे अपने स्वरूप च बणाया है। 10 इक ही मुंऐ ला श्राप कने धन्याबाद दोनो निकलदे न। हे मेरे मसीह भाईयो, ऐसा नी होणा चाईदा। 11 पांणिए दे इकी ही खुऐ ला कोड़ा कने मिठा पाणी दोनो सोगी कदी नी निकली सकदे। 12 हे मेरे मसीह भाईयो, इयां ही अंजरी दे रखे च जैतून, या दाखा दिया बेला च अंजीर कदी नी लगी सकदे। इयां ही पांणिए दे इकी ही खुऐ ला कोड़ा कने मिठा पाणी दोनो सोगी कदी नी निकली सकदे। 13 तुसां च ज्ञान बाला कने समझदार कुण है? अगर तुसां हेन, तां तुहांजो इसयो अच्छी जिन्दगी जी करी साबित करणा चाईदा कने शांत सभाव जडा तुहाडे ज्ञान ला ओदा है, अपने भले कम्मा दे जरिये साबित करणा चाईदा। 14 अगर तुसां अपने मने च कड़वाट, जलन कने मतलबीपन रखदे न, तां इदा घमंड मत करदे, कने ना ही सच्च दे खिलाफ कोई झूठ बोलनयो। 15 ऐ ज्ञान सै नी है, जडा स्वर्गे ला मिलदा है, ऐ तां शारीरिक, संसारिक, कने शैतानी है। 16 क्योंकि जिथू जलन कने मतलबी हुंदा है, ओथु बखेडा कने हर तरा दे बुरे कम्म भी होंदे न। 17 पर जडा ज्ञान स्वर्गे ला मिलदा है, सै पेहले तां पबित्र होंदा है, फिरी मिलनसार, कोमल, कने प्यारभाव, दया ला भस्या, खरे कम्मा ला लदुया कने बिना कुसी भेदभाव कने बिना कुसी कपट दे होंदा है। 18 कने जडे मेल मिलाप करणे बाले न, उना शान्ति दा बी राणा कने धार्मिकता दा फसल बडणी।

4 तुसां च ऐ लडाई कने झगडे कुथु ला ओदे न; ऐ उना इच्छा ला ओदे न जडियां तुहाडे अंदर लडदियां न। 2 तुसां कुछ चांदे न, पर जालू तुसां जो सै मिलदा नी है; इस तांई तुसां हत्या करणे तांई तैयार होई जांदे न, की तुहांजो सै मिली जाए, पर कुछ हासिल नी हुंदा तांई तां तुसां लडदे झगडदे न, तुहांजो इस तांई कुछ नी मिलदा क्योंकि तुसां परमेश्वरे ला कुछ नी मंगदे न। 3 तुसां मंगदे न फिरी भी तुहांजो नी मिलदा, क्योंकि तुसां बुरिया इच्छा ला मंगदे न, ताकि अपने बुरे कम्मा च उडाई दे। 4 हे व्यभिचारियों सांई वेविश्वासी लोको, क्या तुसां नी जाणदे, कि संसारे दियां चीजां ला मित्रता करणे दा मतलब परमेश्वरे ला बैर करणा है, जडा संसारे दा मित्र बणना चांदा है, सै अपने आपे जो परमेश्वरे दा बैरी बणाई लेंदा है। 5

क्या तुसां ऐ समझदे न, की पबित्र शास्त्र च जड़ा लिखया है सै बेकार है, “जिसा पबित्र आत्मा जो उनी साड़े अंदर बसाया है, सै ऐ चांदा है की असां परमेश्वरे दी ही अराधना करन।” 6 पर परमेश्वर सांझो होर भी जादा अनुग्रह दिन्दा है ताकि असां बुरियां इच्छां दे खिलाफ खड़े होई सकन, इस बजा ला पबित्र शास्त्र च ऐ भी लिखया है कि, “परमेश्वर घमंडियां दा बिरोध करदा है, पर दीन लोकां पर अनुग्रह करदा है।” 7 इस ताई परमेश्वरे दे अधीन होई जा; कने उना कम्मा जो करणे ला मना करा जड़ा कि शैतान चांदा है की तुसां करा, तालू उनी तुहाड़े सामणे ला नसी जाणा। 8 परमेश्वरे दे नेड़े ओआ, तां उनी भी तुहाड़े नेड़े ओणा, ओ पापियो, अपणे मना जो शुद्ध करा। लगातार सोच बदलने बाले लोको, अपणे दिले जो पबित्र करा। 9 अपणे पापां दिया बजा ला दुखी होआ, शोक करा, कने रोआ: तुहाड़ी हंसी रोणे च कने खुशी उदासिया च बदली जा। 10 प्रभुऐ दे सामणे दीन बणा, तां उनी तुहांजो उच्चा उठाणा। 11 हे मसीह भाईयो, इक दुज्जे दी निंदा मत करा, जड़ा अपणे भाईयां दी निंदा करदा है, या भाई पर दोष लांदा है, तां सै व्यवस्था दी निंदा करदा है, कने व्यवस्था पर दोष लांदा है, तां तू व्यवस्था पर चलणे बाला नी, पर उस पर न्याय करणे बाला होया। 12 परमेश्वर ही है जड़ा व्यवस्था देणेबाला कने न्याय करणे बाला है सै नाश करणे बाला कने बचाणे बाला है; तुसां कुण होंदे न, जड़े अपणे पड़ोसिए पर दोष लांदे न? 13 तुसां जड़ा ऐ बोलदे न, “अज या कल असां दुज्जे शेहरे च जाईके इक साल ओथु रेंगे, कने व्यापार करिरी फायदा करगे।” 14 पर ऐ नी जाणदे न की कल क्या होणा है। तुसां सुणा! की तुहाड़ी जिन्दगी हे ही क्या? तुसां तां मन्ना की धुंधा साई न, जड़ी थोड़ी देर मिलदी है, फिरी उड़ी जांदी है। 15 इस ताई तुहांजो ऐ बोलणा चाईदा, “अगर प्रभु दी मजीं होंगी, तां असां जींदे रेणा है, कने ऐ या सै कम्म भी करगे।” 16 पर हुण तुसां अपणी बडियां-बडियां योजना पर घमंड करदे न; ऐसा सारा घमंड बुरा होदा है। 17 इस ताई जड़ा कोई भलाई करणा जाणदा है कने नी करदा, उदे ताई ऐ पाप है।

5 हे अमीरों, सुणा; तुसां लोकां जो रोणा कने जोरे-जोरे ला चिलाणा चाईदा, क्योंकि मुसीबतां तुहाड़े पर ओणे बालियां न। 2 तुहाड़ी धन दौलत नाश होई जाणी कने तुहाड़े कपड़यां जो कीड़े लगी गिया है। 3 तुहाड़ा सोना चांदी बेकार होई गिया है; जिस धन दौलत पर तुसां भरोसा करदे न उनी तुहांजो अग्गी साईं फुकी देणा: तुहाड़ा गठेरया धन दौलत न्याय दे दिने तुहाड़े खिलाफ सबूत दे रूपे च खड़ा

होई जाणा। 4 दिखा, जिना मजदुरां तुहाडे खेतर बड्डे, उना दी मजदूरी जडी तुसां
 उना जो नी दिती, उना दी नी दीतियो मजदूरी परमेश्वरे दे सामणे तुहाडे खिलाफ
 चिलाई-चिलाई करी गबाई दे दी है, कने मजदूरां दी दुहाई स्वर्गीय सेना दे प्रभुऐ
 सुणी लेई है। 5 तुसां धरतिया पर भोग-विलास करणा लगी रे, कने बडा भरी सुख
 भोगया; तुसां तां उस जानवरे सांई होई गे, जिसयो मारणे ला पेहले खुआई पियाई
 करी मोटा करदे न, इयां ही तुसां भी नी जाणदे न, की तुसां नाश होआ दे न। 6
 तुसां भोले लोकां जो दोषी बोली करी मारी दिता, कने सै तुहाडे खिलाफ लडी ही
 नी सके। 7 इस तांई हे मसीह भाईयो, प्रभुऐ दे ओणे दीकर सबर रखा, जियां
 किसान धरतिया दे किमती फसल दी आस रखीकरी पैली कने आखरी बरखा होणे
 दीकर सबर रखदा है। 8 इयां ही तुसां भी सबर रखा, कने आस मत छडा, क्योंकि
 प्रभु ओणे बाला है। 9 हे मसीह भाईयो, इक दुज्जे पर दोष मत ला, ताकि तुहाडे
 पर भी दोष ना लग्गे, दिखा, न्याय करणे बाला ओणे तांई तैयार है। 10 हे मसीह
 भाईयो, जिना परमेश्वरे दे संदेश देणेबालयां प्रभु दे नां ला गल्लां कितियां न, उना
 जो दुख झेलणे कने सबर रखणे दा इक आदर्श समझा। 11 दिखा, असां धीरज
 रखणे बालयां जो धन्य बोलदे न। तुसां प्रभु दे सेवक अय्यूब दे सबर दे बारे च
 सुणया ही है, कने तुसां ऐ भी जाणदे न की प्रभुऐ आखरी च उदी कियां सहायता
 किती, उसला प्रभु दी बडी कसणा कने दया प्रगट होदी है। 12 पर हे मेरे मसीह
 भाईयो, सारयां ला बडी गल्ल ऐ है, कदी भी कसम मत खांदे, ना ही स्वर्गे दी, ना
 ही धरतिया दी, ना ही कुसी होर चीजा दी, पर तुहाडी गल्ल हां दी हां, कने ना दी
 ना हो, ताकि तुहांजो परमेश्वरे ला सजा ना मिल्ले। 13 अगर तुहाडे च कोई दुखी
 हो तां सै प्राथना करे, अगर कोई खुश हो तां सै स्तुति दे भजन गाऐ। 14 अगर तुसां
 चे कोई रोगी हो, तां सै कलीसिया दे अगुवां जो सदे, कने सै प्रभु दे नाऐ ला उस पर
 तेल मली करी उदे तांई प्राथना करा। 15 कने भरोसे दिया प्राथना ला मरीजे दे सारे
 रोग दूर होई जाणे, कने प्रभुऐ उसयो ठीक करी देणा; अगर उनी पाप भी कितयो
 होंगे, तमी परमेश्वरे उसयो माफ करी देणा। 16 इस तांई तुसां अपु चे इक दुज्जे दे
 सामणे अपणे-अपणे पापां जो मनी लिया; कने इक दुज्जे तांई प्राथना करा, जिसला
 तुसां ठीक होई जान; इक धर्मी जणे दी प्राथना बडी सामर्थी है कने अदभुत नतीजे
 निकलदे न। 17 परमेश्वरे दा संदेश देणेबाला एलिय्याह भी तां साडे सांई दुख-सुख
 भोगी माणु था; कने उनी पुरे दिले ला गिडगिडाई करी प्राथना किती, की बरखा ना

हो, कने साडे तिन्ना सालां दीकर धरती पर बरखा नी होई। 18 फिरी उनी प्राथना किती, तां अम्बरे ला बरखा होई, कने धरती हरी बरी होई। 19 हे मेरे मसीह भाईयो, अगर तुसां चे कोई परमेस्वरे दे सच्च दे रस्ते ला भटकी जा, कने कोई तुसां चे उसयो बापस फेरी लेई ओऐ। 20 तां तुसां समझी लिया, जडा कोई परमेस्वरे दी सच्ची शिक्षा ला भटकयो पापिये जो बापस लेई ओगा, उनी इक आदमिये दे प्राणा जो मौत ला बचाणा है, कने परमेस्वरे उदे केई पापां जो माफ करी देणा।

1 पतरस

1 मैं, पतरस जडा यीशु मसीह दा प्रेरित है, ऐ चिट्ठी मेरिया तरफा ला है। मैं ऐ चिट्ठी परमेश्वरे दे चुणयो लोकां जो लिखा दा है जडे पुन्तुस, गलातिया, कप्पदूकिया, आसिया, कने बितूनिया प्रदेशां दे लग-लग शेहरां च परदेसियां सांई रेंदे न। **2** कने पिता परमेश्वरे बडे पेहले ही तुहांजो अपणे लोक होंणे तांई कने पबित्र आत्मा दे कम्मे दे जरिये तुहांजो चुणी लिया है। उनी ऐसा इस तांई किता ताकि तुसां यीशु मसीह दे हुकमा जो मनन कने उदे खूने ला शुद्ध होई सकन। मैं प्रार्थना करदा है की परमेश्वर तुसां जो अनुग्रह कने शांति दिन्दा रे। **3** साडे प्रभु यीशु मसीह दे पिता कने परमेश्वरे दा धन्यवाद हो। परमेश्वरे सांझो अपणी दया ला इक नोई जिन्दगी दिती है, क्योंकि परमेश्वरे यीशु मसीह जो मरयां चे जिन्दा करिरी सांझो बडे आत्मविश्वास सोगी जिणे दे काबिल बणाया है; मतलब की असां उना चीजां जो मिलणे दी उम्मीद करी सकदे न जडियां उनी सांझो देंणे दा बायदा कितया है। **4** असां उना खरियां चीजां दा मिलणे दा इंतजार करदे न जडियां परमेश्वरे साडे तांई तैयार कितियां न। कोई भी कदी भी इना चीजां दा नाश नी करी सकदा। उना कदी भी पुराणिया कने उना दी सुन्दरता घट नी होणी। परमेश्वरे तुहाडे तांई स्वर्गे च उना चीजां जो रखया है। **5** परमेश्वर अपणिया शक्तिया ला तुहाडी रक्षा करदा है, क्योंकि तुसां यीशु मसीह पर भरोसा करदे न। उनी तुहांजो आखरी दिने दीकर जालू यीशु मसीहे मुडी करी ओणा है बचाई रखणा है। तालू तुहांजो पता लगी जाणा की परमेश्वरे तुहांजो पाप कने मौत ला पुरे तरीके ला बचाई लिया है। **6** तुहांजो इना सारियां चीजां दे बारे च खुश होंणा चाईदा, चाहे हुण थोडे बकते तांई लग-लग तरा दियां परेशानियां तुहांजो दुखी करदियां न। **7** कने ऐ परेशानिया इस तांई होंदिया न की ताकि पता लगी सके की तुहाडा भरोसा परमेश्वर पर है की नी। यीशु मसीह पर तुहाडा भरोसा सोने ला भी जादा कीमती है। जियां नाश होई जाणे बाले सोने जो अग्नी च परखया जांदा है कने शुद्ध होंदा है, इयां ही तुहाडा भरोसा भी अगर परेशानियां होणे बाद भी मजबूत रेंदा है, तां इसला तुहाडी बडी तारीफ कने महिमा कने इज्जत होणी जालू यीशु मसीहे फिरी इस संसारे च मुडी ओणा है। **8** तुसां यीशु मसीह जो कदी नी दिखया है, फिरी भी तुसां उसयो प्यार करदे न। तुसां हुण उसयो नी दिखा दे न, पर फिर भी तुसां उस पर भरोसा करदे न। इस तांई तुसां खुशी कने महिमा ला जादा खुश होआ जिसयो अखरां च ब्यान नी करी सकदे

न, 9 क्योंकि परमेश्वर तुहांजो पाप दिया सजा ला बचांदा है। ऐ यीशु मसीह पर तुहाड़े भरोसे दा फल है। 10 ऐ उद्धार कुछ ऐसा था जिदे बारे च परमेश्वरे दे संदेश देणेबाले होर जाणना चांदे थे। उना दसया की कियों परमेश्वरे तुहांजो बचाणे ताई अपणी दया तुहाड़े पर किती जिदे तुसां काबिल नी न, उना उस जबाब जो तोपणे ताई बड़ी मेहनत किती। 11 मसीह दी आत्मा परमेश्वरे दे संदेश देणेबालयां च था, जड़ा मसीह दे दुखां कने उना दुखां बाद मिलणे बाली महिमा दे बारे च उना जो पेहले ला दस्सा दा था। परमेश्वरे दा संदेश देणेबालयां ऐ जाणने दी कोशिश किती की आत्मा उना जो क्या दस्सा दा था, ऐ सारियां गल्लां कालू होंणियां कने ऐ कियों पुरियां होणियां। 12 पर परमेश्वरे इना परमेश्वरे दे संदेश देणेबालयां जो दसया की उना दे संदेश अपु अपने ताई नी न बल्कि तुहाड़े ताई थे। सै संदेश यीशु मसीह दे बारे च शुभसमाचार है जड़ा तुसां हुण सुणया है। परमेश्वरे स्वर्गे ला पबित्र आत्मा भेजया ताकि तुहांजो शुभसमाचार प्रचार करणे ताई सहायता करे। ऐ सब इतणा अनोखा है की ऐथू दीकर की स्वर्गदूत भी बड़िया गौर ला इना गल्लां जो होंदे होए दिखदे न। 13 इस ताई अच्छे तरीके ला सोचा कने अपने आप पर काबू करणे दी कोशिश करा। कने उस उद्धार दी आस अनुग्रह पर लाई रखा जड़ा तुहांजो तालू मिलणा है जालू यीशु मसीह दुबारा इस संसारे च मुड़ी करी ओणा है। 14 परमेश्वरे दिया आज्ञा दा पालन करा जियां अच्छे बच्चे अपने पिता दिया आज्ञा दा पालन करदे न। कने उना बुरे कम्मा जो मत करा जिना दी तुसां इच्छा रखदे थे, जालू तुसां परमेश्वरे दिया सच्चाईया जो नी जाणने थे। 15 पर हुण तुहांजो हर कम्मा च जड़े तुसां करदे न पबित्र होणा चाईदा, जियां की परमेश्वर पबित्र है, जिनी तुहांजो अपने बच्चे होंगे ताई चुणया। 16 क्योंकि पबित्र शास्त्र च लिखया है की, “तुहांजो पबित्र होंणा चाईदा क्योंकि मैं पबित्र है।” 17 कने जालू तुसां प्राथना करदे न, तां तुसां परमेश्वरे जो अपना पिता बोलदे न। पर तुसां याद रखा की सै भेदभाव नी करदा है, कने हर कुसी जो उदे कम्मा दे अनुसार न्याय करदा है। इस ताई जालू की तुसां इसा धरती पर इक परदेसी होईकरी रेंदे न तां तुहांजो परमेश्वरे दी बड़ी इज्जत करणी चाईदी। 18 क्योंकि तुहांजो पता है की तुसां पेहले इक बेकार तरीके ला जिन्दगी जिया दे थे, इक ऐसा तरिका जड़ा तुहाड़े पूर्वजां दे बकत ला चली ओआ दा था। पर तुहांजो उस बेकार जिन्दगी ला बचाई लिया। तुहांजो सोने या चांदिया सांई खत्म होंगे बालियां चीजां ला नी खरीदया है, पर मसीह दे बड़े कीमती खूने

ला खरीदया, जड़ा इक शुद्ध कने सिद्ध मेमने सांई था। 20 इस संसारे जो बणने ला पेहले, परमेश्वरे पेहले ला ऐ फेसला करी लिया था की यीशु मसीह छुड़ाणे बाला होणा। पर सै इना आखरी दिना च तुहाड़ी सहायता करणे तांई इस संसारे च प्रगट होया। 21 जड़ा कुछ भी मसीहे किता है उदिया बजा ला तुसां परमेश्वरे पर भरोसा करदे न। परमेश्वर सेई है जीनी यीशु मसीह जो मरयां चे जिन्दा किता, कने उसयो बडी जादा महिमा दिती। इस तांई तुसां भरोसा करदे न कने परमेश्वर पर तुहाड़ी उम्मीद पक्की है। 22 क्योंकि सच्चाईया जो मनणे ला ही तुहांजो तुहाडे पापां ला शुद्ध कितया है, हुण तुहांजो अपने साथी मसीह भाई बेहणा सोगी इमानदारी कने साफ मने ला प्यार करदे रेणा चाईदा। 23 तुहांजो इक दुज्जे ला प्यार करणा चाईदा क्योंकि तुहांजो परमेश्वरे दिया तरफा ला इक नोई जिन्दगी मिलियो है। तुहांजो ऐ जिन्दगी कुसी ऐसिया चिजा ला नी मिलियो है, जिना खत्म होई जाणा, पर हमेशा टिकी रेणेबाले बचन दे जरिये नोई जिन्दगी मिलया है। (aiōn g165) 24 क्योंकि पबित्र शास्त्र ऐ बोलदा है, “हर इक माणु घाऐ सांई है, कने उदी सारी शोभा घाऐ दे फुलां सांई है। घाऐ सुकी जाणा है, कने फुलां झडी जाणा है।” 25 पर परमेश्वरे दा बचन हमेशा बणी रेंदा है। कने ऐ बचन मसीह दे बारे च शुभसमाचार है जड़ा तुहांजो च प्रचार कितया था। (aiōn g165)

2 इस तांई हर तरा दा बुरा व्यवहार छुट्टी दिया, दुज्जयां जो धोखा मत दिया, पाखंडी मत बणा, दुज्जयां ला जलन मत रखा, कुसी जो बदनाम मत करा, 2 जियां नोऐ जम्हो बच्चे अपणी माता दे दुधे दी इच्छा रखदे न, तियां ही तुहांजो परमेश्वरे दे बचन सिखणे दी इच्छा रखणी चाईदी ताकि तुसां आत्मिक रूप च मजबूत बणी सकन। तां आखरी च, परमेश्वरे तुहांजो इस संसारे दियां बुरियां चीजां ला पुरे तरीके ला बचाई लेणा। 3 क्योंकि जियां पबित्र शास्त्र च लिखया है की, “तुसां अपने अनुभव ला जाणया है की प्रभु भला है।” 4 प्रभु यीशु दी तुलना इक जिन्दे पत्थरे ला कितियो है। उस पत्थरे जो माणुआं फेंकी दितया था क्योंकि उना बोलया की ऐ बेकार था। पर परमेश्वरे दिया नजरा च, सै अनमोल है, कने परमेश्वरे उसयो नियां दे मुख्य पत्थरे दे रूमे च चुणया। हे मेरे मसीह साथियों तुसां भी मसीह बाल ओआ, ताकि तुहांजो भी उदे जरिये जिन्दे पत्थरां सांई बणाया जाऐ जड़े परमेश्वरे दी अराधना दा घर बणाणे तांई लगाऐ जांदे न। उनी तुहांजो भी पबित्र याजक बणाया है। क्योंकि जियां याजक परमेश्वरे जो चढावा चढादें न, तियां ही

तुसां भी चढावे दे स्पे च अपणा दिल परमेश्वरे जो चढाया है। कने सै चढावा परमेश्वरे जो खुश करदा है, क्योंकि तुसां यीशु मसीह दे न। 6 ऐ तियां ही है जियां परमेश्वरे पबित्र शास्त्र च बोलया है, “दिखा, मै कुसी जो यरूशलेम शेहरे च कुणे दे पत्थरे सांई रखा दा है। सै इक बडे कीमती पत्थरे सांई है जडा नियां तांई चुणया। जडा उस पर भरोसा करदा है कने निराश नी होदा।” 7 ऐ पत्थर तुहाडे तांई बडा कीमती है जडे यीशु मसीह पर भरोसा करदे न। पर जडे लोक उस पर भरोसा नी करदे उना दे बारे च पबित्र शास्त्र बोलदा है की, “जिस पथरे जो राजमिस्त्रियां बेकार बोली करी लाणे तांई मना करी दितया था, सै घरे दिया नियां च सारयां ला जरूरी पत्थर बणी गया।” 8 कने फिरी पबित्र शास्त्र च ऐ भी लिख्या है, “इनी पत्थरे लोकां दी ठोकर खाणे दी बजा होणा, ऐ इक चट्टान है जडी उना दे डेई पोंणे दी बजा होणी।” क्योंकि सै परमेश्वरे दे संदेश जो नी मनणे दिया बजा ला ठोकर खांदे न। परमेश्वरे उना सोगी ऐसा ही होणे दी योजना बणाईयो है। 9 पर तुसां ऐसे नी न क्योंकि तुसां परमेश्वरे दे चुणयो लोक न, तुसां परमेश्वरे दे याजक न, राजे न, तुसां परमेश्वरे दी सेवा करणे तांई समर्पित न कने परमेश्वरे दी अपणी निज सम्पति न। उनी तुहांजो नेहरे ला बार अपणी अनोखी लौई च सदया है, ताकि तुसां परमेश्वरे दे अनोखे कम्मा दे बारे च दस्सी सकन। 10 (परमेश्वरे दे संदेश देणेबाले होशे जडा लिख्या है सै तुहाडे बारे च सच्च है।) इक बकत था जालू तुसां परमेश्वरे दे लोक नी थे, पर हुण तुसां परमेश्वरे दे लोक न। पेहले तुसां परमेश्वरे दिया दया जो नी जाणदे थे पर हुण तुसां इसा जो जाणदे न क्योंकि उनी पेहले ला ही तुहाडे पर अपणी दया दस्सी है। 11 प्यारे मसीह भाईयो तुसां इस संसारे च परदेशियां कने यात्रियां सांई रे दे न। मै तुहांजो ला विनती करदा है की उना सारियां बुरियां शरीरिक इच्छां ला बचा क्योंकि सै हमेशा तुहाडिया अपणिया आत्मा दे खिलाफ लड़दियां न। 12 केई बरी ऐसे लोक होंदे न जडे प्रभु जो नी जाणदे न कने सै तुहांजो पर ऐ बोली करी गलत इल्जाम लांदे न की तुहाडे कम्म बुरे न। इस तांई इक अच्छी जिन्दगी जिया ताकि सै उना भले कम्मा जो दीखन जडे तुसां करदे न कने उस दिन परमेश्वरे जो महिमा देन जिस दिन यीशु मसीह मुडी करी ओणा है। 13 प्रभु यीशु दी इज्जत मान करणे तांई तुहांजो उना सारे हुकमा जो मनणा चाईदा जडे इस संसारे दे अधिकारी न; मतलब की राजा दे अधीन जडा सारयां ला बड्डा कने जरूरी अधिकारी है, 14 कने राज्यपालां दे अधीन रिया क्योंकि सेई ही है

जिदा उपयोग राजा उना लोकां जो सजा देंगे ताई करदा है, जिना दे कम्म बुरे न कने उना लोकां दी तारीफ करणे ताई जिना दे कम्म अच्छे न। 15 क्योंकि परमेश्वरे दी ऐ इच्छा है, की साड़े भले कम्मा करणे ला, जड़े लोक परमेश्वरे जो नी जाणदे, सै अगो जो सांझो पर गलत तरीके ला इल्जाम लांणे दी हिम्मत ना करन, क्योंकि ऐ गल्ल साफ-साफ पता है की उना दे झूठे इल्जाम सच्च नी न। 16 तुहाड़े ताई ऐसा कोई भी नी है जड़ा तुहांजो सै करणे ताई रोकी सके जड़ा तुसां करणा चांदे न क्योंकि तुसां साड़े प्रभु यीशु मसीह दे जरिये पेहले ही अजाद होई गियो न। पर बुरे कम्म करणे ताई इसयो भाना मत बणा। तुहांजो अपने कम्मा ला दसणा चाईदा की तुसां सच्ची परमेश्वरे दे सेवक न। 17 सारयां दी इज्जत करा, अपने मसीह भाईयां सोगी प्यार करा, परमेश्वरे ला डरा, राजा दी इज्जत करा। 18 हे सेबकों, तुसां जड़े घरां च कम्म करदे न कने भरोसा करणे बाले न, तुहांजो अपने मालिके दे हुकम मनणा चाईदे कने हमेशा उना दी इज्जत करणी चाईदी। इयां हर तरा दे मालिकां सोगी करा चाहे सै दयालु होन या सही होन, या जालिम होन। 19 क्योंकि अगर असां दुख सेहन करदे न चाहे साड़ी गलती ना हो, पर असां सिर्फ इस ताई सेहन करदे न क्योंकि असां परमेश्वरे दे बारे च सोचदे न, तां परमेश्वर सांझो ला खुश होंदा है। 20 पर अगर तुहांजो गलत करणे ताई मार पोंदी है, तां सजा मिलणे पर सबर रखणे च तुहाड़ी तारीफ करणे दी कोई बजा नी है। पर अगर भलाई करणे दिया बजा ला तुसां दुख सेहन करदे न कने सबर रखदे न, तां परमेश्वर खुश होंदा है। 21 कने परमेश्वरे दे जरिये तुहांजो सदणे दी बजा चे इक बजा ऐ भी है की तुसां उदे ताई भले करदे होए दुख सेहन करी लेंणा। यीशु मसीह जिनी तुहाड़े ताई दुख सेहन किते, सै तुहाड़े ताई इक उदाहरण है। इस ताई तुहांजो सेई कम्म करणे चाईदे जदे मसीहे किते। 22 पबित्र शास्त्र च लिखया है, “उनी कदी पाप नी किता। उनी कदी झूठ नी बोलया।” 23 जालू लोकां यीशुऐ दी बेइजती किती, उनी पलटी करी उना दी बेइजती नी किती। जालू लोकां उसयो दुख दिता, तां उनी उना ला बदला नी लिया। बल्कि उनी अपणी सहायता ताई परमेश्वरे पर भरोसा किता, क्योंकि सै जाणदा था की परमेश्वर हमेशा लोकां दा सही न्याय करदा है। 24 जालू मसीह मरया, तां साड़े पापां दिया बजा ला सूली पर उदे शरीर जो सजा दिती। उनी ऐसा इस ताई किता ताकि असां पाप करणा बंद करी देन। कने उना जखमा दिया बजा ला जड़े उनी सेहन किते, असां ठीक होई गे। 25

इक बकत पेहले तुसां भेडां सांई थे, जडियां गलत रस्ते पर जा दियां थियां। पर हुण तुसां यीशु मसीह बाल बापस आई गियो न जडा तुहाडिया आत्मा दा पुआल कने रखवाला है।

3 हे घरे बालियों, तुसां भी अपने घरे बालयां दे अधीन रिया। ताकि अगर उना चे कोई भी परमेश्वरे दे बचना पर भरोसा करणे ला मना करदा है, तां तुहांजो ऐ दसणे दी जरूरत नी होणी की उना जो भरोसा करणा चाईदा। जालू उना दिखणा की कियां तुसां पबित्र जिन्दगी जिया दे कने परमेश्वरे दी इज्जत करदे न, तां उना मसीह पर भरोसा करी लेणा। **3** तुहाडी सुन्दरता दिखावटी ना हो, जियां की बाल संवारना, कने सोने दे गेहणे पेहनणा, या भौंती-भौंती दे मेगे-मेगे कपड़े पांणा। **4** जडा तुहाडे दिले च है, सेई है जडा तुहांजो सुंदर बणादां है। साडा व्यवहार प्यार भरा कने शांत हो, जडा की परमेश्वरे तांई बडा कीमती है। **5** कने बड़े पहले जडियां जनानियां परमेश्वरे पर भरोसा रखदियां थियां, कने उस पर अपनी आस रखदियां थियां, सै अपने घरे बाले दा हुकम मन्नी करी अपने आपे जो सुंदर बणादियां थियां। **6** जियां सारा अब्राहम दे हुकमा जो मंदी कने उसयो स्वामी बोलदी थी। अगर तुसां दुज्जयां सोगी भलाई करन कने तुहांजो कोई भी चिंता कने डर ना हो, तां तुसां सारा दे बचयां सांई बणणा। **7** तियां ही हे पतियो, तुहांजो अपणिया-अपणिया घरे बालिया सोगी समझदारिया ला रेंणा चाईदा, कने तुहांजो याद रखणा चाईदा सै तुसां ला कमजोर न, इस तांई तुहांजो उना दी इज्जत करणी चाईदी। क्योंकि तुसां दोनों ही हमेशा दी जिन्दगिया दे बरदाने दे हिस्सेदार न जडा परमेश्वरे बड़े अनुग्रह ला दितया है। इयां करा ताकि जालू तुसां परमेश्वरे ला प्राथना करन तां सै तुहाडी सुणे। **8** आखरी च, मै तुसां सारयां ला ऐ बोलणा चांदा है की, तुसां सारयां दा इक ही मन होणा चाईदा कने इक दुज्जे सोगी प्यारभाव ला रिया कने घमंड मत करा कने नम्र बणा। **9** बुराईया दे बदले बुराई मत करा कने ना गाली दे बदले गाली दिया; इदे बदले उना जो आशीष दिया क्योंकि परमेश्वरे तुहांजो इसी तांई सदया है की तुसां दुज्जयां जो आशीष देई सकन। अगर तुसां ऐसा करदे न तां परमेश्वरे भी तुहांजो आशीष देंगी। **10** क्योंकि पबित्र शास्त्र च लिख्या है, अगर कोई माणु अपनी जिन्दगी दी खुशी लेणा चांदा है, कने खरे दिन दिखणा चांदा है, तां उसयो ध्यान देणा चाईदा की सै बुरियां गल्लां ना बोले। कने उसयो एसियां गल्लां करणा बंद करी देणा चाईदा जडियां सच्च नी है। **11** उसयो पक्का ही बुरे

कम्म करणा छडी देणा चाईदे। कने इदे बजाए उसयो सेई करणा चाईदा जडा भला है। दुज्जयां सोगी शान्ति ला रेणे दी कोशिश करा। 12 क्योंकि प्रभु उना लोकां दी देखभाल करदा है जडे भले कम्म करदे न, कने सै हमेशा उना दी प्राथना सुणने ताई कने उना दा जबाब देंगे ताई तैयार है। पर परमेश्वर बुराई करणे बाले लोकां दे खिलाफ कम्म करदा है। 13 अगर तुसां हमेशा भले कम्म करणे दी कोशिश करदे न, तां कोई भी असल च तुहाडा नुक्सान नी करी सकदा। 14 पर अगर जडा सही है सै करणे दिया बजा ला असां दुख झेलदे न, तां असल च असां धन्य होणा। इस ताई अगर कोई लोक सांझो डरान, तां डरदे मत कने ना ही घबरानयो, 15 पर मसीह जो अपने मना च प्रभु दे स्पे च इज्जत दिया। कने अगर कोई तुहांजो ला उस आसा दे बारे च पुच्छे जड़ी भरोसा करणे बाले होंगे दे नाते तुसां सारयां च है, तां हमेशा उसयो समझाणे ताई तैयार रिया। 16 कने अपनी अंतरात्मा भी शुद्ध रखा, इस ताई की जिना गल्लां दे बारे च तुहाडी बदनामी होंदी है उना दे बारे च सै, जडे मसीह च तुहाडे खरे चाल-चलण दी बेइजती करदे न, शर्मिदा होन। 17 अगर सांझो अपने भले कम्मा दिया बजा ला दुख मिलदा है, तां ऐ साडे ताई खरा है, अगर परमेश्वरे दी ऐई इच्छा है। ऐ तां बुरे कम्मा दिया बजा ला दुख झेलणे ला साडे ताई खरा है। 18 मैं इस ताई बोला दा है क्योंकि यीशु मसीहे भी साडे पापां दिया बजा ला दुख सेहन किता कने मरी गया। सै सिर्फ इक ही बरी मरया उसयो दुबारा मरणे दी जरूरत नी है। सै इक धर्मी माणु था जडा पापी माणुआं ताई मरी गया ताकि सै सांझो परमेश्वरे दे नेडे आंणी सके। उना उदे शरीर जो तां मारी दिता पर परमेश्वरे उसयो पबित्र आत्मा दिया शक्तिया ला दुबारा जिन्दा करी दिता। 19 तालू उदिया आत्मा जाई करी उना आत्मा जो शुभसमाचार प्रचार किता जड़ियां उसा जगा पर केद कितियां न, जिथू मरयां लोकां दियां आत्मा न। 20 ऐ उना लोकां दियां आत्मा थियां जिना बडे बकत पेहले जालू नूह अपना जाज बणा दा था, तालू इना परमेश्वरे दे हुकम जो नी मनया था, तालू परमेश्वर बडे सबर ला इंतजार करा दा था की क्या सै लोक पश्चाताप करगे। पर जालू पाणिऐ संसारे दा नाश करी दिता, तालू सिर्फ अठ लोक बचे जिना जाजे च प्रवेश किता था। 21 पुराणे बकत च उना दा उद्धार हुण साडे उद्धार दा इक उदाहरण है जालू असां बपतिस्मा लेंदे न। जिस पाणिऐ च असां बपतिस्मा लेंदे न, सै साडे शरीर ला मेल नी साफ करदा, पर ऐ इक निशाण है की असां परमेश्वरे ला माफी मंगी है ताकि अग्रे

जो साड़ा मन परेशान ना रे। सांझो माफी मिली सकदी है क्योंकि यीशु मसीह मौत दे बाद फिरी जिन्दा होया है। 22 कने सै स्वर्गे जो चली गया। हुण सै ओथु पर परमेश्वरे दे सज्जे पासे कने सारयां ला बडिया जगा पर जाई करी बेई गया, कने सै स्वर्गदूतां कने सारे अधिकारियां कने सारियां शक्तियां पर राज करदा है।

4 इस ताई जियां मसीहे शरीर च रेईकरी दुख सेहन किता, तुहांजो भी उस सांई ही दुख सेहन करणे ताई तैयार रेंणा चाईदा। क्योंकि अगर तुसां मसीह ताई दुख सेहन करणे ताई तैयार न, तां तुसां पाप नी करणे दा फेसला करी लिया है। 2 कने इसा बजा ला सै माणु इस संसार च रेईकरी उना बुरे कम्मा जो नी करदा है, जिना जो लोक अक्सर करणा चांदे न, पर उनी सेई करणा जडा परमेश्वर चांदा है की सै करे। 3 क्योंकि तुसां अपणिया पुराणिया जिन्दगिया च बडा बकत बर्बाद करी दिता जालू तुसां होर जातियां सांई, बुरे कम्मा च, बासना च, खाणे पीणे च, दास्-बाजी च कने असभ्य देवतयां कने उना दियां मुर्तियां दी पूजा करदे थे, जिना ला परमेश्वर नफरत करदा है। 4 इस ताई तुहाडे पूरणे मित्र हेरान होई जादे न, जालू तुसां उना सोगी बुरियां चीजां च शामिल नी होंदे जडे सै करदे न। इस ताई सै तुहाडे बारे च बुरा बोलदे न। 5 पर इक दिन जस्र उना परमेश्वरे दे सामणे न्याय ताई खडे होणा, कने परमेश्वरे उना ला हर इक कम्मे दे बारे च पूछणा जडा उना धरती पर कितया। परमेश्वरे जिन्दे कने मरयो दोनों लोकां दा न्याय करणा। 6 क्योंकि ऐई बजा है की मरयो लोकां भी मसीह यीशु दे बारे च शुभसमाचार सुणया। उना दे शरीरां जो सारयां सांई मरणा पिया, पर सै हुण आत्मा च हमेशा परमेश्वरे सोगी रेंदे न। 7 सारियां गल्लां दा अंत जल्दी होणे बाला है; इस ताई ध्याने ला सोचा कने अपने आपे जो काबू च रखा कने प्राथना ताई तैयार रिया। 8 सारयां ला जसूरी गल्ल ऐ की, इक दुज्जे ला इमानदारिया ला प्यार करा, क्योंकि अगर तुसां लोकां ला प्यार करगे तां तुसां हमेशा कुसी भी बुरे कम्मे जो माफ करणे ताई तैयार रेंणा जडे उना कितयो न। 9 लोकां दा अपने घरे स्वागत करा कने बिना कोई शिकायत कितयो करा। 10 हर इक माणुऐ जो परमेश्वरे दिया तरफा ला बरदान मिलया है, उसयो उस बरदाने दा इस्तेमाल दुज्जयां दी सहायता करणे ताई करणा चाईदा। उना जो परमेश्वरे दे अच्छे सेबकां दे स्पे च अपने बरदाना दा इस्तेमाल करणा चाईदा जडे परमेश्वरे उना जो अनुग्रह ला दितयो न। 11 अगर तुहाडे बाल प्रचार करणे दा बरदान है, तां तुहांजो परमेश्वरे दे बचना दा प्रचार करणा चाईदा, अगर तुहाडे बाल

दुज्जे लोकां दी सहायता करणे दा बरदान है, तां सै इस कम्मे जो उस शक्तिया ला करन जड़ी परमेश्वर तुहांजो दिन्दा है। तां फिरी जडा कुछ भी तुसां करणा उसला यीशु मसीह दे जरिये परमेश्वरे जो महिमा मिलणी। सारी महिमा कने शक्ति यूगां-यूगां दीकर उदी है! आमीन। (aiōn g165) 12 हे प्यारे मसीह भाईयो, उना दुख देंगे बालियां चीजां दे बारे च हेरान मत होआ जिना दियां बजा ला तुहांजो दुख झेलणा पोआ दा है क्योंकि तुसां मसीह दे चेले न। पर ऐ चीजां ऐ दसणे तांई होआ दियां न की क्या तुसां सच्ची परमेश्वरे पर भरोसा करदे न। इस तांई ऐ मत सोचा की तुहाड़े सोगी कुछ अजीब घटना होआ दियां न। 13 बस ऐ सोची करी खुश रिया, क्योंकि तुहांजो उना दुखां चे इक हिस्सा मिलया है, जडे मसीह जो मिलयो थे। इसा बजा ला जालू मसीहे सारयां लोकां जो अपणी महिमा दसणे तांई दुबारा मुडी करी ओणा है तां तुहांजो होर जादा खुशी होंणी है। 14 फिरी अगर मसीहे दे नाए दिया बजा ला तुहाड़ी बुराई होंदी है, तां तुसां धन्य न, क्योंकि परमेश्वरे दी महिमा बाली आत्मा तुहांजो च बास करदी है। 15 तुहाड़े चे कोई भी माणु चोरी, खून करणे ला या बुरे कम्म करणे ला, या दुज्जयां दे कम्मे च हथ पाणे दिया बजा ला दुख ना झेले। 16 पर अगर मसीही होणे दिया बजा दुख झेलणा पोए, तां तुसां इसयो शर्मिंदगी दी गल्ल मत समझदे, पर इसा गल्लां तांई परमेश्वरे दी महिमा करा की तुसां इस तांई दुख सेहन करा दे न क्योंकि तुसां यीशु मसीह दे चेले न। 17 क्योंकि न्याय करणे दा बकत आई गया है, परमेश्वरे पेहले असां भरोसा करणे बालयां दा न्याय करणा है, इस तांई उना भयानक चीजां दे बारे च सोचा जड़ियां उना लोकां सोगी होंणियां न जडे परमेश्वरे दे दितयो शुभसमाचारे जो नी मंदे। 18 जियां की पबित्र शास्त्र च लिखया है, “अगर इक भले माणुऐ दा बचाया जाणा इतणा मुशकिल है, तां बुरे लोकां दा कने पापियां दा क्या होणा जडे परमेश्वरे दे शुभसमाचारे पर भरोसा नी करदे?” 19 इस तांई जडे लोक परमेश्वरे दिया इच्छा दे अनुसार दुख झेलदे न, उना जो परमेश्वरे पर भरोसा करदे रेंणा चाईदा, जिनी उना जो बणाया है। परमेश्वर हमेशा सै करदा है जडा उनी करणे दा बायदा कितया था कने इस तांई जडा खरा है सै करदे रेंणा चाईदा।

5 कुछ एसियां गल्लां न जड़ियां मै ओथु दे कलीसिया दे अगुवां ला बोलणा चांदा है क्योंकि मै भी तुहाड़े सांई इक अगुवा है। मै खुद उना दुखां जो दिखया है जडे बडे पेहले यीशु मसीहे सेहन किते। जालू उनी दुबारा मुडी करी ओणा है, तां मै

उदिया महिमा च हिस्सेदार बणना है। हुण मै तुहांजो ला बिनती करदा है, 2 जियां इक पुहाल अपणियां भेडा दी रखबाली करदा है, तियां ही तुहांजो भी हर इकी जणे दी देखभाल करणी चाईदी जिसयो परमेश्वरे तुहाडिया देखभाला च दितया है। इस कम्मे जो अपणिया इच्छा ला करा, ना की कुसी मजबूरिया दिया बजा ला क्योंकि परमेश्वर ऐई चांदा है की तुसां ऐसा करन। ऐ कम्म इस तांई मत करा की तुसां पैसा कमाणा चांदे न, पर परमेश्वरे कने लोकां दी सेवा करणे दी इच्छा ला करा। 3 उना लोकां दे उपर इक शासक सांई हुकम मत दिया जिना तांई तुसां जिम्मेबार न, पर उना तांई इक अच्छा उदाहरण बणा। 4 जालू यीशु मसीहे, जडा साडा प्रधान पुहाल है, उनी मुडी करी ओणा है, तालू तुहांजो इक सुंदर मुकुट मिलणा है जिदी चमक कदी नी घटणी। 5 इयां ही तुसां जवान लोकां जो बुड़े मर्दा दे हुकम मनणा चाईदे। तुसां सारयां जो प्यारभाव ला इक दुज्जे दी सेवा करणी चाईदी, क्योंकि पबित्र शास्त्र च लिख्या है की, “परमेश्वर घमण्डियां दा बिरोध करदा है, पर नम्र लोकां तांई भला है।” 6 इस तांई अपने आपे जो परमेश्वरे सामणे नम्र बणा जडा सारयां ला शक्तिशाली है, ताकि सै सही बकत ओणे पर तुहांजो बड़ी जादा इज्जत दे। 7 परमेश्वरे जो अपणी सारी चिंता कने पेशानिया दस्सा क्योंकि सै तुहाडी परवाह करदा है। 8 ध्यान रखा, कने जागदे रिया, क्योंकि शैतान तुहाडा दुशमण तुहांजो पर हमला करणा चांदा है, ताकि तुसां परमेश्वरे दे हुकमा जो नी मनन। सै धहाड़ने बाले शेरे सांई फिरदा कने दिखदा रेंदा है की कुसयो खाई सके। 9 तुहांजो अपने पक्के भरोसे सोगी शैताने दा बिरोध करणा चाईदा। याद रखा की तुहाडे मसीह भाई-बेहण जडे पुरे संसार च रे दे न, ऐदे ही दुखां जो सेहन करा दे न जियां तुसां सेहन करा दे न। 10 परमेश्वरे जडा अनुग्रह ला पूरा भस्या है, उनी साडे मसीह सोगी रिश्ते दिया बजा ला स्वर्गे च उदी हमेशा दी महिमा च हिस्सेदार होंगे तांई चुणया है। तुहांजो थोड़े बकते दीकर दुख झेलणे बाद परमेश्वरे तुहांजो अच्छा बणाई देणा ताकि तुहांजो च फिरी कोई दोष ना रे ताकि तुहाडा भरोसा मजबूत हो कने डगमगाणे बाला ना हो। (aiōnios g166) 11 उनी हमेशा तांई शक्तिशाली स्पे ला शासन करणा। आमीन। (aiōn g165) 12 मै ऐ छोटी देई चिट्ठी सिलवानुस दिया सहायता ला लिखियो है कने तुहांजो भेजी है। जिसयो मै मसीह च भरोसे दे काबिल भाई मंदा है। मेरा इसा चिठिया जो लिखणे दा मकसद तुहांजो उत्साहित करणा है कने तुहांजो भरोसा दिलाणा है की जडा कुछ भी तुसां सिखा दे न सै

असल च तुहाडे ताई परमेश्वरे दे अनुग्रह दा हिस्सा है। इस अनुग्रह च टिकी रिया। 13 जडे बाबेल शेहरे दे यीशु पर भरोसा करणे बाले लोक तुहांजो नमस्कार करदे न, जिना जो परमेश्वरे चुणया है, जियां उनी तुहांजो चुणया था। मरकुस जड़ा मेरे ताई इक पुत्रे साई है, सै भी तुहांजो नमस्कार करदा है। 14 इक दुज्जे जो गले लाईकरी नमस्कार करा। मै प्राथना करदा है परमेश्वर तुसां सारयां जो शांति दे जडे प्रभु यीशु मसीह सोगी रिश्ता रखदे न।

2 पतरस

1 मैं, शमौन पतरस, जड़ा यीशु मसीह दा सेबक कने प्रेरित है। मैं तुसां सारयां ताई ऐ चिठी लिखा दा है जडे सांझो सांई उसी कीमती भरोसे जो साझा करदे न, जड़ा भरोसा सांझो साडे परमेश्वर कने उद्धारकर्ता यीशु मसीहे जरिये मिलया है, जड़ा सांझो परमेश्वरे दिया नजरा च सही बणादां है। **2** मैं प्राथना करदा है की परमेश्वर तुहांजो जादा ला जादा अनुग्रह कने शांति दे जियां-जियां तुसां परमेश्वर कने साडे प्रभु यीशु मसीह दे ज्ञान च बददे जान। **3** परमेश्वरे अपणी शक्तिया ला सांझो सै सब दितया है, जड़ा सांझो इक ऐसी जिन्दगी जिणे ताई चाईदा जड़ी परमेश्वरे जो खुश करदी है। ऐ इस ताई होया क्योंकि असां परमेश्वरे जो जाणदे न कने सै सेई है जिनी अपणी अच्छाई कने महिमा दिया बजा ला सांझो अपने लोक होंगे ताई सदया है। **4** कने उदिया महिमा कने अच्छाईया दिया बजा ला, उनी सांझो बडे महान कने कीमती बायदे दितयो न। ताकि इना बरदाना दा इस्तेमाल करिरी असां इस संसारे च जड़ियां बुरियां इच्छा न उना ला बची सकन कने परमेश्वरे दे सभाबे च साझी बणी सकन। **5** क्योंकि तुसां परमेश्वरे दे सभाबे च साझी होणे ताई न इस ताई तुहांजो सिर्फ मसीह पर भरोसा ही नी करणा चाईदा, बल्कि तुहांजो हमेशा सेई करणे दी कोशिश करणी चाईदी जड़ा दुज्जयां ताई खरा है। तुहांजो ना सिर्फ सै करणा चाईदा जड़ा खरा है, बल्कि तुहांजो ऐसे लोक बणना चाईदा जडे समझदारिया ला व्यवहार करणा जाणदे न। **6** तुहांजो ना सिर्फ ऐ जाणना चाईदा की समझदारिया ला कियां व्यवहार करणा है, बल्कि तुहांजो अपने आपे जो भी काबू करणा चाईदा। तुहांजो ना सिर्फ अपने पर काबू रखणा चाईदा, बल्कि तुहांजो मुसीबतां च सबर भी रखणा चाईदा। ना सिर्फ तुहांजो सबर रखणा चाईदा, बल्कि तुहांजो ऐसे तरीके ला जीणा चाईदा जड़ा परमेश्वरे जो खुश करदा है। **7** ना सिर्फ तुहांजो इस तरीके ला जिणा चाईदा जड़ा परमेश्वरे जो खुश करदा है, बल्कि तुहांजो इक दुज्जे मसीह भाई बेहणा जो अपने खुद दे परिवारे सांई प्यार करणा चाईदा। ना सिर्फ तुहांजो इक दुज्जे सोगी अपने परिवारे सांई प्यार करणा चाईदा, बल्कि तुहांजो सारे लोकां सोगी प्यार भी करणा चाईदा। **8** क्योंकि अगर ऐ सारियां गल्लां तुसां च हेन कने बदा दियां न, तां इना साडे प्रभु यीशु मसीहे दा होर जादा ज्ञान लेंगे च तुहांजो बेकार कने असफल नी होणा देणा। **9** पर जिदे च ऐ गुण नी है, सै उस माणुऐ सांई जिदी नजर इतणी कमजोर है की सै दिखी नी सकदा कने

भूली गया है की परमेश्वरे उसयो उदे पुराणे पापां ला पबित्र करी दितया है। 10 इस बजा ला हे मसीह भाईयो, अपने आपे जो कने होर लोकां जो ऐ दसणे ताई होर भी अच्छा व्यवहार करणे दी कोशिश करा की परमेश्वरे सच्ची चुणया है कने तुहांजो अपने लोक होंगे ताई सदया है। अगर तुसां ऐसा करगे तां पक्का ही तुसां कदी भी परमेश्वरे ला लग नी होंगा। 11 कने परमेश्वरे तुहाडा उस राज्य च बडे आदर सोगी स्वागत करणा, जिथू साडा प्रभु कने उद्धारकर्ता यीशु मसीहे हमेशा ताई राज करणा। (aiōnios g166) 12 मैं तुहांजो इना गल्लां दे बारे च बार-बार याद दिलाणा चांदा है, हालांकि तुसां पेहले ला ही इना गल्लां जो जाणदे न कने पूरा भरोसा करदे न की सै सच्चियां न। 13 साडे प्रभु यीशु मसीहे मिंजो साफ-साफ दस्सी दितया है की मैं जल्दी ही मरी जाणा है। इस ताई मिंजो लगदा है की मेरे ताई ऐई खरा है की जालू दीकर मैं जिन्दा है तालू दीकर मैं तुहांजो याद दिलांदा रे। 15 इस ताई मैं तुहांजो ऐ गल्लां दसणे ताई इतणी मेहनत करा दा है, ताकि मेरिया मौता ला बाद तुसां हर बकत इना गल्लां जो याद रखन। 16 जालू असां प्रेरितां तुहांजो साडे प्रभु यीशु मसीह दी शक्ति कने मुडी ओणे दे बारे च संदेश दिता, तां असां तुहांजो कोई चलाकिया ला मन घडन्त कहाणियां नी सुणाईयां न, बल्कि असां उदिया महिमा जो अपनी हखी ला दिखया है। 17 असां उदे सोगी उस पबित्र पाडे पर थे, जालू पिता परमेश्वरे उसयो महिमा कने इज्जत दिती थी। उस बकत परमेश्वरे दिया तरफा ला यानी की महिमा ला उस ताई अबाज आई, “ऐ मेरा अपना प्यारा पुत्र है, जिसला मैं खुश है!” असां खुद स्वर्गे ला ओदी अबाज जो सुणया। 19 कने असां जाणदे न की मसीह दे बारे च परमेश्वरे दे संदेश देणेबालयां जडे बचन लिखयो थे, सै सच्चे न, कने जडा असां तुहांजो यीशु मसीहे दे दुबारा मुडी ओणे दे बारे च सिखाया था, सै इसा गल्ला जो सच्च साबित करदे न। तुहांजो उना बचना जो ध्याने ला सुणना चाईदा, क्योंकि जियां नेहरे च इक चमकदा दिय्या लोकां जो सही रस्ता दसणे च सहायता करदा है, तियां ही इना बचना तुहांजो ऐ जाणने ताई सहायता करणी की सच्च क्या है। प्रभु यीशु मसीह दे दुबारा मुडी करी ओणे दीकर तुहांजो उना बचना जो ध्याने ला सुणना चाईदा, उदा मुडी करी ओणा नोए दिने दिया भयागा सांई रौशनी लोणा है, कने सै भयागा दे तारे सांई होणा। उस बकत उदी लौ तुहाडे दिलां च चमकणी कने तुहाडे सामणे परमेश्वरे जो साफ-साफ प्रगट करणा। 20 पर ऐ बडा जरूरी है की तुसां इसा गल्ला जो समझन की परमेश्वरे दा

संदेश देणेबालयां दे बचन जडे तुसां पबित्र शास्त्र च पढदे न, सै सिर्फ उना दे अपणे बिचार नी न। 21 क्योंकि पबित्र शास्त्र च दीतियो कोई भी भविष्यवाणी कदी भी माणुऐ दिया मरजिया ला नी होदी है। पर पबित्र आत्मा उना दे मना च पांदा है, जालू उना परमेश्वरे दिया तरफा ला आयो संदेशे जो बोलया।

2 जियां बडे बकत पेहले, ऐथू इस्राएली लोकां बिच झूठा संदेश देणेबाले गुरू थे, तियां ही तुहाडे बिच भी झूठी शिक्षां दे झूठे गुरू होणे। सै झूठी शिक्षां जो चुपके ला फेलाई दिन्दे न, कने जड़ियां लोकां जो मसीह पर भरोसा करणे ला रोकदियां न। इना झूठे गुरूआं मसीह जो अपणा मालिक मनणे ला मना करी देणा जडा उना दा मालिक है कने जिनी उना जो पाप दिया शक्तिया ला अजाद कितया है। ऐसा करिरी उना अचानक अपणे आप दा नाश करवाई लेणा है। 2 परमेश्वरे दे मतयां लोकां इना गुरूआं दे बुरे कम्मा दी नकल करणी है, कने जडा कुछ भी सै करदे न उदिया बजा ला लोकां परमेश्वरे पासे जाणे बाले रस्ते दे बारे च बुरियां-बुरियां गल्लां करणियां। 3 ऐ गुरू लालची होणे, कने उना बणियां-बणाईयां कहाणियां सुणाई करी तुहांजो धोखा देणा ताकि तुहांजो ला पैसा कमाई सकन। परमेश्वरे बडे पेहले ही फेसला करी लिया था की सै उना जो सजा दे कने सै ऐसा करणे ताई तैयार है। उनी पक्का ही उना दा नाश करी देणा। 4 तुसां जाणदे न की बडे बकत पेहले जालू कुछ शैताने दे दूतां परमेश्वरे दे हुक्मा जो नी मनया था, तां परमेश्वरे उना स्वर्गदूतां जो सजा दिती। उनी उना जो नरक च फेंकी दिता, कने उना जो नेहरे च केद करिरी उस दिने दीकर रख्या है जालू उनी उना दा न्याय करणा कने सजा देंणी है। (Tartaroō g5020) 5 तुसां ऐ भी जाणदे न की जालू बडे बकत पेहले रेणे बालयां लोकां परमेश्वरे दा डर नी मनया तां उनी उना दे बुरे कम्मा जो नजरअंदाज नी किता जडे सै करा दे थे। बल्कि उनी पुरिया धरतिया पर पांणी भरी करी ऐसी सजा दिती की सै सारे डूबी करी मरी गे। पर परमेश्वरे नूह समेत अठां लोकां जो बचाई लिया, जिना परमेश्वरे सोगी सही रेणे दे बारे च बिचार किता। 6 परमेश्वरे सदोम कने अमोरा शहरां जो सजा दिती, कने उना जो ऐसा भस्म करी दिता की सै फकुई करी राख बणी गे। परमेश्वरे इना लोकां जो सजा देईकरी चेताबनी दिती की जडे लोक परमेश्वरे दे हुक्मा जो नी मंदे न उना सोगी क्या होणा है। 7 पर इसला पेहले की परमेश्वर सदोम कने अमोरा शहरे दा नाश करदा, उनी लूत जो ओथु ला निकाली दिता कने बचाई लिया, सै इक धर्मी माणु था। लूत बडा दुखी था क्योंकि

सदोम शेहरे दे लोक कुसी भी नियम जो नी मंदे थे कने बड़े ही शर्मशार कम्म करदे थे। 8 सै उना बुरे लोकां बिच रेंदा था, कने सै हर रोज उना बुरे कम्मा जो दिखदा था जड़े सै करदे थे कने उना दियां बुरियां गल्लां जो सुणदा था, कने सै इना सारियां गल्लां ला बड़ा दुखी था, क्योंकि सै इक धर्मी माणु था। 9 ऐ सारे कम्म जड़े परमेश्वरे अतीत च किते, सै सांझो ऐ दसणे ताई न की जड़े लोक परमेश्वरे जो खुश करणे बाली जिन्दगी जिन्दे न, जालू सै मुसीबता च होंदे न तां परमेश्वर उना दी पक्का रक्षा करदा। कने असां ऐ भी यकीन करी सकदे न की परमेश्वरे उस दिने दीकर लगातार अधर्मियां जो सजा दिन्दे रेंणा जालू दीकर सै सारे लोकां दा न्याय नी करदा। 10 परमेश्वरे उना झूठे गुरूआं जो पक्का ही सजा देंणी है जड़े अपणी बुरियां इच्छा दे मुताबिक कम्म करदे न, कने अपने उपर परमेश्वरे दे अधिकारे जो नी मंदे न। सै ढीठ कने घमण्डी न। सै महिमामय स्वर्गे दे प्राणियां दे बारे च बुरा भला बोलणे ला नी डरदे न। 11 पर स्वर्गदूत जड़े इना झूठे गुरूआं ला जादा शक्तिशाली न, सै भी उना दी बेइज्जती नी करदे जालू सै परमेश्वरे सामणे उना पर दोष लांदे न। 12 पर ऐ झूठे गुरू जंगली जानवरां सांई कम्म करदे न, जड़े सेई करदे न जदिया उना दा शरीर चांदा है कने जड़े इस तांई पैदा होंदे न की लोक उना जो फसाई करी मारी सकन। ऐ झूठे गुरू उना चीजां दी बेईज्जती करदे न, जिना दे बारे च सै असल च कुछ नी जाणदे। परमेश्वरे उना जो तियां ही नाश करी देणा जियां लोक जानवरां जो मारदे न। 13 उना दा विनाश उस नुक्सान दा फल है जड़ा उना कितया है। उना जो दिन दोषहरी अनैतिक खांणा-पिणा पसंद है। सै तुहाड़े बिच इक कलंक कने धब्बे न। सै धोखा देंणे च खुशी मंदे न, कने सै तुहाड़े तांई धामा च तुहाड़े सोगी खांदे पिंदे न। 14 सै हर इक जनानिया सोगी व्यभिचार करणा चांदे न, जिसा जो भी दिखदे न। सै पाप करणे दे मौके तोपदे रेंदे न। सै उना लोकां जो धोखा दिन्दे न जिना दा मसीह पर भरोसा कमजोर होंदा है, कने सै उना जो पाप पासे लेई जांदे न। कने उना दे होर जादा-जादा चीजां पाणे दे हमेशा बददे लालचे दिया बजा ला ही परमेश्वरे उना जो सजा देंणी। 15 उना सही कम्म करणा बंद करी दितया है, कने उना सियुदा ही कम्म करणा शुरू करी दितया है, जदिया बओर दे पुत्र बिलामे बड़े पेहले कितया था। उनी गलत कम्म करिरी पैसा कमाणा पसंद कित। 16 पर परमेश्वरे बिलामे जो उदे बुरे कम्मा तांई उदिया गदिया दे जरिये फटकार लाई। भले ही गधे बोलदे नी न, पर उना गदिया बिलामे ला इन्साना सांई गल्ल किती, जालू

बिलाम राजे जो मिलणे ताई गदिया जो लदी करी लेई चलया था कने परमेश्वरे उस बकत बिलामे जो बेवकूफिया बाला कम्म करणे ला रोक़ी दिता। 17 ऐ झूठे गुरु उना पांणिए दे झरनया सांई बेकार न, जडे सुकी गियो न। सै उना बदला सांई बेकार न, जिना जो बरखा होणे ला पेहले तेज होआ उड़ाई करी लेई जांदी है। परमेश्वरे उना तांई इक ऐसी जगा तैयार कितियो है जिथू सिर्फ काला नेहरा ही है। 18 जालू सै लोकां जो शिक्षा दिन्दे न, तां सै बेकार कने घमंडी गल्लां दा इस्तेमाल करदे न। सै लोकां जो दसदे न की सै उना शर्मनाक कम्मा जो करी सकदे जड़ा उना दा शरीर करणा चांदा है, कने सै उना लोकां जो दुबारा पाप करणे तांई भटकाई दिन्दे न, जिना थोड़े बकत पेहले ही यीशु मसीह पर भरोसा किता था। 19 झूठे गुरु लोकां जो दसदे न की सै जड़ा कुछ भी करणा चांदे न, सै करणे तांई उना जो अजादी है, हालांकि सै खुद गुलाम न क्योंकि उना दा अपणा पापी सभाब उना जो बुरे कम्म करणे तांई मजबूर करदा है। क्योंकि जड़ा कुछ भी तुहांजो काबू करदा है, तुसां उदे गुलाम बणी जादे न। 20 लोक संसारे दिया बुराईया ला बची गे जालू उना प्रभु यीशु मसीह जो उद्धारकर्ता मन्नी लिया, पर हुण फिरी दुबारा उना बुरे कम्मा च फसी गियो न, कने सै बुरे कम्म सान्झो काबू करदे न, इस तांई हुण यीशु मसीह जो छडणे बाद उना दी हालत पेहले ला भी बुरी होई गियो है, जालू उना भरोसा नी कितया था। 21 मेरा ऐ मतलब है, क्योंकि परमेश्वरे उना लोकां जो होर भी जादा सकत सजा देंगी जडे प्रभु यीशु मसीह जो छडी दिन्दे न, बजाए उना दे जिना कदी प्रभु यीशु मसीह जो अपनाया ही नी। उना तांई ऐई खरा होणा था की सै कदी ऐ जाणदे नी की जिन्दगी जो धर्मी तरीके ला जिणे दा क्या मतलब होंदा है। हुण सै जाणदे न की सही क्या है पर उना परमेश्वरे दे हुकमा मनणा बंद करी दितया है जडे असां प्रेरितां सिखायो थे। 22 उना सोगी जड़ा होंदा है सै दसदा है की ऐ कहाबतां सच्चियां न; सै कुत्तयां सांई न जड़ा अपणिया उलटिया जो चटणे तांई बापस ओंदा है, कने सै सुअरां सांई न जिसयो धोया जांदा है कने सै दुबारा चिकड़े च लोटणे तांई चली जांदा है।

3 हे प्यारे मसीह भाईयो, हुण मैं तुहांजो ऐ दुज्जी चिट्ठी लिखदा है, मैं तुहांजो ऐ दोनों चिट्ठियां इस तांई लिखियां न, ताकि जड़िया गल्लां तुसां पेहले ला ही जाणदे न, उना दे बारे च तुहांजो याद दिलाई करी तुहाड़े मना च साफ बिचार पैदा करी सकें। 2 मैं ऐसा इस तांई करा दा है क्योंकि मैं चांदा है की तुसां उना बचना जो

याद रखा, जड़े परमेश्वरे दे संदेश देणेबालयां बड़े पेहले बोलयो थे, कने साड़े उद्धारकर्ता, साड़े प्रभु यीशु मसीह दियां शिक्षां जो याद रखा जड़ियां तुहांजो उना प्रेरितां सिखाईयां थियां जड़े तुहाड़े बाल आये थे। 3 सारयां ला जरूरी गल्ल ऐ है जड़ी तुहांजो पता होणा चाईदी की मसीह दे दुबारा मुडी ओणे ला पेहले आखरी दिना च ऐसे लोक होंगे न जिना तुहाड़िया इसा गल्ला दा मजाक उड़ाणा की मसीहे दुबारा मुडी करी ओणा है। उना अपणिया बुरियां आदतां ला मजबूर होईकरी बुरे कम्म करणे जिना ला उना जो खुशी मिलदी है। 4 कने उना बोलणा, “उदे ओणे दा बायदा सच्च नी है! उनी कदी नी ओणा है, क्योंकि सारयां ला पेहले साड़े अगुवे थे, सै सारे मरी गियो न, पर फिरी भी कुछ नी बदलया है। सारियां चीजां तियां ही होंदिया आईयां न जालू ला परमेश्वरे इस संसारे जो बणाया है।” 5 सै जाणी बुझी करी इसा गल्ला जो नजरअंदाज करदे न की संसारे दिया शुरूआत च, परमेश्वरे बोलया कने अम्बर बणी गया। अपने बचने ला उनी धरतिया जो पाणिया ला लग किता, कने पाणिऐ ला सूकी जमिना जो बाहर लेई आया। 6 इस पाणिऐ ला ही उनी उस संसारे जो खत्म करी दिता जड़ा उस बकत था। उनी इक भारी बरखा किती कने सारिया धरतिया पर बाढ आई गई कने सारे जिन्दे प्राणी डुबी करी मरी गे। 7 जियां परमेश्वरे धरती कने अम्बरे जो बणाणे दा हुकम दिता था, तियां ही उनी इस हुणे दे युगे जो तालू दीकर बणी रेणे दा हुकम दिता जालू दीकर उसयो अग्गी च ना फुकी दे। परमेश्वर उना जो उस रोजे दीकर रखा दा है जालू उनी सारे लोकां दा न्याय करणा कने उना लोकां दा नाश करणा जड़े उदी इज्जत नी करदे। 8 हे मेरे प्यारे मसीह भाईयो, तुसां इसा इकी गल्ला जो कदी मत भुला की परमेश्वरे तांई इक दिन हजार सालां सांई है कने हजार साल इक दिन सांई है। उदे तांई इक दिन कने इक हजार साल सब इक बराबर है। 9 कुछ लोक सोचा दे न की प्रभु बापस मुडी ओणे दे बायदे जो पूरा करणे च देरी करा दा है पर प्रभु देरी नी करा दा है बल्कि सै तुहाड़े सोगी सबर रखा दा है। क्योंकि सै कुसी जो भी नाश नी करणा चांदा है। परमेश्वर चांदा है की हर कोई अपने मने जो फिराए कने गलत कम्मा जो करणा बंद करी दे कने उदे बाल आई जा। 10 पर प्रभुए पक्का ही बापस ओणा है। कने उनी अचानक ही मुडी करी ओणा है जियां कोई चोर अचानक आई जांदा है। उस दिने अम्बरे च बड़े गड़ाकयां दा शोर होणा है। कने अम्बरे लोप होई जाणा। अम्बरे च सारा कुछ मतलब की सूरज, चाँद, तारे सब कुछ अग्गी च खत्म होई

जाणा। उस दिन परमेश्वरे उना सारे कम्मा जो प्रगट करी देणा है जड़े लोकां कितयो न, ताकि उना दा न्याय होई सके। 11 परमेश्वरे पक्का ही इना सारियां चीजां दा नाश करी देणा है, जियां मैं हुण बोलया है, इस तांई तुहांजो पबित्र चाल चलन कने भक्ति च जिन्दगी जिणा चाईदी जड़ी परमेश्वरे जो खुश करे। 12 जियां की तुसां उस दिने दा इंतजार करा दे न जालू परमेश्वरे संसारे दे लोकां दा न्याय करणे तांई ओणा है, तां उस दिने दे जल्दी ओणे तांई अपणी तरफा ला पूरी कोशिश करा। उस दिन अग्गी भड़की पोंणा है कने अम्बरे जो भस्म करी देणा है, उसा गर्मियां ला अम्बरे दा सब कुछ पिघली जाणा। 13 पर असां उम्मीद करा दे न की परमेश्वरे इक नोआ अम्बर कने नोई धरती बणाणी जिदा उनी बायदा कितया था। ओथु सिर्फ धर्मी लोक ही रेंदे न। 14 इस तांई हे प्यारे मसीह भाईयो, जालू तुसां इना गल्लां दा होणे दा इंतजार करा दे न, इस तांई तुहांजो ऐसी जिन्दगी जिणे दी हर इक कोशिश करणा चाईदी जड़ी पबित्र कने परमेश्वरे जो खुश करदी हो कने इक दुज्जे सोगी शांतिया सोगी रिया। 15 साडे प्रभु दे सबर जो इक ऐसा मौका समझा, जडा सै तुहांजो ओणे बाले न्याय ला बचणे तांई दे दा है। ऐ सब कुछ साडे प्यारे मसीह भाई पौलसे भी परमेश्वरे दे दितयो ज्ञाने ला इक चिठिया च लिखया है, जडा मैं तुहांजो दसया है। 16 उनी अपणियां सारियां चिठियां च, जडियां उनी यीशु मसीह पर भरोसा करणे बालयां जो लिखियां न, उना च एसियां ही गल्लां करदा है जदियां तुहांजो लिखियां न। पर कुछ गल्लां जडियां सै लिखदा है, उना जो समझणा मुशकिल है। जिना लोकां खरी शिक्षा नी लियो है कने जिना दा मसीह पर भरोसा कमजोर होंदा है, सै इना मुशकिल गल्लां दा मतलब गलत समझांदे न, तियां ही जियां सै पबित्र शास्त्र दे कुछ हिस्सयां जो गलत तरीके ला दसदे न। इयां करिरी ला खुद ही अपणा नाश करी लेंदे न। 17 इस तांई हे मसीह भाईयो, तुसां पेहले ला ही जाणदे न की ऐ गल्लां होणियां न। इस तांई इसा गल्ला दा ध्यान रखा की जड़े लोक नियमा जो नी मंदे सै तुहांजो झूठ बोली करी भटकाई ना दें। अगर तुसां सच्चाई पर भरोसा करणा बंद करी दिगे जिस पर तुसां इक बकत पर बड़ा जादा भरोसा था। 18 पर तुसां साडे प्रभु, कने उद्धारकर्ता यीशु मसीह दे अनुग्रह जो होर जादा ला जादा अनुभव करणा चाईदा, कने ऐ की तुसां होर अच्छे तरीके ला जाणी सकन। उदी महिमा हुण कने हमेशा होंदी रे। आमीन। (aiōn g165)

1 यूहन्ना

1 असां तुहांजो इक माणुऐ दे बारे च लिखा दे न जड़ा जीवन दा बचन है, कने सै शुरूआत ला ही था, जिसयो असां सुणया, जिसयो असां ध्याने ने अपणी हखी ने दिखया कने हथां ने छुता। **2** ऐ माणु जड़ा जिन्दगी दिदा है सै धरती पर आया है, कने असां उसयो दिखया, कने उदी गबाई दिन्दे न, कने तुहांजो हमेशा दी जिन्दगी दे बारे च दसदे न, जिसयो पिता परमेश्वरे सांझो दसया। (aiōnios g166) **3** जड़ा कुछ असां यीशुऐ मसीह दे बारे च दिखया कने सुणया है, उदी गबाई तुहांजो भी दिन्दे न, इस ताई की तुहाड़ी संगती साडे सोगी हो: कने साड़ी ऐ संगती पिता परमेश्वर सोगी, कने उदे पुत्र यीशु मसीह सोगी है। **4** कने ऐ गल्लां असां इस ताई लिखदे न, की तुहाड़ी खुशी पूरी होई जा। **5** जड़ा शुभसमाचार असां यीशुऐ ला सुणया है, सै ऐ है, की परमेश्वर अच्छा है कने ज्योति सांई पबित्र है कने उदे च कोई भी बुराई नी है। **6** अगर असां बोलन, की परमेश्वरे सोगी साड़ी हिस्सेदारी है, कने असां फिरी भी बुराई करदे रेंदे न, तां असां झूठ बोलदे न कने सच्चाई ने नी जिन्दे न। **7** तुसां सै ही करा जड़ा सही है जियां परमेश्वर सिद्ध स्पे च सही है, तियां ही असां भी लौई च जी न, तां परमेश्वरे कने इक दुज्जे ने हिस्सेदारी रखदे न, कने उदे पुत्र यीशु मसीह दा खून सांझो साडे सारयां पापां ला शुद्ध करदा है। **8** अगर असां बोलन की असां कोई पाप नी किता, तां असां अपने आपे जो धोखा दिन्दे न, कने जड़ी सच्चाई परमेश्वर बोलदा है इस पर भरोसा नी करदे। **9** अगर असां परमेश्वरे सामणे अपने पापां जो मन्नी लेन, तां सै साडे पापां जो माफ करणे कने सांझो सारे अधर्म ला शुद्ध करणे च भरोसे दे काबील कने धर्मी है। **10** अगर असां बोलन की असां पाप नी किता, तां असां परमेश्वरे जो झूठा बणादे न, कने असां परमेश्वर दे बचन जो नी समझदे न कने सै जड़ा बोलदा है उदा पालन नी करदे।

2 हे मेरे बच्चो, मैं ऐ गल्लां तुहांजो इस ताई लिखा दा है, की तुसां पाप ना करन; कने अगर कोई पाप करे तां पिता परमेश्वर बाल साड़ा इक सहायक है सै यीशु मसीह है कने सांझो माफ करणे तांई पिता परमेश्वरे ला प्रार्थना करदा है कने सै धर्मी है। **2** कने उनी ही साडे पापां दी माफी तांई अपना बलिदान दिता: कने सिर्फ साडे ही नी पर संसारे दे सारे लोकां दे पापां तांई भी। **3** अगर असां परमेश्वरे दे हुक्मा जो मन्नी लेंगे, उसला ही सांझो पता चलणा की असां उसयो जाणदे न। **4** जड़ा कोई ऐ बोलदा है, मैं परमेश्वरे जो जाणी गया है, पर उदे हुक्मा जो नी

मनदा, सै झूठा है; कने परमेश्वरे दे सच्च दे अनुसार जिन्दगी नी जिन्दा है। 5 पर जड़ा कोई परमेश्वरे दे बचना जो मनदा है, उदे च सची परमेश्वरे दा प्यार सिद्ध होया है, सांझो इसी ने ही पता चलदा है, की असां उदे सोगी बणी रेंदे न। 6 जड़ा कोई ऐ बोलदा है की असां यीशु मसीह च टिकयो न, तां सै यीशु मसीह सांई ही चाल चलन रखन। 7 हे प्यारो, मैं तुहांजो कोई नोआ हुकम नी लिखदा, पर सेई पुराणा हुकम जड़ा शुरू ला तुहांजो मिलया है; ऐ पुराणा हुकम सै बचन है, जिसयो तुसां तालू सुणया जालू यीशु मसीह पर भरोसा किता। 8 फिर भी जड़ा हुकम मैं तुहांजो लिखदा है, सै नोआ हुकम है, कने इदी सच्चाई यीशु मसीह च कने तुसां च भी मिलदी है; क्योंकि हुण बुराई खत्म होंदी जा दी है कने सच्चाई कने पबित्रता बदा दी है। 9 जड़ा कोई ऐ बोलदा है, की मैं अच्छाई कने भलाई ने जी दा है; पर अपने मसीह भाईयां ने बैर रखदा है, सै हल्लै दीकर भी बुराई च ही है। 10 जड़ा कोई अपने मसीह भाईऐ ने प्यार रखदा है, सै भलाई ने जिन्दगी जिंदा है, कने उदे अंदर ऐसा कुछ नी है जड़ा कुसी दे पाप करणे दी बजा बणे। 11 पर जड़ा कोई अपने मसीह भाइये ने बैर रखदा है, सै बुराई च जी दा है कने बुराई च चलया है, कने नी जाणदा है की कुथु चलया है क्योंकि बुराईया उदियां हखी अनिया करी दितियां न। 12 हे बच्चो, मैं तुहांजो इस तांई लिखा दा है, की यीशु मसीह दे नाऐ ने तुहाडे पाप माफ होऐ न। 13 हे पिताओं, मैं तुहांजो इस तांई लिखा दा है, क्योंकि तुसां मसीह जो जाणदे न, जड़ा शुरू ला है। हे जवानो, मैं तुहांजो इस तांई लिखा दा है, की तुसां उस शैताने पर जित हासिल किती है: हे बचयां, मैं तुहांजो इस तांई लिखया है, की तुसां पिता परमेश्वरे जो जाणी गियो न। 14 हे पिताओं, मैं तुहांजो इस तांई लिखया है, क्योंकि तुसां मसीह जो जाणदे न, जड़ा शुरू ला है। हे जवानो, मैं तुहांजो इस तांई लिखया है, की जोरे बाले होआ, कने परमेश्वरे दा बचन तुसां च बणी रेंदा है, कने तुसां उस शैताने पर जित हासिल किती है। 15 तुसां ना तां संसारे ला कने ना तां संसारे दिया चीजां ने प्यार रखा अगर कोई संसारे ने प्यार रखदा है, तां उदे च पिता परमेश्वरे दा प्यार नी है। 16 क्योंकि जड़ा कुछ संसारे च है, मतलब की शरीर दी पापी इच्छा जो पूरा करणा, कने चीजां जो दिखणा कने उना जो पाणे दी इच्छा रखणा कने जड़ा उदे बाल है कने जड़ा सै करदा है उदा घमंड करणा, सै पिता परमेश्वरे दिया तरफा ला नी, पर संसारे दिया तरफा ला है। 17 संसार कने उदी बुरी इच्छा दोनो खत्म हुंदे जादे न, पर जड़ा परमेश्वरे दिया

इच्छा दे अनुसार चलदा है, सै हमेशा बणी रेंदा है। (aiōn g165) 18 हे बच्चो, ऐ मसीहे दा मुडी करी ओणे दा बकत है, जियां तुसां सुणया है, की मसीहे दा बिरोधी ओणे बाला है, उदे अनुसार हुण भी बडे भरी मसीह दे बिरोधी आई गियो न; इसला असां जाणदे न, की मसीह दे मुडी करी ओणे दा बकत है। 19 सारे जडे मसीह दा बिरोध करदे न सै निकलयो तां सांझो ला ही न, पर सांझो चे नी थे; क्योंकि अगर सांझो चे होंदे, तां साडे सोगी रेंदे, पर उना सांझो छडी दिता क्योंकि उना चे कोई भी साडा नी था। 20 पर तुहांजो तां यीशु मसीह दे जरिये पबित्र आत्मा मिलया है, कने तुसां सब सच्च जाणदे न। 21 मैं तुहांजो इस ताई नी लिखया, की तुसां सच्च जो नी जाणदे न, पर इस ताई लिखया है, की तुसां उसयो जाणदे न, कने इस ताई की कुसी भी झूठ दा जन्म सच्च ला नी होंदा है। 22 झूठा कुण है? सिर्फ सै जडा यीशु जो मसीहा होणे जो मना करदा है; कने मसीह दा बिरोधी सेई है, जडा पिता परमेश्वर दा कने पुत्र यीशु जो नी मनदा है। 23 जडा कोई पुत्रे जो नी मनदा है उदे बाल पिता परमेश्वर भी नी: जडा पुत्र यीशु जो मन्नी लेदां है, उदे बाल पिता परमेश्वर भी है। 24 जालू तुसां मसीह पर भरोसा किता कने जडा सच्चाई दा बचन तुसां सुणया, सै ही तुसां च बणी रे। अगर सै तुसां च बणी रे, तां तुसां भी पुत्रे च, कने पिता परमेश्वर च बणी रेणा। 25 हमेशा दी जिन्दगी सै बायदा है जडा पिता परमेश्वरे सांझो ने कितया है। (aiōnios g166) 26 मैं तुहांजो उना लोकां दे बारे च चिताबनी दे दा है जडे तुहांजो गलत शिक्षा ने धोखा देणे दी कोशिश करा दे न। 27 पर तुहांजो तां पबित्र आत्मा यीशु मसीह दे जरिये मिलया है, सै तुहाडे च हमेशा बणया रे; इस ताई तुहांजो सच्चाई दे बारे च कुसी माणुऐ जो सिखाणे दी जरूरत नी है, बल्कि पबित्र आत्मा तुहांजो उना सरियां चीजां दे बारे च जाणने च मदद करणी है जिना दी तुहांजो जरूरत है, जडा पबित्र आत्मा तुहांजो सिखाणा सै सच्च है, उस च कुछ झूठ नी है: इस ताई यीशु मसीह सोगी बणी रिया जियां की पबित्र आत्मा करणे ताई बोलया है। 28 हे बच्चों मसीह सोगी बणी रिया; की जालू उनी दोबारा प्रगट होणा, तां सांझो हिम्मत हो, कने असां उदे ओणे पर उदे सामणे शरमिदा ना होन। 29 क्योंकि तुसां ऐ जाणदे न, की यीशु मसीह धर्मी है, तां ऐ भी जाणदे न, की जडे कोई धर्म दे कम्म करदे न, सै परमेश्वर दे बच्चे न।

3 बिचार करा की पिता परमेश्वरे साडे ने कितणा प्यार किता है, की सांझो परमेश्वर दे बच्चे बोलन, कने सच्ची असां परमेश्वर दे बच्चे न। इस संसारे दे

लोक ऐ नी जाणदे न की असां परमेश्वर दे बच्चे न क्योंकि सै पिता परमेश्वर जो नी जाणदे। 2 हे प्यारो, हुण असां परमेश्वरे दी ओलाद न, कने हल्ले दीकर ऐ प्रगट नी होया, की असां भविष्य च क्या बणी जाणा। इतणा पता है की जालू उनी प्रगट होणा है, तां असां भी उदे सांई होणा, क्योंकि उसयो तदिया ही दिखणा जियां सै है। 3 कने जड़ा कोई यीशु मसीह पर आस रखदा है, सै अपने आपे जो तदेया ही पबित्र करदा है, जदेया सै पबित्र है। 4 जड़े कोई लगातार पाप करदे न, सै परमेश्वरे दी व्यवस्था जो नी मंदे कने पाप करणा व्यवस्था जो तोड़णा है। 5 कने तुसां जाणदे न, की सै इस तांई आया है की साड़े पापां दिया सजा जो दूर करी दे; कने उदे च कोई पाप नी है। 6 जड़ा कोई उदे च बणीरैदा है, सै लगातार पाप नी करदा; जड़ा कोई पाप करदा है, सै नी जाणदा की यीशु मसीह कुण है, कने ना ही उसयो जाणया है। 7 हे बच्चो, कुसी दे बेहकाबे च मत ओदे। जड़ा धार्मिकता दे कम्म करदा है, सेई यीशु मसीह सांई धर्मी है। 8 जड़ा कोई लगातार पाप करदा है, सै शैताने दिया तरफा ला है, क्योंकि शैतान शुरू ला ही पाप करदा आया है, परमेश्वरे दा पुत्र इस तांई आया, की शैताने दे कम्मा जो खत्म करे। 9 जड़ा कोई परमेश्वरे दे बच्चे न सै लगातार पाप नी करदा; क्योंकि परमेश्वर दा सभाब उदे च है: कने सै पाप नी करी सकदा, क्योंकि सै परमेश्वरे दा बच्चा है। 10 इसी ने परमेश्वरे दे बच्चे कने शैताने दे बच्चे जाणे जांदे न; जड़ा कोई धर्मे दे कम्म करदा, सै परमेश्वरे दिया तरफा ला है, कने जड़ा कोई अपने मसीह भाईऐ ने प्यार करदा है सै भी परमेश्वरे दिया तरफा ला है। 11 जड़ा समाचार तुसां शुरू ला सुणया है, से ऐ है, की असां इक दुज्जे ने प्यार रखिए। 12 कने आदम दे पुत्र कैन सांई मत बणदे, जड़ा उस शैताने दा बच्चा था, जिनी अपने भाईऐ दी हत्या किती, कने उनी उदी कुसा बजा ने हत्या किती? उनी इस तांई हत्या किती क्योंकि उदे अपने कम्म बुरे थे, कने उदे भाईऐ दे कम्म धर्मे दे थे। 13 हे मसीह भाईयो, अगर संसारे दे लोक तुहांजो ने बैर रखदे न तां हेरान मत होंदे। 14 सांझो पता है, की असां मौत दी शक्ति ला अजाद होई गियो न कने हुण साड़े बाल परमेश्वरे दिया तरफा ला हमेशा दी जिंदगी है; क्योंकि असां मसीह भाईयां ने प्यार रखदे न, कने जड़ा प्यार नी रखदा है सै हले भी मौत दिया शक्तिया दे अधीन है। 15 जड़ा कोई अपने भाईयां ने बैर रखदा है, सै हत्यारा है; कने तुसां जाणदे न, की कुसी भी हत्यारे च हमेशा दी जिन्दगी नी रैदी। (aiōnios g166) 16 असां प्यार जो यीशु मसीह ला ही जाणया, की उनी साड़े तांई अपने

प्राण दिते; इस ताई सांझो भी मसीह भाईयां ताई प्राण देणा चाईदे। 17 पर जिसदे बाल संसारे दी धन सम्पत्ति हो कने सै अपने मसीह भाईये जो कंगाल दिखीकरी उस पर तरस ना खा, तां उदे च परमेश्वरे दा प्यार नी होई सकदा। 18 हे मेरे प्यारे बच्चो, सांझो बचना कने गल्लां ला ही नी, पर उना दी सहायता करी के सच्चा प्यार करणा चाईदा। 19 जालू असां दुज्जयां ने प्यार करगे इसला ही सांझो पता चलणा है, की असां सच्च दी ओलाद न। कने जालू कदी साड़ा मन सांझो पर दोष ला, तां असां परमेश्वरे दे सामणे अपने मने जो दिलासा देई सकदे न। 20 क्योंकि परमेश्वर साडे मने ला बड्डा है; कने सब कुछ जाणदा है। 21 हे प्यारो, अगर साड़ा मन सांझो दोष नी ला, तां असां परमेश्वरे सामणे हिम्मत होंदी है। 22 कने जड़ा कुछ असां परमेश्वरे ला मंगदे न, सै सांझो उसला मिलदा है, क्योंकि असां उदे हुकमा जो मंदे न; कने जड़ा परमेश्वरे जो खुशी दिन्दा है असां सेई करदे न। 23 कने उदा हुकम ऐ है की असां उदे पुत्र यीशु मसीहे पर भरोसा करन कने जियां उनी सांझो हुकम दितया है तियां ही अपु चे प्यार रखन। 24 जड़ा उदे हुकमा जो मनदा है, सै परमेश्वर च रेंदा है कने परमेश्वर उना च रेंदा है। कने इसी ला ही उसा पबित्र आत्मा ला जड़ी उनी सांझो दिती है, असां जाणदे, की सै सांझो च रेंदा है।

4 हे प्यारो, हर इक कुसी पर भरोसा मत करा जड़ा बोले उस बाल पबित्र आत्मा है, पर उना जो परखा, की सै परमेश्वरे दिया तरफा ला हेन की नी; क्योंकि बडे भरी झूठे संदेश देणेबाले इस संसारे च आयो न, जडे बोलदे न की असां पिता परमेश्वरे दिया तरफा ला बोलदे न। 2 परमेश्वरे दी आत्मा जो तुसां इसा रीतिया ने पछेणी सकदे न, की जड़ा कोई माणु ऐ मनी लेंदा है, की यीशु मसीह माणु बणी करी आया है, सै परमेश्वरे दिया तरफा ला है। 3 कने जड़ा कोई माणु यीशुऐ जो नी मंदा है, सै परमेश्वरे दिया तरफा ला नी है; कने सेई मसीह दे बिरोधी दी आत्मा है; जिसदी चर्चा तुसां सुणी बैठयो न, की सै औणे बाला है, कने हल्ले भी संसारे च है। 4 हे बच्चों, तुसां परमेश्वरे दिया तरफा ला झूठे संदेश देणेबालयां जो हराया; क्योंकि जड़ा पबित्र आत्मा तुहाडे च है, सै शैताने ला बडा है जड़ा संसार च है। 5 सै परमेश्वर दिया तरफा ला झूठे संदेश देणेबाले संसारे दे न, इस ताई सै संसारे दियां गल्लां करदे न, कने संसार दे लोक उना दी सुणदे न। 6 असां परमेश्वरे दिया तरफा ला न, जडे परमेश्वरे जो जाणदे न, सै साड़ी सुणदा है; जड़ा परमेश्वरे जो नी जाणदा है सै साड़ी नी सुणदा है इस तरीके ने असां सच्च दी आत्मा कने झूठ दी आत्मा जो

पछेणी लेंदे न। 7 हे प्यारो, असां अपु चे प्यार रखन; क्योंकि प्यार परमेश्वर ला है कने जड़ा कोई दुज्जयां सोगी प्यार करदा है, सै परमेश्वरे दा बच्चा है कने परमेश्वरे जो जाणदा है। 8 जड़ा दुज्जयां जो प्यार नी करदा सै परमेश्वरे जो नी जाणदा है, क्योंकि परमेश्वर प्यार है। 9 जड़ा प्यार परमेश्वर साडे ला रखदा है, सै इसा गल्ला ने प्रगट होया है की पिता परमेश्वरे अपने इकलोते पुत्रे जो संसार च भेजया है ताकि सांझो उसला हमेशा दी जिन्दगी मिल्ले। 10 सच्चा प्यार ऐ नी है की असां परमेश्वरे ने प्यार किता, पर उनी सांझो ने प्यार किता है, पर परमेश्वरे साडे पापां जो माफ करणे ताई अपने पुत्रे जो बलिदान होणे ताई भेजया है। 11 हे प्यारो, जालू परमेश्वरे सांझो ने ऐसा प्यार किता, तां सांझो भी अपु चे ऐदिया ही प्यार रखणा चाईदा। 12 परमेश्वरे जो कदी भी कुनी नी दिखया है; अगर असां अपु चे प्यार रखिए, तां परमेश्वर सांझो च बणी रेंदा है; कने उदा प्यार सांझो च सिद्ध होई गया है। 13 इसी ने सांझो पता चलदा है, की असां परमेश्वर च रेंदे न, कने परमेश्वर सांझो च रेंदा है; क्योंकि उनी अपनी पवित्र आत्मा सांझो दितया है। 14 असां पुत्रे जो दिखया है कने गबाई भी दिन्दे न की पिता परमेश्वरे अपने पुत्रे जो संसारे दे लोकां दा उद्धारकर्ता बणाई के भेजया है। 15 जड़ा कोई ऐ अपनाई लेंदा है की यीशु परमेश्वरे दा पुत्र है, परमेश्वर उदे च रेंदा है, कने सै परमेश्वरे च रेंदा है। 16 असां जाणदे न कने भरोसा करदे न की परमेश्वर सांझो ने प्यार करदा है, उसयो असां जाणी गे न, कने सांझो उदा भरोसा है; परमेश्वर प्यार है जड़ा प्यार च बणया रेंदा है परमेश्वर उदे च रेंदा है, कने सै परमेश्वरे च रेंदा है। 17 इसी ला ही प्रेम सांझो च पूरा होया कि, न्याय दे दिने सांझो हिम्मत मिल्ले की सै सांझो नी दिगा, क्योंकि मसीह सांई इक दुज्जे सोगी प्यार करदे न कने इसा दुनिया च मसीह सांई रेंदे न। 18 प्यार च डर नी होंदा, सिद्ध प्यार डरे जो भी दूर करी दिन्दा है, क्योंकि जड़ा डरदा है सै सजा ला डरदा है। जड़ा डरदा है सै प्यारे च सिद्ध नी होया है। 19 परमेश्वरे सांझो ला पेहले प्यार किता इस ताई असां परमेश्वर कने दुज्जयां सोगी प्यार करदे न। 20 अगर कोई बोले, मैं परमेश्वरे ने प्यार करदा, पर अपने मसीह भाईऐ ने दुशमणी रखे; तां सै झूठा है; क्योंकि जड़ा अपने मसीह भाईऐ ने जिसयो उनी दिखया है उसला प्यार नी रखदा है, तां सै परमेश्वरे ने भी प्यार नी रखी सकदा है, जिसयो उनी दिखया भी नी है। 21 कने उसला सांझो ऐ हुकम मिलया है, की जड़ा कोई परमेश्वरे ने प्यार रखदा है, सै अपने मसीह भाई ने भी प्यार रखे।

5 जिदा ऐ भरोसा है की यीशु ही मसीह है, सै जन परमेश्वरे दी संतान है कने जड़ा कोई पिता परमेश्वरे ला प्यार करदा है, तां सै उदी संतान ला भी प्यार करदा है। **2** जालू असां परमेश्वरे ने प्यार करदे न, कने उदे हुकमा जो मंदे न, तां इसी ने सांझो पता चलदा है, की परमेश्वरे दी ओलाद ने प्यार रखदे न। **3** परमेश्वरे ने प्यार करणे दा मतलब है की असां उदे हुकमा जो मनन; कने उदे हुकमा जो मनणा बड़ा कठिन नी न। **4** क्योंकि जड़े कोई परमेश्वरे दे बच्चे न, सै संसारे पर जित हासिल करदे न, कने सै जीत, जिसने संसारे जो रांदा है, सै साड़ा भरोसा ही है। **5** संसारे पर जीत पाणे बाला कुण न? सिर्फ सेई जिसदा भरोसा है, की यीशु ही परमेश्वरे दा पुत्र है। **6** ऐ यीशु मसीह है, जिसयो परमेश्वरे इस संसार च भेजया है, कने उसयो पाणिऐ ने बपतिस्मा दितया था, कने बाद च जालू सै मरी गया तां उदा खून बेह गया। सै सिर्फ बपतिस्मा लेणे तांई नी आया था पर सूली पर अपणा खून बहाइ करी मरया भी। पबित्र आत्मा दसदा है की यीशु मसीह परमेश्वरे ला आया, कने पबित्र आत्मा हमेशा सेई दसदा है जड़ा सच्च है। **7** गबाई ऐ है की यीशु मसीह साड़े पापां तांई बलिदान होया, ऐ तिन्न गल्लां इसदी गबाई दिन्दियां न। **8** पबित्र आत्मा, पाणी, कने खून; तिन्नो इक ही गल्ल बोलदियां न। **9** जालू असां माणुऐ दी गबाई मन्नी लेंदे न, तां परमेश्वरे दी गबाई तां उसला भी बदीकरी है कने परमेश्वरे दी गबाई ऐ है, की उनी अपने पुत्रे दे बारे च गबाई दितियो है। **10** जड़ा परमेश्वरे दे पुत्रे पर भरोसा करदा है, सै अपने मने च ही गबाई रखदा है; जिनी परमेश्वरे पर भरोसा नी रखया, उनी परमेश्वरे जो झूठा बणाया; क्योंकि उनी उसा गबाइया पर भरोसा नी किता, जड़ी परमेश्वरे अपने पुत्रे दे बारे च दिती है। **11** कने सै गबाई ऐ है, की परमेश्वरे सांझो हमेशा दी जिन्दगी दितियो है कने सांझो ऐ हमेशा दी जिन्दगी परमेश्वरे दे पुत्रे ला मिल्ली है। (aiōnios g166) **12** जड़ा पिता परमेश्वरे दे पुत्र यीशु मसीह जो अपनांदा है, उदे बाल हमेशा दी जिन्दगी है; कने जड़ा परमेश्वरे दे पुत्रे जो नी अपनांदा है, उदे बाल हमेशा दी जिन्दगी भी नी है। **13** मैं तुहांजो ऐ सब इस तांई लिखया है की तुसां, जड़े परमेश्वरे दे पुत्रे पर भरोसा करदे न, की तुहांजो पता लग्गे की हमेशा दी जिन्दगी तुहाड़ी है। (aiōnios g166) **14** कने सांझो परमेश्वरे सामणे जड़ी हिम्मत होंदी है, सै ऐ है; की अगर असां उदी इच्छा ने कुछ मंगदे न, तां सै साड़ी सुणदा है। **15** कने जालू असां जाणदे न, की जड़ा कुछ असां परमेश्वरे ला मंगदे न, सै साड़ी सुणदा है, तां ऐ भी जाणदे न, की जड़ा कुछ असां

मंगया है सांझो मिल्ला भी है। 16 अगर कोई अपने मसीह भाईए जो ऐसा पाप करदे दिखे, जिदा परिणाम मौत न हो, तां सै उदे ताई परमेश्वरे ला प्राथना करा तां परमेश्वरे उदिया जिन्दगिया दी रक्षा करणी। क्योंकि इक पाप ऐसा भी होदा है जिदा नतीजा मौत है; मैं इदे बारे च परमेश्वरे ला प्राथना करणे ताई नी बोलदा। 17 हर तरा दा अधर्म तां पाप है, पर ऐसा पाप भी है, जिदा नतीजा मौत है। 18 सांझो पता हे, की जड़ा कोई परमेश्वर दा बच्चा है, सै लगातार पाप नी करदा; क्योंकि परमेश्वरे दा पुत्र यीशु मसीह उदी रक्षा करदा है कने शैताने उसयो छुई नी सकदा। 19 असां जाणदे न, की असां परमेश्वरे ला न, कने सारे संसारे दे लोक उस शैताने दे वशे च पियो न। 20 कने ऐ भी जाणदे न, की परमेश्वरे दा पुत्र यीशु मसीह इस संसार च आया कने उनी सांझो समझ दिती, की असां उस सच्चे परमेश्वरे जो पछेणन। असां सच्चे परमेश्वरे सोगी करीबी रिश्ते च न क्योंकि साड़ा उदे पुत्र यीशु मसीह सोगी करीबी रिश्ता है। सच्चा परमेश्वर कने हमेशा दी जिन्दगी ऐई है। (aiōnios g166) 21 हे बच्चों, अपने आपे जो हर इक ऐसी चिजा ला दुर रखा जड़ी तुहाड़े दिले च परमेश्वरे दी जगा ले।

2 यूहन्ना

1 मैं यूहन्ना कलीसिया दा अगुवा, मैं ऐ चिट्ठी उसा आदरणीय जनानिया जो कने उसा दे बच्चयों जो लिखा दा है, जिना जो परमेश्वरे चुणया है। मैं सच्ची तुहांजो ने प्यार करदा है, कने सिर्फ मैं ही नी पर सै सारे भी प्यार करदे न, जड़े परमेश्वरे दी सच्चाईया पर भरोसा रखदे न। **2** असां तिजो ला इस ताई प्यार करदे क्योंकि सच्ची शिक्षा साडे मना च बणियो है सै हमेशा साडे सोगी बणी रेणी है। (aiōn g165) **3** परमेश्वर पिता कने उदे पुत्र यीशु मसीह दिया तरफा ला अनुग्रह, दया कने शांति असां सारयां सोगी बणी रे। जड़े सच्च जो मंदे कने इक दुज्जे ने प्यार करदे न। **4** मैं बड़ा खुश होया जालू मैं तेरे कुछ बचयां दे बारे च सुणया की सै सचाई ने जिन्दगी जी दे न, सै बिलकुल सै ही करा दे न जड़ा साडे पिता परमेश्वरे करणे जो बोलया। **5** हुण हे आदरनीय जनानी, मैं तिजो ला विनती करदा है, की सांझो इक दुज्जे ने हमेशा प्यार करणा चाईदा। ऐ कोई नोआ हुकम नी है पर सेई हुकम है जिसयो असां उस बकते ला जाणदे न जालू असां मसीह दे पिच्छे चलणा शुरू कितया था। **6** सच्चा प्यार सै है जड़ा असां तालू करदे न जालू असां परमेश्वर दे हुकमा जो मंदे न, जालू ला असां मसीह दे पिच्छे चलणा शुरू कितया है, तालू ला असां सुणया है की परमेश्वरे तुहांजो हुकम दितया है की तुहांजो हमेशा इक दुज्जे ने प्यार करदे रेणा चाईदा। **7** मैं ऐ इस ताई बोला दा है क्योंकि केई लोक न जड़े झूठे उपदेश दिन्दे न सै मतियां जगां च गियो न, सै बोलदे न की यीशु मसीह माणुऐ दे स्पे च इसा दुनिया च नी आया है। जड़ा कोई ऐ नी मंदा की यीशु माणुऐ दे स्पे इसा धरती च नी आया है तां सै माणु मसीह दा बिरोधी है कने लोकां जो हमेशा धोखा दिदा है। **8** इस ताई तुसां ऐ ध्यान रखा की ऐ लोक तुहांजो धोखा ना देन, ताकि परमेश्वरे दी सेवा ताई कितियो मेहनत बेकार ना होई जा कने परमेश्वरे तुहाड़ी सेबकाई ताई तुहांजो पूरा इनाम देणा। **9** जड़े लोक सच्ची शिक्षा ला भटकी जांदे न कने मसीह दी शिक्षा जो नी मंदे न, सै परमेश्वरे सोगी संगती च नी न। जड़े लोक यीशु मसीह दी शिक्षा जो मंदे न सै परमेश्वरे सोगी कने उदे पुत्र यीशु सोगी संगती च न। **10** अगर कोई तुहाड़े बाल आए कने कुछ सिखा दा है, जड़ा मसीह यीशु दी शिक्षा ला लग है। ना तां उदी मेहमान नबाजी करा, कने ना ही उसयो नमस्ते करा। **11** क्योंकि जड़ा कोई ऐसे माणुआं दा स्वागत करदा है, सै उदे बुरे कम्मा च हिस्सेदार होदा है जड़ा सै करदा है। **12** मैं होर भी मतियां गल्लां तुहांजो दसणा

चांदा है, पर मैं उना जो इयां चिठिया च नी लिखणा चांदा है, पर मिंजो आस है,
की मैं तुहाड़े बाल ओऐ, कने आमणे सामणे होईकरी गल्लां करे तालू असां पूरी
तरा ला खुश होणा। 13 ऐथू तुहाड़ियां बेहणा दे बच्चे, जिना जो परमेश्वरे चुणयां है
सै तुहांजो नमस्कार करा दे न।

3 यूहन्ना

1 मैं यूहन्ना कलीसिया दा अगुवा इसा चिठिया जो अपने प्यारे भाई गयुस जो लिखदा है, मैं तिजो ला सच्चा प्यार करदा है। **2** हे प्यारे, मेरी ऐ प्रार्थना है; जियां तुसां भरोसे च मजबूत होंदे जांदे न, ठीक तियां ही बाकी होर कम्मा च भी तरकी करा कने स्वस्थ रिया। **3** क्योंकि कुछ विश्वासी भाईयां आई करी, मिजो दसया की तुसां अपनी जिन्दगी इमानदारिया ने सच्चाई च जी दे न, तां मिजो बड़ी खुशी होई। **4** जालू भी मैं ऐ सुणदा है की सै लोक जडे मेरे बचयां सांई न, सै उसी तरीके ने जी दे न, जडा सच्ची परमेश्वरे सांझो दसया है, इसला मिजो होर भी जादा खुशी होंदी है। **5** हे प्यारे, तू बड़िया इमानदारिया ने साडे मसीह भाईयां दी मदद किती जडे शुभसमाचार प्रचार तांई यात्रा करा दे थे, चाहे सै तुहाडे तांई अनजाण ही थे। **6** उना चे केई लोकां ऐथू दे विश्वासियां जो कलीसिया च दसया है की तू अपने मसीह साथियां ने कितणा प्यार करदा है। हुण मैं तिजो ने बोलदा है तिजो ऐसे मसीह साथियां दी मदद करदे रेणा चाईदा जडे मसीह दा शुभसमाचार प्रचार करणे तांई यात्रा करदे न क्योंकि ऐ परमेश्वरे जो खुश करदा है। **7** क्योंकि सै मसीह दा शुभसमाचार सुणणे तांई निकलयो न, कने भरोसा नी करणे बालयां ला कोई मदद नी लेंदे। **8** इस तांई ऐसयां दा अपने घरे ओणे पर स्वागत करा कने जड़ी उना दी जरूरत है सै दिया, जिसने असां भी सच्ची सेवा दे हिस्सेदार बणन। **9** मैं कलीसिया दे ना इक चिट्ठी लिखी; पर दियुत्रिफेस उनी मेरियां गल्ला जो मनणे ला मना करी दिता क्योंकि सै खुद हमेशा ला ही कलीसिया दा अगुवा बणना चांदा है। **10** इस तांई जालू मैं ओणा, तां तुहाडे सामणे उदे कम्मा जो जडा सै करा दा कने जडा साडे बारे च बुरियाँ-बुरियाँ गल्लां बोलदा है सारा कुछ दसगा; कने इतणा ही नी, सै अपु तां शुभसमाचार प्रचार करणे बाले मसीह भाईयां जो स्वीकार नी करदा है कने ना ही कलीसिया दे लोकां जो ऐसा करणा दिन्दा है कने जडे करणा चांदे न, उना जो मना करदा है, कने कलीसिया ला निकाली दिन्दा है। **11** हे प्यारे, उना माणुआं दी नकल मत करदे जडे बुरे कम्म करदे न, पर उना माणुआं दे पिच्छे चलनयो जडे अच्छे कम्म करदे न। जालू कोई अच्छा कम्म करदा है, तालू सै ऐ साबित करदा है, की मैं परमेश्वरे दा पुत्र है कने जडा बुराई करदा है उनी परमेश्वरे जो नी दिखया। **12** दिमेत्रियुस दे बारे च कलीसिया दे सारे लोक बोलदे न की बडा अच्छा बन्दा है क्योंकि सै सच्चाई ने जिन्दगी जिन्दा है, सच्च भी अपु उदी गबाई

दिदा है: कने असां भी बोलदे न, की सै बड़ा अच्छा बन्दा है कने तू जाणदा है,
असां सच्च बोलदे न। 13 मैं होर भी मतियां गल्लां तुहांजो दसणा चांदा है, पर मैं
उना जो इयां चिठिया च नी लिखणा चांदा है। 14 पर मिजो आस है, की मैं तुहाड़े
बाल ओऐ, कने आमणे सामणे होईकरी गल्लां करे तालू असां पूरी तरा ला खुश
होणा। मैं प्राथना करदा है की परमेश्वर तिजो शांति दे। ऐथू दे मसीह मित्र तिजो
नमस्कार करदे न ओथु दे दोस्तां दे ना लेई-लेई के नमस्कार बोली दियां।

यहूदा

1 मैं, यहूदा तुहांजो ऐ चिठ्ठी लिखा दा है। मैं यीशु मसीह दा सेबक कने याकूबे दा छोटा भाई है। मैं तुसां लोकां जो लिखा दा है, जिना जो परमेश्वरे अपने उपर भरोसा करणे ताई सदया है। साड़ा पिता परमेश्वर तुहांजो ने प्यार करदा है कने तुहाड़ी रक्षा करदा है। **2** मैं प्रार्थना करदा है की परमेश्वर तुहांजो दया, शांति कने प्यार बड़ा जादा दे। **3** हे प्यारे मसीह भाईयो, मैं तुहांजो उसा नोई जिन्दगी दे बारे च लिखणे दी हर इक कोशिश करा दा है कने जड़ी यीशु मसीह दे जरिये परमेश्वरे दिया तरफा ला होंदी है कने जिसा च असां सारे हिस्सेदार न। पर हुण मिंजो इसा चिठिया जरिये तुहांजो प्रोत्साहित करणे दी जरूरत महसूस होआ दी है ताकि तुसां मसीह पर भरोसे च टिकी रेणे ताई कोशिश करा। परमेश्वरे अपने लोकां ताई ऐ भरोसा इक ही बरी हमेशा ताई दितया है, कने इसयो बदली नी सकदे। **4** मैं तुहांजो इस ताई लिखा दा है क्योंकि कुछ ऐसे लोक न जड़े भरोसा करणे दा दिखावा करदे न, कने परमेश्वरे दी इज्जत नी करदे न कने तुहाड़िया कलीसिया च शामिल होई गियो न, कने गलत शिक्षा दिन्दे न क्योंकि परमेश्वरे अपने अनुग्रह ला साड़े पापां जो माफ करी दिन्दा है, इस ताई असां बुरे कम्म कने पाप करी सकदे न, जड़ा साड़ा इकलोता मालिक कने साड़ा प्रभु है। बड़े बकत पेहले ला, पबित्र शास्त्र च लिख्या है की परमेश्वरे ऐसे लोकां जो सजा देणी है। **5** हालांकि तुसां इना सारियां गल्लां दे बारे च जानदे न, फिरी भी मैं तुहांजो इना गल्लां दी याद दिलाणा चांदा है, की परमेश्वरे इस्राएलियां जो गुलामी ला अजाद कराया कने मिस्र देशे ला कडी लेई आया, पर बादे च उनी सारयां जो मारी दिता, जिना रेगिस्तान च उस पर भरोसा नी किता। **6** याद करा की परमेश्वरे उना शैताने दे दूतां जो कियां सजा दिती, जिना अपणिया जिम्मेदारियां जो नी निभाया, कने उना अपने पदां जो छडी दिता। परमेश्वरे इना स्वर्गदूतां जो नेहरे च रखया है, कने ऐसे संगला ला बनया है जिना जो कोई नी तोड़ी सकदा ताकि उस महान न्याये बाले दिने उना दा न्याय होई सके। (aïdios g126) **7** इस ताई इना इस्राएली कने स्वर्गदूतां सांई, उना लोकां जो भी याद रखा जड़े सदोम कने अमोरा शहरां च कने उना दे अखे-बखे दे ग्रां च रेंदे थे, की उना सोगी क्या होया था। सै लोक व्यभिचारी होई गियो थे, कने हर तरा दे नाजायज यौन रिशतयां च पेई गियो थे, इस ताई परमेश्वरे उना जो अग्नी ने मारी दिता। उना सोगी जड़ा होया सै झूठे गुरूआं ताई इक चेताबनी है की उना जो

भी कदी नी बुझणे बालिया अग्गी दी सजा मिलणी है। (aiōnios g166) 8 इना उदाहरणा दे बारे च जाणने बाद भी, ऐ भरोसा होणे दा दिखावा करणे बाले माणु इयां ही पाप करदे न कने बोलदे न की उना दर्शण दिखया है। सै अपने शरीर जो पाप करणे ताई इस्तेमाल करदे न, कने परमेश्वरे दे अधिकारां जो नी मंदे न, कने महिमामय स्वर्गदूतां जो बदनाम करदे न। 9 पर ऐथू दीकर की प्रधान स्वर्गदूत मीकाईले भी ऐसियां बुरियां गल्लां नी कीतियां जदियां गल्लां ऐ झूठे गुरू करदे न। पर जालू उनी शैताने सोगी बेहस किती कने मूसा परमेश्वरे दा संदेश देणेबाले दिया लाशा जो लेई जाणे ताई अपने अधिकारे जो चुनौती दिती, तां मीकाईले ऐ नी सोचया की उदे बाल बुरियां गल्लां बोली करी शैताने पर बुरा दोष लाणे दा हक है। बल्कि उनी बोलया, “प्रभु तजो ला सकताईया ला गल्ल करे।” 10 पर सै लोक जडे परमेश्वरे दी अराधना नी करदे, सै ऐसिया गल्लां दा बिरोध करणे ताई उना दे बारे च बुरा भला बोलदे न, जडियां उना जो समझ नी ओदियां; कने सै जंगली जानवरां सांई व्यवहार करदे न, कने जिना कम्मा दे बारे च सै जाणदे नी न, उना जो बिना सोचयो समझे करदे न, परमेश्वरे उना जो सजा देंणी है। 11 उना दा बड़ा बुरा होणा है! की सै कैन सांई बुराई दे रस्ते पर चलदे न, जिनी अपने भाई दी हत्या करी दिती थी, क्योंकि सै भाईऐ ला जलदा था, क्योंकि परमेश्वरे उदे भाईऐ दे बलिदान जो अपनाई लिया था पर उदे बलिदाने जो नी। उना जल्दबाजी च सेई गलती किती जड़ी बिलामे होर लोकों जो पाप पासे लेई जाणे दी किती ताकि पैसे कमाई सके। जियां मूसा दे खिलाफ जाणे ला कोरह दा नाश होई गया, तियां ही उना लोकां दा भी नाश होई जाणा जडे परमेश्वरे दे खिलाफ जांदे न। 12 जियां पाणिऐ अंदर लुकियां चटाना समुंद्री जाजां तांई खतरनाख न, तियां ही ऐ लोक तुहाडे सोगी धामा च तुहाडे तांई खतरनाख न। चाहे सै प्रभु भोज च शर्मनाक कम्म करदे न पर सै इना कम्मा दिया बजा ला कोई भी शर्म महसूस नी करदे। सै उना पुहाला सांई न जडे अपनी ही देखभाल करदे न; सै दुज्जयां लोकां दी सहायता नी करदे। सै उना बदला सांई न जिना जो सुकी होआ बिना बरखा कितयो उडाई लेई जांदी है। सै बायदे तां बडे करदे न, पर कुछ दिन्दे न। फसल दे बकते दे रुखां सांई न जिना पर कोई फल नी होंदा है जिना जो उखाड़ी दिन्दे न, मतलब की सै मरी गियो न। 13 समुन्द्रे दियां भारी लेहरां सांई जडियां गंदा झाग बणादियां न, ऐ लोक भी शर्मनाक कम्म करदे न। सै कुछ तारयां सांई न जडे इक सीधे रस्ते पर नी

चलदे, कने सही रस्ता नी दसदे। प्रभु उना ताई इक जगा रखा दा है जड़ा जिथू पूरा नेहरा ही है जिथू उना जो हमेशा ताई रेणा पोंणा है। (aiōn g165) 14 कने हनोक जड़ा पेहले माणु आदम ला बाद सतमी पीढ़ियां च जमया था, उनी इना अधमीं लोकां दे बारे च भविष्यवाणी किती, “सुणा! परमेश्वरे पक्का ही अपने अणगिनत स्वर्गदूतां सोगी ओणा। 15 सारे लोकां दा न्याय करणे ताई, उना सारे बुरे कम्मा ताई उना पर दोष लाणे ताई जड़े उना परमेश्वरे दे खिलाफ कितयो न कने उना सारियां भद्दी गल्लां ताई जड़े उना उदे खिलाफ बोलियां न।” 16 ऐ लोक हमेशा परमेश्वरे दे खिलाफ बोलदे न कने दुज्जयां लोकां च गलती तोपदे न। सै लगातार उना बुरे कम्मा जो करदे न जड़े उना दे दिल करणा चांदे न। सै अपने बारे च घमंड ला दाबा करदे न कने खुद दे फायदे ताई दुज्जयां लोकां दी चापलूसी करदे न, उना जो पिता परमेश्वरे दिया तरफा ला सजा मिलणी। 17 पर हे प्यारे मसीह भाई, तुसां उना गल्लां जो याद रखा; जड़े साडे प्रभु यीशु मसीह दे प्रेरित बड़े पेहले बोली बैठयो न। 18 सै तुहांजो ला बोलदे थे, “साडे प्रभु यीशु मसीह दे मुडी करी बापस ओणे ला पेहले, ऐसे लोकां होंणा है जिना प्रभु कने उदे लोकां दा मजाक उड़ाणा। ऐ सेई लोक न जिना दिया जान्दियां च बुरी इच्छां दा काबू है।” 19 ऐ सै लोक न, जड़े तुहांजो च फुट पांदे न, उना दिया बुरियां इच्छा उना जो काबू करदियां न, कने उना च पबित्र आत्मा नी है। 20 पर हे प्यारे भाईयो तुहांजो इक दुज्जे दी सहायता करदे रेणा चाईदा ताकि उना पबित्र सच्चाईयां च जिना पर तुसां भरोसा करदे न, इक दुज्जे जो बधाई सकन। तुहांजो पबित्र आत्मा दिया अगुवाई च प्राथना करणी चाईदी। 21 तुहांजो इस भरोसे सोगी जीणा चाईदा की परमेश्वर सांझो ला प्यार करदा है। हालांकि तुसां उस दिने दा इंतजार करदे न जालू साडे प्रभु यीशु मसीहे बापस मुडी करी ओणा ताकि तुहांजो हमेशा दी जिन्दगी मिल्ले क्योंकि उनी सांझो पर दया किती है। (aiōnios g166) 22 उना लोकां ताई दयालु बणा जड़े ऐ नी जाणदे कुस पर भरोसा करन। 23 कुछ होर लोक जिना जो तुसां जाणदे न, अगर सै नरख पाससे जा दा दे न, तां उना जो उस हमेशा दिया अग्नी ला झट खिची करी बचाई लिया। कने दुज्जयां पर दया दस्सा। पर सियुदा ही पाप करणे ला बचणे ताई साबधान रिया। ऐथू दीकर की उना कपड़यां ला भी नफरत करा जिना पर पाप दे कम्मा दे दाग न। 24 इकलोता परमेश्वर ही है जड़ा तुहाड़ी रक्षा करी सकदा है, जालू सै तुहांजो अपणिया महिमा च अपने सामणे खरेडदा है। उनी सांझो साडे

प्रभु यीशु मसीह दे जरिये बचाया है। महिमा, गौरव, शक्ति, अधिकार बकत दी
शुरूआत ला ही उदे थे, हुण भी उदे न, कने हमेशा ताई उदे ही रेणे। आमीन। (aiōn
g165)

प्रकाशितवाक्य

1 इसा कताबा च उना गल्लां जो लिख्या है जडिया परमेश्वरे यीशु मसीह जो दसियां न। परमेश्वरे इस ताई उसयो दसियां ताकि सै अपने सेबकां जो उना घटना दे बारे च दस्सी सके जडियां जल्दी ही होणियां न। यीशु मसीहे ऐ संदेश मिंजो, अपने सेबक यूहन्ना बाल स्वर्गदूते जो भेजी करी दसया, **2** इस ताई, मैं सै सब कुछ लिख्या जड़ा मैं दिखया। मैं इसा कताबा च परमेश्वरे दा बचन कने सै सच्चियां शिक्षां लिखियां न जिना दे बारे च यीशु मसीहे मिंजो दसया। **3** परमेश्वरे हर उस माणुऐ जो आशीष देणी जडे इसा भविष्यवाणियां जो दुज्जयां जो पढी करी सुणादां है, कने उनी हर उस माणुऐ जो आशीष देणी जडे उसयो सुणदे न कने इसयो मंदे न। क्योंकि ऐ चीजां जल्दी ही होणियां। **4** ऐ चिट्ठी यूहन्ना दिया तरफा ला आसिया प्रदेशे दिया सत्तां कलीसियाँ ताई है: मैं प्राथना करदा है की परमेश्वर तुहांजो पर अनुग्रह कने शांति दे। सै सेई परमेश्वर है, जड़ा बकत दिया शुरूआत ला लेईकरी हुणे दीकर कने हमेशा ताई नी बदलदा। कने उना सत्तां आत्मा दिया तरफा ला, जडियां परमेश्वरे दे सिहांसने दे सामणे न, **5** कने यीशु मसीह दिया तरफा ला जिदे बचना पर भरोसा करी सकदे न, सै सेई ही है जड़ा मरी करी दुबारा ला जिंदा होणे बालयां चे पेहला है कने सै इस संसारे दे सारे राजयां दा शासक है। कने यीशु मसीह सांझो ला प्यार करदा है। सै साडे ताई मरी गया कने उनी साडे पापां दिया सजा जो खत्म करी दितया है। इसा बजा ला असां याजकां दा इक परिवार बणी गियो न, जडे उदे पिता परमेश्वरे दी सेवा करदे न। इस ताई यीशु मसीह जो महिमा कने शक्ति हमेशा मिलदी रे। आमीन। (aiōn g165) **7** सुणा, सै बदलां सोगी औणे बाला है; कने हर इक जणे उसयो दिखणा, जडे लोक उदिया मौता ताई जिम्मेबार थे, उना भी उसयो ओदे दिखणा। कने धरतिया दे सारे लोकां जोरे-जोरे ला रोंणा जालू उना उसयो दिखणा। हॉं ऐसा ही होणा! आमीन। **8** प्रभु परमेश्वर बोलदा है, “मैं अलफा कने ओमेगा है, मतलब की मैं ही है जिनी सारियां चीजां दी शुरूआत किती, कने मैं ही है जिनी सारियां चीजां जो खत्म करणा, कने मैं ही है जड़ा हमेशा ला था, कने जड़ा औणे बाला है, मैं सारयां ला शक्तिशाली है।” **9** मैं यूहन्ना, तुहाड़ा साथी मसीह भाई, मैं भी तुहाड़े सांई दुख सेहन किता। मैं परमेश्वरे दे राज्य दा इक नागरिक है जियां की तुसां न, कने मिंजो भी अपणियां पेशानिया जो तियां ही सबर सोगी सेहन करणा चाईदा जियां तुसां करदे न। मैं परमेश्वरे दे बचन दा प्रचार करणे

कने यीशु दे बारे च दसणे दिया बजा ला पतमुस दे टापूए पर केदी बणाई करी भेजी दितया था। 10 तुआरे जो जड़ा परमेखरे दा दिन है, परमेखरे दी आत्मा मिंजो पर आई। कने मैं अपने पिच्छे ला कुसी जो बोलदे सुणया जड़ा तुरही साई उच्चा कने साफ अबाजा च बोला दा था। 11 उनी मिंजो बोलया जड़ा कुछ तू दिखदा है, उसयो कताबा च लिखी करी उना सत्तां कलीसियाँ जो भेजी दे जड़ियां इफिसस, स्मरना, पिरगमुन, थुआतीरा, सरदीस, फिलदिलफिया, कने लौदीकिया शहरां च न। 12 तालू मैं ऐ दिखणे ताई पिच्छे मुडया की कुण मिंजो ला गल्लां करा दा है, कने मैं सोने दे सत्त दिये दिखे; 13 कने उना दिय्यां बिच इक प्राणी दिखया जड़ा माणुए साई लग्गा दा था। उनी इक लम्बा चौला पाया था जड़ा उदे पैरां दीकर पुजदा था। उनी अपणिया छातिया दे चारो पास्से इक सोने दा पटका पाया था। 14 उदे सिरे दे बाल चीटिया उना साई चिट्टे या बर्फा साई थे। कने उदियां हखी अग्गी दिया लौई साई चमका दिया थियां। 15 उदे पैर पीतलू साई चमका दे थे, जियां पितलू जो भटिया च तपा दे होन, कने जालू उनी बोलया तां उदी अबाज बड़ी जोर दी थी, जियां केई झरनया ला पाणी पोणे दी अबाज होंदी है। 16 उनी अपने सजे हथे च सत्त तारे लियो थे, कने उदे मुंए ला तेज दोधारी तलवार निकलदी थी; उदा मुं उतणा ही चमका दा था जियां सूरज दोपेरा बड़िया धूपा च चमकदा है। 17 जालू मैं उसयो दिखया, तां झट उदे पैरां च मरयो माणुए साई पेई गया। पर उनी मिंजो पर सजा हथ रखीकरी बोलया, “डर मत; मैं ही है जिनी सारियां चीजां दी शुस्आत किती, कने मैं ही है जिनी सारियां चीजां जो खत्म करणा कने मैं सै है जड़ा हमेशा जिन्दा है, 18 चाहे मैं मरी गया था। पर हुण मैं जिन्दा है कने हमेशा जिन्दा रेणा; मैं युगां-युगां दीकर जिन्दा है; कने मेरे बाल मौत कने अधोलोक पर अधिकार है जड़ा मरयो लोकां दी जगा है। (aiōn g165, Hadēs g86) 19 इस ताई तू इना सारियां गल्लां जो लिखी ले, जिना जो तू दिखदा है, कने ऐ चीजां पक्का ही बादे च होणियां न।” 20 हुण मैं तिजो दसणा की मेरे सजे हथे दे सत्तां तारयां दा क्या मतलब है जड़ा पेहले पता नी था। इदा मतलब ऐ है की सत्त तारे उना स्वर्गदूतां जो दसदे न जड़े सत्त कलीसियां दी रखबाली करदे न कने सत्त दिये सत्त कलिसियां जो दशादे न।

2 उनी मिंजो ऐ भी बोलया, इफिसस शहरे दिया कलीसिया दे अगुवे जो ऐ संदेश लिख: मैं सेई है जड़ा अपने सज्जे हथे च सत्त तारे लेई रखदा है, कने सोने दे सत्त

दिव्यां दे बिच चलदा है, मैं तिजो ला ऐ बोलदा है: **2** मैं जाणदा है की तू क्या करदा है, कने कितणी मेहनत करदा है कने कदी हार नी मंदा। मैं ऐ भी जाणदा है की तू बुरे लोकां दियां झुठियां शिक्षा जो सेहन नी करदा। तू उना लोकां जो जांचया परखया जडे बोलदे न की सै प्रेरित न पर असल च सै प्रेरित नी न कने सै सारे झूठे निकले। **3** तू सबर रखीकरी दुखां जो सेहन कितया है क्योंकि तू मिंजो पर भरोसा करदा है, कने फिरी भी तू मेरी सेबा करणा बंद नी किती। **4** पर हुण मिंजो तिजो ला ऐ शिकायत है की: हुण तू मिंजो ला सियुदा प्यार नी करदा जदिया प्यार तू मिंजो ला तालू करदा था जालू तू पैली बरी मिंजो पर भरोसा किता था। **5** इस ताई याद कर की तू शुरूआत च मिंजो ला कदिया प्यार करदा था कने हुण तू मिंजो ला सियुदा प्यार नी करदा। इसा गल्ला जो मन्नी ले कने मिंजो ला सियुदा ही प्यार करणा शुरू करी दे जदिया तू शुरूआत च किता था। अगर तू मन बदलगा नी, तां मैं तेरे बाल ओणा कने जिथू तेरा दिव्या रख्या है उसयो ओथु ला हटाई करी तिजो सजा देणी। **6** पर मैं तिजो ला खुश भी है क्योंकि तू उना लोकां ला नफरत करदा है जडे नीकोलस दियां गल्लां मंदे न, तियां ही जियां मैं उना दे कम्मा ला नफरत करदा है। **7** हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है। सै लोक जडे बुरियां शक्तियां जो हरां दे न, उना जो मैं जिन्दगी देणेबाले स्रखे ला फल खांणे दी इजाजत देणी जड़ा परमेस्वरे दे स्वर्गे दे बगीचे च है। **8** स्मरना शेहरे दिया कलीसिया दे अगुवे जो ऐ लिख: मैं ही है जिनी सारियां चीजां जो शुरू कितया है, कने मैं ही सै है जिनी सारियां चीजां दा अंत करणा; चाहे मैं मरी गया था कने हुण जिन्दा है कने हमेशा जिन्दा रेणा मैं तिजो ला ऐ बोलदा है; **9** मैं जाणदा है की तिजो दुख तकलीफ होए कने तू गरीब है। पर तू दिले ला अमीर है। मैं उना लोकां दे बारे च जाणदा है, जडे ऐ यकीन कने बोलदे न की सै परमेस्वरे दे चुणयो लोक न, मतलब यहदी लोक, पर हे नी न। सै तेरे बारे च बुरियां गल्लां बोलदे न, पर असलियत च सै शैताने दिया मंडलिया दे बंदे न। **10** उना दुखां ला मत डरा जडे तिजो मिलणे न। शैताने लोकां ला तुसां चे कुछ लोकां जो गिरफ्तार कराणा कने तुहांजो जेल कराई देणी ताकि सै तुहाड़ी परिक्षा करी सके। तुसां दस दिना दीकर बडियां मुसीबतां जो झेलणा। पर मिंजो पर भरोसा करणा कदी मत छडदे चाहे तुहांजो मरणा पोए, क्योंकि मैं तुहाडिया जिता ताई इनाम च हमेशा दी जिन्दगी

देणी। 11 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है: जड़े लोक बुराई जो हराई करी जित हासिल करदे न, उना जो उसा दुज्जी मौत ला कोई नुक्सान नी होणा, जालू परमेश्वरे आखरी न्याय करणा। 12 पिरगमुने शेहरे दिया कलीसिया दे अगुवे जो ऐ लिख: मैं ही है जिदे बाल तेज दोधारी तलवार है, मैं तुहांजो ला ऐ बोलदा है: 13 मैं जाणदा है, की तेरा शेहर शैताने दे काबू च है, पर इदे बावजूद भी मिंजो पर भरोसा करणा नी छडया कने मेरियां शिक्षां जो मनणा नी छडया। तू उस बकत भी भरोसा करणा नी छडया जालू उना अन्तिपास जो ओथु मारी दिता। सै मेरे बचना दा प्रचार करणे च भरोसे दे काबील था, इस तांई उसयो तेरे शेहरे च मारी दिता जड़ा शैताने दे काबू च है। 14 पर मिंजो तेरे बारे च कुछ शिकायतां न, क्योंकि तू उना गल्लां दा बिरोध नी करदा जड़े झूठी शिक्षा दिन्दे न, जियां परमेश्वरे दा संदेश देणेबाले बिलामे बड़े पहले दीतियां थियां। बिलामे राजा बालाक जो सिखाया की इस्राएल दे लोकां जो पाप करणे तांई उकसाणे तांई क्या करणा चाईदा। उनी उना जो मूर्तियाँ अग्वे चढाईयां चीजां जो खाणे कने व्यभिचार करणे तांई सिखाया। 15 तियां ही तुहाडे बिच कुछ लोक न जड़े नीकुलइयां दे दलां दियां शिक्षां जो मंदे न। 16 इस तांई पाप करणा छडी दिया, अगर तू ऐसे कम्म करणा बंद नी करगा तां मैं जल्दी ही ओणा, कने उना लोकां दे खिलाफ उसा तलबारा ला लडना, जडी मेरे मुंऐ ला निकलदी है जड़ा मेरा बचन है। 17 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है: सै लोक जड़े बुराई जो हरादे न, मैं उना जो उस मन्ने चे देणा जिसयो कुनी लुकाया है। मैं उना चे हर इक जो इक चिट्टा पथर देणा, जिस पर इक नोआ ना लिख्या होणा। जिस माणुऐ जो सै मिलगा उसयो छडी करी कोई भी उस नाऐ जो नी जाणी सकदा। 18 थुआतीरा शेहरे दिया कलीसिया दे अगुवे जो ऐ लिख: परमेश्वरे दे पुत्रे दिया तरफा ला ऐ संदेश है जिदियां हखी अग्गी दिया लौई सांई चमका दियां थियां, कने जिदे पैर पीतलू सांई चमका दे थे, जियां पीतलू जो भटिया च तपा दे होन, सै ऐ बोला दा है: 19 मैं तुहाडे कम्मा जो जाणदा है की तुसां इक दुज्जे ला प्यार करदे न कने तुसां पक्का भरोसा करदे न। मैं जाणदा है की तुसां इक दुज्जे दी सहायता किती, कने तुहाडी सेहनशक्ति जो भी जाणदा है। मैं जाणदा है की तुसां हुण पेहले ला जादा

भले कम्म करदे न जालू तुसां पेहले मिंजो पर भरोसा किता था। 20 पर मिंजो तेरे बारे च कुछ शिकायतां न, राणी इजेबेल जड़ी बड़ी पेहले रेंदी थी, उसा सांई इक जनानी तुहाड़े बिच है। सै अपने आप जो परमेश्वरे दा संदेश देणेबाली बोलदी है पर मेरे चेलयां जो गलत शिक्षा दिन्दी है। सै मेरे दासां जो व्यभिचार करणे कने मूर्तियाँ अगो चढाईयां चीजा जो खाणे दी शिक्षा दिन्दी है। 21 मैं उसा जो अपने पापां ला पश्चात्ताप करणे दा मौका दिता है, पर सै उना बुरे कम्मा जो बंद करणे ला मना करदी है। 22 मैं उसा जो रोगी बणाई देणा। कने जड़े उसा सोगी व्यभिचार करदे न, अगर सै भी उसा सांई पाप करणा नी छडगे तां मैं उना जो भी बड़े दुखां च पाई देणा। 23 मैं उना लोकां जो मारी देणा है जड़े उदिया शिक्षां जो मंदे न; तालू सारियां कलीसियाँ जो पता चली जाणा की मैं हर इक जणे दे बिचारां कने मकसदां जो परखदा। मैं तुहांजो सबना जो तुहाड़े अपने कम्मा दे अनुसार इनाम देणा है। 24 पर थुआतीरा शेहरे च तुसां बाकी लोकां उसा झूठी शिक्षा जो नी मन्नया। तुसां उना गल्लां च हिस्सा नी लिया जिसयो उदे चले शैताने दियां बड़ी जरूरी गल्लां बोलदे न। मैं तुहांजो बोलदा है, की मैं तुहाड़े पर होर कोई जरूरी हुकम नी थोपणा, सिवाए इदे की जालू दीकर मैं नी आई जांदा तालू दीकर मिंजो पर पक्का भरोसा करदे रेनयो। 26 सै लोक जड़े बुराईया जो हराई दिन्दे न, कने संसारे दे अंत दिकर मेरे हुकम मंदे रेंदे न, मैं उना जो देशां पर राज्य करणे दा हक देणा। 27 मैं उना जो राज्य करणे दा सेई हक देणा जियां मेरे पिता मिंजो दिता है। उना दा राज्य लोए सांई मजबूत होणा जडा टूटदा नी है, उना दे दुश्मणा टुटयो भांडया सांई होणा। 28 कने मैं उसयो अपनी जीत दसणे तांई ब्यागा दा तारा देणा। 29 हर कुसी जो जडा मेरे संदेश जो समझणा चांदा है, उसयो इसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है।

3 सरदीसे शेहरे दिया कलीसिया दे अगुवे जो लिख: ऐ संदेश उदिया तरफा ला है जिनी सत्त तारयां जो अपने हथां च रखया है कने जडा परमेश्वरे दियां सत्त आत्मा जो भेजदा है। सै ऐ बोलदा है, की मैं तेरे कम्मा जो जाणदा है: तू मिंजो च भरोसे दे लायक लगदा है, पर असल च तू मेरे हुकमा जो नी मंदा। 2 इस तांई साबधान होई जा, कने मिंजो पता लग्गा है की विश्वासी होणे दे नाते जदेई जिन्दगी जिणे तांई परमेश्वरे बोलया है सियुदी जिन्दगी तुसां नी जिया दे न। इस तांई आत्मिक निद्रा ला जागी जा, कने जड़े मसीह गुण तुहांजो च हुण भी बचयो न उना जो नोए करा

इसला पेहला की सै गायब होई जान। 3 इस ताई उसा शिक्षा जो याद कर, जड़ी तू बड़े पेहले सुणियो थी कने भरोसा किता था, कने जड़ा तिजो सिखाया था उसयो मन, कने गलत कम्मा जो छडी करी पापां जो मनी ले। अगर तू ऐसे गलत कम्म करणा नी छडदा है, तां मै चोरी छुपे ओणा, जियां राती चोर ओदा है, कने तू उस बकत जो नी जाणी सकदा जालू मै तिजो सजा देणे ताई ओणा। 4 पर सरदीस च तुहाडे बिच कुछ ऐसे लोक न जिना पाप नी कितया है, जिना विश्वासी होणे दे नाते इक पबित्र जिन्दगी जि है। उना चिट्टे कपडे पाई करी मेरे सोगी रेंणा है, क्योंकि सै भरोसे दे लायक न। 5 सै जड़े जीत हासिल करदे न, उना जो भी उना सांई ही चिट्टे कपडे पेहनणे न। मै उना दे ना उसा कताबा ला कदी नी हटाणे न जिसा च परमेश्वरे उना लोकां दे ना लिखयो न जिना जो हमेशा दी जिन्दगी मिलणी। मै अपने पिता दे सामणे कने उदे स्वर्गदूतां दे सामणे ऐ घोषित करणा की सै मेरे न। 6 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है। 7 फिलदिलफिया शेहरे दिया कलीसिया दे अगुवां जो ऐ लिख: ऐ संदेश उदिया तरफा ला है जड़ा पबित्र कने सच्च है, सै जिदे बाल दाऊद दे राज्य दा अधिकार है। अगर सै दरबाजा खोलदा है, तां कोई भी उसयो बंद नी करी सकदा। अगर सै उसयो बंद करी दे, तां कोई भी उसयो खोली नी सकदा। मै तुसां जो ऐ बोलदा है की, 8 मै तेरे कम्मा जो अच्छे ला जाणदा है। मै जाणदा है की तिजो च थोड़ी ही ताकत है, पर फिर भी तू मेरियां बोलियां गल्लां पर भरोसा किता कने तू इसा गल्ला ला मना नी किता की तू मिंजो पर भरोसा करदा है। इस ताई मै तिजो ताई इक दरबाजा खोलया है, जिसयो कोई बंद नी करी सकदा। 9 सै लोक जड़े इक ऐसे झुंडे दे सदस्य न जड़े शैताने ला रिशता रखदे न, कने बोलदे न की सै यहूदी न पर सै सच्चे यहूदी नी न कने सै झूठ बोलदे न। दिख मै ऐसा करणा है, की जिसला उना आई करी तेरे पैरां च पेई जाणा, कने उना जो पता लगी जाणा है की मै तिजो ला प्यार रखदा है। 10 तू मेरे संदेशे दा पालन किता ताकि जालू तू दुख झेले तां उसयो सबर रखीकरी सेहन करी सकन। इस बजा ला, मै तेरी परिक्षा दे बकत तेरी रक्षा करणी। जड़ी इस संसारे दे सारे लोकां पर ओणी है। 11 मै जल्दी ही ओणे बाला है; इस ताई तिजो मिंजो पर भरोसा करदे रेंणा चाईदा ताकि कोई भी तिजो तेरी जित दा इनाम लेंणा ला ना रोकी सके जड़ा मुकुटे सांई है। 12 सै जड़े जीत हासिल करदे न, जियां इक खम्बा घरे जो

मजबूत बनादा है, तियां ही उना भी हमेशा ताई परमेश्वरे दे मंदरे च रेणा। मैं उदे पर मेरे परमेश्वरे दा नां लिखणा कने परमेश्वरे दे शेहर यस्शलेम दा ना लिखणा। कने ऐ सेई शेहर है जडा स्वर्गे च है, मतलब की मेरे परमेश्वरे दिया तरफा ला थले ओणा। मैं उदे पर मेरा नोआ ना लिखणा। 13 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। 14 लौदीकिया शेहरे दिया कलीसिया दे अगुवे जो ऐ लिख: ऐ संदेश उदिया तरफा ला है जडा आमीन है। कने भरोसा दिया काबलियता ला परमेश्वरे दे बारे च सच्च जो प्रगट करदा है, कने मैं सेई है जिदे जरिये परमेश्वरे सारियां चीजां जो बनाया है। 15 मैं जाणदा है की तू क्या करदा है, तू कितणी मेहनत करदा है कने कदी हार नी मंदा। कने ना तां तू मिंजो पर भरोसा करणे ला मना करा दा है कने ना ही मिंजो पुरे मने ला प्यार करदा है। मैं चांदा है की या तां तू मिंजो मनणे ला मना करी दे या मिंजो ला पुरे मने ला प्यार कर। 16 इस ताई की तू मिंजो पर भरोसा करणे ला मना करा दा है कने ना ही मिंजो पुरे मने ला प्यार करदा है, क्योंकि तिजो मिंजो पर अधा-अधुरा भरोसा है, इस ताई मैं तिजो पूरी तरहा ला हटाणे ताई तैयार है। 17 तू सोचदा है की तू अमीर है, कने तेरे बाल सै सब है जिदी तिजो जरूरत है, पर तू नी जाणदा की इदा सच्च ऐ है की, तिजो पर तरस ओणा चाईदा। क्योंकि सच्च ऐ है की तू गरीब है, तेरे बाल कपड़े नी न, कने तू अन्ना है। 18 इस ताई मैं तिजो सलाह दिन्दा है की तिजो मिंजो ला शुद्ध सोना खरीदणा चाईदा ताकि तू सच्ची दा अमीर बणी सके। तिजो मिंजो ला अपने पांणे ताई चिट्टे कपड़े भी खरीदणे चाईदे ताकि तेरा शरीर डक्की रे कने तू शर्मिंदा ना हो। कने तिजो अपनी हखी दा लाज करणे ताई दवा भी मिंजो ला खरीदणी चाईदी ताकि तू दिखी सके। 19 मैं जिना-जिना ला भी प्यार करदा है, उना जो मैं सिखांदा है कने सजा दिन्दा है ताकि सै खरे बणन। इस ताई अच्छाई करणे च लग्गी रिया, कने पापी कम्म करणा बंद करी दिया। 20 मैं तुहाड़े दिले च बसणे ताई, मैं उस बंदे साई है जडा घरे बाहर खडोतया है कने दरबाजे जो खटखटा दा है। अगर तुसां मेरिया अबाजा जो सुणदे न कने मेरे ताई अपना दिल खोलदे न तां मैं अंदर ओणा कने असां इक दुज्जे सोगी संगती करणी। 21 सै जडे जीत हासिल करदे न, उसयो मैं अपने सोगी उदे सिंहासने पर बोंणे दा हक देणा। ऐ बिलकुल मेरे साई ही होणा, जियां मैं जित हासिल कितियो हो कने अपने पिता दे

बखे आसन मिलया हो। 22 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है।

4 मैं इना सारियां गल्लां जो दिखणे बाद स्वर्गे च खुलया दरबाजा दिखया। कने कोई मिंजो सोगी गल्लां करा दा था कने गल्लां करणे बाला सेई था जिसयो मैं पेहले भी सुणया था, जिदी अबाज तुरही जो बजाणे दिया अबाजा सांई थी। कने उनी मिंजो बोलया, “मेरे बाल ऐथू उपर आई जा; कने मैं सै गल्लां तिजो दसणियां न, जिना दा इना गल्लां बाद पूरा होणा जरूरी है।” 2 तालू ही झट परमेस्वरे दी आत्मा मिंजो पर आई; “कने मैं स्वर्गे च इक सिंहासन दिखया कने उस सिंहासने पर कुसी जो बैठया दिखया।” 3 जड़ा उस पर बैठया था, उदा चेहरा बेशकीमती अनमोल पथरे सांई चमकदा था जिसयो यशब कने लाल कीमती पथर बोलदे न। कने उदे सिंहासने दे चारो पासे इक इन्द्रधनुष था, जडे सेले कीमती पथरे सांई मिल्ला दा था। 4 उस सिंहासने दे चारो पासे होर चोबी सिंहासन थे; कने इना सिंहासना पर चोबी अगुवे चिट्टे कपड़े पायी करी बैठयो थे, कने उना दे सिरां पर सोने दे मुकुट थे। 5 उस सिंहासने ला बिजली कने गड़ाकयां दी अबाज निकला दी थी कने सिंहासने दे सामणे अग्गी दे सत्त दिये बलयो थे, कने जड़ियां परमेस्वरे दियां सत्त आत्मा थियां, 6 कने उस सिंहासने सामणे इक फर्श था जड़ा समुंद्रे सांई चौड़ा था कने शीशे सांई साफ था। कने सै सिंहासन उना सबना दे बिच था कने उदे चारो पासे चार जिन्दे प्राणी दिखे, जिना दे पुरे शरीर हखी ला डकुयो थे। 7 उना चारां जिन्दे प्राणिया चे प्राणी शेर सांई मिल्ला दा था, कने दुज्जा प्राणी बछड़े सांई था, तिजे प्राणिये दा मुं माणुऐ सांई था, कने चौथे दा उडदे बाजे सांई था। 8 कने उना चारां जिन्दे प्राणियां दे छे-छे फंग थे, कने उना दे शरीर पर हखी थियां, ऐथू दीकर की उना दे फंगा हेठ भी; कने सै रात-दिन बिना अराम कितयो ऐ बोलदे रेंदे थे, “पबित्र, पबित्र, पबित्र प्रभु परमेस्वर, सारयां ला शक्तिशाली, जड़ा बकत दिया शुरुआत ला लेईकरी हुणे दीकर कने हमेशा तांई नी बदलदा कने जड़ा औणे बाला है।” 9 जड़ा सिंहासने पर बैठया है, कने सै सेई है जड़ा हमेशा-हमेशा दीकर जिन्दा रेंदा है, जालू भी सै जिन्दा प्राणी उसयो आदर कने धन्यावाद दिन्दे न। तां सै चौबी अगुवे जडे सिंहासने पर बैठयो न, उदे सामणे झुकी जांदे न कने उदी अराधना करदे न। सै ऐ बोली करी सिंहासने दे सामणे अपने-अपने मुकुटां जो रखी

दिन्दे थे। (aiōn g165) 11 ऐ साडे प्रभु परमेश्वर, तू सारियां चीजां जो बणाया है, तेरिया इच्छा अनुसार सै बणाईयां न। इसा बजा ला तुसां महिमा कने आदर कने शक्ति देणे दे काबिल है।

5 जडा सिंहासने पर बैठया था, मैं उदे सजे हथे च इक कताब दिखी, कने सै कताब दोनो पासयां ला लिखियो थी, कने सै सत्त मुहरां लाई के बंद कितियो थी। 2 फिरी मैं इक शक्तिशाली स्वर्गदूते जो दिखया कने सै जोरे-जोरे ला ऐ प्रचार करा दा था की, “इसा कताबा जो खोलने दे कने इसा दियां मोहरां जो तोड़ने दे काबील कुण है?” 3 पर ना तां स्वर्गे च, ना ही धरती पर, ना ही धरतिया दे थले चे कोई इसा कताबा जो खोलणे कने उसा जो पढ़ने दे काबिल निकलया। 4 तालू मैं बडे जोरे-जोरे ला रोया, क्योंकि उसा कताबा जो खोलणे बाला कने नां ही कोई पढ़ने दे काबिल है। 5 इसा गल्ला पर उना अगुवां चे इकी मिंजो ला बोलया, “मत रो; दिख, सै जिसयो यहूदा दे गोत्रे दा शेर बोलदे न, कने जडा राजा दाऊदे दा बंशज है, उनी उसा कताबा जो खोलणा कने सै उसा दियां मोहरां जो तोड़ी सकदा है, उनी शैताने जो हराई दिता।” 6 तालू मैं उस सिंहासने कने चारों जिन्दे प्राणियां कने उना चौबी अगुवां दे बिच इक छेलुये जो खडोतयो दिखया था। कने उस छेलुये दे शरीर पर ऐसे निशाण थे की उसयो मारी दितया था। उदे सत्त सिंग कने सत्त हखी थियां; ऐ परमेश्वर दियां सत्त आत्मा न, जड़ियां सारिया धरतिया पर भेजियां न। 7 उनी छेलुऐ आईके उदे सजे हथे ला कताब लेई ली, जडा सिंहासने पर बैठया था। 8 जालू उनी कताब लेई ली, तां सै चारों जिन्दे प्राणी कने चौबी अगुवे उस छेलुये अगो पेई गे; कने हर इकी अगुवे हथे च वीणा कने धूपे ने भरूया सोने दा कटोरा लिया था, उस धुपे दी खुशबु उना लोकां दी प्राथना दा निशाण है जडे परमेश्वरे दे सेवक न। 9 कने सै ऐ नोआ गीत गाणा लग्गे, तू इसा कताबा जो खोलणे कने इदिया मोहरां जो खोलणे दे काबील है; क्योंकि उना तेरी बलि दिती कने तू अपणे खूने ला हर इक कुले, भाषा, लोकां, कने जातियां चे परमेश्वरे तांई लोकां जो खरीदी लिया। 10 कने तू उना जो ऐसे लोक बणाई दितया है जिना पर साड़ा परमेश्वर राज करदा है कने याजक बणाया जडे उदी सेबा करदे न, कने उना धरतिया पर राज करणा। 11 जालू मैं फिरी दिखया, तां मैं अचानक उस सिंहासने कने उना जिन्दे प्राणियां कने चौबी अगुवां दे चारो पासे ला स्वर्गदूतां दियां अबाजा सुणियां, जिना दी गिणती नी करी सकदे थे। 12 कने सै जोरे ला गांदे दे थे, “धन्य

है, सै छेलू जिसयो मारी दितया था, सै महिमा दे काबिल है। उदा अधिकार महान है। उदा ज्ञान गेहरा है। सै बड़ा शक्तिशाली है कने बड़ा अमीर है। ओआ असां उदा आदर करन। ओआ असां उदी स्तुति करन।” 13 फिरी मैं स्वर्गे च, कने धरतिया पर, कने धरतिया दे थले, कने समुन्द्रे दियां बणाईयां सारियां चीजा जो, कने सै सब केसी जो जडा उना चे है, उना जो ऐ बोलदे सुणया, “की ओआ असां उदी स्तुति करन जडा सिंहासने पर बैठया है। ओआ असां हमेशा तांई छेलुये दी महिमा करन कने उसयो आदर देन क्योंकि सै सारयां ला जादा शक्तिशाली है।” (aiōn g165)

14 कने चारों जिन्दे प्राणियां, “आमीन” बोलया, कने सै अगुवे झुकी करी उदी अराधना करणा लगगे।

6 फिरी मैं दिखया की छेलुये उना सत्तां मुहरां चे इकी जो खोलया; कने मैं चारों जिन्दे प्राणियां चे इकी जो पुकारदे सुणया। उदी अबाज गड़क्यां सांई तेज थी। उनी बोलया, “हुण जा, अगगे बद।” 2 तालू ही मिंजो इक चिट्टा घोड़ा मिल्ला, कने उदे पर सवार होयो माणुऐ धनुष लिया था; कने उसयो इक मुकुट भी दितया था, कने सै इक विजेता सांई जित हासिल करणा निकलया कने दुबारा ला उनी ही जितणा। 3 जालू छेलुये दुज्जी मोहर खोली, तां मैं दुज्जे जिन्दे प्राणिए जो ऐ बोलदे होऐ सुणया, “हुण जा, अगगे बद।” 4 फिरी इक चमकदार लाल घोड़ा उसा जगा ला बार आया जिथू सिंहासन रख्या है। परमेश्वरे उस पर बैठयो जो धरती दे लोकां जो अपु चे लडाणे दी शक्ति दिती, ताकि सै लडाईया दे बकत इक दुज्जे जो मारी दें। इस कम्मे तांई परमेश्वरे इस सवारे जो इक बड़ी तलवार भी दितियो थी। 5 जालू छेलुये तिजी मोहर खोली, तां तिजे जिन्दे प्राणिए जो ऐ बोलदे होऐ सुणाया, “हुण जा, अगगे बद।” कने तालू मैं दिखया की इक काला घोड़ा बाहर आया है कने उस पर सवार बंदे दे हथे च इक तरकड़ी थी। 6 कने मैं सुणया की उना चारों जिन्दे प्राणिया चे कोई बोला दा था, ऐ माणुऐ सांई अबाज थी की, “ओणे बाले दिना च धरतिया पर अकाल पौणा। इस तांई इक किलो कणक कने तिन किलो जौं दी कीमत पुरे इक दिने दिया ध्याडिया बराबर हौणी। पर तेले कने अंगूरा दे रस्सां दी कीमत नी बदलणी।” 7 जालू छेलुये चौथी मोहर खोली तां मैं चौथे जिन्दे प्राणिए जो ऐ बोलदे सुणया, “हुण जा, अगगे बद।” 8 तालू मैं फीका पिया हरे रंगे दा घोड़ा दिखया; कने उस पर सवार बंदे दा नां मौत था; कने अधोलोक उदे पिच्छे-पिच्छे ओआ दा था। कने उसयो धरतिया पर रेणेबाले इक चौथाई लोकां जो

मारणे दा हक है। उनी उना जो भूखा ला, उना जो बुरियां-बुरियां बिमारियां जो, कने उना जंगली जानवरां ला मारी दिता। (Hadēs g86) 9 जालू छेलुये पंजमी मोहर खोली, तां मैं वेदिया दे थल्ले उना लोकां दिया आत्मा थियां जिना जो मारी दितया था क्योंकि उना परमेश्वरे दे बचना दा प्रचार कितया था कने प्रभु यीशु पर भरोसा करणे ला पिच्छे नी हटे की यीशु उना दा प्रभु है। 10 कने उना जोरे ला पुकारी करी परमेश्वरे ला बोलया, “हे पबित्र कने सच्चे परमेश्वर; तू धरतिया पर रेणेबाले उना बुरे लोकां जो सजा देणे च इतणा लम्बा इंतजार कजो करदा है?” असां बिनती करदे न की तू उना लोकां दे व्यवहारे जो बदला ले जिना सांझो मारी दितया था। 11 कने उना चे हर इकी जो चिट्टे कपड़े दितयो। कने परमेश्वरे उना जो बोलया, “हुणे ताई अराम करा, क्योंकि हल्ले भी कुछ सोगी कम्म करणे बाले कने तुहाड़े साथी मसीह भाई न, जिना जो तुहाड़े सांई मारी देणा है। जालू दीकर तुहाड़े मसीह साथियां दे मरणे दी संख्या पूरी होई जांगी, तालू ही मैं बदला लेंगा।” 12 जालू मैं उसयो छेमी मोहर खोलदे दिखया, तां मैं दिखया की इक बड़ा बड़ा हिलण होया, कने सूरज दा रंग काले कम्बले सांई काला होई गया कने पूरे चन्द्रमे दा रंग खूने सांई लाल होई गया। 13 कने अम्बरे दे तारे धरतिया पर इयां पेई गे जियां तूफाने ला स्खे ला कच्चे फल पेई जांदे न। 14 अम्बर उस कागजे सांई गायब होई गया जिसयो लपेटी दितया हो कने सारे पाड़ कने समुंद्रे चे सारे टापूआं अपणी जगा बदली दिती। 15 इदा नतीजा ऐ होया की, तालू धरतिया दे राजे, कने प्रधान, कने सरदार, कने अमीर कने सामथी लोक, कने हर इक सेवक, कने जड़े गुलाम नी न, सारे पाड़ां दियां गुफां च कने पथरां थल्ले जाई लुकयो न; 16 कने पाड़ां कने पथरां ला बोलणा लग्गे, “साड़े पर पेई जा; कने सांझो उसला बचाई लिया जड़ा सिंहासने पर बैठया है कने छेलुऐ दिया सजा ला बचाई लिया।” 17 क्योंकि सै भयानक दिन आई गया है जालू परमेश्वरे कने छेलुये सारयां जो सजा देंगी कने कोई भी इसा सजा ला नी बची सकदा।

7 इदे बाद मैं धरतिया दे चारों कुणा च चार स्वर्गदूतां जो खड़ोतया दिखया। कने उना स्वर्गदूतां जो परमेश्वरे हक दितया है की सै संसारे दे लोकां जो दुख परेशानिया च पाई करी उना दा नुक्सान करन, चाहे सै धरती च होन या समुंदर च। उना संसारे दे चारो कुणयां ला होआ जो रोकी दिता, ताकि समुंद्रे च धरती च या बणे च होआ ना चले। मैं इक होर स्वर्गदूते जो पूर्व दिशा पाससे ला प्रगट होंदे दिखया, उदे बाल

जिंदे परमेश्वरे दी मोहर थी। उनी स्वर्गदूते उच्चिया अबाजा ला उना चार स्वर्गदूतां जो पुकारी करी बोलया; 3 “जालू दीकर असां अपने परमेश्वरे दे सेबकां दे मथयां च मोहर नी लांगे, तालू दीकर धरती कने समुन्द्र कने सखां दा नाश मत करदे, ताकि सै उना दुख परेशानिया च नी पोंन।” 4 जालू स्वर्गदूतां मोहर लांगे दा कम्म पूरा करी लिया। तां कुनी मिंजो दसया की सै लोक जिना दे मथे पर स्वर्गदूतां परमेश्वरे दी मोहरा दा निशाण लाया है, उना दी गिणती 1,44000 थी। ऐ लोक इस्राएल दे बारां गोत्रां चे थे: 5 स्वर्गदूतां यहदा दे गोत्रां चे बारह हजार पर परमेश्वरे दी मोहर लाई, स्बेने दे गोत्रे चे बारा हजार पर, गाद दे गोत्रे च भी बारा हजार, 6 आशेर दे गोत्रे चे भी बारा हजार, नमाली दे गोत्रे चे भी बारा हजार; मनश्शे दे गोत्रे चे भी बारा हजार, 7 शमौने दे गोत्रे चे बारा हजार पर, लेवी दे गोत्रे चे बारा हजार पर, इस्राकार दे गोत्रे च बारा हजार, 8 जबूलने दे गोत्रे च बारा हजार, यूसुफे दे गोत्रे चे बारा हजार, कने बिन्यामीन दे गोत्रे चे बारा हजार पर मोहर दिती है। 9 इदे बाद मैं दिखया की लोकां दी इक इतणी बडी भीड़ थी की कोई भी उना सारयां जो गिणी नी सकदा था। सै संसारे दिया हर इक जाति, कने कुल, भाषा चे थे। सै सारे सिंहासने कने छेलुये सामणे खडोतयो थे। उना चिट्टे कपडे पायो थे कने उना सारयां हथे च खजूरी दियां डालियाँ पकड़ियां थियां कने जडा इक त्योहारे दा प्रतीक है; 10 कने जौरे ला पुकारी करी बोला दे थे, “साडे परमेश्वरे दी स्तुति हो, जडा सिंहासने पर बैठया है, कने छेलुए दी जै-जै कार करा! सिर्फ तू ही है जडा उद्धार करदा है।” 11 कने सारे स्वर्गदूत, उस सिंहासने दे चारो पासे कने अगुवां दे कने चारों जिन्दे प्राणिनां दे चारों पासे खडोतयो थे। फिरी सै सिंहासने दे अग्वे दण्डवत होई गे कने उना परमेश्वरे दी अराधना किती। 12 “आमीन, असां हमेशा तेरी महिमा करदे न, तिजो धन्यबाद कने इज्जत दिन्दे न! असां मंदे न कने तू ज्ञानवान, कने शक्तिशाली है, जडा हमेशा तांई सारे कम्मा जो करणे दे काबिल है! परमेश्वरे दा धन्याबाद कने महिमा करदे न।” (aiōn g165) 13 उना चे इकी अगुवे मिंजो ला पुच्छया, “ऐ जिना चिट्टे कपडे पायो थे सै कुण है? कने कुथु ला आयो न?” 14 मैं उसयो बोलया, “हे मालिक, मैं नी जाणदा पर तू जाणदा है।” उनी मिंजो बोलया, “ऐ सै लोक न जिना बडा दुख झेलया है। उना अपने कपडयां जो छेलुये दे खूने ला धोई लिया है कने हुण सै चिट्टे होई गियो न, इदा मतलब ऐ है की उना दे पाप मिटाई दितयो न।” 15 इसा ही बजा ला सै परमेश्वरे दे सामणे खडोतयो न, कने हर

बकत दिन रात परमेश्वरे दे घरे च उदी सेबा करदे न। कने सै जड़ा सिंहासने पर बैठया है, उनी उना बिच रेंणा कने उना दी रक्षा करणी। 16 “उना फिरी भूखे कने प्यासे नी होणा; कने ना ही सूरजे उना जो धुपा ला जलाणा कने ना ही गर्मियां ला उना जो जलन होणी। 17 क्योकि छेलू जड़ा सिंहासने बिच है, उनी उना दी देखभाल करणी, तियां ही जियां इक पुआल अपणियां भेडां दी देखभाल करदा है कने उनी उना जो ताजा पाणिए बाल लेई जाणा जड़ा लोकां जो जिन्दगी दिन्दा है कने परमेश्वरे उना दिया हखी ला सारे आंसू पूंजी देणे।”

8 जालू छेलुये सत्तमी मोहर खोली, तां सै सारे जड़े स्वर्गे च थे अघे घंटे ताई शांत होई गे। 2 तालू मै उना सत्तां स्वर्गदूतां जो दिखया जड़े परमेश्वरे दे सामणे खडोतयो रेंदे न, कने उना जो सत्त तुरहियां दितियां। 3 फिरी ओथु ला, इक होर स्वर्गदूत सोने दा इक धूपदान लेईकरी आया कने वेदिया बखे खडोई गया। कने उसयो सारयां लोकां दियां प्राथना समेत बालने ताई बडा भरी धुप दिता। उनी धूप कने प्राथना जो उस सोने दिया बेदिया उपर बाली दिता, जड़ी परमेश्वरे दे सिंहासने दे सामणे है। 4 जालू उनी ऐसा किता, तां धूपे दा धुआं पबित्र लोकां दियां प्राथना समेत स्वर्गदूते दे हथे ला उठी करी परमेश्वरे दे सामणे गया। 5 तालू स्वर्गदूते धूपदाने जो वेदिया दिया अग्गी चे अंगारे भरी दिते, कने धरतिया पर फेंकी दिते, कने फिरी गडाके, बिजली, कने अबाजां, कने हिलण होणा लग्गे। 6 कने सै सत्तो स्वर्गदूत जिना बाल सत्त तुरहियां थियां उना जो बजाणे ताई तैयार होऐ। 7 पेहले स्वर्गदूते तुरही बजाई कने खूने ला मिलयो ओले कने अग्ग पैदा होई, कने धरतिया पर पेई गे। इसा बजा ला धरतिया दा इक तिहाई हिस्सा फकोई गया, कने स्खां दी इक तिहाई भी फकोई गे, कने सारा सेला घा भी फकोई गया। 8 दुज्जे स्वर्गदूते तुरही बजाई, तां इक अग्ग लगयो बडे बड्डे पाड़े सांई कोई चीज समुंदरे च पेई गई, कने इसा बजा ला समुंदर भी इक तिहाई हिस्सा खूने सांई होई गया, 9 कने समुंदरे च रेणेबाले इक तिहाई प्राणी मरी गे। इसला समुंद्रे दे इक तिहाई जाज खत्म होई गे। 10 तीजे स्वर्गदूते तुरही बजाई, कने इक बडा बडा तारा मशाला सांई बलया होया स्वर्गे ला टूटया, कने नदियाँ दे इक तिहाई हिस्से पर, कने ताजा पाणिए दे तलाबां पर जाई पिया। 11 उस तारे दा नां कौड़ा है। इदिया बजा ला सै सारा इक तिहाई पाणी कोडा कने जरिला होई गया, कने उस पाणिए जो पीणे बालयां दी मौत होई गई। 12 चौथे स्वर्गदूते तुरही बजाई, तां सूरजे दा इक तिहाई, चन्द्रमे दा इक तिहाई कने

तारयाँ दे इक तिहाई पर कोई चीज टकराई, इसा बजा ला दिने दे इक तिहाई बकते दीकर सूरज नी चमकया कने चन्द्रमा कने तारे राती दे इक तिहाई बकते दीकर नी चमके। 13 जालू मै फिरी दिखया, तां अम्बरे च इक बाजे जो बडे उच्चा उडदे दिखया कने जोरे ला ऐ बोलदे सुणया की, “जालू आखरी तिन्ना स्वर्गदूतां उना तुरही जो बजाणा जड़ियां उना जो दितियां न, तालू संसारे पर ओणे बालियां मुसीबतां बड़ियां भयानक न। धरतिया पर रेणे बालयां पर, हाय, हाय, हाय!”

9 जालू पंजमे स्वर्गदूते तुरही बजाई, तां मै स्वर्गे ला धरतिया पर इक तारा पोंदा दिखया, कने उसयो अथाह कुंडे दी चाबी दितियो थी। (Abyssos g12) 2 उनी अथाह कुंडे जो खोलया, कने कुंडे ला बड़ी बडिया भटिया सांई धुंआ निकलया, कने कुंडे दे धुएँ ला सूरज कने बाताबरन काला होई गया। (Abyssos g12) 3 उस धुएँ चे धरतिया पर टिट्टियां निकलियाँ, कने उना जो बिछुआं सांई लोकां जो डंग मारणे दी शक्तियाँ दितियां थियां। 4 जियां कुसी जो बिच्छुएँ दे डंग मारणे ला पीड होंदी है, तियां ही इना टिट्टियां जो पंज मिने दीकर उना दा नुकसान करणे दा हुकम दितया है जिना दे मथे पर परमेश्वर दिया मोहरा दा निशाण नी था। पर उना जो ना तां धरती दे घा जो, ना कुसी बूटे जो कने ना कुसी स्रखे दा नुकसान करणा था। 6 उना पंज मिनयां च लोकां मरणे दे तरीके तोपणे न, पर उना मरी नी सकणा है। उना जो मरणे दी इच्छा होणी, पर उना ला मरी नी होणा। 7 ऐ टिट्टियाँ दिखणे च लडाईया तांई तैयार घोडयां सांई लगदियां थियां, कने उना अपने सिरां पर सोने दे मुकुट सांई कुछ पाया था। कने उना दे मुह माणुआं सांई थे। 8 कने उना दे बाल जनानिया दे बालां सांई लम्बे थे। कने उना दे दंद शेर दे दंदा सांई पक्के थे। 9 उना अपणिया छातिया पर लोहे दा कवच पाया था। जालू सै उडदे थे, तां सै सियुदी अबाज करदे थे, जियां मते घोडे लडाईया च जाणे बाले रथां जो खिचदे बेले करदे न। 10 उना दियां बिछुआं सांई पूंछा कने डंग थे। कने उना दिया पूंछा च डंक थे, कने उना जो पंज मिने दीकर माणुएँ जो दुख देणे दी शक्ति मिलियो थी। 11 इक राजा है जडा उना जो काबू करदा है। सै सेई शैताने दा दूत है जिनी अथाह कुंडे जो खोलया था, उदा ना इब्रानी भाषा च अबद्दोन है, कने यूनानी भाषा च अपुल्लयोन है, जिदा मतलब है की सै जडा नाश करदा है। (Abyssos g12) 12 पंज मिने बाद सै मुसीबत खत्म होई जाणी। पर इदे बाद भी होर दो मुसीबतां ओणे बालियां न। 13 इदे बाद जालू छेमे स्वर्गदूते अपनी तुरही बजाई। जालू उनी उसयो बजाया तां मै

परमेश्वरे दे सामणे धूप बोलने बालिया वेदिया दे चोरो कुणा ला इक अबाज सुणोई,
14 उना अबाजां छेमे स्वर्गदूते ला बोलया, “उना चार शैताने दे दूतां जो खोली दे
जडे फराता नाए दिया खड़ा दे बखे बनयो न।” **15** इस ताई तालू सै चारों शैताने दे
दूत खोली दिते। सै पेहले ला ही तैयार थे कने उना जो बोलया था की इस मिने, इस
दिन, इस साल ताई इतंजार करा कने हृण ऐ बकत आई गया था। उना जो संसारे दे
इक हिस्सा लोकां जो मारणा था। **16** ओथु घोड़े पर सवार सेनिका दी फौज गिठी
होई, जिना दी गिणती मैं **20** करोड़ सुणी। **17** सै घोड़े कने उना दे सवार जिना जो
मैं दर्शण च दिखया, सै उना दे रक्षा करणे बाले कवच अग्गी सांई लाल, गाड़ी
नीली कने गंधक सांई पिली थी। घोड़यां दे सिर शेरों दे सिरा सांई लगदे थे, उदे मुए
ला अग्ग, धुंआ कने गंधक निकला दे थे। **18** इना उना मुसीबतां ला, जड़ियां
घोड़यां दे मुआं ला निकलने बाली अग्ग, धुंआ, कने गन्धक थी, इना ला इक
तिहाई लोक मारी दिते। **19** पर उना घोड़यां बाल लोकां जो मारणे तांई दो लग
चीजां थियां, पेली तां सै उना दे मुए ला निकलदी थी, दुज्जी उना दिया पुछां च
थी। क्योकि उना दियां पूछा सप्पां सांई थियां, कने उना चे लोकां जो कटणे तांई
सिर थे। **20** पर बाकी लोक जडे उना मुसीबतां ला पेहले नी मरयो थे, उना हल्ले
भी अपने बुरे कम्म करणा नी छडे। उना हत्या करणा, टूणा-टोटका, नाजायज
रिश्ते, चोरी करणा नी छडया। उना बुरियां आत्मा कने अपने हथां ला बणियां
चीजां दियां पूजा करणा भी नी छडया, जियां की सोने या चांदी या पितल या पत्थर
या लकड़ियां ला बणियां मूर्तियां, जड़ियां ना तां दिखी सकदियां, कने ना सुणदियां,
कने ना ही चलदियां न।

10 फिरी मैं इक होर शक्तिशाली स्वर्गदूते जो स्वर्गे ला उतरदे दिखया कने इक
बदल उदे चारो पासे था। कने इक इन्द्रधनुष उदे सिरे चारो पासे था, कने उदा मुं
सूरजे सांई चमकदा था कने उदियां जंगा अग्गी दे बलदे खम्बयां सांई थियां। **2**
उदा सज्जा पैर समुंद्रे पर रख्या, कने उदा खबा पैर जमिना पर रख्या। उदे हथे च
इक छोटा दिया कागज था। **3** उनी स्वर्गदूते जोरे ला पुकारया कने उदी अबाज शेरें
दे गर्जणे सांई थी। जालू सै चीखया, तां सत तेज अबाजां उसयो जबाब दिता, जड़ी
गडाकयां दिया अबाजा सांई थियां। **4** जालू सतों गर्जणे दियां अबाजां बंद होई
गियां, तां मैं जड़ा सुणया उसयो लिखणा लग्गा, पर मैं स्वर्गे ला ऐ अबाज सुणी,
“जड़ियां सत गल्लां तू गर्जणे ने सुणियां न, उना जो छुपाई रख कने लिख मत।”

5 जिस स्वर्गदूते जो मैं दिखया था, सै समुंदरे कने धरतिया पर खड़ोतयो था, उनी अपणा सज्जा हथ कसम खाणे ताई स्वर्गे पासे चुकया। 6 कने जड़ा हमेशा-हमेशा दीकर जिन्दा रेंदा है, जिनी स्वर्ग, धरती कने समुंद्रे कने उना च रेणे बालियां सारियां चीजां जो बणाया है, उदे नाए दी कसम खाई करी उनी बोलया की, “हुण कुसी भी गल्ला ताई होर जादा इंतजार नी करणा पोंणा। हुण सै सारियां पुरियां होई जाणियां।” (aiōn g165) 7 सतमें स्वर्गदूते जो तुरही बजाणे दे दिनां च, जालू उनी तुरही बजाणी है, तालू उनी जल्दी कम्म करणा है, उनी अपणिया गुप्त योजना जो पूरा करणा, जियां की उनी अपने सेबक परमेश्वरे दे संदेश देणेबालयां जो इदा शुभसमाचार दितया था। 8 तालू मैं फिरी सै अबाज सुणी जिनी स्वर्ग च मिंजो ला गल्ल किती थी। अबाजा मिंजो ला बोलया, “जा, उसा छोटिया दिया कताबा जो लेई ले जड़ी स्वर्गदूते दे हथे खुलियो है जड़ा स्वर्गदूत समुंदर कने धरतिया पर खड़ोतया है।” 9 मैं स्वर्गदूते बाल जाई करी बोलया, “ऐ छोटी देई कताब देई दे।” कने उनी मिंजो ला बोलया, “ले इसयो खाई ले; इसा दा स्वाद तां मखिरे सांई मीठा है,” पर बादे च इदिया बजा ला तरे पेटे च तकलीफ होंणी। इस तांई मैं सै कताब लेई लि जड़ी स्वर्गदूते पकड़ियो थी कने खाई लेई कने सच्ची इदा स्वाद शेहदे सांई मीठा था, पर जालू मैं इसयो निगली लिया, तां मेरा पेट दुखणा लग्गा। 11 तालू मिंजो ला ऐ बोलया, “लग-लग झुंडा कने देशां कने लग-लग भाषा बोलणे बालयां लोकां जो कने राजयां जो इक बरी फिरी ला दस्स, जड़ा परमेश्वर तिजो बोलणे तांई बोलदा है।”

11 फिरी मिंजो नापणे तांई इक सोठी दिती कने परमेश्वरे मिंजो बोलया, “उठ, जा कने मेरे मंदरे कने वेदिया दा नाप ले, कने उना लोकां दी गिणती कर जडे ओथु मेरी अराधना करा दे न।” 2 पर मंदरे दे बाहरे दे अंगणे जो मत नाप; उसयो रेंणी दे क्योंकि सै लोक जडे परमेश्वरे जो नी जाणदे उना जो दितया है, कने उना पबित्र शेहर यरूशलेम जो बयाली मिनयां दीकर बरबाद करदे रेंणा है। 3 “कने मैं अपने दो गबाहां जो ऐ हक देणा की सै टाट ओढी करी इक हजार दो सो सठ दिनां दीकर भविष्यवाणी करन।” 4 ऐ सेई दो जैतून सख कने दो दिये न जडे धरतिया दे प्रभुऐ दे सामणे खड़ोतया न। 5 कने अगर कोई उना दा कोई नुकसान करणा चांदा है, तां उदे मुंऐ ला अग्न निकलदी है कने उना दे दुश्मणा जो भस्म करी दींदी है, कने अगर कोई उना जो नुकसान करणा चांगा, तां सै पक्का इसी तरीके ला मारी देणा।

6 उना जो हक है की अम्बरे जो बंद करन, ताकि उना दी भविष्यवाणियाँ दे दिनां च कोई बरखा ना हो; कने उना जो सारे पाणिऐ पर हक है, की उसयो खून बणान, कने जालू-जालू सै चांगे तालू-तालू सै धरतिया पर मुसीबतां जो लेई ओन। 7 जालू उना दो गबां परमेश्वरे दे संदेशे दा प्रचार करी बौणा है, तालू सै जंगली जानवर जड़ा अथाह कुंडे ला निकलना है, उनी दो लोकां सोगी लड़णा, कने उना जो हराई देणा कने मारी देणा। (Abyssos g12) 8 कने उना दियां लाशां बडे शहर यरूशलेमे दियां सड़कां पर रेंगियां न, जिथू उना दा प्रभु भी सूली पर चढ़ाया था। इस शहरे जो निशाण दे स्पे च सदोम कने मिस्र देश बोलदे न। क्योंकि इस शहरे दे लोक सदोम कने मिस्र देशे दे रेणे बालयां लोकां सांई बडे बुरे थे। 9 कने सारे लोक, कने कुल, कने भाषा, कने जातियां सारे लोकां उना जो साढे तिन दिनां दीकर दिखदे रैणा है, पर उना कुसी दिया भी लाशां जो दफनाणा नी देणा है। 10 कने इस संसारे दे लोकां उना दे मरणे पर खुश होणा कने मगन होणा कने इक दुज्जे जो तोफे भेजणे न, क्योंकि इना दोनो परमेश्वरे दे संदेश देणेबालयां संसारे दे लोकां जो दुखी कितया था। 11 पर साढे तिन दिनां दे बाद परमेश्वरे उना च अपणा सा पाया कने सै जिन्दे होई गे, कने सै खडोई गे, कने जिना लोकां उना जो दुबारा ला जिन्दे दिखया, सै डरी गे। 12 इदे बाद उना दो लोकां स्वर्गे ला इक बंदे जो बोलदे सुणया, जिनी उना जो जोरे ला पुकारया कने बोलया, “ऐथू उपर ओआ।” जालू दुश्मण दिखा दे थे, तालू सै इक बदले ला डकुई करी स्वर्गे जो चली गे। 13 फिरी तालू ही यरूशलेम शहरे च इक बड़ा बड़ा हिलण होया, कने शहरे दियां इमारतां दा दसमां हिस्सा पेई गिया, कने उस हिलणे ला सत्त जार लोक मरी गे कने जडे लोक बची गियो थे, सै डरे ला रौणा लग्गे कने उस परमेश्वरे दी महिमा करणा लग्गे जड़ा स्वर्गे च है। 14 ऐ दुज्जिया मुसीबता दा खात्मा था; पर हल्ले इक होर है जड़ी तोल्ली औणे बाली है। 15 जालू सतमे स्वर्गदूते तुरही बजाई, तां में स्वर्गे ला तेज अबाजां जो पुकारदे सुणया: “संसारे च हुण होर कोई नी है जड़ा राज करे, सिर्फ साड़ा परमेश्वर कने उदा चुणया मसीहे राज करणा कने उनी हमेशा तांई राज करणा।” (aiōn g165) 16 कने चौबियां अगुवां जडे परमेश्वरे सामणे अपने-अपने सिंहासने पर बैठयो थे, उना परमेश्वरे अग्गे दण्डवत करिरी, 17 ऐ बोलणा लग्गे, “हे सारयां ला शक्तिशाली प्रभु परमेश्वर, कने तू सेई परमेश्वर है, जड़ा बकत दी शुरूआत ला लेईकरी हुणे दीकर कने हमेशा तांई नी बदलदा, असां सच्ची तेरा धन्यावाद करदे न, क्योंकि तू

हुण अपणी महान सामर्थ्य दस्सी कने हुण तू धरती पर अपणा राज्य शुरू करी दिता है। 18 कने जीना देशां दे लोक तिजो पर भरोसा नी करदे सै बड़े गुस्सा न, कने बकत आई गया है की तू अपणा गुस्सा दस्से कने उना सारयां दा न्याय करणे दा बकत आई गया है जड़े मरी गियो न। कने हुण सै बकत भी है जालू तू उना परमेश्वरे दा संदेश देणेबालयां जो इनाम देणा जड़े तेरी सेबा करदे न कने उना सारे लोकां जो जड़े तेरी इज्जत करदे न, हालांकि तू उना दा नाश करी देणा है जिना धरती दा नाश कितया है।” 19 कने परमेश्वरे दा जड़ा मंदर स्वर्गे च है, सै खोली दिता, कने उदे मंदरे च उदी बाचा दा संदूक मिल्ला, कने बिजली लग्गी, गड़ाके होए, हिलण होए, कने बट्टे-बट्टे ओले पे।

12 जालू सै मुकी गया, तां ओथु इक अनोखा निशाण था, जिसयो अम्बरे च दिखी सकदे थे। क्योंकि चन्द्रमे पर इक खड़ोतियो जनानी प्रगट होई जिना ऐसे कपड़े पायो थे जड़े सूरजे सांई चमकदे थे। कने उसा दे सिरे पर मुकुट लाया था, जिदे उपर बारा तारे थे। 2 सै जनानी गर्भवती थी, उसा दा बच्चा पैदा करणे दा बकत आई गया। कने सै बच्चा जमणे दिया पीड़ा ला रोआ दी थी। 3 इक होर निशाण अम्बरे च मिल्ला, इक बड़ा बड़ा लाल अजगर था, जड़ा शैतान है। उदे सत्त सिर थे कने दस सिंग थे, कने उदे सत्तों सिरा पर सत्त मुकुट थे। 4 कने उदिया पूंछा अम्बरे दे इक तिहाई तारयां जो खिची करी धरतिया पर सुटी दिता, सै अजगर उसा जनानिया दे सामणे जाई खड़ोता, ताकि जालू सै बच्चा जम्मे तां उसा दे बच्चे जो खाई जा। 5 तालू उना जनानिया जागते जो पैदा किता, पर उसयो अजगर नी खाई सकया क्योंकि उसयो झट खोई लिया कने परमेश्वरे दे सिहांसने सामणे लेई ओदा। उनी जागते इक लोहे दे डंडे सोगी सारे देशां दे लोकां पर राज करणा। 6 कने सै जनानी उसा सुनसान जगा जो नठी गई, जड़ा परमेश्वरे उस तांई तैयार कितया था ताकि सै ओथु इक हजार दो सो सठ दिनां दीकर पली सके। 7 फिरी स्वर्गे च लड़ाई होई, तां परमेश्वरे दे मुख्य स्वर्गदूतां चे इकी जिदा ना मीकाईल है, उनी अपणे अधीन स्वर्गदूतां सोगी अजगरे पर हमला किता। कने अजगर कने शैताने दे दूतां मीकाईल दे खिलाफ लड़ाई लड़ी। 8 अजगर लड़ाई हरी गया, कने उसयो कने उदे दूतां जो स्वर्गे ला कडी दिता। 9 इस तांई उसयो कने उदे दूतां जो धरतिया पर फेंकी दिता। ऐ बट्टा अजगर सेई है जड़ा बड़े पेहले सप्पे दे स्प्पे च मिल्ला था, जिसयो शैतान या दोष लांणे बाला बोलदे न। ऐ सेई है जड़ा इस संसारे

दे लोकां जो धोखा दिन्दा आया है। 10 फिरी मैं स्वर्गे ला ऐ जोंरे ला अबाज सुणी, हुण साडे परमेव्वरे अपने लोकां जो बचाणा! हुण उनी अपणिया शक्तिया दा इस्तेमाल करणा कने राजे दे रूपे च राज करणा! हुण उदे मसीहे संसार पर अपने अधिकारे दा दाबा करणा! हुण शैताने साडे परमेव्वरे दिया हजुरी च खडोई करी साडे साथी सेबकां पर दिन रात दोष नी लाणा, क्योंकि उसयो स्वर्गे ला बार फेंकी दितया है! 11 कने साडे भरोसा करणे बालयां शैताने जो राई दिता। उना उसया छेलुये दे खूने दिया शक्तिया ला हराया है, जडा उना जो पापां ला छुडाणे ताई मरी गया था। क्योंकि उना भरोसा करणा नी छडया की छेलू उना दा प्रभु है। हालांकि उना जो दुख तकलीफ होई, ऐथू दीकर की उना जो मारी भी दिता पर सै अपने उस भरोसे ला पिच्छे नी हटे। 12 इस ताई तुसां सारयां जो खुश होणा चाईदा जडे ऐथू स्वर्गे च रेंदे न। पर तुसां जडे धरती पर न कने जडे समुंद्रे च न तुहांजो पर तरस खाणा चाईदा, क्योंकि बुरियां आत्मा दा अगुवा थले तुहाडे बाल आई गया है। असल च सै बड़ा जादा गुस्सा है क्योंकि सै जाणदा है की जल्दी ही उदा अंत होई जाणा। 13 जालू अजगरे समझी लिया, की उसयो धरतिया पर सुटी दितया है, तां उनी उसा जनानिया दा पिच्छा किता जिना पुत्र जमया था। 14 पर परमेव्वरे उसा जनानिया जो बाजे दे दो फंग दितयो थे, ताकि सै उडी करी सुनसान जगा च जा जडी उसा ताई तैयार कितियो था। कने ओथु उसा दी साडे तिन्ना सालां दीकर देखभाल किती ताकि अजगर उसा दीकर ना पुज्जी सके। 15 तालू अजगरे उसा जनानिया पर अपने मूऐ ला खड़ा साई पाणी फेंक्या ताकि बाड़ उसा जो रूडाई लेई जा। 16 पर धरतिया उसा जनानिया दी सहायता करणे ताई पाणिए जो निगली लिया जडा अजगरे अपने मूऐ ला निकला था। 17 इस बजा ला, अजगर उसा जनानिया पर बड़ा गुस्सा होया, इस ताई उनी जनानिया दे बंशजा दे खिलाफ लडाईया दी घोषणा करी दिती। मतलब की उना लोकां दे खिलाफ जडे परमेव्वरे दे हुकमा जो मंदे न कने यीशु मसीह दियां सिखाईयां शिक्षा जो मंदे रेंदे न।

13 तालू सै अजगर चली गया कने समुंद्रे दे कंडे पर खडोई गया। तां मैं इक जानवरे जो समुंदरे ला निकलदे दिखया, जिसदे दस सिंग कने सत्त सर थे। उदे सिगां पर दस राजमुकुट थे, कने उदे हर इक सिरे पर परमेव्वरे दे खिलाफ इक ना लिख्या था। 2 जडा जानवर मैं दिखया, सै चिते साई था; उदे पैर भालुऐ साई थे, कने मुं शेरें साई था। अजगरे अपणी शक्ति इस जानवरे जो देई दिती कने उसयो

धरती पर राज करणे दा हक देई दिता। 3 मै जानवरे दे सिरां चे इकी सिरे च इक
 ढुगे जखमे दा निशाण था, जडा उदिया मौता दी बजा बणी सकदा था, पर उदा
 जखम खरा होई गया था, इस ताई धरतिया दे लोक हेरान थे कने सै उदे चेले बणी
 गे। 4 सारयां लोकां अजगरे दी पूजा किती क्योंकि उनी जानवरे जो अपना हक
 देई दितया था। उना उस जानवरे दी भी पूजा किती। उना बोलया, “कोई भी इस
 जानवरे ला जादा शक्तिशाली नी है कोई भी उसला लडी नी सकदा है।” 5
 परमेश्वरे उस जानवरे जो अपने बारे च बड़ाई कने परमेश्वरे दी बुराई करणे दा हक
 दिता। कने परमेश्वरे उसयो बयाली मिनयां दीकर ऐ हक रखणे दा हुकम दिता। 6
 कने जानवरे परमेश्वरे दी बुराई करणा शुरू किती, उनी उदे नां दे खिलाफ कने उसा
 जगा दे खिलाफ बोलया मतलब की स्वर्गे दे खिलाफ जिथू परमेश्वर रेंदा है, कने
 ओथु रेणेबाले लोकां दे खिलाफ बुराई करणा शुरू किती। 7 उस जानवरे जो ऐ हक
 दितया है की सै परमेश्वरे दे लोकां ला लडे, कने उना जो राई दे, कने उसयो हर
 इक कुल दे लोकां, जातियां, भाषा पर हक दितया है। 8 धरतिया पर रेणेबाले सारे
 लोक जानवरे दी पूजा करणा लग्गे, मतलब की सै सारे लोक जिना दे नां संसारे
 दिया शुरूआत ला छेलुऐ दिया जिन्दगिया दिया कताबा च नी लिखयो न। छेलू सेई
 है जडा मारी दिता था। 9 हर कुसी जो जडा मेरे संदेश जो समझणा चांदा है, उसयो
 उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा
 है। 10 जिना दा जेला च जाणा तय है, उना जो पक्का जेल होंगी, जिना लोकां दा
 तलबारा ला मरणा तय है, उना पक्का ही तलबारा ला मरणा है। इस ताई परमेश्वरे
 दे लोकां जो दुख सेहन करणे च सबर रखणा चाईदा कने उस पर भरोसा करदे रेंणा
 चाईदा। 11 फिरी मै इक होर जानवरे जो धरतिया ला निकलदे होऐ दिखया, उदे
 छेलुये सांई दो सिंग थे। पर जालू सै बोलणा लग्गा तां उदी अबाज अजगरे सांई
 थी। 12 ऐ दुज्जा जानवर उस पेहले बाले जानवरे दे सारे हकां दा इस्तेमाल करदा
 था। कने धरतिया दे लोकां जो उस पेहले जानवरे दी जबरदस्ती पूजा करांदा था,
 जिदा सै जखम ठीक होई गया था। 13 सै दुज्जा जानवर बड़े-बड़े चमत्कार दसदा
 था, ऐथू दीकर की सै लोकां दे दिखदे-दिखदे अम्बरे ला अग्गी दी बरखा कराई
 दिन्दा था। 14 दुज्जे जानवरे जो पेहले जानवरे दिया हजुरिया च चमत्कार दसणे
 दी इजाजत है। इना चमत्कारां दिया बजा ला सै धरती दे लोकां जो भटकाई सकदा
 था। उनी उना जो पेहले जानवरे दी मूर्ति बणाणे दा हुकम दिता, जडा तलबारा ला

घायल होणे बाद भी जिन्दा रिया था। 15 कने दुज्जे जानवरे जो उस पेहले जानवरे दी मूर्ति बणाई करी उसा जो जिन्दा करणे दी हक मिलिया था, ताकि मूर्ति बोली सके कने उना लोकां जो मराई दे जडे उस जानवरे दिया मूर्तिया दी पूजा नी करणे। 16 दुज्जे जानवरे छोटे-बड़े, अमीर-गरीब, मालिक या जडे गुलाम न मतलब की सारयां लोकां जो मजबूर किता की सै पेहले जानवरे दे नाए दी छाप अपने सजे हथे पर या मथे पर लाई लेन। 17 उनी ऐसा इस तांई किता ताकि कोई भी माणु जिदे पर पेहले जानवरे दी छाप ना हो तां सै कोई भी समान खरीदी बेची नी सकदा था। 18 इसा छाप दे बारे च समझणे तांई तुहांजो ज्ञान दी जरूरत है। पर जिस बाल ज्ञान है, सै ऐ पता लाई सकदा है की इस जानवरे दिया संख्या दा क्या मतलब है। क्योंकि ऐ इक माणुऐ दा ना है। ऐ संख्या छेसो छयासठ है।

14 मैं फिरी दिखया की, सै छेलू सियोन पहाड़े पर खडोतया है, कने उदे सोगी इक लख चौवाली जार लोक न, जिना दे मथे पर उदा कने उदे पिता दा नां लिखया होया है। 2 कने मैं स्वर्गे च कुसी दी अबाज सुणी जड़ी इक झरने दिया तेज अबाजा सांई थी। जड़ी अबाज मैं सुणी, सै अबाज उसा अबाजा सांई थी, जियां लोक तार बाले यंत्रा जो बजांदे निकलदे न। 3 कने इक लख चुर्ताली हजार लोक सिहांसने, चार जिन्दे प्राणियां कने अंगुवां सामणे खडोतयो थे; सै इक नोआ गीत गा दे थे, जिसयो सेई सीखी सकदे थे, जिना जो परमेश्वरे धरतिया पर रेणेबाले लोकां बिच ला छुड़ाया था। 4 ऐ सै न, जडे पबित्र जिन्दगी जिन्दे न। ऐ उना लोकां सांई न जिना इक बरी भी नाजायज रिश्ता नी बणाया है कने ना ही इना कुसी चिजा दी पूजा कितियो है, ऐ सिर्फ छेलुये दी ही पूजा करदे न, जिस पासे छेलू जांदा है, ऐ भी उदे पिच्छे चली पोंदे न। ऐ सै न जिना जो धरतिया दे सारे माणुआं ला लग कितया है, जियां लोक खेतरां दियां फसला दा सारयां ला खरा हिस्सा परमेश्वरे जो दिन्दे न, तियां ही ऐ लोक अपणिया जिन्दगिया जो पुरिया पबित्रता सोगी परमेश्वर कने छेलुये जो दिन्दे न। 5 कने उना कदी भी झूठ नी बोलया है, उना च कुछ भी गलत नी है। 6 फिरी मैं इक होर स्वर्गदूते जो अम्बरे च उच्चा उड़दे दिखया। उनी स्वर्गदूते उस शुभसमाचार जो लिया था जड़ा कदी नी बदलदा, उनी संसारे च रेणेबाले लोकां, हर इक देश, हर इक गोत्र, कने सारियां भाषां च इदी घोषणा किती। (aiōnios g166) 7 कने उनी बड़े जोरे ला बोलया, “परमेश्वरे ला डरा, कने उदी महिमा करा, क्योंकि उदा हण लोकां दा न्याय करणे दा बकत है। कने उदी

अराधना करा क्योंकि सेई है जिनी स्वर्ग, धरती, समुंदर कने पाणिऐ दे तलाबां जो बणाया है।” 8 ओथु इक होर स्वर्गदूत था जड़ा पेहले दे पिच्छे आया कने बोलया, “बाबेल देश दा सर्वनाश होई गया! बड़े बाबेल देश दा सर्वनाश होई गया! बाबेल देशे सारिया माणुआं दिया जातिया जो अपणिया शराबा दे नशे च दूत करी दिता, उदा बड़ा ही बुरा व्यवहार ऐ है जड़ा उनी सारिया धरतिया कने माणुआं दिया जातिया जो सिखाया क्योंकि उनी उना जो मूर्तिपूजा करणा सिखाया।” 9 फिरी इदे बाद इक होर स्वर्गदूत बड़े जोरे ला बोलदा होया आया, “जड़ा कोई उस जानवरे कने उदिया मूर्तिया दी भक्ति करगा, कने अपने मथे कने अपने हथे पर उदी छाप लांगा, 10 तां उनी परमेश्वरे दे प्रकोपे दिया शराबा जो जड़ी बिना मिलावटा दी है, उदे गुस्से बाले कटोरे च पाईयो है, पिणा कने पबित्र स्वर्गदूतां दे सामणे कने छेलुये दे सामणे अग्गी कने गन्धका दिया पीड़ा च पोणा। 11 अग्गी ला निकलदा धुंआ जड़ा उना जो सतांदा है सै हमेशा उपर उठदा रेंदा है। दिन रात उना दा सताया जाणा स्कदा नी है क्योंकि उना उस जानवरे दी कने उदिया मूर्तिया दी पूजा किती, कने उना उस जानवरे दी छाप लाई।” (aiōn g165) 12 इस तांई ऐ जरूरी है की परमेश्वरे दे लोक उना सारे दुखां जो सेहन करन जिना चे होईकरी सै गुजरदे न। उना सेई करणा जड़ा परमेश्वर हुकम दिन्दा है कने उना जो यीशु मसीह पर भरोसा करणा बंद नी करणा चाईदा। 13 कने फिरी मैं स्वर्गे ला कुसी जो बोलदे सुणया, “इना गल्लां जो ऐथू लिख।” हुणे ला सै लोक सोभाग्यशाली न जड़े परमेश्वरे पर भरोसा करदे मरी जांदे न। तालू पबित्र आत्मा इसा गल्ला ला राजी होया, उनी बोलया, “ऐ सच्च है। सै सोभाग्यशाली न क्योंकि उना जो अपणिया कड़िया मेहनता ला अराम मिलणा कने जड़े कम्म उना कितयो न उदे तांई उना जो इनाम मिलणा।” 14 मैं फिरी इक चिट्टे बदले जो दिखया, कने मैं उस बदले पर कुसी जो बैठया दिखया जड़ा माणुऐ सांई लग्गा दा था, कने उस पर माणुऐ दे पुत्रे सांई कोई बैठया है, जिसदे सिरे पर सोने दा मुकुट कने हथे च पेनी दराटी थी। 15 तालू ही फिरी इक होर स्वर्गदूत परमेश्वरे दा संदेश लेईकरी स्वर्गे दे मंदरे ला बार आया, ऐ चौथा स्वर्गदूत था। उनी बदले पर बैठयो माणुऐ जो जोर देईकरी बोलया, “धरतिया दी फसल तैयार है, फसला जो बडणे दा बकत आई गया है। इस तांई अपणी दराटी चला कने फसला दी बडाई कर।” 16 इसा बजा ला सै माणु जड़ा बदले पर बैठया था, सै अपणिया धराटिया ला धरतिया पर बडणा लग्गा उनी पुरिया धरतिया

दिया फसला दी कटाई कितनी। 17 फिरी पजमा स्वर्गदूत उस मंदरे ला निकलया, जड़ा स्वर्गे च है, कने उदे बाल भी पेनी दराटी थी। 18 तालू इक होर स्वर्गदूत वेदिया ला बार आया, जड़ा अग्गी ला धुप बालने दी जिम्मेदारी निभान्दा है। उनी जोरे ला उस स्वर्गदूते ला जिनी पेनी दराटी लियो थी उसयो बोलया, “धरतिया पर अंगूरा दे गुच्छे पक्की गियो न! उना जो अपणिया दराटिया ला बडी ले।” 19 तालू उनी स्वर्गदूते अपणिया दराटिया ला उना अंगूरा जो बड्डी दिता जडे धरती पर थे कने उना जो गठेरया। ताकि उना जो निचोड़ी सकन, इदा मतलब ऐ है की परमेश्वरे बडी खतरनाख सजा देणी। अंगूरा जो शेहरे ला बार निचोडया। ओथु जिथू अंगूरा जो निचोडया था ओथु ला जड़ा खून निकलया सै इतणा डुगा था, जितणा की इक घोड़े दा सिर होंदा है जालू उसयो लगामा ला पकड़दे न कने तिन सौ किलो मीटर दीकर चली गिया।

15 इदे बाद मै अम्बरे च जड़ा नोआ नोखा चमत्कार दिखया कने सै बड़ा डराणे बाला था। ओथु सत स्वर्गदूत थे जिना सत लग-लग मुसीबतां पकड़ियां थियां। ऐ मुसीबतां आखरी न क्योंकि जालू उना मुकी जाणा तालू परमेश्वरे दा गुस्सा भी पूरा होई जाणा। 2 तालू मै कुछ दिखया जड़ा समुन्द्रे सांई लगदा था कने शीशे सांई चमकदा था कने उदे च अग भी मिलियो थी। मै उना लोकां जो भी दिखया जिना उस जानवरे जो हराया था क्योंकि उना उदिया मूर्तिया दी अराधना नी कितियो थी कने उना पर जानवरे दी छाप नी लगियो थी। 3 कने सै परमेश्वरे दे दास मूसा दा गीत गांदे थे, जड़ा छेलुये दे बारे च गीत है। सै गांदे थे की, “हे सारयां ला शक्तिशाली प्रभु परमेश्वर, जड़ा कुछ तू कितया है सै कीमती कने अनोखा है।” तू सारयां देशां दा राजा है, तू जड़ा भी करदा है सेई सच्च कने धर्मी है। 4 “हे प्रभु, सारे लोक तेरी इज्जत करदे न, सै सारे तेरे नाए दी इज्जत करदे न, क्योंकि सिर्फ तू ही पबित्र परमेश्वर है। हर इक जातिया दे लोक तेरे बाल ओदे न, कने सै तेरी अराधना करदे न क्योंकि तेरे धर्मे दे कम्म सारे लोक अच्छे ला जाणदे न।” 5 इदे बाद जालू सै गीत गाई बैठे, तालू मै दिखया की स्वर्गे दा मंदर खुलया था। जड़ा मिलाप बाले तम्बुऐ सांई है। 6 कने सै सतों स्वर्गदूत जिना बाल सतों मुसीबतां थियां, उस मंदरे ला बार निकले। उना चमकदार कपड़े पायो थे कने उना दिया छातिया दे चारो पासे सोने दिया पट्टियां भी थियां। तालू उना चार जिन्दे प्राणियां चे इकी उना सत स्वर्गदूतां जो परमेश्वरे दिया तरफा ला जड़ा हमेशा जिन्दा है, गुस्से

दा भस्मा इक-इक सोने दा कटोरा दिता। (aiōn g165) 8 कने मन्दिर परमेश्वरे दिया महिमा कने सामर्थ्य ला ओणे बाले धुंए ला भस्ई गया। कने तालू दीकर कोई भी मंदरे च नी जाई सके जालू दीकर उना सत्त स्वर्गदूतां दे जरिये नियोरियां सतो मुसीबतां मुकी नी जान।

16 फिरी मै उदे बाद मंदरे ला इक उचिया अबाजा जो सत्तों स्वर्गदूतां जो ऐ बोलदे सुणया, “जा, कने परमेश्वरे दिया तरफा ला सजा जो जड़ी उना सत्तों कटोरयां च है, धरतिया दे लोकां पर नियोरी दिया।” 2 इस तांई पेहले बाले स्वर्गदूते जड़ा उदे कटोरे च था सै धरती पर नियोरी दिता। फिरी उना लोकां जो जिना पर उस जानवरे दी छाप थी, या जिना उदिया मुर्तिया दी पूजा कितियो थी, उना जो बड़े बड़े जखम होई गे जिना च बड़ी जादा पीड़ा होंदी थी। 3 दुज्जे स्वर्गदूते जड़ा उदे कटोरे च था उसयो उनी समुंदरे च नियोरी दिता। कने तालू ही समुंद्रे दा रंग मरयो माणुए दे खूने सांई होई गया, कने समुंद्रे च रेणे बाली हर इक प्राणी दी मौत होई गई। 4 तिजे स्वर्गदूते जड़ा उदे कटोरे च था उसयो उनी खड्डां कने पाणिए दे झरनया पर नियोरी दिता, कने सै खून सांई बणी गे। 5 तालू मै उस स्वर्गदूते जो जिसया पाणिए पर हक है, परमेश्वरे ला ऐ बोलदे होए सुणया, “हे पबित्र परमेश्वर, जड़ा बकत दी शुरुआत ला लेईकरी हुणे दीकर कने हमेशा तांई नी बदलदा, तू जड़ी सजा दितियो है, सै सही है।” 6 क्योंकि उना तेरे लोकां कने परमेश्वरे दे संदेश देणेबालयां जो मारी दिता, इस तांई तू हुण उना जो खून पिणे तांई दिन्दा है। ऐई उना तांई खरा है। 7 मै फिरी वेदिया ला कुसी जो बोलदे सुणया, “हाँ, हे सारयां ला शक्तिशाली प्रभु परमेश्वर, ऐ सच्च है की जियां तू लोकां दा न्याय करदा है सै सही है।” 8 चौथे स्वर्गदूते जड़ा उदे कटोरे च था उनी सूरजे पर नियोरी दिता, कने सूरजे जो अपणी गर्मीं बदाणे दी इजाजत दिती, इसा बजा ला लोक जादा गर्मियां दिया बजा ला फकुई गे, 9 इस तांई उना परमेश्वरे जो श्राप दिता था, क्योंकि सेई था जिदे बाल सजा देंगे दा हक था। उना हल्ले भी अपने पापां ला पञ्चाताप नी किता कने परमेश्वरे दी निंदा किती, उना हल्ले दीकर परमेश्वरे दिया महानता जो नी मनया। 10 पंजमे स्वर्गदूते जड़ा उदे कटोरे च था उनी उस जानवरे दे सिंहासने पर नियोरी दिता, कने जिस राज्य पर जानवर राज करदा था उस पर नेरा छाई गया; कने लोक अपणिया जीभा जो चबाणा लग्गी पे क्योंकि सै उना दुखां कने जखमा जो सेहन नी करी सका दे थे जड़े उना जो होआ दे थे। 11 कने

अपणियां पिंडा कने फोडयां दिया बजा ला स्वर्ग दे परमेश्वरे दी बुराई किती; भले ही उना दे हालात इयोदे थे पर अपणे बुरे कम्मा ला पश्चाताप नी किता कने ना ही उना बुरे कम्मा जो करणा छडया जडे सै करा दे थे। 12 छेमे स्वर्गदूते जडा उदे कटोरे च था उनी सै बड़ी बड़ी नदी फरात च नियोरी दिता, इसा बजा ला उसा दा पाणी सुकी गया कने पूर्व दिशा दे राजे अपणिया सेना लेईकरी उसा नदिया जो पार करी सके। 13 कने मै इदे बाद तिन बुरी आत्मा जो दिखया जडियां दिखणे च मेंढके सांई थियां। इक उस अजगरे दे मुऐ ला बार आई, कने दुज्जी पेहले जानवरे दे मुऐ ला बार आई कने तीजी उस दुज्जे जानवरे दे मूऐ ला बार आई जिनी झूठा संदेश दितया था। 14 इना बुरियां आत्मा बाल चमत्कार करणे दी शक्ति थी कने उना जाई करी उना लोकां जो गठेरया जडे इस संसारे दे सारे देशां पर राज करदे न ताकि सै सारयां ला शक्तिशाली परमेश्वरे दे उस महान दिने पर उदे खिलाफ लड़ाई लड़ने तांई जान। 15 “उना बुरियां आत्मा राज कने उना दियां सेना जो उसा जगा पर गिठा किता जिसया इब्रानी भाषा च हर-मगिदोन बोलदे न।” इस तांई प्रभु यीशु मसीह बोलया है, “ऐ गल्ल सुणा। मै चोरे सांई अचानक ओणा है। सोभाग्यशाली है सै माणु जडा मेरे ओणे पर जागदा है कने अपणे कपडे तैयार रखदा है। तालू उना नंगे नी होणा कने शर्मिदा नी होणा जालू उना लोकां बिच जाणा।” 17 कने सतमे स्वर्गदूते जडा उदे कटोरे च था उनी होआ च नियोरी दिता, कने मै सुणया, ओथु सै था जडा स्वर्गे दे मंदरे दे अंदरे ला परमेश्वरे दे सिंहासने ला बोला दा था, “सब कुछ होई गया।” 18 कने उसी बकत बिजलियां कने गडगडात बदलां दे गडाके होणा लगे कने इक ऐसा भयानक हिलण होया, इसला पेहले लोकां कदी भी इतणे जोरे ला हिलण महसूस नी कितया था। 19 इसला बाबेल दा सै बड़ा शहर तिन हिस्सयां च बंडूई गया। क्योंकि परमेश्वरे अपना वायदा पूरा किता जडा उनी बाबेल शहरे दे लोकां जो सजा देणे दे बारे च कितया था। इसयो परमेश्वरे बड़ी कठोर सजा देंगी। ऐ इयां ही होणा जियां उना बिना पांणी पायो शराब पि लियो है, जिसया परमेश्वरे अपु गलासे च पाया है, जडा उदे गुस्से जो दसदा है। 20 कने उस बकत समुंद्रे दे सारे टापू गायब होई गे, कने पाड़ भी गायब होई गे। 21 अम्बरे ला लोकां पर बड़े-बड़े ओले पे, हर इकी ओले दा बजन लगभग 50 किलो था। ऐ मुसीबत बड़ी भरी बड़ी थी, इसा बजा ला लोकां परमेश्वरे दी बुराई किती।

17 जिना सत्त स्वर्गदूतां बाल सै सत्त कटोरे थे, उना चे इक जणे आई करी मिंजो ला ऐ बोलया, “मैं तिजो दसणा की परमेश्वरे कियां उसा बडिया बेश्या जो सजा देंगी, जड़ी ऐसिया जगा पर बौदी है जिथू ला मतियां खट्वां न।” **2** जिसा सोगी धरती दे राजयां व्यभिचार किता, बाबेल दे बुरे कम्मा धरतिया दे सारे देशां जो भ्रष्ट करी दिता। ऐ ऐसा था जियां उनी उना जो शराब पिणे ताई दिती, कने इसा बजा ला परमेश्वरे उना जो सजा देंगी। **3** तालू स्वर्गदूत मिंजो पबित्र आत्मा दिया सहायता ला सुनसान जगा च लेई गया, आत्मा मिंजो अपने काबू च लेई लिया, कने मैं ओथु इक जनानिया जो दिखया जड़ी इक लाल रंगे दे जानवरे पर बेठियो थी, जिसादे सत्त सिर कने दस सिंग थे। उदा शरीर परमेश्वर दे खिलाफ लिखयो ना ला भस्या था। **4** इना जनानिया बैगणी, कने लाल रंगे दे कपडे पायो थे। उना अपने शरीर जो सोने दे मेगे मणियां कने मोतियां ला सजाया था। कने उसा दे सज्जे हथे च शराबा ला भस्या सोने दा गलास पकड़या था, जड़ा उसा दे बुरे कम्मा कने गंदे यौन कम्मा जो दसदा है। **5** कने उसा दे मथे पर इक ना लिखया था जिदा इक गुप्त मतलब है, “मैं महान शहर बाबेल है। मैं सारियां बेश्यां दी मां है कने संसारे दे सारे बुरे कम्मा दा जरिया है।” **6** कने मैं दिखया की जनानी परमेश्वरे दे लोकां दे खूने दे नशे च थी, जिना जो लोकां मारी दितया था क्योंकि सै यीशुऐ पर भरोसा करदे थे। कने उसयो दिखीकरी मिंजो बड़ी हेरानी होई। **7** उनी स्वर्गदूते मिंजो ला बोलया, “तू हेरान मत हो। मैं तिजो इसा जनानी, कने उस जानवरे दा, कने जिस पर सै बेठियो है, जिदे सत्त सिंग न कने दस सर न, गुप्त भेद समझांगा।” **8** जड़ा जानवर जिसया तू हुण दिखया, इक बकत पेहले जिन्दा था, पर हुण नी है, कने सै हुण अथाह कुंडे ला बार ओणे बाला है कने परमेश्वरे पुरे तरीके ला नाश करी देणा। धरती पर रेणेबाले लोक जिना दे ना परमेश्वरे संसार शुरू होणे ला पेहले जिन्दया दिया कताबा च नी लिखयो, उना सारयां हेरान होई जाणा जालू उना इस जानवरे जो दिखणा। इक बकत पेहले सै जिन्दा था; हुण सै जिन्दा नी है; पर उनी फिरी बापस मुड़ी ओणा। (Abyssos g12) **9** ऐ समझणे ताई तुहांजो ज्ञान दी जरूरत है: जानवरे दे सत्तो सर उस शेहरे जो द्रशांदे न जिस पर ऐ जनानी राज करदी है। कने सै सत्त राजयां जो भी द्रशांदे न। **10** कने सै जड़े सत्त राजा न, उना चे पंज तां पेहले ही मरी गियो न; उना चे इक हुण राजा है कने आखरी बाला हल्ले दीकर आया नी है, पर जालू उनी ओणा तां उनी थोड़े बकते ताई राज करणा। **11** सै जानवर जड़ा

बड़े पेहले रेंदा था कने हूण नी है, सै अठमा राजा है। पर सै अठमा राजा पेहले सत्त राजयां चे इक है। आखरी च उस राजे जो पक्का ही हमेशा ताई सजा मिलणी। 12 जडे दस सिंग तू पेहले दिखे थे, सै उना दस राजयां जो द्रशादे न जिना हल्ले दीकर राज करणा शुरू नी कितया है। उना दस राजयां जो उस जानवरे सोगी मिलिकरी थोड़े दे बकते ताई राज करणे दा अधिकार मिलणा। 13 इना सारयां राजयां दा इक ही मकसद है, कने उना अपणी-अपणी शक्ति कने अधिकार जानवरे जो देई देणा। 14 “जानवर कने इना दसां राजयां छेलुये दे खिलाफ युद्ध करणा, पर छेलुये उना जो हराई देणा, क्योंकि सै प्रभुआं दा प्रभु, कने राजयां दा राजा है। उनी उना जो अपने सदयो, चुणयो कने भरोसे दे काबील चेलयां सोगी हराई देणा।” 15 स्वर्गदूते भी मिंजो ऐ भी बोलया, “जड़ा पांणी तू पेहले दिखया था, जिस पर सै बेश्या बेठियो थी, सै सारे संसारे दे लोक न, जड़े सारियां जातियां, धर्म, देश दे कने लग-लग भाषा बोलणे बाले न।” 16 सै बकत ओणा जालू जानवर उना दस राजयां सोगी जडे उदे सोगी न, उस बेश्या ला नफरत करणी जड़ी उस पर बेठियो है। उना उस पर हमला करणा, उसयो नंगा करणा, उना उदे मिटे दा हिस्सा खाई जाणा, कने बाकियां जो उना फुकी देणा। 17 सै जनानी जिसया तू दिखया था, सै बड़ा शेहर है जड़ा धरती पर सारे राजयां पर शासन करदा है। ऐ चीजां उदे सोगी होई ना, क्योंकि परमेश्वरे अपने मकसदे जो पूरा करणे ताई उना दे मना दा मार्गदर्शन किता है। ऐई बजा है की उना अपना अधिकार जानवरे जो देई दिता ताकि सै राज करे, जालू दीकर सै पूरा नी होई जा जड़ा परमेश्वरे बोलया था।

18 इदे बाद मै इक होर स्वर्गदूते जो स्वर्गे ला उतरदे दिखया। उदे बाल बड़ा अधिकार था कने उदिया चमका दिया बजा ला सारिया धरतिया पर लौ होई गई। 2 उनी जोंरे ला पुकारी करी बोलया, “बाबेल देश दा सर्वनाश होई गया! बड़े बाबेल देश दा सर्वनाश होई गया।” कने सै बुरियां आत्मा दा घर, कने हर इक अशुद्ध आत्मा दा अडा, कने हर इक अशुद्ध कने बुरे पंछियां दा अडा होई गया। 3 ऐ इसा बजा ला होणा क्योंकि उना जनानिया जड़ी बाबेल शेहर है, उना हर इक देशे दे सारे लोकां जो सै शराब पियाईयो है जड़ी उसा दी मूर्तियां दी पूजा है। सारिया धरतिया दे राजा उदे गंदे कम्मा च शामिल होयो न। धरतिया दे व्यापारी उसा जनानिया दिया मेगियां-मैंगिया चीजां दिया इच्छा दिया बजा ला अमीर बणी गे। 4 फिरी मै स्वर्गे ला इक हर अबाज सुणी, “हे मेरे लोको, उस शेहरे ला

निकली जा। उना लोकां सोगी मिली करी पाप मत करा, ताकि तुहांजो उना सोगी सजा ना मिल्ले।” 5 क्योंकि उना दे पाप बड़े बड़े न, जिना दा ढेर अम्बरे दीकर लग्गी गया है, कने परमेश्वर उसा बुराई जो कदी नी भुलदा है जड़ी उना कितियो है। 6 इस ताई मैं बोलदा है, उस शेहरे सोगी भी सियुदा ही कर जियां उनी दुज्जयां सोगी कितया है, उदे सारे बुरे कम्मा ताई उसयो दो गुणा बदला दे। उस शेहरे ताई दौगुनी शक्तिशाली यातना दी तैयारी कर जदियां यातना सोगी उनी दुज्जयां लोकां सोगी जुलम कितया था। 7 तू उसयो पक्का ही बड़ी जादा पीड़ कने दुख देणी जडा उदे जिन्दगी जिणे दे तरीके कने उदे अपने आपे दे घमंडे दे बराबर है। उनी अपने आपे ला बोलया, “मैं इक राणिया सांई लोकां सांई राज करणा।” इक बिधवा नी है कने मिंजो कदी दुख नी होणा। 8 उदे अपनी बड़ाई करणे दिया बजा ला उस अचानक मुसीबतां आई पोंणियां। सिर्फ इकी ही दिने च बिमारी कने शोक कने अकाल उस पर इक सोगी आई जाणा। कने उसयो अग्नी च भस्म करी देणा, क्योंकि प्रभु परमेश्वर शक्तिशाली है, कने उनी उसयो सजा देणी। 9 कने राजे शेहरे जो फकुंदा दिखणा तां उना उदे ताई रोणा कने दुख मनाणा। 10 कने सै उसा सजा ला डरे न जडा उसा जो पीड़ दिन्दा है, बड़े शेहर, बाबेल। हे मजबूत शेहर, हाय। हाय। थोड़े दे बकत च, परमेश्वरे तेरा न्याय करी दिता कने सजा दिती। 11 धरती दे व्यापारियां उदे ताई रोणा कने दुख मनाणा है, क्योंकि हुण कुनी भी उना दा माल नी खरीदणा है। 12 उना दा माल केईयां तरा दा था। उदे च सोना, चांदी, रतन, मोती थे। उदे च बड़े खेल कने मेंगे धागे चमकीले लाल बैजणी, रेशमी, कपड़े दे बणायो थे। उदे च खुशबुदार लकड़िया ला बणियां चीजां, हाथिये दे दंदा ला बणियां चीजां थियां, होर भी बाकी चीजां थियां जडियां मेंगी लकड़िया या पीतल, लोहा, या संगमरमर दियां बणियां थियां, 13 कने लोक दालचीनी, मसाले, धूप, इत्र, लोबान, शराब, तेल, मैदा, गाय-बैल, भेड़-बकरियां, घोड़े, रथ, कने दास कने माणुए दे प्राण नी खरिददे थे। 14 व्यापारियां उसला बोलणा, सै सारियां चीजां जिना दी तू इच्छा रखदी थी हुण नी न। हुण सारियां खेल खुशबुआ बालियां चीजां जडियां तिजो पसंद थियां, सै सारियां चीजां जिना जो तू अपने शरीर जो सुंदर बणांदी है, सै सारियां गबाची गियां न, हुण नी मिलदियां। 15 इना चीजां दे व्यापारी जड़े उदे जरिये अमीर होई गियो थे, उसा दी पीड़ा दे डरे ला उना दूर खड़ोणा कने रोंदे-रोंदे बोलणा, 16 हाय! हाय! ऐ बडा शेहर जिनी मलमल कने लाल रंग दे

कपड़े पायो थे, कने सोने कने मोतियां ला सजया था; 17 घड़िया च ही उदा सारा धन खतम होई गया। जाजे दे सारे कमान कने सै सारे जड़े जाजे पर यात्रा करदे न, कने सै सारे जड़े समुंदरे ला अपणा गुजारा करदे न, बाबेल शेहरे ला बड़े दूर खडोई करी दिखदे रे। 18 कने जालू उना शेहरे जो फकुंदे कने अग्गी ला निकलदे धुंऐ जो दिखणा कने चिल्लाणा, इस सांई महान शेहर होर कोई नी होया! 19 कने उना अपणा दुख दसणे तांई अपने-अपने सिरां पर धुड पाणी है, कने रोंदे-रोंदे कने चीलाई करी बोलणा, हाय। हाय। ऐ बडा शेहर जिदिया संपतिया ला समुंद्रे दे सारे जाजां बाले अमीर होई गियो थे, सै घड़िया च ही सारा उजड़ी गया। 20 तू जड़ा स्वर्गे च रेंदा है, कने हे परमेश्वरे दे लोको, कने प्रेरितां, कने परमेश्वरे दे संदेश देणेबालयां, जड़ा उस सोगी होया उस पर खुश होआ, क्योंकि परमेश्वरे बाबेल शेहरे जो उना गल्लां च दोषी बणाया है जड़ियां उनी तुहाड़े सोगी कितियां न। 21 फिरी इक जोरे बाले स्वर्गदूते बडिया चक्किया दे चक्के दे बराबर इक पथर चुकया, कने ऐ बोली करी समुंदरे च सुटी दिता, “जियां इस पथरे जो समुंदरे च फेंकदे न,” कने सै दोबारा नी मिलदा है, तियां ही सै महान शेहर बाबेल भी इक ही बरी च खतम होई जाणा, कने दुबारा नी बणाणा। 22 बाबेल शेहर तेरियां गलियां च फिरी कदी भी गाणा बजाणा नी सुणोणा, कोई भी गायकां, बंसरी बजाणे बालयां, कने तुरही बजाणे बालयां दा संगीत नी होणा। तुहाड़े सारे माहिर कर्मचारी गायब होई जाणे, कने तुहाड़ियां मिलां बाल पिणे तांई कोई अनाज नी होणा। 23 कने उदियां राती नेरियां होणियां, ऐथू दीकर की इक भी दिय्या नी बलना। ओथु कुसी भी लाड़ा लाड़िये दिया खुशिया दी गल्ल नी होणी। ऐसा इस तांई होणा क्योंकि उदे व्यपारियां जड़े दुनिया भर च सारयां ला बड़े थे उना अपने जादू टोणे ला देशां जो धोखा दिता है। 24 परमेश्वरे बाबेल जो इस तांई सजा दिती क्योंकि सै परमेश्वरे दे संदेश देणेबालयां जो, कने होर सारे लोकां जो जड़े परमेश्वरे दे न, कने धरती दे लोकां जो मारणे दा दोषी था।

19 जालू सै जोरे बाला स्वर्गदूत बोली बैठा तां इदे बाद मै जड़ा सुणया सै इयां था जियां मते लोक गा दे होन, “परमेश्वरे दी महिमा हो! तू ही है जड़ा उद्धार करदा है, कने सामर्थ्य साडे परमेश्वरे दी ही है।” 2 उदी स्तुति करा क्योंकि उदे सारे फैसले सही कने सच्चे न। उनी बदनाम बेश्या दा न्याय करिरी बदला लिया क्योंकि उना संसारे दे लोकां जो पाप करणे तांई भरमाया। परमेश्वरे उसा वेश्या दा न्याय करिरी

बदला लिया क्योंकि उना अपने दास मारयो थे। 3 फिरी दूजी बरी उना बोलया, “हालेलूय्याह! बाबेल जो नाश करणे बालिया अग्गी ला निकलणे बाला धुंआ उठदा रेणा कने कदी बंद नी होणा।” (aiōn g165) 4 कने चोबियाँ अगुवां कने चारों जिन्दे प्राणिनां गोडे भार बेईकरी परमेश्वरे जो दण्डवत किता, जडा सिंहासने पर बैठया था, कने बोलया, “आमीन! परमेश्वरे दी स्तुति हो।” 5 कने फिरी मैं कुसी जो बोलदे सुणया, कने ऐसा लगया की जियां ऐ अबाज परमेश्वरे दे सिंहासने ला आई हो। उनी बोलया, “साडे परमेश्वरे दे सेबकों कने तुसां जडे उदा डर मंदे न, चाहे बड़े दर्जे दे होन या छोटे दर्जे दे होन तुसां सारे परमेश्वरे दी स्तुति करा।” 6 इदे बाद, फिरी मैं ऐ भी सुणया जडा बड़े जादा लोकां दे चिलाणे सांई था। उना दा चिल्लाणा मते पाणिए दिया अबाजा सांई था, कने बदलां दे गडाकयां दिया अबाजा सांई था। मैं उना जो ऐ बोलदे सुणया; परमेश्वर साड़ा प्रभु, ओआ असां उदी स्तुति करन। क्योंकि उदे बाल हर जगा राज करणे दी शक्ति है। 7 ओआ, असां खुश कने मगन होई जान, कने उदी स्तुति करन, क्योंकि छेलुये दा बियाह होणेबाला है, उदी लाडी श्रृंगार करिरी कने अपने आपे सजाई करी उदे तांई तैयार है। 8 छेलुये उसयो साफ चमकदार मलमल ला बणयो कपडे पाणे तांई दिते न, जडे श्रद्ध न, जडा भरोसा करणे बालयां दे भले कम्मा दा प्रतीक है। 9 तालू स्वर्गदूते मिंजो ला बोलया, “ऐ लिख, धन्य सै न, जिना जो छेलुये दे बियाये दा जशन मनाणे तांई धामा च सदया है।” फिरी उनी मिंजो बोलया, “ऐ बचन परमेश्वरे दे सच्चे बचन न।” 10 जालू मैं सुणया तां जडा मिंजो ला गल्लां करा दा था, मैं उस माणुऐ सामणे झुकी गया, क्योंकि मैं उदी अराधना करा दा था। उनी मिंजो बोलया, मेरी अराधना मत कर, मैं भी तेरे सांई परमेश्वरे दा सेबक है कने तेरे भाईयां सांई जडे यीशु मसीह दियां सच्ची शिक्षां पर भरोसा करदे कने मंदे न। तिजो परमेश्वरे दी ही अराधना करणी चाईदी। क्योंकि परमेश्वर आत्मा है जडी परमेश्वरे दे लोकां जो यीशु मसीह दी दसियो सच्चाईया दी घोषणा करणे दे काबिल बणादां है। 11 फिरी मैं स्वर्गे की खुलया होया दिखया, कने ओथु मेरे सामणे इक चिट्टा घोडा था; कने उस पर इक सवार था, सै परमेश्वरे दा सच्चा कने भरोसेमंद सेबक था; सै धार्मिक तरीके ला उदे दुशमणा दा न्याय करदा है कने उना दे खिलाफ लड़ाई करदा है। 12 उदियां हखी अग्गी दियां लपटा सांई चमकदियां थियां, कने उदे सिरे पर मते भरी राजमुकुट थे। उदा इक ना उस पर लिखया था, पर सिर्फ सेई उस नाऐ दा मतलब

जाणदा था। 13 उनी खूने च डोबया कपड़े पायो थे, कने उदा ना परमेश्वरे दा बचन था। 14 कने स्वर्गे दी सेना उदे पिच्छे-पिच्छे थी। सै भी चिट्टे घोड़यां पर सवार थे कने उना चिट्टे मलमले दे कपड़े पायो थे जिना च कोई भी दाग नी था। 15 उदे मुंऐ ला इक पैनी तलवार निकली जिसला उनी देशां जो हराई देणा। जड़ा उदे अधिकारां जो नी अपनांदा उनी उना जो पुरे तरीके ला सजा देंगी। उनी सारयां ला शक्तिशाली परमेश्वरे दे भयंकर गुस्से जो इयां ही छडी देणा जियां इक रस्सकुंड ला अंगरा दा रस्स निकलदा है। 16 कने उदिया पोशाका कने उदिया सजिया जंघा पर ऐ ना लिखया है: “राजयां दा राजा कने प्रभुआं दा प्रभु है।” 17 फिरी मैं इक स्वर्गदूते जो सूजे पर खडोतयो दिखया, कने उनी अम्बरे च उच्चे उड़दे मांस खाणे बाले सारे पंछियां जो जोरे ला पुकारया, “ओआ, उसा बडिया धामा ताई गिठे होई जा जड़ी परमेश्वरे तुहाड़े ताई तैयार कितियो है।” 18 ओआ कने राजयां, सेना दे अगुवां, ताकतबर सेनिका, घोड़यां कने उना से सवारां दा मास खाओ। तुसां हर तरा दे मरयो लोकां दा मास खाई सकदे न, मतलब की गुलाम कने अजाद, बड़े कने छोटे, सारयां दा मास खा। 19 फिरी मैं उस जानवरे जो दिखया जड़ा समुंद्रे ला बार आया था, कने धरती दे राजयां कने उना दियां सेना जो दिखया। सै घोड़े पर बोणे बाले कने उदिया सेना दे खिलाफ लड़ाई लड़ने ताई इक सोगी आए। 20 कने सै पैला जानवर, कने उदे सोगी सै झूठा परमेश्वरे दे संदेश देणे बाला पकड़ोई गया, झूठे संदेश देणेबाले जानवरे दिया तरफा ला चमत्कारी चिन्न दस्से कने उना सारे लोकां जो भटकाया, जिना अपने मथे पर छाप लाईयो थी कने जड़े उदिया मुर्तिया दी पूजा करदे थे। ऐ दोनो जींदे जी उसा अग्नी दिया झिला च पाई दिते, जड़ी गन्धक ला बलदी है। (Limnē Pyr g3041 g4442) 21 तालू चिट्टे घोड़े दे सवारे उस जानवरे दे सारे सेनिका जो मारी दिता, उनी उना जो उसा तलबारा ला बडी दिता जड़ी उदे मूऐ ला निकली थी। तालू अम्बरे दे सारे पंछी मरयो लोकां दा मास खांणे ताई आई गे जालू दीकर की उना दा पेट भरूई नी जा।

20 फिरी मैं इक स्वर्गदूते जो स्वर्गे ला उतरदे दिखया, जिंदे हथे च डुगे कुंडे दी चाबी थी, कने इक बडी जंजीर थी। (Abyssos g12) 2 कने उनी उस पूराणे अजगरे जो झपटी करी पकड़ी लिया। जिसयो शैतान भी बोलदे न, उनी उसयो बन्नी करी डुगे कुंडे च फेंकी दिता कने दरवाजा बंद करी दिता कने उस पर मोहर लाई दिती ताकि उसयो इक जार सालां दीकर कोई खोले ना। इना जार सालां च

शैताने संसारे लोकां जो धोखा नी देई सकणा। उदे बाद उसयो थोड़े बकते ताई छडी देणा। (Abyssos g12) 4 फिरी मैं कुछ सिंहासन दिक्खे, कने जड़े लोक उना सिंहासना पर बैठयो थे उना जो राज करणे दा हक दितया था। मैं उना लोकां दियां आत्मा जो भी दिखया जिना दे सिरां जो बड्डी दितया था क्योंकि उना ऐ मन्नी लिया था की यीशु उना दा प्रभु है, कने सै परमेश्वरे दे बचने पर भरोसा करदे थे। उना जानवर या उदिया मुर्तिया दी पूजा नी कितियो थी कने इना अपने मथे कने हथां पर जानवरे दी छाप नी लाइयो थी। ऐ लोक दुबारा ला जिन्दे होई गे कने इना इक हजार सालां दीकर मसीह सोगी राज किता। 5 मरयां चे जिन्दे होंगे बालयां चे ऐ सारयां ला पेहले थे कने ऐ बड़े जादा सोभाग्यशाली कने पबित्र न। दूजी मौत दा उना पर कोई अधिकार नी है। सै परमेश्वरे दे कने मसीह दे याजक होणे कने उना सोगी इक हजार साल दीकर राज करणा। इना इक हजार सालां ला पेहले कुसी भी भरोसा करणे बालयां जो जड़े मरी गियो थे जिन्दा नी कितया। 7 जालू हजार साल पुरे होई जाणे तां स्वर्गदूते शैताने जो ओथु ला जिथू सै बन्नया था अजाद करी देणा कने उनी उना देशां जो धोखा देंगे ताई बार आई जाणा जड़े पुरे संसारे च खिंडयो न। इना देशां जो गोग कने मागोग बोलदे न। शैताने उना सारयां जो इकी जगा पर गठेरी देणा जिथू उना लड़ाई करणी। उना समुंदरे दे बखे दिया रेता बराबर होणा की कुनी उना जो गिणी नी सकणा। 9 कने सै सारिया धरतिया पर हर जगा गे। उना उस शेहरे जो घेरी लिया, जिसयो परमेश्वर प्यार करदा है, जिथू उदे लोक रेंदे थे। परमेश्वरे दिया तरफा ला कने स्वर्गे ला अगग आई उना पुरिया सेना जो भस्म करी दिता। 10 इदे बाद शैतान पकड़ोई जाणा, जिनी हर देशे दे लोकां जो भटकाया कने उसयो गन्धक दिया अग्गी च फेंकी देणा, मतलब की उसा अग्गी च जड़ी झीला सांई बड्डी है। जिदे अंदर उस जानवरे जो कने परमेश्वरे झूठे संदेश देणेबालयां जो पेहले ही फेंकी दितया था। उसा अग्गी च उना जो हमेशा ताई दिन रात सताया जाणा है। (aiōn g165, Limnē Pyr g3041 g4442) 11 फिरी मैं इक चिट्ठा सिंहासन दिखया जिस पर परमेश्वर बिराजमान था। पर ओथु जिथू परमेश्वर बिराजमान था, ओथु ला धरती कने स्वर्ग सारा गायब होई गया कने फिरी कुनी भी उना जो नी दिखया। 12 फिरी मैं मरयो लोकां जो उस सिंहासने सामणे खडोतयो दिखया मतलब की उना जो जड़े खास न कने आम लोक न। सै लोक जड़े समुंद्रे च डूबी करी मरी गियो थे कने कबरां दे सारे मरयो लोक, कने सै सारे लोक जड़े मरयां

दिया जगा पर थे, सै सारे उस सिहांसने सामणे खडोते। कने कताबां च लिखियां गल्लां दे अनुसार, जडा-जडा उना कितया उदे अनुसार उना दा न्याय होणा। (Hadēs g86) 14 सै सारे लोक जिना दे ना जिन्दगिया दिया कताबा च नी लिखयो थे, उना जो अग्गी दिया झिला च फेंकी दिता। इदे बाद मौत नी है, हुण मरयां दी कोई जगा नी है क्योंकि सै सारे लोक जिना दे ना जिन्दगिया दिया कताबा च नी लिखयो थे उना जो अग्गी दिया झिला च फेंकी दिता, इसा जो ही दुज्जी मौत बोलदे न, जडा की अग्गी दिया झिला च सजा है। (Hadēs g86, Limnē Pyr g3041 g4442)

21 फिरी मैं नोआ स्वर्ग कने नोई धरती दिखी, क्योंकि पूराणी धरती कने स्वर्ग हुण नी थे। कने हुण कोई समुन्द्र भी नी था। 2 फिरी मैं पबित्र नोए शहर यरूशलेमे जो भी दिखया, जडा स्वर्गे ला परमेश्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिसा जो कपडे पहनाई करी कने श्रृंगार कितया है जडी लाडे सोगी बियाह करणे तांई तैयार है। 3 फिरी मैं इक अबाज सुणी जडी परमेश्वरे दे सिंहासने ला जोरे ला बोली, “दिख, हुण परमेश्वरे लोकां बिच अपना घर बणाणा।” उनी उना सोगी रैणा, कने सै उदे लोक होणे, उनी अपु उना जो अपने लोकां दे स्पे च अपनाणा कने उनी उना सोगी रैणा कने उना भी उसयो परमेश्वरे दे स्पे च अपनाई लेंणा। 4 परमेश्वरे उना दियां हखी ला सारे आंसू पूंज्जी देंगे; कने इदे बाद कुसी भी माणुए जो दुख नी सेहणा पोंणा, रोणा नी पोंणा, दर्द महसूस नी होणा, ना ही कूदी मौत होंगी क्योंकि पूराणे संसारे दियां सारियां चीजां गायब होई गियां न। 5 कने जडा सिंहासने पर बैठया था, उनी बोलया, “दिख, मैं सब कुछ नोआ करी दिन्दा है।” फिरी उनी बोलया, “लिखि ले, क्योंकि जडा मैं बोलदा है उदे पर भरोसा करी सकदा है। ऐ गल्लां पक्का ही होणियां।” 6 फिरी उनी मिंजो बोलया, सब कुछ मुकी गिया है। मैं अलफा कने ओमेगा, कने शुरूआत कने अंत है। जडा कोई प्यासा है, मैं उसयो उस पाणिऐ ला मुफ्त पांणी पिणे तांई देणा जडा हमेशा दी जिन्दगी दिन्दा है। 7 जडा शैताने जो हराई दिन्दा है, उसयो मिंजो ला सै ऐ सारियां आशीषां मिलणियां; कने मैं उदा परमेश्वर होणा कने सै मेरा पुत्र होणा। 8 पर जडे मिंजो पर भरोसा नी रखदे, उना जो जोर लाईकरी गंधक बालिया उसा झिला च पाई देणा, जडी दुज्जी मौत है। कने सेई अंजाम उना दा भी होणा, जडे लोकां दे सामणे मिंजो अपनाणे ला डरदे न,


बुरे कम्म करदे न, जडे हत्यारे न, गंदे कम्म करदे न, जादू टोणा करदे न, मूर्तियां
 दी पूजा करदे न, या झूठ बोलदे न। (Limnē Pyr g3041 g4442) 9 फिरी उना
 सत्तां स्वर्गदूतां चे इकी जिना माणुए दिया जाति पर सत्त आखरी मुसीबतां ला
 भरयो कटोरे न्योरे थे, मिंजो सोगी गल्ल किती कने उनी बोलया, “ऐथू ओआ, मैं
 तिजो लाड़ी दसणी जिदा जल्दी ही छेलुये सोगी बियाह होई जाणा है।” 10 ताल्
 परमेश्वरे दिया आत्मा इक दर्शण दसया। उस दर्शने च स्वर्गदूत मिंजो इक बडे
 बड्डे पाडे पर लेई गया। कने पबित्र शेहर यरूशलेम दसया, जडा परमेश्वरे दिया
 तरफा ला स्वर्गे ला थले उतरया था। 11 शेहर परमेश्वरे ला मिलणे बालिया लौई
 ला चमका दा था, कने उदी ज्योति बडे कीमती पथर मतलब की यशब नाए दे
 बेशकीमती पथरे सांई चमका दी थी, कने शीशे सांई साफ थी। 12 शेहरे दियां चारो
 पासे दियां दिबारां बडिया उच्चिया थियां, कने शेहरे च बारा दरबाजे थे कने उना
 सारे दरबाजयां च इक स्वर्गदूत पेहरा दे दा था कने उना दरबाजयां पर इस्राएलियां दे
 बारा गोत्रां दे ना लिखयो थे। 13 शेहरे दिया चारों दिशां च तिन दरबाजे थे: पूर्व,
 पश्चिम, उत्तर कने दक्षिण च। 14 उना शेहरे दियां दिबारां बारा बड्डे-बड्डे पथरां उपर
 बणाईयां थियां, कने उना हर इक पथरे पर छेलुये दे बारह प्रेरितां दे नां लिखयो थे।
 15 सै स्वर्गदूत जडा मिंजो सोगी गल्लां करा दा था, उदे बाल दरबाजयां कने
 उदियां दिबारां जो नापणे तांई इक सोने दा गज था। 16 उस शेहरे दे चार सिरे थे
 कने चारो सिरे इकोदे थे। स्वर्गदूते उस सोने दे फीते ला शेहरे जो नापया; इदी
 लम्बाई दो हजार चार सौ किलो मीटर थी। इदी चौड़ाई कने उच्चाई लम्बाईया
 बराबर ही थी। 17 इदे बाद स्वर्गदूते दिबारां दी उच्चाई नापी। उनी इसयो भी इयां
 ही नापया जियां लोक चीजां जो नापदे न। दिबार छियासठ मीटर उच्ची थी। 18
 शेहर खरे सोने ला बणया था जडा शीशे सांई चमकदा था कने उदियां दिबारां यशब
 नाए दे कीमती पथरे ला बणियां थियां। 19 उस शेहरे दियां नियां कीमती बारा
 बड्डे-बड्डे पथरां पर बणियां थियां; पैली नी यशबे दी, दुज्जी नीलमणी दी, तीजी
 लालड़ीए दी, चोथी मरकते दी, 20 पंजमी गोमेदके दी, छेमी माणिक्ये दी, सतमी
 पीतमणिए दी, अठमी पेरोजे दी, नौमी पुखराजे दी, दसमी लहसनिये दी, गयारमी
 धूम्रकांते दी, कने बारमी याकूबे दी थी। 21 बारा दरबाजे भी इक-इक कीमती
 मोतियां ला बणयो थे, कने शेहरे दियां सडकां खरे सोने दियां बणियां थियां जडियां
 शीशे सांई चमकदियां थियां। 22 मैं इस शेहरे च कोई मंदिर नी दिखया क्योंकि

सारयां ला शक्तिशाली प्रभु परमेश्वर कने छेलू उस शेहरे च है। इस ताई ओथु मंदरे दी कोई जरूरत नी है। 23 उस शेहरे च ना सूरजे दी कने ना चन्द्रमे दी जरूरत है, क्योंकि सै शेहर परमेश्वरे कने छेलुये दिया रोशनिया ला रोशन है। 24 उस शेहरे च चमक संसारे च रेणे बालयां सारे लोकां जो रौशनी दिन्दी है कने संसारे दे सारे राजयां अपणिया-अपणिया दौलता जो उस शेहरे च लेई ओणा है। 25 उस शेहरे दे दरबाजे दिन भर खुले रेंदे न। सै कड़ी कदी भी बंद नी होंदी क्योंकि ओथु कदी भी रात नी होंदी। 26 संसारे दे लोकां संसारे दियां सारियां खुबसुरत चीजां जो कने लोकां दिया धन दौलता जो उस शेहरे च लेई ओणा है। 27 पर जडे कुछ भी गंदा था या सै लोक जडे बुराई करदे न या झूठ बोलदे न, उना जो पक्का ही उस शेहरे च अंदर ओणे दी इजाजत नी है। ओथु सिर्फ सेई लोक अंदर जाई सकदे न जिना दे ना छेलुये दिया जिन्दगिया दिया कताबा च लिखयो थे।

22 तालू स्वर्गदूते मिंजो इक नदी दस्सी जिदे च जिन्दगी दा पांणी था। पांणी शीशे सांई चमका दा था। ऐ नदी परमेश्वर कने छेलुये दे सिहांसने दे थले ला बेह दी थी। 2 नदी शेहरे दिया सड़का दे बिचो बिच ला गुजरदी थी। नदिया दे हर इक किनारे पर जिन्दगी देणेबाले स्रख लगयो थे जडे हर साल बारा बरी फल दिन्दे थे मतलब की हर मिने च इक बरी। संसारे दे लोक उना दे पत्तयां दा उपयोग अपणियां बिमारियां जो ठीक करणे तांई करदे न। 3 उस शेहरे च कुछ भी ऐसा नी है जडा परमेश्वरे दे श्राप दे अधीन है। परमेश्वर कने छेलुए दा सिंहासन उस शेहरे च होणा, कने परमेश्वरे दे सेवकां उदी अराधना करणी। 4 उना परमेश्वरे जो आमणे सामणे दिखणा, कने परमेश्वरे दा नां उना दे मथे पर लिखया होणा। 5 कने ओथु फिरी कदी रात नी होणी, कने शेहरे दे लोकां जो रस्ते च चलणे तांई दिथ्ये दी जरूरत नी होंगी कने ना ही सूरजे दिया लौई दी जरूरत थी, क्योंकि परमेश्वरे ही है जडा लोकां जो लौ दिन्दा है। जडे लोक ओथु रेंदे न उना हमेशा तांई राजयां सांई राज करणा। (aiōn g165) 6 तालू स्वर्गदूते मिंजो ला बोलया, “ऐ सारियां गल्लां जड़ियां तिजो दसियां न, सै सच्च न कने पुरे तरीके ला भरोसा करणे दे काबिल न। क्योंकि प्रभु परमेश्वरे जिनी संदेश देणेबालयां दे मना दा मार्गदर्शन करणे तांई अपणा आत्मा दितया था, सेई है जिनी मिंजो, जडा की उदा स्वर्गदूत है, तिजो ऐ दसणे तांई भेजया है जडा जल्दी ही होणा।” 7 “कने दिख, मै तौली ओणे बाला है; सै धन्य न जडे इसा कताबा च लिखियां भविष्यवाणियां जो मंदे न।” 8 मै सेई यूहन्ना

है जिनी इना सरियां गल्लां जो दिखया कने सुणया है। कने जालू मैं इना गल्लां जो सुणया कने दिखया, तां मैं स्वर्गदूते दी अराधना करणे ताई उदे पैरां च पेई गया। 9 पर उनी मिंजो ला बोलया, “इयां मत कर; क्योंकि मैं तेरा कने तेरे भाई जड़े परमेश्वरे दे संदेश देणेबाले न कने इसा कताबां दियां गल्लां जो मनणे बालयां सांई साथी सेबक है, सिर्फ परमेश्वरे दी ही अराधना कर।” 10 फिरी उनी मिंजो बोलया, इसा कताबां दिया भविष्यवाणियां दिया गल्लां जो लोकां ला मत लुका; क्योंकि इना चीजां दा पूरा होणे दा बकत नेडे आई गया है। 11 “जड़ा कोई भी बुरे कने गंदे कम्म करदा है, उना जो सै बुरे कने गंदे कम्म करदे रेणा चाईदा। कने तियां ही जड़े कोई अच्छे कने पबित्र कम्म करदे न, उना जो अच्छे कने पबित्र कम्म करदे रेणा चाईदा।” 12 तालू प्रभु योशुये बोलया, मैं तौली ही औणे बाला है; कने लोकां जड़े-जड़े कम्म कितया न, मैं उना जो उना दे कम्मा जो दिखीकरी इनाम कने सजा देंगी। 13 “मैं अलफा कने ओमेगा, पेहला कने आखरी, शुरूआत कने अंत है।” 14 धन्य न सै, जड़े अपने कपड़यां जो छेलुये दे खूने ला धोई लेंदे न मतलब की अपने पापां जो खत्म करी दिन्दे न, इस ताई उना जो शेहरे दे दरबाजयां अंदर कने जिन्दगी दे रखे दे फल खाणे दा हक है। 15 पर जड़े बुरे कम्म करदे न, जादू टोंणा, व्यभिचारी, खूनी, मूर्तिपूजक, कने हर इक झूठ जो पसंद करणे बाले कदी भी अंदर नी जाई सकदे न। 16 मैं, यीशुए अपने स्वर्गदूते जो तुहाडे बाल इना गल्लां दी घोषणा करणे ताई भेजया है जडियां परमेश्वरे दिया कलीसिया च होन। मैं राजा दाऊद दा बंशज है, कने मैं ही ब्यागा दे तारे सांई है। 17 कने परमेश्वरे दी आत्मा कने छेलुये दी लाडी योशुये ला बोलदे न, “तिजो पक्का ओणा चाईदा।” हर इक जड़ा ऐ सुणदा है, उसयो भी ऐ बोलणा चाईदा, “आ!” कने जड़ा कोई भी प्यासा है, सै ओए कने उस पाणिऐ जो पिया जड़ा जिन्दगी दिन्दा है, जड़ा की उना सारयां जो मुफ्त मिलदा है जड़े उसयो पिणा चांदे न। 18 मैं यूहन्ना है कने मैं तुसां सारयां जो ऐ चेताबनी दे दा है, जड़े इसा कताबा दिया भविष्यवाणियां जो सुणदे न, जडियां हुण होआ दियां न कने अग्रे होणे बालियां न, जडियां मैं इसा कताबा च लिखियां न; अगर कोई माणु इना गल्लां च कुछ भी बदांदा है, तां परमेश्वरे उदिया सजा जो भी बधाई देणा। उनी तुहांजो उना मुसीबतां ला मारणा, जडियां मैं इसा कताबा च लिखियाँ न। 19 अगर कोई ऐसा माणु है जड़ा इसा कताबा च भविष्यवाणिया दियां गल्लां चे कुछ हटाई दिन्दा है,

तां परमेश्वरे तुहांजो ला उना आशीषां जो लेई लेणा जड़ियां मै इसा कताबा च लिखियां न कने परमेश्वरे उस जिन्दगी दे स्ख ला फल खाणे कने पबित्र शेहरे च रेणे दा हक भी बापस लेई लेणा। 20 ऐ यीशु मसीह दे शब्द न जड़ा उना सारियां गल्लां दी गबाई दिन्दा है जड़ियां इसा कताबा च लिखियां न, सै बोलदा है “हां, मै तोल्ली ओणे बाला है।” मै युहन्ना जबाब दिता, “आमीन, हे प्रभु यीशु मसीह आ।” 21 मै प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होंदा रे। आमीन।



फिरी मै पबित्र नोऐ शहर यरूशलेमे जो भी दिखया, जडा स्वर्गे ला परमेख्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिसा जो कपडे पहनाई करी कने श्रृंगार कितया है जडी लाडे सोगी बियाह करणे तांई तैयार है। फिरी मै इक अबाज सुणी जडी परमेख्वरे दे सिंहासने ला जोरे ला बोली, “दिख, हुण परमेख्वरे लोकां बिच अपणा घर बणाणा।” उनी उना सोगी रेंणा, कने से उदे लोक होणे, उनी अपु उना जो अपने लोकां दे स्मे च अपनाणा कने उनी उना सोगी रेंणा कने उना भी उसयो परमेख्वरे दे स्मे च अपनाई लेंणा।

प्रकाशितवाक्य 21:2-3

Reader's Guide

भटियाली at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

भटियाली at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aīdios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bhattyali---Bhattyali-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियो 10:7
प्रकाशितवाक्य 9:1
प्रकाशितवाक्य 9:2
प्रकाशितवाक्य 9:11
प्रकाशितवाक्य 11:7
प्रकाशितवाक्य 17:8
प्रकाशितवाक्य 20:1
प्रकाशितवाक्य 20:3

aidios

रोमियो 1:20
यहूदा 1:6

aiōn

मती 12:32
मती 13:22
मती 13:39
मती 13:40
मती 13:49
मती 21:19
मती 24:3
मती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यहून्ना 4:14
यहून्ना 6:51
यहून्ना 6:58
यहून्ना 8:35
यहून्ना 8:51
यहून्ना 8:52
यहून्ना 9:32
यहून्ना 10:28
यहून्ना 11:26
यहून्ना 12:34
यहून्ना 13:8
यहून्ना 14:16

प्रेरितां दे कम्म 3:21
प्रेरितां दे कम्म 15:18
रोमियो 1:25
रोमियो 9:5
रोमियो 11:36
रोमियो 12:2
रोमियो 16:27
1 कुरिन्थियो 1:20
1 कुरिन्थियो 2:6
1 कुरिन्थियो 2:7
1 कुरिन्थियो 2:8
1 कुरिन्थियो 3:18
1 कुरिन्थियो 8:13
1 कुरिन्थियो 10:11
2 कुरिन्थियो 4:4
2 कुरिन्थियो 9:9
2 कुरिन्थियो 11:31
गलातियो 1:4
गलातियो 1:5
इफिसियो 1:21
इफिसियो 2:2
इफिसियो 2:7
इफिसियो 3:9
इफिसियो 3:11
इफिसियो 3:21
इफिसियो 6:12
फिलिप्पियो 4:20
कुलुस्सियो 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानिया 1:2
इब्रानिया 1:8
इब्रानिया 5:6
इब्रानिया 6:5
इब्रानिया 6:20
इब्रानिया 7:17
इब्रानिया 7:21
इब्रानिया 7:24
इब्रानिया 7:28
इब्रानिया 9:26
इब्रानिया 11:3
इब्रानिया 13:8
इब्रानिया 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यहून्ना 2:17
2 यहून्ना 1:2
यहूदा 1:13
यहूदा 1:25
प्रकाशितवाक्य 1:6
प्रकाशितवाक्य 1:18
प्रकाशितवाक्य 4:9
प्रकाशितवाक्य 4:10
प्रकाशितवाक्य 5:13
प्रकाशितवाक्य 7:12
प्रकाशितवाक्य 10:6
प्रकाशितवाक्य 11:15
प्रकाशितवाक्य 14:11
प्रकाशितवाक्य 15:7
प्रकाशितवाक्य 19:3
प्रकाशितवाक्य 20:10
प्रकाशितवाक्य 22:5

aiōnios

मती 18:8
मती 19:16
मती 19:29
मती 25:41
मती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यहून्ना 3:15
यहून्ना 3:16
यहून्ना 3:36
यहून्ना 4:14
यहून्ना 4:36
यहून्ना 5:24
यहून्ना 5:39
यहून्ना 6:27
यहून्ना 6:40
यहून्ना 6:47
यहून्ना 6:54
यहून्ना 6:68

यहन्ना 10:28
यहन्ना 12:25
यहन्ना 12:50
यहन्ना 17:2
यहन्ना 17:3
प्रेरितां दे कम्म 13:46
प्रेरितां दे कम्म 13:48
रोमियो 2:7
रोमियो 5:21
रोमियो 6:22
रोमियो 6:23
रोमियो 16:25
रोमियो 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानिया 5:9
इब्रानिया 6:2
इब्रानिया 9:12
इब्रानिया 9:14
इब्रानिया 9:15
इब्रानिया 13:20
1 पतरस 5:10
2 पतरस 1:11
1 यहन्ना 1:2
1 यहन्ना 2:25
1 यहन्ना 3:15
1 यहन्ना 5:11
1 यहन्ना 5:13
1 यहन्ना 5:20
यहदा 1:7
यहदा 1:21
प्रकाशितवाक्य 14:6

eleēsē

रोमियो 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लूका 12:5
याकूब 3:6

Hadēs

मत्ती 11:23
मत्ती 16:18
लूका 10:15
लूका 16:23
प्रेरितां दे कम्म 2:27
प्रेरितां दे कम्म 2:31
1 कुरिन्थियों 15:55
प्रकाशितवाक्य 1:18
प्रकाशितवाक्य 6:8
प्रकाशितवाक्य 20:13
प्रकाशितवाक्य 20:14

Limnē Pyr

प्रकाशितवाक्य 19:20
प्रकाशितवाक्य 20:10
प्रकाशितवाक्य 20:14
प्रकाशितवाक्य 20:15
प्रकाशितवाक्य 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō


2 पतरस 2:4

Questioned


None yet noted




भरोसे दिया बजा ला ही अब्राहम नाए दे माणुए जो परमेवरे इक ऐसी जगा च जाणे ताई सदया ज़िंसा जगा जो परमेव्वर बादे च उसयो विरास्त च देणेबाला था। कने सै ऐ नी जाणदा था की कुथयो चलया है,
पर फिर भी परमेव्वरे दा हुकम मन्नी करी सै उस देशे जो चली गया। - इब्रानिया 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



मैं ऐ इस ताई बोलदा है क्योंकि मैं, माण्डे दा पुत्र, इस संसारे च सारयां दी सेवा करणे ताई आया है, मैं इस ताई नी आया कि लोकां ला अपनी सेवा करा।
मैं तां लोकां जो पापां ला छुटकारा करणे ताई अपने प्राण कीमत च देणा आया है। - मरकुस 10:45



ऐ चिठ्ठी पौलुस दिया तरफा ला है, जड़ा प्रभु यीशु मसीह दा सेवक है, कने परमेवरे उसयो प्रेरित होणे ताई चुण्या है, कने परमेवरे दा शुभसमाचार दा प्रचार करणे ताई नियुक्त कितया है। - रोमियो 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophesies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Usher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis preaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we?		Genesis 1:26 - 2:3		Mankind is created in God's image, male and female He created us				
How are we sinful?		Romans 5:12-19		Sin entered the world through Adam and then death through sin				
Where are we?		When are we?						
Who are we?	God	Innocence		Fallen			Glory	
		Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
		John 10:30 God's perfect fellowship	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3	
	Mankind	John 8:58 Pre-incarnate		John 1:14 Incarnate	Luke 23:43 Paradise	God's perfectly restored fellowship with all Mankind praising Christ as Lord in the Holy City		
		Psalm 139:7 Everywhere		John 14:17 Living in believers				
		Ephesians 2:1-5 Serving the Savior or Satan on Earth						
		Genesis 1:1 No Creation No people	Genesis 1:31 No Fall No unholy Angels	Luke 16:22 Blessed in Paradise		Luke 16:23, Revelation 20:5,13 Punished in Hades until the final judgment		
				Hebrews 1:14 Serving mankind at God's command				
				2 Peter 2:4, Jude 6 Imprisoned in Tartarus		Revelation 20:13 Thalaasa		
	Angels			1 Peter 5:8, Revelation 12:10 Rebelling against Christ Accusing mankind		Revelation 19:20 Lake of Fire	Lake of Fire prepared for the Devil and his Angels	
						Revelation 20:2 Abyss		
Why are we?				Romans 11:25-36, Ephesian 2:7		For God has bound all over to disobedience in order to show mercy to all		

Destiny

भटियाली at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you*," John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



इस ताई त्सं जाई करी सारियां जातियां दे लोकां जो चेले बणा; कने उना जो पिता, पुत्र, कने पबित्र आत्मा दे नाए ने बपतिस्मा दीया। - मती 28:19